






ეპროპეი შედეგის საქართველო

1823-1923

ეპროპეი შედეგის საქართველო





ევროპელი
ქართველი
სამართლებრივი

1823

ევროპელი ქალების საქართველო GEORGIA OF EUROPEAN WOMEN 1823-1923

პროექტის ავტორი და სამეცნიერო რედაქტორი:
ლელა გაფრინდაშვილი

პროექტი „ევროპელი ქალების საქართველო 1823-1923“
განახორციელა კავშირმა „ქალების ინიციატივა თანასწორობისათვის“
ფრიდრიხ ებერტის ფონდის მხარდაჭერით.
კუბლიკასიაში წარმოდგენილია ავტორთა პირადი მოსაზრებები.
დაუშვავალია ფრიდრიხ ებერტის ფონდის მიერ გამოცემული მასალების
კომერციული მიზნით გამოყენება ფონდის თანხმობის გარეშე.

© ქალების ინიციატივა თანასწორობისათვის (WIE)

მთარგმნელები: ლელა ფიროსმანიშვილი, ნინო მიქაშაშვიძე,
ელენე მარგველაშვილი, თამარ ონოფრინკო,
ლია ვითეკი, ლელა დუბაძე, ნიკა გელოვანი

რედაქტორები:
ელზა ნაბახტაშვილი, ნინო ბეჟიშვილი
მხატვარი: ლუიზა ლაფერაძე
ყდის დიზაინი: გიია არაბული
დამკვეთი: გიგა ცომაიძე


დამამუშავებელი შპს „სეზანე“
CEZANNE
PRINTING HOUSE

თბილისი 2021
ISBN 978-9941-8-2887-4



**FRIEDRICH
EBERT
STIFTUNG**

ლელა
გაფრინდაშვილი
ნომადიზმი:
კულტურული და პოლიტიკური
განხორციელება



7

ფრედერიკა
ფონ ფრაიბანი
ნარილები
კავკასიიდან და
საქართველოდან



49

ანგელა შთაიდელე
ჟენთლმენი ჯეკი:
ენ ლისტერის
ბიოგრაფია



83

ანა დრანსე
შამილის ტყვე
ფრანგი ქალის
მოგონებები



137

კარლა სერენა
მოგზაურობა კავკასიაში:
შავი ზღვიდან კასპიის
ზღვამდე: 1875-1881



177

ბერტა ფონ ზუტენერი
მოგონებები



265

მარტორი უორდროკი
ჯონ ოლივარ უორდროკი
ნინდა ნინოს
ცხოვრება



339

ოდუბ კენი
ოქროს საწმისის
ქვეყანაში



409

წინასიტყვაობა

მოგზაური ქალების სამყარო ქალთა კულტურის ერთ-ერთი ნაწილია, მისი ყველაზე მრავალფეროვანი და მოულოდნელი შენაკადია. იგი გვიჩვენებს, თუ როგორ დაუსხლტნენ ქალები შინაურ ყოფას და როგორ დაეწაფნენ ახალი ცოდნის, გამოცდილების, ინფორმაციის, თავგადასავლის, სიყვარულის და შემოქმედების სივრცეებს.

XIX-XX საუკუნეებში, რუსეთის იმპერიასა და საქართველოს დემოკრატიულ რესპუბლიკაში დასავლური ცივილიზაციის წარმომადგენელთა სტუმრობას პოლიტიკური მნიშვნელობაც ჰქონდა. ისინი ამჩნევდნენ, აღწერდნენ და თანამემამულეებს უზიარებდნენ ქართული და დასავლური კულტურების შეხვედრისა და განსხვავების წერტილებს, მონათესავე და განხეთქილების ველებს, რუსული თვითმპყრობელობის ასიმილაციური პოლიტიკის ვერაგულ ბუნებას.

ევროპელმა ქალებმა, როგორც ინტელექტუალურმა პილიგრიმებმა, გაიტანეს ქართული კულტურა თავიანთ ქვეყნებში და ბიძგი მისცეს ქართველი ქალების სულიერი და გონებრივი ემანსიპაციის მიზანსწრაფვას.

ჩვენი ქვეყნის სტუმართა ნააზრევი უნიკალური წყაროა საქართველოს ეკონომიკური, სოციალური, პოლიტიკური, ყოფითი, ადამწესობრივი, ეკოლოგიური თავისებურებების შესაფასებლად. მათგან პირველის, ფრედერიკა ფრაიგანგის „წერილები კავკასიიდან და საქართველოდან“ 1823 წელს გამოიცა. ასი წლის შემდეგ კი, პარიზში დაიბეჭდა ოდეტ კენის წიგნი „ოქროს საწმისის ქვეყანაში – მენშევიკურ, დამოუკიდებელ საქართველოში“.

უცხო თვალით დანახული, ქართული სინამდვილის ამსახველი ტექსტები არაჩვეულებრივად სასარგებლო იქნება ყველასთვის, ვინც ქალების კულტურას, ისტორიას იკვლევს, ვისაც საკითხების და პრობლემების ინტერდისციპლინური პერსპექტივა აინტერესებს და არ არის შემზღუდული ვიწრო და მშრალი ისტორიოგრაფიით.

ეს ტექსტები უნიკალურ მასალას გვაწვდის გენდერის კვლევის კურიკულუმისთვის, რომელიც ძალიან ღარიბია ქართული ან ქართულად თარგმნილი მნიშვნელოვანი კვლევებით და წიგნებით.

„ევროპელი ქალების საქართველო – 1823-1923“ გაგაცნობთ ფრედერიკა ფონ ფრაიგანგის, ენ ლისტერის, ანა დრანსეს, კარლა სერენას, ბერტა ფონ ზუტნერის, მარჯორი და ოლივერ უორდროპების, ოდეტ კენის თვალით დანახულ საქართველოს და,

ამავე დროს, შთაგავონებთ შეადაროთ მათი ხედვა თანამედროვე მოაზროვნეთა, მოგზაურთა, მკვლევართა, პოლიტიკოსთა ინტერესებსა და თვალსაზრისებს.

პროექტის წარმატება განაპირობა მთარგმნელთა, რედაქტორთა, დიზაინერისა და ილუსტრატორის მუყაითმა შრომამ და მონდომებამ. დიდი მადლობა თითოეულ მათგანს ამ ძალისხმევისათვის.

განსაკუთრებული მადლობა მინდა ვუთხრა გერმანიის ფედერაციული რესპუბლიკის ფრიდრიხ ებერტის ფონდის (FES) წარმომადგენლობას საქართველოში და მის დირექტორს, ქალბატონ ია თიკანაძეს, პროექტის მხარდაჭერისათვის.

ლელა გაფრინდაშვილი

კავშირის „ქალების ინიციატივა თანასწორობისათვის“ თავმჯდომარე
ივანე ჯავახიშვილის სახელობის, თბილისის სახელმწიფო
უნივერსიტეტის პროფესორი



მედეა

როკუს პოცის გრავიურა, XVIII საუკუნე,
დიდომაჟე ბიზანტიელის მიხედვით

ნომადიზმი: კულტურული და პოლიტიკური განზომილება

ქალები და პატრიარქალური წესრიგი

ბოლო ორი საუკუნეა, სწავლულებს ცნებაში – „კულტურა“ სულ უფრო მეტი გარკვეულობა შეაქვთ: აღმოაჩენენ და ადგენენ მის ესთეტიკურ, ანთროპოლოგიურ და სოციალურ განზომილებებს. ისინი აღიარებენ, რომ ცოდნა და კულტურა ძალაუფლების ფორმებია და არ არის ნეიტრალური სქესის, ასაკის, რასის, ეთნიკური, რელიგიური და გენდერული იდენტობების მიმართ. ამროვნება, ცნობიერებისა და შეცნობის თავისებურებები დამოკიდებულია იმაზე, თუ რამდენად შეუძლია ადამიანს გადაადგილდეს, სამოძრაოს და გადასცეს საკუთარი იდეები, მიზნები, ეჭვები, პოზიციები, რამდენად აქვს უფლება, წინ აღუდგეს ამ პროცესში წარმოქმნილ დაბრკოლებებს.

ადგილმონაცვლე ადამიანი, ნომადი, გადის შემოსაზღვრული, ზღვარდადებული ამროვნებიდან, რაც შემეცნების თეორიული და მეთოდოლოგიური თავისუფლების საწინდარია. ეს ფიზიკური, სულიერი და ინტელექტუალური დეტერიტორიზაციის პროცესია. მასში ჩართული ადამიანი ფიქრობს, წერს და ლაპარაკობს რაციონალურის და ირაციონალურის, გონებისა და გრძნობის, საკუთარისა და უცხოს გადაკვეთაზე, ეძებს და მონიშნავს ახალ ჰორიზონტებს და არღვევს ცოდნის კანონიზაციის ტრადიციულ კალაპოტს.

ცხადია, ადგილმონაცვლეობა კაცობრიობის გარიჟრაჟზე და თანამედროვე, გლობალიზებულ სამყაროში რადიკალურად განსხვავდება ერთმანეთისგან. XIX საუკუნემდე ქალებს უკიდურესად შეზღუდული ჰქონდათ სამოქმედო არეალი – საჯარო, სამოქალაქო, პოლიტიკური სივრცე დახშული იყო მათთვის. ეს შეზღუდვა მოქმედებდა, სანამ ქალების შრომაზე არ გაჩნდა მოთხოვნილება „გარეთ“, ურბანისტურ და ინდუსტრიულ სამყაროში. მანამდე კი თუნდაც განათლებული, წარჩინებული ქალების შრომა და ნააზრევი მკვდრადშობილი ან დავიწყებისთვის განწირული იყო.

ქალების ასპარეზის დეტერმინაცია იკითხება მითებშიც, რომელთა გმირების თავგადასავალი ყველაზე ძველი დასტურია იმისა, თუ როგორ წარმოშობს, იმორჩილებს, როგორ განაიარაღებს კულტურა ადამიანებს, როგორ ავიწროებს ან ათავისუფლებს მათ, როგორ განარჩევს ვაჟებს და გოგონებს, დაბადებისთანავე ახ-

ვედრებს რა ფიზიკური და სულიერი პერფორმანსის განსხვავებულ სივრცეს. ერთი მათგანი ცოდნის მფლობელი, მომპოვებელი და გამზიარებელი, კანონმდებელი, შემოქმედი, მეომარი, მოსამართლე და მსაჯულია, მოაზროვნე და მოლაპარაკეა, ხოლო მეორე – პირველის სიცოცხლის მიმნიჭებელი, მისი ცოდნის მსმენელი, გადამწერი და შემნახველი. ქალი მიჯაჭვულია საკუთარ კერას, აცილებს, ელოდება და ეგებება სალაშქროდ, საღალაობოდ ან სააზროვნოდ წასულ მამას, მეუღლეს ან ვაჟს, ბრუნავს მათი გზის, მოძრაობის უდრტვინველობაზე.

როგორ უკავშირდება **კასანდრას** სახე ნომადიზმის იდეას? მისან ქალს ფეხდა-ფეხ დასდევს მამაკაცური წესრიგი: სასიყვარულო სარეცელზე უარის გამო წყევლის აპოლონი, შეშლილად და მატყუარად ნათლავენ თანამემამულეები, ვისაც იგი ტროას განადგურებას უწინასწარმეტყველებს. ურჩი ქალიშვილი მამამ, ტროას ომის (ძვ. წ. XIII-XII საუკუნეები) შემდეგ, ევრიფილუსზე გაათხოვა, აიაქსმა გააუპატიურა, ხოლო ეგისტემ მას და მის ვაჟებს სიცოცხლე მოუსწრაფა. ქალის ეს უძველესი სახე დღეს უკვე ჰეგემონური პატრიარქატის კრიტიკისაკენ გვიბიძგებს, რათა დავძრათ და ავამოძრაოთ ჩვენი კაპიტულანტური აზროვნება და გადავლახოთ სივრცული და ინტელექტუალური, რეალური და ვირტუალური საზღვრები.

ფინიკიელი **ევროპა** ზევსის რჩეულია. უზენაესის ძალითა და ძალმომრეობით, თეთრ ხარზე ამხედრებულმა „ღმერთთა და კაცთა მამამ“ იგი საკუთარ ფესვებს მოსწყვიტა და კრეტაზე გაიტაცა.

აღმოსავლეთიდან დასავლეთში მიგრირებული ქალი-ევროპა თითქოს ჩაეწე-რა გეოპოლიტიკურ მამა-ევროპის კანონში: სისხლიანი დაპირისპირებების, იმპერიული და კოლონიური ომების ისტორიაში. თითქოს ქალი-ევროპის ნებაზე არცაა დამოკიდებული მისი ისტორია, თითქოს საკუთარი თავგადასავლის მდუმარე დამკვირვებელი, დამტირებელი ან დამადასტურებელია.

ზევსის ქალიშვილი, **პერსეფონე** – თვალწარმტაცი მინდვრების, ყვავილნარების ტრფიალი, მიცვალებულთა სულების მბრძანებელმა ჰადესმა მოიტაცა. სასოწარკვეთილი ქალწული ამაოდ უხმობდა ცათა მბრძანებელ მამას დასახმარებლად. ქმარმა მას ქორწინების დაურღვევლობის გარანტია, ბროწეულის მარცვალი გადააყლაპა და თავისად დაიგულა. აქედან მოყოლებული, პერსეფონეს მამისეულ კერაზე ყოფნა ბუნების აყვავების საწინდარია, ხოლო ქმართან დაბრუნება – ბუნების ჭკნობასა და კვდომას იწვევს.

ბერძნულ და რომაულ მითოლოგიაში, ანტიკური ხანის ხელოვნებაში პერსეფონე ნაყოფიერების ღვთაებაა, მიცვალებულთა სულების და მიწისქვეშა ურჩხულების მბრძანებელი. ქვესკნელის ტახტზე მჯდომი, იგი სულების საჩივრებს ისმენს და ქმრის განაჩენს აღასრულებს.

პერსეფონეს ძალმოსილება ჭიბლარითაა მიბმული მამისა და ქმრის ძლიერებაზე და მათთან კავშირით საზრდოობს. მის ცხოვრებაში არაფერია ისეთი, რასაც

დამოუკიდებელი, იმანენტური მნიშვნელობა და საზრისი აქვს, რადგან იგი უპირველესად ზევსის ქალიშვილი და ჰადესის ცოლია, ისინი ახდენენ პერსეფონეს ქცევისა და გავლენის ინიციაციას.

ანტიგონე პატრიარქალურ წესრიგში მოძრაობს. იგი თან ახლავს თებედან განდევნილ, დაბრმავებულ მამას. თებეში დაბრუნებულს კი ახალი განსაცდელი ელოდება: დაღუპული ძმები, რომელთაგან ერთ-ერთი, პოლინიკე დაუმარხავი უნდა დარჩენილიყო, როგორც მშობლიური ქალაქის მოღალატე. ასეთი იყო კრეონტის ვერდიქტი.

მეფის გადაწყვეტილებას აუმხედრდა ანტიგონე: ყოველი ბერძენისთვის წმინდა ადათის, დაწერილ კანონზე მაღლა მდგომი, დაუწერელი კანონის ძალით მან თავად მიაბარა მიწას საყვარელი ძმა. ამ საქციელისთვის იგი აკლდამაში ცოცხლად უნდა დაემარხათ. საბოლოოდ ეს ვერდიქტი კრეონტმა კი შეცვალა, მაგრამ დააგვიანდა: ანტიგონემ თავი ჩამოიხრჩო. მისმა სატრფომ, ჰენონმა კი მეფის/მამის თვალწინ დალია სული.

„ჩვენ ამქვეყნად სუსტ ქალებად ვიშვით და ჩვენი ხვედრი მორჩილებაა. ღმერთებს პატივს ვცემ, მაგრამ სახელმწიფოს წინააღმდეგ წასვლა არ შემიძლია“ – უთხრა ისმენემ ანტიგონეს და ამით საკუთარი და საერო კანონებს განმგმირავ მახვილს შეატოვა. აქ თითქოს ერთმანეთს უპირისპირდება კანონმორჩილი და სამართლიანი, შეშინებული და გაბედული ქალი. მაგრამ ადათთა სააღაპოზე სიცოცხლის მიმტანი ანტიგონე ნუთუ მსხვერპლი არ არის?! მისი სიყვარული ხომ აღაპა, თვითგანადგურების მომთხოვნი სიყვარული?!

შეგვიძლია თუ არა ვივარაუდოთ, რომ იმდროინდელ საბერძნეთში იყვნენ ძმები და მამები, რომლებიც იმავეს ჩაიდენდნენ საკუთარი დებისა და ქალიშვილებისთვის? რას მოგვითხრობენ მათზე ესქილე, სოფოკლე, ევრიპიდე ან უფრო გვიანდელი ტრაგიკოსები? სამწუხაროდ, არაფერს, რადგან არსებობს დაძმური და მამაშვილური თავგანწირვა, სადაც დის ძმისთვის და ქალიშვილის მამისთვის თავდადება პატრიარქატის კანონია, მაგრამ პირუკუ ვერსიაზე ჩვენი გონება არ თანხმდება, ჩვენი კალამი არ წერს და ჩვენი სიტყვა არ ისმის. კასანდრას, ევროპას, პერსეფონესა და ანტიგონეს ბედში საერთოა მათი ნების, სურვილისა და სიცოცხლის წინასწარმეტყველება, წინასწარ ცოდნა იმისა, თუ რა მოხდება, როცა ქალების სამშობლოს და მამაკაცებს საფრთხე დაემუქრებათ? სწორედ ამას მოგვითხრობენ მითებიც, მითოლოგიურ გმირთა თავგადასავლების გამლექსავებიც და მეიგავენიც.

რუტინული, ლიმიტირებული, შემოსაზღვრული სივრციდან ქალები მაინც გადიან, მაგრამ ამ „გასვლას“ ისევ მათი „მამაკაცები“ აკონტროლებენ. სახლს მიღმა მოძრავი ქალი ინტუიციით და ემოციებით მოქმედებს, რადგან ცოდნა და გონება მისი სამკალი არ არის.

ასეთ გინოფობიურ წესრიგს დაუპირისპირდა XIV საუკუნის მწერალი ქალი,

ქრისტინ პიზელი თავისი რომანით „წიგნი ქალების ქალაქის შესახებ“. ავტორმა ააშენა სიმბოლური ქალაქი, სადაც ქალები დაფასებულები და დაცულები არიან. იგი ესაუბრებოდა, თავისკენ უხმობდა არა მხოლოდ სამეფო კარის ქალბატონებს, არამედ ვაჭარ, მოსამსახურე, გლეხ, გუვერნანტ, ქვრივ და მეძავ ქალებსაც კი. სამი ალეგორიული ფიგურის: გონების, სამართლის და სათნოების (Reason, Justice and Rectitude) ერთმანეთთან დაკავშირებით გამოიცდება ქალებში სამართლიანობა, სათნოება და საკუთარი იდენტობის წახალისება. ტექსტი წარმოგვიდგენს მხოლოდ ქალურ ხმებს, მაგალითებს და შეხედულებებს.

მთავარი პერსონაჟი, **ქალბატონი გონება** აცხადებს, რომ ქალების შესახებ სტერეოტიპები სიცოცხლისუნარიანია, რადგან ქალები არ მონაწილეობენ საუბარში/დებატში/მსჯელობაში მაშინ, როცა დამაჯერებელი მეტყველებითა და ქცევით გამოირჩევიან ყოველდღიურობაში. ამიტომ ქალებმა უნდა აღიარონ და გამოაჩინონ/ფართოდ გაასაჯაროონ საკუთარი შესაძლებლობები ადამიანებს შორის მშვიდობის დამყარებისას.

ქრისტინი ხედავს, თუ რამდენად მაგნებელი და დამაკნინებელია სამეფო კარის და საზოგადოების ინტრიგებში ქალების მონაწილეობა, რამდენად ვნებს ეს მათ ღირსებას და ქალების ერთმანეთთან დაკავშირებას, სოლიდარულ ერთობას... „დისკუსიის უნარი ყოველი ქალის მორალური რეპერტუარის ნაწილი უნდა იყოს!“ მისი აზრით, ქალის გავლენა გაიზრდება, როცა მის ენაში/საუბარში/აზრში შეთანხმებული იქნება უმანკოება, სიკეთე და თავშეკავება. ყველა უთანხმოებას და თვითპრეზენტაციის სირთულეს ქალი ადვილად გაუმკლავდება, თუ რიტორიკის ძალას მოიშველიებს.¹

კაცობრიობის სიჭაბუკეში არსებულ გინოფობიას იმდროინდელი ადამიანის გარე სამყაროსთან დამოკიდებულება ასაზრდოებდა – დაპყრობისა და დამორჩილების ვნება. ხმლისა და ძალმომრეობის პერიოდი ნელ-ნელა დაჯაბნა შესწავლის, გაცნობის, აღმოჩენის, ამოხსნის ინტერესმა, რომელიც საკუთარი და სხვების კულტურათა, იდეათა ცნობისწადილით საზრდოობდა. ამ გარდატეხათა შუაგულში ისევ მამაკაცები ტრიალებდნენ, რადგან ქალებმა ჯერ ვერ შეაღწიეს გონების სავანეში. რელიგიურმა, საქველმოქმედო სწავლებებმა და ინსტიტუტებმა დაიახლოვეს, მიიღეს ქალები, ამ მოძრაობებისთვის აუცილებელი ერთგულებისა და თავგანწირვის გამო, რამაც მნიშვნელოვნად გაზარდა გონებაზე, ცოდნაზე, კულტურაზე მათი წვდომა. თუმცა, თანასწორობის ქრისტიანული იდეა ვრცელდება უფრო სულიერ ცხოვრებაზე და არა – საეროზე.

სულიერი ლიდერების მოწაფეები და ნამოწაფარი ქალები/დედები, მოწყალების/თანაღმობის კერებთან ერთად, ცოდნისა და განათლების სურვილსაც აღვივებდნენ ეკლესია-მონასტრების წიაღში. აქვე იბადებოდა ან საფუძველი ეყრებოდა

1. Christine de Pisan, Le Livre de la Cite des Dames, 1405.

თეოლოგიური ტექსტების არა უბრალოდ გადამწერა და მკითხველთა, არამედ ინტერპრეტატორთა და შემდეგ უკვე – კრიტიკოსთა ნააზრევსაც.

სავარაუდოდ, სწორედ პილიგრიმი, მისიონერი და საგალობლების შემსრულებელი ქალები გარდაისახნენ მოგზაურ, მომთაბარე სახალხო მთქმელებად, აშულებად, რომელთა ტექსტები ხალხურ ზეპირსიტყვიერებაში უხვად მოიპოვება, მაგრამ სახელები უკვალოდ გაქრა. ამ თვალსაზრისით ძალიან საინტერესოა XII-XIII საუკუნეების საფრანგეთში მცხოვრები ტრობაირიცები (troubairitz), ქალი ტრუბადურები, რომლებიც არღვევენ ქალური სივრცის საზღვრებს და თავისუფლად შე/მოქმედებენ, ხდებიან სიყვარულის სუბიექტები და არა მხოლოდ – ობიექტები. მათში გამორჩეულები: აზალე დე პორტერაგი, ნა (ა) კასტელოზა, გერსენდა დე ფორკალკი, კომტესა დე დია, ნა გორმონდა დე მონპელიე – გრძნობების, სიყვარულის, ცოცხალი და ვნებიანი თავდავიწყების მოძღვრელები არიან. ასეთივე აშული ქალები, Minnesänger-ები იყვნენ გერმანიაშიც.

საქართველოში აშული მამაკაცების, მენესტრელების გარდა, იყვნენ **ქალი აშუ-ლებიც**. ქამრიანი სონა, სატრფოს ჭირისუფალი და დამწუხრებული ყარიბი, საკუთარ ბედს დამღეროდა და ფოთიდან თბილისში და თბილისიდან ფოთში მოძრაობდა. ნინო ორბელიანი, სიყვარულის მარადი მაძებარი და დამკარგავი, ვნებისა და მუზის გამნიავებელი, სამიკიტნოების ხშირი სტუმარი და საღალბო-სატრფიალო მუხამბაზების მოყვარული იყო. ვინ იცის, რამდენი დაირა გაცვდა და რამდენი მოცეკვავე სხეული დაიქანცა ნინოს სახლში გამართულ ბოჭემურ თავყრილობებზე?!

კულტურის მოხელეთებს ემსახურებოდა ქალების ლიტერატურული, არტისტული სალონები, რომლებიც „ერის მამებს“ საკუთარ სივრცეში შემოიტყუებდნენ. პატივის, თვალისა და ყურის სიამეთა, ხორციელ და სულიერ ვნებათა სავანეში მონებივრე „ცოდნის მპყრობელები“ ამ ადგილებს ეჩვეოდნენ, ეჯაჭვებოდნენ და ხშირად თავიანთი ნაშრომები და შემოქმედება პირველად აქ გამოჰქონდათ თანამოაზრეთა და კრიტიკოსთა სამსჯავროზე. ასე მუშაობდა გონებასთან ზიარების ქალური სტრატეგია, რომლის წყალობითაც ქალები ესწრებოდნენ და ეზიარებოდნენ სწავლულთა და შემოქმედთა ნააზრევს, იდეების გაცვლასა და გადასინჯვას. ისინი თავად ამ პროცესში არ ერთვებოდნენ, იყვნენ განაპირა და არა – ცენტრალური სუბიექტები, მაგრამ ერთმანეთში ხანგრძლივად, გულდასმით და რუდუნებით განიხილავდნენ და განსჯიდნენ იმ თემებს, რომელთა დაბადებას, გამომზეურებას, სამსჯავროზე გამოტანას შეესწრნენ. ასე იზადებოდა პირველი ფრთხილი, მაგრამ გულწრფელი და განსხვავებული ტექსტები – რაყიფი ან მიჯნური ქალების პოეზია და პროზა, არანაკლებ საინტერესო სასიყვარულო და საარშოიო წერილები, ფუნაგორიები, ეპიგრამები. ქალების პირველი პოეტური სტრიქონები, ბუნების წიაღში ყარიბთა დარი ხეტიალი და ციურ მნათობთა მესაიდუმლოება სწორედ იმის მაჩვენებელია, რომ ისინი „საზღვრებს“ არღვევენ და თავისუფლდებიან. ცხადია, ქალების ეს ნააზრევი უმრავლეს შემთხვევაში დაკარგული, დავიწყებული ან შეუსწავლელია.

როცა ქალები კულტურის კვლავმწარმოებლებიდან (procreate) მის შემოქმედებად (create) გარდაისახნენ, როცა წერა და ლაპარაკი დაიწყეს, თავდაპირველად მაინც საკუთარ ყოფაში, ენაში ჩაიძირნენ. ისინი აღიქვამდნენ, აგროვებდნენ, ითვისებდნენ, გადაამუშავებდნენ, გადასცემდნენ ცოდნას საკუთარი „სხვების“ ფარგლებში ან მხოლოდ საკუთარ თავს ესაუბრებოდნენ. მაგრამ პოეტი და მწერალი მაინც გადის მშობლიური ენის საზღვრებიდან, წარმოქმნის ან წარმოშობს ახალ ენას, სიტყვების და ამრების პოლიფონიურ, პოლისაზრისულ მიმდევრობას.

ამ ეტაპზე უკვე ირღვევა ფალოცენტრული კულტურა, რომელიც ფოკუსირებულია მამაკაცური საწყისის, ტრადიციისა და ამროვნების ლოგიკაზე. იწყება გრძნობების, ემოციების, ირაციონალური და „მამის“ წესრიგის მიღმური წერა და ლაპარაკი.

მედია, ქეთევანი და თამარი ევროპაში

ევროპელების საქართველოსადმი ინტერესი ჯერ კიდევ ქრისტეშობამდე წარმოიშვა. მას საფუძველი ჩაუყარა პლუტარქეს, ციცერონის, ქსენოფონტეს, ჰომეროსის, აპოლონიოს როდოსელის და სხვათა ცნობებმა ქართველი ტომების შესახებ. VII-XIII საუკუნეებში კი ბერძნულ, რომაულ და არაბულ წყაროებს დაემატა სხვადასხვა ქვეყნის ელჩების, მისიონერთა და მოგზაურთა, ევროპული საგმირო ეპოსისა და სარაინდო რომანების ცნობები კავკასიელ ხალხებზე.

„...აღმოსავლეთის მშებედ გაბრწყინებული კულტურა უფრო მშვენიერდებოდა დასავლეთის ამროვნებასთან დაახლოვებით. ევროპა გვიცნობდა და ჩვენ მას ვუყვარდით. ჯერ კიდევ მე-13 საუკუნეში რომი გვიგზავნიდა მისიონერებს. მე-15 საუკუნეში ჩვენ უახლოვდებით საფრანგეთს – საბა სულხან ორბელიანი ელჩად მიდის ლიუდოვიკო მე-14-სთან და თავის იგავ-არაკებში თითქოს ლაფონტენის გავლენითაც გაიმსჭვალა. კრებიონი თავის ტრაგედიის რადემისტის დედა ამრს სესხულობს ჩვენი ისტორიიდან...“²

ასე ახასიათებს ელისაბედ ორბელიანი ქართულ-ევროპულ დაახლოებას, საუბრობს სულხან საბას და ლაფონტენის ნაამრეზზე და პროსპერ ჟოლიო დე კრებიონის ტრაგედიაზე „რადამისტი და მენობია“, სადაც აღწერილია ეპიზოდები ფარსმან პირველის ცხოვრებიდან.

მარჯორი უორდროპიც ხაზს უსვამს ქართული და დასავლური კულტურების სიახლოვეს:

2. ჟურნალი „თეატრი და ცხოვრება“, 1918, №6, გვ. 4. ეს არის ფრაგმენტი სიტყვიდან, რომელიც ელისაბედ ორბელიანმა 1918 წელს, თბილისის უნივერსიტეტის დაფუძნების დღეს წარმოთქვა.

„...საქართველო ნამდვილად დიდი ყურადღების ღირსია... კავკასიის ქრისტიანულმა სამეფომ, ბუნების მიერ განსაკუთრებული ნიჭით უხვად დაჯილდოებულმა, შეითვისა აღმოსავლური და დასავლური კულტურა და ჯერ კიდევ ადრეულ წლებში მიაღწია სრულყოფილებას განათლებაში, მიუხედავად ომებისა და ძნელებდობისა, ლიტერატურის შექმრა ცოცხლად შეინარჩუნა.“³

მარჯორის აზრით, განდევნილი შუა საუკუნეებს განასახიერებდა, ხოლო გლეხის ქალი – აღორძინების ეპოქას. მისთვის „განდევნილის“ ავტორი განა კლეოპატრას, სემირამიდას, ძველი ბუდისტური ლეგენდების ან ფრანგული რომანების მაცდურ ლამაზმანს გვიხატავს, არამედ – საკაცობრიო სიხარულისა და სიყვარულის ერთგულ არსებას. ილიას პერსონაჟი ძალდაუტანებლად უპირისპირდება განდგომას, აფხიზლებს მოჰყავს მასპინძლის მთვლემარე გონებას და აღვიძებს მასში ცვლილებისა და განახლების წადილს.

ილია ჭავჭავაძის პოემის მთარგმნელს სურდა ინგლისელი მკითხველი ქართველების ცოდნის, გონების და დასავლურ ცივილიზაციისაკენ სწრაფვაში დაერწმუნებინა. სწორედ ამ მისწრაფებას წამოწევს წინ ოლივერ უორდროპიც „ვეფხისტყაოსანზე“ საუბრისას:

„...ასეთი წიგნი განძად უნდა ჩაითვალოს მთელი კაცობრიობისათვის, განსაკუთრებით კი ისეთი ერებისათვის, რომლებიც მსგავსად ქართველთა, ბერძნების და ქრისტიანობის იდეალების გავლენას განიცდიდნენ. ამ შემთხვევაში ჩვენ საქმე გვაქვს არა უცხო ენის ფსიქოლოგიასთან, არამედ თვით ხალხისავე სულიერ ცხოვრებასთან, რომელიც, მართალია, მეზობელი აზიის გონებრივი მოძრაობის გავლენას განიცდიდა, მაინც მთელი ათასი წლის ბრძოლის განმავლობაში ცხადად ამტკიცებდა, რომ მისი ბუნებრივი მისწრაფება მიმართული იყო ევროპისაკენ, გამუდმებით მისთვის მიეპყრო თვალნი...“⁴

დასავლურ ლიტერატურაში მრავლადაა ქართული ისტორიული გმირებისა და კულტურული ფენომენების ასახვის მაგალითები. შუა საუკუნეების მოაზროვნე, სნორი სტურლუსონი⁵ თავს უყრის უძველეს მითებს, ლეგენდებს, თქმულებებს, რომელთაგან ზოგიერთი აუცილებლად მოგვაგონებს ამირანისა და პრომეთეს თავგადასავალს. საფიქრებელია, რომ ეს ნაწარმოები ერთ-ერთი

3. ეს არის ფრაგმენტი წინასიტყვაობიდან, რომელიც მარჯორიმ თავისსავე თარგმნილ „განდევნილს“ დაურთო, *The Hermit, A Legend by Prince Ilia Chavchavadze, Translated from the Georgian by Marjory Wardrop, Bernard Quaritch, 15 Piccadilly, London, 1895*, გვ. 7.

4. ეს არის ფრაგმენტი მარჯორის მიერ ინგლისურად თარგმნილი „ვეფხისტყაოსნის“ წინასიტყვაობიდან. *The Man in the Panther's Skin. A Romantic Epic by Shota Rustaveli. A close rendering from the Georgian attempted by Marjory Scott Wardrop. London, 1912.*

5. Snorri Sturluson, 1179-1241, ისლანდიელი ისტორიკოსი, პოეტი და პოლიტიკოსი. აქ საუბარია მის ნაწარმოებზე „Prose Edda“/ „უმცროსი ედა“.

წყაროა იმ მკვლევართათვის, რომლებიც პრომეთეს მითის კავკასიურ წარმომავლობაზე საუბრობენ.

ვარაუდობენ, რომ XIII საუკუნის ისლანდიურ თქმულებებშიც „ინგვარ საგა“, სადაც საუბარია აღმოსავლეთის ქრისტიან დედოფალზე, სწორედ თამარ მეფე იგულისხმება.⁶ ცნობილია ასევე ნორვეგიელი მწერლის, კნუტ ჰამსუნის პიესა „დედოფალი თამარი“, „ვეფხისტყაოსნის“ არტურ ლაისტისეული (1889) და მარჯორისეული თარგმანები (1912).

მარჯორი უორდროპი თავის წერილში „ტრანსკავკასიური ხალხური თქმულებები პრომეთეს შესახებ“ საუბრობს ამირანზე, როგორც ქართველ პრომეთეზე. მისთვის ცნობილია ბესარიონ ნიჟარაძის მიერ სვანეთში ჩაწერილი მითი მონადირე დარჯელანის და ნადირობის ქალღმერთ დალის ვაჟზე.⁷ დღემდე ცოცხალია სვანური ფერხული „დალა კოჯარს ხელღვაჟალე“ და მრავალი სახეცვლილი თქმულება კლდეთა ბინადარ ლამაზმანზე.

„დიდება სვანეთის ღმერთებს!
ნათელი ადგას თქვენს საბრძანებელს!
დიდება შენდა, ნადირთ მფარველო,
შენ გემორჩილება ზვავი და გრიგალი.
კარგი მონადირის მარჯვენა ხელი ხარ,
ცუდი მონადირის მტერი და დამსჯელი.
საჯიხვეებში ჯიხვი გყავს მრავალი,
საშურთხეებში – შურთხის ქარავანი.
დიდება შენ, დალ ბედნიერო!“⁸

სვანური გივერგილის ისტორიაც გატრილი ვაშლივით ჰგავს ამირანის და პრომეთეს თავგადასავალს. გივერგილის დედაც თვალუწვდენელი კლდის ბინადარი დალია, რომელმაც შეუძლებელია არ გაგვასხენოს გერმანელი ლორელაი, მამაკაცების სულთა მპყრობელი, ოქროსთმიანი სირინოზი.

ქართველი პრომეთეს შესახებ მოგვითხრობს ფრანც კაფკას „პრომეთე“, რობერტ შლაიჰშტაინერის „ქართული ბალადა ამირანზე“ და ჰუგო ჰუპერტის „უშბა – პრომეთეს სამყოფელი“ და მრავალი სხვა გამოკვლევა თუ მოგონება, რომლებიც საქართველოს შესახებ დაუწერიათ ჩვენი კულტურით დაინტერესებულ ევროპელებს.

6. ეს ვარაუდი გამოთქვამს შვედ ისტორიკოს კარლ გრიმბერგს. იხილეთ: ნოდარ კაკაბაძე, ვინ იყო იოანე ხუცესი?, ჟურნალი „ჯვარი ვაზისა“, 1989.

7. ბესარიონ ნიჟარაძე, ისტორიულ-ეთნოგრაფიული წერილები, ტომი I, თბილისი, 1962, გვ. 150-161.

8. გივერგილი, სვანური ეპოსი, თბილისი, 1969, გვ. 4.

ქართული კულტურისადმი ინტერესის გაღვივებაში არავინაა ისეთი ღვაწლმოსილი, როგორც კოლხი მედეა. თქმულებები არგონავტებსა და ოქროს საწმისზე ჯერ კიდევ XIII საუკუნეში იქცევს შემოქმედთა ყურადღებას. შუა საუკუნეების გერმანელმა პოეტმა ჰერბორტ ფონ ფრიცლარმა თავისი რომანით „ტროას სიმღერა“⁹ ევროპულ ლიტერატურაში გააცოცხლა მედეას სახე. XVII საუკუნიდან მოყოლებული კი ამ ტრაგედიას მწერლების, დრამატურგებისა და მოგზაურების მრავალი თაობა უბრუნდება.

ფრანც გრილპარცერის „ოქროს საწმისი“¹⁰ არგონავტების მითსა და ევრიპიდეს ტრაგედიას ეფუძნება. მედეა აქ უფრო ამორძალი ქალია, მონადირე და ქაღალმერთ დარიშხას თავყვანისმცემელი, იგი მამაკაცთა მოდგმის უარმყოფელია და ამიტომ უპირისპირდება ძიძიშვილ პერიტას, რომელსაც მეცხვარე შეუყვარდა:

„რა უნდა მითხრა? ნადირობას რომ განერიდე,
მერე მწყემსებთან, მწვანე ველზე ამოჰყავ თავი?
ასეა, არა? უმადურო, დაუნახავო!
გასტეხე ფიცი, მხოლოდ ჩემი ყოფილიყავი
და არა კაცის? მიპასუხე, უარჰყავ აღთქმა?“¹¹

მამისა და კოლხეთის ქალიშვილი მალე საკუთარ მშობელსაც უარყოფს და საკუთარ სამშობლოსაც. მათი სიყვარული იასონის სიყვარულმა დაამარცხა. ნაცნობ-მეგობრებს და ნათესავებს დაშორებული მედეა ახალ კერას ეძებს საბერძნეთში, მამულივით თბილსა და სანდოს, თავისუფალსა და ნუგეშისმცემელს. მაგრამ ყველა მისი წადილი და მოლოდინი მიწას ენარცხება – სატრფომ, რომელსაც ცხოვრების ყველა განძი ანაცვალა, უღალატა და შეურაცხყო. ფესვებს მოწყვეტილი მედეასათვის მეუღლის საქციელი ერთგულების ფიცის დარღვევა კი არ არის, არამედ იასონის ანგარებისა და ცბიერების აპოთეოზია. ლაფში ამოსვრილი დედა ღვიძლი შვილების მოკვდინებით იასონსაც იმავეს განაცდევინებს, რასაც თავად განიცდის: ხორციელ, სულიერ და ზნეობრივ სიკვდილს ერთდროულად:

„მედეა: ცოდვამ გიწია და მოგებლო მოსაზღვეველი!
იასონი: შენს ფეხთით ვწევარ ქედმოხრილი, დამარცხებული.
მედეა: გაუძელ ტანჯვას!

9. Heribort von Fritzlad, „Liet von Troye.“

10. Franz Grillparzer, Das Goldene Vlies, 1818-1820, სამმოქმედებიანი დრამა, რომელიც გერმანულიდან თარგმნა ვიქტორ კახნიაშვილმა, დაიბეჭდა კრებულში „კოლხ მედეადან თანამედროვე საქართველომდე“, თბილისი, 1984.

11. ფრანც გრილპარცერი, ოქროს საწმისი, წიგნში „კოლხ მედეადან თანამედროვე საქართველომდე“, თბილისი, 1984, გვ. 37.

იასონი: ასეთ ტანჯვას სიკვდილი მიჯობს!
მედეა: რაც ცხოვრებაში ჩაიდინე, მოინანიე!
ახლა მშვიდობით, ვერ მიხილავ ველარასოდეს!¹²

მედეა დაემშვიდობა ავი ბედისწერის მთავარ შემოქმედს. წავიდა და მწარე საფიქრალი დაუტოვა ყველა ქალს, ვინც მშობლიურსა და უცხოს, სიყვარულსა და ვალდებულებას სასწორზე შედებს და რომელიმე მხარის სასარგებლო გადაწყვეტილებას მიიღებს. ეს დილემა მარადიულია ქალებისათვის, როგორც მცნება-შეხსენება და ამავე დროს ორაკულის გაფრთხილებაა.

ევროპელ სწავლულთა დიდი ინტერესი გამოიწვია ქეთევან დედოფლის მოწამეობრივმა აღსასრულმა. ეს ამბავი კათოლიკურ სამყაროში იტალიელი მისიონერის, პიეტრო დე ლა ვალეს მეშვეობით გავრცელდა. აღმოსავლეთში ხანგრძლივი ცხოვრების შემდეგ, 1626 წელს იგი ვენეციაში დაბრუნდა და შეადგინა „ინფორმაცია საქართველოს შესახებ“ და „ანგარიში სპარსეთის მეფის აბასის სახელმწიფოს მდგომარეობის შესახებ“. ამ უკანასკნელში პადრე საუბრობს შაჰის პიროვნულ თავისებურებებზე, იგონებს მის სასტიკ ქმედებებს და მათ შორის – ქეთევანის დასჯას.

1633 წელს კი ანდრეას გრიფიუსის დრამა „ქეთევან ქართველი ანუ გაუტეხელი სიმტკიცე“ გამოქვეყნდა. ანტიოსმალურად განწყობილი ავტორი ხოტბას ასხამს ზნეობრივი სტოიციზმითა და თავგანწირვით გამორჩეულ ქართველ ქალს, შაჰის ავხორცულ გულისთქმასთან დაპირისპირებულს და სარწმუნოების დამცველს. გრიფიუსის ტექსტი ქრისტიანული მისტიკისა და ქართველი ხალხის თავისუფლებისათვის ბრძოლაში ქალების წვლილის ერთ-ერთი საუკეთესო ნიშანსცეცია.

გერმანელმა მეცნიერმა, ებერჰარდ ვერნერ ჰაპელმა თავის კვლევებში ყურადღება მიაქცია ქართველების მაჰმადიანებთან ბრძოლის ისტორიას და ქეთევან დედოფლის წამების ამბავიც გაიხსენა.¹³

ამირანმა, მედეამ და ქეთევან დედოფალმა ყველაზე მყარი ხიდი გადეს ქართველებსა და ევროპელებს შორის. ამ ხიდით გავიდა საქართველოდან ჩვენი ეროვნული გონის ნაჭირნახულები აზრები და აღიძრა ინტერესი ჩვენდამი. ეს ხიდი დაეხმარა ევროპულ მეცნიერებასა და ხელოვნებასთან საზიარებლად დაძრულ ჩვენს თანამემამულეთ და მანვე უწინამძღვრა იმ ქალებს, რომლებსაც ანდამატივით იზიდავდა აღმოსავლეთი, – ჯერ კიდევ შეუცნობელი, იდუმალი და შთამაგონებელი საგანძური.

12. ფრანც გრილპარცერი, ოქროს საწმისი, წიგნში „კოლხ მედეადან თანამედროვე საქართველომდე“, თბილისი, 1984, გვ. 71.

13. საქართველოს შესახებ გერმანულენოვან წყაროებზე საუბრობს ვიქტორ კახინაშვილი წერილში „ქართული თემა გერმანულენოვან მწერალთა შემოქმედებაში“, წიგნში „კოლხ მედეადან თანამედროვე საქართველომდე“, თბილისი, 1984, გვ. 5-21.

ევროპელი ნომადები საქართველოში – ფრედერიკადან ოდეტამდე

რას ხედავენ და აღმოაჩენენ საქართველოში ევროპელი ნომადები? რა არის მათთვის ნაცნობი ან უცხო? ამ კითხვებზე პასუხს გვაძლევს იმ ქალების ტექსტები, რომლებიც 1811 – 1921 წლებში ჩვენს ქვეყანაში ახალი ცოდნის, გამოცდილების და თავგადასავლის საძიებლად ჩამოვიდნენ.

ცხადია, არანაკლებ საინტერესოა იმ ქალების პერსპექტივაც, რომლებიც ჩვენში ბედმა ან ბედუკუდმართობამ გადმოტყორცნა და დაამკვიდრა: კავკასიელი, აღმოსავლელი ან დასავლელი დევნილები, დიასპორული სუბიექტები. სამწუხაროდ, ახლა ამ ისტორიის რეანიმაცია უკვე ძნელია, რადგან თავის დროზე ეს შეხედულებები, ფიქრები, შეფასებები, სატკივარი ან სიხარული არავის ჩაუწერია. მესსიერების შემნახველთაგან არავინ დაინტერესდა, რას განიცდიდნენ და როგორ მოეწყვნენ გერმანელი, ვაინახი, სომეხი, ოსი, ლეკი, უდი, ებრაელი ან სხვა ხალხების წარმომადგენელი ქალები საქართველოში?

მოგზაური ქალების ტექსტები კი დიდი მოთმინებით გველოდნენ, როდის მივაკითხავდით და დავეწაფებოდით მათი კალმით აღწერილ და შემონახულ საუნჯეს. თავიანთ შთაბეჭდილებებს ისინი გულუხვად გვიზიარებენ ყველაფერზე, რაც საქართველოში ნახეს, მოისმინეს, განიცადეს და შეისწავლეს. მათი უმრავლესობა დაწინაურებული საზოგადოების წარმომადგენელია: მკვლევრები, მწერალი, დიპლომატიური ან საქმიანი წრეების წარმომადგენლები.

მათგან განსხვავებულია ანა ჰაფნერ-ფორნერისი, ჰიმელბერგელი ფერმერის ქალიშვილი, რომელმაც 1805 წელს, 22 წლისამ დაიწყო მოგზაურობა და მრავალი წელი აღმოსავლეთში გაატარა. მცირე ხნით თბილისშიც იცხოვრა. სავარაუდოდ, ევროპელ ქალთაგან ის პირველი დასახლდა თბილისში და აქაური ყოფა აღწერა.

ანას თავგადასავლის ამსახველი წიგნი „კარინტიელი ქალის ბედი და გამოცდილება სხვადასხვა ქვეყანაში მოგზაურობის დროს და თითქმის 30-წლიანი ყოფნისას აღმოსავლეთში, როგორიცაა: მალტა, კორფუ, კონსტანტინეოპოლი, სმირნა, ტფილისი, თავრიზი, იერუსალიმი, რომი“¹⁴ 1849 წელს გამოიცა.

დაწყებითი სკოლისა და ტრადიციული საოჯახო აღზრდის შედეგად მიღებული ცოდნა ანას მასპინძელ ქვეყნებში გამოადგა საიმისოდ, რომ წარმატებული დიდა, მზარეული, ხელსაქმის ოსტატი, მეურნე და ვაჭარი ყოფილიყო. შინ დაბრუნებულ ქალს კვლავ გარე-გარე მიუწევს გული. ის უკვე მომთაბარეა, ახალ-ახალი ადგილე-

14. “Schicksale und Erlebnisse einer Kärntnerin während ihrer Reisen in verschiedenen Ländern und fast 30jährigen Aufenthaltes im Oriente, als: in Malta, Corfu, Constantinopel, Smyrna, Tiflis, Tauris, Jerusalem, Rom”, 1849 herausgegeben von der Villacher Familie (Dr. Franz) Ressimann.

ბის და გამოცდილების გარეშე ცხოვრება არ შეუძლია: „მრავალწლიანმა მოხეტიალედ ცხოვრებამ ჩამომიყალიბა ჩვევა, რომ ერთ ადგილზე დიდხანს ვერ გავჩერდე. ამიტომ პატარა ეტლი და ცხენი შევიძინე და კუთხე-კუთხე შემოვიარე ჩემი ქვეყანა“.

1811 წელს საქართველოს ესტუმრა **ფრედერიკა ფონ ფრაიგანგი**. იგი ვენაში დაიბადა 1790 წელს, აფანასი კუდრიავსკისა და კატარინა კრიუნეს ოჯახში. მისი მეუღლე ცნობილი მეცნიერი და დიპლომატი, ვილჰელმ ფონ ფრაიგანგი, იმხანად რუსეთში მსახურობდა და სამშვიდობო მოლაპარაკების საწარმოებლად სპარსეთში იყო მივლინებული. სწორედ მას გამოჰყვა ფრედერიკა, სამი წლის ანდრესა და სამი კვირის კატერინასთან ერთად.

ამ მოგზაურობის ამსახველი წიგნის პირველი ნაწილი „წერილები კავკასიიდან და საქართველოდან“ ფრედერიკას ეკუთვნის, ხოლო სპარსული ნაწილი – ვილჰელმს.¹⁵

ფრედერიკამ იცის, რომ ამორძალების, წმინდა ნინოს, თამარ დედოფლის, იოანე პეტრიწის ქვეყანაში მიემგზავრება, მაგრამ პოლიტიკურად უფრო რუსეთს თანაუგრძნობს, კავკასიაში იმპერიული პოლიტიკის სიკეთეში დარწმუნებულია და განსჯის აქაურ მმართველებს მათი ურჩობისა და დაუმორჩილებლობის გამო. უცხო არ არის მისი გეორგიევსკის ტრაქტატზე და 1801 წლის საქართველოს ანექსიაზე საუბრისას გამოვლენილი ენთუზიაზმი. თბილისში ფრედერიკამ სამთო დაზვერვების სამეცნიერო ექსპედიციების ხელმძღვანელის, გრაფ მუსინ პუშკინის კაბინეტიც მოინახულა. ეს ჩინოვნიკი იმპერიის ერთგული მსახური და საქართველოს რუსეთთან შეერთების ერთ-ერთი მთავარი იდეოლოგია, რომელსაც სჯეროდა, რომ საქართველოს შემოერთებით და მთიელთა განადგურებით რუსეთი მნიშვნელოვან რესურსებს დაეპატრონებოდა, გაააქტიურებდა თურქეთთან და სპარსეთთან ვაჭრობას და საჭიროების შემთხვევაში დაემუქრებოდა ამ ორ ქვეყანას.

ფრედერიკა წერილებით ესაუბრება ნამდვილ თუ გამოგონილ მეგობარს. მოგზაურობის დასაწყისშივე ემშვიდობება მას:

„...მშვიდობით, ჩემო საყვარელო მეგობარო, მშვიდობით, ნევის ნაპირებო, წინ გრძელი გზა გვიდევს. იმის წარმოდგენისას, რომ პირქუში კავკასიის ქედი უნდა გადავლახოთ, ყველაზე მეტად ანდრეზე ვდარდობ – ის ხომ ჯერ სამი წლისაც არ არის. ვდარდობ პატარა კატერინაზე, რომელიც სულ რაღაც სამი კვირის წინ დაიბადა. მხოლოდ ის გარემოება მამშვიდებს, რომ მათი მამა ჩვენთან არის, ასე რომ, ბნელი ფიქრები უკუვაგდე და დამშვიდება ვცადე.

15. წიგნი 1816 წელს ჰაინრიხ კრისტიან გოტფრიდ ფონ შტრუვემ ფრანგულად თარგმნა და გამოსცა, 1817-1818 წლებში გერმანულად, ჰოლანდიურად და შვედურად გამოიცა, 1823 წელს კი ჯონ მურიმ ინგლისური ვერსია გამოსცა ლონდონში – „Letters from the Caucasus and Georgia; to which are added the Account of a journey into Persia in 1812, and an abridged history of Persia since the time of Nadir Shah“, London, John Murray, 1823.

რა სიგიჟეა წელიწადის ამ დროს ტფილისში გამგზავრება, – წამოიძახებს მავანი, – თან ორ პაწიასთან ერთად, რომელთაგან ერთი ახალშობილია! ეჰ, მეგობარო, ჩემს გრძნობებს ადვილად მხოლოდ მაშინ ჩასწვდები, თუ გათხოვილი ხარ და ქმარი გიყვარს...¹⁶

ვალდაი, მოსკოვი, ტულა, ვორონეჟი, აზანსკაია, ნოვოჩერკასკი, აკსაი, სტავროპოლი, გეორგიევსკი, მოზდოკი, ვლადიკავკაზი – ეს არის ადგილები, რომლებიც ფრაიგანგებმა გამოიარეს მანამ, სანამ ლარსს მოადგებოდნენ, დარიალის და არაგვის ხეობებს დაუყვნენ და მცხეთაში ჩამოვიდნენ. 1811 წლის 25 დეკემბერს, ცოლ-ქმარი გენერალ-გუბერნატორის, ფილიპ პაულიჩის სახლში დაბინავდა, საიდანაც მთელი თბილისი მოჩანდა, შადრევნებისა და ბაღის არაჩვეულებრივი ხედი იშლებოდა.

ფრედერიკა ჩამოსვლისთანავე დაინტერესდა ვაჭრობისა და ბუნებრივი რესურსების საკითხებით. რუსეთსა და ირანს შორის ვაჭრობის განვითარებით დაიმდებულებული, კავკასიელთათვის გარე ვაჭრობას დაბალშემოსავლიანად მიიჩნევს. მისი აზრით, აქაურებს უფრო მეტ სარგებელს შემოტანილი პროდუქცია მოუტანს, როგორცაა: ტილოს ქსოვილი, რკინა, ფოლადის ნაწარმი, რუსული ტყვია და დენთი. საქართველოს სავაჭრო პოტენციალზე საუბრისას, რუსეთის კეთილისმყოფელ გავლენაზე მისანიშნებლად, ასეთ რამეს ამბობს:

„ამ დრომდე ძირითადი საქონელი, რომელიც ამ ქვეყნიდან გადიოდა, იყო ცოცხალი – ადამიანები, ქალები და კაცები, რომლებსაც მონებად ყიდდნენ, ძირითადად – თურქეთისა და სპარსეთის სერალებისთვის. ხშირად ლამაზ ქალს ცხენში ან ხმალში გადაცვლიდნენ ხოლმე. ამჟამად ეს სამარცხვინო ვაჭრობა თითქმის ამოიძირკვა...“¹⁷

ბუნებრივი რესურსების თვალსაზრისით, ავტორი დიდი ინტერესით მოგვითხრობს საქართველოსა და კავკასიაში გავრცელებულ მცენარეებზე, როგორცაა კოპიტი, თელა, თუთა, კოწახური, კაპარი, ძირტკბილა, კანაფი, ენდრო, სეზამი. იგი მოხიბლულია ხეხილის მრავალფეროვნებით, ვაზის და ღვინის წარმოების კულტურით, აბრეშუმისა და ბამბის წარმოების, მეფუტკრეობის პერსპექტივით.

საჯარო დაწესებულებების (საქველმოქმედო ორგანიზაციები, ბოტანიკური ბაღი, საჯარო სკოლა) მონახულების შემდეგ, ფრედერიკა, როგორც ევროპელი, საუბრობს ქართველებზე, როგორც აზიელებზე და ზარმაც ხალხზე. ასეთი სულისკვეთება უცხო არ არის იმ დროის რუსი სახელმწიფო და მოხელეებისთვისაც და ეს დალი ამის ფრაიგანგის ტექსტსაც. ამიტომ, ბუნებრივია, მისი ჰეროიკული ინტონაციები

16. Frederika von Freygang, Letters from the Caucasus and Georgia p:3.

17. იქვე, გვ. 123

ყოფილი გენერალ-გუბერნატორის, პავლე ციციანოვის (რომელმაც მთელი სამეფო ოჯახი ძალდატანებით გაასახლა რუსეთში, ხოლო ბაქოს ხანმა გამოსაღმა სიცოცხლეს) დაკრძალვის აღწერისას.

„...მათ მთელი ქალაქი სამგლოვიარო მუსიკის თანხლებით გამოიარეს და სიონს მიაღწენ. ამ პრფოცესის სანახავად მთელი თბილისი გამოეფინა, სახლების სახურავებიც კი ხალხით იყო სავსე.

ძალზე შთაბეჭდავი იყო გენერალ ციციანოვის კუბოს სამარეში ჩაშვების მომენტი – ეკლესიის წინ განლაგებულ ჯარისკაცები იარაღის სამი ზალპით უკანასკნელად მიესალმნენ ამ მამაც ოფიცერს. ეს იყო ნაღვლიანი ცერემონია და ამასთანავე გულწრფელი გამომშვიდობება...“¹⁸

იმპერიული ქედმაღლობა იგრძნობა აღმოსავლური რიტუალებისა და სტუმარ-მასპინძლობასთან დაკავშირებული წესების შეფასებებში. ჯაფირ ყული ხანის მიერ გამართული ლხინის აღწერისას იგი წერს:

„...სპარსელებს აქვთ კიდევ ერთი უსიამოვნო ჩვევა – ისინი იღებენ კერძის ყველაზე გემრიელ ნაწილს, სულ პაწაწინა ნაჭერს, ცოტა ხანს ხელში აგუნდავებენ, გამოარჩევენ ერთ ადამიანს და პირში ჩაუდებენ – ეს მათეზურად დიდ პატივისცემას ნიშნავს. შაჰის წვეულებას იმდენად დიდებულს ვერ დავარქმევდი, რამდენადაც გასართობს. თვითონ შაჰმა რამდენჯერმე შეასრულა პოლონეზე, შეიძლება ითქვას, სპარსელისთვის არცთუ ისე ცუდად. აღმოსავლური ცეკვებიც მინახავს, სპარსულიც, ქართულიც და ლეკურიც. რა მანჭვა-გრეხაა! მუსიკაც ველურია და ილეთებიც. ამის შემდეგ მივხვდი, რას ნიშნავს ბაიადერების ცეკვა...“¹⁹

მცირეწლოვანთა დანიშვნის წესისა და გლოვის რიტუალების გაცნობისას, ფრედერიკაში ქალი იღვიძებს. შაჰის ჰარამხანების არსებობას იგი თავისუფალი ქალებისადმი მამაკაცთა შიშს უკავშირებს და ესმის, რომ დარაჯების, მოსამსახურეების, მოხუცი ქალების, მსტოვრებისა და საჭურისების ზედამხედველობაში გამომწყვდეული ქალების ასეთი იზოლაცია საბოლოო ჯამში ქალების გონებრივ და ზნეობრივ დეგრადაციას იწვევს:

„...დედამიწის ამ ნაწილში ქალის ცნობიერება მოწამლულია მამაკაცთა დესპოტური მბრძანებლობის შხამით, რომელიც აზროვნების გასაქანს არ აძლევს. აქედან გამომდინარე, თქვენ შეიძლება წარმოიდგინოთ, რა სახის ძაფები აკავშირებს ორ სქესს – კაცს, რომელიც აბსოლუტურ ძალაუფლებას ფლობს და ქალს, რომელიც ან სულელია, ან ფარისეველი“.²⁰

18. იქვე, გვ. 160

19. იქვე, გვ. 167

20. იქვე, გვ. 196

საკმაოდ საინტერესოა ბაქოსთან დაკავშირებული ცნობები, რომლებიც კონცენტრირებულია ნავთობის რესურსებზე და ცეცხლთაყვანისმცემელთა ყოფის აღწერაზე: სატანის დამორგუნველი წმინდა ცეცხლი და ღვთაებისადმი აღვლენილი ლოცვა და საგალობლები, რომელთაც დიდი რუდუნებით ასრულებენ მორწმუნეები.

ფრედერიკა კახეთის აჯანყებასაც შეესწრო. ხალხი ფილიპ პაულიჩის მიერ გატარებულ რეფორმებს აუმხედრდა: კაპიტან-ისპრავნიკების თარეშს და ადგილობრივი მოსახლეობის დაწოკებას საიმისოდ, რომ რუსების 30-ათასიანი ჯარი გამოეკვებათ. ამას ემატებოდა საქართველოდან განდევნილი, რუსულ ბატონობასთან შეურიგებელი ალექსანდრე ბატონიშვილის თანამოაზრეთა წინააღმდეგობა. ალექსანდრე რუსების დაუძინებელი მტერი იყო და სწორედ ამიტომ უდიდესი ავტორიტეტი ჰქონდა კავკასიაში. რუსები კი მის სახელს სულ სპარსეთისა და ოსმალეთის ინტერესებს უკავშირებენ. ამ ამრს ემხრობა ფრედერიკაც და მზრუნველი, იმპერიული სულისკვეთებით წერს:

„...კახეთისთვის ამბოხი ჩვეულებრივი ამბავია, რადგან ამ მხარეში არეულობა ხელს აძლევს როგორც სპარსეთის მთავრობას, ისე ალექსანდრეს – საქართველოდან გადახვეწილ მეფეს...

რა დასანანია, რომ ეს ყოველმხრივ შემკული ქვეყანა მუდმივად შიმშილის, შავი ჭირისა და აჯანყების მსხვერპლია. ყოველგვარმა ბოროტებამ და უბედურებამ აქ მოიყარა თავი... აქვე მახლობლად ჩასაფრებული თურქები და სპარსელები, ამბოხება და შავი ჭირი ქვეყნის გულში, საყოველთაო სიდუხჭირე და ხელმოკლეობა...“²¹

ფილიპ პაულიჩმა კახელების წინააღმდეგობა ჩაახშო, მაგრამ ამბოხებულები მაინც ვერ დაიმორჩილა. მათთან მოლაპარაკებების შედეგად, აღადგინა მოურავები, ამნისტიასა და რეფორმებს დაჰპირდა, რაც მას უფლებამოსილების გადაჭარბებად ჩაუთვალა ხელმძღვანელობამ და უკან გაიწვია.

ფრედერიკას თბილისში ყოფნისას დაინიშნა ახალი მთავარმართებელი, ნიკოლაი თედორეს ძე რტიშჩევი, რომელმაც ვილჰელმ ფრაიგანგი სამშვიდობო მოლაპარაკებების საწარმოებლად სპარსეთში გადაიყვანა.

ფრედერიკამ ქმარი გაისტუმრა და თავად შვილებთან ერთად გეორგიევსკისკენ გაემგზავრა, სადაც ვილჰელმის ბიძა იყო მმართველი და რამდენიმე დღით შეყოვნებასაც გეგმავდა. თუმცა, ბედი მას საზარელ განსაცდელს უმზადებდა: უკანა გზაზე, 1812 წლის 1 სექტემბერს, პატარა კატერინა ავად გახდა და 12 სექტემბერს კისლოვოდსკში გარდაიცვალა.

„ანდრეს გამუდმებით სურდა პატარა დის მოფერება და მის ხანგრძლივ ძილზე ჩიოდა. კატერინას ნამდვილად ეძინა და იძინებს მანამ, სანამ არ მოხდება ბედნიე-

რი გამოღვიძება, რომელიც ამქვეყნიურ ძილს მოსდევს და რომელიც ასე ხანმოკლე აღმოჩნდა მისთვის. შეძრული გავხედავ ხოლმე მთავარი გზის შორიახლო მდებარე მის სამარხს. აი, წამოვიყვირებ, სამუდამო განსასვენებელი იმ არსებისა, რომელსაც მკერდში ვიკრავდი, ვაპურებდი, შევხაროდი და ვუფრთხილდებოდი.

იტირე, ჩემო მეგობარო, ჩვენი ძვირფასი ეკატერინესთვის, მაგრამ, ოჰ! უფრო მეტად მისი უბედური მშობლებისთვის იტირე!²²

ასე დაასრულა ფრედერიკამ პირველ ოქტომბერს მეგობართან მიწერილი წერილი და გააგრძელა გზა შინისაკენ. ნაპოლეონის ლაშქრობის შედეგად დანგრეულ მოსკოვში იგი 1813 წლის 16 იანვარს ჩავიდა. შვილის დაკარგვითა და მისი სათაყვანებელი ქალაქის იავარქმნით შეძრული ფრედერიკა ასე ასრულებს ტექსტს:

„ყველაფერი მდუმარე ნანგრევებშია მოქცეული, მაგრამ მათი წიაღიდან ისმის ხმა, რომელიც რუსი ხალხის სიმაძაქესა და სიდიადეს, ქვეყნისა და იმპერატორისადმი ერთგულებას ღაღადებს. აქვე, ქალაქის ფერფლიდან, შეგიძლიათ გაიგონოთ ქვეყნის უსაფრთხოებისთვის თავდადებულთა ღვთაებრივი სამართლიანობის ხმა, რომელიც სიტყვის მჩაგვრელის დასჯას მოითხოვს.

დაე, მოსკოვმა იამაყოს თავისი ბედით – იგი ადგილს დაიკავებს რუსეთის დიდების მათიანეში, პირველ ადგილს მის ყველა ქალაქთა შორის: მართალია თავიდან აშენებული, მაგრამ მაინც იმპერიისთვის სახელოვანი თავდადებულობით ოდითგანვე ცნობილი, ძველებური მოსკოვი იქნება.²³

მამის შინ დაბრუნების შემდეგ კარლი დაიბადა და ოჯახი პეტერბურგში გადასახლდა. ფრედერიკა 1863 წელს გარდაიცვალა და ვიბორგის კათოლიკურ სასაფლაოზეა დაკრძალული. ვილჰელმი დიპლომატიურ სამსახურში იყო ჯერ ნიდერლანდებში, შემდეგ კი – ვენეციაში, სადაც 1849 წელს აღესრულა.

მოგზაურ ქალთაგან, ქრონოლოგიურად, მესამე ინგლისელი **ენ ლისტერია**, ჯეიმს ლისტერისა და რებეკა ბეთლის ქალიშვილი. მისი დღიურები, როგორც უნიკალური არტეფაქტი, კოდიფიცირებული ენის გამო, დღემდე თავსატეხია მკვლევართათვის. ენი მთელი ცხოვრების მანძილზე აწარმოებდა დღიურს, სადაც საკუთარ ცხოვრებას, ეკონომიკურ პრობლემებს, ლესბოსურ ურთიერთობებს და მოგზაურობის შთაბეჭდილებებს ასახავდა.

ენი და მისი თანამგზავრი ანა უოკერი საქართველოში დარიალის ხეობით შემოვიდნენ. თბილისში, გუბერნატორ გოლოვინის მეუღლის წყალობით, თავიანთი მოგზაურობისთვის საჭირო ხალხს დაუკავშირდნენ. ექვსთვიანი მოგზაურობის (1840 წლის თებერვალი – სექტემბერი) შთაბეჭდილებები საინტერესოა მრავალი კუთ-

22. იქვე, გვ. 244

23. იქვე, გვ. 258

ხით: კულტურის და რელიგიის კვლევა, მოგზაურობა და ტოპოგრაფია, სოციალური და ეკონომიკური საკითხები, არქიტექტურა და არქეოლოგია, სამხედრო საკითხები.

გერმანელი მეცნიერი ანგელა შტაიდელე ენ ლისტერის შემოქმედების საუკეთესო მკვლევარია. მისი წიგნი „ჯენტლმენი ჯეკი: ენ ლისტერის ბიოგრაფია“ არაჩვეულებრივი სიზუსტით და შთამბეჭდავად აღგვიწერს ინგლისელი მწერლის ინტელექტუალურ გზას: საკუთარი სხეულის, ვნებების, მისწრაფებებისა და სამყაროს შეცნობის ისტორიას.²⁴

ქალებმა მოგზაურობა 1839 წლის 26 ივლისს დაიწყეს. ჯერ მათ დანია, ნორვეგია, შვედეთი და ფინეთი მოიარეს, შემდეგ ჩავიდნენ რუსეთში. იქ შეხვდნენ გენერალ-გუბერნატორ გოლიცინს, სხვა დიდებულებს და წარჩინებულებს, ადამიანებს, მაგრამ საიმპერატორო ოჯახი ვერ გაიცნეს. მოინახულეს უნივერსიტეტის სტამბა, ბუნების ისტორიის მუზეუმი, ქოლერის ინსტიტუტი, ბავშვთა სახლი. დაესწრნენ მართლმადიდებლურ და მუსლიმურ ღოცვებს, ციმბირში გადასახლებულთა მსვლელობას. ერთ-ერთ წვეულებაზე გაცნობილი მოსკოველი ვენერა – სოფია ალექსანდრეს ასული ურუსოვა-რადზივილი, ენს გულში ჩაუვარდა, მაგრამ თვალცრემლიანი დაემშვიდობა.

ენმა კავკასიაში გამგზავრების წინ ეტლი საგულდაგულოდ გამართა და ჰამერსლის აკრედიტივები რუბლებზე გადაცვალა. ქალებმა მუხლებამდე მომდგარი ტყავის ჩექმა და სქელი პალტოები შეიკერეს და შვედი მისტერ გროსის, გიორგი ჩაიკინის და მისი მეუღლის, დომნას თანხლებით გზას გაუდგნენ.

ათი დღე დასჭირდათ ყაზანში ჩასასვლელად. აქაური თათარი თაფლით მოვაჭრის, არსაიფის, ჰარამხანის ნახვამ ენში აღძრა წინააღმდეგობისა და უსამართლობის განცდა, რომელიც რადიკალურად განსხვავდება და უპირისპირდება ქალების იზოლაციის ამ სივრცისადმი მამაკაცების რომანტიკულ და პოეტურ დამოკიდებულებას:

„თავიდან ყველა ქალს გაქცევა უნდოდა, მაგრამ მალევე დაამშვიდეს. საცოდავი არსებები! რამდენი ადამიანია ნამდვილი ცხოველი! სულით ავადმყოფთა თავშესაფრის გარდა, არასდროს მინახავს ისეთი დამთრგუნველი, ნაღვლიანი და შეურაცხმყოფელი სანახაობა, როგორიც ამ ჰარამხანაში ვნახე. ისინი არ დაიშვებიან საზოგადოებაში და არც შეუძლიათ ამის მოთხოვნა – რა საშინელ დეგრადაციას განიცდის კაცობრიობის ნახევარი!“²⁵

24. Angela Steidele, Gentleman Jack: A Biography of Anne Lister: Regency Landowner, Seducer and Secret Diarist, 2017, Berlin.

25. Angela Steidele, Gentleman Jack: A Biography of Anne Lister: Regency Landowner, Seducer and Secret Diarist, p:238.

გზადაგზა ქალებმა გაიცნეს ყალბუხელი პრინცი სერებჯაბ ტიუმენი, ქვემოვოლგელი გერმანელები, ასტრახანში მცხოვრები ბელგიელი მკერავი და გაეცნენ მათ ყოფას, სამზარეულოს.

თითქოს ენ ლისტერს ეს ახალი სამყარო ეუცხოება, მაგრამ ეს მხოლოდ ერთი შეხედვით. მახვილი თვალი და გონების სიძლიერე მასში შეუმეცნებლისა და გაუგებრის შემეცნების, წვდომის სურვილს ბადებს:

„ყველაფერი მაინტერესებს – ყველგან კარგია – მე ნაკლს ვერ ვპოულობ. კარგად მძინავს იატაკზე და ჯერჯერობით არც იატაკის მდგომარეობა მაღელვებს, გინდ ასეთი იყოს, და გინდ ისეთი. ანას ყველაფერი ბინძური ეჩვენება და აქაურობას ინგლისის ფუნდუკებს ადარებს. უსამართლობაა. ამას არც რუსებს ვაკადრებ და არც საკუთარ თავს. თუ გავითვალისწინებთ რუსეთის შემადგენლობაში შემავალი სხვადასხვა ხალხის ცივილიზაციის რეალურ მდგომარეობას და იმას, თუ რამდენად არ იცნობენ საკუთარ მხარეს მაღალი წრის წარმომადგენლები და რამდენად იშვიათად მოგზაურობენ საკუთარ ქვეყანაში, იმ კომფორტისა და პირობების არსებობა უფრო მიკვირს, რაც ჩვენ გვაქვს, ვიდრე ის, რომ რაღაც გვაკლია“.²⁶

22 მარტს, თბილისში ჩასასვლელ საშვში ასტრახანში 125 რუბლი გადაიხადეს. როცა ბადრაგზე უარი უთხრეს, ენმა ერთ-ერთი პისტოლეტი გადატენა, მაგრამ მოზღოვში მაინც აიყვანა ოთხი კერძო მოსახლე ბადრაგად.

1840 წლის 8 აპრილს ქალები უკვე დარიალის ხეობაში იყვნენ. ენი გაოგნებულია ყაზბეგის მთების მშვენიერებით და შემდეგ უკვე მცხეთით:

„აქ ყველაფერს შორეული ანტიკურობის სუნი დაჰკრავს! [...] სახლები, მიწაში ჩაფლული ღუმელები, საქონლის ტყავისგან დამზადებული ღვინის ჭურჭელი, რომლის ერთ-ერთი ფეხიდანაც ღვინო გადმოდის, ხის მერქნისაგან გამოთლილი ნავები, ნამდვილად ისეთივეა, როგორიც ჰომეროსის დროს იყო“.²⁷

13 აპრილს ენ ლისტერი და ანა უოკერი უკვე თბილისში ჩამოვიდნენ და, ქალბატონი გოლოვინას (გენერალ-გუბერნატორის მეუღლე) წყალობით, ჩინებულად მოეწყვნენ, მალევე გაიცნეს ნინო და ეკატერინე ჭავჭავაძეები. ეკატერინემ ისინი ზუგდიდში დაპატიჟა.

თბილისურ შთაბეჭდილებებში მნიშვნელოვანი ადგილი უჭირავს ბაზარს, გოგირდის აბანოს, ბოტანიკურ ბაღს. გრაფინია პანინამ თავის ბიძაშვილს, ქალბატონ გოლოვინას მისწერა ენისა და ანას შესახებ და ამიტომ მათი პირობები გაუმჯობესდა.

ენს თეირანსა და ბაღდადში წასვლა მოუხდა. იქით წასასვლელად შარავლების ჩაცმა და ჯორებზე გადაჯდომა მოუხდებოდათ და თეირანიდან ბაღდადში მხოლოდ

26. იქვე, გვ. 242-243

27. იქვე, გვ. 246

ქარავანს შეიძლებოდა გაჰყოლოდნენ. უკვე ფულიც შემოაკლდათ. ამას ისიც დაემატა, რომ ანამ ენი მოგზაურობის ეგოისტურად დაგეგმვაში ამხილა. ამიტომ 18 მაისს ქალები ბაქოში ჩავიდნენ.

ქალწულის კოშკი, შირვანშაჰების სასახლის ნანგრევები, ნავთობით მდიდარი აფშერონის ნახევარკუნძული, ათეშგიაჰის ტაძარი, კრიშნაიდი და ინდოელი მორწმუნეების რიტუალები...

სტუმრებში ცხოველ ინტერესს იწვევდა... შემახის ბაზარში ენმა ინა შეიძინა, თმაში მოულოდნელად გამორეული ჭადარის შესაღებად. აქვე დააგემოვნა და მოიწონა მამაკაცის ხელით მიწოდებული ქლიავის ჩირის ნამცხვარიც და ბაქოს კომენდანტის, ჩეკმარევის ცოლის დამზადებული გარეული ფრინველის მარინადი.

ბაქოდან დაბრუნებულმა ენმა ახალი მარშრუტი თავისი სამოგზაურო „ბიბლიის“, ფრედერიკ დიუბუა დე მონპერეს „კავკასიაში მოგზაურობის“²⁸ მიხედვით შეადგინა: გორი, ატენის სიონი, უფლისციხე, სურამის უღელტეხილი, ბაგრატი, გელათი, მოწამეთა, ნიკორწმინდა, ლები. ყველა ეს ადგილი, ბუნება, არქიტექტურა, კლიმატი, მოსახლეობის ხელგაშლილობა სასიამოვნო და ღირსსახსოვარი აღმოჩნდა სტუმრებისთვის.

ლაილაშში ენმა ერთი ცხენი შეიძინა, სვანეთში წასვლაზე უარი თქვა და რიონის ხეობით ქუთაისში დაბრუნდა. მალევე მოგზაურები ეკატერინე ჭავჭავაძეს ეწვივნენ ზუგდიდში. აქაც ჩინებული გარემო დახვდათ: სპარსული ხალიჩებით, კომფორტული ავეჯითა და პარფიუმერით გაწყობილი ოთახი, დადიანების ბოტანიკური ბაღი. მაგრამ ეკატერინე ენს ფერმკრთალი ეჩვენა, მისი ქალიშვილიც ავად იყო. იქური სიცხის გამო, სტუმრები კვლავ მთისკენ წავიდნენ: ავიდნენ ჯვარში, საჩინოსა და ჯგალში.

„ნ:05 საათზე სოფელ ჯაყალისკენ [ჯგალი] გავემართეთ და 6 ¼ საათზე ჩავედით. 2 კოტეჯი. ინდური სიმინდის ბეღელში (პატარა მოწნულ ქოხში, ალბათ ზომით 4½ იარდი 3 იარდზე) მოვეწყვეთ. ჩვენი ნაბდები ჩალაზე გავშალეთ და ახლა, 8:25, დავწერე ეს ბოლო 19 სტრიქონი. ჩრდილოეთით მაღალი ბორცვები მოჩანს და ალაგ-ალაგ ტყიანი გორაკებით დაფარული ქედები, პატარა ტყიანი კონუსისებური მწვერვალებივით რომ ამოშვერილან. ბორცვები ორივე მხარეს დაღარულია და ქედებს გვერდზე მცირე ზომის კონუსისებური მწვერვალები ამშვენებს. 8:25 საათზე ჩაი და ა.შ. 9 ½ დავწექი“.²⁹

ეს იყო ბოლო სიტყვები, რომლებიც ენ ლისტერმა თავის დღიურში ჩაწერა. 1840 წლის 22 სექტემბერს, ქუთაისში, იგი ცხელებით (ტიფი ან მწვავე მაღარია) გარ-

28. Frédéric Dubois de Montpéroux, Voyage autour du Caucase, Paris, 1839.

29. Angela Steidele, Gentleman Jack: A Biography of Anne Lister: Regency Landowner, Seducer and Secret Diarist, p:258.

დაიცვალა. ანა უოკერმა იგი კონსტანტინეპოლის გავლით, ლონდონში გადაასვენა და 29 აპრილს სამრევლო ეკლესიის აკლდამაში დაკრძალა. ამ ადგილის ნახვა დღეს შეუძლებელია.

ასე დამთავრდა ენ ლისტერის, დაუდეგარი და ღრმად მოაზროვნე, მშფოთვარე ქალის ცხოვრება. მისი დღიურის მოცულობა და ბუნება ნათელყოფს, რომ იგი არა მხოლოდ წერდა, არამედ აღწერდა საკუთარ არსებობას და რაობას, რადგან ამის ხმამაღალი, საყოველთაოდ მიღებული ხერხებით გამხელა-დემონსტრირება არ შეეძლო.

ანა დრანსე საქართველოში 1853 წელს კომერციული საქმიანობის წამოსაწყებად ჩამოვიდა. პარიზში მან ათი წლის ვაჟი და ხანში შესული დედა დატოვა. როცა მიხვდა, რომ მის გეგმებს ასრულება არ ეწერა და სამშობლოში დაბრუნება გადაწყვიტა, დავით ჭავჭავაძე გაიცნო და მისი ქალიშვილების გადიობას დათანხმდა. ბავშვებითა და ოჯახით ანა ისე მოიხიბლა, რომ უყოყმანოდ დარჩა თბილისში და ამის შესახებ პარიზში თავისიანებსაც შეატყობინა.

დავით ჭავჭავაძის ოჯახი მალე წინანდალში გადასახლდა, სადაც ბლომად ხალხმა მოიყარა თავი: ანა ილიას ასული ბაგრატიონი-ჭავჭავაძე და მისი შვილები (სალომე, მარიამი, ელენე, თამარი, ალექსანდრე, ელისაბედი), ბარბარე ბაგრატიონი-ორბელიანი, ნინო ბარათაშვილი (ნიკოლოზის და), თინა/თინია ჭავჭავაძე-ორბელიანი, ჭავჭავაძეთა სამი თაობის აღმზრდელი მარინა-გამდელი, ძიძა ალექსანდრა და ანა დრანსე.

ფრანგი ქალი აღფრთოვანებულია საქართველოს ბუნებით და იმ ადამიანებით, რომელთაც თბილისში გადაეყარა და მათთვის უკვე შინაურად იქცა.

მაგრამ, 1854 წელს, ლეკები თავს დაესხნენ დავით ჭავჭავაძის წინანდლის მამულს, დაარბიეს და გაძარცვეს ოჯახი, ხოლო ქალები დაღესტანში გაიტაცეს. მომხდურთა გაუგონარ ძალმომრეობასა და უხეშ ქმედებას შეეწირა დავითისა და ანას ნაბოლარა გოგონა – ელისაბედი/ლიდია, რომელიც ამ დროს თვეების იყო. ჩვილი ცხენზე შეგდებულ დედას ხელიდან გაუვარდა და იგი ცხენებმა გადათელეს. ამ ტრაგედიით დაიწყო რვათვიანი ტყვეობა, რომელსაც აღწერს ანა დრანსე თავის მოგონებაში.

ტყე-ტყე სიარულითა და უსმელ-უჭმელობით დაქანცული ქალები ერთმანეთს ანუგეშებდნენ, რათა თავს დატეხილი უბედურებისა და მოსალოდნელი იზოლაციის სიმძიმე შეემსუბუქებინათ.

შამილის გეგმა ასეთი იყო: მისი შვილი, ჯემალ ედ-დინი, რუსებმა ჯერ კიდევ ყმაწვილი მოიტაცეს და ახლა გიორგი XII-ის შვილიშვილების, ანა და ბარბარე ბაგრატიონების მეშვეობით უნდოდათ მისი დაბრუნება.

საქმის მიმდინარეობას აკვირდებოდნენ შამილის ცოლებიც: ზაიდეთი, ამინეთი და შუანეთი, ხოლო ეს უკანასკნელი – თანაუგრძნობდა ტყვეებს. სწორედ მან ურჩია

ღონემიხდილ ანას – ზაიდეთთან მისულიყო და საქმეში მამამისის ჩართვა ეთხოვა, რადგან ამ კაცს შეიძლებოდა დადებითი როლი ეთამაშა. მთიელი ქალის გული რომ მოეღბო, ანამ მას თანალმობისკენ მოუწოდა:

„...წარმოიდგინე შენი თავი ჩვენს ადგილზე. შენც დედა ხარ, იფიქრე შენს პატარა ნაჯავათზე, ვინც ასეთი სინაზით გიყვარს... შენც ცოლი ხარ... როცა სიკვდილი მოგიახლოვდება, ნუთუ არ მოისურვებ, რომ იგი, ვინც გიყვარს, იმ დროს შენ გვერდით იმყოფებოდეს, რათა თვალები საკუთარი ხელით დაგიხუჭოს?...“³⁰

ზაიდეთი ძუ მხეცად გადაიქცა. საჭირო თანხა შენმა ქმარმა ქართველებისგან მოწყალების თხოვნით შეგიგროვოსო – მიაძახა ანას. ამ გაავებულმა შეძახილმა ლამის სიცოცხლე მოუსწრაფა ისედაც ძალაგამოცლილ ტყვეს. სააქაოს იგი მხოლოდ შვილების დაკარგვის შიშმა მოაბრუნა: „ყურანის“ მიხედვით „დედა თუ ტყვეობაში მოკვდება, შვილნი მისნი რჩება მაჰმადს“.

ზაიდეთის მამა, ხანდაზმული და ბრძენი დერვიში კი შამილს არწმუნებდა, მილიონი მანეთის მოთხოვნაზე ხელი აედო და შემოთავაზებულ ორმოც ათასს დასჯერებოდა:

„უარი თქვით ყველაფერზე – ჩაიზე, შაქარსა და სხვა ათას გამოუსადეგარ რამეზე, რაც რუსეთიდან შემოაქვთ. ნუ მისცემთ ცოლებს ნებას, აბრეშუმი და ოქრო ატარონ. განერიდეთ ყველაფერს, რაც თქვენი მტრების ქვეყნიდან შემოდის.“

ნუ ითხოვთ მილიონ რუბლს ტყვეთა გასათავისუფლებლად, დააბრუნეთ ისინი თავიანთ სამშობლოში, როგორც კი იმამს იმპერატორის ხელით შვილს გადასცემენ...“³¹

რუსებისადმი უნდობლობის გამო, ხასავიურთში შვილის ამოსაცნობად შამილმა თავისი ხალხი გაგზავნა: იმამის მოურავი – ჰაჯი, ჯემალ ედ-დინის ბიძა, ხალხის წარმომადგენელი – ჰასანი და კიდევ სამი მთიელი. ამოსაცნობ ნიშანთა შორის იყო ბავშვობისდროინდელი ტრავმები – მოტეხილი ხელი და ყვავილის კვალი. ამ პროცედურამ წარმატებით ჩაიარა და ტყვე ქალების განთავისუფლებაც გადაწყდა.

რვათვიანი პატიმრობის შემდეგ, 1855 წლის 10 აპრილს, ტყვეებმა დაღესტანი დატოვეს. ისინი გულმხურვალედ გამოემშვიდობნენ შამილის ცოლებს, ზაიდეთის სწორუპოვარ მამას, თარჯიმან თამარს, კარიმატს, ჰაჯი რებილს. ქართველი ქალებიც, რომლებიც ტყვეობაში რჩებოდნენ, ქალბატონებს ევედრებოდნენ, რომ ისინიც მალე გამოესყიდათ.

ტყვეთა გაცვლა კურინსკის ციხესიმაგრესთან მოხდა, რომლის კომენდანტს თანახმდნენ ლეონტი პავლეს ძე ნიკოლაი, დავით ჭავჭავაძე, ივანე ბაგრატიონი და რუსულ მუნდირში გამოწყობილი ჯემალ ედ-დინი და მისი ძმა – ყაზი მაჰმადი, რო-

30. Anna Drancey, *Captive de Chamyl*, Paris, 1857, p:114.

31. იქვე, გვ. 102

მელმაც მგზნებარე სიტყვა წარმოთქვა და მამის დანაბარების შესაბამისად, ხაზი გაუსვა ტყვე ქალების კეთილშობილებას და ის, რომ შამილის სერალის თითოეული მკვიდრი მათ ღირსეულად ექცეოდა.

„...მათ არ შეხებიან არანაირი ბიწიერება, იმამის ცოლები თავს ევლებოდნენ, უფრთხილდებოდნენ როგორც საკუთარ დებს. არც ერთი მამაკაცის მხერას არ შეუღწევია მათ რიდეებში. სპეტაკნი არიან, ვითარცა შროშანები და დაცულნი ყველას თვალისგან, ვითარცა უდაბნოს ქურციკები. მათ საყოველთაო პატივისცემა და სიმპათია დაიმსახურეს ჩვენგან და ახლა ისინი უკვე თავიანთ ოჯახებს უბრუნდებიან“.³²

ფულის გადაცემის შემდეგ მხარეები ერთმანეთს დაშორდნენ. დავით ჭავჭავაძემ გულში ჩაიკრა შვილები, მეუღლე და ყველა განთავისუფლებული. ადგილობრივები თვალცრემლიანები უყურებდნენ უცოდველ ბავშვებს და შორეულ ვედენოში გადახვეწილ ქალებს, რომელთაც მრავალთვიან ტყვეობას გაუძლეს.

ანა და ბარბარე ბაგრატიონებს შინ მამის გარდაცვალების ამბავი დახვდათ. ილია ბატონიშვილი სწორედ იმ დღეს გარდაცვლილა, როცა მისი ქალიშვილები დაატყვევეს, 1854 წლის 4 ივლისს.

პარიზში დაბრუნებულ ანა დრანსეს დედა ველარ მიეგება. საბრალო ქალმა ხანგრძლივ დაძაბულობას და დაუსრულებელ ლოდინს ველარ გაუძლო. თან თავიდან, გაზეთებმა ქალიშვილის დაღუპვაც კი ამცნეს. შემდგომში ამ ინფორმაციის უარყოფამ ალბათ უკვე ველარ გაამრთელა შემზარავი ცნობით დალდასმული გული.

ანას მოგონებები პარიზში გამოიცა 1857 წელს.³³ წიგნს ავტორი არ ჰყავს. თუმცა, შესავალში ედუარდ მერლიუ გვატყობინებს, რომ გამოცემაში მოთხრობილი ამბები მან სიტყვასიტყვით ჩაიწერა ანასგან:

„...გადაიარა თუ არა პირველმა ელდამ, თავი ერთად მოვიყარეთ, რომ მის აქ არყოფნის პერიოდზე და დედაზე გვესაუბრა. ჩვენს კითხვებზე პასუხად გვიამბო, რომ ჩეჩენთა და ლეკთა ერთდროულად ბარბაროსული და გმირი ტომები ჯერ კიდევ ინარჩუნებენ დამოუკიდებლობას, რაც ცივილიზებულმა ერებმა ვერ შეძლეს. მან ასევე მოგვითხრო იდუმალებით მოსილ შამილზე და იმამის სერალის პატარ-პატარა ინტრიგებზე. დაწვრილებით მოგვიყვა ტყვეობაზე და ეს წიგნიც, რომელსაც მისივე თანხმობით გამოვცემთ, დაწერილია ანა დრანსეს მონათხრობის მიხედვით“.³⁴

32. იქვე, გვ. 167

33. Les Princesses Russes Prisonnières au Caucase. Souvenirs D'une Française Captive de Chamyl. Recueillis par Eduard Merlieux. Paris. Ferdinand Sartorius, Editeur, 9, Rue Mazarine, 9; 1957

34. Anna Drancey, Captive de Chamyl, Paris, 1857, p:2.

უავტოროა 1858 წელს კირილე ძიუბინსკის მიერ ფრანგულიდან თარგმნილი წიგნიც, მაგრამ სათაურშივე წერია, რომ იგი ქალბატონი დრანსეს მოგონებებს წარმოადგენს.³⁵

ძიუბინსკი გვესაუბრება, როგორც იმპერიული პოლიტიკის მეხოტბე და აპოლოგეტი. მისი აზრით, რუსეთს კავკასიაში დამპყრობლური მიზნები როდი ამოძრავებს, არამედ – აქაურ ველურ ხალხებში განმანათლებლური იდეების გავრცელების ზნეობრივი მიზანი, მათში სამოქალაქო შეგნების, შრომის კულტურის დამკვიდრება. მისი აზრით, ეს აღვირახსნილი ფანატიზმით შეპყრობილი ტომები იოლად არ შეიცვლებიან, მაგრამ დრო მოვა და მადლიერების თვალთ შეხედვენ მათ მტერს – რუსეთს.

„ჩვენს სამშობლოს აქვს სხვა, უმაღლესი, უფრო ზნეობრივი მიზანი – დათესოს ამ ტომებში განმანათლებლობის კეთილისმყოფელი თესლი, შეიტანოს მათში სამოქალაქო ცხოვრების წესი, ასწავლოს კეთილშობილი შრომა და ამით აჩვენოს, რომ მტაცებლობით საზრდოს შოვნა, ველური ცხოველებივით, არ არის ადამიანის საკადრისი ქცევა. მაგრამ ჩვენი დიდსულოვანი მეფეების ამ სანუკვარ მიზანს მალე ასრულება არ უწერია. კიდევ დიდი დრო გაივლის, სანამ დაუმორჩილებელი ტომები, აღვირახსნილი ფანატიზმით ანთებულები და თვით ბუნებისგან დაცულები, ქედს მოიხრიან რუსული იარაღის უძლეველობის წინაშე და სამოქალაქო ცხოვრებასთან წილნაყარნი, მოწიწებითა და მადლიერების გრძნობით შეხედავენ თავიანთ უწინდელ მტერს – რუსეთს, რომელმაც საყვარელი შვილების დაღვრილი სისხლის, უამრავი მსხვერპლის სანაცვლოდ მატერიალური და სულიერი განძი მოუტანა მათ. დიახ, კიდევ მრავალი წელი გაივლის, მრავალი მსხვერპლი გახდება სატირო, სანამ ჩვენი კეთილი სამშობლო კავკასიის მთებზე საკუთარი კაცთმოყვარეობის დროშას აღმართავს. მაგრამ ასეთია ყველა დიდი მოვლენის, დიდი გარდატეხის ბედი!..³⁶

ძიუბინსკის შეფასებით, კავკასიელთა საბოლოო მორჯულებამდე რუსებმა მათი ადათები, ზნე-ჩვეულებები უნდა შეისწავლონ. ანა დრანსეს წიგნიც ამიტომ შევარჩიეთო, თორემ ეს ამბები უკვე სხვებმაც აღწერეს და გამოაქვეყნესო...³⁷

ფრანგი ნომადის ტექსტი გამორჩეულია ძალდაუტანებელი ნარატივით, შთაბეჭდილებათა და განცდათა სიუხვით, პერსონაჟების უნიკალურობით. კითხვის დასრულების შემდეგაც სულ თვალწინ გიტრიალებს: წინანდლის დარბეული კარ-მიდამო,

35. Пленницы Шамиля. Воспоминания Г-жи Дрансе, взятой в плен вместе с княгинями Варварой Ильиничной, вдовой генерал-майора кн. И. Орбелиани, Анной Ильиничной, супругою полковника кн. Д. Чавчавадзе, с детьми их и другими, во время вторжения скопищ Шамиля в Кахетию, въ 1854 г. Изданная въ Париже въ 1857 году.

36. Пленницы Шамиля. 1858, გვ. 2.

37. აქ უდავოდ იგულისხმება ევგრაფი ვერდერეცკის თაოსნობით 1856 და 1857 წლებში შედგენილი და 1857 წელს უკვე ინგლისურად (ჰ. ედუარდის თარგმანი) გამოცემული წიგნი.

თავდამსხმელთა ტლანქი და უხეში სხეულები, შამილი და მისი იდუმალი სამფლობელო, ანა ბაგრატიონი და მისი შვილები, ლიდია და ევა – ორი უცოდველი მსხვერპლი, ვედენოელი დერვიში და მისი ქალიშვილი, მელანო და კატერინა, ბარბარე და ნინო ჭავჭავაძეები, სერალში დაბადებული ნიკოლოზი, დაღესტანში დარჩენილი ქართველი ქალები... თითქოს ყურშიც უწყვეტად ჩაგესმის ტყვე ქალების მხურვალე ლოცვა და ყაზი-მაჰმადის მგზნებარე სიტყვები: „არც ერთი მამაკაცის მხერას არ შეუღწევია მათ რიდეებში. სპეტაკნი არიან, ვითარცა შროშანები და დაცულნი ყველას თვალისგან, ვითარცა უდაბნოს ქურციკები...“

ანას ტექსტით შთაგონებული ალექსანდრე დიუმა 1858 წელს სასწრაფოდ გამოეშურა კავკასიისკენ და აქ ორწლიანი მოგზაურობის შესახებ შესანიშნავი წიგნი გამოაქვეყნა.

ბელგიელმა მწერალმა და მოგზაურმა **კარლა სერენამ**³⁸ საქართველო 1876-1878 და 1881 წლებში მოინახულა. ბუნება და ყოფა მან არა მარტო სიტყვიერად აღწერა, არამედ მისი ფოტოების მიხედვით გაკეთებული საუცხოო ილუსტრაციებით დაასურათა. ილუსტრაციებზე თხუთმეტმა მხატვარმა იმუშავა. იმერეთის, სამეგრელოს, სვანეთის, გურიის, აფხაზეთის, მესხეთის, ჯავახეთის ბუნება და ხალხი ისეთ პანორამას ქმნის, რომ შეუძლებელია მოსწყდე მანამ, სანამ ბოლო ნამუშევარს არ იხილავ. კოლექციაში შევიდა ფრანგი მოქანდაკის, მარსელ ლანსელოს რამდენიმე გრაფიურა.³⁹

კარლა მსუბუქად და ზედმეტი ეპითეტების გარეშე, გონებასახვილურად ეხმინება ქართველთა და კავკასიელთა ყველა იმ ადამს, ტრადიციას, რომელიც ევროპელისთვის უცხო ან მოულოდნელია. მისი აზრით, ევროპისგან მოშორებულ ქვეყნებში მცხოვრები ხალხის თავისებურებები მანკიერებად კი არ უნდა ჩაითვალოს, არამედ – თავისებურებად, რომელიც მათ დანარჩენი სამყაროსგან გამოარჩევს.

ჩემთვის სასიამოვნო აღმოჩენა იყო, რომ კარლამ გრემიც მოინახულა და იქ ჯორჯაძეების ოჯახი გაიცნო. სავარაუდოდ, ეს ბარბარე ერისთავის და ზაქარიას ჯორჯაძის ოჯახია. ეს ორი დაუდგრომელი ქალი ერთმანეთს ვერ შეხვდებოდა, რადგან ბარბარე ამ დროს საინგილოშია. მისმა ნათესავებმა კი კარლას უთუოდ უმასპინძლეს.

38. Caroline Hartog Morgenstein – Serena, 1824-1884.

39. კარლას სტატიები იბეჭდებოდა ჟურნალში „Le Tour du Monde“ 1880 წელს, ხოლო 1881 წელს გამოიცა „Mon Voyage: souvenirs, Vol. I: De la Baltique a la Mer Caspienne“. მხატვარ-ილუსტრატორები იყვნენ: Robert Langlois, Antonie Eugene Ronjat, Achille-Louis-Joseph Sirouy, Achille Granchi-Taylor, P. Sellier, Jean-Paul Laurens, A. Deroy, Gaston Charles Vuillier, Hubert Clerget, Charles Goutzwiler, Illarion Pranishnikoff, Alexandre Ferdinandus, Pierre Fritel, Eugène Burnand, Marie Dronsart, Marcelle Lancelot. კარლამ დიმიტრი ერმაკოვის რამდენიმე ფოტოც გამოიყენა. ფრანგ მოქანდაკე ქალს, მარსელ ლანსელოს ეკუთვნის გრაფიურები: „გორის დუქანი“ და „გორელი ხაბაზები“.

სამურზაყანოსა და აფხაზეთში, ავი სულის, როკაპის, წინააღმდეგ გამართული რიტუალი კარლას იტალიურ jettatore-ს ახსენებს. ეს იგივე „ჭიაკოკონობაა“, როცა ადამიანები უნდა გაფრთხილდნენ, რომ ჭინკამ მათ გული არ ამოაცალოს და როკაპს არ მიართვას. განსაცდელის თავიდან ასაცილებლად, სახლების წინ ჯვრებს ამავრებენ და უზარმაზარ კოცონს ანთებენ.

სამეგრელოს, სამურზაყანოსა და აფხაზეთის ყოფის გაცნობისას, კარლამ სიღარიბე ყველა წოდებაში დაინახა, გარდა პოლიციელებისა, სტარშინებისა და სხვა ჩინოვნიკებისა. თვალში საცემი იყო გლეხების საკუთრების სიმწირე, რადგან მათი განთავისუფლება 1861 წლის რეფორმის შემდეგ მოხდა. ქუთაისის წმინდა ნინოს სახელობის ქალთა სასწავლებელი და სასოფლო-სამეურნეო სკოლა განათლების საერთო სურათს (არასაკმარისი ვაჟთა სკოლები და საქალებო სკოლების არარსებობა) ვერ ცვლიდა.

კარლამ საინტერესოდ აღწერა ქვეყნის მთავართან სტუმრობა, შერვაშიძეების, დადიანებისა და ანჩაბაძეების ურთიერთობა, საზოგადოებისა და მეურნეობის ორგანიზების წესები, მონასტრებისა და ისტორიული ძეგლების სტილი და მხატვრობა, ხალხური თქმულებებისა და ლეგენდების ადგილი მოსახლეთა მესხიერებაში. მასში ცნობისმოყვარეობას აღძრავდა გეოგოგისა და გართობის რიტუალები, ცხენოსანთა ასპარეზობა და სარისკო ორთაბრძოლები, ჩაცმულობა და სამკაულები, კვების პროდუქტები და სამზარეულო, რელიგიური რიტუალები, სხეულის ენა და ქალების თავისუფლების ხარისხი:

„...მეგრელი და სამურზაყანოელი ქალებისგან განსხვავებით, აფხაზი ქალები ნაკლებად ჩანან საჯაროდ; ამას ფესვები უნდა ჰქონდეს ისლამში, რომელიც ამ ქვეყნის წინა რელიგია იყო და გარდა იმისა, რომ მისი კვალი ჯერაც ჩანს ადათ-ჩვევებში, ერთგვარად შერევია კიდევ ქრისტიანობას, რომელსაც ახლა აღიარებენ. ამის მიუხედავად, ქალს, რომელსაც არ მოსწონს საკუთარი ქმარი, უფლება აქვს მიატოვოს იგი და დაუბრუნდეს საკუთარ ოჯახს, მიუხედავად ქმრის წინააღმდეგობისა. ამასთან, ქალი დედოფალია საკუთარ ოჯახში, ქმარი კი მას გულისხმიერებითა და პატივისცემით ეპყრობა და ზოგავს თითქმის ყოველგვარი დამღლევი საქმიანობისაგან. ამ რეგიონში ქორწილი დიდი დღესასწაულია...“⁴⁰

მოგზაურმა მნიშვნელობა მიანიჭა სხვადასხვა ეთნოსისა და აღმსარებლობის წარმომადგენელთა მშვიდობიან თანაცხოვრებას აფხაზეთშიც და ჯავახეთშიც შეამჩნია რუსების ავტორიტარული და მილიტარისტული მმართველობის დაღი ხალხის განვითარებაზე. იგი ერთნაირი ცნობისწადილით უსმენდა დუხობორების

40. Carla Serena, *Excursions in the Caucasus from the Black Sea to the Caspian Sea: 1875-1881*, Narikala Publications, Inc. New York. London. Tbilisi, 2015, p:195.

მეთაურს, მუსლიმ და ქრისტიან გლეხებს ან სამონასტრო ცხოვრებაში ჩართულ პირებს.

1881 წელს, „ენიგმატურ კავკასიაში“ მეორე მოგზაურობიდან სამშობლოში დაბრუნებული ქალი, სიხარულით იგონებდა ჩვენს ქვეყანაში გატარებულ დროს და ადამიანებს, რომლებიც მას გულწრფელი სიყვარულით და სტუმართმოყვარეობით ხვდებოდნენ. „ამას არასოდეს დავივიწყებ“ – ამბობდა იგი და ვინ იცის, იქნებ ისევ თბილისისკენ ან რომელიმე ჩვენი მხარისკენ მოუწევდა გული?!

1876 წლიდან 1885 წლამდე საქართველოში ცხოვრობდა **ბერტა კინსკი – ფონ ბუტნერი**, ავსტრიელი მწერალი, ნობელის პრემიის ლაურეატი მშვიდობის დარგში და მისი მეუღლე – არტურ გუნდაკარ ფონ ბუტნერი.

1909 წელს გამოქვეყნებულ „მემუარებში“⁴¹ ბერტამ მნიშვნელოვანი ადგილი დაუთმო საქართველოს. აქ არის მისი შთაბეჭდილებები გორში, ქუთაისში, თბილისსა და ბუგდიდში მოგზაურობაზე, იქაურ ყოფასა და ქართველებზე. სამეგრელოში მათი მასპინძელი ეკატერინე ჭავჭავაძე, ხოლო თბილისში თამარ ჭავჭავაძე იყო.

საგულისხმოა ის ფაქტიც, რომ ბუტნერები „ვეფხისტყაოსნის“ ტექსტით დაინტერესდნენ, გაეცნენ მასთან დაკავშირებულ მასალებს და თარგმნაც სცადეს:

„ქართული პოემის თარგმნა კმაყოფილებით გვაკმაყოფილებდა. ჩვენ წინაშე გადაიშალა უკვე განვლილი მე-13 საუკუნის სამყარო ამ შორეულ მხარეში. ეს იყო ეპოქა, რითაც ამაყობენ ქართველები, რადგან ამ დროს ქვეყანაში ოქროს ხანა სუფევდა – ეპოქა, როცა დიდი დედოფალი თამარი მართავდა საქართველოს, შოთა რუსთაველი გალობდა მის კარზე, უმღეროდა მის ღიღებს, მის ძაღას, მის სილამაზეს.

„ვეფხისტყაოსნის“ ჩვენეული თარგმანი არ დაიბეჭდა, მაგრამ ჩვენ არ გვინანია ის დრო, რაც ამ სამუშაოზე დაგვხმარა. ყოველივე ამის მეშვეობით და იმ მონათხრობითაც, რითაც გვამდიდრებდა ჩვენი ქართველი პატრიოტი, ჩვენ შევალწიეთ ქართველი ხალხისა და ამ მომავლოდელი ქვეყნის არსსა და სულში, მის ისტორიასა და ლიტერატურაში, სადაც ამდენი ხანი დავყავით.“⁴²

„სამოგადოებაში გასვლა“ – ასე დაარქვა ბერტამ მოგონებების იმ თავს, სადაც მისი ოჯახის ვენის პირველ „Societe“-ში მოხვედრის მცდელობებია აღწერილი, რომელთაგან ერთ-ერთი 18 წლის ბერტას 55 წლის ქვრივზე გათხოვების ისტორიაა. მაღალ სამოგადოებაში მოხვედრის სურვილმა ვერ დაჯაბნა თავისუფალი არჩევანისა და ნების სული და საქმროს მტკიცე უარი განუცხადა.

ბადენ-ბადენის, ვენეციის, რომის მეჯლისები, მიღებები, თეატრალიზებული წარმოდგენები ერთმანეთს ცვლიდა. ახალგაზრდა, ინტერესიანმა ბერტამ ამასობაში კი-

41. Bertha von Suttner, Memoiren, Carl Schunemann Verlag, Bremen, 1965.

42. იქვე, გვ. 117-120

დეე ორი ხელის მთხოვნელი გააწბილა და ამით ძალიან გაიხარა, რადგან დაოჯახებაში გარე სამყაროსგან მოწყვეტის საფრთხე დაინახა და ვინ იცის, ამ გზით შეიძლება საშვეიდობო მოძრაობაშიც ვეღარ ჩართულიყო?!

ბალ-მასკარადების პერიოდს მალევე მოჰყვა დაღვინებული მკითხველის ეპოქა. მისთვის ეს არის ორი, ერთმანეთის გამამდიდრებელი ცხოვრება: პიროვნული და წიგნისმიერი:

„ეს ორმაგი გამოცდილებაა. სწორედ მისგან ამოიზარდა ის პიროვნება, რომელსაც მე დღეს წარმოვადგენ. „ათას ერთი ღამის“ ზღაპრები ზუსტად ისევე მიეკუთვნება ჩემს ალმოსავლურ შთაბეჭდილებებს, როგორც ჩემი რეალური ყოფნა კავკასიაში და არც ერთ ცოცხალ დამსვენებელს ისე არ აუჩქროლებია ჩემთვის გული, როგორც მარკიზ დე პოზას წარმოსახულ სახეებს...“⁴³

ჰერ ფონ კონიდსვარტერის რჩევით, ბერტამ ეკატერინე ჭავჭავაძე-დადიანი და მისი შვილები: ნიკო, სალომე და ანდრე გაიცნო. ქალები იმდენად დაახლოვდნენ, რომ ბერტა სალომეს მეჯვარეც იყო, როცა იგი პრინც აშილ მიურატზე დაქორწინდა. მისთვის ეს ამბავი სასიამოვნო და საინტერესო აღმოჩნდა, ამიტომ არაჩვეულებრივი რუდუნებით აღგვიწერს საზეიმო ცერემონიას: პატარძლის სამკაულების ბრწყინვალეობას და შლეიფს, რომელსაც საოჯახო გერბი, ოქროს საწმისი ამშვენებდა.

ეკატერინე ჭავჭავაძე მის ავსტრიელ ფავორიტ გოგოს, რომელსაც სიყვარულით „კონტესინას“ ეძახდა, საქორწინო საჩუქარიც შეურჩია და საკუთარი საიდუმლოებებიც გაანდო:

„...მერე მკითხა, ნუთუ თავყვანისმცემელი არ გყავსო, ნუთუ არავინაა ისეთი, რომ მოგეწონოსო. არა, ჩემი გული თავისუფალი იყო. სულ ახლახან ბეწვზე გადარჩა, რომ თავიდან არ დანიშნულიყო. წინა ზაფხულს ბიარიცში ხელი სთხოვა ჰერცოგ ფონ ოსსუნამ, ესპანეთის უდიდესმა და უმდიდრესმა დიდებულმა. მაგრამ დედოფალმა გათხოვება ვერ გადაწყვიტა. იგი თავისი შვილების მომავლით ცხოვრობდა და ერთი სული ჰქონდა დაბრუნებულიყო თავის ქვეყანაში, სიდანაც განდევნილი იყო ნიკოს სრულწლოვანებამდე.“⁴⁴

მრავალი წელი იგონებდა ბერტა ერეკლე ბაგრატიონს, რომელსაც სწორედ ამ სანუკვარ ოჯახში დაუახლოვდა და შეუყვარდა. თუმცა ეს ურთიერთობა მალევე დამთავრდა, რადგან ვაჟს სულ სხვა ქალი უყვარდა და ავსტრიელი გოგონასთვის ყალბი დაპირებები არ მიუცია.

სასიყვარულო იმედგაცრუებას მოჰყვა საშემსრულებლო წარუმატებლობაც:

43. იქვე, გვ. 47

44. იქვე, გვ. 52

ხანგრძლივი მუზიციურობისა და მეცადინეობის შემდეგ, ბერტას პოლინა ვიარდო გარსიამ მოუსმინა და სანუგეშო ვერაფერი უთხრა. შემდეგ პარიზში, მანესტრო დუპრეცისთანაც სცადა ბედი, მაგრამ ამაოდ. მუსიკალური ეპოპეა კი დამთავრდა 18 წლის ინგლისელი ვაჟით, რომლის მამა დაბეჯითებით ითხოვდა 25 წლის ბერტას ხელს, მაგრამ ნიშნობის დღეს სასიძო არ გამოცხადდა და მხოლოდ მეორე დღეს მოიწერა, რომ ორივე ბატონი ინგლისს გაემგზავრა.

საოპერო ხელოვნებისადმი სიყვარულმა დააკავშირა ბერტა პრინც ადოლფ ვიტგენშტაინთან, რომელიც შესანიშნავად მღეროდა და ბედის საძებნელად ამერიკაში გაემგზავრა. ბერტა კი, როგორც მისი საცოლე, ვისბადენში დარჩა იმ იმედით, რომ ადოლფის მიერ ვარსკვლავური კარიერის აწყობის შემდეგ, ისინი კვლავ ერთად იქნებოდნენ. მაგრამ გემით მგზავრობისას ადოლფი გარდაიცვალა და მისი ცხედარი, გულზე საცოლის ფოტოსურათით, ზღვაში ჩაუშვეს.

„...ეს იყო ჩემი ცხოვრების მტკივნეული და მაინც მშვენიერი ეპიზოდი – სიმღერის ჯადოსნობის და იმედგაცრუების მოკლე რომანი. გემის Rhein-ის გემბანზე ასწიეს სამგლოვიარო დროშა, ქორალი შეასრულეს, გემი გაჩერდა და სალუტის თანხლებით ცხედარი ზღვაში ჩაუშვეს. ტალღებში გაუჩინარდა – ხელოვანი, პრინცი, კეთილი სულის ადამიანი. მას საცოლის სურათი დადუმებულ გულზე დაადეს; ზღვის ტალღები ქვითინით უმღეროდნენ მიცვალებულს და ჩემს სურათს საქორწილო სიმღერას“.⁴⁵

ნებისმიერი თავგადასავალი, წარუმატებლობა ან ხელმოცარულობა ბერტასთვის წიგნის ერთი ფურცელი იყო, რომელსაც წყაროს წყალივით ეწაფებოდა: რეალური, ცოცხალი ცხოვრების პარალელურად მიდიოდა ახალგაზრდა ქალის ნუგეშისმცემელი მხატვრულ-შემოქმედებითი და სამეცნიერო ცხოვრება. კანტი, შოპენჰაუერი, ჰარტმანი, შტრაუსი, ფოიერბახი, პასკალი, კომტი, ლიტრე, ვიკტორ კუზენი და სხვა მრავალი ავტორი ბერტას სულიერი მეგობრები შეიქნენ და სწორედ მათი დახმარებით აფართოებდა საკუთარ სააზროვნო ასპარეზს.

მაგრამ 1870-იანი წლებიდან, ევროპული ომების მიმდინარეობისას, მომავალ პაციფისტში ჯერ კიდევ არ ჩანდა მილიტარისტულ მსოფლმხედველობასთან დაპირისპირების იმპულსი. ამის მიზეზი კი იყო ომთან პერსონალური კავშირის უქონლობა და არარსებობა რწმენისა, რომ სოციალური სინამდვილე აუცილებლად შესაცვლელია და შესაცვლელია სწორედ მისი მონაწილეობით.

„სიმღერ-სიმღერით“ სიარულის დრო დასრულდა, როცა ოცდაათი წლის ბერტას უკვე თავი უნდა ერჩინა. გერმანული, ფრანგული, ინგლისური და იტალიური ენების სრულყოფილად მცოდნე და კარგი მუსიკალური განათლების ქალი სამუშაოს ძებნას შეუდგა. ასე მოხვდა ფრაუ კინსკი მისი მომავალი მეუღლის, არ-

45. იქვე, გვ. 79

ტურ გუნდაკარ ფონ ზუტნერის ოჯახში, მისი დების (ლოტი, მარიანე, ლუიზე და მათილდე) აღმზრდელად. არტური შვიდი წლით უმცროსი იყო, მაგრამ ამას დიდი გრძნობის დაბადებისთვის არანაირი დაბრკოლება არ შეუქმნია. თუმცა, ურთიერთობის დრო მათ აუცილებლად უნდა „მოეპარათ“ და მშობლების თვალს უნდა მორიდებოდნენ. ვაჟის გამიჯნულების ამბავი ბარონესამ მალე შეიტყო და აღმზრდელი სახლიდან წავიდა. ასე აღმოჩნდა ბერტა აღფრედ ნობელთან, პარიზში, საყვარელ არტურთან განშორებით გულდამძიმებული:

„ერთმანეთს ვეხუტებოდით და ვტიროდით. „ერთმანეთს უნდა დავშორდეთ! ნუთუ ეს შესაძლებელია? გვეყოფა კი ძალა? იქნებ რამე მოხდეს, რომ დავრჩე? ოჰ, ეს ზედმეტად კარგი იქნებოდა... არაფერიც არ მოხდება... არ შეიძლება... და კიდევ რამდენიმე უხმო, მარილისგემოიანი კოცნა, კვლავ ამოოხვრა და ხელახლა ჩივილი, ტკივილით გაჯერებული მოსაფერებელი სიტყვები. წასვლამდე არტური ჩემ წინ დაეცა და კაბის კალთაზე მორჩილად მეამბორა.“⁴⁶

ასე დაიწყო სატრფოს მონატრებით გამოწვეული კაემნისა და ნობელთან გამოგნებლად საინტერესო საუბრების ეპოპეა. ბერტასკენ მოფრინავდა არტურისა და მისი დების უსასრულო წერილები. წყვილი მოიცვა მეღანქოლიამ და რადგან მისი დაძლევა ორთავსთვის შეუძლებელი შეიქნა, ბერტა პარიზში დაბრუნდა. სასტუმროს ნომერში მისულ არტურს სიცოცხლე დაუბრუნდა. 1876 წლის 12 ივნისს, გუმპოლდსკირხნერის სამრევლო ეკლესიაში მათ ჰვარი დაიწერეს და მალევე საქართველოში გამოემგზავრნენ:

„ჩვენი მიზანი იყო იმ ქვეყანაში ჩასვლა, საიდანაც იაზონმა ოქროს საწმისი მოიპარა. იმ მომენტში, მგონი, ორივე ჩვენაგანში იძალა იაზონის განწყობამ: ერთმანეთში ირეოდა სათავგადასავლო ჟინი, დამპყრობლის თავდაჯერებულობა, იმედებით გაბრუნება. წინ გველოდა ახალი, მოულოდნელობებით აღსავსე სამყარო; ისეთ მიწაზე უნდა დაგვედგა ფეხი, რომელიც გამორჩეული იყო ყველაზე უფრო კლასიკური დიდებულებით; უამრავი ისეთი განცდა გველოდა, რომელთა ბოლომდე წარმოდგენაც კი არ შეგვეძლო. ვიცოდით, რომ გველოდებოდნენ და ხელგაშლილი შემოგვეგებებოდნენ...“⁴⁷

ბერტა უკიდურესად ბედნიერი იყო იმით, რომ მათ ოქროს საწმისის მოტაცება არ სჭირდებოდათ, რადგან ერთმანეთი ჰყავდათ, როგორც ყველაზე მნიშვნელოვანი და სანუკვარი ქონება.

ავსტრიელი წყვილი ფოთში ჩამოვიდა. ღამე იქვე გაათიეს. დილით კი ქუთაისში წავიდნენ, სადაც გენერალმა წერეთელმა უმასპინძლა. სტუმრები მოიხიბლნენ

46. იქვე, გვ. 90

47. იქვე, გვ. 90

ლხინით, სასმლით და ქართული ცეკვით. მესამე დღეს, გრაფი კომტ დე როზმორ-დუკის თანხლებით გორდისკენ გაეშურნენ, სადაც მთელი ზაფხული დარჩნენ. შემდეგ წყვილი კვლავ ქუთაისში დასახლდა, ჯერ გენერალ ჰაგემაისტერის სახლში, ხოლო შემდეგ – ნაქირავებ ბინაში. ბერტა სიმღერისა და ფორტეპიანოს გაკვეთილებს იძლეოდა, ხოლო არტური – გერმანულისას და ასევე კორესპონდენციებს, პატარა ჩანახატებს აგზავნიდა გერმანული პრესისათვის.

საქართველოში დაიწყო წერა ბერტამაც. იგი წარმატებით ბეჭდავდა Presse-ში, ფსევდონიმით B. Sulot. მისი რომანები „ცუდი ადამიანი“, „ჰანნა“ და „სიყვარულის არსენალი“, ხოლო არტურის „დარეჯანი“, „ამნაური“ და „კავკასიის შვილები“ სწორედ აქ შეიქმნა.

1877 წლის 24 აპრილს რუსეთ-თურქეთის ომი დაიწყო. ქუთაისელი ქალების მიერ ორგანიზებულ საქველმოქმედო ღონისძიებებში ბერტა ენთუზიაზმით მონაწილეობდა. ცოლ-ქმარი მზად იყო დატრილების მოვლა-პატრონობაში ჩართულიყო, მაგრამ იმ პირობით, რომ ორთავეს ერთ ჰოსპიტალში მიამაგრებდნენ. ასე არ გამოვიდა, ამიტომ ამ განზრახვას შეეშვნენ. სამშობლოდან მიღებული ყველა წერილი მოახლოებულ განსაცდელს ამცნობდა და ნათესავებს უკან დაბრუნებას ურჩევდნენ. შიმშილი, საომარი მოქმედებებისა და შავი ჭირის გავრცელების შიში, არტურის უმცროსი დის, მათილდეს გარდაცვალება – ეს ყველაფერი დამთრგუნველი იყო, მაგრამ ისინი ბედს არ ეპუებოდნენ:

„ეს ხომ იმიტომ მოგვეცა, რომ ჩვენი ხასიათი გამოეწრთო და ჩვენში კაცობრიობის ტანჯვისა და ხალხის სიდუხჭირის მიმართ თანაგრძნობა აღეძრა, რამაც მოგვიანებით შექმნა საფუძველი ჩვენი თანამშრომლობისა კაცობრიობის საკეთილდღეოდ და გაავიღვიძა ერთმანეთზე უფრო სასიკეთო შეხედულებები“.⁴⁸

1878 წელს ზუტენერები თბილისში გადმოსახლდნენ. ბერტა მუსიკას ასწავლიდა, არტური ფრანგ ხალიჩების ფაბრიკანტთან და მშენებელთან, მუსიე ბერნესთან მუშაობდა. ბინადაც ამ ბატონთან ცხოვრობდნენ. ხშირად სტუმრობდნენ თამარ ჭავჭავაძეს, რომელიც ბერტას ქართველი სიყვარულის, ერეკლე ბაგრატიონის ქვრივი იყო. მის სალონში იკრიბებოდა მთელი ქართული არისტოკრატია. ზუტენერები გამუდმებით მუშაობდნენ და მოგზაურობდნენ სამეგრელოს, იმერეთსა და თბილისს შორის, უთვალავჯერ შეიცვალეს ბინა. ერთი ხანობა ზუგდიდში, გერმანულ კოლონიაში დასახლდნენ. არტური აშილ მიურატს ეხმარებოდა სახლისა და საჯინიბოების მშენებლობაში, ბალის გაშენება-კეთილმოწყობაში, ხოლო ბერტა – პატარა ლუსიენსა და ნაპოს ამეცადინებდა.

48. იქვე, გვ. 105

1884 წელს, ბერტამ ორი მეგობარი დაკარგა: ეკატერინე ჭავჭავაძე და დედა, რამაც მისი სამშობლოში დაბრუნება დააჩქარა. წასვლამდე რამდენიმე თვე მამია გურიელთან იცხოვრეს, რათა „ვეფხისტყაოსნის“ თარგმანზე ემუშავათ და თამარ მეფის მმართველობაზე, ქვეყნის ისტორიაზე უფრო მეტი გაეგოთ.

საქართველო ზუტენერებისთვის თავშესაფარიც იყო და სამშობლოც, აზიაც და ევროპაც, მწარეც და ტკბილიც. ისინი მუშაობდნენ და მეურნეობას უძღვებოდნენ, სწავლობდნენ და ასწავლიდნენ, მაგრამ თითქოს ამას ზრდასრულებივით კეთილდღეობისთვის კი არ აკეთებდნენ, არამედ – გასართობად, სათამაშოდ. თითქოს მთელს ცხოვრებას ცხრა წელი ჯიბიდან ამოაცალეს, საქართველოში ჩამოიტანეს და ერთმანეთისთვის, სიყვარულისთვის გაფლანგეს. ოქროს საწმისი კი არ მოიტაცეს, არამედ – შეიტკბეს და თვითგამდიდრებას და სულიერ გამდიდრებას მოახმარეს:

„ვტიტინებდით ათას სისულელეზე, ვიქცევოდით უგუნურად, გამოვიგონეთ ჩვენი ენა, ბრალდებებს ვაყრიდით ერთმანეთს, ვასრულებდით ყველაზე ველურ ცეკვებს და უცნაურ სიმღერებს, ვთამაშობდით... თუ თოჯინებით არა, ჩვენი ფანტაზიით წარმოდგენილი არსებებით, მოკლედ: ბრიყვი, ბრიყვი, ნეტარი ბავშვები...“⁴⁹

1876-1885 წლების თავგადასავალი ბერტა ზუტენერმა თავის მონოგრაფიაში „Es Lowos“ აღწერა. ზოგი მკითხველი საყვედურობდა ავტორს – ინტიმურ ცხოვრებას ასეთი გამომზეურება, სახალხოვად გამოფენა არ უხდებაო. ამ ყვედრებაზე ბერტას ეცინებოდა, რადგან იგი წერდა არა საყოველთაო მოწონებისთვის, არამედ მხოლოდ იმათთვის, ვინც მის ტექსტში საკუთარ თავს აღმოაჩენდა. ასეთები კი იყვნენ და უხვად უგზავნიდნენ წერილებს ბერტას, ფსევდონიმით „ერთი“.

მარჯორი და ოლივერ უორდროპების შრომები საქართველოს შესახებ⁵⁰ და მთელი მათი ცხოვრება, ქართული კულტურის პოპულარიზაციისთვის მოღვაწეობის შეუდარებელი მაგალითია. მათ დააფუძნეს ანგლო-ქართული საზოგადოება, რომელიც მიზნად ისახავდა საქართველოს ისტორიის, ლიტერატურისა, ხელოვნების, ეთნოლოგიისა და არქეოლოგიის შესწავლას, საქართველოსთან და კავკასიასთან დაკავშირებული წიგნების, თარგმანების გამოქვეყნებას და ამ ლიტერატურის შესახებ საცნობარო ბიბლიოთეკის შექმნას.

მარჯორი საქართველოს ორჯერ ესტუმრა, 1894 და 1896 წლებში. მეორედ ჩამოსვლისას მას უკვე ოლივერის გარდა თან ახლდა დედა – მარჯორი კამერონ სკოტი, მამა და ძმა – თომას უფროსი და თომას უმცროსი უორდროპები.

ქუთაისში სტუმრებს დათა მიქელაძის სახლში უმასპინძლეს. თამადამ, წერა-კითხვის გამავრცელებელი საზოგადოების წევრმა, კონსტანტინე დიმიტრის ძე ბაქ-

49. იქვე, გვ. 113

50. მარჯორი და ოლივერ უორდროპების გამოქვეყნებული და გამოუქვეყნებელი ნაშრომები, წერილები ინახება ოქსფორდის ბოდლეინის ბიბლიოთეკაში/Oxford Bodleian Library.

რადემ, მარჯორის სადღეგრძელო შესვა: მოუთხრო, თუ როგორ ერგო ღვთისმშობელს საქართველო წილად და როგორ იქცა იგი ჩვენი კულტურის პირველ წმინდანად და მფარველად, როგორი გამორჩეული იყო ქართველი ქალების გავლენა ჩვენს ისტორიაში. ბოლოს კი მჭევრმეტყველმა ორატორმა დასძინა:

„...თუმცა ქალების ეს შესანიშნავი გავლენა დღეს შეწყდა, როცა ქართველების სახელები გამქრალა ისტორიიდან. მიუხედავად ამისა, ქართველები სულიერად არ დაცემულან და ელოდებიან თავიანთ ქალ ნუგეშისმცემელს. იქნებ იმ პირველმა წმინდანმა შეგარჩიათ თქვენ, მარჯორი, რათა კიდევ ერთხელ დაგვიმტკიცოს მისი ზრუნვა. შეიძლება ეს თქვენ ხართ ის პიროვნება, რომელსაც მან ეს დიდი საქმე დაავალა. საიდან სად ჩაუგდია თქვენს გულში ნაპერწკალი და აღუძრავს მასში ჩვენდამი სიმპათია და სიყვარული? საიდან სად მოგიმართავთ თქვენ ჩვენკენ, რომ გავგიცნოთ და შეგვისწავლოთ რიგიანად და შემდეგ გავგაცნოთ ევროპას, აღძრათ ჩვენდამი სიმპათია, რომ იმით იქნება მივიწყებული დროებით ერი გამოირკვეს წყვდიადიდან... ღმერთმა ქნას შეგესრულებინოთ ეს დიდი და სამძიმო საქმე პირნათლად...“⁵¹

მარჯორი სიცოცხლის ბოლომდე მეგობრობდა და მიმოწერა ჰქონდა ქართველ მწერალ და საზოგადო მოღვაწე ქალებთან: ანასტასია წერეთელთან, დომინიკა ერისთავთან, ელისაბედ საგინაშვილთან, ოლღა გურამიშვილთან, ტასო მაჩაბელთან, ელენე წერეთელთან, ბაბო ბაგრატიონთან. მას ჰყავდა ქართველი ნათლულები: ელენე გიორგის ასული როსტომაშვილი და ხიდისთაველი ობოლი ბიჭი ალექსი. სოფელ ნიგოითში მას დიმიტრი მაჭუტაძე და მისი ინგლისელი მეუღლე ანა ტარსეი მასპინძლობდნენ.

მარჯორი გამუდმებით აქვეყნებდა ინფორმაციას საქართველოში მიმდინარე მოვლენებზე, განსაკუთრებით კი რუსეთის იმპერიის ბოროტმოქმედებაზე: 1803 წელს მარიამ დედოფლის ძალადობრივ გადასახლებაზე, სასულიერო პირების შევიწროებასა და მათ დაპატიმრებაზე, 1905-1906 წლების გამოსვლების საპასუხო რეპრესიებსა და ქართველი ხალხის უფლებებზე, იყოს დამოუკიდებელი და სუვერენული სახელმწიფო. და-ძმა ცდილობდა, რუსეთის იმპერიის სასტიკი ქმედებების შესახებ ხმა მიეწვდინა გავლენიანი წრეებისთვის და გაეგრძელებინა საპროტესტო წერილები. საყურადღებოა მარჯორის მიმართვა რუსი ქალებისადმი:

„რუსო მანდილოსნებო! ნუთუ არ გესმით ქართველთა ქვითინი და კვნესა? ნუთუ არ იცით, რას უშვრებიან თქვენს დებს ლამაზ საქართველოში? მთელი ქვეყანა ალშია გახვეული, არავის იწყალებენ – მოხუც ქალებს, 8 წლის ბავშვებს, სკოლის

51. ეს წერილი უორდროპების არქივში ინახება, თავის სადისერტაციო ნაშრომში იგი შორენა შტოიერმა გამოაქვეყნა, იხ: <http://iliauni.edu.ge/uploads/other/1/1441.pdf>

მოსწავლე გოგონებს... საშინელებამ და სიგიჟემ მოიცვა ქვეყანა. ეს ყოველივე საქართველოს სხვადასხვა კუთხეში მეორდება. ორი თვეა ქალები და ბავშვები ტყეს აფარებენ თავს, დამსჯელი დივიზიებისაგან თავის დასაცავად, მაგრამ იქაც არ არიან უსაფრთხოდ აღვირაბსნილი სისასტიკის წინაშე. რამდენი პატარა ბავშვი დაიღუპა ან ძალადობის მსხვერპლი გახდა...⁵²

1900 წელს ინგლისში გამოიცა მარჯორის და ოლივერის ნაშრომი „წმინდა ნინოს ცხოვრება“.⁵³ იგი თავს უყრის საქართველოს განმანათლებელი ქალის შესახებ არსებულ წყაროებს და წარმოაჩენს წმინდანის დამსახურებას ქართველი ხალხისა და ქრისტიანული სამყაროს წინაშე.

1912 წელს კი ოლივერ უორდროპმა საზოგადოებას წარუდგინა მარჯორის მიერ პროზაულად თარგმნილი „ვეფხისტყაოსანი“. წიგნს წინ უძღოდა ოლივერის ვრცელი წინასიტყვაობა, აწ განსვენებული მისი დის ცხოვრების, რუსთაველის ქმნილების და რუსთველოლოგიური კვლევების შესახებ.⁵⁴

მარჯორის გარდაცვალებას უამრავი ქართველი მოღვაწე გამოეხმაურა: საგაზეთო სტატიები და ლექსები მიუძღვნეს, დასტიროდნენ შინაურსა და უგულითადეს მეგობარს. იმ დროს ინგლისში მყოფმა ქართველებმა კი 1909 წლის 21 დეკემბერს თავი მოიყარეს, ქალაქ სევენოკისკენ გაეშურნენ და დაესწრნენ საგვარეულო აკლდამაში მის დასაფლავებას.

საქართველოს დემოკრატიული რესპუბლიკის დაფუძნებიდან ორი წლის თავზე საქართველოს ესტუმრა ჰოლანდიელი ფემინისტი და მწერალი **ოდეტ კენი**, რომლის ნაშრომი „ოქროს საწმისის ქვეყანაში, დამოუკიდებელ, მენშევიკურ საქართველოში“ ჩვენს ქვეყანაში სწორედ მის მოგზაურობას ეძღვნება.⁵⁵

ოქროს საწმისის ქვეყნით დაინტერესება და მისდამი სიყვარული ოდეტს გიორგი (გრიგოლ/გრიშა) წერეთელმა გაუღვივა. მას, როგორც გამორჩეულად პატივსაცემ, მრავალი ღირსებით დაჯილდოებულ მამაკაცს და საკუთარი ერის საუკეთესო შვილს, უძღვნის მწერალი ქალი 1923 წელს პარიზში გამოცემულ მემუარებს.

„ამ პირველ ტომს, რომელშიც აღწერილია საქართველო, დიდი სიყვარულით ვუძღვნი ქართველ თავადსა და კაპიტანს, გიორგი (გრიგოლ) წერეთელს; მსურს

52. მარჯორის ხელნაწერი „Memoir consening events in Georgia in 1906“. იხ: <http://iliauni.edu.ge/uploads/other/1/1441.pdf>

53. Marjory Wardrop and J. O. Wardrop, *Life of St. Nino, Studia Biblica et Ecclesiastica, Esseys, Chiffly in Biblical and Patristic Criticism by members of the University of Oxford, Volume V, Part I.* Oxford, At the Clarendon Press, M DCCCC, 1900.

54. *The Man in the Panther's Skin: A Close Rendering from the Georgian Attempted by Marjory Scott Wardrop.* London: The Royal Asiatic Society of Great Britain and Ireland, 1912.

55. Odette Keun, *Au Pays de la Toison D'or, En Georgie Mencheviste Independante*, Ernest Flammarion, Editeur, Paris, 1923.

ამგვარად გამოვხატო მოწიწება მისდამი და პატივი მივავო ამ ჩინებულ ადამიანს, რადგან ფარდა ახადა ყველაფერს და ცხადლივ დამანახა თავისი ერის განუზომელი ღირსებანი, როცა ჩვენი საამური კავშირით ვტკებოდით; სწორედ ამ ღირსებათა წყალობით, კიდევ უფრო ძლიერ შემიყვარდა მისი შინაგანი სამყარო, შემიყვარდა თავაზიან, სანდომიან, სიყვარულის ღირს მამაკაცთა მოდგმა, რომლის სათაყვანო განსახიერებაცაა გრიგოლ წერეთელი⁵⁶.

ჩვენი ქვეყნის კულტურული თავისებურებების გარდა, ოდეტს აინტერესებს რეფორმები, რომლებიც დამოუკიდებელ რესპუბლიკაში მიმდინარეობს და ალფრთოვანებულია იმით, რომ მმართველმა პოლიტიკურმა ძალამ ქალებს უკვე მიანიჭა აქტიური და პასიური ხმის უფლება. თუმცა, იცის, რომ პარიზის საერთაშორისო კონფერენციის მიერ საქართველოს დემოკრატიული რესპუბლიკის de-jure აღიარებიდან ორი კვირის თავზე, 1921 წლის თებერვალში, ჩვენი ქვეყანა ბოლშევიკებმა დაიკავეს და „გააწითლეს“.

ოდეტი კარგად იცნობს საქართველოს ისტორიას. იცის კოლხი მედეასა და თამარ დედოფლის შესახებ, წაკითხული აქვს მარჯორი უორდროპის მიერ თარგმნილი „ვეფხისტყაოსანი“. ამიტომ ქალების ჩაგვრას ან ჩამორჩენილობას არ მოეღოს და მისი ქართველი დების ძალა და თავისუფლების გამოვლინების ფორმები უფრო აინტერესებს. გარდა ამისა, მას ალბათ ესმის, რომ პრიმიტიული ყოფა თავისთავად წარმოშობს და ამკვიდრებს თანასწორ პასუხისმგებლობას ყოფაში. აქ საქმიანობის სქესურ-როლური განაწილება მკაცრია, ქალსაც და მამაკაცსაც ერთნაირად მძიმე ჭაპნის ტარებას აკისრებს.

ლანდშაფტით, ქალებისა და მამაკაცების იერიით, ბუნების ფერებითა და გარემოს თავისთავადობით მოხიბლული ოდეტი გამოვლენებლად ზუსტად და ძალდაუტანებლად ბადებს მხატვრულ სახეებს და ტექსტში მარგალიტებივით მიმოაბნევს. ხან დაისია წყალგარეული სისხლის ფერი და ხან – ქვემო სვანეთში მომდინარე ცხენისწყალია ბავშვის თვალებივით კრიალა, ხან ლეჩხუმის პანორამა ჰგავს მოელვარე მუარეს და ხან ცხენის ფლოქვებქვეშ დამსხვრეული კენჭების ხმა – კასტანიეტების ჰანგს.

ოდეტის სიყვარული და დასავლეთ საქართველოში მისი მეგზური, გრიშა წერეთელი, პლატონ წერეთლისა და დიგორხან დადეშქელიანის ვაჟი იყო. მათ ქართულ თავგადასავალში ყველაზე დრამატული, ფემინისტური და პოლიტიკური საზრისებით დატვირთული ტექსტი გრიშას დედულეთს ეხება. წყვილი კალაში სწორედ მაშინ ჩავიდა, როცა სახალხო გვარდია მთავრობის დავალებით პირველი მსოფლიო ომიდან დემობილიზებულთა განიარაღების ოპერაციას ატარებდა. მთიელები ამ

56. Odette Keun, Au Pays de la Toison D'or, En Georgie Mencheviste Independante, p:4.

კამპანიას არ ეთანხმებოდნენ, რადგან იარაღის მფლობელთა დიდი ნაწილი არც ქურდი იყო, არც ყაჩაღი და იარაღს თავდაცვითი მიზნით იყენებდნენ.

როგორც ჩანს, სვანებმა „მოულოდნელი სტუმრები“ სამტროდ მოსულებად ჩათვალეს და საღამო ხანს საზარელი სროლა ატეხეს. ოდეტი და გრიშა პოლიციის შენობაში დაიმაღნენ, სააქაოსთან გამომშვიდობების მოლოდინში. ამ მეტაფიზიკურმა, სივრცისა და დროის მიღმურმა ყოფიერებამ სულის ჩარაზული სარკმელი გახსნა და აიძულა გრიშა, ამჟამინდელი სიყვარულისთვის პირველი სიყვარულის ტრაგედია მოეთხრო: როგორ დაუპირისპირდნენ მშობლები მისი და ელენეს სიყვარულს, როგორ ჩაყარა საწამლავი სასოწარკვეთილმა გოგომ საკუთარ და სატრფოს საკვებში, რის გამოც თავად გარდაიცვალა, ხოლო გრიშას ხანგრძლივი მკურნალობა დასჭირდა.

თვალცრემლიანი და აქვითინებული გრიშა ცდილობს ოდეტს მოეხვიოს, მაგრამ ქალი უეცრად გარდაიქმნება იაზონთან დაპირისპირებულ მედეად. ჩვენ ვაკვირდებით კოლხი ამორძალის რეინკარნაციას „ოქროს საწმისის ქვეყანაში“:

„გონგადასული, შეშლილი ქალივით გავუძალიანდი მის მძიმე ხელებს, აუტანელ ტვირთად რომ დამწოლოდნენ მხრებზე და ჩემს მოდრეკას ლამობდნენ. დამეხსენით ყველანი! მინდა, მოვკვდე თავისუფალი და ეული, მარტოდ შთენილი, არა მწადია ეს მკლავები, მარწუხებივით რომ შემომჭდობიან; არა მსურს მამაკაცის ეს ალერსი და ლაციცი; ვნატრობ, მოვკვდე მეთვალყურეთა მხერისაგან შორს, მათი სიტყვებისაგან შორს... არ მინდა არც ღმერთების ნუგეშისცემა, არც ადამიანთა მოდგმის დახმარება, შემწეობა, შველა, მოწყალება და მფარველობა... არავის ვენდობი, არავისი მწამს ჩემი თავის გარდა – მხოლოდ საკუთარი ხელები გამომადგება ჩემი გონებისა და სულის მტკიცე საყრდენად, და როს, ბოლოს და ბოლოს, დავიხსნი თავს ყოველი საძულველი, უცხო მონობის უღლისაგან და ვიგემებ ნანატრ თავისუფლებას, ჩემი ეული ცნობიერების განუყოფელი მთლიანობის წყალობით, თამამად გავუსწორებ თვალს შეუცნობელს და გულუშიშრად შევეგებები სიკვდილის იდუმალ სამყაროს. ხელის კვრით მოვიცილე გაოგნებული გრიშა, განვეშორე მილიციელებს, და საკუთარ შინაგან სამყაროში ჩაძირული, ველოდები, როდის დადგება უკანასკნელი წამი, თუკი მაინცდამაინც ამაღამ უნდა დადგეს“.⁵⁷

მეორე დღეს მოსახლეთა უმრავლესობამ უარყო რამენაირი კავშირი იმ ხალხთან, ვინც წინა დღით სროლა ატეხა. ოდეტს წმინდა კვირიკეს და ივლიტას ტაძარში შესვლაზეც უარი უთხრეს მასპინძლებმა. ვერც თხოვნამ, ვერც ამ ისტორიულ ძეგლზე თავდაუზოგავი ზრუნვის დაპირებამ ვერ მოაღბო სვანების გული. გრიშამ ალბათ წინაპრების ავტორიტეტიც გამოიყენა მათ დასაყოლიებ-

57. იქვე, გვ. 275-276

ლად, მაგრამ ყველა მცდელობა წყლის ნაყვა გამოდგა იმ რწმენის წინააღმდეგ, რომ ქალებს, თავისთავად იმის გამო, რომ ისინი ქალები არიან, უწმინდურება შეაქვთ წმინდა ტაძარში.

ნადირობის ქალღმერთი დალის ძალმოსილების, სვანი ქალების გამორჩეული სიმამაცისა და გმირობის ფონზე მართლა პარადოქსულია ქალების უწმინდურების შესახებ წარმოდგენის სიცოცხლისუნარიანობა. თუმცა გასაგებია, რომ კერპთაყვანისმცემლობისდროინდელი შეხედულებები საუკუნეებს სწორედ იმიტომ უძლებს, რომ ისინი საკრალურთან და ხელუხლებელთანაა დაკავშირებული და განსჯის სფეროში იშვიათად ხვდება.

გრიშა წერეთლის ნათესავი, ნინო/ქეით დადემქელიანი, რომელიც მამაკაცის უნიფორმაში გადაცმული, პირველ მსოფლიო ომში იბრძოდა, მონაწილეობდა საქართველოს დამოუკიდებელი რესპუბლიკის პოლიტიკურ ცხოვრებაში. ბოლშევიკური რეჟიმის დამყარების შემდეგ კი საფრანგეთში დასახლდა და საკუთარი უნიკალური თავგადასავალი ფურცელზე გადაიტანა და მემუარებად გამოსცა. წიგნი 1934 წელს ინგლისურად თარგმნა ართურ ჯ. ემ-თონმა სათაურით „პრინცესა“.⁵⁸

არავინ იცის, უამბო თუ არა დავითმა ოდეტს ნინოს მეომრული თავგადასავლის შესახებ ან გააცნო თუ არა იგი. არადა, მწერალი ქალი უდავოდ დიდი ინტერესით მოისმენდა „განკაცებული“ ლამაზმანის მონათხრობს: მისი, ჯარისკაცების, ფრონტის ხაზის მედლების ურთიერთობისა და ბრძოლის ამბებს.

ახმეტაში ოდეტ კენი რუს ბოლშევიკებსაც გადაეყარა. მისი მონათხრობიდან ვარკვევთ, რომ სერგეი კიროვი ამ დროს თბილისშია და ბოლშევიკურ მისიას ხელმძღვანელობს. მათ უკვე „დიდი ტერორი“ მოაწყვეს ბაქოში: ათასობით ადამიანი დახოცეს და „ჩერეზვიჩიკას“ ტრიბუნალით გაასამართლეს, სატუსალოებში გამოკეტეს. ოდეტის შეფასებით, კომუნისტებმა უწინდელი იმპერიალიზმი „მშრომელთა იმპერიალიზმით“ ჩაანაცვლეს და კომუნიზმი, როგორც ინტელექტუალური და მორალური მოძღვრება, პოლიტიკურ-მილიტარისტულ იდეოლოგიად გადააქციეს.

რუსებს არ მოეწონათ თანამოსაუბრე ქალის სიმამაცე და პირდაპირობა, მისი შეფასება, რომ ამჟამინდელი ბოლშევიზმი ისევე აზიანებს ჭეშმარიტ კომუნიზმს, როგორც ინკვიზიციამ ავნო ქრისტიანულ რელიგიას. მცირეხნიანი დუმილის შემდეგ კიროვის ერთ-ერთი ხელის ბიჭი ფეხზე წამოდგა და ოდეტს მიმართა:

„...როცა ჩვენ მოვალთ და მართვის სადავეებს ჩავიგდებთ ხელში, ტავარიშჩ (ეს სიტყვა ამხანაგს ნიშნავს რუსულად), ციხეში გიკრავენ თავს; ჰოდა, შეგიძ-

58. Kati Dadeshkeliani, Princessa, London, G.Bell & Sons Ltd, 1934.

ლიათ, გულდასმით განსაჯოთ ჩვენი მეთოდები სატუსალოში, დაუსრულებლად იფიქროთ ამაზე“.⁵⁹

ამ ეპიზოდში კარგად ჩანს რუსი ბოლშევიკების გამორჩეული თავდაჯერებულობა და დამანგრეველი სულისკვეთება, საქართველოს დემოკრატიული რესპუბლიკის მმართველთა მიმართ უპატივცემულობა და რწმენა იმისა, რომ ისინი აუცილებლად გაიმარჯვებდნენ – ცეცხლით და მახვილით მოაშთობდნენ პროლეტარიატის დიქტატურის ხელის შემშლელ და დამაბრკოლებელ ყველა ძალას.

აღმოსავლეთ საქართველოში ოდეტის მეგზური დავით ილიას ძე ჭავჭავაძეა: საქართველოს ლაშქრის ლეიტენანტი. ოცი წლის ჭაბუკს სამხედრო საქმეთა სამინისტრომ ოდეტის უსაფრთხო მოგზაურობის უზრუნველყოფა დაავალა კახეთში, თიანეთში, ფშავში, თუშეთსა და ხევსურეთში.⁶⁰

კახეთის ერობაში სტუმარს ეტლი გამოუყვეს და დავითის წინაპართა მამულში, წინანდალში წაიყვანეს, სწორედ იმ სახლში, საიდანაც დავითის ბებია და ნათესავები გაიტაცეს ლეკებმა.⁶¹

1920 წლის „საქართველოს რესპუბლიკა“ მკითხველს ოდეტის, როგორც საქართველოს დამოუკიდებლობის მხარდამჭერისა და პარიზის ჟურნალ-გაზეთებში მისი აგიტატორის, ჩამოსვლას აუწყებს და სიხარულით აღნიშნავს, რომ ახლა ეს მამაცი ფრანგი ქალი ჩვენი ქვეყნის ისტორიისა და ადამ-წესების უკეთ გასაცნობად ჩამოვიდა და მალე წიგნსაც მიუძღვნის საქართველოს.

„...ეს მამაცი ქალი, ჯერ სრულებით ახალგაზრდაა, იქნება ასე 22-25 წლისა, რუსული და არც ქართული ენები არ იცის, ლაპარაკობს ფრანგულად, სამაგიეროდ დავ. ჭავჭავაძემ ზედმიწევნით იცის ფრანგული ენა და მისი საშუალებით იცნობს და იწერს ყველა ცნობებს.

ამავე საღამოთი ძვირფასი სტუმრები ეწვივნენ საზოგადო საკრებულოს, მხოლოდ მეორე დღეს 28 ივნისს გაემგზავრნენ ალვანში, სადაც განაგრძობენ გზას ომალოსკენ, შემდეგ ავლენ ფარსმაში და გადაივლიან მთებს და ჩავლენ ყაზბეგში, ასეთი მარშრუტი ჰქონდათ შედგენილი ტფილისიდან პროფესორ შანიძის, ექვ. თაყაიშვილის და შ. ქარუმიძის მიერ.⁶²

59. Odette Keun, Au Pays de la Toison D'or, En Géorgie Menchéviste Indépendante, p:48.

60. დავითის მამას, ილია დავითის ძეს და დედას, ბარბარე/ვერა ასლანის ასულ ვაჩნაძეს კიდევ ორი ქალიშვილი ჰყავდათ: ანა და ნინა. დავითის პირველი მეუღლე იყო ეველინ ჰეილერი, ხოლო მეორე – მარი ჭყონია, რომელიც საფრანგეთში ცხოვრობდა. ეს ცნობები მომავლად კინორეჟისორმა, მერაბ კოკოჩაშვილმა.

61. ამ დრამატულ თავგადასავალზე ზემოთ ვისაუბრე, ანა დრანსეს წიგნის განხილვისას. დიდი ალბათობით დავითმა ამ წიგნის შესახებ იცოდა და ოდეტსაც უამბო. თუმცა, უცნაური კია, რომ „ოქროს საწმისის“ ავტორი ანას და მის წიგნს არ მოიხსენიებს.

62. საქართველოს რესპუბლიკა, 1920, N147, გვ. 2-3.

თუშეთში ოდეტს მოსწონს ბავშვების უმანკო ინტერესი და განსაკუთრებული მოწადინება სწავლა-განათლებისადმი, თუში ქალის გულში ჩამწვდომი, გარმონზე დამღერებული სიმღერა და ამ მელოდიით თავდახრილი, დარცხვენილი მამაკაცები და ეუცნაურება უმძრახობის წესი,⁶³ აფრთხობს მიცვალებულთა სულების პატივ-საცემი რიტუალები, ქორწინების გარეშე სასიყვარულო ურთიერთობების მიმართ უღმობელი დამოკიდებულება, მშობიარობისა და „ქალის წესის“ დროს ქალების სამრევლოსა და საჩხეში იზოლაცია. თუმცა, საოჯახო ურთიერთობების გარეთ, საჯარო სივრცეში ქალები და მამაკაცები თანასწორები ჩანან:

„...ქალები და მამაკაცები თავისუფლად ირევიან ერთმანეთში, ისე ებაასებიან და ეპყრობიან ერთიმეორეს, როგორც თანასწორთ შეჰფერიო. ქალები, მიუხედავად იმისა, რომ მძიმედ და თავდაუზოგავად შრომობენ, მიწას ამუშავენ და არც შინ არა აქვთ მოსვენება, უფრო ინდივიდუალურები არიან; შეინარჩუნეს შინაგანი „მე“; ოჯახური კერის ბატონ-პატრონნი არიან, მართვის სადავეთა მპყრობელნი...“⁶⁴

ოდეტი დიდი გულმოდგინებით აღწერს იმ რეფორმებს, რომელთაც ახალგაზრდა რესპუბლიკის მმართველები ახორციელებენ: სამედიცინო პუნქტებისა და საავადმყოფოების გახსნა, საგანმანათლებლო და საინფორმაციო კერების დაფუძნება მოზრდილთათვის, ჟურნალ-გაზეთების გავრცელება რეგიონებში, მთიელების დეპუტატთა მეცადინეობა საკუთარი ხალხის პრობლემების მოსაგვარებლად.

სტუმარი სულსწრაფად გადაადგილდება და ყველგან, სადაც კი იყო (კახეთი, თუშეთი, ფშავი, ხევსურეთი, გურია, იმერეთი, რაჭა, ლეჩხუმი, ქვემო და ზემო სვანეთი) აკვირდება და დეტალურად აღწერს არქიტექტურული ძეგლების სიდიადეს, ყოველდღიური და საოჯახო ყოფის, სახლების, სამოსის, ცეკვისა და სიმღერის თავისთავადობას. მიუხედავად გზადაგზა წარმოშობილი სიძნელეებისა, მოგზაურობასთან დაკავშირებული ემოციური დაძაბულობისა და ბრაზისა, ოდეტი მაინც კეთილგანწყობილი და ინტერესით აღსავსეა. ამის მიზეზი სიყვარულია, დაუოკებელი გრძნობა ადამიანისა და სამყაროს მიმართ, რომელიც მან ერთნაირი ძალით შეიგრძნო გრიშა წერეთელთან ურთიერთობაშიც და ყველა იმ კუთხეში, სადაც იმოგზაურა. სწორედ ამიტომ ავსებს მესტირის ჰანგი მწერალ ქალს ამაღლებული გრძნობით და ახსენებს ტარიელისა და ნესტან-დარეჯანის შეხვედრის ეპიზოდს, მარჯორის „ვეფხისტყაოსნიდან“:

„მთვარეს თავი დაეხსნა გველის ტყვეობიდან, მოეშორებინა ის შხამიანი ქვეწარმავალი და მზესთან შესახვედრად მიეშურებოდა; ერთი სული ჰქონდა, შეჰგებებოდა ელვარე მნათობს; კაცმა ასწია თავისი ჩაჩქანი, უკან გადაიყარა გრძელი

63. ამ წესის მიხედვით ქალს გარკვეული დროით არ აქვს მეუღლის მშობლებთან საუბრის უფლება.

64. Odette Keun, *Au Pays de la Toison D'or, En Géorgie Ménécheviste Indépendante*, p. 53.

თმა, რომლის თითოეული ღერიც ქორფა ღერწმის სათუთ, მოქნილ ტანს ჰგავდა და კიდევ უფრო ამშვენებდა მას; გულმკერდი გულმკერდს მისწებებოდა, კისერი კისერზე მიბჯენილიყო, ყელი ყელს გადასტდობოდა...“⁶⁵

თბილისიდან სტამბოლში ჩასული მწერალი ქალი ბრიტანელებმა დააკავეს, რუსების ჯაშუშობის ბრალდებით და სტავროპოლში გადაასახლეს. როცა რუსული უშიშროების სამსახურს თავი დააღწია, იგი პარიზში დაბრუნდა. სავარაუდოდ, 1920 წლის შემდეგ, ოდეთი ქართველ სატრფოს აღარ შეხვედრია. 1924 წელს გრიშა მოკლეს, დიდი ალბათობით ეროვნულ-განმათავისუფლებელ მოძრაობაში მონაწილეობისთვის.⁶⁶

მაღევე ოდეთი ჰერბერტ უელსს დაუახლოვდა და რამდენიმე წელი მასთან ერთად იცხოვრა.

რომანით „თავადი ტარიელი: საქართველოს ამბავი“ მწერალი ქალი მის საყვარელ ქვეყანას კიდევ ერთხელ დაუბრუნდა. სოციალისტი და ფემინისტი მთელი ცხოვრება აკრიტიკებდა ტოტალიტარიზმს, შეუზღუდავ კაპიტალიზმსა და მათდამი შემრიგებლურ დამოკიდებულებას. „ოქროს საწმისის ქვეყანას“ კი ალბათ ხშირად იხსენებდა და ალბათ ხშირადაც კითხულობდა თავისივე წიგნის ამ სტრიქონებს:

„საქართველო მოესწრო იმ დღეს, როცა სხვებმა საბჭოთა რესპუბლიკად გამოაცხადეს და მისი მართვის სადავენი მოსკოვმა იგდო ხელთ. ახლა, როცა ამ ტექსტს ვწერ, რუსული ბოლშევიზმი ფესვს იდგამს ამ სულგრძელი, ხელგაშლილი, გულუხვი, მამაცი, დიდსულოვანი, თვალწარმტაცი, მშვენიერი, მომხიბვლელი, რაინდული სულისკვთებით განმსჭვალული, ყველასაგან გამორჩეული ხალხით სავსე პაწაწინა ქვეყანაში, რომლის მკვიდრთაც სიბილწის ნატამალი არა აქვთ; იგი იმსახურებს ბედნიერებას, უფრო მეტადაც კი, ვიდრე ნებისმიერი სხვა. ეს ქვეყანა შემოიჭრა ჩემს გულში, ძალზე ღრმად შემოიჭრა და საუკუნოდ დაიდო ბინა იქ...“⁶⁷

ოდეთის შემდეგ, მაღევე – 1920 წლის სექტემბერში, საქართველოში ევროპელი სოციალისტები, მეორე ინტერნაციონალის წარმომადგენლები ჩამოვიდნენ. მათ შორის იყვნენ: სოციალისტები და აქტივისტები ეთელ ანკანი-სნოუდენი, ლალა სპაიერ-ვანდერველდე და ლუიზე რონსპერგერ-კაუცკი (ასევე კამილ ჰაისმენსის მეუღლე და მისი ქალიშვილი – სარა). ისინი იყვნენ კახეთში, დუშეთში, ჭიათურაში, სამეგრელოსა და გურიაში. ეთელ სნოუდენი სიტყვითაც კი გამოვიდა მუშათა

65. იქვე, გვ. 60

66. გიორგი პლატონის ძე წერეთელს ორი დედამიწვილი ჰყავდა: არჩილი და ეკატერინე. შთამომავალი არც ერთს არ დარჩენია. გოგონა, რომელმაც უიმედო სიყვარულის გამო თავი მოიწამლა, იყო ელენე ივანეს ასული გერპინი. გიორგი წერეთელის შესახებ ცნობები ინახება იური ჩიქოვანის არქივში. ეს ინფორმაცია მომწოდეს მისმა მეუღლემ, ირინა კვირკველიამ და ლევან თაქთაქიშვილმა.

67. Odette Keun, Au Pays de la Toison D'or, En Géorgie Ménécheviste Indépendante, p:7.

შეკრებებზე. ქალების საზოგადოებრივი აქტიურობა და რესპუბლიკის მმართველთა მიერ ჩატარებული ქალების სასარგებლო რეფორმები სასიამოვნო სიახლე აღმოჩნდა სტუმრებისთვის. შეხვედრების შინაარსის შესახებ მასალა ცოტაა, თუ არ ჩავთვლით საინფორმაციო ხასიათის საგაზეთო პუბლიკაციებს. ეროვნულ-დემოკრატიული პარტიის წევრის, ზურაბ ავალიშვილის შეფასებით, რომ სოციალისტთა ვიზიტი ქართველებში ყალბი ოპტიმიზმს ბადებდა, რადგან ინგლისელებმა უკვე ბათუმი დატოვეს, ხოლო ამიერკავკასიის პოლიტიკურ პროცესს რუსები და თურქები აკონტროლებდნენ:

„ევროპიელ ცნობილ სოციალისტების ამ მოგზაურობას (მათ შორის მე-2 ინტერნაციონალის სამი სტატს დამა ქალბატონი კაუცკისა, ვანდერველდესა და სნოუდენისა, რომელნიც ლორწეებით ცნობის მოყვარეობით უცქერდნენ „ამ ტურფა სურათოვან საქართველოს“), დიდი მნიშვნელობა ჰქონდა მათ გონებაში საქართველოს დამოუკიდებლობის და მისი, როგორც დემოკრატიული „ოაზისის“, ჩასანერგათ... ამ დამოუკიდებლობის განსამტკიცებლათ კი ექსკურსიას, რა თქმა უნდა, არავითარი მნიშვნელობა არ ჰქონია. მან გამოიწვია ან გააძლიერა მეტად უდროოთ ილუზიები შესახებ „დასავლეთის დემოკრატიის დახმარებისა“.⁶⁸

სულ მალე, 1921 წლის 25 თებერვალს, საქართველოში წითელი არმია შემოვიდა და ბოლშევიკური მმართველობა დამყარდა. კაცობრიობის ამ ერთ-ერთმა ყველაზე სისხლიანი რეჟიმის დაუნდობელმა ხელმა დიდი ხნით ჩატეხა ის ხიდი, რომელიც უხსოვარი დროიდან ქართველმა და ევროპელმა ნომადებმა ერთმანეთთან დასაკავშირებლად გადეს.

ბოლოთქმა

აჰა, გასრულდა ჩემი მოგზაურობა ევროპელი ქალების ნააზრევში, მათ მიერ ნათქვამი ან ნაარაკალი სამყაროს ლაბირინთებში. ამ ტექსტების მოხელთება ერთჯერადი სამუშაო არ არის, რადგან მათი სხეულები ეს-ესაა გამომზეურდა და ჯერ ყველა დეტალი არ ჩანს, არ იკითხება და არ ითარგმნება. მაგრამ ჩვენ უკვე შეგვიძლია მათთან მრავალჯერადად მიბრუნება და ცხადად დანახვა, რომ ფრედერიკა ფრაიგანგის საქართველო ახლოა მარჯორი უორდროპის საქართველოსთან, ისევე როგორც კარლა სერენას, ანა დრანსეს, ბერტა ზუტნერის, ენ ლისტე-

68. ზურაბ ავალიშვილი, საქართველოს დამოუკიდებლობა 1918-1921 წლების საერთაშორისო პოლიტიკაში, თბილისი, 1929, გვ. 229.

რისა და ოდეთ კენის თვალთახედვა. ხომ საინტერესოა, თუ რატომ უტრიალებს მათი უმრავლესობა ქართველ ქალებს? რატომ იზიდავს მათ გულსა და გონებას საქართველოს საერო და სასულიერო ისტორიის ქალური შენაკადები, მითებისა და ლეგენდების ქალი-გმირები? რატომ ჩერდება მათი მზერა ქალურ სივრცეებზე, ლოცვებსა და საგალობლებზე? რატომ ემსგავსებიან კოლხ მედეას ქალების ჩაგვრისა და თავისუფლების შეზღუდვის მომენტში? ეს არის კითხვები, რომელთაც ბიძგი უნდა მისცეს ახალ ქართულ-ევროპულ დიალოგს, გამოკვლევებს და შემოქმედებას.

პოლიტიკურად კი თანამედროვე საქართველოში ისევე აქტუალურია XIX საუკუნის დროინდელი პრობლემები: კვლავ დამოუკიდებლობისა და თავისუფლებისთვის ვიბრძვით. ამ სტრიქონების წერისას აზრები სულ რიონის ხეობისკენ გაშირბის, სადაც იქაურები ავის მომასწავებელი ჰესის მშენებლობას აპროტესტებენ. სსრ კავშირის დროს შექმნილი და იმჟამინდელი ქართველი მეცნიერების ძალისხმევით შეჩერებული პროექტი კვლავ გააცოცხლეს ინვესტორს ამოფარებულმა ხარბმა და უპასუხისმგებლო ჩინოვნიკებმა. მოქალაქეების აზრით კი, ქვეყნისთვის ეკონომიკურად მომგებიანი მხოლოდ ის გეგმაა, რომელიც სტრატეგიულად და ეკოლოგიურად უსაფრთხოა. ამიტომ დგანან ისინი მედგრად და იმ ძალმომრეობისაგან გვიცავენ, რაზეც მარჯორი უორდროპი 1894 წელს წერდა:

„...ჩაგვრასა და დესპოტიზმს, აგრეთვე, სრულ რუსიფიკაციას, რომელიც ქართველებს დაატყდათ თავს, შედეგად მოჰყვა მაღალი ცივილიზაციის დაცემა და აჯანყებული ხალხი, რომელიც მზადაა იმოქმედოს მის ეროვნულობას დამუქრებულ ცბიერ და სასტიკ საფრთხეთა თავიდან ასაცილებლად. საქართველოს უძველესი სამეფო დასავლეთ ევროპისაგან ელის შემწეობას და თანაგრძნობას“.⁶⁹

ეს სიტყვები დღესაც ისევე საჭირო და საჭირობოროტოა, როგორც 127 წლის წინათ. სწორედ რომ ღვთისმშობლის მისიონერს ჰგავდა მარჯორი უორდროპი, ჩვენი თავისუფლების საიმედო დესპანი ევროპაში; ხოლო დღეს, რიონის ხეობის მცველების: მაკა სულაძის, მარიტა მუსელიანის და ლალი ეფრემიძის კარ-მიდამოში/οίκος-ში თითქოს ერთად გამაგრდნენ საქართველოს ტრფიალი ევროპელი ნომადები და ჩვენი მედეა, წმინდა ნინო, თამარი და ქეთევანი, რათა ქართული კულტურა შინაური და გარე კოლონიზატორებისგან გაათავისუფლონ.

69. მარჯორი უორდროპი, მოგზაურობა საქართველოში, ჩანაწერები, თბილისი, 2012, გვ. 45.



თბილისის ხედი პანთეონიდან

ილუსტრაცია ფრედერიკ ფონ ფრაიბანგის ნიშნიდან
„წერილები კავკასიიდან და საქართველოდან“, 1823
ლუიზა ლაფერაძის რეპროდუქცია

წერილები კავკასიიდან და საქართველოდან

მთარგმნელის წინათქმა

ამ ნაწარმოების დედანი გერმანულ ენაზე დაიწერა ანონიმი ავტორის მიერ. სანკტ-პეტერბურგის საზოგადოებაში თავიდანვე გავრცელებული იყო აზრი, რომ მისი ავტორები არიან ქალი და მამაკაცი, რომლებმაც წიგნში აღწერილ ქვეყნებში იმოგზაურეს და ერთხანს იქ დაჰყვეს კიდეც.

წინამდებარე ნაწარმოების პირველი ნაწილის (რომელიც დასათაურებულია, როგორც „წერილები კავკასიიდან და საქართველოდან“) ავტორი მთარგმნელს წარუდგინეს, როგორც სასიამოვნო და მცოდნე ადამიანი. სწორედ ასეთი შთაბეჭდილება რჩება მკითხველს ამ ნაწარმოების წაკითხვის შემდეგ. მისი ქმარი, წიგნის დანარჩენი ნაწილების ავტორი, არის მისტერ ფრაიგანგი, ვაჟი გერმანელი ექიმისა, რომელიც იმხანად რუსი იმპერატორის სამსახურში იდგა. მისტერ ფრაიგანგი-უმცროსი, პროფესიით დიპლომატი, ტფილისიდან გამოიხმეს 1812 წელს, რუსეთისთვის ძნელბედობის ჟამს, ფრანგებთან ომის დროს და კარის მრჩევლის რანგში მიაღწიეს სპარსეთის ტახტის მემკვიდრის, აბას-მირზას სამეფო კარზე სწორედ იმ დროს, როდესაც იქ ბრიტანეთის საელჩოს ხელმძღვანელს, მის მაღალღირსებას სერ გორ უისლის ელოდნენ.

მუსიე და მადამ ფრაიგანგების მოგზაურობათა წიგნის ფრანგული თარგმანი ეკუთვნის მ. დე სტრუვეს, ჰამბურგში მოღვაწე რუს მინისტრს. სწორედ მისი თარგმანი დაედო საფუძვლად წინამდებარე ნაშრომს. ჩვენ ყოველი ღონე ვიხმარეთ, რათა ინგლისური თარგმანი რაც შეიძლება მიგვეახლოებინა დედანთან. ტექსტისთვის არც არაფერი მიგვიმატებია და არც გამოგვიკლია, თუ არ ჩავთვლით იმ ადგილებს, სადაც ერთი და იგივე მეორდება, ან სენტენციებს, რომლებიც მოკლებულია მტკიცებულებებს.

მთარგმნელი პასუხისმგებელია მის მიერ გაკეთებულ შენიშვნებზე, თუმცა მათი მიზანია არა დედანში მოყვანილი ფაქტების დადასტურება ან განმარტება, არამედ აუცილებელი დაზუსტებები და საჭირო ილუსტრაციები. რაოდენ სიმართლესაც უნდა შეიცავდეს გამოთქმა – „შენიშვნები ავტორის ბარგიაო“, უმეტეს შემთხვევაში, ეს ის ბარგია, რომელიც წიგნის მოგზაურობის დროს გადაუდებელ საჭიროებას წარმოადგენს.

წერილი I

ვალდაი, 1 სექტემბერი, 1811 წელი

...და აი, მოლოდინსა და ფორიაქს ბოლო მოეღო, დადგა განშორების ჟამი. მშვიდობით, ჩემო საყვარელო მეგობარო, მშვიდობით, ნევის ნაპირებო, წინ გრძელი გზა გვიდევს. იმის წარმოდგენისას, რომ პირქუში კავკასიის ქედი უნდა გადავლახოთ, ყველაზე მეტად ანდრეზე ვდარდობ – ის ხომ ჯერ სამი წლისაც არ არის. ვდარდობ პატარა კატერინაზე, რომელიც სულ რაღაც სამი კვირის წინ დაიბადა. მხოლოდ ის გარემოება მამშვიდებს, რომ მათი მამა ჩვენთან არის, ასე რომ, ბნელი ფიქრები უკუვავდე და დამშვიდება ვცადე.

რა სიგიჟეა წელიწადის ამ დროს ტფილისში გამგზავრება, – წამოიძახებს მავანი, – თან ორ პაწიასთან ერთად, რომელთაგან ერთი ახალშობილია! ეჰ, მეგობარო, ჩემს გრძნობებს ადვილად მხოლოდ მაშინ ჩასწვდები, თუ გათხოვილი ხარ და ქმარი გიყვარს.

გამგზავრება.

დაგპირდი, რომ ჩვენი მოგზაურობის ანგარიშს გამოგიგზავნიდი. ვერ დავიჩემებ, რომ ჩემი ნაწერი სიტყვაკაზმულობის ნიმუში იქნება, ალბათ უფრო ერთი უბრალო ამბავია იმის შესახებ, თუ როგორ მოგზაურობს ოჯახი, რათა უკეთესი მომავლის იმედით ბედი სცადოს უცხო ცის ქვეშ! ასეა თუ ისე, ეს ჩვენი თავგადასავლის დასაწყისია.

ვალდაი გორაკებს შორის შემალლებულ ადგილზე გადაშლილი პატარა ლამაზი ქალაქია. ირგვლივ ტბები აკრავს, ტბებში კუნძულებია მიმოხეული. ერთ ასეთ კუნძულზე, ხშირი ტყის შუაგულში, დგას უძველესი მონასტერი, რომელიც უწინ ძალიან მდიდარი ყოფილა და შემოგარენში საკმაოდ დიდ მიწებსაც ფლობდა. შეუძლოდ გახლდით და ქალთა მონასტრის სამლოცველოში წასვლა ვერ მოვახერხე, რათა ჩემი შვილების ჯანმრთელობა უფლისთვის შემეცედრებინა, მაგრამ საქართველოდან დაბრუნებისას აუცილებლად აღვაკვლენ გულმხურვალე ლოცვას. უფალმა დაგვიცვას და შეგვიწყალოს!

გავჩერდით ერთ დიდ სოფელში, სიმაგორიაში, ვალდაის მახლობლად. ჩვენი სახლი ფერდობზე იდგა, საიდანაც მშვენიერი ხედი იშლებოდა. შენთვის არ მომიწერია კნატუნა ბლითებზე, რომლებსაც გოგონები ყველა კუთხე-კუნჭულში სთავაზობდნენ მოგზაურებს?! ჩემი პატარა ანდრე მათ ვალდაურ კანფეტებს ეძახის.

ნახვამდის, შემდეგ წერილში მოსკოვურ შთაბეჭდილებებზე მოგწერ.

წერილი II

მოსკოვი, 5 სექტემბერი, 1811 წელი

მიხარია, რომ ვნახე მოსკოვი – ეს დიდებული დედაქალაქი, დიდი მთავრების უძველესი სამყოფელი, ძლევამოსილი ისტორიის მოწმე, ცნობილი კრემლი – მეფეთა უძველესი სასახლე. მისი დანახვისას გონებაში ცოცხლდება რუსეთის ისტორიის ღირსშესანიშნავი მოვლენები. ეკლესიების სიმრავლე ამ ქვეყნის მამულიშვილთა უფლის სადიდებელ საქმეებზე მეტყველებს, სახლები და გრძელი ქუჩები – ყველაფერი ცნობისმოყვარეობასა და პატივისცემას აღძრავს.

სიდიადისა და გრანდიოზულობის გარდა, მოსკოვს გააჩნია რაღაც გასაოცრად სულში ჩამწვდომი ძალა, რომელსაც ადამიანი ღრმა ფიქრებში მიჰყავს. რამდენი ქარიშხალი გადაუტანია რუსთა ამ უძველეს მეტროპოლისს, რამდენი მტრისთვის გაუძლია, რამდენი მომხდური მოუგერიებია. რაოდენ დიდი სიმამაცე უჩვენებიათ მის შვილებს სხვადასხვა დროს ათასი ჯურის მტერთან, რაოდენ დიდი ჟინით უბრძოლიათ პოლონელ თუ თათარ დამპყრობთა წინააღმდეგ, რომლებიც შეუპოვრად მოიწვედნენ ქვეყნის შიგნით და დროდადრო, მცირე ხნით, ხელში იგდებდნენ ამ დიდებული ქალაქის სადავეებს. რუსეთი, რომელიც სამი საუკუნის მანძილზე გმინავდა ბარბაროსების უღელქვეშ, წარმოადგენს სიმამაცისა და შეუპოვრობის იშვიათ მაგალითს, რომლის მეშვეობით ერს შეუძლია ნებისმიერი ბარიერი გადალახოს. რუსეთის ისტორიას მხოლოდ ესპანეთის მაგალითი თუ შეედრება – მავრთა წინააღმდეგ ესპანელთა დაუღალავი, ექვსსაუკუნოვანი ბრძოლა, რომელიც საბოლოოდ ესპანელთა გამარჯვებით დაგვირგვინდა. ახალი ღირსშესანიშნავი მაგალითი, რომელიც ესპანეთმა გვაჩვენა, კიდევ ერთხელ ცხადყოფს, რომ ამალღებული სულისა და დაუცხრომელი ენერგიის ერს ყოველთვის შესწევს ძალა, ღირსეულად გაიაროს ისტორიის ყოველი ბედუკუდმართი მონაკვეთი.

მოსკოვის სანახებმა მაიძულა თემიდან ოდნავ გადამეხვია. დროის უქონლობა და ჯანმრთელობის მდგომარეობა ხელს რომ მიწყობდეს, სიხარულით განვიხილავდი ამ დიდებული ქალაქის ყოველ წვრილმანს, მის ლამაზ ქუჩებსა და ევროპულ ხედებს, ჯეროვნად აღვწერდი ყველაფერს, რაც ვნახე. ვგონებ, ამ სიამოვნების გარკვეულ დრომდე გადადება მომიწევს.

ტულა – ვორონეჟი.

წერილი III

**ნოვოჩერკასკი, 331 ვერსი კამენსკაიადან,
10 ოქტომბერი, 1811 წელი**

როგორც კი ფეხი ველური სტეპების მიწაზე დავდგით, საშინელმა ციებ-ცხელებამ შემომიტია. ათი დღე შემოვრჩით სტანიცა კამენსკაიაში, რომელიც ვორონეჟიდან 245 ვერსის მოშორებით მდებარეობს. ახლაც სუსტად ვარ, მაგრამ ოდნავი შვება ვიგრძენი თუ არა, მაშინვე ამბის თხრობა განვაგრძე.

ვორონეჟში, რომელიც ვალდაისა და მოსკოვს შორის მდებარეობს, დახვეწილი, დიდი გემოვნებით შესრულებული, საოცარი სილამაზის ტყავის რამდენიმე ნამუშევარი ვნახე. მოსკოვიდან ვორონეჟამდე სხვა ღირსშესანიშნავი არაფერი შემიმჩნევია, თუ არ ჩავთვლით ტულას, სადაც რკინისა და ფოლადის შესანიშნავი საამქროები დავათვალიერეთ. ცოტაოდენი შეუპოვრობაა საჭირო, რათა აქაური ინდუსტრია სხვა ევროპული სახელმწიფოებისას გაუტოლდეს, თუმცა, ისიც უნდა ითქვას, რომ რუსეთი ისედაც შეუდარებელი და თვითმყოფადი ქვეყანაა მდიდარი რესურსებითა და მრავალეროვანი მოსახლეობით.

როგორც იქნა, სიცივეს გამოვექცეთ. თქვენთან შესაძლოა, ახლა დაზამთრდა, ჩვენ კი დიდი ყინვები უკან მოვიტოვეთ. ვორონეჟში, მეტადრე კი ნოვოჩერკასკში, მშვენიერი დარი დაიჭირა. გზაზე პეტერბურგიდან მოსკოვამდე გვხვდებოდა უამრავი დიდი და მძლარი სოფელი, სავსე ყველაფრით, რასაც ადამიანის სული და გული ისურვებს, თუმცა მოსკოვს იქით ეს ბედნიერება იკლებს და ვორონეჟისკენ მისგან თითქმის აღარაფერი რჩება. სოფლები იშვიათდება და მხოლოდ ჩალით დახურული ქოხმახები გვხვდება, რომლებშიც ბუხრის კვამლი გარეთ ვერ გადის. ყველას არ შეუძლია ასეთ ქოხში ცხოვრება. სურსათ-სანოვაცე მხოლოდ მახლობელ ვორონეჟში იშოვება — ეს არის საკმაოდ დიდი და ლამაზი ქალაქი სტეპებში, თუმცა იქამდე კარგა მანძილია, რომლის იქით სტეპებია, გზად დონის კაზაკებით დასახლებული პატარა ქალაქი კაზანსკაია უნდა გაიაროთ.

ბევრს სტეპი უნაყოფო მიწად წარმოუდგენია, რაც, რასაკვირველია, სინამდვილეს არ შეესაბამება, განსაკუთრებით, ისეთი ადგილები, როგორიცაა კურსკი, ორიოლი და ვორონეჟი. რაც მართალია, მართალია, აქ საკმაოდ ნაყოფიერი ნიადაგია — ტყუილად კი არ ამბობენ, რომ ეს რეგიონი რუსეთის მთავარი ბელელიცაა. ერთადერთი, რაც ამ მიწას ნამდვილად აკლია, ეს არის სათანადო დამუშავება და მზრუნველი ხელი.

კაზანსკაიაში სურსათ-სანოვაცის მარაგისა და გამართული სატრანსპორტო საშუალების გარეშე წასვლა არ ღირს. რაღა შუა ზღვაში გასულხართ და რაღა სტეპებში გიმოგზაურიათ — თუ რამეს წაიღებ თან, თორემ იქ არაფერი დაგხვდება ორი პატარა სოფლის გარდა, რომლებსაც აქ სტანიცებს ეძახიან. ირგვლივ, ასეუ-

ლობით ვერსის მანძილზე, მხოლოდ უკიდევანო ცა და სტეპია. ეს არის დონის კაზაკების მხარე, რომლის დედაქალაქი ნოვოჩერკასკია. ძველი ჩერკასკი ახლისგან დაახლოებით 30 ვერსით არის დაშორებული.

სტეპებში მოგზაურობა მხოლოდ ზღვაში მოგზაურობას შეიძლება შევადაროთ. იქაური გაშლილი და უდაბური სივრცე დაახლოებით იმავე გრძნობას იწვევს, თითქოს მრავალი თვე ზღვის ერთფეროვან ტალღებს მიაპოვდე – მგზავრის დაღლილ მხერას მხოლოდ ხის, ბუჩქისა და სახლის დანახვა თუ ახარებს, ხანდახან ჩიტი თუ გადაიფრენს, ისიც – კანტიკუნტად. იშვიათად, რომ ეს ყველაფერი ერთად შეგხვდეს, განსაკუთრებით, თუ გზა აგებნა და ამ მივარდნილ მხარეში ჩაიკარგე, თან ქარბუქის დროს, რაც შემოდგომასა და ზამთარში აქ არცთუ ისე იშვიათია. წელიწადის ამ დროს ტრანსპორტის ყოველი საშუალება თოვლში ეფლობა და ყინვა და სუსხი სუნთქვას გიკრავს.

თვითონ მიწა ნაყოფიერია, მაგრამ მისი დამუშავება თითქმის შეუძლებელია, რადგან აქ არც ტყეა და არც წყალი. ასეთია სტეპი. ხალხიც ბარმაცი და უნიათო სახლობს, როგორც ყველგან, სადაც თბილა და მიწა ნაყოფს იძლევა. იტალიური *Dolce far niente* (ტკბილი უსაქმურობა. მთ. შენიშვნა) მათი ცხოვრების განუყოფელი ნაწილია.

მიწა კარგად რომ დაემუშავებინათ, ჭები ამოეთხარათ და დონისა და ყუბანისპირას ატეხილი ტყეებისთვის მიეხედათ, აქაურობა რამდენიმე წელიწადში დაბლობზე გადაშლილი, მხიარული და წელმაგარი ხალხით მჭიდროდ დასახლებული მშვენიერი მხარე იქნებოდა, მთელ ქვეყნიერებაზე სახელს გაითქვამდა, ყველა გაზეთი მასზე ამბებით იქნებოდა აჭრელებული. ზუსტად ვიცი, მარტო კავკასიის რეგიონში ოთხი მილიონი აკრი (საუბარია ფრანგულ აკრზე. მთ. შენიშვნა) სასოფლო-სამეურნეო საქმიანობისთვის ვარგისი მიწაა – მხოლოდ მზრუნველი ხელი სჭირდება და შედეგიც არ დაახანებს!

ამ საშიშ ადგილებში მოგზაურობისას ვცდილობდი, მომავალში გადამეხედა და დამენახა, როგორ შეიცვლებოდა აქაურობა ეპოქებისა და თაობების ცვლასთან ერთად.

წერილი XXV

ტფილისის სანახები

ტფილისი, 25 დეკემბერი, 1811 წელი

ბინა დავიდეთ გენერალ-გუბერნატორის სასახლეში, საიდანაც ლამის მთელი ქვეყანა მოჩანს, ყოველ შემთხვევაში, აქედან ნამდვილად შეგიძლიათ დაინახოთ მთელი ქალაქი და ვრცელი ველი, რომელიც მას აკრავს. ჩვენი სახლის უკანა მხრი-

დან ნაკლები სილამაზის ხედი როდი იშლება – მაღალი მთა, მთის კალთაზე კი ეკლესია ბაღითა და **შადრევნით**. შორს, დაახლოებით 150 ვერსის მანძილზე, დაინახავთ ცად აზიდულ ზვიად მთებს და ისეთი გრძნობა შეგიპყრობთ, თითქოს ვიღაცას ევროპა და აზია უზარმაზარი ფარდით გაუყვიაო. მთებს შორის თეთრად ელვარებს ყაზბეგის დათოვლილი მწვერვალი. ეს სურათი მუდმივად იცვლება – მთები ხან მკაფიოდ ჩანან, ხანაც ნისლით შესუდრულები მნახველის თვალს ემალებიან, მაგრამ ყაზბეგი, ახოვანი და მრისხანე, თითქოს ღრუბლებიდან ეშვებაო, ყოველთვის გარკვევით მოჩანს. მთების კალთები ხან დათოვლილია, ხანაც დამტკბარი ამინდი შავ კალთებს გამოუჩენს. მხოლოდ ყაზბეგი და კიდევ ერთი-ორი სხვა მთა არასოდეს იხდის თეთრ ქუდს, პაპანაქება ზაფხულშიც კი, როდესაც მზის სხივები გიგანტური მთების კალთებს გადაანათებს. ამ მთების ხილვისას სრულიად ვმუნჯდები და ვგრძნობ, ჩემი კალამი უძლურია აღწეროს ეს სილამაზე. მთების პეიზაჟი ლამის ყოველ საათში იცვლება, თითქოს ბუნებას სურს, მთელი თავისი დიდებულებითა და მრავალფეროვნებით წარმოგვიდგეს. ხანდახან ცა უცაბედად ისე მოიქუფრება, აქაურობა ისეთი სანახავია, გჯერა, რომ უზენაესის ნებით სწორედ აქ არის ყოველგვარი ღვთაებრივი საიდუმლოს აკვანი.

ზამთრის მოსასხამში გახვეული კავკასიის ქედების მიუხედავად, აქ გაცილებით თბილა, დეკემბრის ბოლოა, მაგრამ მხოლოდ ერთხელ მოთოვა და ისიც მალევე დადნა. ამბობენ, მალე გაზაფხული მოვაო.

წერილი XXVI

პეტრე დიდი

თბილისი, 10 იანვარი, 1812 წელი

ახლაც გაოცებული ვარ ისტორიებით, რომლებიც აქ მესმის. თურმე რა იდეები ჰქონია ამ მხარესთან, ისევე როგორც რუსეთის სხვა ტერიტორიებთან დაკავშირებით, პეტრე პირველს, რომელსაც არცთუ ისე დიდი ხნის წინ პეტრე დიდი უწოდეს. მას სურდა ვოლგის, დონისა და დვინის გავლით ჯერ შავი და კასპიის ზღვების, შემდეგ კი ამ ორის ჩრდილოეთ ოკეანესთან დაკავშირება. იმ დროისთვის უკვე აპირებდა გაეჭრა არხი, რომელიც ერთმანეთთან დააკავშირებდა ვოლგას და ნევას, ორივეს კი – ბალტიის ზღვასთან. მისი ჩანაფიქრის მიზანი იყო ასევე, ერთმანეთთან დაეკავშირებინა სამი ზღვა, რაც პეტერბურგს აქცევდა ევროპისთვის მიმზიდველ და ხელსაყრელ ადგილად, აზიაში კი ასეთი იქნებოდა ასტრახანი, ქალაქი, რომელსაც მთელი იმპერია უნდა აეყვავებინა.

კასპიის ზღვა შეიძლებოდა გამხდარიყო ყველაზე ხელსაყრელი ადგილი კომერ-

ციისთვის, თუმცა მაშინ ცოტა რამ თუ იცოდნენ მისი ნაპირებისა და მისადგომების შესახებ. პირველ ყოვლისა, აუცილებელი იყო ზუსტი ინფორმაციის შეგროვება. იმპერატორმა, რომელსაც მეზობელი სახელმწიფოების წყრომის ეშინოდა, თავისი გეგმები რომ დაემაღა, გამოაცხადა, თითქოს მდინარე დორიის, იმავე გორიის სათავეს ეძებდა, რომლის წყლებში ოქრო იყო. ალექსანდრე ბეკევიჩი, ჩერქეზეთის პრინცი, მომდევნო წელს სასურველი ნახაზებით დაბრუნდა. წარმატებით ფრთაშესხმულმა იმპერატორმა პრინცს მეორე დავალება მისცა, რაც მოგვიანებით სპარსეთისთვის ომის გამოცხადების მიზეზი გახდა. ექსპედიციის მთავარი მიზანი იყო კასპიის ნაპირებზე ორი ციხესიმაგრის აგება, რომლებსაც სავაჭრო გემები უნდა დაეცვა.

1716 წელს პრინცი ბეკევიჩი სათავეში ჩაუდგა რეგულარულ არმიას, რომელიც სამი ათასი მეზობლისგან შედგებოდა, მაგრამ თათრებმა ისეთ დღეში ჩააგდეს, იძულებული გახდა ძალები დაეხსაქსა. ისინი თავს დაესხნენ რუსების ჯარს და სულ ნაწილ-ნაწილ გაულიტეს, გენერალს კი სასტიკი წამებით სული ამოხადეს. ამ საშინელი ამბიდან ცოტა ხნის შემდეგ იმპერატორმა შექმნილი მდგომარეობით ისარგებლა და კასპიის დასავლეთი ნაწილი, ხოლო საქართველო მთლიანად დაიკავა, რომელიც, მას და ვახტანგს (ქვეყნის მეფისნაცვალი) შორის არსებული შეთანხმების საფუძველზე, ისედაც რუსეთის ქვეშევრდომი იყო. იმპერატორმა ოსმალეთის იმპერიის ხელისუფლებას აგრძნობინა, რომ მისი ერთადერთი მიზანი ლეკების გამოშურისძიება იყო, თუმცა ბოლოს, ისევე როგორც შვედებთან, თურქეთთან შეთანხმებას მაინც მიაღწია და ზავი დადო, რომელიც ცნობილია, როგორც ნოიშტადტის ზავი. მხოლოდ ამის შემდეგ დაიმშვიდა გული და უავგუსტეს მეუღლესთან ერთად 1722 წლის 24 მაისს მოსკოვიდან გაემგზავრა. ასტრახანში მან მოინახულა ექსპედიციისთვის გამზადებული ჯარი, სპარსულ პროვინციებში ჯარისკაცებთან ერთად გაემგზავრა და პირველ რიგში დერბენდი აიღო.

თურქები დერბენდს დემირ-კაპის, ანუ რკინის ჭიშკარს ეძახიან. ეს არის პირველი გამაგრებული ადგილი, საიდანაც დაღესტნის გავლით შირვანში გადადიხარ. ციხესიმაგრე გაშლილია კავკასიის ძირში, ზემოთ კი, ერთ-ერთ მთაზე, ზღვის დონიდან დაახლოებით 3 000 იარდის სიმაღლეზე, დგას კოშკი, რომლის ორი კედელი ზღვას გადაჰყურებს. იქვეა ვიწრო ხეობა, რომელსაც რომაელები კასპიის ჭიშკარს ეძახდნენ (პლინიუსი ამ ტერმინს არამართებულად მიიჩნევდა.). პეტრე დიდი, ოსმალეთის მიმართ თავისი ინტერესის გათვალისწინებით, მცდელობას არ აკლებდა, დერბენდი ხელში ჩაეგდო, რადგან, მისი აზრით, ეს იყო ყველაზე მნიშვნელოვანი გასასვლელი, რომელიც რუსეთს მეზობელ ქვეყნებსა და სამხრეთ აზიასთან დააკავშირებდა.

ვახტანგმა, რომელიც თურქების გავლენას განიცდიდა და დიდად არც თავისი ხალხი სწყალობდა, იმპერატორს დანაპირები ვერ შეუსრულა. ამ უკანასკნელმა, რომელიც თავისი ახალი მდგომარეობით ფრიად კმაყოფილი გახლდათ, გადაწყვი-

ტა, ლაშქრობა დაესრულებინა და ასტრახანში დაბრუნდა მას შემდეგ, რაც თავისი ნაცვალის დანიშნა და დერბენდის ციხეში ორი ათასი რუსი ჯარისკაცი დატოვა, მდინარე სულაკზე კი, რომელსაც სახელი გადაარქვა და St. Croix უწოდა, ციხე ააგებინა.

შემფთოებულმა თურქებმა იმპერატორთან სასწრაფოდ აფრინეს ემისარი, რომელმაც რუსებს დერბენდისა და ტარკის დატოვება და ციხესიმაგრის დანგრევა მოსთხოვა. მოლაპარაკებების პარალელურად, ორივე ქვეყანა ომისთვის ემზადებოდა. პეტრემ ბრძანება გასცა, დერბენდის ციხე თავდაცვით რეჟიმზე გადაეყვანათ, ხოლო დაღესტნის საზღვართან ჯარი ჩაეყენებინათ, თან თურქებს არწმუნებდა, თქვენთან ზავის დარღვევა არ მინდაო. მისი თქმით, ლეკებისა და ასტრახანთან გააქტიურებული უზბეკების დამოშმინების გარდა, სხვა განზრახვა არ ჰქონდა. ამისთვის სჭირდებოდა დაეკავებინა ქვეყანა, რომელიც შავ და კასპიის ზღვებს შორის მდებარეობდა. მარკიზი დე ბონაკი, საფრანგეთის ელჩი კონსტანტინეპოლში, რომელიც იმპერატორსა და ოსმალეთს შორის შუამავლის როლს ასრულებდა, ყოველ ღონეს ხმარობდა, ეს უკანასკნელი დაემშვიდებინა, რადგან რუსებზე მეტად სპარსეთის აგრესიის ემინოდა. ამასობაში რუსებმა გილანი აიღეს. ოსმალებმა შეკრიბეს 40 000-იანი არმია, რომელსაც სათავეში ერზურუმის ფაშა იბრაჰიმი დაუყენეს და თბილისზე გაილაშქრეს. ქართველები დამარცხდნენ, თურქებისთვის კი ეს გამარჯვება რუსების მიერ გილანის აღების საპირწონე იყო. ორივე სახელმწიფო თავს გამარჯვებულად გრძნობდა, განსაკუთრებით სპარსეთის ფონზე, რომელიც სამოქალაქო ომის გამო სისხლისგან იცლებოდა.

რუსეთის იმპერატორს ახალი თავსატეხი გაუჩნდა – გილანთან დასაკავშირებლად ბაქოს ციხე უნდა აეღო. ამ ახალმა ვითარებამ შაჰ-თამაზს ბევრი ვერაფერი არგო. უზურპატორი მუჰამედის მიერ უკიდურესად შევიწროებული შაჰი იძულებული იყო, საშველად რუსეთისთვის მიემართა. მან პეტერბურგთან დადო ხელშეკრულება, რომლის მიხედვით, თმობდა დერბენდისა და ბაქოს ახლომდებარე დასახლებებს, ასევე გილანის, მაზანდარანისა და ასტრახანის პროვინციებს. 1724 წელს ხელშეკრულება დაიდო რუსეთსა და თურქეთს შორის. მარკიზ დე ბონაკის ჩარევით ოსმალებმა შაჰ-თამაზის მიერ კასპიის პროვინციების დათმობის ხელშეკრულება ცნეს. პეტრეს სიკვდილისა და თურქების მიერ სპარსეთში წარმოებული დაპყრობითი კამპანიების შემდეგ, რომელიც თავრიზის აღებით დაგვირგვინდა, მათი პრეტენზიები კიდევ უფრო გაიზარდა; რუსებმაც საკმაოდ იხიერეს, მაგრამ დედოფალმა ანამ დათმო თავისი ახალი სამფლობელოები ვიდრე კურამდე (*იგულისხმება მდინარე მტკვარი. მთ. შენიშენა*), Resht-ის ხელშეკრულების ხელმოწერით დაამტკიცა, სამაგიეროდ კი, სპარსეთთან დაუბრკოლებელი ვაჭრობის უფლება მიიღო.

წერილი XXVII

თეიმურაზი

ტფილისი, 12 იანვარი, 1812 წელი

დიდი ხელმწიფის, პეტრე პირველის დაპყრობების შემდეგ მიწა გიამბოთ საქართველოს გმირზე, მეფე ერეკლეზე.

1740 წლის ცნობილი ინდოეთის ლაშქრობის შემდეგ ნადირ-შაჰმა საქართველოში მეფისნაცვლად კახეთის მეფე, თეიმურაზი დანიშნა და ცოტა ხანში თავის კარზე მიიწვია, მაგრამ თეიმურაზმა წასვლა ვერ გაბედა – ეშინოდა, რომ შაჰს მისი მოშორება და კახეთის მიტაცება ჰქონდა განზრახული. ამიტომ მშვიდობის შესანარჩუნებლად და ურთიერთობების მოსაგვარებლად თავისი ცოლი გაგზავნა. შაჰმა კეთილად მიიღო თეიმურაზის ცოლი და იმდენად მოიხიბლა მისი მანერებითა და კეთილშობილებით, რომ არა მარტო დაუდასტურა ქმრის პოზიცია, არამედ ისეთი ფირმანი უბოძა, რომლის თანახმად თეიმურაზი თავრიზის, ერევნის, განჯისა და კასპიის ზღვის მთელი სამხრეთ-დასავლეთის მეფისნაცვალი ხდებოდა. 1713 წელს დედოფალს გაუჩნდა შვილი, ერეკლე, რომელმაც ბავშვობიდანვე განსაკუთრებული ნიჭი გამოამჟღავნა და მალე ნადირ-შაჰის რჩეული გახდა. ვახტანგ მეფის გადადგომისა და რუსეთში გამგზავრების შემდეგ ტახტის ხელში ჩაგდებას და მისი ადგილის დაკავებას ბევრი სხვა პრეტენდენტი ლამობდა, მაგრამ ნადირ-შაჰის ძალაუფლებისა და ერეკლეს სიმამაცის წყალობით მათი გეგმები ჩაიშალა.

1747 წელს ნადირ-შაჰი მოკლეს. მისი სიკვდილის შემდეგ სპარსეთში მდგომარეობა ისევ დაიძაბა, საქართველოში კვლავ განახლდა არეულობა და გამუდმებული თავდასხმები, თუმცა თეიმურაზი თავისი ვაჟის, ერეკლეს დახმარებით, სპარსეთისა და ლეკების მოგერიებას ახერხებდა. ორ შაჰს – კუგასა და იბრაჰიმს შორის უთანხმოების პერიოდში ერეკლემ რამდენიმე ბრწყინვალე გამარჯვება მოიპოვა. კუგამ უკან დაიხია და თავისი პოზიციები ინდოეთამდე დათმო; მაგრამ თეიმურაზსა და მის ვაჟს საკუთარ ძალებში დაურწმუნებლობის გამო ძლიერი მოკავშირე ესაჭიროებოდათ. 1752 წელს მათ რუსეთში გაგზავნეს ელჩები და დედოფალ ელიზავეტას სთხოვეს, მტრებისგან დაეცვა ისინი, ებოძა ფირმანი, როგორც ვახტანგ მეფეს ცარმა, ალექსი მიხაილოვიჩმა უბოძა და განეახლებინა ყველა რწმუნება, რაც საქართველოს რუსეთისგან ჰქონდა. ამის სანაცვლოდ, საქართველომ რუსეთს ქვეშევრდომობა აღუთქვა და ერთგულების ფიცი მისცა.

ამასობაში ერეკლე სპარსეთის ტახტის სამ პრეტენდენტს ებრძოდა. ორ მათგანზე ბრწყინვალე გამარჯვება მოიპოვა, მაგრამ მესამესთან დამარცხდა. მისი სიმამაცე თვით სპარსელებსაც კი იმდენად აღაფრთოვანებდათ, ხშირად ერ-

თმანეთთან შუამავლობას მას სთხოვდნენ. იმ პერიოდში სპარსეთი ერთი დიდი ბრძოლის ველი იყო, სადაც სამი მემკვიდრე ერთმანეთს ტახტისთვის ერკინებოდა. იმ ომის ქარცეცხლისა და ძალაუფლებისთვის დაუნდობელი ბრძოლის აღწერა ყოვლად წარმოუდგენელია.

1760 წელს თეიმურაზსა და მის ვაჟს შორის განხეთქილება ჩამოვარდა. ერეკლემ ქართლი და კახეთი დაიპყრო, თეიმურაზი კი იძულებული გახდა ჯერ გორში, შემდეგ კი რუსეთში, პეტერბურგში წასულიყო, სადაც 1762 წელს აღესრულა. დაკრძალულია ასტრახანში.

ამ ხნის განმავლობაში ერეკლე საკმაოდ გაძლიერდა. 1761 წელს მან თავის მფარველობაში მოაქცია ასად-ხანი. ქერიმ-ხანსა და აჰმედ-ხანს შორის დანაწევრებული სპარსეთი საფრთხეს აღარ წარმოადგენდა. 1763 წელს, როდესაც თურქეთსა და რუსეთს შორის ომმა იფეთქა, ერეკლემ თავისი ჯარი რუსეთს მიაშველა. ამ საბაბით რუსის ჯარი გრაფ ტოტლებენის მეთაურობით საქართველოში შევიდა და იმერეთი და სამეგრელო თურქეთის უღლისგან გაათავისუფლა, მეფობა აღუდგინა სოლომონს, რომელმაც თურქების შემოჭრის შემდეგ თავი მთებს შეაფარა. 1774 წლის ზავის მიხედვით, ქართლ-კახეთი თურქებისგან გაათავისუფლდა, სამეგრელო კი ისევ მათ მმართველობაში დარჩა. ამ ზავის შედეგად საქართველო მთლიანად გაათავისუფლდა თურქთა თავდასხმებისგან, მაგრამ სპარსეთთან ასეთი შეთანხმება არ არსებობდა. ქვეყანამ ამოისუნთქა, თუმცა შინააშლილობის მოსურნეები ადვილად არ ნებდებოდნენ. ქართლის ტახტის ძიება, რომელიც ერეკლემ თავის სამეფოს, კახეთს მიუერთა, ყოველ წამს შეიძლებოდა ვახტანგის (რომელიც 1724 წელს გადადგა) მემკვიდრეებთან ახალი შეტაკების საბაბი გამხდარიყო. ამ საფრთხის გამო ერეკლემ გადაწყვიტა, ქართლი და კახეთი რუსეთის იმპერატორის, ეკატერინე მეორისთვის ჩაეხარებინა. 1783 წელს გეორგიევსკში დადებული ხელშეკრულების მიხედვით, რომელსაც ხელი მოაწერეს რუსეთის მხრიდან გენერალმა პოტიომკინმა, ხოლო საქართველოს მეფის მხრიდან პრინცებმა, ბაგრატიონმა და ჭავჭავაძემ, საქართველო რუსეთის შემადგენლობაში შევიდა.

ამ შეთანხმებით გააგებულმა თურქებმა საქართველოს, რომელიც ამიერიდან რუსებს უნდა დაეცვათ, ლეკები შეუსიეს. ეს ამბავი რუსეთსა და თურქეთს შორის ომის მიზეზი გახდა. 1791 წლის საზავო ხელშეკრულების საფუძველზე ქართლ-კახეთი თურქებისგან გაათავისუფლდა. ამიერიდან კავკასიელ ტომებს ამ პროვინციებზე თავდასხმა აეკრძალათ, თუმცა საქართველო ახალი ჭირისგან ვერც ამ ღონისძიებებმა დაიცვა. ამასობაში სპარსეთის ტახტზე აღზევდა საჭურისი აღა-მაჰმად-ხანი, რომელიც 1794 წელს საქართველოს შემოესია, 1795 წელს კი ერეკლე მეორის წინააღმდეგ გაილაშქრა. ერეკლე დამარცხდა და თავს გაქცევით უშველა, აღა-მაჰმად-ხანმა თბილისი აიღო. რუსების შურისძიებამ არ დაახანა: საომარ

კამპანიას სათავეში ჩაუდგა გრაფი ვალერიან სუბოვი და 1796 წელს დერბენდი, შემახა, ბაქო და განჯა დაიბრუნა. ასეთი სამხედრო დახმარების გარეშე ერეკლე თავის კარიერას გაურკვეველ ვითარებაში დაასრულებდა და სადმე, თავისი სამფლობელოსგან შორს, დაღუვდა სულს. ეკატერინე მეორის სიკვდილმა საფრთხე შეუქმნა რუსეთის მონაპოვარს სპარსეთში. იმპერატორმა პავლემ ჯარი უკან გამოიწვია, საქართველო მეზობელი ბარბაროსებისთვის იოლ ლუკმად იქცა. ეს ვითარება კიდევ უფრო დამძიმდა 1798 წელს, მას შემდეგ, რაც 64 წლის ასაკში, თავისი მეფობის ორმოცდამეთორმეტე წელს მეფე ერეკლე გარდაიცვალა. ტახტზე ავიდა მისი მემკვიდრე, რომელიც ასევე ებრძოდა ურიცხვ მტერს, განუწყვეტლივ რომ ესეოდა მის ბედკრულ ქვეყანას. მან იცოდა, რომ თავისი ქვეყნის აღსასრული ახლოვდებოდა და იმპერატორ პავლეს ქვეშევრდომობის თხოვნით მიმართა. იმპერატორმა მისი თხოვნა შეისმინა. შედეგად, 1801 წელს საქართველოს ანექსია გამოცხადდა. ეს მანიფესტი იმავე წლის 12 სექტემბერს იმპერატორმა ალექსანდრემ განაახლა. საქართველოს უკანასკნელი მეფის, გიორგის სიკვდილის შემდეგ ქართლისა და კახეთის სამეფოები ხუთ რეგიონად დაიყო: გორი, ლორი, დუშეთი, თელავი და სიღნაღი. თავადმა ციციანოვმა საქართველოს საზღვრები მნიშვნელოვნად გააფართოვა სპარსეთში ლაშქრობებით.

წერილი XXVIII

ვაჭრობა საქართველოში

ტფილისი, 18 იანვარი, 1812 წელი

მას შემდეგ, რაც საქართველო რუსეთის შემადგენლობაში შევიდა, ვაჭრობა მათ შორის გაიზარდა, თუმცა მნიშვნელოვან დაბრკოლებას ქმნიდა კავკასიის ქედი, ასევე მანძილი ყიზლარსა და ასტრახანს შორის. მთავარი საკვანძო პუნქტი მოზდოკი იყო. საქართველოდან რუსეთში გაჰქონდათ აბრეშუმი, ძირითადად სპარსეთის მიმდებარე რეგიონებიდან. საქონლით დატვირთული ტრანსპორტი მხოლოდ ხაშურამდე მიდიოდა, კავკასიის ქედზე კი დაქირავებულ მტვირთავებს გადაჰქონდათ. მარშრუტის სირთულის გამო მხოლოდ ძვირფასი და მსუბუქი წონის საქონლით ვაჭრობდნენ, მაგალითად, სპარსული სანელებლებით, რომლებსაც საქართველოში შედარებით დაბალ ფასად ყიდულობდნენ. რუსეთიდან შემოდიოდა საათები, რკინა და ფოლადის ფურცელი, რკინა-კავეული, ბეჟდენდი (*cochineal* / *კოშინელი* – *ერთგვარი მწერი, რომელსაც საკვებში, ასევე სასმელში საღებავად იყენებდნენ, იგივე ჭიაფერი. მთ. შენიშენა*), ინდიგო და ნაირფერი წმინდა ქსოვილი. ამ დრომდე ძირითადი საქონელი, რომელიც ამ ქვეყნიდან გა-

დიოდა, იყო ცოცხალი – ადამიანები, ქალები და კაცები, რომლებსაც მონებად ყიდდნენ, ძირითადად – თურქეთისა და სპარსეთის სერალებისთვის. ხშირად ლამაზ ქალს ცხენში ან ხმალში ცვლიდნენ. ამჟამად ეს სამარცხვინო ვაჭრობა თითქმის ამოიძირკვა.

ძირითადად, საქართველოდან იყვნენ მამლუქები, რომლებმაც ეგვიპტეში დაახლოებით მეთოთხმეტე საუკუნის მეორე ნახევარში ბაჰრის დინასტია გაანადგურეს, ტახტი ხელში ჩაიგდეს და 1517 წლამდე, სულთან სელიმის მიერ ეგვიპტის დაპყრობამდე, მბრძანებლობდნენ. სიტყვა მამლუქი აღნიშნავს ბიჭუნებს, რომლებსაც ვაჭრები და მძარცველები საქართველოდან, ჩერქეზეთიდან და ანატოლიიდან იტაცებდნენ და კონსტანტინეპოლსა და კაიროში ყიდდნენ. ბავშვებს ყიდულობდნენ ეგვიპტეში მაღალ სამხედრო წოდებამდე აღზევებული მათივე თანამემამულეები, საკუთარ სახლში მიჰყავდათ და თავიანთ მეგვიდრეებად ზრდიდნენ. შესაძლოა, ეს იყო ძველთაძველი ჩვეულება, დაკავშირებული პატრიარქ იოსებთან, რომელიც პოტიფარმა (*ბიბლიისა და ყურანის პერსონაჟი, ფარაონის ამაღლის უფროსი მთ. შენიშვნა*) თავის სახლში მონად მიიყვანა და მისი ჭკუით იმდენად მოიხიბლა, რომ ეგვიპტის პირველი ვეზირის წოდება უბოძა. ეს ერთ დროს მონად გაყიდულები ახლა ბეის ტიტულს ატარებენ და სახელმწიფო მართვაში მონაწილეობენ, მაგრამ მაშინ მათ მიმართ კანონი იმდენად მკაცრი იყო, რომ ბეის შვილს არ შეეძლო მაღალი თანამდებობა დაეკავებინა, მას მხოლოდ სამხედრო კარიერის არჩევის უფლება ჰქონდა; მაშინდელი სახელმწიფო ორგანო კარგ ხელფასს უნიშნავდა, დაეზნე-ელ-ბალადის სტატუსს ანიჭებდა, რაც „ქვეყნის შვილს“ ნიშნავს. თითქმის ყველა მამლუქი ქრისტიანული წარმოშობის იყო, მაგრამ მყიდველებს ისინი მუსლიმანურ სარწმუნოებაზე გადაჰყავდათ, ასწავლიდნენ თურქულ და არაბულ ენებს, შემდეგ კი – ყურანს, რომელიც მუსლიმანურ სამყაროში ერთსა და იმავე დროს რელიგიაცაა და სამოქალაქო კოდექსიც. დიდი სიზუსტითა და სიმარტივით ჩამოყალიბებული კანონების ცოდნა მათ საშუალებას აძლევდა, ნებისმიერი სიძნელის გადასატრელად ყურანისთვის მიემართათ. ყურანის კანონებში გაწაფულ მუსლიმანს სრულად ჰქონდა გაცნობიერებული თავისი მოვალეობა ღმერთისა და კაცის წინაშე და ამდენად, შეეძლო საღვთო, საერო და სამხედრო საქმეებს გასძლიოდა.

მამლუქებს ადრეული ბავშვობიდან წვრთნიდნენ და ცხენზე ჯირითს, შუბის ტყორცნას, მახვილის მარჯვედ ქნევასა და ცეცხლსასროლი იარაღის გამოყენებას ასწავლიდნენ; უდაბნოს მწველ სიციხეს და ცხელ ჰავასთან გამკლავების წესებს აჩვენებდნენ და მუდმივად სრულყოფისკენ სწრაფვას უღვივებდნენ. მამლუქი აუცილებლად უნდა ყოფილიყო ფიზიკურად ძლიერი და ამტანი, სულიერად გაუტეხელი. ერთადერთი, რაც მათ აკლდათ, ეს იყო ევროპული ტაქტიკა. ჩვენი ოფიცრების მიერ გაწვრთნილი მამლუქი კონკურენციას გაუწევდა ნებისმიერი ევროპული ქვეყნის ჯარისკაცს. მათ რიგებში არ იგრძნობა დისციპლინა, წარმოდგენა არა

აქვთ თანამედროვე არტილერიაზე და უსისტემოდ იბრძვიან.

15-18 წლის ასაკში მამლუქს შეუძლია დაიმორჩილოს ნებისმიერი ზნის ცხენი, ლაპარაკობს რამდენიმე ენაზე, გაწაფულია რელიგიურ და საკანონმდებლო საკითხებში და შეუძლია გაუმკლავდეს ნებისმიერ ამოცანას, რომლის წინაშე შესაძლოა მისი მდგომარეობის ადამიანი აღმოჩნდეს. მამლუქს შეიძლება მიენიჭოს ნებისმიერი სამხედრო წოდება თავისი დამსახურებისა და მიხედვით. როგორც კი ბეი ქაშეფის, ანუ ლეიტენანტის წოდებას მიაღწევდა, პატრონს უფლება ჰქონდა, მის კონტროლს დაქვემდებარებული ქალაქის მმართველად დაენიშნა. ლეიტენანტის წოდების მამლუქს შეეძლო თვითონ ეყიდა მამლუქები, რომლებიც მასთან ერთად საქმიანობდნენ და ქონებას ერთმანეთში იყოფდნენ. ლეიტენანტზე აღმატებული წოდებაა ბეი, რომელიც მამლუქს დივანის (პროვინციაში მოქმედი საბჭოს) ოცდაოთხ წევრს შორის მოხვედრის შესაძლებლობას აძლევდა, თუმცა-ღა ბეი ასეთი პოზიციის დაკავების შემდეგაც კი თავს თავდაპირველი პატრონის ქვეშევრდომად მიიჩნევდა და მისდამი მორჩილებას გამოხატავდა.

ასეთი იყო მამლუქების წარმოშობა და მათი სამხედრო კარიერა.

კავკასიის საკმაოდ მწირი გარევაჭრობა დიდ შემოსავალს არ იძლეოდა. მათ გაჰქონდათ თაფლი, ცვილი, ტყავი, გაჰყავდათ აგრეთვე ცხენები. სამაგიეროდ, შემოჰქონდათ ტილოს ქსოვილი, ტყვია, რკინა, ფოლადის ნაწარმი, რუსული ტყავი და დენტი.

ყიზლარის ციხესიმაგრე, რომელიც თერგის სათავისგან ორმოცი ვერსით არის დაშორებული, 1735 წელს ააშენეს. იგი საქართველოსა და კავკასიის შორის საკვანძო სავაჭრო პუნქტია, რომელიც, თავის მხრივ, ასტრახანის სავაჭრო მარშრუტის ნაწილს წარმოადგენს. თერგი რომ ნაკლებქვიშიანი იყოს და ნავებს ატარებდეს, ყიზლარი უფრო განვითარებულ სავაჭრო ადგილად იქცეოდა, თუმცა მდინარისა და ზღვის შესართავთან წყლის დონე შვიდ-რვა ფუტს არ აღემატება, ასე რომ, გამტარუნარიანობას ეს მიზეზიც უშლის ხელს. სპარსეთიდან ძირითადად აბრეშუმი გადის, ისიც – უმნიშვნელო რაოდენობით.

დერბენდი ათდღიანი ფიცხელი შეტაკებების შემდეგ ხელში ჩაუვარდა რუსეთს. ეს ადგილი სავაჭროდ გამოუსადეგარია – არც უსაფრთხო პორტია და არც წესიერი მისადგომები. გემები რამდენიმე ვერსის მოშორებით ჩერდებიან. აქ ქარის მიმართულება წამდაუწუმ იცვლება და გემებს ნაპირისკენ მიაქანებს. გაცილებით მოსახერხებელია ნისავაჯას ნავმისადგომი, რომელიც ნისიბატში, დერბენდის სამხრეთით, ორმოცი ვერსის მოშორებით მდებარეობს.

ბაქოში, რომელიც დერბენდიდან ორი ათასი ვერსის მანძილზე მდებარეობს, როგორც უკვე აღვნიშნე, სპარსეთის არეულობის შემდეგ ცხოვრება მინელდა. მიუხედავად ამისა, აქ დღემდე ნახავთ დიდებულ მეჩეთებსა და ლამაზ სახლებს, მოედნებსა და პორტთან ახლოს ჩამწკრივებულ ქარვასლებს, რაც ძალიან მოსა-

ხერხებელს ხდის ტვირთის გადაზიდვას. ბაქოს ძირითადი პროდუქტი არის ნავთობი, რომელიც იქვე, ქალაქთან ახლოს მოიპოვება. ამ ნივთიერებას გამოსათვთვრებლად იყენებენ, ხანდახან გამოსადეგია მედიცინასა და მხატვრობაში. ბაქოდან გადის ოპიუმი, ღვინო, ბრინჯი, აბრეშუმი, ბამბა და ზაფრანა. ბაქოს პორტს მდინარის სათავე ქმნის. ვაჭრობა უფრო ხელსაყრელი იქნებოდა, აქაურობასთან უფრო ახლოს რომ იყოს სალიანი – პატარა დაბა, რომელიც ამავე დასახელების კუნძულზე მდებარეობს. ეს ქვეყანა განთქმულია მარილით, თევზითა და ლერწმით, რომელიც მტკვრის ნაპირებზე იზრდება და ტოლს არ უდებს არასისა და ესპანეთის ლერწამს.

ეინსელი – ადგილი კასპიის სამხრეთ ნაპირებზე, სარფიანად ვაჭრობს ასტრახანთან. ადრე აქ რუსეთის კონსული ცხოვრობდა. ეინსელიდან პროდუქცია გადის რეხტში, რომელსაც მისგან სულ რაღაც ოცი ვერსი აშორებს. ეს ქალაქი ასევე ვაჭრობს გილანთან, იქიდან საუკეთესო აბრეშუმს იღებს – ქსოვილის მასალას, რომლითაც თავრიზს იქით, ყაზვინსა და ისპაჰანთანაც კი ვაჭრობენ. გარდა ამისა, ამ ქალაქებს ეინსელი რუსული პროდუქციითაც ამარაგებს.

ბოლო საუკუნეში გილანის აბრეშუმის ექსპორტი წელიწადში 5 000 ფუტას აღემატება, თითოეული 7-9 გირვანქას იწონის. მიმდინარე კურსით თითო ფუტა 90 რუბლი ღირს. პეტრე პირველის ლაშქრობამდე აბრეშუმი თურქეთში გადიოდა.

რუსეთსა და სპარსეთს შორის პოლიტიკური ურთიერთობების გაუმჯობესება უცილობლად გავლენას მოახდენს ვაჭრობის განვითარებაზე; და კიდევ ერთი – ყველაზე მისაღები იქნებოდა საქონელგაცვლა. რუსეთს ნამდვილად სჭირდება ძვირფასი ლითონების ინდუსტრიის განვითარება, ამაში კი მას სპარსეთის ბაზრისთვის აუცილებელი და საჭირო პროდუქციის ექსპორტი დაეხმარებოდა.

ეს კომერციული ურთიერთობები რუსეთს გზას გაუხსნის ინდოეთისკენ. მანძილი არც ისეთი დიდი დაბრკოლებაა, როგორც ერთი შეხედვით შეიძლება მოგვეჩვენოს. სახმელეთო გზებზე ტვირთის გადასაზიდად აქლემებს იყენებენ. ისინი იკვებებიან მანანის ბუჩქის ნაყოფით, რომელსაც ყველგან შეხვდებით. სპარსეთში, მაგალითად, ვაჭრებისთვის არსებობს ქარვასლები, სადაც მათ შეუძლიათ საქონელი უსასყიდლოდ დააბინაონ და თავადაც დაისვენონ. ამ მნიშვნელოვანი ფაქტორისა და სპარსთა საქმიანი და ფხიზელი ბუნების წყალობით, რომელიც განსაკუთრებით მოგზაურობისას ვლინდება, ტვირთის გადაზიდვა ძვირი არ ჯდება, რაც კიდევ უფრო ხელსაყრელს ხდის ინდოეთთან ვაჭრობას.

წერილი XXIX

საჯარო დაწესებულებები

ტფილისი, 25 იანვარი, 1812 წელი

აქ უკვე ვესტუმრე ორ საქველმოქმედო ორგანიზაციას, ორივე ძირითადად გენერალ-გუბერნატორის მეოხებით არსებობს. ერთი მათგანი არის საკმაოდ დიდი და მყუდრო, განსაკუთრებულად სუფთა და მოვლილი ლაზარეთი, რომელსაც დღითი დღე სულ უფრო მეტი სარგებელი მოაქვს ქალაქისთვის. მისგან არცთუ ისე შორს მდებარეობს ბოტანიკური ბაღი, სადაც უამრავი სამკურნალო მცენარე ხარობს. მეორე დაწესებულებაა საჯარო სკოლა ახალგაზრდა ქართველთათვის, რომელშიც არაერთი თვალსაჩინო მოღვაწე სწავლობდა. ზოგადად, აზიელებს ნიჭი არ აკლიათ, მაგრამ ძველთაგანვე მოსდევთ სიზარმაცე, რომელიც მამიდან შვილს გადაეცემა. ეს ნაკლი დამახასიათებელია თბილისის კლიმატის ქვეყნებისთვის და, რა თქმა უნდა, აღმოსაფხვრელია.

დღეს სპარსთა ვერაგობის ორი მსხვერპლის დასაფლავებას დავესწარი. თავადი ციციანოვი, წარმოშობით ქართველი, რომელმაც არაერთხელ გამოიჩინა თავი რუსეთის სამსახურში, 1803 წელს საქართველოს სამხედრო გუბერნატორად დაინიშნა. ეს ის ციციანოვია, რომელმაც განჯის ციხე შეტევით აიღო, ქალაქს სახელი შეუცვალა და ელიზავეტპოლი უწოდა. მან ხელში ჩაიგდო რამდენიმე სახანო, მათ შორის შუშა და ყარაბაღი. თავად ციციანოვის მიმართ მოწიწებას იჩენდნენ თურქები, სპარსელები, ლეკები და ამ რეგიონის ბევრი სხვა ეთნოსი. დღემდე მის სახელს შიშით ახსენებენ, სპარსეთში ბავშვებსაც კი აშინებენ. ციციანოვმა ბაქოს ხანისგან რწმუნება მიიღო ქალაქის ციხის გასაღების ჩაბარების შესახებ და მაშინვე მასთან შესახვედრად გაემგზავრა, თან მხოლოდ პოლკოვნიკი ერისთავი და კაზაკების პატარა რაზმი იახლა. ისინი ხაფანგში შეიტყუეს, ხანის ბრძანებით დახოცეს, თავები დააჭრეს და სპარსეთის შაჰს გაუგზავნეს, სხეულები კი ადგილზევე დამარხეს. მხოლოდ მას შემდეგ, რაც ბაქო რუსებმა აიღეს, გენერლების, გლეხებისა და ბულგაკოვის ბრძანებით სამარე გათხარეს და ქართველთა ცხედრები სომხურ ეკლესიაში დასაკრძალად გადაასვენეს. ახლანდელი გენერალ-გუბერნატორის ბრძანებითა და მისი პირადი მრჩეველის დახმარებით მიცვალებულები თბილისში გადმოიყვანეს და დიდი პატივით სიონში დაასვენეს. დასაფლავებას დაესწრნენ გენერალ-გუბერნატორი, რამდენიმე სხვა გენერალი, სამხედრო და საერო მთავრობის წევრები, თბილისისა და სხვა ქალაქების გარნიზონები. მათ მთელი ქალაქი სამგლოვიარო მუსიკის თანხლებით გამოიარეს და სიონს მიადგნენ. ამ პროცესიის სანახავად მთელი თბილისი გამოეფინა, სახლების სახურავებიც კი ხალხით იყო სავსე.

ძალზე შთამბეჭდავი იყო გენერალ ციციანოვის კუბოს სამარეში ჩაშვების მომენტი – ეკლესიის წინ ჩამწკრივებული ჯარისკაცები იარაღის სამი ზალპით გამოემშვიდობნენ ამ მამაც ოფიცერს. ეს იყო ნაღვლიანი ცერემონია და ამასთანავე – გულწრფელი გამოთხოვება.

აი, მისი ეპიტაფიაც:

აქ განისვენებს თავადი პავლე დ. ციციანოვი – მუხანათურად მოკლული დაუმარცხებელი ოფიცერი, რუსული არმიის მთავარსარდალი საქართველოში. მტრებმა ვერაგული ჩანაფიქრი აღასრულეს 1906 წლის 8 თებერვალს, როდესაც ბაქოში ჩავიდა ქალაქის ციხის გასაღების მისაღებად. იქვე დამარხეს. ამჟამად კი, მისი საიმპერატორო უდიდებულესობის, ალექსანდრე პირველის ბრძანებითა და საქართველოს გენერალ-გუბერნატორის, მარკიზ დე პაულუკის ძალისხმევით აქ განისვენებს ნეშტი ამ დიდებული სარდლისა, რომელმაც დიადი საქმეებით უკვდავყო თავისი სახელი.

ამ ცერემონიას ესწრებოდა სპარსეთის ხანი **ჯაფირ ყული**, შაკის (შექის) (რეგიონი ამერბაიჯანში. მთ. შენიშენა) ხანი, რომელიც ამჟამად რუსეთის არმიის გენერალ-ლეიტენანტის წოდებას ატარებს. ის ახლახან ჩამოვიდა ტფილისში, რათა პატივისცემა დაუდასტუროს ახალ გენერალ-გუბერნატორს. ქვემოთ უფრო დაწვრილებით მოგახსენებთ მის შესახებ.

შაკის (შექის) ხანი საკმაოდ ხანდაზმულია, თარგმანის მიხედვით თუ ვიმსჯელებთ, შესანიშნავი მოსაუბრეა, ცდილობს, თავი ევროპულ ყაიდაზე დაიჭიროს. სწორედ ის ედავებოდა სპარსეთის ტახტს ამჟამინდელ შაჰს. მას შემდეგ, რაც იმედები გადაეწურა, სპარსეთში აღარ დაედგომებოდა, მით უმეტეს, რომ რუსებს თანაუგრძნობს. ხვალ ვაპირებ დაწვრილებით მოგწეროთ იმ სასიამოვნო დროს ტარების შესახებ, რომელიც ხანმა მოგვიწყო.

ნერილი XXX

სპარსული ლხინი

ტფილისი, 21 იანვარი, 1812 წელი

რამდენიმე დღის წინ ჯაფირ ყული-ხანმა სადილზე მიიწვია გენერალ-გუბერნატორის მეუღლე, რომელსაც მეც თან ვახლდი. სუფრაზე შემოიტანეს თეფშები და დანა-ჩანგალი, რაც მიაჩნებდა მის სურვილზე, ჩვენ წინაშე ყურადღებიან მასპინძლად წარმოჩენილიყო. თუმცა თავად, სპარსული ჩვეულების თანახმად, ჭამის დროს ამ ნივთებს არ იყენებდა. მაგიდას მთელ სიგრძე-სიგანეზე ბრტყელი ლავაში ეფარა, რომელიც გადასაფარებლისა და ხელსახოცების როლს ასრულებდა. თავად ხანი თეფშისა და ხელსახოცის ნაცვლად უფრო მომცრო ზომის ბრტყელ ლავაშს იყენებდა.

სადილობა დაშაქრული ხილით დაიწყო, შემდეგ კი სპარსული წვნიანი – ბომბაში შემოიტანეს. ძალიან მაინტერესებდა მენახა, როგორ დახვრებდა ხანი წვნიანს, სანადლეოზმეც კი თანახმა ვიყავი, რომ თავს ვერ გაართმევდა, მაგრამ თურმე ვცდებოდი. მისი პურისგან დამზადებული თეფში კოვზის მოვალეობასაც ასრულებდა. მან პური დაამტვრია და წვნიანით სავსე თასში ჩაყარა. ლუკმებს სათითაოდ ხელით იღებდა და ყლაპავდა. ჩვენც კი გვაჯობა, მიუხედავად იმისა, რომ მისგან განსხვავებით ჩვენ თეფშებსა და კოვზებს ვიყენებდით. ცოტა არ იყოს, უსიამოვნო სანახავი იყო, როგორ სანსლავდა წვნიანს ხელით, მით უმეტეს, თუ იმასაც წარმოიდგენთ, რომ სპარსი თავადები ხელებს ყვითლად, ფრჩხილებს კი მუქ წითლად იღებავდნენ. წვნიანის შემდეგ უხვად დამტკბარი კერძები მოგვართვეს. მერე შემოიტანეს პილპილითა და ზაფრანით შეზავებული ხორცის რაგუ, რასაც მოაყოლეს დაახლოებით ექვსი სხვადასხვა სახის ფლავი – აზიელების საყვარელი საჭმელი; ამათგან მხოლოდ ერთის ჭამა ღირდა. ყველას სხვადასხვა ფერი ჰქონდა, ზოგი ცხვრის ხორცისა იყო, ზოგი ქათმის, ზოგი კიდეც წაბლით შეზავებული. ზოგი კერძი ხის შამფურებზე შემწვარი ხორცისგან მოემზადებინათ და ბოლის გემო დაჰკრავდა. შემწვარი ხორცი, რომელსაც ისინი შიშლიკს ეძახიან, ძალიან გემრიელია. უამრავი სახეობის ფლავი არსებობს. ერთ-ერთის რეცეპტს აქვე შემოვთავაზებთ:

ექვსი-შვიდი გირვანქა ცხვრის ხორცი დაგჭრათ და ორ ქათამთან ან სხვა შინაურ ფრინველთან ერთად მოვხარშოთ. წყალი გადავწუროთ და შევინახოთ. ქვაბის ძირზე დავადნოთ კარაქი. შემდეგ ფენებად მოვაცაროთ ბრინჯი, თითო ფენა დაახლოებით ორ-ნახევარი სანტიმეტრის სისქის უნდა იყოს. შემდეგ დავამატოთ წაბლი, შუაზე გაჭრილი გაფცქვნილი ნუში, უკურკო ქიშიში, მიხაკი, დარიჩინი და ილი. ზემოდან დავაწყოთ ხორცის ნატრები და ქვაბი ბოლომდე გავავსოთ ბრინჯით, ბოლოს კი დავასხათ ხორცის ნახარში ისე, რომ ბრინჯი მთლიანად დაიფაროს. თხუთმეტ წუთში ბრინჯი მზად არის, ნახარშს მთლიანად ამოიშრობს; ბრინჯს ზემოდან ასხამენ გამდნარ კარაქს. ამის შემდეგ ქვაბს აფარებენ ცხელ წყალში დასველებულ და გაწურულ ქსოვილის ნატერს და თავს მჭიდროდ ახურავენ. სუფრაზე მიტანამდე ბრინჯი კარგად უნდა გაიშალოს, ოღონდ ისე, რომ ტენი შეინარჩუნოს.

სასმელად სხვადასხვა სახეობის შერბეთი და აირანი მოგვართვეს. თუ გნებავთ, წარმოდგენა შეიქმნათ სპარსელთა ჭამის მანერაზე, უნდა დააკვირდეთ, როგორ ჭამენ ფლავს. თითებს ბრინჯში ჩაყოფენ, კარგა მოზრდილ ლუკმას ამოიღებენ და პირისკენ გააქანებენ. არც ჩანგლის, არც დანის გამოყენება არ იციან. საზიზღრად გაქონილ ხელს იშმენდენ ლავაშის ხელსახოცზე, რომელიც მაგიდას აფარია, ბოლოს კი ამ თავიანთ ხელსახოცსაც ჭამენ. ხანი ჭამის დროს მხოლოდ მარჯვენა ხელს ხმარობს, მარცხენა, თავისი ქვეყნის ჩვეულებისამებრ, ყოველთვის ქამარზე უდევს. სპარსელებს ცხიმიანი და დაშაქრული საჭმელები უყვართ, მათ სამზარეულოში ზაფრანა განსაკუთრებული სანელებელია. ხანი, რაც შეეძლო, ცდილობდა,

თავაზიანად მოქცეულიყო. ჩვენსავით სკამზე იჯდა, თუმცა სპარსელები მაგიდებსა და სკამებს საერთოდ არ იყენებენ. ისინი პირდაპირ იატაკზე გაშლილ ხალიჩაზე სხედან და წინ სატმელ-სასმლით სავსე დიდი ლანგრები უდგათ. ჯდომის მანერაც უცნაური აქვთ – ფეხებს შიგნით ისე იკეცავენ, საერთოდ არ უჩანთ. რა თქმა უნდა, გარკვეული დროა საჭირო, რომ ადამიანი ასეთ ჯდომას მიეჩვიოს.

სადილის შემდეგ ყალიონი შემოიტანეს. პირველად ხანმა მოწია, შემდეგ კი, იმავე მუნდშტუკით იმას მიაწოდა, ვისი გამორჩევაც უნდოდა სტუმრებს შორის. სხვათა შორის, სპარსელებს აქვთ კიდევ ერთი უსიამოვნო ჩვევა – ისინი იღებენ კერძის ყველაზე გემრიელ ნაწილს, სულ პაწაწინა ნაჭერს, ცოტა ხანს ხელში აგუნდავენ, გამოარჩევენ ერთ ადამიანს და პირში ჩაუდებენ – ეს მათებურად დიდ პატივისცემას ნიშნავს. შაჰის წვეულებას იმდენად დიდებულს ვერ დავარქმევდი, რამდენადაც გასართობს. თვითონ შაჰმა რამდენჯერმე შეასრულა პოლონეზე, შეიძლება ითქვას, სპარსელისთვის არცთუ ისე ცუდად. აღმოსავლური ცეკვებიც მინახავს, სპარსულიც, ქართულიც და ლეკურიც. რა მანჭვა-გრეხაა! მუსიკაც ველურია და ილეულებიც. ამის შემდეგ მივხვდი, რას ნიშნავს ბაიადერების ცეკვა.

ხანის სტუმრობა თბილისში, მთელი თავისი ამალით, სპარსული მანერების კარგი მაგალითი იყო ჩვენთვის. ქალაქიდან გასვლამდე კიდევ ერთი სანახაობა მოგვიწყო: ეს იყო წარმოდგენა სპარსი ცხენოსნების მონაწილეობით, რომლებმაც ჯირითის საოცარი ილეუები გვიჩვენეს, დოღი და შუბებით ბრძოლა. გაქანებულ ცხენებზე ჯირითის დროს ერთი მეორეზე სწრაფად ცლიდნენ კარაბინებსა და პისტოლეტებს. ტფილისიდან მოშორებით ხანი ცხენიდან ჩამოხდა და ტახტრევანზე დაბრძანდა – ფრიად მოსახერხებელ, ფანჯრებიან ტრანსპორტში, რომელშიც ჯორები შეებათ. ტახტრევანმა მომაგონა გადასატანი სავარძლები, რომლებიც მრავლად მენახა ჩვენს საყვარელ ვენაში.

ნერილი XXXI

ქართული გაზაფხული

ტფილისი, 15 თებერვალი, 1812 წელი

გენერალ-გუბერნატორი პროვინციების მოსახლეულებლად გაემგზავრა. მისი საბოლოო დანიშნულების ადგილი იყო ბაქო, როგორც თავად განაცხადა.

გაზაფხული ძალას იკრებს. შეუძლებელია ადამიანი არ აღაფრთოვანოს საქართველოს არაჩვეულებრივმა ჰავამ. ყოველი დღე წინაზე უფრო მშვენიერია. უღრუბლო, გაკრიალებული ცის კამარაზე კაცი სამოთხეს დაინახავს. ნუშის ხეების ყვავილობა აქაურობას კიდევ უფრო ამშვენებს და სიკეკლუცეს მატებს. ყველაფერი ყვავის

და იფურჩენება. აქაური მზის ამოსვლა განსაკუთრებულად მშვენიერი და საზეიმო სანახაობაა, უთვალავი სახეობის ფრინველი გალობით ესაღმება სინათლის მშობლის ამობრწყინებას. ჰაერში ტრიალებს ათასგვარი სურნელი, მცენარეები რომ გამოსცემენ, მათი სინორჩისა და სილამაზით ტკობა ადამიანს არასოდეს მოსწყინდება; მაგრამ, როგორც ცხოვრების ყველა სიამე, გაზაფხული მალე გადის. ამბობენ, მაისის შემდეგ აქ ისეთ სიციხეებს დაიჭერს, ეს სიმწვანე სულ დატკნებაო. კავკასიონზე თოვლი აღარ დევს, მხოლოდ თეთრქუდიანი ყაზბეგი და კიდეც რამდენიმე მწვერვალი იწონებს თავს. კონტრასტი უზარმაზარია: ერთი მხრივ, ხაშური თავისი ჭაღარა მოსასხამით, მეორე მხრივ კი, თავისი სინორჩით ლორთქო სიმწვანე.

ზემოთ უკვე ვახსენე ჩვენი სახლის უკან, გორაკის კალთაზე, ბაღში ჩაფლული ეკლესია, რომელსაც გვერდზე ჩანჩქერი ჩამოუდის. არასოდეს მომწყინდება ამ ულამაზესი პეიზაჟის ცქერა. ყოველ კვირადღეს, ასევე დღესასწაულებზე, ვხედავ აღმართზე გამწკრივებულ მომლოცველებს, რომლებიც ეკლესიისკენ მიემართებიან. ამ ეკლესიიდან, საიდანაც ლამის მთელ ქვეყანას დაინახავთ, სრული დიდებულებით მოჩანს კავკასიონი. ასეთი სანახაობის შემყურემ შეუძლებელია ღმერთის ყოვლისშემძლეობა არ იწამო, მოწიწებით არ განიმსჭვალო მისი ყოველი ქმნილების მიმართ.

ტფილისი მთლიანად ხეხილის ბაღებშია ჩაფლული და ახლა, გაზაფხულზე, ყვავილებისგან თეთრად გადაპენტილია, გვეგონება, თეთრი მანდილი ახურავსო. ეს იმას ნიშნავს, რომ შემოდგომაზე ხილის კარგ მოსავალს მოიწვევენ. გენერალ-გუბერნატორმა თავის სახლთან ხეხილის ახალი ბაღი გააშენა, რაც მისთვისაც სასიამოვნო იქნება და მაგალითად გამოადგებათ ქართველებს, რომლებიც, მიუხედავად მშვენიერი ჰავისა, დღემდე არ იყენებენ იმ შესაძლებლობებს, ბუნება რომ იძლევა.

გენერალ-გუბერნატორის მეუღლე ყოველ საღამოს სტუმრად იღებს ქართველ ბანოვანებს, ძირითადად, თავადის ასულებს. მათ შორის სამეფო ოჯახიდანაც კი არიან. მათგან ყველაზე საინტერესოა თეკლა, ერეკლეს ასული, იგი თავად ორბელიანოვზეა გათხოვილი და თავი წარმომავლობის შესაფერისად უჭირავს. ბანოვანები ცხენით დადიან, ყოველთვის მსახურის თანხლებით. თავით ფეხამდე თეთრ მანდილებში არიან გახვეულები. ცხენზე ამხედრებული და ამგვარად შემოსილი ამაღლა სიბნელეში შეიძლება აჩრდილებოდაც კი მოგეჩვენოს. ზოგი მათგანი მოსვლისთანავე მოიხდის მანდილს და ქართული ტანისამოსით გამოგვეცხადება ხოლმე. გენერალ-გუბერნატორმა არაერთხელ გამოთქვა სურვილი, თავადის ასულებს თავიანთი უცნაური სამოსი ევროპულ კაბებზე გაეცვალათ. რამდენიმემ სიმამაცე გამოიჩინა და ევროპულად გამოწყობილი გამოჩნდა; თუმცა, ისიც უნდა ითქვას, რომ აღმოსავლური სამოსი, რომელიც ჩვენ უცნაურად გვეჩვენება, მათ ჰავასა და ცხოვრების წესს მშვენივრად ესადაგება. სპარსეთში, მაგალითად, კაცი, რომელიც თითქმის მთელ დროს ჯირითობასა და იარაღით წვრთნაში ხარჯავს, ფართო და მოხერხებულ შარვალს ატარებს, ქალს კი, რომელიც საკუთარ

ტახტს არ სცილდება, პირიქით, ვიწრო სამოსელი აცვია. ევროპაში კაცი ქუდს იხდის, სპარსი კაცი კი – არასოდეს. სამაგიეროდ, ისინი სახლში შესვლის წინ ფეხზე იხდიან, რათა არ დააზიანონ ხალიჩა, რომელიც სპარსეთში ყველა ოთახის განუყოფელი ნაწილია და საკმაოდ ძვირია. აღმოსავლეთში უამრავი ადათ-წესი და ჩვეულებაა, რომლებიც ევროპულ ღირებულებებს ეწინააღმდეგება. მაგალითად, ქართულ სუფრაზე პირველად ის კერძები შემოაქვთ, რაც ჩვენში დესერტად ითვლება. ზაფხულობით აქ ისე ცხელა, ადგილობრივები მსუბუქი და გამაგრილებელი საკვების გარდა არაფერს ეკარებიან. ასეთი თავშეკავების შედეგად, საკმაოდ ძლიერები არიან და ღრმა სიბერემდე ცოცხლობენ. მამაკაცები ზაფხულობითაც თბილად იმოსებიან, რადგან საღამოობით საკმაოდ გრილა. ამგვარად, დავასკენი, რომ თურქებს, მოლდაველებსა და ესპანელებს ურჩევნიათ დღისით დასცხეთ, ვიდრე საღამოს, მზის ჩასვლის შემდეგ შესცივდეთ. ამ დროს მართლაც საგრძნობლად აცივდება ხოლმე, როგორც სამხრეთული ქვეყნების წესია. ტფილისში ჯერ კიდევ შეხვდებით ქალებს, განსაკუთრებით დაბალი წრის წარმომადგენლებს, რომლებიც ძველებურად სახეს იფარავენ და მხოლოდ თვალები უჩანთ. სპარსელები ქალების სამყოფელს ჰარამხანას, წმინდა ადგილს ეძახიან, თურქები კი – სერალს, რაც მათ ენაზე სასახლეს ნიშნავს. არსად ისე მკაცრად არ იცავენ ქალების სამყოფელს, როგორც სპარსეთში, სპარსი კაცების ზღვარდაუდებელი ეჭვიანობის გამო. ასეთ საქციელს ისინი ამართლებენ თავიანთი მოციქულის სიტყვებით: „დაიცავი შენი მრწამსი და შენი ქალები“. იმის გამო, რომ ამ სენტენციას მეტი წონა შემატონ, ამბობენ: ეს არის ერთ-ერთი ყველაზე მნიშვნელოვანი შეგონება მისი უზენაესი დოქტრინებიდან, რომლებსაც ის, მომაკვდავი, სასიკვდილო სარეცელზე წარმოთქვამდა.

სხვადასხვა ქვეყანაში განსხვავებული ჩვეულებებია. სპარსეთში ბრძენკაცს ჩვენში სულელად შერაცხავდნენ, ან იქნებ იმდენად სულელად არა, რამდენადაც სასტიკ და უსამართლო ადამიანად. ქვეყანაში, სადაც სიზარმაცე ლამის სათნოების დონეზეა აყვანილი და ტკბობის უზენაეს წყაროს წარმოადგენს, სინამდვილეში კი მათ სისუსტეს კვებავს და ამართლებს, სავსებით გასაგებია ის საშიშროება, რასაც სპარსი მამაკაცები თავისუფალ ქალში ხედავენ; მაგრამ ნუთუ ამ საშიშროების ასაცილებლად მაინცდამაინც ამ საცოდავი ქალების დატყვევება და ერთ ადგილზე გამოკეტვაა საჭირო?! ასეთი საქციელი ჩვენი მაცხოვრის მცნებებს უარყოფს. განა მთელი კაცობრიობა ქალს არ უნდა უმაღლოდეს ყველა იმ სათნოებას, რომლებიც ამკობს ცივილიზებულ საზოგადოებას?! აზიელ ქალებს თავიანთი მონური მდგომარეობა განსჯის უნარსაც კი ართმევს; და თუ ნორმალურ საზოგადოებაში თავისუფალი ნების ადამიანი იქცევა მორალურ-ზნეობრივი კანონების შესაბამისად, დედამიწის ამ ნაწილში ქალის ცნობიერება მოწამლულია მამაკაცთა დესპოტური მბრძანებლობის შხამით, რომელიც ამროვნების გასაქანს არ აძლევს. აქედან გამომდინარე, თქვენ შეიძლება წარმოიდგინო-

ნოთ, რა სახის ძაფები აკავშირებს ორ სქესს – კაცს, რომელიც აბსოლუტურ ძალაუფლებას ფლობს და ქალს, რომელიც ან სუფელია, ან ფარისეველი.

სერალები და ჰარამხანები შემოსაზღვრულია მაღალი კედლებით, მეტიც, კედლები ზოგან ორმაგია, ზოგან კი – სამმაგი, რაც კიდევ უფრო მეტად გაგონებს ციხეს. სპარსელის ეჭვიანობა ცოლის მიმართ ამ უკანასკნელის სიკვდილის შემდეგაც გრძელდება. ქალის საფლავს ირგვლივ ბაღდახინი აკრავს, რათა დაკრძალვაზე მისულმა ხალხმა ცხედარი არ დაინახოს.

არავინ იცის, რა ხდება ჰარამხანაში, განსაკუთრებით დიდგვაროვანთა, უმაღლესი იერარქიის ჰარამხანებში – დასავლეთისთვის ეს ადგილი დღემდე გასაიდუმლოებულია. ამბობენ, იქაურობა სავსეა სახელოსნოებით, სადაც ქალები ტანსაცმლისა და ფეხსაცმლის მკერავებად, მზარეულებად მუშაობენ; ამბობენ, მოხუცი აფთიაქარი ქალებიც არიანო. გაღავნის შიგნით არის მეჩეთები, სასაფლაოები, ერთი სიტყვით, ყველაფერი, რაც ქალაქს სჭირდება. გამოდის, ჰარამხანა ერთი დიდი ქალთა მონასტერია.

ჰარამხანა სპარსული სასახლის საუკეთესო ნაწილია. სწორედ აქ, თავისი ოჯახით გარემოცული, სიცოცხლის უდიდეს ნაწილს ატარებს მისი პატრონი და მბრძანებელი. შაჰის ჰარამხანა რამდენიმე ნაწილად იყოფა. ისინი ერთმანეთისგან დამოუკიდებლად არსებობენ. შაჰის სიკვდილის შემდეგ ქალები ოთხ ჯგუფად ნაწილდებიან და დარჩენილ ცხოვრებას ამგვარად ატარებენ. ადვილი წარმოსადგენია, როგორ აძრწუნებთ თავიანთი პატრონის სიკვდილის მოლოდინი და როცა ეს მოხდება, ცას სწვდება მათი ქვითინი და მოთქმა-გოდება. თითოეული ოთახის კარს თითო სატურისი იცავს და მსახურების გარდა არავის უშვებს. თუ შაჰს ვაჟი დარჩა, მას ასევე ცალკე ათავსებენ, წესისამებრ, დედაც მასთან ერთად რჩება. შაჰის ჰარამხანას ბადალი არ ჰყავს მისი ბინადარი ქალების სილამაზის გამო. ისინი არასოდეს გამოდიან საზოგადოებაში, სპარსეთის ყველაზე დიდებული ბანოვანები არასოდეს ენახვებიან უცხო თვალს და თითქმის არასოდეს ტოვებენ სასახლეს. როდესაც ასეთი დიდებული ქალი სასახლიდან გადის, მას თან ახლავს მოახლეებისა და სატურისების მთელი ამალა, რომ არაფერი ვთქვათ მისი მბრძანებლის მიერ მიჩენილ მსტოვრებსა და მოხუც ქალებზე, რომლებიც მას შორიდან უთვალთვალებენ.

როდესაც ასეთი აღმატებული წოდების ქალი ქუჩაში გადის, რაც მხოლოდ ღამით არის შესაძლებელი, მას ასი ნაბიჯის დაშორებით უკან მიჰყვებიან ცხენოსნები, რომლებიც ხმამაღლა მოუწოდებენ გამვლელებს, გზა დაუთმონ დიდებული ქალის მხლებლებს. სპარსეთში ეს მოწოდება უფრო შემზარავია, ვიდრე სხვა მუსლიმანურ ქვეყნებში. ამ შეძახილის გაგონებისთანავე ხალხი ისე იმალება, თითქოს შავ ჭირს გაუბრძანო. ცხენზე ამხედრებული, გრძელი სახრეებით შეიარაღებული სატურისები დიდის ამბით დარბიან მცველთა რაზმსა და ბანოვანს შორის და სცემენ ყველას,

ვინც გზიდან გადასვლას დროულად ვერ მოახერხებს. სასჯელის ამ ზომის სიმძიმე დამოკიდებულია იმ ბანოვანის რანგზე, რომელსაც ისინი იცავენ. ვინც სერალში ან ჰარამხანაში მცხოვრები ქალბატონის თვალსაწიერში მოხვდება, შესაძლოა, ეს სიცოცხლის ფასადაც კი დაუჯდეს.

ძველი დროიდან მოყოლებული, ყველა, ვისაც საქართველოში უმოგზაურია, აღნიშნავს, რომ არასოდეს უნახავს ქართველი ქალი ნაყვავილარი სახით. შაჰის ჰარამხანები და სულთნის სერალები ძირითადად სილამაზით განთქმული ქართველი და ჩერქეზი ქალებით მარაგდებოდა. მათი მშობლები თვითონ სთავაზობდნენ თავიანთ საცოდავ ქალიშვილებს და, რადგან ფასი მათ სილამაზეზე იყო დამოკიდებული, ყოველ ღონეს ხმარობდნენ, რომ გოგონებს სახეზე ნაყვავილარი არ დარჩენოდათ. გამოდის, სიხარბე და სარგებლის სიყვარული ყოფილა საუკეთესო აცრა, რომელიც იმ საწყლებს ყვავილის გამანადგურებელი შედეგებისგან იცავდა. დელა მორტრეიე თავის ჩანაწერებში მოიხსენიებს მარტივ ხერხს, რომელსაც მოხუცი ქალები მიმართავდნენ.¹

წერილი XXXII

გრაფი მუსინ-პუშკინი

ტფილისი, 10 თებერვალი, 1812 წელი

დღეს გარდაცვლილი გრაფის, მუსინ-პუშკინის კაბინეტი და ბიბლიოთეკა დათვალიერე. გრაფი ნატურალისტი გახლდათ. ყველაზე მეტად მისი კოლექციით მოვიხიბლე. ვნახე საქართველოს ფაუნის უამრავი სახეობა: ცხოველები, ფრინველები და სხვა. სამწუხაროდ, ყველაფერი იმდენად გავერანებულია, მალე გრაფის აგრერიგად ნალოლიავეები კოლექციიდან აღარაფერი დარჩება. თვალი მოვკარი მინერალებს, ბევრი საკმაოდ ღირებული უნდა იყოს; რა გასაკვირია, გრაფი სპეციალობით მინერალოგი იყო და საქართველოს მალაროების მმართველობა ებარა. რამდენიმე მალარო განსაკუთრებულია, თუმცა მათ შორისაც გამორჩეულია ერთი,

1. მთარგმნელისგან: ძნელია დადასტურებით იმის თქმა, რამდენად სარწმუნოა ავტორის განცხადებები აცრებთან დაკავშირებით. ენციკლოპედია ბრიტანიკაში შეტანილია ძალიან საინტერესო სტატია ამ საკითხის შესახებ, საიდანაც ცხადი ხდება, რომ ჯეროვნად გამოკვლეული არ არის, ვინ გამოიგონა ან საიდან გავრცელდა აცრების პრაქტიკა ამ კუნძულზე; თუმცა არსებობს აზრი, რომ ლედი მერი უორტლი მონტაგუმ თურქეთიდან შემოიტანა გასული საუკუნის დასაწყისში; თუმცა დოქტორ უილიამ ჰავერფორუსტის 1725 წლისა და დოქტორ ელვე ზანდერ მანროს მოხსენებებიდან ჩანს, რომ შოტლანდიასა და უელსში აცრებს გაცილებით უფრო ადრე აკეთებდნენ. არსებობს ვარაუდი, რომ ეს ხერხი ერთი წყაროდან გავრცელდა არაბეთში, ბენგალიასა და არაერთ სხვა ქვეყანაში. ქართველები, მაგალითად, ასეთ აცრებს მხარზე იკეთებდნენ.

რომელიც ბამბეკის მხარეს, ერევანთან ახლოს მდებარეობს და ცნობილია სპილენძისა თუ ვერცხლის მდიდარი საბადოებით.

ახლახან გავიგეთ, რომ გენერალ-გუბერნატორი ბაქოში ჩავიდა. კიდევ ერთი სიახლე უნდა გაგანდოთ, რომელიც ამ ამბავს უკავშირდება. გებერები, ძველ სპარსელთა შთამომავლები, ქვეყნის სხვადასხვა რეგიონში ცხოვრობენ, მაგრამ მათი ნაწილი ბაქოს შემოგარენში სახლობს. მათ სწამთ უზენაესი არსების, რომელიც წმინდა ცეცხლისგან წარმოიშვა და რომელსაც ისინი ეთაყვანებიან და ესავენ. მათი რწმენით, მზე არის დიადი სული, მშობელი ყოვლისა, რასაც კი ადამიანის თვალი სწვდება. მთვარე მნიშვნელობით მეორე დიადი სულია, დანარჩენი პლანეტები კი თავ-თავისი რანგის მიხედვით ფასდება. მათი აზრით, მთვარის დაბნელება არის მთვარის მიტაცება ბნელი ძალების მიერ; სწამთ, რომ არსებობენ ანგელოზები, რომლებსაც მცირე ღმერთებად მიიჩნევენ; აღიარებენ ორი მტრული საწყისის – ნათელისა და ბნელის არსებობას, პირველი ღმერთს მსახურებს, მეორე კი – ბოროტ ძალას.

მათი ქურუმები არიან მოგვები, რომელთა უპირველეს საზრუნავს წარმოადგენს მარადიული ცეცხლის მოვლა-შენარჩუნება. ეს ქურუმები რაღაცით რომის ვესტალებს მოგვაგონებენ. მათი მთავარი ტაძარი დგას მთაზე, იეზიდის მახლობლად, სადაც მათი Pyreum, ანუ ცეცხლის მთავარი კერა მდებარეობს.

მათი მოციქული არის ზოროასტრი, რომელსაც ისინი ზერდუშს ეძახიან. იგი იყო ზოროასტრების უზენაესი ქურუმი, რომელიც, სპარსული მატთანის მიხედვით, წარღვნიდან დაახლოებით 1 300 წლის შემდეგ ცხოვრობდა. მუსლიმანი მწერლები მის აზერბაიჯანულ წარმოშობაზე მიუთითებენ; მართლაც, ცნობილია, რომ ცეცხლთაყვანისმცემელთა ყველაზე ცნობილი ტაძრები სწორედ ამ რეგიონშია, გარდა ამისა, თავად ქვეყნის სახელწოდება – აზერბაიჯანი – ცეცხლოვან მიწას ნიშნავს. ადგილი, სადაც დღემდე ანთია მარადიული ცეცხლი, ბაქოდან თხუთმეტი ვერსის დაშორებით მდებარეობს. სადღაც შორიახლოს არის უზარმაზარი გამოქვაბული, სადაც ძლიერი სიცხის დროს საქონელს აფარებდნენ ხოლმე; სწორედ აქ ჰქონდა საიდუმლო თავშესაფარი მოწყობილი იმ დროისთვის სახელგანთქმულ ყაჩაღს – სტენკა რაზინს. ადრე წმინდა ცეცხლის ახლოს იდგა ქვის შენობა, რომლის ექვსივე ოთახში გებერები ცხოვრობდნენ, თავიანთ წმინდა წიგნს კითხულობდნენ და მორიგეობით მზისადმი საგალობლებს აღავლენდნენ. წმინდა წიგნი იუწყებოდა, რომ მილიონობით წლის განმავლობაში ამ ადგილას წმინდა ცეცხლი ენთო. მათ სწამდათ, რომ ღმერთმა, რომელსაც სურდა კაცობრიობა ტანჯვისგან გამოეხსნა, აქ, ამ უძირო უფსკრულში ჩააგდო სატანა და სასჯელად მოუვლინა მარადიული ცეცხლი, რომელშიც იგი მილიონი წელია იწვის. გებერები ამ ადგილს იცავენ, რათა დღედაღამ ენთოს და არასოდეს მინავლდეს ცეცხლი, რათა აღსრულდეს ღვთის ნება. ადრე მარადიული ცეცხლი ენთო ორმოში, რომლის სიგრძე – ას ოცი, სიღრმე კი თორმეტი ფუტია.

ცეცხლის ენები დაახლოებით თვრამეტი ფუტის სიმაღლეს სწვდება. გამოქვაბული კლდეშია. საოცარია, მაგრამ იმ დროიდან მოყოლებული, რაც ეს ცეცხლი არსებობს, ორმო არ ღრმავდება, მიუხედავად იმისა, რომ იწვის კირქვა, რომელიც ამ მხარეში მრავლად მოიპოვება. ერთ ადგილას აგროვებენ კირქვის უზარმაზარ ლოდებს და ირგვლივ აალებულ ჩალას შემოუწყობენ. ცეცხლი ხმაურით ამოდის მიწიდან, ლოდები კი სამდღიანი წვის შემდეგ იქცევა კირად, რომელიც ბაქოში გადააქვთ. საწვავად იყენებენ ნაფტალინსაც, რომელიც უხვად მოიპოვება ამ რეგიონში, იგი პირდაპირ ნიადაგიდან იფრქვევა და გარკვეული დროის შემდეგ საკმაოდ დიდ მარაგს ქმნის. წვის დროს სქელი, შავი კვამლი და საშინელი სუნი ამოდის. მარადიულ ცეცხლს ასეთი რამ არ ახასიათებს. გებერები ამ ცეცხლს თავიანთ საცხოვრისებში იყენებენ: მცირე ორმოებს თხრიან, შიგ ქვაბს ჩაკიდებენ და საჭმელს ამზადებენ. ორმოში ანთებულ ჩალის ღერს ჩააგდებენ თუ არა, ცეცხლი მაშინვე აგიზგიზდება. ასე საჭმლის მომზადება შეშით დანთებულ კოცონზე გაცილებით ადვილია. როგორც კი ამ საქმეს მორჩებიან, ცეცხლს სველი თექის ნაჭრით აქრობენ. ამგვარი მეთოდით ჩაქრობის შემდეგ ცეცხლი თავისით არავითარ შემთხვევაში აღარ გაღვივდება. ასეთი ორმოები გებერების საცხოვრისებს განათებით, ზამთარში კი გათბობით უზრუნველყოფს. სანათის როლს ასრულებს ღერწმის ჯოხი, რომელსაც საწოლის თავთან იატაკში ჩაარჭობენ და ირგვლივ თიხით გაამაგრებენ, წვერსაც თიხას წაუსვამენ. როდესაც ჯოხს ამოიღებენ და აანთებენ, იგი სანთელივით იწვის და არ ქრება, სანამ თიხის ფენას არ მოხსნიან. ღერწმის ღერებით განათებული საცხოვრისი ძალიან ლამაზია. ჩვეულებრივ, სანათები პირამიდის ფორმისაა, რომელსაც ბოლოებში ცეცხლი უკიდია. გასანათებლად, გასათბობად და საჭმლის მოსამზადებლად ცეცხლის გამოყენება დიდი შვებაა ღარიბებისთვის, რადგან მათ საწვავზე ზრუნვა არ უწევთ, განსაკუთრებით ისეთ რეგიონებში, სადაც შეშა ძნელად იშოვება. ინგლისელები საწვავად გაზს იყენებენ, რაც ზემოთ აღწერილ ბუნებრივ ფენომენს მოგვაგონებს. ეს მიგნება კარგად გამოიყენა კანცლერმა სობოლევსკიმ, რომელმაც პეტერბურგის გასანათებლად ევრეთ წოდებული თერმოლაბები დანერგა. მარადიული ცეცხლის სიახლოვეს ხარობს მცენარეები. მისგან დაახლოებით 160 იარდის მოშორებით მშვენიერი ბაღნარია, ორი ტყე არის, რომლებშიც წმინდა წყალი დგას. ჩაუქრობელი ცეცხლის გარშემო, რამდენიმე ვერსის მანძილზე, ნებისმიერ ადგილზე, სადაც უნდა გათხარო მიწა და ცეცხლი წაუკიდო, უხვად ამოდის ნავთობი, რომელიც თავისით არ ქრება. ცეცხლთაყვანისმცემლები ხატებს არ აღიარებენ. ცხოველებიდან ეთაყვანებიან ძროხას. საქონელს რუდუნებით უვლიან და არასოდეს კლავენ, ხბოსაც კი. ძროხის რძე მათი ძირითადი საკვებია. ცეცხლის მომვლელები – ქურუმები თითქმის შიშვლები დადიან, წითელი ხის მძივების ყელსაბამს ატარებენ, შუბლზე კი ძროხის ფუნისა და ზაფრანის ნარევს იცხებენ, რაც საკმაოდ გავრცელებულია ინდოეთში. ისინი ლოცულობენ მზის ამოსვლამდე და მზის ჩასვლის შემდეგ.

განიბანებიან და მადლიერების ნიშნად ნაბან წყალში აგდებენ ფულს, რომელსაც ღარიბებს აძლევენ. წმინდა ცეცხლისგან დაახლოებით ხუთი ვერსის რადიუსით შავი ნავთობის დაახლოებით 52 წყარო იყო, რომლებსაც სპარსელები ფლობდნენ. დღეისთვის მათი რიცხვი მნიშვნელოვნად შემცირებულია. წყაროები ოცი ტუაზის სიღრმისაა (*სიგრძის ფრანგული სამომი, უდრის დაახლოებით ორ მეტრს. მთ. შენიშვნა*). თითოეული მათგანი დღეში სამას ბათმან (ბათმანი დაახლოებით 15 რუსული გირვანქა) ნავთობს იძლევა.

საბადოს ასეთი ახლო მდებარეობა ბაქოსთან ქვეყნისთვის შემოსავლის დიდი წყაროა, რადგან მისი ზღვით გადატანა საკმაოდ ადვილია. ქვეყნის მცხოვრებლები ამ ნივთიერებას სახურავების გასაპოხად იყენებენ – მშვენივრად იჭერს წვიმას; გარდა ამისა, საქონელს უსვამენ მავნე მწერებისგან დასაცავად. სპარსელები ზედაპირების გასაპოხლებლადც ხმარობენ.

ნავთობი წვის დროს შავ კვამლს გამოყოფს. ღარიბები მას გასანათებლად და ცეცხლის დასანთებად იყენებენ. ღია ფერისა უფრო ადვილად აალებადია და წყალზეც კი იწვის. ზოგისთვის გასართობიც კია: საღამოობით ზღვაში აქცევენ და ცეცხლს უკიდებენ. საოცარი სანახაობაა – ისეთი შთაბეჭდილება იქმნება, რომ სანაპირო და ზღვაში მდებარე პატარა კუნძულები ცეცხლის ალშია გახვეული. თეთრი ნავთობის წყაროსგან ოთხი ვერსის მოშორებით მდებარეობს ეგრეთ წოდებული ცეცხლის ადგილი. მასთან მიახლოებისას გოგორდის სუნი იგრძნობა და ერთი ვერსის მანძილზე ცისფერი ალი მოჩანს, განსაკუთრებით ღამით, მშრალ ამინდში. იქვე ახლოს ცხოვრობენ მუშები, რომლებიც ღერწმინაში ღამღამობითაც კი მუშაობენ. ბაქოს შემოგარენში არის კიდევ ერთი სახეობის ცეცხლი, რომელიც შემოდგომაზე, გვალვიან ამინდში ან ნაწვიმარზე გორაკების მწვერვალებიდან მასიურად იფრქვევა და დაბლობებზე ვრცელდება. ასეთი ცეცხლი არც ანათებს და არც ათბობს.

იშვიათად მოიძებნება ადგილი, სადაც ისეთივე ძლიერი ქარი იცის, როგორიც ბაქოში. თავად სიტყვა „ბაქო“ ქარიშხლიან გორას ნიშნავს. ქარიშხალი ზღვისკენ მიაქანებს ყველაფერს, რაც გზაზე ხვდება – ხალხს, საქონელს თუ კლდის ნამტვრევებს. ამ უძლიერეს ქარიშხალს უზარმაზარი ლოდების დაძვრაც შეუძლია. დაბლობ ადგილებში, ბაქოს მახლობლად, ზამთრის თვეებში გროვდება წყალი, რომელიც აორთქლების შემდეგ ტოვებს მარილს. მისი გაყიდვით ქალაქი მნიშვნელოვან სარგებელს ნახულობს.

აი, ეს არის ბაქოს და მისი შემოგარენის ღირსშესანიშნაობები, რომელთა შესახებ მინდოდა თქვენთვის მომეთხრო.

წერილი XXXIII

ქართული ქორწილი

ტფილისი, თებერვალი, 1812 წელი

ამ ცოტა ხნის წინ ქორწილში ვიყავი, დღეს კი დაკრძალვას დავესწარი. მსურს ცოტა რამ გიამბოთ ქართული ადათ-წესების შესახებ.

ისინი ძალიან ადრე ქორწინდებიან. პატარძალი 12 წლისაა, ნეფე კი – ალბათ თხუთმეტის. ხშირად აკვნიდანვე ინიშნებიან, მაგრამ გარკვეულ დრომდე ერთმანეთს არ იცნობენ. ესეც მათი ადათია. საქორწინო რიტუალი ბერძნული წესის მიხედვით სრულდება, ერთადერთი განსხვავება ის არის, რომ პატარძლის სახე მანდილით არის დაფარული. ნეფესაც კი არ შეუძლია მისი დანახვა. ქორწინება აქ გარიგების საქმეა და არა გულის წადილისა. ეკლესიიდან გამოსვლისას ნეფე-პატარძალს თოფების სროლით ეგებებიან. ქორწილზე სამკაულებით შემკული, მორთულ-მოკაზმული და თავით ფეხამდე მანდილით შებურვილი პატარძალი ქართველების ჩვეულებისამებრ ფეხმორთხმით ჯდება ხალიჩაზე და ინდური პაგოდის მსგავსად მთელი ქორწილის განმავლობაში ერთ პოზაში, გაუნძრევლად ზის, მდუმარე და უჭმელ-უსმელი. ისეთი შთაბეჭდილება მრჩება, იმისთვის, რომ გათხოვდე, გარკვეულ პირობებს უნდა აკმაყოფილებდე, მაგრამ იგივე მოეთხოვება საქმროსაც – ისიც ასევე გაუნძრევლად უნდა იჯდეს. ერთმანეთს ზურგი რომ შეაქციონ, ირგვლივ მყოფები იფიქრებენ, ჩხუბს ხომ არ აპირებენო. სხედან მორჩილად, თითქოს ერთმანეთს ეუბნებიან: „ნუ გამიბრაზდები, მე ამ საქმეში ბრალი არ მიდევს, მათ დაგვაქორწინეს...“ ცერემონიის შემდეგ პატარძალს მანდილს გადახდიან და სახეს გამოუჩენენ. ამის შემდეგ იწყება პურისჭამა, რომლის სიუხვე დამოკიდებულია ორივე მხარის შეთანხმებაზე.

ძალიან მინდოდა მენახა ნეფე-პატარძლის სახეებზე აღბეჭდილი გრძნობები, რომლებსაც მანდილის ახდის შემდეგ ერთმანეთის მიმართ გამოამჟღავნებდნენ, მაგრამ სულ ტყუილად. პატარძალი ქანდაკივით უძრავად იდგა. რაც შეეხება ნეფეს, მხოლოდ ოდნავ შეეტყო კმაყოფილება ნორჩი პატარძლის საკმაოდ ლამაზი სახის დანახვისას. მე თუ მკითხავთ, გოგონა გაცილებით ლამაზი იქნებოდა, რომ არა ფერ-უმარილი, უგემოვნოდ შეწითლებული ლოყები, ფანქრით უსწორმასწოროდ შეერთებული წარბები და უშნოდ აჩონჩხილი თვალ-მარგალიტი. ალბათ ვერასოდეს მიგხვდები, როგორ შეიძლება მსგავსი მატრიმონიალური ცერემონია ბედნიერი ოჯახური ცხოვრების დასაწყისი იყოს; თუმცა დიდი ხანია არსებობს მოარული აზრი, რომ ქორწინება ლატარეას ჰგავს – ამ მოსაზრებით თავს ის წყვილები იმშვიდებენ, რომლებსაც ქორწინებამ ბედნიერება ვერ მოუტანა. უიღბლო ურთიერთობების ნამდვილი მიზეზი კი ის არის, რომ ცოლ-ქმარს ერთი პირი არა

აქვთ, მათი გემოვნება და პრინციპები ერთმანეთს არ ემთხვევა, რაც წესით, რა თქმა უნდა, ქორწინებამდე უნდა გაირკვეს. ასეთი გარიგებები მხოლოდ ისეთ საზოგადოებაში იდება, რომელშიც ქორწინებას ფინანსები ან რამე სხვა მიზნები უდევს საფუძვლად, სადაც ცოლი მისდამი გულგრილი ქმრის მონურად მორჩილი მსხვერპლია.

მიუხედავად იმისა, რომ დაქვრივებული ქალის გლოვა ქმრის სიყვარულის გამოხატულებაა, ქართველებში ამ მხრივაც რთულადაა საქმე. ამ დილით დაკრძალვას დავესწარი. ღრმად დამწუხრებული ქალი რამდენიმე საათის მანძილზე გაშტერებული იჯდა ქმრის კუბოსთან, ლოყებზე ცრემლები ჩამოსდიოდა, ქვითინებდა და მოთქვამდა, თმას იგლეჯდა, მკერდში მჯილს იცემდა, ყოველი მისი ქმედება მწუხარებასა და სასოწარკვეთილებას გამოხატავდა, მაგრამ აღმოჩნდა, რომ მათთან ასეთი საქციელი ჩვეულებრივი, დამკვიდრებული წესი ყოფილა.

ვინმე კაცს მოჰყავს შეკაზმული ცხენი, რომელიც სიცოცხლეში მიცვალებულს ეკუთვნოდა, ახლა კი წინ მიუძღვის ცხედარს. უკან მიჰყვებიან ნათესავები, რომლებიც გაუჩერებლად მოთქვამენ. ესეც ჩვეულება ყოფილა. მიცვალებულის დამარხვის შემდეგ ჭირისუფლები შინ ბრუნდებიან. ახლობელი ქალებით გარშემორტყმული ქვრივი დაჯდება იმ ადგილას, სადაც ცხედარი ესვენა. ხმას არავინ იღებს. ასე გრძელდება ექვსი კვირის მანძილზე. ეს არის მძიმე გლოვის პერიოდი. გულახდილად ვიტყვი, არა მგონია, ასეთი გადამეტებული მწუხარება გულწრფელი იყოს.

წერილი XXXIV

საქართველოს კლიმატი

ტფილისი, 14 თებერვალი, 1812 წელი

საქართველოში წელიწადის ისეთ დროს ჩამოვედი, მის ჰავაზე სრული წარმოდგენა ვერ შევიქმენი, ასე რომ, სხვების მონაყოლს გაგიზიარებთ და ჩემს დაკვირვებებსაც ზედ მოვაყოლებ.

აქაური ჰავა ნეაპოლისას ჰგავს, იმდენად თბილა, იანვარში კოლხიკუმი ამოდის, თებერვალში კი ნუში და სხვა ხეხილი ყვავილობს. აქაურობა იმდენად მდიდარია მცენარეებით, ჩვენს ჩრდილოეთ რეგიონებს ვერც კი შევადარებ. საქართველოში უხვად მოდის ხილი, მრავლად იზრდება ჩვეულებრივი და ჯუჯა თელა. სწორედ ამ ხის ფოთლებისგან ამზადებენ ციმბირში ჩაის; თერგის ნაპირზე სულ მუხებია, დიდი რაოდენობით იზრდება ჭადარი, რომელსაც თითქმის ყველა რეგიონში შეხვდებით, წიფელი ხომ არსად ისე არ ხარობს, როგორც კავკასიაში,

მთელი კასპიისპირეთი და თერგის მიდამოები სავსეა ზეთისხილით. ამ ნაყოფს ძირითადად თათრები და სომხები ეტანებიან. გარდა ამისა, მისგან ხდიან წვენს, რომელსაც Tolkan-ს ეძახიან. დონის სტეპებში ხარობს უამრავი ჯუჯა ნუშის ხე, ასევე ცირცელი, რომელიც კავკასიაში კიდევ უფრო მეტადაა გავრცელებული. ადგილობრივი მცხოვრებლები მისგან საუკეთესო არაყს ხდიან. კავკასიაში ასევე ხარობს კოპიტი, თერგის ნაპირებზე იზრდება თუთა, ძირითადად – ბუჩქის სახით. ადგილობრივი მოსახლეობა თუთის ფოთოლს აბრეშუმის ჭიის საკვებად იყენებს. ამ დარგის შემდგომი განვითარება აქაურობას დიდ სარგებელს მოუტანდა. მთელ კავკასიაში და განსაკუთრებით თერგის ნაპირებზე ხარობს კოწახური, რომლის წვენს ტყავისა და აბრეშუმის შესაღებად იყენებენ, განსაკუთრებით – ასტრახანში. მისი წყალობით იქაურობა ყვითლად ღალანებს. თერგის ნაპირებზე ასევე იზრდება კაპარი. ამ მცენარის ბუჩქი ერთსა და იმავე დროს ისხამს კვირტებს, ყვავილებსა და ნაყოფს. ძმრითა და მარილით შეზავებული კაპარის ნაყოფი ძალიან გემრიელია. გავრცელებული მცენარეა ასევე ძირტკბილა. თერგის მიდამოებში მშვენიერი ვაზი ხარობს. აქაური ჰავა – მზე, ნიადაგი იმის საშუალებას იძლევა, რომ ამ კულტურას უკეთესად მოუარონ. საერთოდ, ვაზი საქართველოში ყველგან ხარობს და მისგან მშვენიერ ღვინოსაც აყენებენ, მაგრამ კახეთზე უკეთეს ვენახებს ვერსად შეხვდებით. მაზანდარანში, ძველ ჰირკანიაში, ვაზი ხეებზე ეხვევა, ადამიანის ტანის სიმაღლე იზრდება და ისეთ სიმაღლეს აღწევს, ყურძნის მოკრეფა საკმაოდ დიდი თავსატეხია. ამ ლამაზ ქვეყანაში ყველაფერი მოდის: ფორთოხალი, ნუში, ლიმონი, ბროწეული, კასპიის ზღვასთან ახლომხლო მთელი ტყეები იზრდება. ეს მხარე ერთი უკიდევანო ბაღნარია, სადაც ბუნება ყვავის, მსხმოიარობს და უხვ ნაყოფს იძლევა; თუმცა დედამიწაზე არაფერია სრულყოფილი – ჰაერი ჯანსაღი არ არის, შესაძლოა, ზღვისა და ჭაობების სიახლოვის გამო. მოკლედ, აქ ყველაფერი ხარობს, ადამიანის გარდა. დიდმა აბასმა, რომელსაც მაზანდარანი ძალიან უყვარდა დედამისის აქაური წარმოშობის გამო, რამდენჯერმე სცადა ეს მიწა ხალხით დაესახლებინა, მაგრამ ამაოდ – აქაურ ჰავას ვერავინ გაუძლო. მნახველის თვალს დღემდე აღაფრთოვანებს მისი ბრძანებით გაშენებული დიდებული ბაღები, მაგრამ იმ ადგილებს, სადაც ადამიანი ფეხს ვერ იკიდებს, გარეული ცხოველები ეპატრონებიან.

„შენი აკვანი კავკასიის მყინვარი იყო,
ძუძუ გაწოვა ჰირკანიის მრისხანე ვეფხვმა“.

ათქმევინებს ტორკვატო ტასო განრისხებულ და მიტოვებულ არმიდას რინალდოსთვის, რითაც ხაზს უსვამს კაცის ველურ და დაუნდობელ ბუნებას.

თერგის ხეობაში ასევე იზრდება შესანიშნავი ბამბა, მაგრამ მორწყვა აკლია,

სათანადოდ რომ უვლიდნენ, მთელი რუსეთის მანუფაქტურებს მოამარაგებდა. თამბაქოს კულტურაც ასეთსავე გასაჭირშია. თერგის ნაპირებზე იზრდება ველური კანაფი, რომელსაც თათრები და კაზაკები იყენებენ. როგორც ჩანს, აქ ენდროც ენდემური ჯიშია. დიდი რაოდენობით იზრდება სეზამი, რომელსაც აქაურები ქუჩ-ჯუტს უწოდებენ. მისგან გამოხდილი ზეთი პროვანსულზე არანაკლებია, მისგან საუკეთესო მდგოვნი გამოდის.

საქართველო და მთლიანად კავკასია მდიდარია გემრიელი ხილით. თერგის ხეობასა და ყიზლარში ნუშის ხეები ხარობს, მაგრამ ბევრგან, მაგალითად, ტფილისის მახლობლად, ველურად იზრდება, ისევე როგორც მსხალი, ატამი და გარგარი. იგივე შეიძლება ითქვას ვაშლზე, ქლიავსა და ალუბალზე. აქაურები ხეხილის კულტივირებას მაინცდამაინც არად დაგიდევენ. საზამთრო და ნაირნაირი სახეობის ნესვი საოცრად გემრიელი იცის. დიდი რაოდენობით ხარობს სატაცური. აქ ბუნება იმდენად მრავალფეროვანი და გულუხვია, რომ ადამიანები მიწის დამუშავებაზე ნაკლებად ზრუნავენ, ხელის განძრევა ეზარებათ. სიმინდი არა მარტო თერგის ხეობაში, მთელ საქართველოში მოჰყავთ, მაგრამ მცირე რაოდენობით. ფეტვი უფრო კასპიის ნაპირებზეა გავრცელებული, თუმცა თერგის ხეობაშიც თესავენ. ფეტვი განსაკუთრებით უყვართ სომხეთში, სადაც საკმაოდ გავრცელებულია მისგან მომზადებული კერძები. ბრინჯი კასპიის სანაპიროზეც ხარობს და თერგის ხეობაშიც. ამ კულტურას ბევრი წყალი სჭირდება, შესაბამისად, ბრინჯის ყანები უნდა დაიტბოროს, რაც მის ირგვლივ არაჯანსაღ გარემოს ქმნის. ერთ დროს ბრინჯს ყიზლარის ახლოს თესავდნენ, მაგრამ მას შემდეგ, რაც შეამჩნიეს, რომ მაღალი ტენიანობა მოსახლეობის ჯანმრთელობას საფრთხეს უქმნიდა, ბრინჯის მოყვანა დაბიდან ორმოცდაათი ვერსის მანძილზე აიკრძალა.

კასპიის ნაპირებზე უამრავი მცენარე ხარობს, მაგრამ ოც-ოცდაათ წელიწადში ერთხელ კალიები იქაურობას გამანადგურებელ ზიანს აყენებენ.

საქართველოში ჭვავი, ხორბალი, ქერი, შვრია და წიწიბურა უხვი მოსავლით არ გამოირჩევა. თერგის ხეობაში გავრცელებულია ფუტკარი, განსაკუთრებით – კავკასიის მთიან ტერიტორიაზე. ეს მთიანი მხარე ვარდის სამშობლოდ არის მიჩნეული და საერთოდ, აქ ისეთი არაჩვეულებრივი ჭვავა, დარწმუნებული ვარ, სხვა ბევრი ისეთი მცენარე ხარობს, რომლებიც ბოტანისტებს ჯერ კიდევ არ აღმოუჩენიათ.

წერილი XXXV

ხალხის აჯანყება

18 თებერვალი, 1812 წელი

კახეთიდან ცუდი ამბები მოდის. თუ ამბობება დასაწყისშივე არ ჩაახშეს, საყოველთაო არეულობა დაიწყება. უკმაყოფილო რეგიონებში შეიარაღებული ხალხი დადის. კახეთისთვის ამბოხი ჩვეულებრივი ამბავია, რადგან ამ მხარეში არეულობა ხელს აძლევს როგორც სპარსეთის მთავრობას, ისე ალექსანდრეს – საქართველოდან გადახვეწილ მეფეს (*იგულისხმება ალექსანდრე ბატონიშვილი, ერეკლე მეორის ვაჟი. მთ. შენიშვნა*).

არ ვიცი, თქვენამდე მოაღწევს თუ არა ეს წერილი, ამბოხების გამო კავშირი საკმაოდ გართულებულია და დღითი დღე უარესდება. აჯანყებულებს სხვა კავკასიელებიც შეუერთდნენ. ყოველგვარი გზა მოჭრილი გვაქვს და შეშფოთებულები ველოდებით გენერალ-გუბერნატორის ჩამოსვლას, რომელიც ამჟამად აქ არ იმყოფება. რა დასანანია, რომ ეს ყოველმხრივ შემკული ქვეყანა მუდმივად შიმშილის, შავი ჭირისა და აჯანყების მსხვერპლია. ყოველგვარმა ბოროტებამ და უბედურებამ აქ მოიყარა თავი. აქეთ თოვლიან-ყინულიანი მთები, იქით თვალშეუდგამი კლდეები და უფსკრულები, აქვე მახლობლად ჩასაფრებული თურქები და სპარსელები, ამბოხება და შავი ჭირი ქვეყნის გულში, საყოველთაო სიდუხჭირე და ხელმოკლეობა. ქვეყანა სულ მუდამ ზღვარზეა, ერთი მოუსავლიანი წელი, საზღვრის ჩაკეტვა კავკასიასთან ან ხაშურს ზემოთ და შიმშილობა ჩამოვარდება. ვფიქრობ, კარტოფილის შემოტანა მნიშვნელოვნად შეამსუბუქებდა ამ მდგომარეობას.

მას შემდეგ, რაც მხოლოდ აჯანყებასა და მის მოსალოდნელ შედეგებზე მესმის, ჩემთვის საქართველო ისეთი მიმზიდველი აღარ არის, თუმცა, რაც დრო გადის, მით უფრო მეტად ვამჩნევ, რა ღამაზია აქაურობა. ძალიან დავსევდიანდი და წერის გუნებაზე არა ვარ. იმაზე ფიქრმა, რომ აჯანყების შუაგულში, ასეთი ველური ადამიანების გარემოცვაში აღმოვჩნდით, ყველგან ხმაური და აურზაურია, მოსვენება დამიკარგა. ვეჭვობ, სიმშვიდე დავიბრუნო მანამ, სანამ ჩვენს პატარებთან ერთად კავკასიიდან არ გავაღწევთ და კვლავ არ დამიბრუნდება იმედი, რომ ოდესმე კიდევ შევხვდებით.

წერილი XXXVI

აჯანყების ჩახშობა**ტფილისი, 28 თებერვალი, 1812 წელი**

რამდენიმე დღის ფორიაქის შემდეგ, როგორც იქნა, გენერალ-გუბერნატორი დაბრუნდა და ჩვენს შიშსაც ბოლო მოეღო. იგი თავად გაემგზავრა კახეთში, აჯანყების ჩახშობის მიზნით. როგორც ჩანს, მიღებულმა ზომებმა ნაყოფი გამოიღო – მეამბოხეები დამორჩილდნენ, არეულობა მიწყნარდა. სულ მალე ეს აურზაური შეწყდება და ქვეყანაში კვლავ სიმშვიდე დაისადგურებს. ვლადიკავკაზის მმართველმა, მამაცმა გენერალმა, პოლკოვნიკ კასიბეკის დახმარებით, კავკასიის გზა სრულიად გაათავისუფლა.

ამასობაში სანკტ-პეტერბურგიდან ჩამოვიდა კურიერი, რომელმაც გვაცნობა, რომ მთავრობას სურს გენერალ-გუბერნატორი საქართველოდან გაიწვიოს. ეს ამბავი, ეჭვგარეშეა, ჩემი და ჩემი ქმრის მდგომარეობაზეც იმოქმედებს. ცოტა ხნის ფიქრის შემდეგ დავასკვენი, რომ ფუჭი თავის მტვრევა არაფერს გვარგებს და აჯობებს, თუ ჩვენს ბედს განგებას მივანდობთ. რაც იქნება, იქნება. გენერალ-გუბერნატორი რაც შეიძლება სწრაფად უნდა დაბრუნდეს, შემცვლელი დაინიშნოს და მერე ჩვენი ბედიც გადაწყდება.

გუშინ გავიგეთ, რომ მთიდან ზგავი ჩამოწვა და საქართველოსკენ მომავალი მთელი კოლონა დაიშმქრა. რამდენიმე ადამიანი დაიღუპა.

წერილი XXXVII

მომავლის გეგმები**ტფილისი, 20 მარტი, 1812 წელი**

გენერალ-გუბერნატორი ექსპედიციიდან დაბრუნდა. კახეთში სიმშვიდემ დაისადგურა.

ძალიან ცუდი დღე დამადგა. ამდენი შფოთვისა და ნერვიულობისგან ჯანმრთელობა შემერყა. ექიმები საქართველოდან წასვლას მირჩევენ – აქაური ჰავა არ გიხდებაო. გადაწყდა, მაისის დასაწყისში პეტერბურგში დავბრუნდე გენერალ-გუბერნატორის მეუღლესთან ერთად. რა შესანიშნავი იქნება, შენი ხილვის ბედნიერება თუ მეღირსა! იმდენად აღფრთოვანებული ვარ, ჩემ წინაშე აღმართულ ყველა დაბრკოლებას იოლად ვუყურებ – იქნება ეს კობი, ხაშური თუ სამი ათასი ვერსი, რაც ერთმანეთს გვაშორებს!

ჩემი ქმარი აქ დარჩება და შემდგომ განკარგულებებს დაელოდება. ერთად გამგზავრება ვერ ხერხდება, ამიტომ ის მოგვიანებით შემოგვიერთდება.

წერილი XXXVIII

ახალი გენერალ-გუბერნატორი

ტფილისი, 15 აპრილი, 1812 წელი

ყველაფერი მოგვარდა. ახალი გენერალ-გუბერნატორი ადგილზეა, მისი წინამორბედი მასზე დაკისრებული ახალი მოვალეობის შესრულებას შეუდგა. თავად ძალიან სწყდება გული საქართველოზე, ხოლო ვინც მისი ხელმძღვანელობით მუშაობდა, ყველა მას მისტირის. გენერალ-გუბერნატორის მეუღლე მომავალი თვის დადგომას ელოდება, რომ ერთად გავემგზავროთ პეტერბურგში. ხაშურის უღელტეხილზე გადასვლა ჯერ კიდევ საკმაოდ საშიშია. ახალი გენერალ-გუბერნატორის მეუღლემ დიდი გაჭირვებით ჩამოაღწია. ის და ახალი გენერალ-გუბერნატორი ძალიან კარგად გვეპყრობიან, თუმცა, ამ უკანასკნელმა, როგორც კი დაინიშნა, მაშინვე ბრძანება გასცა ჩემი ქმრის სპარსეთში გადაყვანის შესახებ. ამ ახალი დანიშნულების ძირითადი მიზანი საზავო მოლაპარაკებები უნდა იყოს. ერთი მხრივ, მიხარია, მეორე მხრივ კი, მწყინს ეს გაუთვალისწინებელი განკარგულებები, მაგრამ როდესაც ქმართან განშორებაზე ვფიქრობ, თავს იმით ვინუგეშებ, რომ საინტერესო და საპატიო მისია აკისრია; გარდა ამისა, მას კი ვშორდები, სამაგიეროდ, შენთან ახლოს ვიქნები. ამ ურთიერთსაწინააღმდეგო გრძნობებისა და შფოთვების წამალი არის იმედი იმისა, რომ ყველაფერი კარგად იქნება.

წერილი XXXIX

ავტორის დაბრუნება

ტფილისი, 3 მაისი, 1812 წელი

გამგზავრებისთვის ყველაფერი მზად არის. თანმხლებად მოგვყვება ვლადიკავკაზის კომენდანტი თავისი ფეხოსანი ამალით. ამბობენ, ხაშურის უღელტეხილზე ჯერ კიდევ თოვლი დევს და ამ თვის ბოლომდე არ დადნებაო. მიუხედავად ამისა, გენერლის მეუღლე, რომელსაც სურს, რაც შეიძლება მალე შეხვდეს თავის ქმარს, მგზავრობის გადადებას არ აპირებს. სხვა არაფერი დამრჩენია

გარდა იმისა, რომ მის სურვილს დავემორჩილო და უზენაეს ძალას ვთხოვო ამ ძნელ გზაზე დაგვიფაროს მე და ჩემი შვილები.

ჩემი ქმარი ამ ცოტა ხნის წინ სპარსეთში გაემგზავრა მემკვიდრე პრინცის, აბას-მირზას სამეფო კარზე, თავრიზში, რომელიც უძველესი მიდიის მიწაზე მდებარეობს. აქ უკვე საკმაოდ ჩამოცხა. ჩემმა ქმარმა ცხენით მგზავრობა ამჯობინა. გზა დამღლელია და არცთუ ისე უსაფრთხო. თან ახლავს ამაღლა – პირადი მსახური, რამდენიმე დრაგუნი და კაზაკები. მოსიყვარულე მეუღლის ლოცვამ დაიცვას ამ რთულ გზაზე!

გეორგიევსკამდე ვერაფერს მოგწერ. ამ ქალაქის მმართველი ჩემი ქმრის ბიძა გახლავთ, ამიტომ, ვფიქრობ, ერთი-ორი დღით დავყოვნდები.

მთარგმნელი ლელა ფიროსმანიშვილი,
რედაქტორი ელზა ნაბახტეველი.

სტატია ითარგმნა შემდეგი გამოცემის მიხედვით:
Frederica von Freygang, Letters from the Caucasus and Georgia; to which are added the Account of a journey into Persia in 1812, and an abridged history of Persia since the time of Nadir Shah, London, John Murray, 1823 (pp: 1-10, 137-206)



96 ლისტერი

უცნობი მხატვარი, 1817

ლუიზა ლაფერაძის რეპროდუქცია

ჯენტლმენი ჯეკი

ენ ლისტერის ბიოგრაფია: რეგენტობის ეპოქის მემამულე,
მაცდუნებელი და საიდუმლო დღიურების ავტორი

პროლოგი:

ენ ლისტერის დღიურების გაშიფვრა

ჯონ ლისტერი შვიდი წლის იყო, როდესაც მამამისმა მემკვიდრეობით მიიღო „შიბდენ ჰოლი“. ის და მისი ოჯახი ჰალიფაქსის მახლობლად მდებარე მანორში საცხოვრებლად 1854 წელს გადავიდნენ. ჯონი იზრდებოდა ვეშაპის ძვლების, ვეფხვის ტყავისა და სათამაშო ნიანგის გარემოცვაში. მას შემდეგ, რაც „შიბდენ ჰოლის“ ლორდი გახდა, ძველი ფურცლების, დოკუმენტებისა და წერილების არაერთი შეკვრა დაათვალიერა, რომლებიც წინა თაობებისგან იყო შემორჩენილი. მას განსაკუთრებით იტაცებდა „მის ლისტერის ოცდაოთხი დღიური და წიგნაკი“.¹ დღიურების მარმარილოსებრ მოხატული გარეკანი ხბოს რბილი ტყავის ყდაში იყო ჩასმული, სქელი ფურცლები კი შავი მეღვინით შესრულებული ფაქიზი ხელნაწერით იყო სავსე. მიუხედავად ამისა, წვრილი ნაწერი ძნელად იკითხებოდა; ენ ლისტერს მრავალი აბრევიატურა ჰქონდა გამოყენებული, ზოგიერთი ნაწილი კი საიდუმლო შიფრით იყო დაწერილი.

ტექსტის ნაწილებმა, რომელთა გარჩევაც ჯონმა შეძლო, იგი აღაფრთოვანა. ენ ლისტერი მონაწილეობდა პოლიტიკასა და საზოგადოებრივ საქმიანობაში და ჰალიფაქსის ლიტერატურული და ფილოსოფიური საზოგადოების ერთადერთი თანადამფუძნებელი ქალი იყო. მისი დღიური ადგილობრივი ისტორიის საგანძურს წარმოადგენდა. 1887-1892 წლებში ჯონ ლისტერმა 121 ნაწყვეტი გამოაქვეყნა გაზეთ „ჰალიფაქს გარდიან“-ში, სათაურით „სოციალური და პოლიტიკური ცხოვრება ჰალიფაქსში ორმოცდაათი წლის წინ“.

ფრაგმენტები, რომელთა გაშიფვრაც ჯონმა ვერ შეძლო, დაუოკებელ ინტერესს აღუძრავდა მას. რას მაღავდა ბერძნული ასოების, რიცხვებისა და გამოგონილი სიმბოლოებისგან შემდგარი საიდუმლო შიფრი? მან დახმარება სთხოვა მეგობარს, ანტიკვარული ნივთების მკვლევარს, არტურ ბარელს, რომელმაც ორი ასოს <h> და <e>-ს ეკვივალენტების პოვნა, მათი სიტყვებში გამოყენების სიხშირი-

სა და პოზიციის საფუძველზე შეძლო: შემდეგ, საბუთების კრებულის ნახევარი რომ დავათვალიერეთ, ქალაქის ნავლევზე აღმოვაჩინეთ ეს სიტყვები – «ღმერთის მატეს...». ჩვენ მაშინვე მივხვდით, რომ შემდეგი სიტყვა იქნებოდა «იმედი»;¹ ხოლო *h* და *e* შეესაბამებოდა ჩემს ვარაუდს. სიტყვა „იმედი“ დაშიფრული იყო. ამ ოთხი ასოს რაობაში თითქმის დარწმუნებულებმა, გვიან ღამით დავიწყეთ საიდუმლოს დანარჩენი გასაღებების ძიება. დღის 2 საათზე მოვრჩით[...]. გამოკვლევის შემდეგ აღმოჩნდა, რომ დაშიფრული ნაწილების გამოქვეყნება სრულიად შეუძლებელი იყო;² რადგან ეს გახლდათ ჰომოსექსუალური პრაქტიკის ინტიმური ისტორიები ენ ლისტერსა და მის უამრავ «მეგობარს» შორის; არც ერთი მათგანი არ გამოჩენია.³

ენ ლისტერის დღიურებში ყველა ჩანაწერი იწყება იმით, თუ ვისთან და რამდენჯერ ჰქონდა სექსი წინა საღამოს, და განმეორდა თუ არა ის ღამით ან დილით. ენი რეგულარულად ინიშნავდა საკუთარი და პარტიონერების ორგაზმების რაოდენობასა და ხარისხს. თუ მარტო გაიღვიძებდა, ინიშნავდა, მასტურბირებდა თუ არა. ბარელმა ეს ყველაფერი *მორალური თვალსაზრისით მეტად მიუღებლად*⁴ მიიჩნია და მეგობარს ურჩია, დაუყოვნებლივ დაეწვა დღიურები. ბარელი გააღიზიანა არა მხოლოდ ამ ფაქტმა და ენ ლისტერის ქალი საყვარლების სიმრავლემ, არამედ მისმა თვითშეფასებამ. იმან, რომ თავს ღმერთის ქმნილებად მიიჩნევდა და არ გააჩნდა არავითარი ლესბოსური სიძულვილი საკუთარი თავის მიმართ, სასოწარკვეთა, ცრემლები ან მარყუჟში თავის გაყოფის სურვილი. პირიქით, ლისტერს ჩამოყალიბებული ჰქონდა ადრეული ფორმის გეი სიამაყე. ენ ლისტერი არ ცდილობდა დაემაღლა საკუთარი განსხვავებულობა; და ამ იდეით თავს იქცევდა.

ჯონ ლისტერი ყოყმანობდა, შეესრულებინა თუ არა მეგობრის რჩევა. მიუხედავად იმისა, რომ გამოქვეყნებაზე ფიქრი აღარ შეიძლებოდა, უნიკალური დღიურების განადგურება არ სურდა. დღიურები ენ ლისტერის საძინებლიდან გამავალ ოთახში დამალა, რომელსაც, სავარაუდოდ, სამუშაო კაბინეტად იყენებდა. კედლის პანელები მოახსნევინა და თაროები გააკეთებინა, შემდეგ ფრთხილად მოათავსა დღიურები იქ და პანელები შეცვალა. დამატებითი ხის პანელების მეშვეობით ოთახის კარი აღარ იყო თვალში საცემი. თუმცა, ფანჯრის იმავე ადგილას დატოვებით, ჯონმა უზრუნველყო, რომ შემდგომ მფლობელებს ოთახი აუცილებლად შეემჩნიათ.

მისი გარდაცვალების შემდეგ „შიბდენ ჰოლი“ გადაეცა „ჰალიფაქს კოროპორეი-შენს“, რომელმაც სახლი მუზეუმად აქცია. როგორც ჯონ ლისტერს ჰქონდა განზრახული, ენ ლისტერის დღიურები ამ კარადაში იპოვეს და დაშიფრულმა პასაჟებმა კიდევ ერთხელ აღძრა ცნობისმოყვარეობა. მუნიციპალიტეტის ბიბლიოთეკარმა, ედუარდ გრინმა მიაკვლია მოხუც არტურ ბარელს, რომელმაც მას შიფრი გადას-

i. იმედი – (ინგლ.) Hope (მთარგმნ. შენ.).

ცა, მაგრამ გააფრთხილა იმის თაობაზე, რაც მის ლისტერის ძველი სკანდალური ამბების შესახებ იცოდა.⁵

შიფრი, რომელიც ჰალიფაქსის ბიბლიოთეკის სეიფში ინახებოდა, ედუარდის ქალიშვილს, მურიელ გრინს, გასული საუკუნის 30-იან წლებში გადაეცა. 1960-იან წლებში კი – ვივიენ ინგემსა და ფილის რამსდენს, მაგრამ მოითხოვეს გარანტია, რომ არასასურველი მასალა არ გამოქვეყნდებოდა.⁶

საუკუნის განმავლობაში მხოლოდ ჰალიფაქსის ბიბლიოთეკარებმა და არქივისტებმა იცოდნენ ის, თუ რას წერდა ენ ლისტერი თავის დაშიფრულ დღიურებში. მხოლოდ 70-იანი და 80-იანი წლების ქალთა განმათავისუფლებელმა მოძრაობამ შეამზადა იმის საფუძველი, რომ ჰელენა უაითბრედს (1988 და 1992) და ჯილ ლიდინგტონს (1994, 1998 და 2003) მისი დღიურები ცენზურის გარეშე გამოეცემებინათ. ჰალიფაქსისა და მიმდებარე ტერიტორიის თანამედროვე მკვლევრებისა და რედაქტორების ხუთმა თაობამ ენ ლისტერის ხელნაწერის გაშიფვრას წლები დაუთმო და ამოუწურავი სიმდიდრის მასალა აღმოაჩინა. ამ წიგნის წერისას ხშირად ვეყრდნობოდი ზემოთ ხსენებული მკვლევრების, განსაკუთრებით, ჰელენა უაითბრედისა და ჯილ ლიდინგტონის წერილობით ასლებსა და გამოცემებს. მათ დიდ პატივს ვცემ და მათი შრომის გარეშე ამ წიგნის გამოცემა შეუძლებელი იქნებოდა. მიუხედავად იმისა, რომ კალდერდეილის არქივში ვნახე ენ ლისტერის დღიურებისა და სხვა ქალაქების დედნები, თავად არ მიცდია დაშიფრული პასაჟების ასლების გაკეთება ან ახალი გვერდების გაშიფვრა. ჩემი ამოცანა, ლისტერის ერთგული მკვლევრებისგან განსხვავებით, სხვა იყო; ენ ლისტერის განსხვავებული და მრავალფეროვანი ყოველდღიური ქრონიკის სხარტად გადმოცემა და მისი დაუმორჩილებელი ცხოვრებისა და სიყვარულის ისტორიის ერთ წიგნად ქცევა მსურდა. უმეტესწილად საშუალებას ვაძლევდი მემუარისტს, თავად ესაუბრა, რადგან იგი შეგნებულად წერდა საკუთარი ცხოვრების შესახებ: გადაწყვეტილი მქვს, რომ ჩემმა ცხოვრებამ არ ჩაიაროს რაიმე სახის პირადი ქრონიკის წარმოების გარეშე, რომელსაც ალბათ ღიმილით წავიკითხავ მას შემდეგ, რაც დრო ყინულივით გააციებს იმ გრძნობების წყაროს, ახლა ასე მჩქეფარედ რომ მოედინება.⁷

ჰალიფაქსიდან მოსკოვში

ენ ლისტერმა და ანა უოკერმა ბარგი ჩაალაგეს ხანგრძლივი მოგზაურობისთვის: რამდენიმე ჩემოდანი აავსეს ტანსაცმლით, ფეხსაცმლით და ქუდებით ცხელი და ცივი ამინდისთვის, ლაშქრობებისა და სხვადასხვა საზოგადოებრივი შემაჯავებელი; ხის ყუთებში ჩააწყვეს წიგნები, პატარა ქურა ლაშქრობებისთვის

და ქვაბი, დანა-ჩანგალი და ჭურჭელი, სამოგზაურო მაგიდა ზედ მიმაგრებული სამელნით, ქაღალდები, წერილების გასახსნელი, სახაზავი და ორი თერმომეტრი. ენი გამოცდილი მოგზაური იყო და მითითებები გასცა, თუ როგორ მოეთავსებინათ ბარგთან ერთად ეტლი. იგი დაახლოებით 17 ცენტნერს (800 კგ) იწონიდა, ამას ემატებოდა კიდევ 15 ცენტნერი (700 კგ) ბარგი.

1839 წლის 20 ივნისს დაიძრნენ, საბოლოო საყიდლები ლონდონში მოითავეს. ენმა იყიდა კომპასი, ტელესკოპი და სათადარიგო საათი. ჰამერსლიში, თავისი ბანკიდან, ენმა გამოიტანა პასპორტი, რომელიც მის, მადმუაზელ უოკერის¹ და მათი მსახურების სახელზე იყო გაცემული. აკრედიტივების¹ გადაცვლა ადგილობრივ ვალუტაში დიდ ქალაქებში იყო შესაძლებელი. ამიტომაც მის ლისტერმა ჰალიფაქსის ბანკს დაავალა, რომ მისი ჰამერსლის ანგარიში რეგულარულად მოემარაგებინათ. ჰამბურგში ჰამერსლის აგენტის მეშვეობით შეიქმნა საგანგებო ფონდი 2000 გირვანქა სტერლინგის ოდენობით, რომელზე წვდომაც მოსკოვიდან გაცილებით ადვილი იქნებოდა. დაბოლოს, ენ ლისტერმა და ენ უოკერმა თავიანთი ანდერძი იურიდიულად დაამოწმეს და ჰამერსლის ბანკს მიაბარეს შესანახად.

მოგზაურ ქალებს დაგეგმილი ჰქონდათ, რომ ეტლი 1839 წლის 2 ივლისს, შუალამისას, ლონდონის დოკის ტერიტორიაზე გადაეტვირთათ და იქიდან პირდაპირ ჰამბურგში წასულიყვნენ. მაგრამ ორივეს საშინელი ჰიდროფობიის შეტევა დაეწყო.² მათ დაუყოვნებლივ გააუქმეს გეგმა – დიდხანს ემგზავრათ გემით და გადაწყვიტეს უმოკლესი საზღვაო მარშრუტით წასულიყვნენ დუვრიდან კალემდე, რაც გაცილებით ხანგრძლივ სახმელეთო მოგზაურობას ნიშნავდა. ცოტაოდენი დროის დასაზოგად შეუჩერებლად იმგზავრეს კალედან კოპენჰაგენამდე. ისევე, როგორც 1833 წელს, ენ ლისტერი შოკირებული იყო ჰანოვერის სამეფოს ცუდი ქუჩებით; *უბრალო ბილიკი ქვიშიან დაბლობზე, აუჩქარებელი ნაბიჯით სიარულს ვერ გავცდით. ქვიშიანი, ტორფიანი, მანანით დაფარული, ხავსიანი ჭაობები ან საძოვრები – ზამთარში უღიმღამო და პირქუში იქნება. ყველგან ქვიშა, ქვიშა, რომელშიც ეკიპაჟის ბორბლები ეფლობოდა. მდინარეების გადასალახად ცხენები უნდა ჩაეხსნათ და ეკიპაჟი ბორანზე გადაეტვირთათ. კელნამდე ოლდენბურგის, ბრემენისა და ჰამბურგის გავლით მიაღწიეს. გემის კაპიტანმა კოპენჰაგენში თქვა, რომ არასდროს დაუტვირთავს გემზე ასეთი მძიმე საბარგო ეკიპაჟი.³*

დანიაში 14 ივლისს ჩავიდნენ და სასტუმრო „როიალში“ დაბინავდნენ. ენს იმედი გაუცრუვდა, რადგან 1883 წელს შეძენილი ნაცნობებიდან ქალაქში მხოლოდ მონსენიორ დე ჰაგემანი იმყოფებოდა, მისი მეგობრის, ჰარიეტის ქმარი. მან

i. სახელობითი ფასიანი ქაღალდი, რომელიც ადასტურებს იმ პირის უფლებას, რომელზეც გამოწერილია ფასიანი ქაღალდი, მიიღოს ბანკიდან დოკუმენტში მითითებული თანხა (მთარგმნ. შენ.).

დაათვალიერებინა ქალებს სამეფო სასახლე და სამხატვრო აკადემია, სადაც მოქანდაკე ბერტელ თორვალდსენს, რომში ორმოცწლიანი მოღვაწეობის შემდეგ, დაედო ბინა. ენ ლისტერმა ის დაახასიათა, როგორც *კოპენჰაგენის პრაქსიტელე. სამწუხაროდ, ის სახლში არ დაგვხვდა. ჩემმა ძველმა მეგობარმა მის ატელიეში წავგიყვანა, ბინაში, სამუშაო კაბინეტში. საინტერესო იყო ასეთი კაცის წიგნები-სა და ჟურნალ-გაზეთების დათვალიერება, რომლებიც აქეთ-იქით მიმოფანტული იყო ისე, როგორც მან დატოვა. ოთხი დღის შემდეგ განაგრძეს გზა როსკილემდე, სადაც მის ლისტერმა მის უოკერს როსკილეს კათედრალი დაათვალიერებინა და ჰარიეტ დე ჰაგემანი გააცნო.*

აქამდე ენ ლისტერი ნამყოფი იყო ყველგან, სადაც გაიარეს. 1839 წლის 19 ივლისს კი მისთვის უცნობ ტერიტორიაზე მოხვდა. წყვილმა ფრედერიკსბორგში მოინახულა ჰელსინგორის ძველი ციხესიმაგრე, პატარა ეკლესია, სადაც დანიის მეფეების კორონაცია ხდებოდა. ზაფხულის გრძელი, სკანდინავიური საღამო კრონბორგის სიმაგრეზე ძროშიაღში გაატარეს, სადაც „ჰამლეტის“ მოქმედება ვითარდება, თუმცა, ენის აზრით, ეს *ფანტაზიის ნაყოფი უფროა, ვიდრე რეალობა.*⁴ დილით იქირავეს გემი, რომელსაც მათი ეკიპაჟისთვის ადგილი ჰქონდა და ჰელსინგორისკენ გაემგზავრნენ. ოცდაათი საათის განმავლობაში სანაპიროს გასწვრივ, გოტენბურგისკენ მიაპობდნენ ტალღებს. ენს ჰალანდის თეთრი პლაჟები – შვედეთის ახლანდელი ტურისტული ცენტრი, მოსაწყენი ეჩვენა, მაგრამ *ყველაფერი, რაც შვედურია, ჩვენთვის ახალი და, შესაბამისად, საინტერესოა. რა უცნაურიც არ უნდა იყოს, აქაურებთან საერთო ენის გამონახვა გამიჭირდა! დამტკრეული გერმანულის გარდა, ერთი სიტყვაც ვერ გავიგეთ და ვერც გავაგებინეთ.* მათი მსახური, მისტერ გროსი, თავისუფლად ლაპარაკობდა გერმანულად, მაგრამ ენს იმედი გაუცრუა; ის მშვენივრად ემსახურებოდა მათ „მოდრავ სახლში“, მაგრამ ფოსტალიონებთან, მეზაჟეებთან ან სასტუმროს მებატონეებთან ურთიერთობისას გაუბედავი და მერყევი აღმოჩნდა. მისი მეუღლე, გროცა კი გაცილებით მარჯვე მოახლე იყო და ყველა სასტუმროში, სადაც ჩერდებოდნენ, მეგობრებს იჩენდა და მნიშვნელოვან ინფორმაციას აგროვებდა – განსაკუთრებით მაშინ, როდესაც ისინი გოტენბურგში ინგლისურენოვან სასტუმროში, „მისის ტოდთან“, დარჩნენ.

უნდოდათ, იქიდან შემოვლითი გზით ნორვეგიაში ჩასულიყვნენ. ნორვეგიის გზებიც ქვიშიანი იყო, ამიტომ მძიმე ეკიპაჟი და ბარგის უმეტესი ნაწილი მისტერ და მისის გროსებს დაუტოვეს, რომლებიც გოტენბურგში დარჩნენ. ენმა და ანამ იყიდეს პატარა, ბევრად უფრო მსუბუქი ეტლი და დაიქირავეს შოტლანდიური წარმოშობის შვედი მეეტლე, რათა ნორვეგია დაეთვალიერებინათ *ჩრდილოეთ ევროპის გზამკვლევი* (1838) რეკომენდებული გზების მიხედვით. მომდევნო თვეების განმავლობაში, ეს სამოგზაურო გზამკვლევი ენის ბიბლიად იქცა – მოგ-

ბაურობის ყველა ეტაპზე იქ მოცემულ რჩევებს მისდევდნენ და რეალობას იქ აღ-
წერილ ფაქტებს ადარებდნენ.

მოგზაურობა 1839 წლის 26 ივლისს დაიწყო. იმის შესახებ, თუ რა გადახდათ
თავს 13 ოქტომბრამდე, ვიცით მხოლოდ იმ წერილების წყალობით, რომლებიც
ენ ლისტერმა თავის მეგობრებს მისწერა, რადგან მისი დღიურის შემდეგი ოცი
გვერდი ცარიელი დარჩა; ამდენი ახალი გამოცდილებისა და განუწყვეტელი
მოგზაურობის გამო ენმა ვერ მოახერხა, ფანქრით დაწერილი დაუდევარი ჩანა-
წერები დღიურში გადაეტანა. *ჩვენ მოვიხიბლეთ კრისტიანიით – წერდა ენი მა-
რიანა ლოუტონს იმ ქალაქის შესახებ, რომელიც ახლა ოსლოს სახელით არის
ცნობილი. მის საუცხოო ადგილმდებარეობას ნორვეგიის ერთ-ერთი ყველაზე
დიდი და მშვენიერი ფიორდის სათავესთან ვერაფერი შეედრება. მაგრამ ყველა
გვირჩევდა, წადით ბერგენის, წადით ტრონჰეიმის სანახავადო. გზას გავუდექით
– პეიზაჟები კრისტიანიიდან გაუსტას მთამდე [გაუსტა – ნორვეგიის სამხრეთით
ყველაზე მაღალი მთა 1883 მ.] ერთი აუწერელია – კლაკნილი ფიორდი, პატარა
საუცხოო ტბები, კლდეები და ბნელი ფიჭვნარი, მათ თავზე აღმართული მთები
და ზედ შეფენილი ნორვეგიული კოტეჯები. მაგრამ ამინდი გაფუჭდა. ტელემარკის
რეგიონში, ბოლკეშაში, ძლიერი წვიმის გამო ორი დღე დაკარგეს; და როდესაც
ვნახეთ, რომ ამინდის გამოკეთების იმედი აღარ უნდა გვქონოდა, უხალისოდ გა-
მოვბრუნდით უკან.⁵ ოსლოში შეიძინეს საჩუქრები ახლობლებისთვის ინგლისში
გასაგზავნად (ენმა ვერე კემერონს ანჩოუსებით სავსე პატარა კასრი გაუგზავნა),
მსუბუქი ეტლი გაყიდეს და გოტენბურგში გემით დაბრუნდნენ; მადლობელი ვარ,
რომ კვლავ „ტერა ფირმაზე“ დავდგი ფეხი. ამაზე უარესი ღამე გემზე არასოდეს
გამიტარებია. ისე ცუდად ვიყავი, რომ არც ლაპარაკი შემეძლო, არც მოძრაობა.⁶*

ეკიპაჟთან და მსახურებთან ერთად, შვედეთი კვლავ აღმოსავლეთით გადაკ-
ვეთეს, ერებრუს, ვესტეროსის და ენშოპინგის გავლით. 22 აგვისტოს ჩავიდნენ
სტოკჰოლმში. სამხრეთული კლიმატით ის ნეაპოლსაც კი გაუწევს მეტოქეობას.
წარმოდგენაც კი არ მექონდა, თუ ჩრდილოეთის ქალაქები ასეთ თვალწარმტაც
ადგილებში იყო გაშენებული.⁷ გზამკვლევში მოცემული რეკომენდაციების თანახ-
მად, ენმა და ანამ დაიქირავეს ახალი მეგზური; და წავედით ორკვირიან ტურში
უფსალის გავლით (უფსალის ვარდისფერი თაფლუჭი ისე გემრიელია, როგორც
საუკეთესო ვარდისფერი შამპანური) და ყველა მაღარო მოვიარეთ თავიდან
ბოლომდე, რაც მეტად საინტერესო იყო.⁸ ენმა დაათვალიერა შვედეთში იმ დროს
ყველაზე მნიშვნელოვანი რკინის საბადოები დანემორაში, სპილენძის ცნობილი
მაღარო ფალუნში და ვერცხლის მაღარო სალაში. სანამ ენი სამთო ტექნოლო-
გიას სწავლობდა, ლისტერვიკის შახტის მიწისქვეშა წყლების პრობლემების გა-
დაჭრის იმედით, ანა მზის შუქზე ჯდომას და ხატვას ამჯობინებდა.

ჩვენ ყველაფერი გვსიამოვნებდა და ყველგან კეთილი ხალხი გვხვდებოდა,⁹

– აჯამებს ენი შვედეთში გატარებულ დღეებს. მოგვეწონა კარგი, პატროსანი შვედები, ყოველთვის ძალიან თავაზიანები, რომლებიც მზად იყვნენ, ჩვენი ნებისმიერი სურვილი შეესრულებინათ.¹⁰ მოგზაურები შეეჩვივნენ ოთახებში მიმობნეულ ღვთისსახ, მხოლოდ საკვები არ იყო მთლად მათი მოსაწონი; მიუხედავად იმისა, რომ ეს არ არის გურმანთა ქვეყანა და დიდი ქალაქების გარდა იშვიათად გვიმასპინძლებოდნენ ხორციით, ვსვამდით რძეს, ყავას ან ანკარა წყაროს წყალს, მაგრამ მაინც კარგად ვიყავით და მივირთმევდით ბლინებსა და რბილ ნამცხვარს, ლიბპას რომ უწოდებენ, რომელიც მე ძალიან შემიყვარდა.¹¹

სტოკჰოლმში დაბრუნებულებმა ენმა და ანამ წყლის შიში დაძლიეს და ბორნით ორდლიან მოგზაურობაში გაემართნენ ტურკუსაკენ (შვედ. აბო). ამგვარად, რუსეთის ტერიტორიაზე აღმოჩნდნენ, რადგან 1809 წელს რუსეთის მეფემ ფინეთი დაიპყრო და ფინეთის დიდი სამთავრო რუსეთის ნაწილი გახდა. წინა საუკუნეების მანძილზე შვედეთის მმართველობის კვალი განსაკუთრებით სანაპიროს გაყოლებაზე შემორჩენილიყო და მოგზაურების შვედმა მეგზურმა საფოსტო სადგურებზე მშობლიურ ენაზე შეძლო მოლაპარაკება. სწრაფად გაიარეს კეთილმოწყობილი გზები, განსაკუთრებით მაშინ, როდესაც ჩვენი მძღოლი სატვირთო კოფრზე იჯდა, მე კი, რუსული ან ძველი ბერძნული წესით, ერთ მწკრივად შებმულ ოთხ ცხენს მივაჭენებდი.¹² ორი ღამე გაატარეს ჰელსინკიში, ფინეთის ახალ დედაქალაქში, რომელიც საკმაოდ მომხიბვლელად მიიჩნიეს.¹³ რათა ბოლო მოეღოთ შვედური აბოს ბატონობისთვის, რუსეთის ახალმა მმართველებმა ჰელსინკი, რუსეთის იმპერიასთან ახლოს მდებარე უმნიშვნელო ქალაქი, დედაქალაქად გამოაცხადეს. რუსებმა პეტერბურგის მიბაძვით ჰელსინკიში ნეოკლასიკური შენობები აღმართეს; სენატის მოედანი ჯერ კიდევ სამშენებლო მოედანს ჩამოჰგავდა. ასე რომ, ჰელსინკი ენმა და ანამ მეტად თანამედროვედ მიიჩნიეს. ჩვენი მოგზაურობა ფინეთის გავლით მართლაც ძალიან სასიამოვნო და მეტად ეკონომიური იყო. ვნახეთ ქვეყანა და ხალხი – ეს უკანასკნელნი ყოველთვის თავაზიანები იყვნენ და მუდმივად ცდილობდნენ, ყველაფერი გაეკეთებინათ ჩვენი სიამოვნებისათვის; ქვეყანა კი მომხიბვლელი და საინტერესო აღმოჩნდა.¹⁴ ენი წერდა ყოველდღიურ დეტალებზე, როგორებიცაა სახლების კარზე ნაძვის ახალი ტოტების ჩამოკიდება, და ღამეში თეთრი ხავსისა და გამხმარი ყვითელი ხავერდას ფანჯრების მინების ქვეშ დაწყობა.

ვიბორგში (ვიიპური) ჩასვლამდე ცოტა ხნით ადრე მათ პირველად შეხვდათ რუსულად მოლაპარაკე მოსახლეობა; ამ დილით შევათვალიერე მამაკაცების სამოსი, ძალიან კოხტა და შთამბეჭდავი – თეთრი სერთუკი წითელი ან ლურჯი ქამრით. ქალების სამოსლის მუქი ფერის სელის ქსოვილს ვიწრო წითელი ზოლები დაჰყვებოდა, [...]თავზე კი თეთრი თავსაფრები ჰქონდათ წაკრული. როდესაც რუსეთის საზღვარს მიაღწიეს, საზღვრის გადაკვეთის უფლება მაშინვე ვერ მიიღეს:

მთელი ჩვენი წიგნები ეკიპაჟიდან გადმოიტანეს და დაათვალიერეს. მაგრამ, ჩემი სურვილისამებრ, *ჩამოვწერე ნუსხა, ხელი მოვაწერე, კონვერტში ჩავდე და ჩემი ბეჭდით დავბეჭდე, პეტერბურგში ეკიპაჟთან ერთად გასაგზავნად*, რათა ექვსი კვირის შემდეგ ცენზურის კომიტეტში მივსულიყავი და სია შემემოწმებინა. ამრიგად, გვეძლევა უფლება ჩვენი წიგნები და ნივთები წავიღოთ და კომფორტულად ვიმგზავროთ – მაგრამ, საბაჟოს ხელქვეითმა ბარიერი მხოლოდ საზღვარზე იძულებით გატარებული ერთი ლამის შემდეგ, მეორე დილით ასწია და თავი დაგვიკრა, ჩვენ საზღვარი გავიარეთ და გზა გავაგრძელეთ.¹⁵

1839 წლის 17 სექტემბრის ნაშუადღევს გადალახეს დიდებული ნევა და შეაბიჯეს სასახლეების ქალაქში, რომელიც რამდენიმე ასეული წლის წინ ჭაობზე ააშენებინეს ათიათასობით ყმასა და მონას და რუსეთის დედაქალაქად გამოაცხადეს. მოგზაურები დაბინავდნენ ქალბატონი ვილსონის ინგლისურ სასტუმროში და სანკტ-პეტერბურგი ინგლისურენოვანი გიდის დახმარებით დაათვალიერეს. ენი და ანა დაგვეგმილზე ორჯერ მეტხანს, სამი კვირით გაჩერდნენ აქ და საბოლოოდ მაინც ვერ მოახერხეს ყველაფრის ნახვა. ვერ წარმოგვიდგენია ვინმე თავის თავს ნამდვილ მოგზაურს უწოდებდეს ისე, რომ აქ არ იყოს ნამყოფი. ჩანახატების კეთების მოყვარული მოგზაური, რომელმაც ისე დახურა თავისი დიდი ტური, რომ ერმიტაჟის სასახლეს არ ესტუმრა, უმჯობესია დაუყოვნებლივ, სინანულისა და ბრაზისგან მოკვდეს. ისინი ზედიზედ სამი დღის განმავლობაში ათვალიერებდნენ სამხატვრო კოლექციებით სავსე დარბაზებს. მაშინდელ რუსეთში არსებული ერთადერთი რკინიგზის მეშვეობით ეწვივნენ სამეფო სასახლეებსა და ბაღებს „ცარსკოე სელოში“. „აპტეკარსკის“ კუნძულზე ბოტანიკური ბაღის დათვალიერების შემდეგ, ქალებმა შეადგინეს იმ ხეების, ბუჩქებისა და ყვავილების გრძელი სია, რომელთა დარგვასაც შემდგომ სახლში აპირებდნენ.

მიუხედავად იმისა, რომ ცენზორებს მათი არც ერთი წიგნი არ გაუპროტესტებიათ, ენს და ანას მაინც მოუწიათ, ხელისუფლების მიერ დაწესებული რეგულაციების თანახმად, თავადაც დარეგისტრირებულიყვნენ პოლიციაში და მსახურებიც დაერეგისტრირებინათ. შედარებით ლიბერალურ ბრიტანეთში მოგზაურებისა და თავისუფალი ამრის ამგვარი შეზღუდვების გამო ნიკოლოზ I-ს მწვავედ აკრიტიკებდნენ, ის XIX საუკუნის ევროპის ავტოკრატ მმართველებს შორის ყველაზე უფრო რეაქციონერ ხელისუფლად ითვლებოდა. თუმცა, რუსებს არ შეეძლოთ წაეკითხათ მისი პოლიტიკის კრიტიკა, რადგან ქვეყანაში თავისუფალი პრესა აკრძალული იყო. ენი ამას არ შეუწუხებია. მხოლოდ იმას ნანობდა, რომ არ გაუმართლათ და ვერ ნახეს იმპერატორის ოჯახი, რომელიც, მისი თქმით, ევროპაში ერთ-ერთი ყველაზე მშვენიერი ოჯახი იყო.

პეტერბურგიდან ენმა და ანამ შეუჩერებლად იმგზავრეს მოსკოვამდე და ხუთი დღის განმავლობაში 435 მილი დაფარეს. 1839 წლის 12 ოქტომბერს იქირავეს

დიდი, შესანიშნავი ბინა ერთ-ერთ პატარა სასტუმროში, რომელსაც ინგლისელების ოჯახი უძღვებოდა,¹⁶ და ცნობილი იყო სახელით „მისის ჰოვარდთან“. მათ დაუყოვნებლივ დააპირეს მშვიდად გაესეირნათ გარემოს დასაზვერად და თავიანთ ქუჩას, „ბოლშაია დიმიტროვკას“ ჩაუყვანენ, დიდ თეატრს ჩაუარეს, წითელ მოედანზე აღმოჩნდნენ და წმინდა ვასილის ტაძარს წააწყდნენ – რომელიც არაჩვეულებრივად გროტესკული იყო, ამ ეკლესიის მსგავსი არაფერი გვინახავს – და ბოლოს, „სპასკის კარიბჭის“ გავლით შეაბიჯეს კრემლში. რა შეიძლება აღემატებოდეს მოსკოვის ხედს აქედან – ევროპული და ამიური სტილის სიჭრელე, ასობით ეკლესია და გუმბათების პომპეზურობა! ასეთი სურათი ვერც კი წარმომედგინა – მოსკოვმა ყველა ჩემს მოლოდინს გადააჭარბა!¹⁷ სანამ მოსკოვში არ ჩავიდნენ, ენ ლისტერმა ვერ გამო-ნახა დრო და სურვილი, რომ თავის დღიურს მიბრუნებოდა.

მომდევნო ორი კვირის განმავლობაში გიდმა არა მხოლოდ ღირსშესანიშნაობები აჩვენა, არამედ მისცა საშუალება, დაეთვალიერებინათ კერძო სასახლეები იმ დროს, როცა მფლობელები შინ არ იყვნენ. წაიყვანა მოსკოვის წყალსაცავისა და მდინარე მოსკვას გასწვრივ მდებარე ტყიანი ქედის – „ვარაბიოვი გორის“, სანახავად, რომელიც ბოლო ხანებში უზარმაზარი ქალაქის „მწვანე ფილტვებად“ იქცა და, სადაც ლომონოსოვის სახელობის მოსკოვის სახელმწიფო უნივერსიტეტი მდებარეობდა. იქ ენი და ანა შეესწრნენ ნაღვლიან სანახაობას, ყოველ კვირას რომ ეწყობოდა: გადასახლებულთა მსვლელობას, რომლებიც ციმბირში მიემართებოდნენ. გერმანელმა ექიმმა, დოქტორმა ჰაასმა, განუმარტა, თუ როგორი იყო მთელი პროცედურა და აუხსნა, რომ პატიმრები, რომლებიც ავად იყვნენ [...] საავადმყოფოში იგზავნებოდნენ განკურნებამდე ან, თუ განუკურნებელი სენით იყვნენ ავად, სიმშვიდესა და კომფორტში კვდებოდნენ. ენმა ხუთთვენახევრიანი მარშრუტი ციმბირამდე ასევე კომფორტულად მიიჩნია. დღეში 22 ვერსზე მეტის (14,5 მილი) გავლა არ უწევთ და ყოველ ორ დღეში ერთხელ ისვენებენ. სახელმწიფო იხდის მათი კვებისა და ტანსაცმლის საფასურს, – აღნიშნავს ენი, და არავის უსჯიან იძულებით შრომას, მძიმე დანაშაულის ჩამდენთა – მკვლელებისა და მგონი მძარცველების, გარდა? შედარებით მსუბუქ სამართალდამრღვევებს მხოლოდ გადასახლება ემუქრებათ კოლონიებში და სამხრეთის ზოგიერთ რეგიონში, მოსკოვთან შედარებით, ბევრად უკეთესი კლიმატია. ქალისთვის, რომელიც ლონდონის „დასასჯელ ბორბალს“ არც ისე დიდ საშინელებად მიიჩნევდა, ციმბირში გადასახლება სანატორიუმში დასვენებას უტოლდებოდა; მით უმეტეს, რომ ყველა, ვინც კოლონიაში იგზავნება, მიუხედავად იმისა, ყმები არიან თუ არა შინ, თავისუფლდება.¹⁸ იმ დროს ბრიტანეთი საკუთარ კრიმინალებს ავსტრალიაში აგ-

i. დასასჯელი ბორბალი – (ინგ.) Penal Treadmill (მოარგმნ. შენ.).

ბავნიდა, მათ შორის ჩარტისტებს, რომლებიც ენ ლისტერს დიდად არ ეხატებოდა გულზე.

ევროპული პეტერბურგისგან განსხვავებით, მოსკოვის ქუჩები სავსე იყო არა მხოლოდ მართლმადიდებელი რუსებით, არამედ სუნიტი თათრებით, გალიციელი ებრაელებით, შიიტი სპარსელებით, ლუთერანი გერმანელებით, ჩერქეზებითა და ფინელებით. ანას და ენს რუსული მართლმადიდებლური საეკლესიო მსახურება უცნაურიც და ამავდროულად მიმზიდველიც ეჩვენათ. ბერძნული კათოლიკური¹ თაყვანისცემა ბრწყინვალეობითა და ანტიკურობით, რომანულ კათოლიკურთან შედარებით, ერთი საფეხურით მაღლა დგას. მე შევეჩვიე ეკლესიების ბიზანტიურ სტილს, მოოქრულ გუმბათებს, ვერცხლს, ცისფერს და ზღვისფერ მწვანეს და ყველა ფერს, რომლის წარმოდგენაც კი შეიძლება.¹⁹ ისინი ასევე დაესწრნენ პარასკევის მუსლიმურ ლოცვებს. მოლამ თუ მოხელემ (თეთრი მუსლინის ჩალმით და მოყვითალო ყვავილებამოქარგული ხიფთანით) *მხოლოდ ის გვთხოვა, რომ არ გველაპარაკა და ხალიჩებზე ფეხი არ დაგვედგა და თავაზიანად მოგვიჩოჩა ძველი ყუთი* ჩამოსაჯდომად. *ჩვენთვის ერთი სიტყვაც კი არ უთქვამთ* – არასდროს მინახავს ამაზე უფრო მოწესრიგებული ხალხი.²⁰ ენზე დიდი შთაბეჭდილება მოახდინა იმ ქალაქმა, რომლის ნახვაც წლების მანძილზე სურდა. ეჭვს გარეშეა, მოსკოვი ყველაზე თვალწარმატებელი ქალაქია, რომელიც ოდესმე მინახავს. არანაირი ნაკლი, აქ არაფერია მახინჯი და ცუდი. ყველაფერი მეტ-ნაკლებად კარგია და უმეტესი ნაწილი უჩვეულოდ ლამაზია. პირველი შთაბეჭდილება მეტად შთამბეჭდავია და სულ უფრო მძაფრდება.²¹

ოქტომბერში ამინდი საშინლად გაფუტდა. ანა უოკერს, რომელიც ფიქრობდა, რომ დანიშნულების ადგილს მიაღწიეს, ფილის რამსდენის გადმოცემით, მოგზაურობის გაგრძელება აღარ უნდოდა და სახლში დაბრუნება სურდა.²² ენ ლისტერი ფიქრობდა, რომ დეკემბერს დალოდებოდა, რათა გაერკვია, თოვლიან გზებზე მარხილი თუ ივლიდა, რომ მერე სამხრეთისკენ აეღო გეზი. კონფლიქტი ინგლისიდან უზრუნველყოფილი ახალი კავშირების იმედად მოგვარდა. ენმა ბრიტანეთის ელჩს გაუგზავნა ლორდ სტიუარტ დე როტსეის სარეკომენდაციო წერილი, თხოვნით, მოგზაურები დაეკავშირებინა მოსკოვის გენერალ-გუბერნატორთან, პრინც დიმიტრი ვლადიმერის ძე გოლიცინთან. 7 ნოემბერს, ნაშუადღევს ოთხ საათზე, ქალები გუბერნატორის სასახლეში ოფიციალურ ვახშამზე მიიღეს. მათი მასპინძელი იყო პრინც გოლიცინის დისშვილი, მადამ აფრაქსინა, და ეს ნიშნავდა იმას, რომ ანას და ენს მოსკოვის სხვა არისტოკრატიული ოჯახებიც მიიწვევდნენ, მათ შორის მოსკოვის ბოტანიკური ბაღის დირექტორი ალექსანდრე გრიგორის ძე

i. აქ ლისტერი გულისხმობს მართლმადიდებლებს (მთარგმნ. შენ.).

ფიშერ ფონ ვალდჰაიმი და მამამისი, ბოლოლოგი და პალეონტოლოგი, გოტჰელფ ფიშერ ფონ ვალდჰაიმი, ალექსანდრ ფონ ჰუმბოლდტის მეგობარი, რომელიც, ასევე, იყო ჟორჟ კუვიეს სტუდენტი პარიზში, თუმცა, ენის დამოწაფებამდე ბევრად ადრე. გრაფი და გრაფინია პანინები მოგზაურებს ზრუნვას არ აკლებდნენ. გრაფინია ალექსანდრამ იცოდა ინგლისური, რაც რუსეთის არისტოკრატიის წარმომადგენლებს შორის, რომლებიც ჩვეულებრივ ფრანგულად საუბრობდნენ, იშვიათობა იყო; ამასთან, იგი მეტად სასიამოვნო, ენაწყლიანი და სანდომიანი ქალი აღმოჩნდა.²³ პანინებმა წყვილი წაიყვანეს თეატრში, დაათვალიერებინეს ბუნების ისტორიის მუზეუმი, უნივერსიტეტის სტამბა, ხატვის ტექნიკური სკოლა, ბავშვთა სახლი და ქოლერის ინსტიტუტი. ამას გარდა, გრაფინიამ ისინი რუსულ ორთქლის აბანოში წაიყვანა – ისე გვარიანად გავიხეხე,²⁴ – წერს ენი. ენს და ანას ეპატიუბოდნენ მიღებებზე ლამაზ სახლებში, საუკეთესო მეჭლისებზე პარიზულ სტილში, სადაც ბევრი ლამაზი გოგონა იყო, განსაკუთრებით ერთი, ულამაზესი ქალი მათ შორის, ვინც ოდესმე მინახავს – მოსკოველი ვენერა.²⁵

ეს „ვენერაც“, სოფია ალექსანდრეს ასული რადზივილი, ქალიშვილობაში ურუსოვა, მისის ჰოვარდთან იყო გაჩერებული. ენ უოკერზე სამი წლით უმცროსი სოფია იმპერატორის ფლიგელ-ადიუტანტის ცოლი გახლდათ. პრინცესა, წესით, პეტერბურგში უნდა ყოფილიყო, რადგან ის იმპერატორიკას ფრეილინა იყო, მაგრამ სამეფო კარმა და მეუღლემ, ჯანმრთელობის გაუარესების გამო, ნება დართეს ზამთარი მშობლების სახლში გაეტარებინა. ის სასტუმროში იყო გაჩერებული და ელოდებოდა მშობლების სასახლეში თავისი ოთახების მომზადებას. ძალიან სასიამოვნო, ჭკვიანი, ელეგანტური ადამიანია,²⁶ – წერდა ენი ჩაიზე მათი პირველი შეხვედრის შემდეგ. ერთი კვირის მერე მათ შორის ორმხრივი მიზიდულობა გაჩნდა. 12, 14 და 16 ნოემბერს ენი წერდა პრინცესასთან თავისი საუბრების შესახებ შიფრის გამოყენებით, რომლის წაკითხვაც ანას არ შეეძლო, და ფიქრობდა: ნეტავ ერთმანეთს ზედმეტად ხშირად ხომ არ ვხვდებით? სამი დღის შემდეგ, ენმა გადაწყვიტა, რომ ის და სოფია, პირიქით, მეტად იშვიათად ნახულობდნენ ერთმანეთს და აღნიშნავს, რომ ა.უ.-ს¹ მუდმივად ჩვენთან ერთად ყოფნა მეტად უსიამოვნოა. ეს პირველი შემთხვევა იყო, რომ ენი არ ნანობდა, რომ ანამ ფაქტობრივად, არ იცოდა ფრანგული და ამიტომაც არ შეეძლო გაეგო ყველაფერი, რასაც ის და სოფია რადზივილი ერთმანეთს ეუბნებოდნენ. თავის მხრივ, პრინცესა დაინტერესდა ანათი და ენს ა.უ.-ს *ცხოვრების ისტორია გამოჰკითხა*.²⁷

მაგრამ ენს სოფია რადზივილის სილამაზეზე მეტად სპარსეთი და ბაღდადი იზიდავდა. იქ ჩასასვლელად, მას განზრახული ჰქონდა გრძელი მონაკვეთი ვოლ-

i. იგულისხმება ანა უოკერი.

გამდე მარხილით გაეწვლო და შემდეგ გაყინული მდინარის ნაპირის გაყოლებით ასტრახანამდე ჩასულიყო და ბოლოს თბილისში ჩასაღწევად დიდი კავკასიონი გადაეკვეთა. არაერთი სასტიკი ომის მეშვეობით, XVIII საუკუნის შუა წლებიდან მოყოლებული, რუსეთის იმპერია შავი და კასპიის ზღვების სანაპიროებამდე ფართოვდებოდა. 1829 წელს ხელი მოეწერა ხანმოკლე სამშვიდობო ხელშეკრულებას თურქეთთან, მაგრამ რეგიონს ისევ ელოდა დამანგრეველი კონფლიქტები. რუსეთმა ჯერ კიდევ ვერ შეძლო მთლიანი კავკასიის თავის შემადგენლობაში შეყვანა. 1839 წელს მოულოდნელი თავდასხმები და შეიარაღებული აჯანყებები ყოველდღიური მოვლენა იყო. მოსკოვში ანამ და ენმა გაიგეს ფრანგი წყვილის ამბავი, რომლებიც ჩერქეზებმა გაიტაცეს და, რადგან გამოსასყიდი არ გადაიხადეს, ისინი აღარავის უნახავს. არავინ კვებდა დიდ კავკასიონს, თუ გადაუდებელი სამხედრო ან პროფესიული მიზეზები არ გააჩნდა. სანამ მათი ნაცნობი მამაკაცები ერთმანეთს ეჯიბრებოდნენ იმაში, თუ ვინ მისცემდა საუკეთესო რჩევას მოგზაურობისათვის, ქალები ურჩევდნენ, საერთოდ არ წასულიყვნენ; მათ ენი აბსოლუტურ შემოიღად გამოაცხადეს, რადგან ზამთარში უნდოდა წასვლა. დეკემბრის შუა რიცხვებში მოსკოვში დღისით ტემპერატურა -26 გრადუსამდე დაეცა; იმდენად აცივდა, რომ თოვლიც არ მოდიოდა.

ყინვამ და სიცივემ და მათი ნაცნობების ხვეწნამ იმოქმედა და ანა უოკერი დარწმუნდა, რომ სახლში დაბრუნება სურდა; მოგზაურობა შინისაკენ ასევე საკმაოდ სახიფათო იქნებოდა. როდესაც ანამ შემდგომი მოგზაურობის ხარჯის გამო ყოყმანი დაიწყო, ენი პანიკაში ჩავარდა და კატეგორიულად განაცხადა, რომ არავითარ შემთხვევაში უკან არ დაბრუნდებოდა. ამასობაში გრაფმა პანინმა ანას შესთავაზა, დარჩენილიყო მოსკოვში, ხოლო ენი თავის ზამთრის მოგზაურობაში სხვა კომპანიონთან ერთად წასულიყო, რაზეც შეძრწუნებულმა ანამ უპასუხა, რომ „*აქ დარჩენას, ერჩივნა გზაში მომკვდარიყო*“.²⁸ არც ერთი მათგანი კომპრომისზე არ მიდიოდა. ფილის რამსდენი შექმნილ სიტუაციას კრიტიკულად მიიჩნევს: განიხილებოდა განშორების გეგმები, როდესაც სახლში დაბრუნდებოდნენ. მაგრამ საზღვარგარეთ ანამ კიდევ უფრო მძაფრად იგრძნო, რომ ენზე იყო დამოკიდებული, რომელსაც, როგორც ყოველთვის, დასახულ გეგმას ვერ შეაცვლევინებდი. მეორე დღეს ანა დანებდა; *ამ ეტაპზე მე და ა.უ. მოვრიგდით*.²⁹

მოგზაურობის საწინააღმდეგო ამდენი გაფრთხილების შედეგად, ენ ლისტერი ერთადერთ დათმობაზე წავიდა და სამოგზაურო აღჭურვილობაზე გულდასმით იზრუნა. საკუთარი ეტლი მოსკოვის დატოვების შემდეგ აღარ გამოადგებოდა, ამიტომ ენმა ორი ახალი სატრანსპორტო საშუალება შეიძინა. მსახურებისათვის რუსული „კიბიტკა“ – ტილოთი გადახურული უბრალო ხის ოთხთვალა, რომელიც ზამთარში შეიძლებოდა მარხილზე დაეყენებინათ, ხოლო ზაფხულში – ბორბლებზე. თავისთვის და ანასთვის ენმა იპოვა რაღაც, რაც არც მთლად „კიბიტკა“ იყო

და არც მთლად ეტლი, მგზავრებისთვის გამოყოფილი სალონით, კარიტა და ფანჯრებით. ეტლების ხელოსანმა დაამზადა ეტლის შესაფერისი ბარგის შესაფუთი ორი ყუთი, რომლებიც გარეთ – მეეტლეს, ხოლო შიგნით ქალბატონებს დასაჯდომად უნდა გამოეყენებინათ. გრაფ პანინის რჩევით, სალონისთვის ასევე გაკეთდა მატრასები, რომლებიც ზურგს უკან უნდა დაემგვრებინათ და სავარძლების ქვეშ უნდა დაეწყოთ, რომ ეტლიდან არ გადაცვნილიყვნენ. გვირჩიეს, რომ არასდროს დაგვეძინა სხვის დივანზე, დაგვჭამდნენ პარაზიტები; არამედ, ყოველთვის გაგვეჩოჩებინა საკუთარი მატრასი შუა ოთახში. ასე მკბენარებს დრო დასჭირდებოდათ ჩვენამდე მოსაღწევად. ამას გარდა, გრაფმა გვირჩია, „კიბიტკის“ *ძირზე თივა დაგვეყარა და ზედ ჩვეულებრივი ხალიჩა დაგვეგო – ამგვარად სულ თბილად გვექნებოდა ფეხები*. სამგზავროდ მათ მუხლებამდე მომდგარი ტყავის ჩექმებიც შეიკერეს, რომლებიც ბეწვით იყო გაწყობილი, ისევე, როგორც მათი ახალი სქელი პალტოები. ასევე, გრაფის რჩევით, შეიძინეს მგლის ტყავი, ეტლში დასაფარებლად³⁰ და საჭმლის გამაცხელებელი, რომელიც ცხელი წყლის საშუალებით აცხელებდა საკვებს. ენი და ანა მათთვის მიცემული რჩევებისთვის გრაფის დიდად მადლიერები დარჩნენ.

ასევე, ძალზე მნიშვნელოვანი იყო იმის გარკვევა, თუ ვის წაიყვანდნენ თან მომსახურე პერსონალად. მათ მოახლეს, გროცას, მტკიცედ ჰქონდა გადაწყვეტილი, რომ მოსკოვიდან მხოლოდ ინგლისში დაბრუნდებოდა. ენმა კარგი რეკომენდაცია მისცა, რომ სხვა სამსახურის შოვნა შესძლებოდა მანამ, სანამ ანა და ენი ინგლისში დაბრუნებას გადაწყვეტდნენ. მისი მეუღლე კი მზად იყო, კავკასიაში წაჰყოლოდა მოგზაურებს იმ პირობით, რომ ნებისმიერ მომენტში, როცა მისთვის ძალიან უცხო და რთულ პირობებში აღმოჩნდებოდა, ქალების ხარჯზე უკან დაბრუნებას შეძლებდა. მაგრამ მისტერ გროსის წამოყოლაზე უფრო მნიშვნელოვანი იყო ადგილობრივის პოვნა, რომელიც მათ უსაფრთხოდ დააბრუნებდა ასეთი შორეული რეგიონებიდან. მოსკოველი მეგობრების საშუალებით, ისინი დაუკავშირდნენ სახელმწიფო საფოსტო სამსახურის კურიერს, რომელიც უბრუნველყოფდა ყველაფერს, რაც ცხენებს, მეეტლებს, გზებსა და მათ დაბინავებას შეეხებოდა თბილისამდე. ქალების პარიკმახერმა ისინი დააკავშირა ყოფილ ყმასთან, გიორგი ჩაიკინთან, რომელმაც 2000 რუბლად იყიდა თავისუფლება. იგი თავის ყოფილ ბატონთან ერთად ნამყოფი იყო პარიზში, სადაც ისწავლა ფრანგული და წარმოდგენა შეექმნა იმის შესახებ, თუ რას აფასებდნენ დასავლეთევროპელები. გიორგი თავისი საცოლის, ოცდასამი წლის დომინიკას, იმავე დომნას, თავისუფლების გამოსყიდვას ცდილობდა. ნახა რა, რომ დომნა სასიამოვნო შესახედაობის პატარა გოგო იყო,³¹ ენმა ის თავის ახალ მოახლედ აიყვანა. დომნა და გიორგი გამგზავრებამდე აპირებდნენ დაქორწინებას.

ბოლოს და ბოლოს, 1840 წლის იანვრის მეორე კვირას, თოვლი წამოვიდა.

თავიანთი ახალი ეკიპაჟით, ტექნიკითა და მსახურებით ანა და ენი საცდელად გაემგზავრნენ „სერგიევ პოსადისკენ“, სადაც მოსკოვის ჩრდილოეთით, ორმოცდახუთი მილის დაშორებით, ყველაზე მნიშვნელოვანი რუსული მართლმადიდებლური მონასტერი მდებარეობდა. თავიდან ჩვენს პატარა სამგზავრო საშუალებაში სუნთქვა მეკვროდა. დროდადრო ვალებდი და ვხურავდი პატარა სარკმელს, რომ გარეთ გამეხედა და ჰაერი ჩამესუნთქა. *მშვენიერი დღე იდგა და საკმაოდ თბილად ვიყავით მოსასხამებისა და გადახურვის წყალობით.* მაგრამ გაყინულ თოვლზე ისეთი ხმაურით მივკაყვავებდით, *გემის ძრავასთან მიახლოებისას რომ გსმენიათ.* მათ ღამე მონასტრის პანსიონში გაატარეს და მეორე დღეს მონასტერი დაათვალიერეს. *რა თვალწარმტაცია! ნამდვილად ღირდა ამის სანახავად ჩამოსვლა! ეს ციხესიმაგრის მსგავსი მონასტერი, ეს საყდარი თავისი 8 ულამაზესი კოშკითა და მაღალი თეთრი კედლებით ძალიან შთამბეჭდავია.*³² ისინი ორ წირვას დაესწრნენ და მცირე ხნით წინამძღვარსაც შეხვდნენ. უკან ღამით დაბრუნდნენ, რაც ასევე საცდელი გეგმის ნაწილი იყო, და დღის ორ საათზე უკვე მოსკოვში იყვნენ.

ამ გასეირნების შემდეგ, ენ ლისტერს ერთი სული ჰქონდა, თავიანთ გრძელ გზას დასდგომოდნენ. ანა უოკერმა ყურები ჩამოყარა – ე.ლ.¹ *ცდილობს არ შეიმჩნიოს.* ამის გამო, მის უოკერი საერთოდ წყვეტს ლაპარაკს, რაც ე.ლ.-ს *აღშფოთებას იწვევს* – „ასე ხმის გაუცემლად ყოფნას ვერ ვუძლებ“,³³ ციტირებს ენ ლისტერს ფილის რამსდენი მისი დღიურის დაშიფრული ამონარიდიდან. ანას წასვლა არ სურდა, მაგრამ ბეწვის ქუდი და პალტო მაინც შეაკერინა. ენმა დაუბრკოლებლად მიიღო საჭირო საშვები, მარაგიც შეავსო და შეიძინა სანთლები, ჩაი, შაქარი, სამოვარი და ფარანი. ანა ბედს დამორჩილდა. ყველაფერი, რაც თან არ მიჰქონდათ, შეინახეს თავიანთ ეტლში, რომელიც მისის ჰოვარდის ეტლების ფარდულში დატოვეს. ენ ლისტერმა ჰამერსლის აკრედიტივები მოსკოვის ბანკში რუბლებზე გადაცვალა. გააფრთხილეს, რომ ასტრახანის სამხრეთით ამ გზით ფულზე წვდომა აღარ ექნებოდა. გამგზავრების წინა ღამეს ანამ და ენმა არაერთი პირადი და საქმიანი წერილი დაწერეს, რადგან იცოდნენ, რომ დიდი ხნის მანძილზე ამის საშუალება აღარ ექნებოდათ. პრინცესა რადბივილმა გამოსამშვიდობებელი ბარათი მიიღო. მასთან კონფიდენციალური საუბრების შემდეგ, ენი მასთან რომანის გაბმის დადებით და უარყოფით მხარეებს წონიდა.³⁴ თვალცრემლიანები დაშორდნენ ერთმანეთს; *მოგზაურობა გაუსაძლისი იქნებოდა, განშორებისას ადამიანს ხშირად რომ უწევდეს ასეთი ტკივილის განცდა.*³⁵

i. იგულისხმება ენ ლისტერი.

მოსკოვიდან კავკასიაში

მოსკოვი 1840 წლის 5 თებერვალს დატოვეს. გზის სწრაფად გასავლელად, მხოლოდ ორმოცდარვა საათში ერთხელ ჩერდებოდნენ ცხენების შესაცვლელად. ზუსტად ჩვენი სამყოფი თოვლი დევს, გზას რომ ვუყურებ, ჩემი მხრიდან დახეთქილი მიწა მოჩანს. ასე გაგრძელდა ასტრახანამდე, რადგან ზომიერი ამინდი, რომელსაც საკმაოდ დიდი თოვლი მოჰყვა, მკაცრმა ყინვამ შეცვალა. მიუხედავად -18 გრადუსისა, დღისით ენი თავის მხარეს სარკმელს ღიას ტოვებდა – რადგან სხვა შემთხვევაში სარკმელი იორთქლებოდა და ხედს ვერ ხედავდა. როდესაც ცხენები ნელი ნაბიჯით სიარულზე გადავიდნენ, ენმა კარიც კი გამოაღო. მთელი ოთხი დღისა და 280 მილის გავლის შემდეგ, დღის პირველ საათზე ჩავიდნენ (1932 წლიდან 1992 წლამდე გორკის სახელით ცნობილ) ნიჟნი ნოვგოროდში, სადაც პატარა სასტუმროში პირველად დაიძინეს ჩვეულ თეთრეულსა და საღამურებში.

მთის თხემის გასწვრივ მდებარე ნიჟნი მშვენიერი და თვალწარმტაცია; დასახლება თითქოს ტერასებად შეფენილა მთის კალთებზე მდინარე ოკამდე, რომელიც ვოლგაში ჩაედინება; *რა შესანიშნავია ამ ორი კეთილშობილი მდინარის შერთვა*. გრაფინია პანინას სარეკომენდაციო წერილის წყალობით, გენერალ-გუბერნატორმა სადილზე დაპატიჟა და გადასცა ღია ეტლი, რომლითაც ენმა და ანამ დაათვალიერეს ქალაქი, თავისი ცნობილი ბაზრობით, *2635 ქვის და, როგორც მოგვიანებით გენერალ-გუბერნატორთან აღნიშნეს, 2600 ხის მაღაზიით*, სადაც ბაფხულში ერთი თვის მანძილზე იყიდება საქონელი მსოფლიოს ყველა კუთხიდან, ნედლეულიდან დაწყებული, ფუფუნების საგნებით დამთავრებული; *„დვორის“ სიგრძე სულ რაღაც ერთი ინგლისური მილია და ადამიანი, ვინც გზიდან გადახვევის გარეშე ყველა მაღაზიაში შეივლის, მოგზაურობის ბოლოს 40 ინგლისურ მილს დაფარავს! პატარა მაღაზიებით სავსე საოცარი ქალაქი!*

ნიჟნიდან ისინი კვლავ გაყინული ვოლგის ნაპირებს გაუყვნენ და ამ მიმართულებას მიჰყვებოდნენ ლამის კასპიის ზღვის შესართავამდე. ჩავუარეთ არაერთ დიდ ტყიან კუნძულს და რამდენიმე გაყინულ, პატარა პორტში მდგარი გემების მახლობლადაც გავიარეთ. 1840 წელს ვოლგას ჯერ კიდევ არ აკონტროლებდნენ. მარჯვენა სანაპიროს გასწვრივ დაბალი ბორცვები შემოჯარულიყო. ვოლგის მარცხენა სანაპიროს, რომელიც მდელის სანაპიროდ იყო ცნობილი, 1930-იანების დასაწყისიდან მოყოლებული, დაახლოებით ორასი წყალსაცავის აშენებამდე, ბევრგან არ ჰქონდა მკაფიოდ გამოკვეთილი კალაპოტი, და ზოგჯერ გაბაფხულზე, ყინულის გადნობისას, თორმეტი მილის მანძილზე იტბორებოდა. ენი ყოველთვის არ იყო დარწმუნებული, ყინულზე მიდიოდნენ, თუ გაყინულ მიწაზე. სანამ გზაში ვართ, წერა შეუძლებელია, მუდმივი ჯაყჯაყისა და შიგადაშიგ ძლიერი ნჯღრევის გამო. სადგურზე საჭიროზე მეტი ვერ დავწერე, ისე ციოდა, თითები ამტკივდა. ენ-

მა ტემპერატურა შეამოწმა, „კიბიტკის“ კარში 3 საათსა და 17 წუთზე რეომიურის სკალით -14° (-17.5°C) გრადუსი იყო.² ერთი დღის შემდეგ, როცა ტემპერატურა -37.5°C გრადუსამდე დაეცა, ენმა გათოშილი ხელით ეტლის სამი სარკმლიდან ერთ-ერთი ჩატეხა.

მდინარეზე მოგზაურობას თან თავისი საფრთხეც ახლდა. ერთხელ, გაჩერებისას, ჩაძინებულს დაახლოებით 5 საათზე გამეღვიძა. სარკმლიდან თავი გავყავი, რომ გამერკვია, სადგურში ვიყავით თუ არა – არავინ მიბასუხა, გარეთ მხოლოდ თოვლიანი ვაკე იყო, *შენობა არ ჩანდა. მაგრამ მალე ცხენების წყალში ჩაძირვის, კაცების შეძახილებისა და ყინულის მტვრევის ხმაზე მივხვდი, რომ ჩვენი „სადგური“ ვოლგის ჩატეხილ ყინულზე იყო! საბედნიეროდ, ანა ვერ მიხვდა, რომ საფრთხე გვემუქრებოდა. მსახურების „კიბიტკამ“ (ყოველთვის ჩვენსას რომ მოჰყვებოდა უკან) ცუდ ადგილს თავი აარიდა და ჩვენ წინ, ოცი-ოცდაათი იარდით მარჯვნივ, მყარ ყინულზე გაჩერდა. საბედნიეროდ, საკმაოდ ახლოს ვიყავით მარჯვენა ნაპირთან და ღრმა წყალში არ ჩავიძირეთ. ჩვენი ერთ-ერთი ცხენი თითქმის მთლიანად დაფარა წყალმა – მგონი, ფეხები ფსკერზე ჰქონდა დაბჯენილი. კიდევ კარგი, ყინულმა, რომელზეც ეტლი იყო გაჩერებული, გაუძლო სიმძიმეს და წყალი შიგნით არ შევიდა. გროსი მოგვიახლოვდა და გვიჩიოდა, ეტლიდან არ გადმოვსულიყავით, რადგან მუხლამდე წყალში იდგა. მსახურების ცხენების დახმარებით დაახლოებით ათ წუთში მყარ ყინულზე აღმოვჩნდით და შეფერხებების გარეშე გავაგრძელეთ გზა.³*

15 თებერვალს, მოსკოვის დატოვებიდან ათი დღის შემდეგ, ყაზანში ჩავიდნენ. როგორც ახლა, მაშინაც ქალაქის მოსახლეობის უმეტესობა თათრები იყვნენ; შავ-გვრემანები, პატარა, შავი თვალებით, სახის გამოკვეთილი ნაკვთებით, საკმაოდ განსხვავდებიან რუსებისაგან.⁴ აქაც მაღალმა საზოგადოებამ იზრუნა ორ ინგლისელ ქალბატონზე; სადილზე დაპატიჟეს, თეატრში წაიყვანეს და უნივერსიტეტი დაათვალიერებინეს. აღმოსავლეთმცოდნე ალექსანდრე კაზიმის ძე კაზემბეკმა, რომელიც ოთხი წლის შემდეგ ახალგაზრდა ლევ ტოლსტოის მასწავლებელი გახდა, ენისა და ანასთვის განსაკუთრებული მოწვევა მოიპოვა. მათ ჯერ მეჩეთი მოინახულეს; შემდეგ თათარი თაფლის ვაჭრის, არსაიფის სახლს ვესტუმრეთ. ის აქ ყველაზე მდიდარი არ არის, მაგრამ ძალიან კარგი, მეტად პატივსაცემი და საკმაოდ შეძლებული კაცია – ოთხი ცოლი ჰყავს. მხოლოდ მისი ერთი ვაჟი ვნახე, სასიამოვნო გარეგნობის 7 ან 8 წლის ბიჭი. სამი მაგიდა ძლივს უძლებდა სხვადასხვა სახის საკონდიტრო ნაწარმისა და ტკბილეულის სიმძიმეს, შემდეგ ამას მოჰყვა ჩვეული თათრული ვახშამი. ბრინჯის ფლავი ხორცის წვრილ-წვრილი ნატრებით, შემწვარი ცხვრის ხორცი, დაჭრილი შემწვარი ინდაური (თუმცა თათრები არასდროს არაფერს ჭრიან, ხელით ჭამენ), ცივი თევზი და ა.შ. შემდეგ ქალბატონებს ჰარამხანა დაათვალიერებინეს – ოთხი ცოლი, ქალიშვილი, რამდენიმე დისწული

[თუ ძმისწული] და 2 ან 3 მოახლე, მთლიანობაში დაახლოებით 12 ქალი, მდიდრულად გამოწყობილები მარგალიტით, ფირუზითა და ბრილიანტებით შემკულ ფარჩის სამოსელში. ყველაზე ახალგაზრდა ცოლი საკმაოდ ლამაზი იყო, წითლად შეპუდრული ლოყებითა და ჩაშავებული კბილებით. თავიდან ყველა ქალს გაქცევა უნდოდა, მაგრამ მალევე დაამშვიდეს. საცოდავი არსებები! რამდენი ადამიანია ნამდვილი ცხოველი! სულით ავადმყოფთა თავშესაფრის გარდა, არასდროს მინახავს ისეთი დამთრგუნველი, ნაღვლიანი და შეურაცხმყოფელი სანახაობა, როგორიც ამ ჰარამხანაში ვნახე. ისინი არ დაიშვებიან საზოგადოებაში და არც შეუძლიათ ამის მოთხოვნა – რა საშინელ დეგრადაციას განიცდის კაცობრიობის ნახევარი!⁵

მათი შემდეგი მთავარი გაჩერება იყო სარატოვში, თითქმის 430 მილის დაშორებაზე. საფოსტო სადგურებზე კარგი ცხენების შოვნა უფრო და უფრო გაჭირდა და მათი საცხოვრებელი პირობებიც გაუარესდა. ფანჯრები ხარის ნაწლაგებისგან იყო გაკეთებული და საწოლები – როგორც მათ გრაფი პანინი აფრთხილებდა – საცხე იყო ბალღინჯოებითა და რწყილებით. მაგრამ არც ეტლში ყოფნა იყო უფრო კომფორტული. გატეხილი სარკმლის შეცვლის რამდენიმე მცდელობა ჩაიშალა. ცივი ქარი ქრის, დღეს ყველაზე უფრო მეტად იგრძნობა ზამთარი. სანამ ჩვენმა მეგზურმა ხალიჩა, რომელზეც თვითონ იჯდა, არ ააფარა (ჯერ კიდევ შეუმინა) წინა სარკმელს, გვათოვდა – მაგრამ ეს ციდან წამოსული თოვლი კი არ იყო, არამედ გზაზე დამდგარი თოვლის კორიანტელი, რომელიც ეტლში აღწევდა; სამხრეთ-დასავლეთის ძლერმა ქარმა შემალღებულ ვაკეს გადაუქროლა და ქარბუქი გამოიწვია. ეკიპაჟისა და ცხენების მიერ დაყენებული თოვლის კორიანტელის გამო გარემო ისე იყო დაბინდული, 20 იარდის მანძილზეც კი ვერაფერს ვხედავდით. სარატოვის საგუშაგოს 1840 წლის 28 თებერვალს, 1 საათსა და 11 წუთზე, მიაღწიეს. სიცივეში ექვსდღიანი მოგზაურობის მიუხედავად, ქალებს სულაც არ სურდათ კოხტა, პატარა სასტუმროში გამთბარიყვნენ. ერთი სული გვქონდა, იქაურობა დაგვეთვალიერებინა; მოგზაურები პირდაპირ ქალაქში სასაიროდ გაემართნენ. სავატრო ქალაქის სიცოცხლით საცხე ბაზრობამ ისე გაგვართო, რომ ანაც კი აღარ უჩიოდა სიცივესა და დაღლილობას.⁶

ვოლგაზე შემდეგ გაჩერებას, სარეპტას, დაახლოებით 250 მილის დაშორებაზე, ორმოცდარვა საათში მიაღწიეს. იქ გადაეყარნენ ყალმუხებს, ტიბეტური ბუდიზმის მიმდევარ მომთაბარე მონღოლებს. ანა და ენი ერთ ოჯახს იურთაში ეწვივნენ. იატაკი მიწისა იყო, შუაში პატარა ცეცხლი ენთო, კვამლი გადიოდა პატარა წრიული ღრიჭოდან, რომლის დიამეტრიც ალბათ ორი ფუტი იქნებოდა. [...] იქ მყოფ ადამიანებს, მათ შორის ქალებსაც, ეცვათ ბინძური „შუბები“ [მატყლის ხიფთანები], ამ უკანასკნელთ მხოლოდ ოქროს საყურეებითა და გრძელი, შავი, ორ ნაწნავად გაყოფილი, წელამდე თმით თუ გამოარჩევდი [...] ხალხის სახეები ნახატებზე ნანახი

მონღოლების მსგავსია – პატარა, მუქი, ჩაცვნილი თვალები, საკმოდ მაღალი ღაწვები და წაწვეტებული ნიკაპი, მოყავისფრო სახის კანი და კარგი, თეთრი კბილები. ადგილობრივები, მიუხედავად სიბინძურისა, იმაზე ნაკლებ მახინჯები აღმოჩნდნენ, ვიდრე ველოდი. ამიტომაც ჩვენს მეგზურს ვთხოვე, ერთ-ერთი ქალისთვის ეთქვა, რომ ის მომხიბვლელი იყო – მანაც კმაყოფილების ნიშნად გამიღიმა.⁷

ადამიანები, რომელთაც ენი ასე უდარდელად, გულდასმით ათვალიერებდა, არანაკლები ცნობისმოყვარეობით აკვირდებოდნენ მოგზაურებს. ინგლისელი ქალბატონები რაც უფრო უცნობ გარემოცვაში აღმოჩნდებოდნენ, მით უფრო მეტად გამოირჩეოდნენ ადგილობრივი მოსახლეობისაგან. ხალხი ისე მოდის ჩვენ სანახავად, თითქოს რაღაც უცნაური ცხოველები ვიყოთ, რომელთა მსგავსიც ჯერ არ უნახავთ. მათ ფინელების მსგავსი ადგილობრივებიც ნახეს, უფრო ფართო სახეებითა და უფრო სულელური გამომეტყველებით. რამდენიმე წუთში ოცზე მეტი კაცი და ბიჭი და იმდენივე ქალი და გოგო, ბრბო, იკრიბებოდა ჩვენ გარშემო; ყველა ცდილობდა რამენაირად თვალი მოეკრა ჩვენთვის.⁸ ზოგიერთმა ყალმუხმა ისე მოაბეზრეს თავი, რომ ენმა და ანამ თავიანთი ოთახის კარს მაგიდა და ჩემოდანი მიადგეს; ფანჯარასთან ორი სკამით, რომლებზეც ტანსაცმელი იყო დახვავებული, შირმა გააკეთეს. მაგრამ მეორე დილას, ჩაცმის დაწყებისთანავე, ყალმუხებს ცნობისმოყვარეობამ სძლიათ და ნაზად შემოაღეს ჩვენი დასაკეცი კარები და იქიდან გვითვალთვალებდნენ, ისევე როგორც ფანჯრებიდან, სანამ 8:55 საათზე სასაუბმოდ არ დავსხედით. სანამ იქ ვიყავით, მთელი იმ დროის განმავლობაში, ბავშვები და ზრდასრულები მუდმივად კუდში დაგვდევენ.⁹

პროფესორ კამემბეკის სარეკომენდაციო წერილის წყალობით, ყალმუხის მონარქმა – პრინცმა სერებჯაბმა,¹ ორი ქალი თავის ზამთრის რეზიდენციაში, ტიუმენში მიიღო. ის იყო მეტად სასიამოვნო იერის მქონე, სანდომიანი, კარგი გარეგნობის, ჩასკვნილი ჯენტლმენი, ბუნებრივი და სასიამოვნო მანერებით. ნაკვთები ზომიერად მონღოლური ჰქონდა, განსხვავებით ქალებისაგან, რომლებიც აშკარად მონღოლური რასისთვის დამახასიათებელი ნიშნებით გამოირჩეოდნენ. ერთ-ერთი მათგანი განთქმული ყალმუხელი ლამაზმანი იყო. ისინი მიიღეს ევროპული სტილის ავეჯით გაწყობილ მისაღებ დარბაზში, რომელიც მეფისა და დედოფლის პორტრეტებით იყო შემკული. გიორგი მათ რუსულიდან უთარგმნიდა. პრინცმა ისაუბრა ყალმუხებზე და თავის ოჯახზე. ჩინგიზ-ხანის ჩამომავლობა აშკარად ეამაყებოდა. მისი ერთადერთი ვალდებულება მეფის სუვერენიტეტის აღიარება და ომის დროს მეფის სამხედრო სამსახურში ყოფნა იყო. პრინცი სერებჯაბი ლაიფ-

i. სერებჯაბ ტიუმენი (1774-1858) – ყალმუხი თავადი, ხოშეუტოვსკის ულუსის ნოინი, ხოშეუტოვსკის ხურულის (ბუდისტური ტაძრის) დამფუძნებელი, ყალმუხთა პოლკის მეთაური, პოლკოვნიკი (1816) და 1812 წლის სამამულო ომის გმირი.

ციგის ალყისას ყალმუხთა პოლკს ხელმძღვანელობდა და მეფე ალექსანდრეს-თან ერთად პარიზში იყო ნამყოფი. მისი ერთ-ერთი მზარეულიც იქ იყო ნასწავ-ლი და ენსა და ანას ისეთი ნადიმი გაუმართა, ფრანგული ღვინოც რომ არ აკლდა, როგორც *chez un prince Européen*¹. ბოლოს, დალიეს: ორი ფინჯანი შესანიშნავი ჩაი, რომელიც საუკეთესო იყო მათ შორის, რაც კი რუსეთში გამოსინჯავს.

ენმა და ანამ ტიუმენში დაათვალიერეს პრინც სერებჯაბის მიერ აშენებული სკოლა და ტაძარი. სანდომიანი, ლამაზი რუსი ქალი ენიზე ზრუნავდა. ქალბატონ-მა მკლავი მკლავში გამიყარა და მარხილში ჩემ გვერდზე დაჯდა. ხელი შემომხვია, რომ მოულოდნელი შეჯანჯღარებისგან დავეცავი, *მე* უხელთათმანო ხელებზე მო-სასხამი გადავაფარე და ძალიან კარგ მეგობრებად ვიქეციო ასე, ხმის გაუცემ-ლად. სოფელი მხოლოდ კარვებისა და ქოხებისგან შედგებოდა. ისინი გარუსებას ცდილობენ – წერს ენი. ბუდისტური ტაძარი, რომელიც ენს რუსეთში ერთადერთი ეგონა, ოთხ კონუსისებურ სართულზე დადგმული კვადრატული კოშკით, აშკარად ჩინურ სტილში იყო გადაწყვეტილი. [...] როცა კიბეებს მივაღებოთ, დაიწყო მტექარე მუსიკა, დოლი და საყვირი ახმაურდა. ორი ეგზოტიკური სტუმრისთვის, ოცდაერ-თმა ყვითელი ფერის სამოსში გამოწყობილმა თავგადაპარსულმა ბერმა შეასრუ-ლა ცერემონია, თვრამეტი მუსიკოსის თანხლებით, რომელთაც ემოსათ გრძელი, აბრეშუმის ძაფით მოქარგული, ყვავილოვანი ორნამენტებით შემკული, საუცხოო აბრეშუმის მანტიები, რომლებსაც დიდი ხნის ხმარების კვალი ემჩნეოდა, შავი აბ-რეშუმის თავსაბურავი კი ზურგამდე სცემდათ. განშორებისას პრინცმა სერებჯაბ-მა საჩუქრად მონღოლური გრამატიკის წიგნი გადასცა. ენს უკვირდა, რომ ასეთი ადამიანი მაინც წარმართი იყო – პატივს სცემდა ბუდას, როგორც წინასწარმეტ-ყველს, და ტიბეტის დიდ ლამას, როგორც ღმერთის მიწიერ ინკარნაციას!¹⁰

ქვემო ვოლგაზე არა მხოლოდ ყალმუხები, არამედ გერმანელებიც ბინადრობ-დნენ. ოთხმოცი წლის წინათ ეკატერინე დიდმა მოიწვია ისინი ნაყოფიერი, მაგრამ მეტწილად დაუსახლებელი ტერიტორიის ასათვისებლად. ენი თავს თითქმის სახ-ლში გრძნობდა და სიამოვნებდა მოწესრიგებული და სუფთა გერმანული სოფლე-ბის თვალიერება. კოხტა, პატარა, ქვითა და ხით მკვიდრად ნაშენ, მყუდრო ქალაქ სარეპტაში, მსახურმა გროსმა, რომელიც თავადაც გერმანელი იყო, თანამემამუ-ლეს სთხოვა, მათთვის იქაურობა დაეთვალიერებინა. აქაური ხალხი მდიდარი არ არის, მაგრამ ძალიან კარგად ცხოვრობს. მათ არ უწევთ გადასახადების გადახდა, ყველაფრისგან თავისუფლები არიან. მესაათეს აქ მშვენიერი შემოსავალი აქვს – ასევე, მექვამებს, მცხოვრებს, და ყველა სხვას. უამრავი სამუშაოა. ქალებმა ად-გილობრივი ფეიქრებისგან ლამის ჩაჩები შეიძინეს. მათი ფუნდუკის მეპატრონემ

i. chez un prince Européen (ფრანგ.) – ევროპელ პრინცთან (მთარგმნ. შენ.).

კი საყინულე ოთახის მუშაობის ჯგვიანური სისტემა აუხსნა მოგზაურებს, რომელთაც, რუსი გლეხების გერმანელებთან შედარებისას, რუსების განუვითარებლობა გააკრიტიკეს. ენი ნანობდა, რომ მისი გერმანული ჯერჯერობით ორიოდ სიტყვის თქმასა და ორი იმდენის გაგებას არ სცდებოდა. მოგზაურებმა გერმანული კერძებითაც ისიამოვნეს; გემრიელი დარიჩინიანი წვნიანი ნაზი ქათმის ხორცი, შუაზე გაჭრილი და გემრიელად შეკმაზული მტრედები – ანასთვის ნანადირევის ტოლფასი – და ფრინველის ხორცთან ერთად შებრაწული კარტოფილი. ლამაზად მორთული, ჯანსაღი სალათი, ძმრითა და შაქრით შეკმაზული, ერთმანეთში შერეული, ძალიან წვრილად დაჭრილი წითელი და თეთრი კომბოსტო – კარგი იდეაა სახლში ლამაზი სალათის გასაკეთებლად. და შესანიშნავი მსუბუქი კერძი – შებრაწული დარიჩინიანი ბრინჯი. ასევე, დაკონსერვებული ქლიავი და ვაშლი მისატანებლად. სამი მტრედი შევუკვეთეთ – ორი მივირთვით და ერთი ჩვენს ქვაბში შევინახეთ. ერთადერთი, რამაც მათზე შთაბეჭდილება ვერ მოახდინა, იყო გერმანული ფანჯრები – გუშინ ღამით ძალიან ციოდა – რადგან კარგი რუსული ორმაგი ფანჯრების ნაცვლად, ამ ერთმაგში ისეთი ქარი უბერავდა, წისქვილს ამუშავებდა!¹¹

ერთი თვის მანძილზე ყინულოვან ქარში ეტლის ღია სარკმელთან ჯდომის გამო ენი გაცივდა და კონიუნქტივითი დაემართა. მას შემდეგ, რაც სარეპტაში, გერმანელების სოფელში, ერთი დღე საწოლში გაატარა, ენი მოეშადა იმისთვის, რომ ვოლგაზე მათი მოგზაურობის ბოლო ეტაპზე, კიდევ ხუთი დღე გაეძლო ცივი ქარისთვის. ძირითადად ნელ სვლაზე ვართ გადასული, ბარდნის [...] ძლივს მივიწვევთ წინ. იქ, სადაც ქარმა თოვლი მიწიდან გადახვეტა, აღმოვაჩინეთ დიდი, მოტიტვლებული მონაკვეთი, რომელიც წითელი ქვიშით იყო დაფარული. მათ სტეპს მიაღწიეს. ერთადერთი გასართობი კასპიის ზღვიდან მომავალი საქონლით დატვირთული მარხილები იყო. ეს დიდი თევზი, რომელიც მთელ მარხილს ავსებს, უკნიდან გამოშვერილი კუდით, სვიაა.¹² 1840 წლის 12 მარტს, საღამოს, ისინი ასტრახანში ჩავიდნენ.

იქ ერთი ფუნდუკიც კი არ იყო. ენმა მიმართა პოლიციის უფროსს, რომელმაც ღამის გასათევად საკუთარ სახლში შეგვიპატიჟა. ცოტაოდენი ფრანგული იცოდა – მადლიერი ვარ!¹³ მეორე დღეს, გიორგი ჩაიკინმა ისინი ბელგიელ მკერავთან დააბინავა, რომელიც ნაპოლეონის რუსულ ლაშქრობაში მონაწილეობდა, ტყვედ ჩავარდა და ბოლოს ვოლგელ გერმანელ ქალზე დაქორწინდა. მიუხედავად იმისა, რომ ქალაქი და სამეზობლო სილამაზით არ გამოირჩეოდა,¹⁴ დაქანცულები იქ ათი დღით გაჩერდნენ, რადგან ზუსტად 1500 კილომეტრი დაფარეს ხუთ, სასტიკად ცივ კვირაში. ა. უ. დაღლილია და უხასიათოდაა.¹⁵ ენს, რომელიც ჯერ კიდევ საკმაოდ ცუდად გრძნობდა თავს, საწოლში მოუწია წოლა. კითხვაზე, თუ რა შთაბეჭდილება დატოვა მასზე რუსეთში მოგზაურობამ, ის პასუხობს:

ყველაფერი მაინტერესებს – ყველგან კარგია – მე ნაკლს ვერ ვპოულობ. კარგად მძინავს იატაკზე და ჯერჯერობით არც იატაკის მდგომარეობა მაღელვებს, გინდ ასეთი იყოს, და გინდ ისეთი. ანას ყველაფერი ბინძური ეჩვენება და აქაურობას ინგლისის ფუნდუკებს ადარებს. უსამართლობაა. ამას არც რუსებს ვაკადრებ და არც საკუთარ თავს. თუ გავითვალისწინებთ რუსეთის შემადგენლობაში შემავალი სხვადასხვა ხალხის ცივილიზაციის რეალურ მდგომარეობას და იმას, თუ რამდენად არ იცნობენ საკუთარ მხარეს მაღალი წრის წარმომადგენლები და რამდენად იშვიათად მოგზაურობენ საკუთარ ქვეყანაში, იმ კომფორტისა და პირობების არსებობა უფრო მიკვირს, რაც ჩვენ გვაქვს, ვიდრე ის, რომ რაღაც გვაკლია.¹⁶ მათი მსახური, გროსი, ენს არ ეთანხმებოდა. მან უკან დაბრუნება მოინდომა და ენი და ანა იძულებულები იყვნენ, გაეშვათ.

საბოლოოდ, ეტლი შეკეთდა და ბორბლებზე დადგა. გიორგი და დომნა ჩაიკინებმა ახალი „კიბიტკა“ მიიღეს. მარაგი შეივსეს და თბილისში ჩასასვლელი საშვების თანხა გადაიხადეს – 125 რუბლი 550 მილისთვის. მეფე კარგ ფულს აკეთებდა სამგზავრო საშვების გაცემით: ექვს ადამიანს შეეძლო ღამეში რვა რუბლად პატარა სასტუმროში გაჩერებულიყო, მაგრამ სამგზავრო ნებართვა საცხოვრებლის ღირებულებას არ ფარავდა. ამის გადახდა ცალკე უწევდათ, რასაც ცხენებისა და მეეტლეების ხარჯიც ემატებოდა. 22 მარტს გაუდგნენ გზას. სულ ქვიშიანი ტალახი და სტეპია. ასტრახანიდან წამოსვლის შემდეგ, დავტოვეთ ვოლგა და ამის შემდეგ აღარც გვინახავს.¹⁷ მათ თოთხმეტი დღე იარეს მოტიტვლებულ ნიადაგზე, ძლიერ ქართან ბრძოლაში და ახალ, უარეს საფოსტო სადგურს წააწყდნენ, სადაც სამოვარიც კი არ იყო. კიდევ კარგი, ჩვენ სპირტქურა გვქონდა, და ძალიან კომფორტულად დავლიეთ ინგლისური ჩაი. აქ ნალები არ იშოვება, წყალიც არ არის ბევრი – არაფერია ოთახის გარდა.¹⁸ ყიზლარიდან, ბინძური, ტალახიანი ადგილიდან, სადაც დაბალი, ღარიბული, შეუღებავი სახლები¹⁹ იყო, შემდეგი 370 მილის მანძილზე, დიდი კავკასიონის მთავარ ქედამდე, მდინარე თერგის დინებას მოჰყვებოდნენ. სამხედროების გარდა, რუსები აღარ უნახავთ. სულ მთლად ატალახებულ მოზდოკში პირველი შეიარაღებული ბადრაგი აიყვანეს. ჩვენი მეტად მოხერხებული ორი კაზაკი ერთ სანახაობად ღირს. ქუდებს ან ჯოხს ძირს აგდებენ და გალოპით წამოსულები, ხელში იტაცებენ. ასე ერთობიან მანამ, სანამ მათი საცოდავი ცხენები სულმთლად არ გაიოფლებიან. როდესაც შემდეგ სადგურზე, თავდაპირველად, უარი უთხრეს ბადრაგზე, რადგან საბუთი აკლდათ, ენმა გადატენა ერთ-ერთი პისტოლეტი და თითოეულმა ჩვენგანმა 5 ცხენი წამოიყვანა თან.²⁰

ეკატერინოგრადსკაიაში მოზდოკზე უარესი ტალახი იყო, ბადრაგი არ დახვდათ; სამხრეთიდან ჩერქეზების შემოტევის გამო, ყველა სამხედრო ძალა დაკავებული იყო, ამიტომაც ადგილობრივმა მეთაურმა ენს და ანას მოგზაურობის გაგრძელება უბრალოდ აუკრძალა. ამან ენს მის ორმოცდამეცხრე დაბადების დღეზე დასვენე-

ბის საშუალება მისცა. ის და ანა ეტლით გაემართნენ ქალაქის კარიბჭისკენ და პირველად დატკბნენ დიდი კავკასიონის ხედით. რა მშვენიერია 2:10 საათზე! თოვლით დაფარული დიდებული გრანიტისქანებიანი მთაგრეხილი. კლდოვანი, წაწვეტებული, ღარტაფებით დასერილი.²¹

ენს ერთი სული ჰქონდა, იქამდე მიეღწია, მაგრამ მისი პარტნიორი ასეთი ენთუზიაზმით არ იყო სავსე. საფოსტო მეგზურს არ სურდა მათთან ერთად წასვლა, თავი მოიავადმყოფა და პასპორტი რომ მიმეცა, ეკატერინოგრადსკაიაში დაგვტოვებდა. მაგრამ ენს მთების გადასალახად ნებისმიერი კაცი სჭირდებოდა და მეგზურიც უნდა წაჰყოლოდათ. გიორგის, მიუხედავად იმისა, რომ ეშინოდა, სიტყვაც არ დაუძრავს და არც კი უფიქრია ჩვენი მიტოვება; და, თუ მის გარშემო შეკრებილი მშობრების კომპანიას გავითვალისწინებთ, ეს ნამდვილად დიდად დასაფასებელი იყო. დომნამ, *პატარა femme de chambre*ⁱ, თანდათანობით თავი ხელში აიყვანა.²² ანას კი არავინ არაფერს დაეკითხა. ენმა შეკრიბა ოთხი ადგილობრივი შეიარაღებული ცხენოსნისგან შემდგარი კერძო ბადრაგი და გაუდგნენ გზას.

რამდენიმე კილომეტრის გავლის შემდეგ, ჩაუარეს საკარანტინო სადგურს მათთვის, ვინც საპირისპირო მიმართულებით მოგზაურობდა. აქ მათ, ვისაც არ აქვს სამხრეთის მხარის გუბერნატორის ჯანმრთელობის ცნობა, 14 დღე უნდა გაატარონ. ალექსანდროვსკაიაში ინგლისელ ქალებს შეხვდათ რუსი ოფიცერი, რომელიც მარტო მოგზაურობდა, ტიფლისში მიდიოდა და სიამოვნებით დათანხმდა ჩვენს მწკრივებში მგზავრობას! მეორე დილით მათ ოთხი კაზაკისგან შემდგარი ბადრაგი აიყვანეს. გზად მეეტლემ უცებ წამოიძახა – ჩერქეზები! და ეტლი უეცრად გააჩერა. ენმა და ანამ სარკმლიდან მხედრების მრავალრიცხოვანი რაზმი შენიშნეს. ჩვენი კაზაკები საბრძოლველად მოემზადნენ. მე ეტლიდან გადმოვედი და ჩემი ერთ-ერთი დატენილი პისტოლეტი შევმართე. ჩერქეზებმა (მე დაახლოებით 20 დავითვალე), რომლებიც აშკარად კარგ ცხენებზე იყვნენ ამხედრებულნი, წრე დაგვარტყეს და ჩვენ უკან, მარჯვენა მხარეს, შემალელებულ ადგილას დამწკრივდნენ. დავასკვენი, რომ თავიანთ კავალერიას ჩვენზე თავდასხმისთვის ამზადებდნენ – როდესაც შეჩერდნენ, ერთი წუთით შევშფოთდი. მაგრამ მხედრები ყოყმანობდნენ. ნელი ნაბიჯით მივდიოდით, ხანდახან ჩორთით, ამაზე ჩქარა სიარული არ შეგვეძლო. ეტლის ორივე კარი ღია გვექონდა. გონებაში ჩვენი ძალები გადავთვალე – 4 კაზაკი, 4 მეეტლე, რუსი ოფიცერი, მისი მსახური და მეეტლეები, რომლებიც ჩვენთან ერთად წამოვიდნენ, „ტელიაგა“ ერთი თუ ორი კაცის თანხლებით, ჩვენი მეგზური, გიორგი და ჩვენ. მეგონა, რომ სათანადო ბრძოლას გავუმართავდით. სულაც არ შემშინებია, არც ანას. რამდენიმე დაძაბული წუთის

i. *Femme de chambre* (ფრანგ.) – მოახლე (მთარგმნ. შენ.).

შემდეგ, თავიანთ გზას გაუდგნენ.²³ მოგზაურთა ჯგუფი ვლადიკავკაზში ერთი დღის შემდეგ, 6 აპრილს ჩავიდა.

ვლადიკავკაზში, ამჟამად ჩრდილოეთ ოსეთის დედაქალაქი, რუსეთის მთავრობამ თავდაპირველად კავკასიელი ხალხებისგან თავდასაცავად დააარსა. ანტიკური დროიდან, აქედან საცალფეხო ბილიკი მიემართებოდა დიდი კავკასიონის გასწვრივ, რომელიც საბოლოოდ რუსეთის არმიამ გააფართოვა თავისი ლაშქრობებისათვის; ამის შემდეგ მას „საქართველოს სამხედრო გზას“ უწოდებენ. ენმა სამხედროებს სთხოვა, მათთვის საფოსტო სადგურების მდებარეობა მიეთითებინათ, რათა გზად გასაჩერებელი ადგილი, ცხენები და ბადრაგი ეშოვათ. მათ ასევე იშოვეს სამუხრუჭე ხუნდები „კიბიტკისთვის“ და ბანკნოტები, რომელთაც სამხრეთით ფასი აღარ ექნებოდა, ლითონის ფულზე, ვერცხლის რუბლებზე გადაცვალეს. თოვლის გამო მგზავრობა გადაიდო. ენმა დრო იხელთა დღიურის საწერად და აღნიშნა, რომ საერთოდ არ გახსენებია, ნაკიანი წელიწადი რომ იყო. იმის ნაცვლად, რომ 1840 წლის 29 თებერვლის შემდეგ ყველა თარიღი შეესწორებინა, მან მეორე „6 აპრილი“ ჩაამატა.

8 აპრილის ნისლიან დილას შეუდგნენ მთაზე დამქანცველ ასვლას; თითოეულ „კიბიტკაში“ ექვსი ცხენი იყო შებმული, ნაცვლად ჩვეული ორი ან სამი ცხენისა. შუადღისას მიაღწიეს ლარსს (1122 მ) და ცნობილ, რვა მილის მანძილზე გადაჭიმულ, დარიალის ხეობას. კლდეები ორივე მხარეს პარალელური კედლებივით აღმართულან²⁴ – წერდა ფრიად აღფრთოვანებული ალექსანდრე პუშკინი, რომელიც თერთმეტი წლის წინ იყო აქ. ენის აზრით, აქაურობა „ქალსივითა“, უაღრესად ველური და უდაბურია.²⁵ დღეს ხეობაში რუსული, თურქული და ქართული სატვირთო მანქანები დაქრიან შედარებით უკეთესად მოვლილ საქართველოს სამხედრო გზაზე. საღამოსთვის ჯგუფმა მიაღწია სტეფანწმინდას (1750 მ), სოფელს, რომელიც 5047 მეტრიანი ყაზბეგის²⁶ ძირში მდებარეობს; მთას, რომელზეც, ბერძნული მითოლოგიის თანახმად, კაცობრიობისთვის ცეცხლის ჩატანის გამო, პრომეთე იყო მიჯაჭვული. ამინდმა, ისევე, როგორც თავის დროზე პუშკინს, ენს საშუალება არ მისცა ცნობილი მწვერვალი დაენახა. გაშეშებული ვიდექი მანამ, სანამ ვერაფერს ვეღარ ვხედავდი, თვალები ყაზბეგისკენ მქონდა მიპრობილი. *მონასტერმა რამდენიმე წუთით გამიელვა თვალწინ, შემდეგ კი კვლავ ღრუბლებში ჩაიმაღლა.* დღეს ვერ იპოვიოთ ისეთ თანამედროვე ქართულ, ტურისტულ ბროშურას, სადაც არ შეგხვდებათ წმინდა სამების ეკლესიის ფოტო თოვლით დაფარული ყაზბეგის ვულკანური მთის ფონზე.

მეორე დღეს გზა ციცაბო და საშიში გახდა; *მეგზურს სურს, რომ ჩამოვეყვით-დეთ.[...] დაცულები არ ვართ იმისაგან, რომ უეცრად ვიწრო გზიდან მდინარეში არ გადავცვივდებით, [...] გაჭირვებით მივიწვევთ ზევით, ჰაერში პატარა, გაყინული თოვლის ფანტელები დაფრინავს. მეორე დღით, კობში (1981 მ),*

პატარა, ლამაზ, შეთეთრებულ ფუნდუკში²⁷ გატარებული ღამის შემდეგ, საქართველოს სამხედრო გზის ყველაზე მაღალი წერტილის, ჯვრის უღელტეხილის, გადასალახად, დამატებითი მარხილი და 17 კაცი ავიყვანეთ; რაც მეტად წინდახედული ნაბიჯი აღმოჩნდა, კიდევ დასახმარებლად 3 ცხენოსანი კაზაკიც დავიმატეთ. [...] ჩვენი ჯგუფი მეტად თვალწარმტაც სურათს წარმოადგენდა თოვლიანი მთების ფონზე. თოვლი იმდენად ღრმა იყო, რომ მაღე ენსა და ანას თავიანთი ბორბლებიანი „კიბიტკიდან“ მარხილში მოუწიათ გადაჯდომა. ძალიან ცივა, სახეში ცივი ქარი გვირტყამს. [...] 7:55 საათზე სიძნელეებს გადავეყარეთ – აღმართ-აღმართ მიმავალ ციცაბო, ვიწრო ფერდობებს, რომელთა დანახვაზეც თითოეულ „კიბიტკაში“ შებმული 5 ცხენი კინალამ ადგილზე გაშეშდა. 8:50 საათზე უფსკრულის პირას, მთის კალთაზე ვიწრო გზას მივუყვებით. ყველგან სქელ ფენებად დევს თოვლი. ცხრა საათზე ჯვრის უღელტეხილს (2379 მ) მიაღწიეს. 9:20 საათზე შევუდექით ციცაბო, ვიწრო დაღმართს, იქვე, მარჯვნივ კი, უზარმაზარი უფსკრულია. ეს გზის ყველაზე ცუდი ნაწილი იყო და აქ შეგვხვდნენ traineauxⁱ, დატვირთული ცხენები და ჩერქეზი გლეხები. [...] საშინელმა გზამ ისინი მიიყვანა გრძელ, ძალიან ციცაბო დაღმართთან, შიშის მომგვრელ, ფრიალო მაღლობზე, მდინარე არაგნასⁱⁱ თავზე. 2:35 საათზე ჩამოვქვეითდი და ეს მონაკვეთი ბოლომდე ფეხით გავიარე (ანა ტიროდა და ჩამოქვეითება არ სურდა). როგორც კი ლამაზ ხეობას მიაღწიეს, ნათელი გახდა, რომ გზის ყველაზე რთული ნაწილი უკან ჩამოიტოვეს. შუადღისას, 4:50 საათზე, ფასანაურში (1050 მ) მდებარე ფუნდუკს მიაღწიეს და თავიანთ უამრავ დამხმარეს დაემშვიდობნენ. მძიმე დღის მიუხედავად, ანა უოკერმა ჩანახატების გასაკეთებლად კარგი ადგილი აღმოაჩინა, ენი კი სასეირნოდ წავიდა; თეთრი, სწრაფი მდინარე, მთების დახვეწილი ფორმები – მშვენიერი პეიზაჟია.²⁸

ანანურის (712 მ) გავლით, ორი დღის შემდეგ, მათ მიაღწიეს მცხეთას, აზიის ერთ-ერთ უძველეს ქალაქს, თბილისის აშენებამდე საქართველოს უძველეს დედაქალაქს და დღემდე ქვეყნის სასულიერო ცენტრს. ამჟამად იუნესკოს მსოფლიო მემკვიდრეობის ძეგლების სიაში შეტანილმა ქალაქმა, იმედი გაუცრუა ენს, რომელმაც, ერთი შეხედვით, მხოლოდ ნანგრევები და მოუვლელი სოფელი დაინახა. თუმცა, ხელმეორედ დაკვირვების შემდეგ, მან ხალხში, მათ სამოსელსა და ადათ-წესებში აღმოაჩინა მათი წარსულის კვალი. აქ ყველაფერს შორეული ანტიკურობის სუნი დაჰკრავს! [...] სახლები, მიწაში ჩაფლული ღუმელები, საქონლის ტყავისგან დამზადებული ღვინის ჭურჭელი, რომლის ერთ-ერთი ფეხიდანაც ღვინო გადმოდის, ხის მერქნისაგან გამოთლილი ნავეები, ნამდვილად ისეთივეა,

i. Traineaux (ფრანგ.) – მარხილები (მთარგმნ. შენ.).

ii. არაგნა – ენ ლისტერი ამახინჯებს მდინარე არაგვის სახელს (მთარგმნ. შენ.).

როგორც ჰომეროსის დროს იყო.²⁹ ისინი იმავე საღამოს გაუდგნენ გზას თბილისისაკენ. 1840 წლის 12 აპრილი იდგა. მოსკოვიდან წამოსვლის შემდეგ, ორი თვისა და ერთი კვირის განმავლობაში მუდმივად გზაში იმყოფებოდნენ.

ცოტა ხნით აპირებდნენ გაჩერებას და ძალების აღდგენას აღმოსავლური სტილის ქალაქში, რომელშიც ორმოცდაათი ათასი კაცი ცხოვრობდა და მათ შორის უმეტესობა იყო სომეხი და არა ქართველი; ამასთანავე, ჩერქეზები და სპარსელები, პურისტები ვიტებერგიდან და რუსები – ძირითადად სამხედროები და სახელმწიფო მოხელეები. მათ ფუნდუკში ოთახები ცივი და ნესტიანი იყო; საძინებელ ოთახს ექვსი ფანჯარა ჰქონდა და ექვსი მხრიდან ცივი ქარი უბერავდა.³⁰ მზარეულის მიერ მაღაზიიდან ამოტანილი საკვები უკან დააბრუნეს. ანა უოკერმა სპირტურაზე იმპროვიზებული წვნიანი, კვერცხი და ბრინჯი დაამზადა. სიცივისა და წვიმის გამო პირველი კვირის განმავლობაში სახლიდან არ გასულან. ანა ფიზიკურად და ფსიქიკურად გამოფიტული იყო. ენი ისეთი დაღლილი იყო, დღიურის წერაც კი არ შეეძლო და მხოლოდ პრინცესა სოფია რადზივილს შეატყობინა თბილისში ჩასვლის ამბავი. ჩვენთვის აქ ყველაფერი ვარდისფერ ფერებშია, მაგრამ ვერაფერი დამავიწყებს შენთან გატარებულ უბედნიერეს საათებს. [...] მიიღე ჩემი პატარა გამოსამშვიდობებელი ბარათი? ყოველ შემთხვევაში, ნამდვილად ჭეშმარიტებას ლაღადებს. თან მაქვს მხოლოდ ერთი პატარა წერილი – წერილი წმინდა სოფიასგან. *Adieu!*³¹ ეს ტყუილი იყო, ისევე როგორც ყველაფერი დანარჩენი.

გრაფინია პანინას მიერ თავისი ბიძაშვილისთვის, რუსი გენერალ-გუბერნატორის მეუღლისთვის მიწერილი სარეკომენდაციო წერილის წყალობით, მათი პირობები გაუმჯობესდა. ქალბატონმა გოლოვინამ გულთან ახლოს მიიტანა ქალების ამბავი, მათ ოთახში მუშა ლუმელი დაადგმევინა, საჭმელს უგზავნიდა და თავისი ეტლით ქალაქი შემოატარა. რუსმა მმართველებმა კავკასიის ახლად დაპყრობილი ტერიტორიების, რომლებშიც, ასევე, აზერბაიჯანისა და სომხეთის დიდი ნაწილიც შედიოდა, დედაქალაქად თბილისი გამოაცხადეს. მტკვარზე გადასასვლელი ხიდის გვერდზე, ხალხმრავალი და ხმაურიანი ბაზარი მყისვე იქცა ჩვენს საყვარელ ადგილად.³² ისინი გოგირდის აბანოებით განთქმული უბნის – აბანოთუბნის, გავლით გადავიდნენ ულამაზეს ხეობაში, ძველი ნარიყალას ციხის ძირში, სადაც იმ დროს აშენებდნენ ბოტანიკურ ბაღს, რომელიც დღესაც არსებობს. 25 წუთის განმავლობაში ნელი ნაბიჯით მივიწევდით ზევით, შემდეგ კარი გაიღო და ჩვენ თვალწინ საოცარი პანორამა გადაიშალა! გრძელ, ვიწრო თხემზე, თუ კლდის შვერილზე, იდგა ძველი ციხე და სიმაგრეები, რომლებიც ჰყოფდნენ ქალაქს ბაღის ხეობისგან – დიდებულია! აღფრთოვანებისგან დადუმებული ვტკბებოდით – მდინარე, გერმანული კოლონიის წრიული მოედანი, ხიდთან მიყუჟული ქალაქი, თოვლით დაფარული ქედი და ყაზბეგი. რა მშვენიერია! როგორი ახალი, უცხო

და აზიურია ჩვენთვის.³³ მარიანასთვის მიწერილ წერილში ენმა პირველად შეაჯამა თავისი შთაბეჭდილებები, რაც კავკასიონის გადაკვეთის დროს მიიღო. ასევე შთაბეჭედავია პირენეებში საფრანგეთიდან ესპანეთში გადასვლა; მაგრამ აქ ევროპიდან აზიაში ხვდები. [...] ამან ყველა ჩემს მოლოდინს გადააჭარბა.

ქალბატონ გოლოვინას წყალობით, ენი და ანა თავიანთ სახლებში დაპატიჟეს რუსმა სამხედროებმა და ქართველმა არისტოკრატებმა. ჩვენ ყველგან ვხვდებით სასიამოვნო და გაპრიალებულ საზოგადოებას. აქაური გენერლის (ნამდვილი მეფისნაცვლის) მიერ გამართული მეჯლისი ლონდონის ან პარიზის მეჯლისების მსგავსია, ოღონდ, ამას ემატება ქართული სილამაზე და ქართული სამოსის მშვენიერი ნაბავი *dernières modes de Paris*.³⁴ ანასა და ენზე განსაკუთრებით დიდი შთაბეჭდილება მოახდინა ორმა დამ, საქართველოში დღემდე ლეგენდარულმა, ევროპულად აღზრდილმა ქართველმა ქალბატონებმა, *très comme il faut*,³⁵ ნინო ჭავჭავაძემ და მისმა დამ, პრინცესა ეკატერინე დადიანმა, *jeune, jolie, et très gracieuse*.³⁶ ეკატერინე დადიანმა ენი და ანა ზუგდიდში, თავის სასახლეში დაპატიჟა.

მაგრამ ენს სურდა თეირანსა და ბაღდადში წასვლა. ყველანი, ვისაც ხვდებოდნენ, ამ მოგზაურობას შეუძლებლად მიიჩნევდნენ. თავიანთი „კიბიტკით“ შესაძლოა თავრიზამდე ჩასულიყვნენ, მაგრამ მერე ჯორებზე უნდა გადამსხდარიყვნენ, რისთვისაც ქალბატონებს მამაკაცის ტანსაცმლის ჩაცმა მოუწევდათ. აუცილებელი იყო, სპარსი მსახურები და თარჯიმნები ეპოვათ. თეირანიდან ბაღდადში მხოლოდ ქარავნით თუ ჩავიდოდნენ, ხოლო უკან დასაბრუნებლად ერთი წელი მოუწევდათ მოცდა. ამ ამბებს ენი შოკში არ ჩაუვდია.³⁷ ფილის რამსდენი სიტუაციას შემდეგნაირად აჯამებს: ა.უ. *აშკარად განაწყენებულია – ე.ლ.-ს მოგზაურობის გეგმის მიმართ ეგოისტურ მიდგომაში ადანაშაულებს*. საბოლოოდ, ენს ფინანსური მიზეზების გამო უკან დახევა მოუწია, მით უმეტეს, რომ მათმა მოგზაურობამ ბიუჯეტს უკვე გადააჭარბა. ახლა სპარსეთი არ გამოვა.³⁸ ამიტომაც, ისინი მოსკოვში თავიანთ ბანკირს დაუკავშირდნენ, რათა ჰამბურგის საგანგებო ფონდიდან გამოეგზავნა ფული.

რადგან სპარსეთში ვერ წავიდნენ, ენს კასპიის ზღვის ნახვა მოუნდა. ჩვეულებრივი საფოსტო გზა ბაქომდე მიდიოდა და ენს გადაწყვეტილი ჰქონდა, იქამდე მაინც ჩასულიყო. ამან გამოიწვია უთანხმოება ა. უ.-სთან, რომელსაც არ სურდა ასე შორს წასვლა,³⁹ მაგრამ ენმა, როგორც ყოველთვის, თავისი გაიტანა. მხოლოდ დომნას დართეს ნება, დარჩენილიყო, რადგან ორსულად იყო. 13 მაისს, თბილის-

i. *Dernières modes de Paris* (ფრანგ.) – პარიზის უკანასკნელ მოდასთან (მთარგმნ. შენ.).

ii. *Très comme il faut* (ფრანგ.) – მშვენიერია (მთარგმნ. შენ.).

iii. *Jeune, jolie, et très gracieuse* (ფრანგ.) – ახალგაზრდა, ლამაზი და მეტად გრაციოზული (მთარგმნ. შენ.).

ში ჩასვლიდან ერთი თვის თავზე, მცირე ბარგით ამერბაიჯანისკენ გაემშურნენ. მათ თან გაჰყვა გიორგი ჩიკინი, ასევე ოთხი ამხედრებული კაზაკი და დაცვის პოლიციელი. გარკვეული ხნის შემდეგ, მოუწიათ ბაღრაგისთვის ოთხი თათრის დამატება, რადგან გზა სადავო ტერიტორიებზე გადიოდა.

მოგზაურებს ხუთი დღე დასჭირდათ ბაქოში ჩასასვლელად. იქ, ისევე, როგორც ჰანოვერში, არც ისე ბევრი ხიდი იყო და ამიტომ თოვლის დნობის შედეგად აღიდებული მდინარეების გადასალახად ბორანს იყენებდნენ. გზად, მიწურებს ესტუმრნენ. ხუთმა ქალმა, რომელთა სამოსი ისეა შესხნილი, რომ მოშვებული, დაკიდებული მკერდი და მუცლის დიდი ნაწილი მოუჩანთ, ცნობისმოყვარეობით ათვალთქვანებენ ჩვენი ტანსაცმელი, აღფრთოვანებულნი დარჩნენ ანას მწვანე, აბრეშუმგამოკრული, ვარდისფერი ლენტებით მორთული ქუდით. მათ ღამე ორმოცი აქლემისგან შემდგარ ქარავანთან ერთად გაატარეს, მშვენიერ, მშვიდ გარემოში. რამდენიმე წუთი ვიდრე აქლემებთან, ზოგი დაბორიანებდა, ზოგი რაღაცას ცოხნიდა, ზოგს ეძინა, ძაღლური დრუნჩები მიწაზე ჰქონდათ დადებული და უკანა ფეხები უცნაურად ჰქონდათ შეკეცილი, აღმოსავლური ჯდომის ყაიდაზე.⁴⁰ შემახის ბაზარში, ენ ლისტერი, რომელსაც თმაში ჭაღარა გამოერია, დაინტერესდა ინით – მოყვითალო-მომწვანო ფხვნილით, რომლითაც წვერს შავად იღებავენ. ისინი ადგილობრივი კულინარიითაც დანტერესდნენ, გასინჯეს ქლიავის ჩირით დამზადებული, ნამდვილი ქლიავის ნამცხვარი, რომელსაც ზეთში უნაჭუჭოდ მოხარშულ კვერცხთან ერთად მიირთმევენ. ხუთიოდე კაცი ერთი თეფშიდან ჭამდა – ნამცხვარში თითებს აწობდნენ კვერცხის ასაღებად და ერთმა კაცმა პატარა ნაჭერი გამომიწოდა გასასინჯად. მე ნამცხვარი პირდაპირ მისი ხელიდან მივირთვი და ნამდვილად იჭმებოდა.⁴¹

ციცაბო გორაკზე აშენებული ბაქო, იმ დროს, ორმაგი კედლით იყო გარშემორტყმული. ქალაქის რუსმა კომენდანტმა, პოლკოვნიკმა ჩეკმარევმა, ორ ქალს გამოუყო სახლი, რომელიც ქალაქის ქვედა ნაწილში, ზღვასთან იყო ახლოს – ერთი დიდი, ერთი პატარა ოთახი და აივანი, რომელიც ზღვას გადაჰყურებს. მთავარ მეჩეთთან და კომენდანტის სახლთან ახლოს, სახლი კარგ და მშვიდ ადგილასაა. ქალბატონი ჩეკმარევა ზრუნავდა მოულოდნელ სტუმრებზე, რომლებიც რუსეთის იმპერიის ყველაზე პატარა და ყველაზე შორეულ სამხედრო პუნქტს ესტუმრნენ. მან მოგზაურებს გაუგზავნა ნაღები და პური და გარეული ფრინველის მარინადი (ანას რუსეთში არც ერთი ხორცის კერძი ასე არ მოსწონებია),⁴² რომელსაც ანა, როგორც მანამდე თბილისში, თავის სპირტქურაზე მომზადებულ ბრინჯს, კვერცხსა და ბოსტნეულს უმატებდა.

ანა უოკერი განსაკუთრებით დაუმეგობრდა ქალბატონ ჩეკმარევას. ანა აღფრთოვანებული იყო მისი თავისუფალი, თურქულ სტილზე შეკერილი კამზოლით, რომელიც გაცილებით უფრო შესაფერისი იყო ცხელი სეზონისთვის, ვიდრე ინ-

გლისელი ქალბატონების სამოსი, რომლის ტარებასაც ენს კლიმატი აიძულებდა. ამ კლიმატს შეუმოსავი ვერ გავუძლებდი!⁴³

ანამ იყიდა სპარსული აბრეშუმი და ქალბატონ ჩეკმარევას დახმარებით, თავისთვის ჰაეროვანი კაბები შეიკერა. ის ასევე დაუახლოვდა სამხედრო-საზღვაო ფლოტის ადიუტანტს, რომელიც მასავით ჩანახატებს აკეთებდა და ბევრი საინტერესო ამბავი იცოდა კასპიის ზღვის ნიჟარების შესახებ. მიუხედავად იმისა, რომ თავიდან საერთოდ არ ჰქონდა აქ ჩამოსვლის სურვილი, ანა ბაქოში ჩვეულებრივზე მეტად ხალისიანი და მშვიდი იყო. ენ ლისტერმაც ბევრი რამით ისიამოვნა. მოგზაურობისას უკვე მეორედ დაათვალიერა ჰარამხანა, ამჯერად, სპარსელი იუველირის – ჰაჯი ბაბასი; იმდენად გავერთეთ ქალებთან ერთად, რომ დაახლოებით ერთი საათი, თითქმის 8 საათამდე, იქ ვიყავით. იატაკი ლამაზი ხალიჩით იყო დაფარული და ჩვენთვის 3 სკამი იყო მომზადებული. ოთახში დაახლოებით 20 ქალი იდგა, რაც საკმაო რაოდენობა იყო იმისათვის, რომ ოთახი შევსებულიყო. ვაჟმა (ახლად წვერაშლილმა ჭაბუკმა) და მსახურმა ქალმა ჩაი, ტკბილეული და ფსტა მოგვითანეს. [...] ორი ან სამი ქალი ლამაზი იყო, დანარჩენი კი – არა. ეცვათ ფართო აბრეშუმის შარვლები (ჩვეულებრივ, მოწითალო ან მეწამული), რომელთაც ძნელად თუ გაარჩევდი ქვედაკაბისგან, *მაქმანებითა და ძვირფასი ქვებით შემკული* კამზოლები და პირბადეები, ყელსაბამები და სამაჯურები, თავსამკაულები და დიდი ზომის საყურეები, რომლებიც ჩინურს წააგავდა, და 3-დუმიანი, მრგვალი მომინანქრებული ან მოოქრული გულსაბნევეები, რომლებიც შუაში, მკერდზე, ჰქონდათ დაბნეული, შემკული ლალებით, ზურმუხტებითა და სხვა ძვირფასი თვლებით. [...] მათ ჩვენი თხოვნით იცეკვეს ქართული ცეკვა, ტფილისში რომ ცეკვავენ, მაგრამ ბევრად უკეთესად, უფრო ბუნებრივად – განსაკუთრებით კარგი იყო ერთი – შედარებით უფროსი გოგონა (ალბათ 20 წლის), რომელიც ჩვენი ძლიერ მოიხიბლა. ის ქალბატონ ჩეკმარევას ალბათ 2 ან 3 წუთის განმავლობაში ეხუტებოდა, ჩემთან ჩახუტებას კი ამის ნახევარი დრო დაუთმო და განშორებისას დაგვპირდა, რომ მათი წინასწარმეტყველის შეგონებათა მიუხედავად, ჩვენს სანახავად მოვიდოდა! როგორ მოახერხა მიმზიდველი რხევისას ქვედაკაბის წამოწევა, არ ვიცი, მაგრამ ყველაფერს მშვენივრად გაართვა თავი და მისი ცოცხალი თვალები და თითების ძალაში ტკაცუნის აშკარად გამოხატავდა მასში აღძრულ ინტერესს. ქალები ცეკვისას ხელით ტკაცუნის მაგვარ ხმას გამოსცემდნენ ან ტაშს უკრავდნენ და აშკარად სიამოვნებდნენ, რომ მეც მათნაირად „ხელით“ ისეთივე ხმას გამოვცემდი. წამოსვლისას გავედით ჰაჯისთან, *სადაც კომენდანტი და კიდევ ერთი თუ ორი კაცი იყო. მათ ტკბილეული კი მიირთვეს, მაგრამ, ალბათ, ჩვენზე ბევრად ნაკლებად გაერთნენ.*⁴⁴

მას შემდეგ, რაც ანამ და ენმა იხილეს შირვანშაჰების სასახლის ნანგრევები და ქალწულის კოშკი, ახალმა მეგობრებმა ნავთობით მდიდარ აფშერონის ნახევარ-

კუნძულზე წაიყვანეს. ნავთობის ბუმამდე რამდენიმე ათწლეულით ადრე, ნედლე ნავთობს ზედაპირთან ახლოს, ოთხმოცდახუთი ჯაბურღილიდან ჯერ კიდევ ხელით მოიპოვებდნენ და ნავთობის ლამპრებისთვის, ბორბლების საპოხ ან ნავების დასაღლურ მასალად იყენებდნენ. აქ უხვად არის ბუნებრივი გაზი, მის მოსაპოვებლად მხოლოდ გათხრაა საჭირო,⁴⁵ მას საწვავად იყენებენ, ზოროასტრულ ტაძრებში დანთებული მარადიული ცეცხლის მსგავსად. რადგან რეგიონი გამაჰმადიანდა, ძველი სალოცავი ადგილები მეჩეთებად გადაკეთდა; ათეშგიაჰის ტაძარი, რომელიც ნავთობისა და გაზის საბადოებთან ახლოს მდებარეობს, ძველი რელიგიის ერთ-ერთი უკანასკნელი ძეგლია. იგი ციხესიმაგრის მსგავსი, უჩვეულო ადგილია. დაბალი შესასვლელი კარიბჭე გადის ეზოში, რომელიც ოთხივ მხრივ გარშემორტყმულია ოცდაერთი უფანჯრო ოთახით. კვადრატულ, ღია, კოშკისებრ ტაძარში არის (ახლაც) 4 საცეცხლური ბუხარი, სადაც იწვის გაზი. შენობის შუაგულში დაახლოებით 5x3 ფუტის ზომისა და 3 ფუტის სიღრმის კვადრატული ჭაა, რომელშიც მარადიული ცეცხლი ანთია, მაგრამ ერთ-ერთმა ინდოელმა იგი ჩვენ გასართობად, ცივი წყლით ჩააქრო და შემდეგ დაუყოვნებლივ აანთო. იმის გამო, რომ ტაძარი ინდუსებსაც იზიდავდა, 1825 წელს ერთმა ინდოელმა ის საფუძვლიანად აღადგინა, ხოლო, ახლახან ამერიკა-ჯანის მთავრობამ კიდევ უფრო „გააუმჯობესა“. ანა და ენი დაესწრნენ ცერემონიას. მღვდელმთავარს შუბლზე 2 ყვითელ ხაზს შორის მოქცეული წითელი ენა (ცეცხლის ნიშანი) ჰქონდა გამოსახული, თუმცა, საკუთარ თავს კრიშნას თაყვანისმცემელს უწოდებდა. მან და კიდევ ორმა ადამიანმა ძალიან სერიოზული და ღვთისმოსავისთვის შესაფერისი გამომეტყველებით შეასრულეს ცერემონია. ლამაზ, პატარა ხალიჩებიან და ტახტებით გაწყობილ ოთახში, რომელიც სტუმრებისთვის იყო განკუთვნილი და რომელშიც ორი უფრო პატარა ცეცხლი იყო დანთებული, მიირთვეს ვახშამი – ცივი ხორცი, ბურახი და ღვინო. ქალები სახლში საღამოს თერთმეტ საათზე დაბრუნდნენ. ჩაი მივირთვი, ჩამოვკეცი და ერთ მელოდიას ვუსტვენდი დღის 1 1/2 საათამდე.⁴⁶

ბაქოში ჩასვლიდან ერთი კვირის შემდეგ, მაღლიერებით სავსე მოგზაურები დანანებით დაადგნენ უკან დასაბრუნებელ გზას, ქალბატონმა ჩეკმარევამ გამოატანა უზარმაზარი ხორციანი ღვეზელი, ერთი ბოთლი თეთრი ნავთი (უმაღლესი ხარისხის), ბრინჯით სავსე ტომარა, რომელშიც მინიმუმ 10 ან 12 გირვანქა ბრინჯი მაინც იყო, 18 მაგრად მოხარშული კვერცხი, გარეული ფრინველი, პურის კვერი და 2 ბოთლი ბაქოური თეთრი ღვინო.⁴⁷ ენს უნდოდა უკან სომხეთის გავლით დაბრუნებულიყვნენ, რათა კაცობრიობის *berceau*ⁱ, წმინდა არარატი, დაენახა.⁴⁸ მაგრამ არც ერთმა მისმა ნაცნობმა მაღალი რანგის სამხედრომ არ გასცა დაპყრო-

i. Berceau (ფრანგ.) – აკვანი (მთარგმნ. შენ.).

ბილ, მაგრამ არცთუ ისე მშვიდობიან რეგიონში შესვლის საშვი, და თბილისში იმავე გზით მოუწიათ დაბრუნება. მეტად თვალწარმტაცი განჯის – ამჟამად აზერბაიჯანის სიდიდით მეორე ქალაქის – ქარვასლა თავის დროზე ალბათ ლამაზი იყო, მაგრამ ახლა, 6 თუ 7 გადახურული ოთახის გარდა, ნანგრევების გროვაა, და მეტწილად ნაგვით არის სავსე. [...] ვერ დავიძინე სიცხისა და რწყილების გამო. მეორე დღესაც, დღის განმავლობაში გვარიანად დაგვკბინეს. *რწყილებზე ასეთი ნადირობა აღარ მქონია 1827 წელს იტალიაში ყოფნის შემდეგ, როდესაც ერთი ღამის განმავლობაში ხშირად 30-ს ან მეტსაც ვიჭერდი. საწყალ ანას ფეხები სულ ბუშტუკებით დაეფარა – ვაიძულე, ერთი ხელი წინდა გაეხადა და ჩექმები ოდნავ შეესხნა.*⁴⁹ 1 ივნისს ისინი თბილისში დაბრუნდნენ, *მოვეწყვეთ ჩვენს ძველ ბინაში (იმავე ოთახში, იმავე ფასად).*⁵⁰

ჩამოსვლისთანავე მოსკოვიდან გამოგზავნილი ბანკნოტები დახვდათ, რომლე-ბიც ნაცნობებმა ვერცხლის მონეტებზე გადაუცვალეს. განვიხილეთ მოგზაურობისა და ფულის საკითხები და, როგორც ყოველთვის, ეს კარგად არ დამთავრდა. ათა-სი გირვანქიდან 650-ის ეკვივალენტი გვქონდა ცირკულარებში; ასევე, ჰამბურგის საგანგებო ფონდიდან მთელი 85 გირვანქა სტერლინგი გამოითანეს. ამ ფინანსური ოპერაციების შემდეგ, ანა უოკერმა დაუნიებით მოითხოვა სასწრაფოდ შინ დაბრუნება. ენ ლისტერი კი ფიქრობდა, რომ მათ საკმარისი ფული ჰქონდათ დარჩენილი და თან მოგზაურობისთვის შესაფერისი სეზონი იდგა. მას სურდა უფრო კარგად ენახათ კავკასია, შავი ზღვა და მხოლოდ ამის შემდეგ დაბრუნებულიყვნენ შინ.⁵¹ უკან დასაბრუნებელი მოგზაურობისათვის ენმა მოსკოვის შუამავლობით კიდევ 200 გირვანქის გამოტანა მოითხოვა ჰამბურგის საგანგებო ფონდიდან.

ენს ზაფხულის სამი ცხელი კვირა დასჭირდა, რათა მათი მოგზაურობის შემდეგი ეტაპი დაეგემა. ისევე, როგორც გიორგი და დომნა, კაზაკი ოფიცერი, რომელიც მათ თან ახლდა ბაქოში, კვლავ მათთან ერთად იმოგზაურებდა. ეს კაზაკი თურქულად ლაპარაკობდა – ეს აქ აუცილებელია, თითქმის ყველა ქართველი ფლობს თათრულ ენას,⁵² ისევე, როგორც საკუთარ უძველეს ენას. მათ ახლდათ სამი ცხენოსანი კაზაკისგან შემდგარი ბადრაგი. ენმა მარშრუტი თავისი ახალი სამოგზაურო „ბიბლიის“, ფრედერიკ დიუბუა დე მონპერეს – „*Voyage autour du Caucase*“⁴¹ (1839) მიხედვით შეადგინა. ისინი მტკვრის ხეობის გაყოლებით, დასავლეთისკენ გაემართნენ. მცენარეული საფარი უფრო და უფრო უხვი და მრავალფეროვანი ხდებოდა. მათი გამოსვლიდან ორი დღის შემდეგ, ზუსტად 12:40 საათზე, საოცარ სილამაზეს წავაწყდით – წერს ენი. ჩვენგან მარჯვნივ ტყეა, დაახლოებით ერთი კილომეტრის სიგანის, მშვენიერი მწვანედ აბიბინებული ხეობა, მარცხნივ კი –

i. Voyage autour du Caucase (ფრანგ.) – მოგზაურობა კავკასიის გარშემო (მთარგმნ. შენ.).

ტყიანი ბორცვები.⁵³ მათ სამი ღამე გაატარეს გორში; იქიდან გაემართნენ ატენის სიონის ეკლესიისა და მისი შთამბეჭდავი ფრესკების სანახავად. შემდეგ, უძველესი ქალაქი, კლდეში ნაკვეთი უფლისციხე მოინახულეს, სვეტებით და რომაული, კესონებიანი ჭერით რომ იწონებდა თავს. ანა უოკერმა უმაღლეს გამოაძვრინა თავისი სახატავი რვეული ესკიზების გასაკეთებლად და ენ ლისტერმაც კი გააკეთა რამდენიმე იშვიათი ჩანახატი თავის დღიურში.

შემდეგ, საფოსტო გზამ მდინარე მტკვრის ნაპირებიდან გადაუხვია ზემოთ, სურამის უღელტეხილისკენ (949 მ), ამავე სახელწოდების მთის გასწვრივ, რომელიც აკავშირებს დიდ და მცირე კავკასიონს და საქართველოს აღმოსავლეთ და დასავლეთ ნაწილად ყოფს. ანამ და ენმა შეამჩნიეს, რომ ქედი წარმოადგენდა წყალგამყოფს და კლიმატურ გასაყარსაც. ეს მთელი ჩემი ცხოვრების მანძილზე ერთ-ერთი ყველაზე ლამაზი გასეირნება იყო – ღრმა, კლდოვანი ხეობა, გზა ხშირად კლდეში გამოჭრილი თაღის ქვეშ გადიოდა, ხეობის ძირში კი ვიწრო მდინარე მიიკლავებოდა. ყოველი მხრიდან მშვენიერი ტყე გვერტყა გარს – წიფელი, ვერხვი და მთის მწვერვალებზე ალაგ-ალაგ შეფენილი *pinus sylvestris*ⁱ. გზის გასწვრივ გვხვდება თეთრყვავილებიანი, წითელი კენკრით დახუნძლული ბუჩქი ნეკერჩხლისებრი ფოთლებით, რომელიც შინ არასდროს მინახავს, და *rhododendron ponticum*ⁱⁱ, რომელიც პირველად შემხვდა ამ მხარეებში. მრავლადაა მუხა, წიფელი და ევროპული რცხილა, ძალიან ლამაზია; თელა (ასევე, გარეული მსხლისა და გარგარის ხეები), ცხრატყავა, თხილი, ჩვეულებრივი დაფნა (პირველად მხვდება) და კვიდო. აზალია, ცხრატყავა და თხილი გზის ორივე მხარეს, ტყის პირს ულამაზესი, ხშირი ბუჩქნარის სახით მიუყვება.⁵⁴

28 ივნისს ჩავიდნენ ქუთაისში, რომელიც ახლა სიდიდით მეორე ქალაქია საქართველოში, ენ ლისტერის წარმოდგენით კი, ის ძველი კოლხეთის დედაქალაქსა და *le séjour de Médée*ⁱⁱⁱ წარმოადგენდა.⁵⁵ ბერძნული მითის თანახმად, ეს იყო მეფე აიეტის სამშობლო, რომელსაც იაზონმა ოქროს საწმისი მოჰპარა. ქუთაისში ენს და ანას გულთბილად დახვდა ადგილობრივ კაზაკთა კომენდანტის ცოლი, მეტად სასიამოვნო ქალბატონი ბუჟუროვა. ისინი ათი დღის განმავლობაში ცხოვრობდნენ რეგიონის მთავრობის პანსიონში, რომელიც მათი ჩასვლისთვის ნაჩქარევად მოაწყვეს. ამ დილას ენმა თქვა, რომ წლების მანძილზე არ უგრძნია თავი ასე კარგად. მისთვის ეს კლიმატი არც ზედმეტად ცხელია, არც ზედმეტად გრილი, ძალიან მოსწონს ქუთაისი. ქუთაისი გაშენებულია მდინარე რიონზე, იგი-

i. *Pinus sylvestris* (ლათ.) – ჩვეულებრივი ფიჭვი (მთარგმნ. შენ.).

ii. *Rhododendron Ponticum* (ლათ.) – შქერი, როდოდენდრონის გვარის მცენარე (მთარგმნ. შენ.).

iii. *Le séjour de Médée* (ფრანგ.) – მედეას სამშობლო.

ვე უძველეს ფაზისზე, რომელსაც მოუყვებოდნენ იაზონი და არგონავტები, იმ ადგილას, სადაც ეს მდინარე მთებიდან კოლხეთის ფართო ვაკეზე გაედინება; აქ წარმოქმნილი ჭაობები მხოლოდ მეოცე საუკუნეში დააშრეს. ვერ ვიტყვი, რომ მე მომწონს აქაური კლიმატი – ძალიან ცხელი და ნესტიანია – მეტისმეტად ხშირი ტყითაა დაფარული. თუმცა, ძალიან ლამაზი და მოგზაურისთვის საოცრად საინტერესოა.⁵⁶ როგორც ყოველთვის, ახალი ადგილების ნახვას მოწყურებულმა მოგზაურებმა ღირსშესანიშნაობები დაათვალიერეს: ბაგრატის ტაძრის ნანგრევები (ამჟამად რესტავრირებული), გელათისა და მოწამეთას მონასტრები.

ქუთაისში სრულდებოდა მთავარი გზა, რომელზეც საფოსტო სადგურები იყო განლაგებული. იქიდან მხოლოდ ცხენით შეიძლებოდა გზის გაგრძელება. შავი ზღვისკენ მიმავალ გზას ართულებდა ჭაობიანი, ნესტიანი, კოლოებით საცხე ველები. ამიტომ ენმა და ანამ ჯერ დიდი კავკასიონის მთიანეთის დათვალიერება გადაწყვიტეს. მათი ლაშქრობა რაჭა-ლეჩხუმის პროვინციაში რამდენიმე კვირას გაგრძელდა და დაჩრდილა ყველაფერი, რაც კი აქამდე ენახათ. დაიქირავეს ადგილობრივი მეგზური, ადამი, რომელმაც რეგიონში სამოგზაუროდ მოიმარაგა საჭირო აღჭურვილობა და სურსათი, რადგან იქ არც ფუნდუკები იყო, არც მაღაზიები და არც საკვები პროდუქტების დახლები. მას ჰყავდა საკუთარი ცხენი, ხოლო, სხვებისთვის ცხენები იქირავეს მოშესგან, ებრაელი ცხენების მომშენებლისგან, რომელიც ცხოველების მოსავლელად გაჰყვა თან. შედგა მოგზაურთა ექვსკაციანი ჯგუფი: ენი და ანა, მოსკოველი გიორგი ჩაიკინი, თბილისელი კაზაკი ადამი და მოშე ქუთაისიდან. მათ ბარგის დიდი ნაწილი, წიგნებისა და ბეწვით გაწყობილი ჩექმების ჩათვლით, ფეხმძიმე დომნასთან ერთად ბუჟუროვების სახლში დატოვეს. მოგზაურებმა 1840 წლის 9 ივლისს ჩრდილო-აღმოსავლეთისკენ აიღეს გზი. 11:25 საათზე გავიქრდით ჩრდილიან, აბალახებულ ადგილას, გბატკეცილის განაპირას, მდინარესთან ახლოს. კარგად ვისაუზმე ცივი ჩაით, 2 ცივად მოხარშული კვერცხით, კარაქწასმული პურის ნაჭრითა და ნახევარი კიტრით. საუზმე 12:25 საათზე დასრულდა. მე ჩემს ინგლისურ აბგებზე მოვთავსდი და ვწერდი 1 ½ საათამდე, ანას ბალახში (თავის მოსასხამებზე) მიწოლილს მიეძინა. ენი დასვენების ჟამს მოგზაურთა ჯგუფის ყურებით ტკბებოდა – ცხენები გვერდით ბალახობენ, ხოლო ჩვენი მხლებლები ოდნავ მოშორებით საუბრით არიან გართულნი. ადამს ჩერქეზული ქუდი ახურავს, შავი მატყლის კანტითა და ყვითელი წვეთით, ჩვენს ებრაელს კი – შავი კრაველის, სპარსული ქუდი, სხვა მხრივ à la Georgienne აცვია. ჩვენი კაზაკი სამხედრო ფორმაშია გამოწყობილი – ლურჯი, თხელი, მოკლე პიჯაკი, ლურჯი შარვალი და თეთრი კარტუზი. გიორგის თეთრი შარვალი და მოკლე მოყვითალო-მომწვანო პალტო მოსავს, ქამარში – „კინჟალი“ [ხანჯალი]. ანა თავის ამაზონშია და მე – ჩემს გრძელ მანტილიასა და შავ და ჩალისფერ მოსასხამში, მუქი, ლურჯი ქსოვილის (ჯუპი, ლონდონი) კარტუზი მახურავს, დაბოლოს,

მე და ანას ფეხზე მამაკაცის მოსკოვური ჩექმები გვაქვს ამოცმული. [...] ხანდახან სასიამოვნოდ წამოუბერავს ნიაკი. შუადღის 2 საათზე ჩრდილში, ჩემს ჩანთაში საათზე $F 82^{\circ}$ [$27,8C^{\circ}$] გრადუსი იყო და 90° [$32,3C^{\circ}$] გრადუსი იქ, სადაც 3:20 საათზე ვიჯექი და ვკითხულობდი. დაახლოებით ერთ საათში სიცხე გადაივლის და ჩვენც გზას გავუდგებით.⁵⁷ კოლხეთის ტყეში, მდინარის გასწვრივ მიმავალი ბილიკის გარშემო, ყველაფერი ისეა მწვანეში ჩაფლული და აყვავილებული, ტროპიკული ტყე გეგონება. გაოგნებულმა ენმა თავისი საზომის მეშვეობით განსაკუთრებით დიდი ზომის ხეების გარშემოწერილობა გაზომა და ჩაინიშნა.

საბუთების წყალობით ქალებს შეეძლოთ ადგილობრივი ადმინისტრაციისაგან უფასო დაბინავება მოეთხოვათ. ენი ცარიელ ბეღლებს ან ქოხებს ელოდა, მაგრამ ადამი სოფელში ყოველთვის საუკეთესო სახლს მიაღებოდა ხოლმე. თუმცა ეს საუკეთესო სახლი, კარგ მდგომარეობაში მყოფი ხის შენობა, შეიძლება ძალიან ღარიბული, პატარა ქოხი ყოფილიყო.⁵⁸ ქალებს უმეტესწილად ცალკე გამოყოფილი, საკუთარი ოთახი ჰქონდათ, თუმცა ზოგჯერ ერთ ოთახს მთელ ოჯახთან იყოფდნენ. ერთ-ერთ ასეთ შემთხვევაში, იქ გაჩერება ვერ შევძელით – იქაურობა სავსე იყო „ცხელებით“ დაავადებული ადამიანებით, 2 თუ 3 კაცი, რომლებიც კართან მოგვეგებნენ, მოჩვენებასავით იყო გაფითრებული.⁵⁹ საკვები ადგილობრივი მოსახლეობისგან უნდა შეეძინათ, რაც ხშირად არ იყო საკმარისი – ვერცხლის მონეტებსაც კი მთის გლეხებისთვის დიდი ფასი არ ჰქონდა. თავიანთ ჭერქვეშ ხალხი მათ ჩვეულებრივ საუკეთესოდ უმასპინძლდებოდა, ზოგჯერ სადღესასწაულო სუფრასაც უშლიდნენ რამდენიმე თავი კერძითა და სხვადასხვა სახის ღვინით. ასევე, უჩვეულო სანახაობითაც ართობდნენ. გვყავდა მოთვინიერებული დათვის ბელი, რომელიც ჩვენი ხელიდან ჭამდა.⁶⁰

საწირეს, ნაქერალის უღელტეხილის (1217 მ) და ხოტევის გავლით ქალები ჩავიდნენ ნიკორწმინდაში, სადაც აღფრთოვანდნენ ეკლესიის არქიტექტურით, ქვის დამუშავების ოსტატობით – რაც კი ვნახეთ, მათ შორის, ყველაზე მდიდრულია და კარგად ნაშენი.⁶¹ ანამ და ენმა ალბათ მრავალმნიშვნელოვნად გადახედეს ერთმანეთს, როდესაც შესასვლელის მარცხენა მხარეს ადამისა და ევას უჩვეულო ფრესკას წააწყდნენ; შიშველი, ანდროგინული ფიგურების ერთმანეთისგან გარჩევა ძნელია. გამომგზავრებიდან ხუთი დღის შემდეგ, ჩავიდნენ მდინარე რიონზე გაშენებულ ქალაქ ონში (800 მ). სხვადასხვა ფაქტორმა, მათ შორის ნორმალურმა ოთახებმა ქვისგან ნაშენ სახლში, ეგრეთ წოდებულ სასახლეში, და ბაზარმა – ზოგიერთ ქალს ეშინოდა, მათ ნივთებს როცა ვეხებოდით⁶² – განაპირობა ის, რომ ქალაქი მთაში ლაშქრობისათვის შესანიშნავ საბაზო ბანაკად იქცა.

მათი პირველი დანიშნულების ადგილი იყო დიდი კავკასიონის მთავარ მწვერვალზე მდებარე, დიდებული მთებით გარშემორტყმული, რიონის სათავე. ისინი აზალიის ბუჩქებით სავსე ფოთლოვანი ტყის გავლით გაეშურნენ უწერისკენ (950 მ),

სადაც მეორე დილით ოთხი შეიარაღებული კაცისგან შემდგარი ბადრაგი აიყვანეს, რადგან მარშრუტი გადიოდა ოსეთთან მოსაზღვრე რეგიონზე – მაშინდელ, ისევე როგორც ახლანდელ, საომარ ზონაში. ლეხის (1337 მ) გავლით, შებინდებისას, მიაღწიეს მთის უბრალო სამხედრო ბანაკს. მთელი მოგზაურობის მანძილზე პირველად უწევდათ გარეთ დაძინება. რამდენიმე გრძელი, თხელი ბოძისგან აგებული ქოხი, ჩრდილოეთის მხრიდან წვრილი ტოტებით დახურული, წინ კი, კოცონი – ეს არის ჩვენი ღამის გასათევი ბანაკი. ფიქრები ჩემთვის შევიწინაზე, ერთი კაზაკი 3 მორის მოსატანად გავგზავნე და ანას მშვენიერი საწოლი მოვუწყვე. ხეზე წოლა ჩემთვის არ არის მოსახერხებელი, ამიტომაც ბურკა [მწყემსის ქურქი] და უნაგირის რბილი ქვეშსადები მიწაზე გავშალე, მსუბუქი მოსასხამი ჩავიცვი და ჩემს წყალგაუმტარ საწვიმარ ლაბადაში გავეხვიე. ანამ კვერცხი მიირთვა, მე კი ლებიდან წამოღებული კვერი და ცოტა ყველი და ძალიან გემრიელად წავიხემსე.

მეორე დილით, ოთხზე, ოცდაერთ შეიარაღებულ გლეხთან ერთად რიონის სათავისაკენ გაემართნენ. ექვსი საათისთვის ბილიკი ცხენებისთვისაც კი რთულად სავალი გახდა და ჯაგნარში გზის გაკვლევა ფეხით უწევდათ. ადგილზე მისასვლელად ერთი საათი დასჭირდათ. რიონი სათავეს იღებს მყინვარიდან და 2 თვალწარმტაცი ჩანჩქერიდან, ერთი მეორეზე უფრო დიდია. [...] ორი მთა „არენას“ ქმნის და მყინვარი თითქოს ერთმანეთს შორის უნაგირზე შეუსვამთ. [...] ანა დაუყოვნებლივ დავტოვე და 7:55 საათზე უკვე სათავესთან ვიყავი. [...] მყინვარიდან იქამდე, სადაც ანა მის და ხატავს, გამაღებით მოედინება ჩანჩქერი. 10:10 საათისთვის ბანაკში დაბრუნდნენ და თითოეულ თანმხლებ გლეხს ორი ვერცხლის რუბლი გადაუხადეს, რითაც ისინი საკმაოდ კმაყოფილები ჩანდნენ. [...] კარგი, პატიოსანი მთამსვლელები იყვნენ – მათთან ერთად მთელ კავკასიონს მოვივლიდი. ქალები იმავე საღამოს დაბრუნდნენ ლებში, ღია ბეღელში მოუწიათ დაძინება და უნდა ითქვას, რომ ყურადღება ნამდვილად არ აკლდათ – უამრავი ხალხი შეიკრიბა ჩვენ სანახავად.⁶³ მეორე დღეს ონში დაბრუნდნენ, და რადგან მოახლე არ ახლდათ, ენი იძულებული შეიქნა საკუთარი სარეცხი თავად გაერეცხა – ჩემს ცხოვრებაში პირველად⁶⁴ – ორმოცდაცხრა წლის ასაკში.

ონიდან მეორე მნიშვნელოვანი გასვლა საჩხერეში იყო; მდინარე ყვირილას აჰყვნენ დინების საწინააღმდეგო მიმართულებით; დღეს ყვირილა 29-ჯერ და ძირულა 19-ჯერ გადაკვეთეთ. [...] ჩექმები სულმთლად დამისველდა, მიუხედავად იმისა, რომ ფეხებს რაც შეიძლება მაღლა ვწევდი.⁶⁵ მიუხედავად იმისა, რომ ენმა ამ ლაშქრობებში აღმოაჩინა ულამაზეს ადგილებში მდებარე მონასტრები, იხილა არქაული, მღვიმეში ნაკვეთი სახლები და უამრავი საოცარი ბუნებრივი ფენომენი – ღირსშესანიშნაობები, რომლებიც არათუ ქალებს, არამედ თითზე ჩამოსათვლელ ევროპელს თუ ექნებოდა ნანახი, – დიდხანს ერთ ადგილას ვერ ჩერდებოდა. ის წყევლიდა ოთხსაათიან სიესტას, რომელსაც თანმხლები კაცები

დაუინებით მოითხოვდნენ თავისთვის და ცხენებისათვის, რადგან, ეგონა, რომ დღის ძვირფას საათებს კარგავდნენ; ერთადერთი, რისი გაკეთებაც შეეძლო ამ ხანგრძლივი დასვენების დროს, დღიურის წერა იყო. ენი ცოტას ჭამდა, ბევრს წუწუნებდა და ბოლოს შუადღის სიცხეში მარტო მიდიოდა სასეირნოდ. ერთხელ მან ეკალბარდებით დაფარულ ციხესიმაგრეში შეძრომა სცადა. ძლივძლივობით ავბობლდი, მაგრამ ღიობიდან ციხესიმაგრეში შეღწევა შეუძლებელი იყო. ჩამობობლებისთვის 20 წუთი დამჭირდა – 50 წუთი ტყუილად ვიწვალე. 2-ზე ანასთან დავბრუნდი. ერთი კაცი კიბით გველოდებოდა, რომ ჩვენთან ერთად ციხესიმაგრის დასათვალიერებლად წამოსულიყო. პაპანაქებაში სერპანტინით ვიარეთ მანამ, სანამ დასავლეთის მხარეს არ მივაღექით, და 10 წუთში ციხესიმაგრეში აღმოვჩნდით. ხუთი ძველი ზარბაზანი დაგვხვდა, აქედან ერთი ქართული წარწერით. [...] ძალიან საინტერესო ძველი ციხესიმაგრე იყო. 3 საათზე გავედით და 3:18-ზე ხესთან დავბრუნდით, პირი გამშრალი მქონდა და გასაწური ვიყავი. ნახევრად გაშიშვლებული 2 კაცი (გიორგი და ადამი) სიცხისგან იწვოდნენ. გზის ბოლო ნაწილი სულ თაკარა მზეში ვიარეთ, ჩვენი კაკლის ხის სიახლოვეს, 3:35 საათზე, ტემპერატურა $F. 104 \frac{1}{2} [40,3^{\circ}C]$ გრადუსი იყო.⁶⁶ ენს ძალიან უკვირდა, რომ ანა გაცილებით უკეთესად იტანს სიცხეს და ხშირად არ სწყურდება, თუმცა, მეც ვცდილობ სიცხეს შევეგუო. ამ დილით ჩემი შალის სამკლავურები გავიხადე.⁶⁷

ზოგადად, ანა უოკერი ველურ პირობებში ცხოვრებას თავს უკეთ ართმევდა, ვიდრე ენ ლისტერი. ანას მოსწონდა სისხამ დილით ბუნებაში გასვლა, შუადღისას მადიანად ჭამდა, იძინებდა და მერე ჩრდილიან ადგილს პოულობდა სახატავად. ენისგან განსხვავებით, ის კარგი ცხენოსანი იყო, იცოდა, როგორ გამკლავებოდა ცხენებს და მათთან ერთად ყოფნა სიამოვნებდა. ამასთანავე, ქალები ფაქტობრივად შორეულ მთებში ლაშქრობისას უფრო კარგად უგებდნენ ერთმანეთს, მით უმეტეს, რომ ანა უოკერი პირველად გრძნობდა ზრუნვას თავისი პარტნიორის მხრიდან. მათ არაერთხელ აებნათ გზა და კუნაპეტ შავ ღამეში მოუწიათ სიარული. ენი დროდადრო ანას გასძახებდა, რათა დავრწმუნებულიყავი, რომ უკან მომყვებოდა. ჯენტლმენი ენი ანას დასაძინებლად ყოველთვის უკეთეს ადგილს უთმობდა – 1 დივანი (ხალიჩით) ანასთვის და გრძელი დაბალი მაგიდა ჩემთვის⁶⁸ – და კერძების საუკეთესო ნაწილსაც მას უტოვებდა.

ონში დაბრუნებულებს ორი ცხენი დაუკოჭლდათ. იმედი ჰქონდათ, რომ ცხენებს იშოვიდნენ დასავლეთით, ოცდათხუთმეტი მილის დაშორებაზე, ლაილაში, მაგრამ ამ პატარა, ღარიბულ ადგილას მხოლოდ ერთი ცხენის შეძენა მოახერხეს.⁶⁹ ადამმა, გიორგიმ და მოშემ უარი თქვეს სვანეთში გამგზავრებაზე. ენ ლისტერი იძულებული შეიქნა, დათმობაზე წასულიყო და მთაში ოცდაექვსდღიანი ლაშქრობის შემდეგ, ულამაზესი რიონის ხეობის გავლით ქუთაისში დაბრუნებულიყვნენ.

ბათუმში ქუთაისი დულდა და ენს ერთი სული ჰქონდა, იქაურობას გასცლოდა. მათ ოთხი ახალი ცხენი იყიდეს, მოშეს ნება დართეს დაესვენა. გიორგისაც, თავის ორსულ მეუღლესთან, დომნასთან დარჩენისა და მოკეთების საშუალება მისცეს იქამდე, სანამ რამდენიმე კვირის შემდეგ ყველანი ერთად მოსკოვში არ დაბრუნდებოდნენ. ანასთან და ენთან დარჩნენ ადამი – მეგზური ქუთაისიდან და კაზაკი ოფიცერი თბილისიდან, თუმცა, ერთმანეთში საერთო ენაზე ლაპარაკი არ შეეძლოთ. ზუგდიდისკენ გასწიეს დავით და ეკატერინე დადიანის მოსანახულებლად. გზად მარტვილის მონასტრისკენ გადაუხვიეს, მაგრამ დაღამებამდე ვერ მიაგნეს, მერე კი კოკისპირული წვიმა წამოვიდა. მეორე დღეს ნოქალაქევისკენ მიმავლებსაც გზა აებნათ ველურ ბილიკებზე. იქ ასაკოვანმა პრინცმა, ბეჟან დადიანმა ეკალბარდებით დაფარული, მაგრამ ძალიან შთამბეჭდავი აკროპოლისი აჩვენა, რომელიც, როგორც შემდგომ დადგინდა, იყო უძველესი ქალაქი, არქეოპოლისი. საღამო პრინცესასთან საუბარში გაატარეს, რომელიც მეტად მოიხიბლა ენით და მეორე დღით, *ჩაცმისას, საწოლის თავთან დატანებული პატარა სარკმლიდან მითვალთვალედა. მოსასხამი ისე მივკიდე კედელზე, თითქოს ის ვერც კი შევამჩნიე.*⁷⁰ ენს არ აინტერესებდა სოფლად მცხოვრები ქალები, რომელთაგან ზოგიერთ ქრისტიანსაც კი *ეკეთა თეთრი რაღაც, აწევისას პირს რომ უფარავდა.*⁷¹ *ეს ქართველი, მეგრელი ქალბატონები მთელი დღის განმავლობაში თავიანთ ხალიჩებზე სხედან. არაფერს აკეთებენ და უცნაური, უღაზათო შესახედავები არიან. გრძელი, კოჭებამდე კაბების ქვეშ მეწამული ან თეთრი პერანგი აცვიათ. მათი მკერდი კი აქეთ-იქით ბუშტებივით ფართხალებს.*⁷²

იმისთვის, რომ გზა აღარ არეოდათ, პრინცმა ბეჟანმა ინგლისელ ქალებს ზუგდიდში თავისი მსახური, დავითი გააყოლა. დანიშნულების ადგილას 8 აგვისტოს, საღამო ხანს ჩავიდნენ. დადიანების სასახლეში საკმაოდ მოუვლელ მოგზაურებს შესაძლებლობა მიეცათ, თავი მოეწესრიგებინათ. ჩვენი ოთახი სპარსული ხალიჩებითაა გაწყობილი. რამდენიმე მსახური კაცი მოგვიჩინეს და ორმა სასიამოვნო, პატარა მოახლემ ორი კომფორტული ტახტი საუცხოოდ გაგვიშალა – ბალიშები, გადასაფარებლები. ველურ პირობებში გატარებული ხუთი კვირის შემდეგ, ქალები საკუთარმა ოთახმა გააოცა: ვერცხლის ტოლია და დოქი, დიდი მაგიდა და პატარა, მრგვალი ტუალეტის მაგიდა ზედ ლამაზი სარკით, ოთხი სკამი და ორი მდიდრული სავარძელი, ორი ცვილის სანთელი. ამასთანავე, საპონი, სავარცხლები და ჯაგრისები, პენუარები და ღამის ჩაჩები (*ძალიან* ლამაზი), ტუჩსაცხი და ოდეკოლონი. წუხელ გამაღებულ რეცხვასა და (ჩვენი ტანსაცმლით შემოტანილ) რწყილზე ნადირობაში ვიყავით გართული, მაგრამ საერთოდ არ ვართ დაკბენილები. გამგელებულები ეცნენ უგემრიელეს პურსა და ახალ კარაქს, რომლებიც წასახემსებლად მოუტანეს, და მერე, მოულოდნელად გაშლილ სუფრაზე ვერაფერს დააკარეს პირი. მოსკოვის დატოვების შემდეგ ასეთი კომფორტული საწოლი და ოთახი არ გვქონია. მეორე

დილა საწოლში გაატარეს. ანამ ვარცხნილობა გააკეთებინა და შემდეგ მეც ძალიან ლამაზი ვარცხნილობა გამიკეთეს. ჩვენი ჩექმები და მანტილიები გავწმინეთ. შემდეგ მიეცათ შესაძლებლობა, შეხვედროდნენ თავიანთ მასპინძლებს.

ახალგაზრდა ეკატერინე დადიანი ფერმკრთალი და დასუსტებული ჩანდა.⁷³ მისი პირმო ქალიშვილი ისე ავად იყო, რომ დადიანებმა ქუთაისიდან გერმანელი ექიმი მოიწვიეს. ანა და ენი მას ორ საათზე შეხვდნენ რუსული სადილის დროს, რომელსაც კიდევ ესწრებოდა ორი დადიანის ქალი, რუსი ოფიცრის მეუღლე და ფრანგი სოფლის მეურნეობის სპეციალისტი – ჟოზეფ ლიეტო, რომელიც ახალგაზრდა უფლისწულის მამულის მოდერნიზებას აპირებდა. კიდევ ერთი სტუმარი, გერმანელი ბოტანიკოსი, რომლის სახელიც ქალებმა არ იცოდნენ, ცუდად იყო, საწოლში იწვა და მათ ვერ შეუერთდა. სტუმრებმა ფრანგულ ენაზე მიმოიხილეს პოლიტიკური სიახლეები, რაშიც მგზნებარედ ჩაერთო დავით დადიანი, რომლის სამთავრო, სამეგრელო, რუსეთის მხრიდან ტერიტორიული პრეტენზიების საფრთხის ქვეშ იყო. ამის შემდეგ, ანა და ენი სასეირნოდ წავიდნენ დიდ ბოტანიკურ ბაღში, რომელსაც დადიანები აშენებდნენ.

პრინცესა ჩაიბე არ იმყოფებოდა და სტუმრებს ბოდიში შემოუთვალა. ენი და ანა აღმოჩნდნენ, მართალია, მდიდრულ, მაგრამ არაჯანსაღ ადგილას. ზუგდიდში მდებარეობს ვაკეზე – რომელიც იმ დროს ჯერ კიდევ დაჭაობებული იყო – შავი ზღვიდან მხოლოდ 18 მილის დაშორებით. *სწორედ ეს კლიმატი არ უხდება დადიანის პატარა ქალიშვილს, მშვენიერ ბავშვს. პრინცესას ჰაერის გამოცვლა – ლაილაშიში ასვლა ვურჩიე.*⁷⁴ ენი ძლივს უძლებდა ზუგდიდს; ცხელა, ნესტი და ჩახუთულობაა, 4-იდან საღამოს 7 საათამდე მხოლოდ მანტილია მოსხმული, ისე გავიოფლე, რომ ტანზე მშრალ ადგილს ვერ მიპოვიდით.⁷⁵ რადგან ანა უოკერსაც ფერი ჰქონდა დაკარგული, ქალებმა გადაიფიქრეს შავი ზღვისკენ წასვლა და ამის ნაცვლად, კვლავ მთაში ასვლა მოისურვეს, რათა იქიდან ეპოვათ ქუთაისში დასაბრუნებელი გზა. ისინი მეორე დღის ნაშუადღევს, ხუთ საათზე გაემგზავრნენ. ეკატერინე დადიანმა მათ გაატანა *ნ დამარილებული კიტრი, ახალი, დიდი თავი ყველი, 8, 10 თუ უფრო მეტი კვერი და 2 ბოთლი წითელი ღვინო ჩემთვის და 2 თეთრი ანასთვის, 6 თუ 8 ცვილის სანთელი და ახლად დაკრეფილი კიტრი და ვაშლი.*⁷⁶

მათ ჩრდილო-აღმოსავლეთისკენ აიღეს გეზი და რამდენიმე საათის შემდეგ ლიაში, ერთ ფერმაში, მეტად მოკრძალებულ პირობებში დაბინავდნენ. იქაც, *ამ ნესტიან, ცხელ ხეობაში ქალები და კაცები, განსაკუთრებით ბავშვები, ფერმკრთალები და გავყითლებული იყვნენ, არაჯანსაღად გამოიუყურებოდნენ.* რადგან ისინი მთელ ოჯახთან ერთად იყვნენ ერთ ოთახში, როგორც ენი წერს, *ა.მ ექვსამდე გამაღვიძა, ერთი სული ჰქონდა წავსულიყავით.*⁷⁷ საათზე ნაკლებ დროში მიაღწიეს მდინარე ენგურს და გაუყვნენ მის ფართო, რიყის ქვებით მოფენილ კალაპოტში მოქცეულ თქრიალა დინებას ვაკისაკენ. მოგზაურები გაჩერ-

დნენ ჯვარში, იმ დროს დაცარიელებულ სოფელში. ცხრიდან ორამდე ცარიელ ქოხში ისაუზმეს და მეტ-ნაკლებად კომფორტულად იბანავეს – ალბათ, ინფექციის გადადების შიშით. დღეს, ჯვრის უკან აღმართულია ევროპაში ყველაზე მაღალი კაშხლის კედელი, რომელიც ენგურს თავის ვიწრო ხეობაში აკავებს და ფართო ტბას ქმნის. ჩვენ არ ვიცით, გაუვალი იყო თუ არა იმ დროს ხეობა, თუ ენი და ანა დაიკარგნენ, რაც საკმაოდ ხშირად ხდებოდა. ისინი მდინარის დინების მიმართულებით სიარულს შეეშვნენ და სოფელ საჩინოში ჩავიდნენ. შუადღის ხუთ საათზე წვიმა წამოვიდა, არც ისე ძლიერი, მაგრამ შესაძლოა, დიდხანს გაგრძელდეს და ამ დროს, სამივე კაცმა მიგვატოვა, ვიღაცის ან რაღაცის საძიებლად წავიდნენ. ადამი ნახევარ საათში დაბრუნდა. ანამ ათქვეფილი კვერცხი მოამზადა, მე ცხენებს ჩემი ბარგი ჩამოვხსენი და საწვიმარი დავაკერე. დავითმა გზა არ იცის – წავიდა მეგზურის საპოვნელად, რომელიც ჩვენთან ერთად წამოვა სოფელში. ერთი საათი ამაზე დავკარგეთ. 6:05 საათზე სოფელ ჯაყალისკენ [ჯგალი] გავემართეთ და 6 ¾ საათზე ჩავედით. 2 კოტეჯი. ინდური სიმინდის ბელელში (პატარა მოწნულ ქოხში, ალბათ ზომით 4½ იარდი 3 იარდზე) მოვეწყვეთ. ჩვენი ნაბდები ჩალაზე გავშალეთ და ახლა, 8:25, დავწერე ეს ბოლო 19 სტრიქონი. ჩრდილოეთით მაღალი ბორცვები მოჩანს და ალაგ-ალაგ ტყიანი გორაკებით დაფარული ქედები, პატარა ტყიანი კონუსისებური მწვერვალებივით რომ ამოშვერილან. *ბორცვები ორივე მხარეს დაღარულია და ქედებს გვერდზე მცირე ზომის კონუსისებური მწვერვალები ამშვენებს. 8:25 საათზე ჩაი და ა.შ. 9 ½ დავწექი.*⁷⁸

ეს იყო ბოლო სიტყვები, რომლებიც ენ ლისტერმა თავის დღიურში ჩაწერა. 1840 წლის 11 აგვისტო იდგა. ექვსი კვირის შემდეგ ის გარდაიცვალა. რა მოხდა ამ დროის მანძილზე, უცნობია. თავს სუსტად გრძნობდა და წერის გაგრძელება ვეღარ შეძლო? მურიელ გრინის თანახმად, ისინი 31 აგვისტოს კვლავ ჩავიდნენ ლენხუმში, ლაილაშში. იქიდან ქუთაისში დაბრუნდნენ იმავე მარშრუტით, რომელიც ოთხი კვირის წინ გაიარეს. გიორგი და დომნა იქ ელოდებოდნენ და ეკატერინე დადიანის მიერ ზუგდიდში გამოცხებული გერმანელი ექიმიც იქ მუშაობდა. მაგრამ ექიმი ვერ დაეხმარებოდა ვერც ბავშვს და ვერც ენ ლისტერს, რომც შეხვედროდა. ენის ნეკროლოგის მიხედვით, მისი გარდაცვალების თარიღია სამშაბათი, 22 სექტემბერი, ქუთაისი, „*La fièvre chaude*“⁷⁹.

„ცხელება“ იმ პერიოდში სხვადასხვა დაავადების აღმნიშვნელი საერთო ტერმინი იყო. რამდენიმეკვირიანი ავადმყოფობა გვაფიქრებინებს, რომ ეს შეიძლებოდა ტიფი ყოფილიყო, მაგრამ, შესაძლოა, ენი მწვავე მალარიითაც დაავადებულიყო ჭაობიანი კოლხეთის რეგიონში ყოფნისას. მოგზაუ-

i. La fièvre chaude (ფრანგ.) – ცხელება (მთარგმნ. შენ.).

რობის განმავლობაში საკუთარი თავისგან ის მეტისმეტად ბევრს ითხოვდა. რამდენადაც დაჟინებული და ძლიერი იყო, ყოველთვის ზედმეტად მაღალი წარმოდგენა ჰქონდა საკუთარ თავზე. ტბების მხარეში, დიდი სენ-ბერნარის უღელტეხილზე, მონტე-პერდიდოზე, ვინმალზე და ბოლოს, გაყინულ ვოლგაზე, ენ ლისტერი ბედს ეთამაშებოდა. მისტერ დაფინი¹ მართალი აღმოჩნდა: მისმა გონებამ მისი სხეული გაცვითა.

ქვრივი

„ჩვენთვის ცნობილია, რომ ამ პატივცემული ლედის ნეშტი ბალზამირებულია და მის ლისტერის მეგობარი და კომპანიონი, მის უოკერი, კონსტანტინეპოლის გავლით მოასვენებს მას შინ, საგვარეულო აკლდამაში დასასვენებლად“,¹ – წერდა „ჰალიფაქს გარდიანი“ 1840 წლის 31 ოქტომბერს ანას მიერ გამოგზავნილი გარდაცვალების ცნობის თაობაზე. ანა, სავარაუდოდ, ენის ბოლო სურვილს ასრულებდა; წინააღმდეგ შემთხვევაში, ძნელად წარმოსადგენია, რომ მას თავის თავზე აეღო ხანგრძლივი წამება, რასაც ქუთაისიდან ჰალიფაქსში ნეშტის რამდენიმე თვის განმავლობაში მოითხოვდა. მას შემდეგ, რაც გარდაცვლილს ბალზამირება ჩაუტარეს – ხელოვნება, რომელსაც ამ რეგიონში უხსოვარი დროიდან მისდევდნენ – გვამი, სავარაუდოდ, ჩაასვენეს ნახერხიან თუთიის კუბოში, რომელსაც სახურავი ზედ მიარჩილეს.

გემით მგზავრობა, როგორც „ჰალიფაქს გარდიანი“ წერდა, ჩაიშალა. ანა უოკერი ინგლისში სახმელეთო გზით დაბრუნდა. დაიქირავა თუ არა მან სატრანსპორტო საშუალება სპეციალურად კუბოსათვის? თუ ის დანარჩენ ბარგთან ერთად დაიტვირთა? გიორგი ჩაიკინმა, ალბათ, უკან დასაბრუნებელი მგზავრობის დაგეგმვა საკუთარ თავზე აიღო; მას და ფეხმძიმობის ბოლო თვეებში მყოფ დომნას მოსკოვში დაბრუნება სურდათ მანამ, სანამ ზამთარი დადგებოდა. ანა უოკერს თბილისში გამოგზავნილი დახვდებოდა ენის მიერ ბანკისთვის მოთხოვნილი მოგზაურობისთვის საჭირო თანხები. გუბერნატორმა გოლოვინმა მის უოკერის, მისი მსახურებისა და კუბოსთვის საშვები დაუშვა, რათა მათ, კავკასიონის გადაკვეთის შემდეგ ორკვირიანი კარანტინისთვის თავი აერიდებინათ.

საქართველოს სამხედრო გზის გავლით უკან დაბრუნება წარმოდგენილად დამქანცველი იყო; ძნელი წარმოსადგენია, რა გზის გავლა მოუწიათ მძიმე თუთიის კუბოთი დატვირთულებს. თუმცა, წელიწადის ეს დრო უფრო ხელსაყრელი

i. მისტერ დაფინი – ენის პირველი შეყვარებულის, ელაიზა რეინის მამობილი (მთარგმნ. შენ.).

იყო ჯვრის უღელტეხილის გასავლელად, რადგან ოქტომბერში თოვლი არ იდო. ეკატერინოგრადსკაიაში, შესაძლოა, გიორგიმ მის უოკერს შესთავაზა, ასტრახანის გავლის ნაცვლად უფრო მოკლე გზა აერჩიათ, ვორონეჟის გავლით. ქუთაისიდან 1273 მილის დაფარვის შემდეგ, ისინი, სავარაუდოდ, მოსკოვში ნოემბრის ბოლოს ან დეკემბრის შუა რიცხვებში ჩავიდოდნენ. ანა კვლავ მისის ჰოვარდის სასტუმროში გაჩერდა, სადაც მათი დანარჩენი ბარგი და სამგზავრო ეკიპაჟი ინახებოდა. ფილის რამსდენის ცნობით, ანამ, რომელიც მოგზაურობის გაგრძელებამდე, ზამთრის დასასრულს უნდა დალოდებოდა, ენი დროებით დაკრძალა. იპოვეს კი ანას სანუგეშებელი სიტყვები გრაფმა და გრაფინია პანინებმა ან პრინცესა სოფია რადზივილიმა? ის შინისაკენ 1841 წლის ზამთრის მიწურულს დაიძრა. ნეტავ სამგზავრო ეკიპაჟს მისაბმელზე მოთავსებული კუბო უკან მიჰყვებოდა? ჩვენ არ გვაქვს ჩანაწერები იმის შესახებ, თუ რა მარშრუტით გაიარა მის უოკერმა თითქმის ორი ათასი მილი მოსკოვიდან ჰალიფაქსამდე, არც იმის შესახებ, გაჰყვნენ თუ არა მას სახლში მისტერ და მისის გროსები.

ანა ჰალიფაქსში 1841 წლის 24 აპრილს ჩავიდა და გადავიდა „შიბდენ ჰოლში“, რომელიც, ენ ლისტერის ანდერძის თანახმად, მისი სიცოცხლის მანძილზე ანას მფლობელობაში იყო. ჩამოსვლიდან ხუთი დღის შემდეგ, 29 აპრილს, ენ ლისტერი სამრევლო ეკლესიის აკლდამაში დაკრძალა. დღეს ამ ადგილის პოვნა შეუძლებელია. დღეს ენის ნახევრადდამტვრეული საფლავის ქვის ფილა ეკლესიის შესასვლელში, კედელზეა მიყუდებული. მარიან ლისტერი თავისი დის დასაფლავებაზე აუცილებლად ჩავიდოდა მარკეტ უიტონიდან. მისი ურთიერთობა ანა უოკერთან ალბათ საკმაოდ ცივი იყო, რადგან ამ უკანასკნელს დარჩა ის, რაც ენმა საკუთარ დას არ დაუტოვა. მარიანმა კიდევ ორმოცდაერთი წელი გაატარა სილარიბეში და 1882 წელს გარდაიცვალა. ალბათ, იზაბელა ნორკლიფი და მარიანა ლოუტონი ეწვივნენ მის უოკერს, რათა უფრო მეტი გაეგოთ ენის გარდაცვალების შესახებ. იზაბელა ხუთი წლის შემდეგ, 1846 წელს, სამოცდაერთი წლის ასაკში გარდაიცვალა. მარიანა ლოუტონმა იცოცხლა 1868 წლამდე და გარდაიცვალა თავისი მეუღლის, ჩარლზის სიკვდილამდე, რომელზეც ერთ დროს ის და ენი ამდენს ოცნებობდნენ.

„შიბდენ ჰოლში“ სარემონტო სამუშაოები თითქმის დასრულებული იყო. დღემდე სახლი იმავე მდგომარეობაშია შემონახული, როგორც ეს ენ ლისტერს ჰქონდა ჩაფიქრებული, თუმცა, დასრულებული ვერსია თავად ენს არასოდეს უნახავს. მხატვარმა ჯოშუა ჰორნერმა დაასრულა ჯეიმს ლისტერის პორტრეტი, რომელიც ენმა გამგზავრებამდე შეუკვეთა. მის უოკერი, რომელიც იცნობდა ენის ბიძას, როგორც ჩანს, კმაყოფილი დარჩა ნამუშევრით, რადგან მან ჰორნერს იმავე ზომის ენის პორტრეტიც დაუკვეთა. ჯოშუა ჰორნერს რამდენჯერმე ჰყავდა ნანახი ენ ლისტერი, მაგრამ მას ენი ნატურიდან არ დაუხატავს. ანა დაეხმარა მას ენის გახსენებაში, აუწერა მისი პოზა, ტანსაცმელი, თმის ვარცხნილობა და ნიმუშისათ-

ვის მხატვრის გადასცა სამოყვარულო მინიატურა, რომლის მიხედვითაც ჰორნერმა ზეთის მოზრდილი ტილო შექმნა. დაუდგენელია, თუ რამდენად ზუსტად წარმოაჩინა ჰორნერმა ენ ლისტერი. „შიბდენ ჰოლის“ მეპატრონეს გარდაცვალების ჟამს, ორმოცდაცხრა წლის ასაკში, აშკარად მეტად ეტყობოდა სიბერის ნიშნები, ვიდრე ნახატზე გამოსახულ ოცდაათი წლის ქალის იდეალიზებულ ვერსიას. ზედა ტუჩზე საეჭვოდ არ ჩანს ბუსუსების ნასახი.

მხოლოდ იმ მოკრძალებული შემოსავლის წყალობით, რაც ენ ლისტერის ანდერძის თანახმად მემკვიდრეობით ერგო მის უოკერს, იგი მიხვდა, თუ რამდენს ფლობდა სინამდვილეში მისი ცოლი. მხოლოდ 4000 გირვანქა იყო დარჩენილი, გაცილებით ნაკლები, ვიდრე ენი იჩემებდა. ანამ ალბათ გააცნობიერა, რომ თავად მან დააფინანსა ენის წარუმატებელი ინვესტიციები. უყვარდა კი იგი ოდესმე ენს? თუ თავიდანვე ატყუებდა მას? პასუხებს ამ კითხვებზე ანა მეუღლის დღიურებსა და წერილებში ეძებდა. არსებობს მინიშნებები იმაზე, რომ სწორედ მან მისცა ცეცხლს ენ ლისტერისა და მარიანა ლოუტონის წერილები.² მას რომ ენის საიდუმლო კოდის გაშიფვრა და მათი ურთიერთობის ადრეული ხანის შესახებ ჩანაწერების წაკითხვა შესძლებოდა, შესაძლოა, ენის დღიურებიც დაეწვა.

ენ ლისტერის გარდაცვალების შემდეგაც, ანა არ შერიგებია თავის ნათესავებს ჰალიფაქსსა და შოტლანდიაში. რა უნდა ეთქვა მას პრისტლებისა და საზერლენდებისათვის? რომ ისინი ყოველთვის მართლები იყვნენ, როცა ენ ლისტერის შესახებ აფრთხილებდნენ? ჯორჯ საზერლენდი ანა უოკერს ადვილად მოსანადირებელ მსხვერპლად მიიჩნევდა. ის ჯერ საკუთარ მეუღლეს, ელისაბედს, არწმუნებდა, რომ მის დას კვლავ სჭირდებოდა სტივენ ბელკომბის სამედიცინო დახმარება. შემდეგ მან სათანადო სამართალწარმოებისათვის დაიქირავა ადვოკატი, რობერტ პარკერი, რათა ანა, საკუთარი ნების წინააღმდეგ, იორკის ფსიქიატრიულ საავადმყოფოში დაეწვინათ. 1843 წლის 9 სექტემბერს საზერლენდები, ექიმის, ადვოკატისა და ჰალიფაქსის კონსტებლის თანხლებით „შიბდენ ჰოლში“ შეიჭრნენ. ანა ბოლო სართულზე, წითელ ოთახში დაიმალა და იქ ჩაიკეტა. სტივენ ბელკომბმა და რობერტ პარკერმა კონსტებლს კარის გაღება სთხოვეს და ისიც ასე მოიქცა – კარი ანჯამებიდან ამოამტვრია. ოთახში საშინელი სიბინძურე იყო, ხოლო საწოლის გვერდზე იდო დატენილი წყვილი პისტოლეტი. ადვოკატმა შესაძლოა ზედმეტად გაზვიადებულად აღწერა სიტუაცია საკუთარი საქციელის გასამართლებლად. დარაბები დახურული იყო – საწოლის გვერდზე ძველი, ბინძური შანდალი ქონით იყო დაფარული, თითქოს სანთელი ზედ ჩამომდნარიყო – წერდა პარკერი, იმის დასამტკიცებლად, რომ ანას ცეცხლთან მართო დატოვება არ შეიძლებოდა, და რომ მას საკუთარი თავისგან დაცვა სჭირდებოდა. ფურცლები სრულიად უწესრიგოდ იყო მიმოფანტული. წითელ ოთახში უამრავი სისხლით მოსვრილი ცხვირსახოცი დაგვხვდა.³ რადგან ანას, როგორც პარკერი წერს, გადაუდებელი სამედიცინო დახმარება სჭირდებოდა, ის

სტივენ ბელკომბის ფსიქიატრიულ საავადმყოფოში დააწვინეს. შეგვიძლია ვივარაუდოთ, რომ ანა უოკერს მართლაც აწუხებდა ფსიქიკური პრობლემები ევროპაში ცოლის ცხედართან ერთად ტრავმული მოგზაურობის შემდეგ. რამდენად სჭირდებოდა მას კლინიკაში დაწვენა და თვალყურის დევნება, სადავოა. ანა საავადმყოფოში უნდა შეხვედროდა ელაიზა რეინს, რადგან ის გარდაცვალებამდე, 1860 წლამდე, იქ ცხოვრობდა. ენ ლისტერის ორივე სატრფო, პირველი და უკანასკნელი, გიჟებად შერაცხეს.

მას მერე, რაც ანა თავიდან მოიშორა, კაპიტან საზერლენდს გამოუჩნდა სხვა ძლიერი კონკურენტი, რომელიც ასევე აცხადებდა პრეტენზიას საზერლენდის ცოლისდის ქონებაზე – ექიმი ჯონ ლისტერი სუონსიდან. ეს უკანასკნელი თავგამოდებით გამოხდა ენ ლისტერის ანდერძის თანახმად „შიბდენ ჰოლის“ მის უოკერისთვის გადაცემას. საზერლენდს კი თავად უნდოდა ამ ქონების ხელში ჩაგდება. „შიბდენ ჰოლის“ მფლობელობაზე მის უოკერის უფლების გასაჩივრებით, ჯონ ლისტერმა საზერლენდი წლების განმავლობაში სამართლებრივ დავებში გახვია. საზერლენდი ამტკიცებდა, რომ მას არა მხოლოდ კანონიერი, არამედ მორალური უფლებაც ჰქონდა „შიბდენზე“ და ხაზს უსვამდა იმას, თუ რა მარტივად შეძლებდა ნებისმიერი ინტრიგანი ან უპრინციპო ადამიანი მის უოკერის მოტყუებასა და შეცდომაში შეყვანას; და უყოყმანოდ ვამტკიცებ, რომ მის ლისტერი სწორედაც რომ ასე მოიქცა. მე გამუდმებით ვადევნებდი თვალყურს მოვლენებს. მან ჯერ უახლოესი ნათესავების მიმართ უნდობლობა და სიძულვილი ჩაუწერა მის უოკერს; მას მერე, რაც ეს გააკეთა, დაარწმუნა მის უოკერი, რომ მისთვის დაეტოვებინა თავისი ქონება და, თითქოს ეს საკმარისი უსამართლობა არ ყოფილიყო უოკერების ოჯახის მიმართ, დაიყოლია ის, რომ მისი ქონებიდან შემოსული შემოსავალი მათი საზღვარგარეთ ყოფნის დროს მის (მის ლისტერის) *ანგარიშზე ჩაერიცხა. იმედოვნებდა თუ არა მის ლისტერი, რომ მის უოკერი ოდესმე დაბრუნდებოდა მოგზაურობიდან, მხოლოდ ღმერთმა იცის!* საზერლენდი ამტკიცებდა, რომ ანა უოკერი კი არ იყო მის ლისტერის მსხვერპლი, არამედ თვითონ: მწვავედ განვიცდი იმ ბარალს, რომელიც მის ლისტერმა მომაცენა მე, ჩემს მეუღლესა და ვაჟს, და განა სხვა ჩემს ადგილას ასე არ იქნებოდა განწყობილი?⁴

მიუხედავად იმისა, რომ საზერლენდმა მოახერხა ჯონ ლისტერ უფროსის დროებით მოგერიება, მან თავისი წარმატების ნაყოფით ვერ იხიერა. იმავე წელს, როცა მან ანა უოკერი ფსიქიატრიულ საავადმყოფოში გამოკეტა, საზერლენდმა თავისი უფროსი ვაჟი, თორმეტი წლის ჯორჯ სეკვილი დაკარგა. მისი მეუღლე, ანას და, ელისაბედი, ერთ წელიწადში, 1844 წელს, სულ რაღაც ორმოცდასამი წლისა გარდაიცვალა. ორი წლის შემდეგ, ქვრივმა ცოლად მოიყვანა ძალიან ახალგაზრდა მერი ელისაბედ ჰეი. საზერლენდი საცხოვრებლად „შიბდენ ჰოლში“ გადავიდა ცოლთან, თავის ორ ქალიშვილთან და ცხრა წლის ევან ჩარ-

ლზთან ერთად. მაგრამ მას არ ეწერა დიდი ხნით დამტკბარიყო გამარჯვებით და სოფლის ძველი მამულის ბატონობით. ჯორჯ საზერლენდი ერთი წლის შემდეგ, ორმოცდაცხრა წლის ასაკში გარდაიცვალა. მან თავის შვილს დაახლოებით 30 ათასი გირვანქა სტერლინგის ოდენობის მემკვიდრეობა დაუტოვა.

ამ დროისთვის, ანა უოკერი საცხოვრებლად ლაითკლიფში დაბრუნდა. იორკის ფსიქიატრიულ საავადმყოფოში ორი წლის გატარების შემდეგ, უოკერის ოთხმოცდარვა წლის დეიდას ანა შეეცოდა და 1845 წელს ის „კლიფ ჰილში“ დააბრუნა. ანა უოკერი უფროსი ორი წლის შემდეგ გარდაიცვალა, კაპიტან საზერლენდის გარდაცვალების წელს. ორმოცდაოთხი წლის ანა უოკერმა მისგან მემკვიდრეობით მიიღო სამართლებრივი დავა ჯონ ლისტერ უფროსთან, რომელმაც ველარ გაასაჩივრა ანას კანონიერი უფლება ქონებაზე. მაგრამ, ანა „კლიფ ჰილში“ დარჩა და სიკვდილამდე იქ ცხოვრობდა ირლანდიელ მედდასთან ერთად. ის ორმოცდათერთმეტი წლის ასაკში, 1854 წელს გარდაიცვალა. მან თავის დისშვილს უანდერდა ის, რაც ენ ლისტერმა და ჯორჯ საზერლენდმა დაუტოვეს, დაახლოებით 2000 გირვანქა სტერლინგი – მცირე ნაწილი იმისა, რაც მას ერთ დროს გააჩნდა.

ევან ჩარლზ საზერლენდმა უოკერების მთელი ქონება გაანიავა და შოტლანდიაში დაბრუნდა. მან უოკერების საგვარეულო მამული ლაითკლიფში – „ქროუ ნესტი“, მიჰყიდა ტიტუს სოლტს – ბრედფორდში მშრომელებისათვის სოლტერის სანიმუშო სოფლისა და „სოლტ მილის“ დამფუძნებელს. ანა უოკერის მშობლების სახელი აღარ არსებობს; იქაური მიწები გოლფის მოედნებადაა გადაკეთებული. დიდი და ტევადი „კლიფ ჰილი“ ცალ-ცალკე ბინებადაა დაყოფილი. ლიდგეიტი, სადაც ანა ცხოვრობდა მაშინ, როდესაც ენს შეხვდა, ახლა ახალი სახლებით არის გარშემორტყმული. იმ დროიდან, როცა ენ ლისტერი ხშირად სტუმრობდა იქ, მხოლოდ ძველი მამულის კედლებიღაა შემორჩენილი.

ჯონი, მურიელი, ვივიენი, ფილისი, ჰელენა, ჯილი და ანგელა

1855 წელს, ანა უოკერის გარდაცვალებიდან ერთი წლის შემდეგ, ჯონ ლისტერ უფროსმა „შიბდენ ჰოლი“ დაიკავა. ამის შემდეგ ექიმი დროს ხან უაიტის კუნძულზე ატარებდა სამუშაოდ, და ხან ჰალიფაქსში, თავის ახალ სახლში, სადაც მისი ცოლი, ლუიზა ანა ლისტერი (ქალიშვილობაში გრანტი), მათ სამ შვილს, ჯონ უმცროსს, ჩარლზს და ენს ზრდიდა. 1856 წელს ექიმმა ლისტერმა გაყიდა „ნორსგეით ჰაუსი“, სადაც 1961 წელს, მის დანგრევამდე, სასტუმრო ფუნქციონირებდა, როგორც ეს ენ ლისტერს ჰქონდა დაგეგმილი. ენის კაზინოს იყენებდნენ თეატრისა და კინოს დარბაზად.

1867 წელს ჯონ უმცროსი (1847–1933) „შიბდენ ჰოლის“ მფლობელი გახდა. როგორც პროლოგში გიამბეთ, სწორედ ჯონმა დაიწყო ენ ლისტერის ცხოვრების კვლევა „ჰალიფაქს გარდიანში“ გამოქვეყნებულ სერიებში „სოციალური და პოლიტიკური ცხოვრება ჰალიფაქსში ორმოცდაათი წლის წინ“ (1887–1892). თავისი ტორი დეიდისგან განსხვავებით, ის „დამოუკიდებელი ლეიბორისტული პარტიის“ დამფუძნებელი წევრი და ხაზინადარი იყო, მხარს უჭერდა მუშათა უფლებებს, აწყობდა უფასო სასაბილოებს გაფიცულებისთვის და 1893 წლის საყოველთაო არჩევნებში ერთ-ერთი პირველი ლეიბორისტი კანდიდატი იყო ჰალიფაქსში, მაგრამ ლიბერალ კანდიდატთან წააგო. „ჰალიფაქსის ანტიკვარიატის საზოგადოების“ დამფუძნებელმა პრეზიდენტმა, ათწლეულების მანძილზე იმაზე მეტი ფული ჩადო საქველმოქმედო საქმიანობაში კულტურული დაწესებულებებისა და სკოლების დასახმარებლად, ვიდრე „შიბდენ ჰოლს“ შემოჰქონდა. 1923 წელს ის გაკოტრების პირას იყო. მისი დიდი მიღწევების გამო ქალაქმა ჰალიფაქსმა მისგან „შიბდენ ჰოლი“ შეიძინა და მასვე უბოძა მისი მფლობელობა სიცოცხლის მანძილზე. 1926 წელს უელსის პრინცმა ედუარდმა, დედოფალ ელისაბედ II-ის ბიძამ, ფართო საზოგადოებისათვის გახსნა ენ ლისტერის დეკორატიული ბაღი. სამწუხაროდ, მისი ხავსის ქოხი არ არის შემორჩენილი, ალბათ, სარკინიგზო სამუშაოებს შეეწირა.

1934 წელს „შიბდენ ჰოლი“ მუზეუმად გადაკეთდა; ახლა სტუმრებს შეუძლიათ ენ ლისტერის საწერი მასალებისა და ყალბი კულულების ნახვა; სახლისა და ბაღების დათვალიერების შემდეგ, თუ წახემსება ან სადილი მოგინდებათ, შეგიძლიათ გაუყვეთ იმ საცაღფებო ბილიკს, რომელიც 1837 წელს დედოფალ ვიქტორიას კორონაციის აღსანიშნავად საზეიმოდ გახსნა ენმა, და გოდლის შესახვევში, ენის „სტამპ ქროს ინში“ შეიაროთ. დღეს იქ უკვე ყველას, მიუხედავად პოლიტიკური მრწამსისა, შეუძლია იქ დაღევა.

1933 წელს, ჯონ ლისტერის გარდაცვალების შემდეგ, „შიბდენ ჰოლი“ სტაჟიორმა ბიბლიოთეკარმა – მურიელ გრინმა (1909–1997) დაათვალიერა. თაროები წიგნებით იყო გადავსებული, რაც თაროებზე არ ეტეოდა, სკამებზე, მაგიდებსა და იატაკზე იყო მიმოფანტული. სახლი სავსე იყო საბუთებით გატენილი მოზრდილი, მტვრიანი ჩემოდნებით; რას არ იპოვიდით აქ – საიჯარო დოკუმენტაციას, ანდერძებს, ანგარიშებს, რეცეპტებს, გარდაცვალების ცნობებს, დღიურებს, წერილებს და ა.შ. შიგადაშიგ კიდევ ერთი ხელნაწერებით სავსე ყუთი ან ჩემოდანი გამოჩნდებოდა სახლის რომელიმე ნაწილში ნაგვის გროვის ქვეშ მიმაღული.¹ რამდენიმე წლის განმავლობაში გრინმა „შიბდენ ჰოლის“ საბუთების ნუსხა შეადგინა და ნაწილებად დაყო. თავისი სადისერტაციო კვლევისთვის გრინმა ენ ლისტერის 1850 შემორჩენილი წერილიდან 395 მათგანის ასლი გააკეთა და თან სარედაქციო შენიშვნები დაურთო. მან ჯონ ლისტერის „კარადაში“ ნაპოვნი დღიურები გამოიყენა დათარიღების-

თვის და სხვა შეცდომაში შემყვანი, რთული დეტალების დასაზუსტებლად. არტურ ბარელისეული შიფრის გასაღების წყალობით, გრინი მიხვდა, თუ ვისთან ჰქონდა საქმე და გადაწყვიტა წერილების კრებულში – „გაბედული იორკშირელი ქალი: „შიბდენ ჰოლელი ენ ლისტერის წერილები, დ. 1791 გ. 1840“ (1938) – არ აღენიშნა ის ფაქტი, რომ ენი ქალების მოყვარული იყო. მან მოგვიანებით განაცხადა, რომ „ეს ლისტერების ოჯახის უმწიკვლო სახელს ჩირქს მოსცხება“.²

შემდეგი მეცნიერი, რომელიც ენ ლისტერს იკვლევდა, იყო ისტორიკოსი ვივიენ ინგემი (დაახლ. 1918–1969). მას დღიურებთან პირველი შეხება 40-იან წლებში ჰქონდა, როდესაც ამ პერიოდის კაბების მოდას იკვლევდა. 1958 წლამდე მან დრო ვერ გამონახა და არ მიეცა შესაძლებლობა, დაეწყო მუშაობა ამ უზარმაზარ მასალაზე. ამჯერად, ჩვენდა სასიკეთოდ, ჩემი მეგობარი და კოლეგა, ბაკალავრისა და დოქტორის ხარისხის მფლობელი, მისის ფილის მ. რამსდენი შემომიერთდა. ჩვენ დავასკვნით, რომ, სავარაუდოდ, ეს დღიურები აქამდე მთლიანად არავის წაუკითხავს და სწორედ ამის გაკეთება დავისახეთ მიზნად.³ დოქტორი ფილის მ. რამსდენი (ქალიშვილობაში ქროუთერი) დაქორწინებული იყო „ჰალიფაქს კურიერის“ რედაქტორზე და იმედოვნებდა, რომ დღიურებში მიაგნებდა უფრო ზოგად, ფართო საზოგადოებისათვის საინტერესო მასალას.⁴ ვივიენი და ფილისი ერთად თერთმეტი წელი გულდასმით ეცნობოდნენ დღიურებს; მათ ოცდაათხნაწილიანი ტომეულის თითოეული ნაწილი ორჯერ წაიკითხეს. ენის საიდუმლო შიფრის გასაღების დახმარებით, ერთად გაიკვლიეს გზა ლესბოსური სექსის აუარებელ აღწერებში. ეხებოდა მათი იდაყვები ერთმანეთს? ხელები გადაჯვარედინებული ჰქონდათ? ჰქონდა რამსდენს მიზეზი, ეჭვი შეეტანა გაუთხოვარ ვივიენ ინგემში?

ორი მეგობარი არ შეთანხმებულა იმაზე, თუ როგორ წარმოადგენდნენ ენ ლისტერის სასიყვარულო ისტორიებს მომავალ გამოცემებში. 1967 წელს ინგემმა ლონდონის უნივერსიტეტში დაიწყო დისერტაციის წერა თემაზე – „ენ ლისტერის ცხოვრება“; მრჩევლის, ოლივ ანდერსონის თანახმად, აპირებდა განეხილა ენის ლესბოსელობა (რისი უგულებელყოფაც, ცხადია, არ შეიძლებოდა).⁵ ინგემმა რამდენიმე თავის მონახაზი გააკეთა ენ ლისტერის მოგზაურობებზე და 1968 წელს „ალპურ ჟურნალში“ გამოაქვეყნა სტატია ვინმალის მწვერვალის დაპყრობის შესახებ – ეს იყო პირველი პუბლიკაცია ენ ლისტერზე „ჰალიფაქს გარდიანში“ დაბეჭდილი ჯონ ლისტერის სტატიების სერიის შემდეგ. ინგემმა ენი წარმოსახა უშრეტი ენერგიისა და მასკულინური მიდრეკილებების მქონე ძლიერ ქალად.⁶ ჰალიფაქსის ანტიკვარული საზოგადოებისათვის იმავე სტატიის ვრცელ ვერსიაში მან თავისი არაპირდაპირი მინიშნება გადაასხვაფერა: თავისი დროის სტანდარტების მიხედვით, მაღალი იყო და გრძელ, შავ პალტოსა და სქელი ტყავის ჩექმებში გამოწყობილი, ადვილად შეიძლებოდა, კაცი გგონებოდა.⁷ 1969 წლის აპ-

რილში, როდესაც ეს მეორე სტატია დაიბეჭდა, ვივიენ ინგემი უკვე ცოცხალი აღარ იყო. მისი დაუმთავრებელი დისერტაცია ფილის რამსდენს ერგო.

ინგემის გარდაცვალების შემდეგ, რამსდენმა სცადა ენ ლისტერის დღიურების დაშიფრული პასაჟებისთვის საკუთარი ინტერპრეტაცია მიეცა. ინგემმა დღიურებში ზოგადი ინტერესისთვის ყურადსაღები არაერთი დეტალი აღმოაჩინა და წერდა, რომ ვერავინ, ვისაც დღიურის კვლევაზე სერიოზული პრეტენზია ჰქონდა, ამისთვის გვერდის ავლას ვერ მოახერხებდა;⁸ ხოლო, ფილის რამსდენი კატეგორიულად ეწინააღმდეგებოდა ამ მოსაზრებას. ის საკუთარი სქესის მიმართ სასიყვარულო გრძნობებს ამჟღავნებდა, – აღიარებს რამსდენი თავის სტატიაში „ენ ლისტერის დღიური“ (1970); მას ბუნებრივად იზიდავდნენ ყველაზე ლამაზი, მხიარული, კეთილგანწყობილი და საშინაო საქმეში დახელოვნებული ქალები. თუმცა, ამასთანავე აღნიშნავს, რომ: მის დღიურებში დაშიფრულია ვრცელი, სენტიმენტალური მიმოწერა მეგობრებთან, რაც თანამედროვე გონებისთვის მეტად მოსაწყენია. ფილის რამსდენი გულმოდგინედ შეუდგა იმ ყველაფრის დაფარვას, რისი გამომჟღავნების იმედიც ვივიენ ინგემს ჰქონდა. ბუნებრივია ვივარაუდოთ, რომ ამ საიდუმლო პასაჟებს განსაკუთრებული მნიშვნელობა აქვს და ნებისმიერი გზით უნდა მოხდეს მათი გაშიფვრა. საბედნიეროდ, ასე სულაც არ არის საქმე. იშვიათი გამონაკლისების გარდა, „დაშიფრული“ ანბანით გადმოცემული მონაკვეთები ისტორიულ ინტერესს სრულებით არ აღძრავს. როგორც წესი, ეს პასაჟები ეხება საოჯახო და ფინანსურ საკითხებს, ამ მონაკვეთების ამოცნობა მათი კონტექსტის მიხედვით მარტივია და მათი გაშიფვრაც დიდ დროს არ მოითხოვს. ამასთანავე, სხვა „დაშიფრული“ პასაჟები, რომლებიც წმინდად პირადულ თემებს ეხება, გრძელი და მოსაწყენია; და რაც უფრო გრძელია პასაჟი, მით უფრო დარწმუნებით შეიძლება ითქვას, რომ მის გაშიფვრაზე დროის დაკარგვა ნამდვილად არ ღირს.⁹

მრავალწლიანი კვლევის მიუხედავად, რამსდენმა მხოლოდ ერთი სტატია გამოაქვეყნა ენ ლისტერზე. ოლივ ანდერსონი მიიჩნევს, რომ დასავლეთ იორკშირის არქივში დაცულ კოლექციას – „რამსდენის მასალები“, წესით, „ინგემის მასალები“ უნდა ეწოდებოდეს. კრებულში მოცემულია გრძელი ტექსტები ენ ლისტერის მოგზაურობის შესახებ, ქრონოლოგიები და დათარიღებული ამონარიდები დაშიფრული პასაჟებიდან.

რამსდენი 1985 წელს გარდაიცვალა ისე, რომ ვერ მოესწრო ენ ლისტერის დღიურებიდან ამონარიდების, მათ შორის დაშიფრული პასაჟებიდან დეტალური ციტირებების გამოქვეყნებას. ჰელენა უაითბრედი (დ. 1931 წელს), მოწიფული სტუდენტი და ოთხი შვილის დედა, მასალებს ენ ლისტერის შესახებ შემთხვევით წააწყდა. 1984 წელს თავის მშობლიურ ქალაქ ჰალიფაქსში, კალდერდეილის რეგიონულ არქივში, ის საკვლევ პროექტს ეძებდა. იცოდით, რომ ის

დღიურებს წერდა?¹⁰ – ჰკითხა მას არქივარიუსმა და მიკროფოტოფირზე აჩვენა დაშიფრული გვერდი, რომელზეც გული ნამდვილად არ მიგივიდოდა, მაგრამ ჰელენა უაითბრედი მყისიერად მოიხიბლა. ისარგებლა შიფრის გასაღებით და ერთი კვირის მანძილზე ლისტერის დღიურების ორმოცდაათი გვერდის ასლი დაამზადა. 1988 წელს მან გამოაქვეყნა – „საკუთარი გულის ხმა მესმის: ენ ლისტერის დღიურები 1791–1840“, რომელშიც წარმოდგენილი იყო ამონარიდები 1817–1824 წლებიდან. 1992 წელს გამოვიდა – „არ მყავს სხვა ქურუმი სიყვარულის გარდა: ენ ლისტერის დღიურები 1824–1826“. ბრიტანული საზოგადოების ერთი ნაწილი ამ ამბავმა შოკში ჩააგდო. დაირხა ხმები, რომ დღიურები ყალბია, მაგრამ ეს მითქმა-მოთქმა მალევე მიწყნარდა. ენ ლისტერის დღიურმა გამოაშკარავა ქალებს შორის უბიწო „რომანტიკული მეგობრობის“ შესახებ ელისაბედ მავორის (1971) და ლილიან ფადერმანის (1981) იდეის მცდარობა. როდესაც 2010 წელს ბიბისის „ლამაზად შეფუთული“ სატელევიზიო დრამა – „მის ენ ლისტერის საიდუმლო დღიურები“, გამოვიდა, უაითბრედის პირველი წიგნის ახალი გამოცემაც იმავე სათაურით დაიბეჭდა, დამატებითი, 1816 წლის ამონარიდების თანხლებით.

ჰელენა უაითბრედის პიონერული გამოცემების შემდეგ, ოთხმოცდასამი წლის მურიელ გრინმა რედაქტირება გაუკეთა საბეჭდო მანქანაზე აკრეფილ 541 გვერდს, შეამოკლა, ნახევარზე მეტი მასალა ამოაკლო და 1992 წელს გამოაქვეყნა: „შიბდენ პოლელი მის ლისტერი: რჩეული წერილები (1800–1840)“.

ამ დროს, ისტორიკოსმა ჯილ ლიდინგტონმა (დ. 1946 წელს) საკუთარ თავზე აიღო ენ ლისტერის დღიურების მთლიანად გადაწერისა და ციფრულ ფორმატში გადაყვანის ვალდებულება. დაფინანსების მოსაპოვებელი განაცხადის შევსებისას, ლიდინგტონი ითვლიდა სიტყვების რაოდენობას და, მისდა გულის გასახეთქად,¹¹ ოთხი მილიონი სიტყვა მიიღო. ლიდინგტონის შეფასებით, ენ ლისტერის დღიურების სრული ასლის გაკეთებას ცხრა წელი დასჭირდებოდა. ამიტომ ის თავის პროექტში შემოიფარგლა აქამდე უცნობი პასაჟებით, რომლებიც ანა უოკერთან ურთიერთობას ეხებოდა. თავის სხვა გამოცემებში – „ქალთა ბედი: მიწა, სქესი და უფლებამოსილება. ენ ლისტერის დღიურები და სხვა ნაწერები 1833–36 (1998)“, „ბუნების სამფლობელო: ენ ლისტერი და სურვილის ლანდშაფტი (2003)“, ასევე, არაერთ სტატიაში, ლიდინგტონი იკვლევს ენ ლისტერის პოლიტიკურ და სამეწარმეო საქმიანობას.

ენ ლისტერთან იგივე გამოცდილება მქონდა, რაც მის ცხოვრებაში არსებულ არაერთ ქალს – ჯერ მაცდუნა, შემდეგ კი მიღალატა. ის, რაც იმაზე მეტად მომეწონა, ვიდრე ენ ლისტერის საოცრად გულახდილი საუბარი თავის სურვილზე, მისი საკუთარ თავში დარწმუნებულობაა: ვნებიანი იყო მისი ბუნება, ეს იყო და ეს. მან იცოდა თავისი უცნაურობების შესახებ და ყველაფერი გააკეთა იმისათვის, რომ

ამის შესახებ ჰალიფაქსსა და იორკში მეტ-ნაკლებად ყველას გაეგო. თუმცა, მისი საყვარლების უმეტესობა თავს უჩვეულო და უცნაურ ქალად არ მიიჩნევდა. კდემამოსილ პრევიქტორიანულ ეპოქაში, როგორც ეს ჩვენ წარმოგვედგინა, ქალთა სიყვარული არ უკავშირდებოდა დიდ რისკს და არ იწვევდა სავალალო შედეგებს, ეს არასწორად არ მიაჩნდათ. ქალები, უბრალოდ, ამაზე არ ლაპარაკობდნენ და შემდეგ რეპუტაციის შელახვის გარეშე ქორწინდებოდნენ. ანა უოკერი ენ ლისტერივით გაბედული აღმოჩნდა, საცხოვრებლად ერთად გადასვლა და ეკლესიის წინა რიგის მერხზე ერთად ჯდომა იმ დროისთვის ნამდვილად თამამი საქციელი იყო. მიუხედავად ანონიმური საქორწინო განცხადებებისა, რომლებითაც კაპიტან ტომ ლისტერსა და ანა უოკერს დასცინოდნენ, ორმა ქალმა ერთად ჩაუყარა საფუძველი „ნორსგეით ჰილს“. დაუფარავი ურთიერთობის მქონე წყვილის ისტორია მნიშვნელოვანი ემანსიპატორული ეტაპია ლესბოსური სიყვარულის ისტორიაში.

მიუხედავად ყველაფრისა, ენ ლისტერი ნამდვილი მხეცი იყო. ისევე როგორც ვერცერთი მისი საყვარელი, ვერც მე გავეჩეცი ამ დასკვნას და თან, მას მაინც ვერ დავანებე თავი. ძველმოდურ ენაზე დაწერილი პასაჟები სექსზე საოცრად მშვენიერი იყო. და მერე ყველაფერი დამთავრდა.

ეპილოგი:

როგორ წავიკითხოთ ენ ლისტერის ნაწერები

იტალიაში – ექვსას ორმოცი;
გერმანიაში – ორას ოცდათერთმეტი;
ასი საფრანგეთში, თურქეთში ოთხმოცდათერთმეტი;
ხოლო ესპანეთში – ათას ერთი!ⁱ

მოცარტისა და და პონტეს ტრაგედიაში, „დონ ჯოვანის“, მექალთანე გმირის მსახური, ლეპორელო, საოცარი იუმორით უხსნის საცოდავ ელვირას, რომ მხოლოდ ის არ იტანჯება: *Madamina, il catalogo è questo*ⁱⁱ. დონ ჯოვანის უბრალოდ უყვარს ყველა ქალი, მაღალი და დაბალი, მსუქანი და გამხდარი, ქერა და შავგვრემანი,

- i. თარგმანი იტალიურიდან, ნაწყვეტი ოპერის „დონ ჯოვანი“ ლიბრეტოდან, აქტი პირველი, სცენა V (მთარგმნ. შენ.).
- ii. *Madamina, il catalogo è questo* (იტალ.) – ქალბატონო, ესაა კატალოგი (მთარგმნ. შენ.).

ახალგაზრდა და მოხუცი, ლამაზი და მახინჯი, გრაფინია და გლეხის ქალიშვილი. და ის, ლეპორელი, გულდასმით აწარმოებს თავისი ბატონის მიერ დაპყრობილი გულების კატალოგს. ენ ლისტერი თავისი დღიურებით ჰგავდა ორივეს, – დონ ჯო-ვანის და ლეპორელის.

ენ ლისტერმა დღიურის წერა ელაიზა რეინის წერილებისა და ელაიზა რეინის-თვის მიწერილი წერილების სიის შედგენით დაიწყო და, ლეპორელის მსგავსად, ენი წერდა, რათა საკუთარი მოგონებები შემოენახა. მესამე ტომის ის ნაწილი, რომელშიც აღვწერ ჩემს ინტრიგას ენ [ნენც] ბელკომბთან, ყურადღებით გადავიკითხე და გულში გავიფიქრე: „ოჰ, ქალები, ქალები!“ ვფიქრობდი მის ვალენსიზმეც, რომელიც, სხვათა შორის, ენს არაფრით ჩამოუვარდება, რომელმაც თამამად მიმიღო ისეთი, როგორიც ვარ. ასევე, გამართო მის ბრანუნის ამბავიც, მოკლედ რომ აღვწერ. სულ ასეა, ხან ერთთან ვარ, ხან მეორესთან. როდის უნდა გამოვსწორდე?¹ თუ ლეპორელი მხოლოდ ქალების აღწუსხვას აწარმოებდა, ენ ლისტერი ისტორიებს ჰყვებოდა და სჯეროდა, რომ ყველაფერს გადმოსცემდა ზუსტად ისე, როგორც სინამდვილეში იყო, რათა შემდგომში შეძლებოდა მათი ცივი გონებით განხილვა.² წერისა და ენის მიმართ ყოველგვარ უნდობლობასა და ეჭვს მოკლებული მის ლისტერი თავის სტილს ნეიტრალურად და ობიექტურად მიიჩნევდა.

ენ ლისტერს არც საკუთარ თავში ეპარებოდა ეჭვი. არა მგონია, რომ ცხოვრებაში ოდესმე ჩამედინოს უგულო საქციელი – წერდა ის; მწამს, რომ ჩემთან უფრო ხშირად სცოდავდნენ, ვიდრე მე ვცოდავდი სხვების მიმართ.³ არ არის სახარბიელო, მაგრამ არაფერზე არ გავცვლიდი.⁴ მთელი ცხოვრება სურდა, გვერდით ჰყოლოდა ისეთი ადამიანი: ვისაც პატივს ვცემ და ვისზეც ვიზრუნებ, და მუდამ ჩემთან ერთად იქნება. მაგრამ არც ერთ ქალს, რომელსაც მასზე დაქორწინება უნდოდა, არც ელაიზა რეინს, არც იზაბელა ნორკლიფს და არც მარია ბარლოუს და, რაღა თქმა უნდა, არც ანა უოკერსა და არც მარიანა ლოუტონს, ენი ამ როლისთვის შესაფერისად არ მიიჩნევდა. ენ ლისტერის ცხოვრების სიყვარულს მისივე საკუთარი თავი წარმოადგენდა.

მან მთელი თავისი ყურადღება თავის ეგოს, თავის არსებას, სხეულსა და საკუთარ სამყაროს მიაპყრო. სწორედ ეს ეგო იყო მიზეზი იმისა, რომ წერდა: ახლა, როცა ვწერ, ზუსტად 6:05 საათია და წერაში გატარებული ბოლო 2½ საათის განმავლობაში ჭირვეული მეღანქოლიიდან კმაყოფილ მხიარულებამდე მივედი.⁵ ამისთვის გვერდით სხვა ქალი არ სჭირდებოდა: თითქოს მივმართავ მეგობარს, რომელიც მოთმინებით მისმენს, ერთგულია და ნათქვამს არავის უმხელს და იქიდან გამომდინარე, რომ არასდროს არაფერი ავიწყდება, ყოველთვის მზად არის შეადაროს ერთმანეთს წარსული და აწმყო და ამით განამტკიცოს მომავალი.⁶ ეს მისმა საყვარლებმაც იცოდნენ. თითოეული მათგანი ეჭვიანობდა ენის დღიურებზე საკუთარი თავისადმი მიძღვნილ ამ დიდ სასიყვარულო წერილზე.

ცხოვრების წვრილმანი დეტალების ჩაწერით გატაცებული ენ ლისტერი წარმოდგენლად შრომობდა თავის დღიურებზე, ეს მისი დაუძლეველი სწრაფვა იყო. ის წერდა მანამდეც, სანამ თავის მაგიდას მიუჯდებოდა, ის წერდა ცხოვრების პარალელურად – როგორც ყოველთვის, ფანქრით ჩანაწერების გაკეთება დავიწყე⁷ – რეალობას კალმით ხელში განიცდიდა. თავის ყოველდღიურ ჩანაწერებში მის ლისტერი ციტირებდა არა მხოლოდ ნაწყვეტებს იმ წიგნებიდან, რომლებსაც კითხულობდა, არამედ მოჰყავდა გრძელი ამონარიდები წერილებიდან, რომლებსაც ღებულობდა; ის ხან საკუთარი ხელით იწერდა ციტატებს და ხან ბეჭდურ მასალას ურთავდა თავის დღიურებს. მხოლოდ ის, რასთანაც წერით შედიოდა შეხებაში, ხდებოდა მისთვის ჭეშმარიტი და მნიშვნელოვანი. მისი დღიური საკუთარი ცხოვრების ტექსტის სახით ჩამოყალიბებისა და ამით მისი გაორმაგების მასშტაბური მცდელობაა: ჩემი დღიურის გადახედვა და შევსება ყოველთვის სიამოვნებას მანიჭებს. თითქოს თავიდან გავდივარ ჩემს ცხოვრებას.⁸

რაც შეეხება მის ჩანაწერებში არსებულ ინფორმაციას, შემოკლების გარეშე მათ საექვო ღირებულება აქვთ და არც მაინცდამაინც საინტერესო არაა. ეგოცენტრული განურჩევლობით ისინი „სელფის“ ბანალურ უნიკალურობას უსწრებენ წინ. ენ ლისტერის დღიურს საერთო არაფერი აქვს საოპერო ლიბრეტოსთან, ლიტერატურასთან – ეს არის ტექსტობრივი ფორმის მქონე სოციო-ისტორიული მოვლენა, რომელშიც აღწერილია ყველა და ყველაფერი. ლისტერს განსაკუთრებით აინტერესებდა საკუთარი სხეული და მასზე ისეთი აქცენტი გააკეთა, როგორიც მანამდე სხვა არც ერთ მწერალს არ გაუკეთებია. მოხიბლული მასში მიმდინარე ნებისმიერი ძვრებით, ნებისმიერი გაფაჩუნებით, ლისტერი ყველაფერს ჩაწერის ღირსად თვლიდა. და ეს იმ დროს, როდესაც ქალის სხეული სულ უფრო მეტად ხდებოდა ტაბუირებული და კაცების მიერ დომინირებულ დისკურსში მოიხსენიებოდა, როგორც მამაკაცთა ვნების შთაგონების ობიექტი, რომელიც თავად მსგავს გრძნობებს არ განიცდის. გერმანელი ფილოსოფოსი იოჰან გოტლიბ ფიხტე ზემოთქმულს ასე აჯამებდა: არავითარი სექსუალური სწრაფვა არ არის გამოხატული შეურყვნელ ქალში და მასში არ არსებობს არანაირი სექსუალური სწრაფვა, გარდა სიყვარულისა; და ეს სიყვარული ქალის ბუნებრივი მისწრაფებაა, დააკმაყოფილოს კაცი. ეს არის მისწრაფება, რომელიც დაჟინებით ისწრაფვის საკუთარი დაკმაყოფილებისაკენ: თუმცა, არა ქალის, არამედ მამაკაცის სენსუალური დაკმაყოფილებისაკენ; ქალისთვის ეს მხოლოდ სულიერი კმაყოფილებაა.⁹

ენ ლისტერს ხმამაღლა გაეცინებოდა მისი თანამედროვის მტკიცებაზე. ვიქტორიანული ეპოქის მიჯნაზე მან აღწერა ქალის სხეულებრივი, თამამი გამოცდილება. საკუთარი სურვილებით გამოწვეულმა სიხარულმა და მათი

დაკმაყოფილების სირთულეებმა განსაზღვრა მისი ცხოვრება და, შესაბამისად, დღიურების სპეციფიკაც. წერამ მისი სურვილების ადგილი დაიკავა, განავრცო, განაახლა. სექსუალური სიამოვნება წერის აქტის დროს მეორდება. მის დღიურში სექსუალობა ტექსტად იქცევა; სხეული და ცხოვრება – ანბანად. როგორც სასურველმა ქალმა და მწერალმა, ენ ლისტერმა თავის დღიურში შექმნა საკუთარი თავი, საკუთარი წერილობითი სხეული, თავისი ცხოვრების რომანი.

მთარგმნელი ნინო მიქაშავიძე,
რედაქტორი ნინო ბექიშვილი.

სტატია ითარგმნა შემდეგი გამოცემის მიხედვით:
Angela Steidele, Gentleman Jack: A Biography of Anne Lister: Regency Landowner, Seducer and Secret Diarist, MSB Mattes&Seitz Berlin Verlagsgesellschaftmbh, Berlin, 2017 (pp: 1-3, 226-274)

ბიბლიოგრაფია:

პროლოგი: ენ ლისტერის

დღიურების გაშიფვრა

1. Inventory from 1850, item 206, Liddington 1994, 12.
2. Liddington 1994, 15.
3. W1, xiv.
4. Liddington 1994, 15.
5. Liddington 1994, 17.
6. Liddington 1994, 20.
7. Müller 1891.

ჰალიფაქსიდან მოსკოვში

1. To Messrs Hammersleys & Co., 28 Apr. 1836, G1, 488.
2. To Vere Cameron, 13 Jan. 1840, G2, 192.
3. Ca. 7/12 July 1839, RAM: 10, 9.
4. To Mariana Lawton, 18 Nov. 1839, G1, 512 f.
5. To Mariana Lawton, 18 Nov. 1839, G1, 513.
6. 14 Aug. 1839, RAM: 10, 8.
7. To Mariana Lawton, 18 Nov. 1839, G1, 513.
8. To Vere Cameron, 13 Jan. 1840, G2, 193 f.
9. To Mariana Lawton, 18 Nov. 1839, G1, 513.
10. To Vere Cameron, 13 Jan. 1840, G2, 194.
11. To Mariana Lawton, 18 Nov. 1839, G1, 513 f.
12. To Marian Lister, 3 Feb. 1840, G1, 524.
13. To Mariana Lawton, 18 Nov. 1839, G1, 513.
14. 16 Sep. 1839, RAM: 10, 12.
15. 8–17 Sep. 1839, RAM: 10, 11 f.
16. To Mariana Lawton, 18 Nov. 1839, G1, 514.
17. 12 Oct. 1839, RAM: 11, 2.
18. 20 Oct. 1839, RAM: 11, 6.
19. To Vere Cameron, 13 Jan. 1840, G2, 196.
20. [Oct.] 1839, RAM: 11, 4.
21. [Late Nov.] 1839, RAM: 11, 7.
22. 31 Oct. 1839, RAM: 52–76.
23. [Nov. 1839], RAM: 11, 14.
24. 28 Jan. 1840, RAM: 11, 14.
25. To Vere Cameron, 13 Jan. 1840, G2, 197.
26. 3 Nov. 1839, RAM: 11, 13.
27. 11/16/19 Nov., 8 Dec. 1839, RAM: 52–76.
28. 16/18 Dec. 1839, RAM: 52–76.
29. 20/21 Dec. 1839, RAM: 52–76.
30. [Dec.] 1839, RAM: 12, 3.

31. 23 Jan. 1840, RAM: 12, 5.
32. 16/17 Jan. 1840, RAM: 12, 9, 10 f.
33. 23 Jan. 1840, RAM: 52–76.
34. 26/27 Dec. 1839, 24 Jan. 1840, RAM: 52–76.
35. [2 Feb. 1840], RAM: 11, 14.

მოსკოვიდან კავკასიაში

1. 9–11 Feb. 1840, RAM: 13, 2–5.
2. 12 Feb. 1840, RAM: 13, 6.
3. 5 Mar. 1840, RAM: 14, 7.
4. 24 Feb. 1840, RAM: 13, 13.
5. 21 Feb. 1840, RAM: 15, 3.
6. 28 Feb. 1840, RAM: 13, 16 f.
7. 5 Mar. 1840, RAM: 15, 6.
8. 24 Feb. 1840, RAM: 13, 13.
9. 11 Mar. 1840, RAM: 14, 14.
10. 11 Mar. 1840, RAM: 15, 7–8 and letter to Mariana Lawton, 4 May 1840, G2, 202.
11. 4–6 Mar. 1840, RAM: 14, 6, 8–10.
12. 9 Mar. 1840, RAM: 14, 6, 12.
13. 12 Mar. 1840, RAM: 14, 15.
14. To Mariana Lawton, 4 May 1840, G2, 202.
15. 17 Mar. 1840, RAM: 52–76.
16. [Mid] Mar. 1840 RAM: 16, 3.
17. 22 Mar. 1840, RAM: 16, 7.
18. 30/26 Mar. 1840, RAM: 16, 14, 9.
19. 28 Mar. 1840, RAM: 16, 12.
20. 1 Apr. 1840, RAM: 16, 16 f.
21. 3 Apr. 1840, RAM: 16, 17, 19.
22. To Alexandrine Panina, 23 Apr. 1840, G1, 532.
23. 4/5 Apr. 1840, RAM: 17, 1, 2.
24. Pushkin, 1919.
25. 8 Apr. 1840, RAM: 17, 8.
26. ქართული სახელები მოცემულია თანამედროვე ინგლისური ტრანსლიტერაციის მიხედვით.
27. 9 Apr. 1840, RAM: 17, 9 f.
28. 10 Apr. 1840, RAM: 17, 11 f.
29. 12 Apr. 1840, RAM: 17, 16.
30. 12 Apr. 1840, RAM: 18, 2.
31. To Sophia Radzivill, 29 Apr. 1840, G1, 537.
32. 22 June 1840, RAM: 18, 15.
33. 20 Apr. 1840, RAM: 18, 5 f.
34. To Mariana Lawton, 4 May 1840, G2, 203.

35. [April or May] 1840, RAM: 25, 1.
36. To Sophia Radzivill, 11 May 1840, G1, 537.
37. 1 May 1840, RAM: 52–76.
38. 24 Apr. 1840, RAM: 18, 5.
39. 12 May 1840, RAM: 52–76.
40. 3 May 1840, RAM: 19, 2 f.
41. 16 May 1840, RAM: 19, 5.
42. 18 May 1840, RAM: 19, 7, 8.
43. 3 June 1840, RAM: 18, 10.
44. [May] 1840, RAM: 15, 4.
45. 23 May 1840, RAM: 19, 11.
46. 23 May 1840, RAM: 15, 13.
47. [Late May] 1840, RAM: 19, 12.
48. To Mariana Lawton, 4 May 1840, G2, 203.
49. 14/31 May 1840, RAM: 19, 4, 14.
50. 1 June 1840, RAM: 19, 14.
51. 12 June 1840, RAM: 18, 13.
52. 2 May 1840, RAM: 15, 12.
53. 24 June 1840, RAM: 20, 2.
54. 27 June 1840, RAM: 20, 5.
55. To Sophia Radzivill, 29 Apr. 1840, G1, 537.
56. 8 July 1840, RAM: 20, 12.
57. 9 July 1840, RAM: 22, 1.
58. 8/10 July 1840, RAM: 24, 6, 9.
59. 2 Aug. 1840, RAM: 24, 5.
60. 19 July 1840, RAM: 24, 6.
61. 11 July 1840, RAM: 23, 4.
62. 17 July 1840, RAM: 24, 3.
63. 18/19 July 1840, RAM: 22, 11–13.
64. [21] July 1840, RAM: 21, 2.
65. 24 July 1840, RAM: 23, 6.
66. 24 July 1840, RAM: 23, 6.
67. Late July 1840, RAM: 24, 2.
68. 27 July 1840, RAM: 24, 12.
69. 30 July 1840, RAM: 24, 3.
70. 8 Aug. 1840, RAM: 25, 4.
71. 28 July 1840, RAM: 24, 13.
72. 7 Aug. 1840, RAM: 24, 8 f.
73. 8/9 Aug. 1840, RAM: 25, 5 f.
74. 9 Aug. 1840, RAM: 25, 9.
75. [9] Aug. 1840, RAM: 21, 7.
76. 10 Aug. 1840, RAM: 25, 6, 9.
77. 11 Aug. 1840, G2, 205.
78. 11 Aug. 1840, RAM: 25, 10.
79. *Halifax Guardian*, 31 Oct. 1840, G2, 206.

ქვემოთ

1. *Halifax Guardian*, 31 Oct. 1840, G2, 206.
2. Liddington 1994, 60.
3. Memorandum by Robert Parker, 9 Sep. 1843, Liddington 1994, 11.
4. George Sutherland to John Lister senior, 27 Sep. 1844, L1, 238 f.

ჯონი, მურიელი, ვივიანი, ფილისი, ჰელენა, ჰილი და ანგელა

1. Shibden Hall. *A Visitor's Guide*, 2010, 5.
2. Liddington 1994, 17. მაგალითად, გრინმა დამალა ის მოსაწყვევი ბარათები, რომელთა საშუალებითაც ანა უოკერმა და ენ ლისტერმა 1832 წლის შემოდგომაზე საკუთარი შეხვედრა დათქვეს.
3. Ingham 1969, 55.
4. Ramsden 1970, 1.
5. Anderson 1995, 191.
6. Ingham 1968, 199.
7. Ingham 1969, 56.
8. Ingham 1969, 55.
9. Ramsden 1970, 4, 10 f.
10. W1, xvii.
11. Liddington 1994, 24.

ეპილოგი: როგორ წავიკითხოთ ეს ლისტერის ნაწერები

1. *18 June 1824, W1, 373.*
2. To Sibella Maclean, 3 June 1824, G1, 190.
3. To Sibella Maclean, 21 June 1824, G1, 192.
4. 28 Nov. 1824, W2, 58.
5. 31 May 1824, W1, 371.
6. 22 June 1821, W1, 171.
7. 16 Oct. 1831, RAM: 38.
8. 24 Aug. 1822, W1, 233.
9. Fichte [1796] 1845, 311.



შპანეთი და შაშილი
ლუიზა ლაფერაძის რეპროდუქცია

შამილის ტყვე ფრანგი ქალის მოგონებები

1853 წელს, ჩვენი ნათესავი, მადამ ანა დრანსე ტფილისში კომერციული დაწესებულების დასაარსებლად წავიდა. იგი სექტემბრის თვეში ჩავიდა მდიდარი ისტორიით გამორჩეულ საქართველოს დედაქალაქში – ქვეყნის მთავარ ადმინისტრაციულ ცენტრში, რომელიც ახლა რუსეთის ბატონობის ქვეშაა. იქ ჩასულს გაუთვალისწინებელი დაბრკოლება შეექმნა, ამიტომ თავის გეგმებზე უარი თქვა და საფრანგეთში დაბრუნება გადაწყვიტა. თუმცა, მოულოდნელად, თავად დავით ჭავჭავაძის ოჯახში ორი პატარა გოგონას აღსაზრდელად მიიწვიეს. დავით ჭავჭავაძე ქართული თავადური გვარის წარმომადგენელია, მისი მეუღლე ანა ჭავჭავაძე კი – საქართველოს უკანასკნელი მეფის, გიორგი მეცამეტის შვილიშვილი. ამ ანგარიშგასაწევი მოცემულობის გარდა, ნახა თუ არა ანა დრანსემ პატარები, მათთან დაახლოების აუხსნელმა სურვილმა მოიცვა. სიხარულით დათანხმდა შეთავაზებას და გადაწყვეტილების შესახებ ჩვენც გვამცნო.

მადამ დრანსეს ოჯახს მასთან მუდმივი მიმოწერა ჰქონდა. თუმცა 1854 წლის სექტემბერში უკან გაუხსნელი წერილი მიიღეს წარწერით: უკან ბრუნდება მიმღების გარდაცვალების გამო. იმავდროულად, გაზეთებში წერდნენ, რომ თავადის ქალი ჭავჭავაძე სოფელში დროს საამოდ ატარებდა, როცა ის და მასთან დაახლოებული რამდენიმე ადამიანი შამილმა გაიტაცა, მადამ დრანსე კი მოკლეს.

ეს საშინელი დარტყმა იყო მადამ დრანსეს საბრალო დედისთვის. ამ ამბის გაგების შემდეგ მისი ცხოვრება წამებას დაემსგავსა. ამასთან, თავს არ ვზოგავდით, რომ სიმართლე დაგვედგინა და ბოლოს, როგორც იქნა, შევითყვეთ, რომ მადამ დრანსე ცოცხალი იყო და შამილის ტყვეობაში იმყოფებოდა. გაუსაძლისი იყო დედის ტანჯვა ქალიშვილის რვათვენახევრიანი ტყვეობის განმავლობაში – მას მხოლოდ შვილის დაბრუნებაზე ფიქრი ასულდგმულებდა. მიუხედავად დიდი რწმენისა, მის გულში ზოგჯერ სრული უიმედობა მაინც ისადგურებდა. როგორც იქნა, მოუვიდა სასიხარულო ცნობა, რომ მისმა შვილმა თავი დააღწია ტყვეობას და დედა-შვილი სულ მალე ერთმანეთის ნახვას შეძლებდა. ტანჯულმა დედამ მადლობა შესწირა უფალს, რომ ამ დღეს მოესწრო და რამდენიმე დღეში სული დალია...

გათავისუფლდა თუ არა, მადამ დრანსემ საფრანგეთს მიაშურა, რომ რაც შეიძლება მალე ენახა დედა. იქაური მოპყრობისგან ძალაგამოცლილს ერთი სული

ჰქონდა, როდის ჩაისუნთქავდა მშობლიურ ჰაერს. თუმცა, ჯერ კიდევ გზად, მოსკოვში ჩასულმა შეიტყო, რომ დედა აღარ ჰყავდა და ერთადერთ ნუგეშად მის საფლავზე მისვლა და ლოცვა დარჩენოდა.

გადაიარა თუ არა პირველმა ელდამ, თავი ერთად მოვიყარეთ, რომ მის აქ არ-ყოფნის პერიოდზე და დედაზე გვესაუბრა. ჩვენს კითხვებზე პასუხად გვიამბო, რომ ჩეჩენთა და ლეკთა ერთდროულად ბარბაროსული და გმირი ტომები ჯერ კიდევ ინარჩუნებენ დამოუკიდებლობას, რაც ცივილიზებულმა ერებმა ვერ შეძლეს. მან ასევე მოგვითხრო იდუმალებით მოსილ შამილზე და იმამის სერალის პატარ-პატარა ინტრიგებზე. დაწვრილებით მოგვიყვა ტყვეობაზე და ეს წიგნიც, რომელსაც მი-სივე თანხმობით გამოცემთ, დაწერილია ანა დრანსეს მონათხრობის მიხედვით.

ედუარდ მერლიუ

I

თბილისიდან გამგზავრება.

წინანდალი

თავად დავით ჭავჭავაძის¹ ოჯახში შვილების აღმზრდელად მუშაობას 1854 წლის დასაწყისში შევუდექი და ყოველდღიურობის საამო დეტალებს მათთან ერთად თა-ნაბრად ვინაწილებდი. დადგა დრო, როცა თავადის მეუღლე ანა ჭავჭავაძისა² ჩვეუ-ლებისამებრ ტოვებდა თბილისის ზამთრის რეზიდენციას, რათა ქალაქის მცხუნვარე დღეებს ქალაქგარეთ გარიდებოდა. ზაფხულს კახეთში, წინანდლის ვრცელ მამულ-ში ატარებდა, რომელიც დედაქალაქიდან საკმაოდ არის დაშორებული, ხოლო თე-ლავიდან – სულ რამდენიმე ვერსით. მდინარე ალაზნის გადაღმა დაუმორჩილებე-ლი ტომებით დასახლებული რეგიონი მდებარეობდა, სადაც შამილი ბატონობდა.

ივნისის დამდეგს მოისურვა თავადის ქალმა წინანდალში შვილებთან ერთად წასვლა. მათგან ორი უფროსი გოგონა, სალომე და მარიამი მე მეზარა; დანარჩე-ნები კი ძალზე პატარები იყვნენ საიმისოდ, რომ ჩემი სამსახური დასტირვებოდათ: თამარი ჯერაც არ შესრულებულიყო ოთხი წლის, ალექსანდრე და ლილია კი კვლავ ძუძუს წოვდნენ.

1. თავადი ჭავჭავაძე – დავითი, ცნობილი პოეტის, ალექსანდრე ჭავჭავაძის შვილი, ეკატერინე ჭავჭა-ვაძე-დადიანისა და ნინო ჭავჭავაძე-გრიბოედოვის ძმა, წინანდლის მფლობელი, იმხანად 37 წლისა, პოდპოლკოვნიკი, შემდგომ – პოლკოვნიკი და ფლიგელ-ადიუტანტი.
2. ანა ჭავჭავაძე – ილია ბატონიშვილის ასული, ერეკლე მეფის ჩამომავალი, იმხანად 28 წლისა.

ქალაქში ხმა დაირხა ლეკების შესაძლო თავდასხმის შესახებ. ამგვარი მით-ქმა-მოთქმის ნაკლებად გვჯეროდა, მით უფრო იმ საშინელ უბედურებას ვერ წარმოვიდგენდით, რაც შემდეგ ყველას თავს დაგვატყდა. თავადი ჭავჭავაძე ამ ხმების დაზუსტებას შეეცადა, სანდო წყაროებმა კი დაარწმუნეს, რომ საშიშროება არ არსებობდა. ეს იყო და ეს, ჩვენს წასვლას აღარ შეეწინააღმდეგა და 1854 წლის 18 ივნისს თბილისიდან გამგზავრება გადაწყდა.

მომზადებას რამდენიმე დღე დასჭირდა. აზიაში, ასეთ დროს, არა მხოლოდ გზისთვის საჭირო ნივთები და ტანსაცმელი, არამედ ავეჯიც თან მიაქვთ. და ჩვენი მზადება მგზავრობას კი არა, გადასახლება დაემსგავსა. გაკვირვებული ვიყავი, რამდენი რამე ჩამოზიდეს ურმებზე დასაწყობად: დივანი, სკამები, ხალიჩები, კედლის ფარდაგები, სარკეებით დაწყებული ჯამ-ჭურჭლის ჩათვლით; სანელებლები, ჩაი, შაქარი, ძაფი, აბრეშუმი, სათამაშო ქალაღდის დასტები, ცარცი (რომელსაც რუსეთში თამაშის დროს ანგარიშის აღსანიშნად იყენებენ და კაცმა არ უწყის, რამდენს ხარჯავენ) და სურსათ-სანოვავისა თუ სხვა საჭირო ნივთების მარაგი, რაც მდიდარ და ხალხმრავალ თავადის სახლობას სჭირდებოდა. ასევე თან უნდა წაგვეყვანა ფარეშები, წაგვეღო ქსოვილის რულონები: ჩითი, ნარმა, ხამი ტილო და შელებილი ბამბის ქსოვილი, რომელსაც შინამოსამსახურეთა სამოსის შესაკერად იყენებდნენ. ყოველივე ეს დიდი გულისყურით შეფუთეს და ხარებშებმულ საზიდარზე დააწყვეს. ასეთ მთაგორიან ქვეყანაში ეტლი ერთადერთი სამგზავრო ტრანსპორტია, სამანქანო გზას იშვიათად თუ ნახავთ.

ცხენები კვირისთვის მოვითხოვეთ, მაგრამ სადგურიდან უარი მივიღეთ და წასვლა სამშაბათამდე გადაიდო. ორშაბათსაც შეგვეძლო გამგზავრება, მაგრამ რუსები და ქართველები ამ დღეს მნიშვნელოვანი საქმის კეთებას ერიდებიან, რადგან იგი თარს დღედ მიაჩნიათ. 18 ივნისს, სამშაბათ დღეს, სისხამ დილით თბილისიდან გავედით. ბედნიერები ვიყავით, რომ ქალაქის ხვატსა და მტვერს თავს დავალწევდით.

მგზავრობამ ორ დღეს გასტანა. პირველივე დღეს ურმის ორჯერ გადაბრუნების გარდა სხვას არაფერს დავუბრკოლებივართ. ყოველ სადგურზე დასვენებულ ცხენებს გვახვედრებდნენ, გზადაგზა თავად ჭავჭავაძის გლეხები გვეგებებოდნენ, გვესალმებოდნენ და ცხენზე ამხედრებულები გვაცილებდნენ სახიფათო ადგილებში, მეგზურობას გვიწევდნენ. მეორე დღეს ეტლი გაგვიფუჭდა და იძულებული გავხდით გზა საფოსტო საზიდრით დაგვესრულებინა. ზედ თივა დააფინეს, ზემოდან ფარდაგი დაგვიგეს და გზა დამშრალი მდინარის³ ქვიანი კალაპოტით გავაგრძელეთ. ორივე მხარეს ბროწეულის დიდი, აყვავებული ხეები ჩამწკრივებულიყო. თბილი ქვეყნებისთვის დამახასიათებელი ხასხასა მწვანე ფერი თვალს

3. იგულისხმება მდინარე თურდო.

იტაცებდა. როგორც იქნა, დაახლოებით ორ საათზე, გორაკებს შორის გამოჩნდა ხრამის პირას აღმართული წინანდლის სასახლე. დაქანცულები ვიწრო ბილიკებს ავუყევით და სასახლემდე მივალწით.

მას მერე, რაც სული მოვითქვით, ცოტა ხნით დავისვენეთ და ქალბატონის ნახვით გახარებულ გლეხებს როგორღაც თავი დავაღწით, თავადის ქალი თავის ულამაზეს ბაღში შემიძღვა. საოცარი სანახავი იყო ვაზის ტალავრები, ჟასმინის მცენარეებით დაფარული ფანიატურები, სხვადასხვა ჯიშის ასობით ხე – ბროწეული, ლიმონი, ფორთოხალი, აზიური ცხრატყავა... მათი გამაბრუებელი სურნელი ტრიალებდა ირგვლივ. ამ ჯადოსნურ ბაღში სეირნობა აღმაფრთოვანებდა და ვინ იფიქრებდა, წინ რა ჯოჯოხეთი გველოდა.

აქ ყოფნის მესამე დღეს გვესტუმრა ბარბარე ორბელიანი⁴, ანა ჭავჭავაძის და, შვიდი თვის ვაჟ გიორგი ბატონიშვილთან და თვრამეტი წლის მულიშვილ ნინო ბარათოვთან⁵ ერთად. მას თან ახლდნენ გიორგის ძიძა და ორი შინამოსამსახურე ქალი. თავისი დის მსგავსად, ტფილისის ხვატს გამორიდებული ბარბარე ორბელიანიც წინანდლის ციხესიმაგრეში დასვენებასა და პატარა ბიჭის სუფთა ჰაერზე გაკაჟებას იმედოვნებდა. სამი თვეც არ იქნებოდა გასული, რაც მისი მეუღლე, ილიკო ორბელიანი⁶ თურქებთან შეტაკებისას მოკლეს და ახალდაქვრივებული ბარბარე ოჯახის წევრების გარემოცვაში ცდილობდა ნუგეშის პოვნას.

მშვენიერებითა და სიხარულით სავსე რამდენიმე დღემ სწრაფად გაირბინა. ერთხელ, კავკასიის მთების მზის ოქროსფერ სხივებში მოლივლივე ყინულოვან მწვერვალებს გავცქეროდი, როცა თავადმა ხუმრობით მითხრა:

– სწორედ მაგ მთებში ცხოვრობს შამილის ტომი.

– ნათქვამს მიგიხვდით, თავადო, მაგრამ, მგონი, მეტისმეტად მშიშარა გგონივართ.

– ისე გითხარით, – თქვა და ერთხანს შეყოვნდა, მერე კი დასძინა: – რას იზამდით, თქვენს მოსატაცებლად რომ მოსულიყვნენ?

– რალა დროს ჩემი მოტაცებაა, – ვუპასუხე, – მაგრამ თქვენმა შეკითხვამ ჩემი ნაცნობი პოლკოვნიკი გამახსენა, რომელმაც ტფილისში შეხვედრისას მკითხა, ხომ არ ვაპირებდი თქვენთან ერთად სოფელში წამოსვლას. როცა დავუდასტურე, მივდივარ–მეთქი, მირჩია, ხანჯალი თან იქონიე, ლეკებმა არ მოგიტაცონო.

ამ ამბავს სიცილით ვუყვებოდი, და ისიც იღიმოდა.

4. ბარბარე ორბელიანი – ილია ბატონიშვილის ასული, ანა ჭავჭავაძის და, მამაცი გენერალ-მაიორის, ბაშკადიკლართან სასიკვდილოდ დაჭრილი ილია ორბელიანის ქვრივი, ნიკოლოზ ბარათაშვილის ბიცოლა.

5. ნინო ბარათოვი – ნინო მეღვინის ასული ბარათაშვილი (1829–1906), ნიკოლოზ ბარათაშვილის და.

6. ილიკო ორბელიანი – გრიგოლ ორბელიანის უმცროსი ძმა, ნიკოლოზ ბარათაშვილის ძიძა და სკოლის ამხანაგი, გენერალ-მაიორი. ისიც იმყოფებოდა შამილის ტყვეობაში.

მეორე დღიას თავადმა მიიღო ბრძანება, ალაზანგალმა გასულიყო და წინანდლიდან დაახლოებით ორი დღის სავალზე მდებარე ციხესიმაგრის უფროსობა მიეღო⁷. მაშინვე დაიჭირა თადარიგი, წასასვლელად გაემზადა და დარწმუნებით გვიმეორებდა, არაფრის შეგეშინდეთო. გარეთ კოკისპირულად წვიმდა.

– ეს თავსხმა წვიმა ალაზანს აადიდებს, მდინარეს ვერ გადმოლახავენ და ვერც აქამდე მოაღწევენ. ამასობაში კი თბილისიდან ჯარიც ჩამოვა თელავში, – კიდევ ერთხელ სცადა ჩვენი დამშვიდება.

წასვლის დღეც დადგა. როცა თავადი ოჯახის წევრებს ემშვიდობებოდა, მის სიტყვებსა და საქციელში რაღაც განსაკუთრებული სევდა შევამჩნიე. ეს წინათგრძნობა ჩვენი უბედურების მომასწავებელი ხომ არ იყო? თავადის სიმამაცეში ეჭვი არ მეპარებოდა და ვიცოდი, თავის დაცვა შეეძლო. მინახავს, როგორ ეფერებოდა შვილებს ყოველდღე, მაგრამ ახლა ვუყურებდი, რა დაძაბული და აღელვებული იკრავდა ბავშვებს გულში. მდუმარედ, სიყვარულით სავსე თვალებით უყურებდა თავის პაწია ლიდიას, რომელიც ჯერ ოთხი თვისაც არ იყო. თავს ძალა დაატანა და ბავშვს მზერა მოსწყვიტა. საბრალო მამა! პატარა არსებას უკანასკნელად ხედავდა.

მესამე დღეს, საღამოს, მისგან შეტყობინება მოგვივიდა – ციხესიმაგრეს, რომელსაც იგი ოთხასი კაციტ იცავდა, ბევრად რიცხვმრავალი ლეკთა ჯგუფები თავს დასხმოდნენ. ამჯერადაც ირწმუნებოდა, საშიში არაფერიაო და მეუღლეს სთხოვდა, მომდევნო წერილის მიღებამდე წინანდალი არ დაეტოვებინა.

[...]

II

სომეხი მედუქნე

პირველ ივლისს გლეხებმა დაგვანახვეს თელავის მხარეს ცეცხლის ალში გახვეული ხორბლის ყანები. სათუო აღარ იყო – მტერი ვაკეზე დაეშვა, წინ მოიწევდა, ჩვეულებისამებრ, გზას ხანძრით იკვალავდა და ამით მოახლოებას გვამცნობდა. წინანდლეი გლეხები იარაღის გამართვა-გაპრიალებას შეუდგნენ, თავადის ცოლს კი ტყეში გახიზვნას ურჩევდნენ. უარის მიღების შემდეგ მთელი თავიანთი ავლადიდება ურმებზე გადააკრეს და ცოლ-შვილიც ზედ დასხეს. პარასკევს ცეცხლი ისევ ბობოქრობდა. დღისით თელაველი ექიმი გორლიჩენკო⁸ გვესტუმრა.

7. ხანდოს მიდამოებში.

8. გორლიჩენკო – თელავის მაზრის და ჭავჭავაძეთა ოჯახის ექიმი.

– ლეკები, – თქვა მან, – ალაზნის იქითა მხარეს არიან დაბანაკებული. ახლა მდინარის გადმოლახვას ვერ შეძლებენ. თელავში სიმშვიდეა, ტფილისიდან ჯარს ველოდებით.

დარბაზში იმყოფებოდა ქალბატონი თინია, თავადის მოხუცი დეიდა⁹, ისეთი მშიშარა, რომ უმნიშვნელო საშიშროების გაგონებაზეც შფოთავდა. ახლა კი, უჩვეულოდ მშვიდად იყო, რადგან, თურმე:

– ბავშვობიდან გამუდმებით მესმის, – უთხრა მან ექიმს, – ლეკები წინანდალზე თავდასხმას აპირებენო, მაგრამ ეს ხმები არასდროს გამართლებულა და ახლაც ვერ დავიჯერებ.

– რაც უნდა მოხდეს, – დასძინა თავადის ქალმა ანამ, – ჩემი ქმრის წერილს უნდა დაველოდოთ.

ამასობაში გლეხებმა გახიზვნა მოახერხეს. მეზობელი მემამულეები მოდიოდნენ და გვარწმუნებდნენ, რომ მათ ტყეში გავყოლოდით. თავიანთი მთელი ქონება მიეტოვებინათ და მხოლოდ თავის გადარჩენას ცდილობდნენ. თავადის მეუღლე ისევ უარზე იდგა. ქალბატონისადმი დიდი სიყვარულისა და პატივისცემის მიუხედავად, ვფიქრობ, მისი მხრიდან წინდაუხედავი საქციელი იყო დაჟინებული შეგონებების უარყოფა და სასახლეში დარჩენა. მასთან ახლანდელივით ახლო ურთიერთობა რომ მქონოდა, ჯერ კიდევ პარასკევს დავარწმუნებდი, გაქცევა აუცილებელია–მეთქი, მაგრამ იმ დროისთვის ჩვენ მხოლოდ ექვსი თვის ნაცნობობა გვაკავშირებდა. არც ადგილმდებარეობაზე მქონდა რაიმე წარმოდგენა და მეშინოდა, სასაცილო და სულმოკლე არავის ვგონებოდი.

ხანძარი შაბათსაც მძვინვარებდა. მდგომარეობა შემაშფოთებელი იყო და საბოლოოდ თავადის მეუღლემ წასვლა გადაწყვიტა. ვერცხლეულის, ძვირფასი ქვებისა და სხვა ძვირფასი ნივთების ჩალაგება დაიწყო. თავადის ძალზე გულადმა გლეხმა, ზურია, ქალბატონს დასაზვერად წასვლა შესთავაზა. თანხმობის მიღებისთანავე იმ ადგილებისკენ გაემართა, სადაც ცეცხლი გიზგიზებდა. ზურია მალევე დაბრუნდა. ტანსაცმელი ტყვიებისგან ერთიანად დაცხრილული ჰქონდა და სიკვდილს იმიტომ გადაურჩა, რომ შორიდან ნასროლ ტყვიებს დიდი ძალა აღარ ჰქონდა. ის ერთადერთი იყო, ვინც თავი არ დაზოგა ბატონებისთვის, მაგრამ მის მონათხრობს დიდი ყურადღება არავინ მიაქცია – სმა უყვარდა და ამიტომ.

როგორც კი ზურია დასაზვერად წავიდა, სასახლეში ერთი სომეხი გამოგვეცხადა, მედუქნე ვარ და გთხოვთ, ღამე გამათევინეთო. გვითხრა, სადღაც ფული მაქვს მისატანი, მაგრამ ამ ადგილებში რომ გამოვიარე, ლეკებს გადავეყარე და იძულებული გავხდი, იმავე გზით უკან დავბრუნებულიყავიო. მის მონათხრობში, ერთი შეხედვით,

9. თავადების მოხუცი დეიდა – იგივე თინია.

უცნაური თითქოს არაფერი იყო, მაგრამ თავადის ქალს ამ კაცის სახე საეჭვოდ მოეჩვენა და მსახურს უბრძანა:

– თვალი ადევნეთ ამ კაცს, არსად გაუშვათ, იარაღი აჭყარეთ და გაქცევას თუ დააპირებს, ესროლეთ!

ასეთ სიმკაცრეს შექმნილი მდგომარეობა კარნახობდა, თუმცა მისთვის ჩვეულებრივ გულკეთილობით მაშინვე დასძინა:

– მიხედეთ და დააპურეთ!

მსახურებს მხოლოდ ბოლო ბრძანება დაამახსოვრდათ, პირველი კი სრულიად დაავიწყდათ, რამაც მოსალოდნელ კატასტროფას უფრო დაგვასახლოვა.

ამ არასანდო შესახედლობის კაცის მოსვლა, ზურიას მოტანილი ცნობები, ყველაფერი იმაზე მეტყველებდა, რომ საშიშროება გარდაუვალი იყო. იმედი ჯერ არ გადაგვწურვოდა, სწრაფი მგზავრობისთვის განკუთვნილი მსუბუქი საზიდრებიც გვექონდა. თავადის ქალმა თელავში დაუყოვნებლივ გაგზავნა ორი შიკრიკი, რათა იმავე საღამოს მოეყვანათ ცხენები. სადგურზე ორივეს უთხრეს, რომ ცხენები მომდევნო დღის, ანუ კვირა დილის შვიდ საათამდე არ ეყოლებოდათ. მოახლეები სკივრებში ალაგებდნენ ყველაფერს, რისი წაღებაც შეიძლებოდა. ისევ მოვიდნენ გლეხები და დაბეჯითებით კვლავ ტყეში გახიზვნა გვთხოვეს. კეთილი ზურია განსაკუთრებით მე მიკიჟინებდა, მაგრამ განა შემეძლო ასეთი სიმბდალე გამოემჩინა და ამ ყოფაში ჩემი აღსაზრდელები – სალომე და მარიამი მიმეტოვებინა?!

სამზადისი დასრულდა. საღამოს თავადის ქალ ორბელიანის საძინებელში მოვიყარეთ თავი. ბავშვები იატაკზე დაგებულ ხალიჩებზე დავაწვინეთ. დაიძინეს თუ არა, სანთლები ჩავაქრეთ და აივანზე გავედით. მდუმარედ შეეცქეროდით, ნელ-ნელა როგორ გვიახლოვდებოდა მომხდურის ცეცხლი. მთვარე არემარეს ანათებდა და ეს სინათლე ჩვენს წისქვილზე არ ასხამდა წყალს – დაბრკოლებების მიუხედავად, ლეკები წინ მოიწევდნენ და გაქცევის სულ უფრო ნაკლები შანსი გვრჩებოდა.

თავადის ქალი თინია კი ისევ თავისას იმეორებდა:

– ლეკები წინანდალში მოსვლას ვერ გაბედავენ!

გამთენიისას, ოთხ საათზე, ძილ-ღვიძილში მყოფნი თოფის გასროლის ხმამ ერთბაშად გამოგვაფხიზლა. საფრთხე ახლოს იყო, თითქოს შიში ძვალსა და რბილში გაგვიჯდა. უფრო მივყურადეთ, ეგებ კიდევ რამე გაგვეგონა, მაგრამ ჩქამის ხმა არ ისმოდა. იქნებ ეს უეცარი გასროლა შემთხვევითი იყო? ბაღში ჩავედი და ვაზის ფოთლებში ჩიტის ბუდესავით ჩაკარგული სალოცავისკენ გავეშურე. დიდხანს ვლოცულობდი და ვგრძნობდი, თანდათან ძალა მიბრუნდებოდა. ამ ვრცელ ბაღში სიმყუდროვესა და სიჩუმეს დაესადგურებინა და მეც უნებლიეთ ბოლთის ცემა დავიწყე. მაღალი ხრამის პირას გაშენებულ ტყეს რომ მივუახლოვდი, კაცი შევნიშნე, რომლის იქ ყოფნამ ძალიან დამაფრთხო: თავადის ყველა გლეხს, ცხადია, არ ვიცნობდი, მაგრამ ქართველების ფიზიონომია და სახის ნაკვთები ზედმიწევნით ვიცოდი – მშვიდი და

რბილი ნაკვთები აქვთ, ამ კაცს კი ავაზაკის სახე ჰქონდა. ხმის გაუცემლად სასახლის ეზოსკენ რომ გაემართა, მაშინ შევამჩნიე – თოფით იყო შეიარაღებული. რადენადაც შეიძლებოდა, სწრაფი ნაბიჯით გავემართე სახლისკენ. ხრამის მხარეს რომ გავხედე, დავინახე, რომ ხევის ძირში მდინარის წყალი თითქმის ამომშრალიყო და ორი კაცი, თითო-თითო ცხენით, ფრთხილად გადადიოდა მეორე ნაპირზე.

[...]

III

ლეკები. ტყვეობა

ჩვენი მდგომარეობა კარგს არაფერს გვიქადდა და სასოწარკვეთაში მაგდებდა. გავიქეცი, რომ ქალბატონებისთვის ნანახის შესახებ მომეთხორო, თუმცა მითხრეს, რომ თავადის ქალი ორბელიანი ლოცულობდა, თავადის ქალ ჭავჭავაძეს კი ეძინა.

ერთი საათის შემდეგ ანამ თავისთან მიხმო. გასამგზავრებლად ყველაფერი გავამზადეთ. კორსეტში ჩავიდე ჩემებისგან მოწერილი რამდენიმე წერილი და თმის კულული – ყველაზე ძვირფასი რამ, რაც გამაჩნდა. სახელდახელოდ შეკერილ პატარა ჩანთაში ჩავაწყვე ფრანგული ენის გრამატიკა და პატარა ლოცვანის წიგნი სათაურით: „ღმერთი არს სიყვარული“, ¹⁰ რომელიც ჩემმა ერთმა თბილისელმა მეგობარმა ქალმა მისახსოვრა. ჩაის სამზადისს შეუდგნენ – თითქოს შესაფერისი ვითარება ყოფილიყო თავადის ქალის მომსახურებისთვის – ისე იქცეოდნენ, გეგონებოდა, არსად გვეჩქარებოდა. თელავიდან კვლავ მოვიდა ექიმი და საათზე მეტხანს არწმუნებდა თავადის ქალს, ახლავე დავდგომოდით გზას. ხანში შესული რუსი ძიძების ჯიუტობამ და არხეინობამ, აგრეთვე მათმა ხასიათმა, რომ არავის შეეპუნ და დაემორჩილონ, თავისი შედეგი გამოიღო. ის-ის იყო საზიდარზე ქალბატონის ძვირფასეულობა (ალმასები) უნდა დაეწყოთ, რომ გავიგონეთ ყვირილის ხმა: ლ ე კ ე ბ ი!

დილის რვა საათი იყო. უსათნოესი ექიმი გორლიჩენკო (ერთადერთი კაცი, რომლის წინაშეც სიცოცხლის ბოლომდე დავალბებულნი ვართ მისი გმირული თავგანწირვისთვის) ხელში შემართული იარაღით გვთხოვდა, სადმე დაიმაღეთო. ქალბატონმა თქვა, რომ საამისოდ ყველაზე შესაფერისი ადგილი ბელვედერი იქნებოდა. მან არაფერი იცოდა, რა განზრახვა ჰქონდათ ლეკებს და ფიქრობდა, რომ ამ სამალავისკენ არ წამოვიდოდნენ. ბავშვები, ძიძები, მსახურები, ფარეშები და სახლში მყოფი ყველა ქალი უკან გამოგვყვნენ. არასდროს დამავიწყდება ის წუთები, როდეს-

10. ღმერთი არს სიყვარული – წიგნის ავტორი ვერ დავადგინეთ. თვით ეს ფრაზა კი, ქრისტიანობის უმთავრესი რელიგიური იდეა, ამოღებულია სახარებიდან.

საც თავადის ქალმა ჭავჭავაძემ, ჩემდამი მუდამ გულთბილად განწყობილმა, გულში ჩამიკრა და სინანულით აღვსილმა მთხრა:

– ეჰ, ეს რა მომივიდა, მადამ? გთხოვთ, მომიტევოთ ყველა უბედურება, რაც ჩემ გამო შეგემთხვევათ. ღმერთო ჩემო! რატომ არ დაგატანეთ ძალა გაქცეული-ყავით?

– ქალბატონო, ჩემთვის უცნობია, რას მიმზადებს ბედისწერა, მაგრამ, რაც უნდა მოხდეს, მზად ვარ, ჩემი სიცოცხლე შემოგწიროთ.

– ვილოცოთ, ჩვენი აღსასრულის დრო ახლოვდება.

და მართლაც, სულ მალე მკაფიოდ გავიგონეთ მოახლოებულ მთიელთა ნაბიჯების ხმა, რასაც თან სდევდა ბავშვების ყვირილი და ქალების წივილ-კივილი. შემადრწუნებელმა სევდამ და სასოწარკვეთამ მოგვიცვა. ას წელს მიტანებული მოხუცი, რომელმაც ოდესღაც თავად ჭავჭავაძის მამაც აღზარდა და რომელიც ოჯახის წევრად მიაჩნდათ, გულმხურვალედ ლოცულობდა თავისი კეთილი ბატონის შვილების გადარჩენისთვის. გიორგი ორბელიანის გამზრდელი, რომელსაც ქმარ-შვილი თბილისში დაეტოვებინა, გულამოსკვნილი ტიროდა. კატერინა, თავადის ქალ ორბელიანის მოახლეს ასევე ქვითქვითებდა, წუხდა ქალბატონის შვილებზე, რომლებიც თავს ერჩივნა. მოხუცმა თავადის ქალმა თინიამ, წინა დღეს რომ თავს ძალზე უშიშრად გრძნობდა, გონება სულ დაკარგა: იმ წუთებში, როცა ყოველგვარი მატერიალური გაუფასურდა, განუწყვეტლივ ითხოვდა, ჩაის ფინჯნები მომიტანეთ, მეშინია, მძარცველებმა არ მოიპარონო. თავად აღექსანდრე ჭავჭავაძის ძიძა უბრალო ქართველებისთვის დამახასიათებელი ჟესტებითა და ხელების მოძრაობით ლოცულობდა.

შეშინებული სალომე და მარიამი კანკალებდნენ და მეკვროდნენ, მე კი ვემუდარებოდი, არ იტიროთ-მეთქი. ამჯერად უკვე ლეკთა გააფთრებული შეძახილები მოგვესმა. გარშემო ყველაფერს ურტყამდნენ და ანადგურებდნენ, იმსხვრეოდა მინები, ჭრიალებდა ავეჯი, სკივრებში წკრიალებდა ვერცხლეული. ველურები ორივე ფორტეპიანოს კლავიშებს დაუნდობლად და გამალებით უბრახუნებდნენ. ბელვედერიდან ხელისგულივით გადაშლილიყო მთელი ბაღი, რომელიც თანდათან ივსებოდა ჩალმიანი მხედრებით. თავიდან დაახლოებით ორმოცდაათამდე კაცი იყო, მერე კი ერთბაშად მოაწყდნენ და მთელ ბაღს მოედნენ. სასახლეში ერთადერთი გზა დამშრალი მდინარის კალაპოტიდან შემოდის და ისიც აავსეს. აშკარა იყო – წინანდლის მცხოვრებნი სრულ გაჩანაგებას ვერ გადაურჩებოდნენ.

ღრმად ჩაფიქრებულ თავადის ქალს კარგა ხანს ხმა არ ამოუღია. შემდეგ პატარა ლიდია ხელში აიყვანა. ყველანი მუხლებზე ვიყავით დაჩოქილი რამდენიმე კაცის გარდა, რომლებიც დაკეტილ კარს შიგნიდან მთელი ძალით აწევებოდნენ. ლეკებს უცნაურად მოეჩვენათ, რომ წინააღმდეგობა არსად გაუწიეს და ამ იოლი გამარჯვებით გულმოცემულნი კიდევ უფრო გახელდნენ. დარბოდნენ სასახლეში, ყოველ კუთხე-კუნჭულს ედებოდნენ, კედლებზე აკაკუნებდნენ, გეგონებოდა, საგანძურს ეძებნო...

და ნელ-ნელა გვიახლოვდებოდნენ... მხოლოდ თავადის ქალი ორბელიანი იყო მშვიდად. ჯერ თავისი ძვირფასი გიორგი დალოცა, შემდეგ ძიძას გადასცა, მივიდა კართან, რომელსაც მთიელები აწვებოდნენ და ასე მედგრად შეეგება თავის ხვედრს. ეგებ უნდოდა, პირველი მსხვერპლი ყოფილიყო და არ მოსწრებოდა შვილის, დის, მულიშვილისა თუ შვილიშვილების ტანჯვას. ან კიდევ, სურდა, საბედისწერო დარტყმის დადგომამდე თავისი მაგალითით გავემხნეებინეთ.

კარმა გაუძლო, ოღონდ – რამდენიმე წუთით და გაცოფებულმა მთიელებმა ბოლოს შემოანგრის. შეიქმნა დიდი ორომტრიალი, მოგვაწყდა ველურთა ჯგუფი, ისმოდა გავეშებულთა შეძახილები და სასოწარკვეთილთა გოდება. ყოველი ჩვენგანი მტაცებლების ხელში აღმოჩნდა, წინააღმდეგობის გაწევას აბრეშოვდა. ახლაც ცხადად მახსოვს, როგორ მბოჭავს მთიელი, რომლის სახის გახსენებაც მას აქეთ შიშის ზარს მცემს, და მივყავარ. ბელვედერიდან გასასვლელი კარი დაბალია, უნდა დაიხარო და ისე გაიარო, მაგრამ ჩემს მომტაცებელს ეს სულაც არ ადარდებს და თავს კარის ჩარჩოს ვარტყამ.

კაცი, რომლის ნადავლიც აღმოვჩნდი, დგამს თუ არა ფეხს კიბეზე, ისმის საშინელი ჭახანის ხმა და კივილი. კიბე მომტაცებელთა და მათ მსხვერპლთა სიმძიმეს ვერ უძლებს და ტყდება... ამ საშინელ მომენტში ქალბატონის რომელიღაც მოახლე ჩემი კაბის კალთას აფრინდება. მთიელი უხეშად ჰკრავს ხელს და ისიც კისრისტეხით ქვემოთ ვარდება. საფეხური, რომელზეც ვდგავართ, ისიც ირყევა. მთიელმა მთელი ძალით ჩამბლუჯა და მესამე სართულიდან თავგანწირვით გადავეშვიტ, ორ სართულს ჩავუფრინეთ და ეზოში, ნამსხვრევების გროვაში ჩავცვივდით.

როგორც კი მიწაზე დავეცით, გვეცა ერთი ჩალმიანი მძარცველი და ჩემს მომტაცებელს ძიძგილაობა დაუწყო. ცდილობდა, იმის ხელიდან გამოვეგლიჯე, ვისი ნადავლიც ვიყავი. ეს კი არაფრით მთმობდა. ხანჯლებმა იელვა. მეგონა, მომკლავდნენ და დავიყვირე: მე ფრანგი ვარ! ამაო გამოდგა ჩემი სასოწარკვეთილი ყვირილი. ჩემს გამტაცებელს ცალი ხელით ვეჭირე და ჩემდა უნებურად მონაწილეობა უნდა მიმეღო ორი ბოროტმოქმედის ცილობაში. სისხლი დაიღვარა, ჩალმიანს ვერგე. ახალმა პატრონმა, რომელიც სამოსისა და მხეცური შესახედაობის გამო ჩეჩენი მეგონა, წინა ეზოსკენ წამატარია და იქ ორ ნუკერს¹¹ გადამცა. ერთმანეთის ენა არ გვესმოდა. ორი ცხენის აღვირი მომაჩეჩა, მაგრამ ჩემი მოძრაობით მიხვდა, თავს ვარიდებდი ამას და მაშინვე მათრახი მომიღერა. სირცხვილისგან აღმური ამივიდა, თუმცა დავრწმუნდი, რომ ბედს უნდა შევგუებოდი.

[...]

11. ნუკერი – მონღოლური წარმოშობის სიტყვაა. აღმოსავლეთის ზოგიერთ ხალხში აღნიშნავს ხანის, მხედართმთავრის პირად მცველს, მებრძოლს.

IV

წინანდლის ძარცვა.

გამგზავრება

თვალებით ვეძებდი ძვირფას მეგობარ ქალებსა და ჩემს საბრალო აღსაზრდელებს. საშინელი სანახავი იყო ჩვენი ეზო: ცხენები, ხარები, კამეჩები, გადაბრუნებული საზიდრები, ტანსაცმელშემოფლეთილი და თმაგაწეწილი მოქვითინე ქალები... ძალადობის კვალი ეტყობოდა ყველაფერს! პატარა მარიამი, ჩემი მარიამი გამწარებული ხმით მეძახდა; მასთან მირბენა მოვინდომე, მაგრამ ნუკერებმა გამაკავეს... საკუთარი უმწეობის შეგრძნებამ დამთრგუნა, მივხვდი, რომ ამ უბადრუკების ნებადურთველად ნაბიჯსაც ვერ გადავდგამდი. ვტიროდი, ვევედრებოდი, ჩემს საყვარელ პატარასთან მიმიშვით-მეთქი, მაგრამ არაფერმა გაჭრა – არც ცრემლებმა და არც მუდარამ! მოულოდნელად, ბედნიერი შემთხვევითობის წყალობით, ცხენზე მჯდარი მარიამი ჩემ სიახლოვეს აღმოჩნდა; ერთხელ გადაკოცნა როგორღაც მოვასწარი, გამხნელება მინდოდა, მაგრამ იმწამსვე ჩემგან შორს წაიყვანეს.

აქეთ-იქით ვიყურებოდი, ვფიქრობდი, ეგებ სადმე ჩემს სათნო ქალბატონს თვალი მოვკრა-მეთქი და, ბოლოს და ბოლოს, დავინახე... მაგრამ ვაი, ამ დანახვას! მიწაზე გაშლართულს საბრალო ლიდიამ მკერდზე ჰყავდა მიკრული. მშვენიერი თმა გასჩეჩოდა, ცალი ფეხსაცმელი ეცვა, მოქარგული პერანგი სანახევროდაც არ უფარავდა სხეულს, საცვლებისა და ქვედაკაბის ამარა დარჩენილიყო. ძუძუზე მისმულ პატარა ლიდიას მხოლოდ პერანგი ეცვა – ჩვილს არც საბურველი, არც სახვევები, არაფერი უფარავდა სათუთ კანს. თავდამსხმელთა ცხენები ქალბატონის გარშემო ისე ახლოს იდგნენ, შემეშინდა, რამე არ დაუშავონ-მეთქი და ანგარიშიუცემლად მივვარდი, რომ გამეფრთხილებინა. მან თავი წამოსწია და ისე დამიქნია, თითქოს უნდოდა ეთქვა, ახლა ჩემთვის ყველაფერი სულერთია, ცოცხლებში აღარ გწერივარო.

– ბავშვები! ბავშვები! – ძლივს წარმოთქვა ეს ორი სიტყვა.

– მარიამი იქით არის, სალომე კი ცოტა მოშორებით, – ვუთხარი მე.

უცებ ხელზე ძლიერად მომქაჩეს. ქალბატონის მიტოვება არ მინდოდა, მაგრამ ტყვეს ჩემს ნებაზე ყოფნის უფლებას ვინ მომცემდა და ჩემს ადგილს დავუბრუნდი. იმან, რაც შემდეგ დავინახე, თითქოს გამაქვავა: ანას სიახლოვეს დაუნდობელი სისხლიანი შეტაკება გაიმართა, თავად არც კი შერხეულა, მოსალოდნელი საფრთხე თავიდან რომ აეცილებინა. ლეკები მის დასაკუთრებას ცდილობდნენ. იცოდნენ, რომ თავადის ქალი ძვირფასი ნადავლი იქნებოდა და ამიტომ ერთმანეთს დაუნდობლად უტევდნენ. ჩხუბი დასრულდა და ქალბატონი ჩემსავით ერთ-ერთმა დაისაკუთრა, რომელიც დაიხარა და ჰკითხა:

– შენ ხარ თავადის ქალი ჭავჭავაძისა?

– დიახ, – უპასუხა და თვალებით შვილს დაუწყო ძებნა. ქართულად მოლაპარაკე ერთმა კაცმა ბავშვზე მიუთითა. ქალბატონმა ბრილიანტის უძვირფასესი საყურე გამოიძრო და მას გადასცა, შემდეგ კი გონი დაკარგა.

მთელი ამ ხნის განმავლობაში თავადის ქალ ორბელიანს თვალი ვერსად მოვკარი; მისი მულიშვილი კი, თავადის ასული ნინო, ჩემ შორიახლოს საუკეთესო ცხენზე იჯდა. გაკვირვებას ვიყავი, როცა მის მოხდენილ ქართულ ჩაცმულობას შევხედე – უზადოდ მოწესრიგებულად ეცვა, არც კი დასჭმუჭნოდა. თავადის ასულს ერთი ახალგაზრდა იცავდა, რომელსაც დანარჩენებივით მრისხანე გამომეტყველება არ ჰქონდა. თავადის ასულ ნინოსგან სრულიად განსხვავებულად გამოიყურებოდა ქალბატონების ღრმად მოხუცებული დეიდა. კაბა მთლიანად შემოსძარცვოდა, კეთილშობილ სახეზე თეთრი თმა ჩამოშლოდა, ხელები აღეპყრო და თითქოს მამაზეციერს ევედრებოდა, სასჯელი მოევლინა უღირსებო არსებებისთვის, რომლებიც არც მის ჭაღარას სცემენ პატივს და არც მის ასაკს. ას წელს მიტანებული საბრალო ქალიც თითქმის შიშველი იყო; მთიელები სასტიკად მოექცნენ – ხეზე მიაბეს და მეორე დღემდე ასე დატოვეს. რაც შეეხება თავადის ქალ თინას – ჩვენ რომ წაგვიყვანეს, მერე ტყეს შეაფარა თავი, სადაც გლეხებიც იმალებოდნენ. ჩოხა-ახალუხი ჩააცვეს და თელავში წაიყვანეს. ეს ორი მსხვერპლი ლეკებმა მიატოვეს, ფიქრობდნენ, რომ არაფერში გამოადგებოდათ.

ამასობაში სასახლის ძარცვა დაიწყო: სკივრები, ჭურჭელი, ვერცხლეულობა, მაქმანები, ბრილიანტები, ძვირფასი შალეული, ყველაფერი ხარბი მტაცებლების ხელში გადადიოდა, რომლებმაც არც მათი ფასი იცოდნენ და არც იმ ნივთების უნიკალურობისა გაეგებოდათ რამე, რომლებსაც პირველად შეახეს ხელი. სანამ ერთი მათგანი ვერცხლის ლანგრებს ჭეჭყავდა, რათა ტომარაში მოხერხებულად ჩაეთია, მეორე ძველ ხელთათმანს ან ჩვეულებრივ შანდალს ეტანებოდა, რადგან ეგონა, კარგ ნადავლს ვიგდებ ხელშიო. უნდოდათ თან წაეღოთ შაქარი, ყავა, ჩაი. ვიღაც ტუჩსაცხს უსინჯავდა გემოს, სხვა აბუსალათინის ზეთს ყლუპავდა, ალბათ ჩვენი სამზარეულოს სურსათ-სანოვავე ეგონა. ვიღაც ცდილობდა პირში ცარცის ნატეხი ჩაედო, რომ გაეგო, საჭმელად ვარგისია თუ არა. საშინელი და გულისამრევი სანახაობის შემსწრე აღმოჩნდით; ველურებმა თავიანთი სახე სრულად გამოაჩინეს.

ძარცვამ საათზე მეტხანს გასტანა. ბოლოს სასახლის ეზოდან გაგვიყვანეს და გზას დავადექით. ფეხით მივდიოდი; ნუკერები კი ამხედრებულნი მგზავრობდნენ. გზის სივიწროვის გამო ერთი ჩემ წინ მიდიოდა, მეორე კი უკან მომყვებოდა. მალე კიდევ ერთი ჩალმიანი მთიელი შემოგვიერთდა. თავში სამზარეულოს ჭურჭლის ტილო მესროლა და შემდეგ ნუკერის უკან ცხენზე კაცივით შემსვა. სხვა ტყვე ქალებიც ზუსტად ჩემსავით მგზავრობდნენ.

V

ალაზანი

ვიწრო გზით მივალწიეთ მდინარემდე, რომლის ნაპირას თავადის ეკიპაჟები იდგა. ლეკები მიხვდნენ, რომ თან ვერ გაიყოლებდნენ, ამიტომ ცეცხლი წაუკიდეს.

წყალი ცხენებით გადავიარეთ. მხოლოდ თავადის ქალი ანა აგრძელებდა გზას ფეხით მკლავზე გადაწვენილ პატარა ლიდიასთან ერთად. მდინარის შუაგულს რომ მიაღწია, თავი ვერ შეიკავა და ბავშვთან ერთად წყალში ჩავარდა. ლეკებმა მაშინვე ნაპირზე გაიყვანეს და ძალღონეგამოლეული ცხენზე შესვეს. მისი ხელახალი ტანჯვაც აქედან დაიწყო. მომტაცებლის უკან მჯდარს ცალი ხელი მაგრად უნდა ჩაეჭიდა მხედრისთვის, რომ ცხენიდან არ ჩამოვარდნილიყო, მეორით კი ლიდია უნდა მიეკრა მკერდზე. საცოდავ პატარას, რომელსაც მხოლოდ პერანგი ემოსა, დაღლილი ხელი საიმედოდ ვერ იჭერდა და უნაგირს ეხეთქებოდა. დედა ტირილით ემუდარებოდა მასთან ერთად მიმავალ მთიელს, რომ მიეცა რამე, რითაც ბავშვს ტანზე მიიკრავდა... მთიელი მის ტანჯვას არად აგდებდა.

თავადის ქალი ორბელიანი ბრაზობდა, რომ ლიდია თავისთან არ დაიტოვა. ეს იმიტომაც მოხდა, რომ მისი და ძუძუს აწოვებდა პატარას, თან იმ მდგომარეობაში არ ვიცოდით, ვის რა გველოდა და დედა-შვილის განშორება არაკეთილგონივრული საქციელი იქნებოდა. მართალია, ალექსანდრე ჭავჭავაძე ძიძას ხელიდან გამოსტაცეს, მაგრამ ბედის წყალობა იყო, რომ საიმედო ხელში მოხვდა. დედამისის მოახლე ლუცია, საკვებს რომ ვერ შოულობდა, საბრალო ბავშვს თოვლს აჭმევდა და სიკვდილისგან იხსნა. სამაგიეროდ, ყველაზე ილბლიანი გიორგი ორბელიანი აღმოჩნდა. მისი ჯანსაღი სხეული მაშინვე თვალში მოუვიდათ მთიელებს: ძიძას დაუტოვეს და ტომარაც მისცეს, ბავშვი სხეულზე მჭიდროდ რომ მიეკრა.

დროდადრო სალომე და მარიამი ჩემ შორიახლოს ჩნდებოდნენ და დალაპარაკებასა და დამშვიდებას ვახერხებდი. სალომეს ქცევაში, მიუხედავად პატარა ასაკისა, იგრძნობოდა კეთილშობილური სიამაყე – მასთან ერთად მჯდომ კაცზე ხმამაღლა ბრაზობდა და თავისი პატარა ხელით ემუქრებოდა. მეშინოდა, ცუდად არ მოჰქცეოდნენ და მის დაშოშმინებას ცვდილობდი. მარიამს კი მისი თვინიერება და თავაზიანობა წაადგა. თავიდან ტიროდა, შემდეგ ვილაგამ ვაშლი მისცა, ჭამა დაიწყო და მაშინვე გაჩუმდა. ცოტა ხანში გლეხის ბიჭუნა და თავადის ნებიერა – ელო ახლოს დაუსვეს, რის შემდეგაც უდარდელად ცელქობდა და იცინოდა.

ნატრებად დაფლეთილი ჩვენი ტანსაცმელი, შლაპები და სხვა ნივთები ცხენისა თუ მთიელის თავებს ამშვენებდა. ჩემი ქოლგა ვიცანი, რომელიც ერთ-ერთს ბაირალივით მოჰქონდა – მთიელებს, არაბების მსგავსად, ქოლგა კეთილშობილების სიმბოლოდ მიაჩნიათ.

ხანგრძლივი სიარულის შემდეგ ჩვენი გამტაცებლები ფართოდ გაშლილ მდელოზე დასასვენებლად შეჩერდნენ. აშკარად ეტყობოდათ, რომ ნადავლით კმაყოფილები იყვნენ. საქმის დამთავრების ნიშნად რამდენჯერმე თოფიდან გაისროლეს კიდეც. ამ ხმაზე ბევრმა ჩეჩენმა და ლეკმა მოიყარა თავი, რომლებიც წინანდალში ძარცვის დასასრულებლად იყვნენ გაგზავნილი.

ერთ-ერთი მომიახლოვდა და მაჩვენა სასახლიდან მოპარული ფრანგული წიგნი სათაურით „ქრისტიანობის სული“. უხეში ხელის უდიერი მოპყრობის გამო წიგნი შელახულიყო. ძალიან მომინდა, მშობლიურ ენაზე დაწერილი ეს ფურცლები თან მექონოდა, განსაკუთრებით იმიტომ, რომ სხვა შესაძლოა ველარასდროს მეხილა! მთიელმა მკითხა, რა წიგნიაო. რუსული არ ვიცოდი და ერთი სიტყვით ვუპასუხე – კარგია. ისევ გზას უნდა დავდგომოდით. მთიელი თავის ნადავლიანად წავიდა.

თავად ჭავჭავაძის სამი წლის გოგონა თამარი განწირული ხმით ტიროდა, რადგან ძიძისთვის წართმევას ცდილობდნენ. მისი ჩხავილით გაბეზრებულმა მტაცებლებმა ბავშვი ტომარაში ჩასვეს. პატარა, საშიშ სახეებს რომ ველარ ხედავდა, გაყუჩდა და დამშვიდდა, მერე კი ძილმა წაართვა თავი.

ჩვენი გამცილებლები სამი ათას კაცამდე მაინც იქნებოდნენ. ამ სიმრავლის გამო იყო, რომ ჯგუფები ერთმანეთს ვშორდებოდით. ქალბატონებს და ბავშვებს ველარსად ვხედავდი. ყურადღების გადატანა ვცადე და მიმდევრების თვალიერება დავიწყე. გული მწყდებოდა, რომ მთიელები ამ საუცხოო ყანებს ცხენებით უმოწყალოდ თელავდნენ! არაადამიანები, ნამდვილი ბარბაროსები! ამ მიწის საბოლოოდ მოოხრება და გაჩანაგება სურდათ.

როგორც იქნა, მივალწიეთ ალაზანს. თავსხმა წვიმის შემდეგ ისე ადიდებულიყო, რომ თავბარდამცემი იყო მისი ყურება. ნიაღვრებისგან მთლად გადარეულიყო და ნაპირზე გადმოსულიყო. ნუთუ ისეთი უგუნურები აღმოჩნდებიან, რომ აქ გადასვლას გაბედავენ? გაბედეს და თანაც იმგვარი სიმარჯვე და სიმამაცე გამოავლინეს, დღესაც, ამდენი ხნის შემდეგ, გოცეხის ვარ. ბავშვები ცხენების ქედზე შემოსვეს – ასე არ დასველდებოდნენ – ჩვენ კი ჟესტიკულაციით აგვიხსენეს, ასეთ მდგომარეობაში ხელით მაგრად დაიჭირეთო. შემდეგ ცხენები უცებ წყალში შერეკეს; რაც უნდა მაღლა აეწიათ ცხენებს თავები, წყალი მაინც ყურებამდე სწვდებოდათ. უნდა გენახათ, რა თავგანწირვით ცდილობდნენ სტიქიასთან გამკლავებას! შუაგულ მდინარეში რომ ვიყავით, მარიამმა დამიყვინა: „მადამ, წყალი კაბას წაგართმევთ!“ მართალი აღმოჩნდა – მდინარის მეორე მხარეს გასული პერანგისა და კორსეტის ამარა დავრჩი. სიცვიისგან ვძაგძაგებდი. ერთ-ერთ მთიელს შევეცოდე და ნაბადი მომახურა.

ალაზნის ნაპირას რამდენიმე წუთით შევყოვნდით. ჩემმა გამყოლმა ჯიბიდან სიმინდის ფქვილი ამოიბერტყა და უნდოდა, ჩემთვისაც ეწილადებინა. მერე ქვასავით მაგარი კამეჩის მოხარშული ხორცის ნატერი გამომიწოდა. უარი ვუთხარი, და

წყალი ვთხოვე. სწორედ ამ დროს მომიახლოვდა ჩალმიანი მთიელი, რომელმაც ხელზე შერჩენილი ერთადერთი ბეჭედი წამაძრო. მეორე ბეჭედი და სხვა ძვირფასი ნივთები ჯერ კიდევ თავადის სასახლის ეზოში წამგლიჯა. ნუკერებს რაღაც უბრძანა და გაგვშორდა. ჩემმა გამცილებელმა ხარები და კამეჩები სხვა გზაზე გადაიყვანა, მაგრამ დიდად არ დავშორებივარ ჩემს ძვირფას თანამგზავრ ქალებს. [...]

VI

თავდასხმა. ლიდის სიკვდილი

ჩვენ სიახლოვეს მოულოდნელად დიდი განგაში ატყდა. ქართველთა მცირერიცხოვანი ჯგუფი ჩვენს გასათავისუფლებლად თავს დაესხა ბადრაგებს და მათ შორის ამტყდარმა ბათქაბუთქის ხმამ იქაურობა გააყრუა. მთიელები ბევრად მეტნი იყვნენ, მაგრამ ეშინოდათ, ამ პატარა ჯგუფს დიდი ძალა არ მოჰყოლოდა. არც ერთ მუჭა ხალხთან უნდოდათ შებმა და თავიანთი გამარჯვების სასწორზე შეგდება. ჩვენ თავზე ნაბდები გადაგვაფარეს და მოკურცხლეს, ისე გარბოდნენ, ყურადღებას არ აქცევდნენ ყანებს, დაბლობებს, თხრილებსა და სხვა წინააღმდეგობებს. ჰაერი შეძრა ძახილმა: „იმამ შამილი! იმამ შამილი“¹² მათრახებითა და ყიჟინით გადარეული ცხენები ისეთი სისწრაფით მიქროდნენ, რომ სული გვიგუბდებოდა.

ეს მართლაც ჯოჯოხეთური სრბოლა საათზე მეტხანს გაგრძელდა. მხოლოდ შებინდებისას მიუშვეს ალვირს და ცხენებმა ჩორთით განაგრძეს გზა. ჭაობიან ადგილას მოვხვდით. ლიანები და ეკალბარდები გზას გვიღობავდნენ. თავადის ქალმა ჭავჭავაძემ გვერდით ჩამიარა – ერთიანად გაფითრებულმა და დამწუხრებულმა. თან აღარ ჰყავდა ლიდია, რამაც შემაშფოთა. თავს ვეკითხებოდი, სად შეიძლება ყოფილიყო თავადის პატარა ასული? პასუხის გამცემი არავინ იყო და მეც მოთმინებით აღვიჭურვე.

რამდენი ქართული სოფელიც გავიარეთ, ყველა ცეცხლის ალში იყო გახვეული. თითქმის ყოველი ცეცხლმოკიდებული სახლიდან გამოჰყავდათ ტყვეები და ჩვენთან მოჰყავდათ. შემალღებულ ადგილას შევჩერდით. თვალი უზარმაზარი ხანძრის ალმა მომჭრა. საშინელი ყვირილი აღმომხდა. ლეკებმა გამაგებინეს, რომ წინანდლის სასახლე იწვოდა.

12. იმამი შამილი (1797-1871) – შამილ-ეფენდი, დაღესტნისა და საჩაჩნოს მესამე იმამი (იმამი არაბულია, ნიშნავს წინ მდგომს, უწინარესს, სულიერ წინამძღოლსა და საერთო-სახელმწიფო ძალაუფლების მპყრობელს), მთიელთა ეროვნულ-განმათავისუფლებელი მოძრაობის მეთაური.

საბრალო თავადი! ისიც ხედავს ამ ცეცხლის ელვარებას. მისთვის ყველაფერი ძვირფასი იქ ეგულება: ცოლი, შვილები, და, დისშვილი, მეგობრები, დიდი სიმიდირე, რაც რამდენიმე საათში ფერფლად იქცეოდა. გული ლამისაა გაუსკდეს, მაგრამ მოვალეობა უფლებას არ აძლევს, მიატოვოს თავისი სამსახურებრივი ადგილი. რა უნდა მოიმოქმედოს? ისღა დარჩენია, გამოიტიროს თავისიანები როგორც ქმარმა, როგორც მამამ... გამძვინვარებულმა ცეცხლმა ყოველგვარი იმედი გადაუწურა. ალბათ იფიქრა, რომ ჩვენგან აღარავინ დარჩა ცოცხალი.

სხვები გადარჩნენ, მაგრამ ლიდია უკვე აღარ იყო ამქვეყნად. ეს-ესაა გეუბნებოდით, რა სისწრაფით გარბოდნენ ლეკები. თავადის ქაღს ძალა საბოლოოდ გამოელია. ხელი, რომლითაც დიდიდან მოყოლებული ბავშვი ეჭირა, მთლად დაუბუჟდა და – მოულოდნელი ბიძგისგან დედას შვილი ხელიდან უვარდება; ლიდია ბალახზე ეცემა, გაუბედურებული დედა სულის შემძვრელად კივის და ცდილობს ცხენიდან გადმოეშვას ბავშვის ხელში ასატაცებლად, მაგრამ მთიელი მხედარი ისე ძლიერად ბოჭავს, რომ განძრევის საშუალებას არ აძლევს, არად აგდებს მის ყვირილსა და ცრემლებს. მათ უკან ჭენებით მოქრიან ცხენები, რომელთა ფლოქვებმა გადათელა ჩვილის სხეული. რომელიღაც ჩეჩენმა ხანჯლის დარტყმით ბავშვი სიცოცხლეს გამოასალმა.

თავადის ქალი ამ დროს უკვე შორს იყო და ეს არაადამიანურობა არ დაუნახავს. თავს დიდხანს იმშვიდებდა, ბავშვს ვიღაც მაღლიანი აიყვანსო, დედური შფოთვის მიუხედავად, მსგავს ბარბაროსობას ვერ წარმოიდგენდა. კარგა ხნის შემდეგ გავიგეთ, რომ მესამე დღეს ლიდიას სხეული უპოვიათ და მამასთვის მიუტანიათ. პატარა ახლა წინანდლის პატარა ეკლესიაში განისვენებს.

იმავე ადგილას სამოცი გვამი იპოვეს. მათგან სამი წინანდელის იყო: ლიდია, თავადის მოურავის მეუღლე დარეჯანი და მღვდლის ცოლი. ეს უკანასკნელი თავდაპირველად ყველას მე ვეგონე. გაზეთებში გამოქვეყნდა ცნობა ჩემი სიკვდილის შესახებ. ამ უნებლიე შეცდომამ ძლიერ დაამწუხრა ჩემი ოჯახი.

[...]

VII

ღამე ტყეში. ჰაჯი-ქერიმი¹³

დალამდა. დაბურულ ტყეში გზის გასაგრძელებლად შესულებს ტოტები და ღია-ნები განუწყვეტლივ გზას გვილობავდა, წინ ძნელად მივიწევდით. ჩვენი გამტაცებლები ჩქარობდნენ, უნდოდათ, რაც შეიძლება მალე გასცლოდნენ ქართულ მიწას. მიუხედავად გზის სირთულისა, ძალიან დიდხანს შეუსვენებლად მივდიოდით, წუთითაც არ დაგვისვენია. ხანდახან ქალების კივილი ისმოდა, როცა მათი თმა ხეებს ედებოდა, ანდა კეფაში ეკლები ერჭობოდათ. უკუნი სიბნელე იყო. დღესაც გული ყელში მებჯინება, იმ საშინელ პირველ ღამეს რომ ვიხსენებ.

ჩვენი ზედამხედველი, მართალია, მთიელი ველური იყო, მაგრამ არაადამიანური შესახედაობა არ ჰქონდა. რა ვიცოდი, წინ რა წვალემა ან რისი გადატანა მელოდა. ჰაჯი-ქერიმის (ჩალმიანი მთიელი – ჩემი და ორი ნუკერის ბატონი) ბრძანებით უნდა ჩამოვქვეითებულიყავი, დამებრუნებინა ნაბადი, რომელიც ალაზნის გადაღახვის შემდეგ თანაგრძნობის ნიშნად მომასურეს და ფეხით გავყოლოდი მფლობელს. გზას ნაალაფარი პირუტყვი გვიკვალავდა. ქალბატონები ჩემგან შორს იყვნენ. შევუყევით რომელიღაც მთის ფერდობს და კარგა ხანს ვიარეთ. თანდათან ძალა გამომეცალა და დავვარდი. წარმოიდგინეთ ჩემი სირცხვილი და სასოწარკვეთა, როცა უმწეო მსხვერპლს ერთი მეორის მიყოლებით მათრახი დამკრეს. სხვა გზა არ დამჩენოდა, ამ უბედურებისთვისაც უნდა გამეძლო, მაგრამ რას წარმოვიდგენდი, უარესი განსაცდელისა და წამების გადატანა რომ მომიხდებოდა.

გზის გასაგრძელებლად თავს ძალას ამაოდ ვატანდი. ტყეში გამოვლილმა ერთმა ღამემ არაქათი გამომაცალა... მეორედ დავეცი. ჰაჯი-ქერიმმა ისევ დამარტყა. ავდექი, მაგრამ მან ბრაზიანად ისევ მიწაზე დამაგდო. მეგონა, მოკვლას მიპირებდა: ცალი ხელი პირზე ამაფარა, მეორე კი მკერდზე ძლიერად დამარტყა. მუშტი კორსეტში დამალულ მედალიონს მოხვდა, რომელშიც ჩემი შვილის ფოტოს ვინახავდი. მთიელი მეძგერა, კორსეტი ჩამხსნა, რამდენიმე პატარა ხატთან და წერილებთან ერთად მკერდიდან ჩამომგლიჯა ჩემი პატარა ვაჟის პორტრეტი, რომელსაც როგორც სანუკვარ საგანძურს, ისე ვუფრთხილდებოდი. ხატები თითებიდან დაუსხლტა. ყაჩაღს ფული ეგონა და სიბნელეში ხელის ფათურით ძებნა დაიწყო. გამალებით ხან მათრახს მირტყამდა და ხან მუშტებს, რომ მეც მივხმარებოდი. უშედეგოდ ვეძებეთ და გზას უკმაყოფილონი გავუდექით: ის თავის დანაკარგს დარდობდა, მე კი მისი სისასტიკე მანადგურებდა.

13. ჰაჯი-ქერიმი – შამილის ერთ-ერთი ნაიბი.

კოცონი დავინახეთ და მისკენ გავეშურეთ. სიარულისა და სიცივისგან ფეხები მთლად გამხევებოდა. საშინლად მწყუროდა. დაჟინებით ვთხოვდი ჩემს ჯალათს წყალს და როცა მივხვდი, ჩემი არ ესმოდა, თუნგებზე მივუთითე. სპილენძის ჭურჭელი შორიახლოს გაჩერებულ ცხენებზე იყო გადაკიდებული. ჰაჯი-ქერიმმა ბრძანება გასცა, მისთვის მიწაზე ნაბდები გაეშალათ; ერთ-ერთი, მისივე მითითებით, ჩემთვისაც დააფინეს, მაგრამ მე ვიუარე – მერჩინა, ცხენს მივყრდნობოდი, რომლისაც ისე არ მეშინოდა, როგორც ამ ბარბაროსის. ორ საათს მაინც ისვენებდა. მე კი მცოლდა და წყურვილი მახრჩობდა. ბოლოს, ჰაჯი-ქერიმმა მთვარეს ახედა, ნაბადი კვლავ ცხენზე გადააფინა და გზა გავაგრძელეთ. ფეხები დამისისხლიანდა. რაც უფრო წინ მივიწევდი, გზა უფრო და უფრო უარესდებოდა; ჩემი სიფრთხილის მიუხედავად, წვეტიანი ქვები და ეკლიანი ბუჩქები მთელ სხეულს მიკაწრავდა. ვცდილობდი, საბაბი არ მიმეცა, მაგრამ მაინც მცემდნენ. გზის გაგრძელება რომ ველარ შევძელი, მიწაზე დაცემულმა ღმერთს შევთხოვე, ჩემს ტანჯვა-წამებას ბოლო მოეღებოდა. ჰაჯი-ქერიმმა გამოლაპარაკება სცადა, მაგრამ მისი ნათქვამიდან მხოლოდ ეს გავიგე:

– შენ თავადის ქალი ხარ?

კითხვა რამდენჯერმე გამიმეორა. რასაკვირველია, უნდოდა, წინასწარ სცოდნოდა, ჩემში რა გამოსასყიდს მიიღებდა. არც კი მიფიქრია, მეთქვა, თავადის ქალი ვარ-მეთქი, რაც, შესაძლოა, აუტანელ მოპყრობას ამარსებდა.

– გუვერნანტი ვარ.

ჰაჯი-ქერიმს ფრანგული არ ესმოდა, მაგრამ მაინც შეეძლო კაცთმოყვარეობა გამოეჩინა. ჩემგან საკმაოდ ფასეული ნივთები წაიღო და ვერ იფიქრებდა, რომ შეიძლებოდა უბრალო გლეხის ქალი ვყოფილიყავი. ამიტომაც მკითხა:

– შენ ბატონი (ქალბატონი) ხარ?

– დიახ, – ვუპასუხე.

ბოლოს, იხმო ერთ-ერთი ნუკერი – ივანე და მხრებში შემიდგნენ. რამდენიმე ნაბიჯის გადასადგმელად უკანასკნელი ძალ-ღონე მოვიკრიბე. როგორც იქნა, მთის მწვერვალზე ავალწიეთ, მერე თავქვე დავეშვი. არ მახსოვს, ამ გზაზე რამდენ ხანს ვიარეთ. რამდენჯერმე სამივე ერთდროულად დავეცით. განრისხებული ჰაჯი-ქერიმი წაქცევას მე მატრავებდა. ივანე, პირიქით, ყოველთვის ადამიანურად მეპყრობოდა: როცა ჩემი წამოყენება ან ხელის შემოშველება უწევდა, არასოდეს უხეშად არ მომქცევია. ჩვენი ზედამხედველი ნამდვილი მტარვალის იყო და სიცოცხლეს მხოლოდ იმიტომ არ გამომასალმა, რომ ფიქრობდა, დიდ გამოსასყიდს მივიღებო. მან ხომ არ იცოდა, ვინ და რა ვიყავი.

როგორც იქნა, ვაკე ადგილზე გავედით. ივანემ ჰაჯი-ქერიმის უკან ცხენზე შემსვა. უნაგირზე ამოჩრილი ლურსმნები აუტანელ ტკივილს მაყენებდა. რამდენჯერმე წამოვიყვირე, მაგრამ ჰაჯი-ქერიმი ამას ყურადღებას არ აქცევდა. მიბრძანა, მის ქამარს მაგრად ჩავჭიდებოდი. ენით აღუწერელი იყო ჩემი მდგომარეობა – თავის გა-

დასარჩენად იძულებული ვიყავი ჩემს ჯალათს შევხებოდი. სხვა ტყვეებს მოწყვეტილი, ორ კაცს ვყავდი დატყვევებული. ერთი შიშის ზარს მცემდა, მეორეს, პირველის ნების უსიტყვო შემსრულებელს, რომც ნდომებოდა, ვერაფრით დამეხმარებოდა.

როცა ერთი ნაკადული გადავიარეთ, უფლება მომცეს ჩამოვქვეითებულიყავი. საშინლად მწყუროდა და კარგა ხანს უშედეგოდ ვითხოვდი წყალს. ბოლოს გადავწყვიტე ნაკადულის წყალი დამეღია, თუმცა ივანემ სასწრაფოდ შემაჩერა, თითქოს დანაშაულს ჩავდიოდი. მინდორზე ნაბადი დააფინა და მანიშნა, დაჯექიო. დავემორჩილე. ჰაჯი-ქერიმმა თავის უნაგირზე გადაკიდებული ხალიჩა გადმოიღო და წყლის პირას გაშალა. მერე მოიტანა თავისი თოფ-ხანჯალი და ჩემ გვერდით კი არა, ზედ დამაწყო – იმის ნიშნად, რომ მისი მონა ვიყავი. თავი მოიშიშვლა, ნაკადულს მიუახლოვდა და მთვარის შუქს გაუსწორდა. მუხლებზე მდგარი კარგა ხანს ღოცულობდა. მეც ვლოცულობდი, ღმერთს ვემუდარებოდი, ან ქალბატონებთან დავებრუნებინე, ან სიკვდილი გამოეგზავნა.

ლოცვის დასრულების შემდეგ ჰაჯი-ქერიმი ისევ ჩემთან მოვიდა. ივანემ ნაკადულიდან აღებული წყალი მიაწოდა. მან შესვა და მერე მე გამომიწოდა თუნგი, რომელშიც ივანემ რაღაც თეთრი ჩააგდო. გემოთი მივხვდი – შაქარი იყო. წყალს დავეწაფე, ვერა და ვერ ვიკლავდი წყურვილს...

ამასობაში ჰაჯი-ქერიმმა ჯიბიდან ჩემთვის წართმეული ძვირფასეულობა ამოიღო, მათ შორის მედალიონიც. გაკვირვებული უყურებდა ჩემი შვილის პორტრეტს. ვერ ხვდებოდა, ვისი გამოსახულება შეიძლებოდა ყოფილიყო. ვცდილობდი ამეხსნა, რომ ჩემი შვილის სურათი იყო და ვთხოვდი უკან დაებრუნებინა. სასოწარკვეთილმა მთვარეზე მივუთითე და ვთქვი: ალლა იია (ღმერთი არს), ჩემთვის ნაცნობი ორად ორი არაბული სიტყვა. განცვიფრდა. ისევ სცადა გამოლაპარაკება, მაგრამ ვერაფერი გამაგებინა. ასე მგონია, სწორედ ამ წუთიდან ჩემდამი თანაგრძნობა გაუჩნდა და აღარ ვუცემივარ.

[...]

VIII

ძიძა

გზა ცხენებით განვაგრძეთ. კვლავ ჰაჯი-ქერიმის უკან ვიჯექი. მაჩვენა, როგორ ჩავჭიდებოდი და ამით დავასკვენი, რომ სწრაფად ვივლიდით. სინამდვილეში, ცხენები ჩოროთით მიუშვეს და ასე დიდხანს ვიარეთ. ივანე ჩვენზე წინ მიდიოდა. შორს ბუნდოვნად რაღაც გამოჩნდა, რომელიც მიწას თანდათან გამოეყო და ნელ-ნელა მოგვიახლოვდა. ადამიანი აღმოჩნდა – ლეკ მწყემსს ძონძები სხეულს

ძლივს უფარავდა. ჰაჯი-ქერიმს მიუახლოვდა, ბეჭედი აჩვენა, ერთმანეთს რამდენიმე სიტყვა უთხრეს, რის შემდეგაც გაგვეცალა. არ ვიცოდი, ჩემი გამტაცებელი მთიელთა შორის პატივისცემი კაცი იყო თუ არა, მაგრამ მისი ნაიბური მედლებით თუ ვიმსჯელებდით, საკმაოდ წარჩინებული უნდა ყოფილიყო. გზა მივარდნილ ადგილებში გადიოდა, კოცონები მღვიმეებს ანათებდა. ცეცხლის გარშემო მწყემსები ისხდნენ. ეს იმას ნიშნავდა, რომ ამ ადგილებში მშვიდად შეიძლებოდა მგზავრობა და რუსთა თავდასხმა მოსალოდნელი არ იყო.

განთიადზე შესასვენებლად ჭაობიან ადგილას გავჩერდით. ციოდა, ვკანკალებდი. მიბრძანეს ცხენიდან ჩამოვსულიყავი. ჩემდა გასაკვირად, იქვე რამდენიმე ქართველი ქალი შევნიშნე, რომელთაც მთიელები დარაჯობდნენ. ამ უკანასკნელებს ჭაობიდან ხის ძირკვები ამოეღოთ, გროვად დაეხვავებინათ და წვავდნენ. ის-ის იყო გასათობად ცეცხლთან მისვლა დავაპირე, რომ ალერსით ნათქვამი ჩემი სახელი გავიგონე. შევტრიალდი და რას ვხედავ! ქართველ ქალთა შორის ჩემი სათნო თავადის ქალი ორბელიანი დავინახე, რომელიც მიწაზე გაფენილ ნაბადზე იჯდა. მასთან მივირბინე. ფერმკრთალსა და გამხდარს ხელები მომხვია, ცდილობდა, როგორმე გავეთბე.

– ოჰ, ქალბატონო! გუშინ რამდენს გეძებდით...

– რა მოუვიდა ჩემს შვილს? – იკითხა საბრალო დედამ.

– გიორგი სწორედ ტყეში შემოსვლის წინ დავინახე, თავის უშიშარ ძიძას ეჭირა.

ჩემმა ნათქვამმა უბედური დედა ოდნავ დაამშვიდა. შემდეგ ჩემს ტანჯვა-წამებაზე მოვუყევი. ჰაჯი-ქერიმმა მალევე მომაკითხა.

– ეს ფრანგი გენერლის ცოლია, – უთხრა მას თავადის ქალმა, – მინდა ჩემთან დარჩეს.

გენერლის ცოლი ნამდვილად არ ვყოფილვარ, მაგრამ ქალბატონს სურდა, ჰაჯი-ქერიმი ჩემდამი პატივისცემით განეწყო.

– შენ ვინლა ხარ, ასე რომ ლაპარაკობ? – ჰკითხა მან.

– მე თავადის ქალი ბარბარე ორბელიანი ვარ.

– მასში დიდ გამოსასყიდს გადაიხდიან? – ისევ ჰკითხა ჰაჯი-ქერიმმა, – თუ არა და ჩემთან დავიტოვებ.

ამის შემდეგ ჩემთვის წართმეული წერილები აჩვენა თავადის ქალს:

– ესენი ქალაღდის ფულია? რუსეთში ხომ ბევრია ასეთები?

– არა, ფული არ არის.

– აბა, რა არის?

– ოჯახის წევრთა წერილებია.

– თვითონ ქალია თუ ქალიშვილი?

– ქალბატონია.

– შვილები ჰყავს?

- ერთი ვაჟი ჰყავს.
- რუსია თუ ქართველი?
- არც ერთი. ფრანგია. მისი სამშობლო აქედან ძალიან, ძალიან შორსაა.

ჰაჯი-ქერიმმა შეკითხვები დაასრულა და წასვლამდე ჩემი წერილები ცეცხლში ჩაყარა. თუ არ გამოცდის, ვერავინ გაიგებს ჩვენს ტანჯვა-წამებას, რას ნიშნავს ჩვენნაირ მდგომარეობაში მყოფთათვის საყვარელი ადამიანებისგან მიღებული ბარათები. ცეცხლმა წამებში ფერფლად აქცია, რაც კი ძვირფასი რამ გამაჩნდა.

ჰაჯი-ქერიმი მალევე დაბრუნდა. ჩოხა გაიხადა და თავადის ქალ ორბელიანს დასაკემსად მიუგდო. მისი უდიერი საქციელი იმდენად არ მომეწონა, რომ ქალბატონს ჩოხა ხელიდან გამოვტაცე. მთიელს წყენა და გაკვირვება არ დასტყობია. ჯიბიდან პატარა კოლოფი ამოაძვრინა, რომელშიც ნემსი და აბრეშუმის ძაფი იდო და ორბელიანის ქალს გადასცა. ისიც ეგრევე შეუდგა კერვას. როგორც შემეძლო, ვეხმარებოდი. ამ დროს მთიელები წინანდლის ნაალაფარ ჩაის სვამდნენ, მაგრამ არც ერთს, თუნდაც სიბრალულის გამო, ჩვენთვის ფინჯანი ჩაი არ შემოუთავაზებია.

ერთი საათის შემდეგ ჭავჭავაძეების ბავშვების ძიძა, ალექსანდრა მოგვიახლოვდა. მისმა დანახვამ ყველა შეგვაშინა. სასოწარკვეთილი იყო. თავზე, სამ ადგილას ნახმლევი ეტყობოდა. როგორც ჩანს, ხშირმა თმამ სიკვდილისგან იხსნა. ზურგი დასისხლიანებული ჰქონდა, მარცხენა ხელი – დასახიჩრებული, მოკვეთილი თითი ძაფით მიმაგრებულივით ეკიდა ხელის მტევანზე. რა უნდა გვექნა, რით უნდა დავხმარებოდით საბრალო ქალს? ვიცოდით, მთიელები არაფერს მოგვცემდნენ. ჩვენდა გასახარად, ბარბარე ორბელიანს მოუსწრია და თავისი უბრალო, ქვრივის კაბა გადაუნახავს. დაუხანებლად მოახია სახელო და ალექსანდრას ხელი გადაუხვია. მერე სცადა, თავზე იარებისთვისაც მიეხედა, მაგრამ შემხმარი სისხლი და ჩვენი უმწეო მდგომარეობა ამის საშუალებას არ გვაძლევდა. თავადის ქალი იძულებული გახდა, მხოლოდ მცირედით დაკმაყოფილებულიყო და თავი საკუთარი თავსაფრით შეუხვია.

ჰაჯი-ქერიმი ჩოხის წასაღებად მოვიდა. სავარაუდოდ, ჩვენი ნახელავი უნდა მოსწონებოდა, მაგრამ ამას როგორ შევამჩნევდით, როცა დასახიჩრებულ და ნაწამებ ძიძას ვპატრონობდით.

გზას გავუდექით. ცხენზე მჯდარი ორბელიანი წინ მიდიოდა. მე და ალექსანდრა ფეხით მივყვებოდით. განსხეულებულ ურჩხულს ჰგავდა ბადრაგი, რომელიც ალექსანდრას წამდაუწუმ ურტყამდა. სისხლის დაკარგვისა და ტკივილებისგან დაუძლურებული საბრალო ქალი მთხოვდა, არ მიმატოვო. ვერაფრით ვეხმარებოდი, მაგრამ ჩემი გვერდით ყოფნაც ანუგეშებდა. ბოლოს, როცა ძალა სრულიად გამოეცალა, მთელი ხმით დაუწყო ძახილი ორბელიანის ასულს: დედა! დედა! მეც ავყევი. თავადის ქალმა ჩვენი ყვირილი გაიგონა და, მისი თანმხლე-

ბი მთიელის ძლიერი წინააღმდეგობის მიუხედავად, ცხენი შეაჩერა. გაჭირვებით მივლასლასდით მასთან და გამყოლის სისასტიკეზე შევჩივლეთ. თავადმა გარშემომყოფ მთიელებს უთხრა ამის შესახებ, თუმცა მათ წარბიც არ შეუხრიათ. საბოლოოდ, ორბელიანმა მოახერხა, რომ ალექსანდრა ცხენზე შეესვათ, თვითონ კი ფეხით განაგრძო გზა.

დიდხანს ივლიდა ასე, მაგრამ ტალახში სიარული გაუჭირდა და ამის გამო გამოყლებს ჩამორჩა. როგორც კი მთიელებმა ეს შენიშნეს, აიძულეს ძიძასთან ერთად დამჯდარიყო ცხენზე. გასავათებულ ძიძას თავის შემაგრება არ შეეძლო და ორბელიანს ეყრდნობოდა. ძიძა დიდი ტანის იყო, ქალბატონს მისი შემაგრება გაუძნელდა და ძალაგამოცლილს გული შეუღონდა. მთიელები იძულებული გახდნენ, ერთი ცხენი დაეთმოთ ქალბატონისთვის, რომელმაც გზა ცხენით განაგრძო.

ივანეს უკან ვიჯექი. ალაგ-ალაგ ჩვენნიარად დატყვევებული ქართველი გლეხის ქალები გვხვდებოდნენ, ოღონდ, ჩვენგან განსხვავებით, ფეხით მოდიოდნენ. დაბურული ტყის სიღრმეში შევედით. ისეთი ადგილი იყო, იფიქრებდი, აქ კაცს ფეხი არ დაუდგამსო. მიწას სქელი ხავსი ფარავდა, ხოლო ასწლოვანი ხეების გვირგვინს თვალს ვერ აუწვდენდი. ტოტიდან ტოტზე ცისფერ და წითელბუმბულიანი ჩიტები დაფრთხილებდნენ; სხვადასხვა მიმართულებით დარბოდნენ ხავსისფერი ხვლიკები. უღრან ტყეში ერთი ბილიკიც არ იყო გაკვალული.

ნაკადულის სიახლოვეს წინანდლიდან გატაცებული ახალგაზრდა გოგო ვნახეთ. ქალიშვილთან ერთად იყვნენ მისი ღრმად მოხუცებული ბებია და ერთ-ერთი ძმა, რომელსაც ხელში ლიდიას ასაკის ოთხიოდე თვის გოგონა ჰყავდა. პატარა უდედოდ და ურძეოდ დარჩენილიყო.

როცა მდინარეს მივადექით, რომლის გადალახვა არც ისე იოლი იქნებოდა, საწყალი ალექსანდრას დახმარება არავინ ისურვა. ივანეს ვთხოვე მიშველებოდა, მაგრამ უარი მივიღე. ჩვენმა კეთილმა ანგელოზმა, თავადის ქალმა ორბელიანმა მთიელებს სთხოვა, დაჭრილი ქალი მის უკან შემოესვათ ცხენზე. ვერც წარმოედგინა, ამას რა მოჰყვებოდა. ცხენმა იგრძნო, რომ ალვირს ძლიერი ხელი არ მართავდა და შუა მდინარეში გაჩერდა. ქალბატონის მცდელობა, ცხენი როგორმე ადგილიდან დაეძრა, ამას გამოდგა. ბოლოს და ბოლოს, ივანე და კიდევ ერთი მთიელი ცხენებიდან ჩამოხტნენ და თავადის ქალი გაურჩებულ ცხენთან ერთად ნაპირზე გაიყვანეს. მაგრამ რა წამსაც ფეხი მიწაზე დაადგეს, ალექსანდრა მაშინვე ცხენიდან ჩამოაგდეს.

[...]

XVIII

შამილის ცოლები

შამილის ცოლებს შორის უფროსს, სხვა ცოლებისგან განსხვავებით, სერალში განსაკუთრებული უფლებები აქვს მინიჭებული, თუმცა მისი მდგომარეობა და გარეგნობა ერთმანეთს სრულებით არ შეესაბამება. სახეზე ნაყვავილარი ეტყობა. ნელა, მაგრამ სასიამოვნოდ ლაპარაკობს. ძალდაუტანელად, თავისუფლად მოძრაობს და ამ მოძრაობაში ძალაუფლება ჩანს. უფროსი ცოლი ხან ერთ თავადის ქალს ათვალიერებდა, ხან მეორეს. ხელში კრიალოსნის მსგავსი რაღაც ეჭირა და მარგალიტებს თითებით ისე მარცვლავდა, თითქოს ლოცულობსო.

შამილის მეორე ცოლი მშობიარობისთვის ემზადებოდა და ამიტომაც არ შეგვეძლო მისი გარეგნობის შეფასება. სახეზე ფეხმძიმე ქალების უმრავლესობისთვის დამახასიათებელი სიყვითლე დასდებოდა. და ამის მიუხედავად, შეუძლებელი იყო არ გაეოცებინეთ მისი თვალების ცინცხალ მზერასა და ხელების სინატიფეს. ვერცხლივით წკრიალა ხმა ჰქონდა. მართალია, მისი სახის ნაკვთებით ვერ იტყოდი, დიდგვაროვნული წარმომავლობისაო, თუმცა სიკეთითა და სიწრფელით იყო აღსავსე. შუანეთი ერქვა და წარმოშობით რუსი იყო. იშვიათად ლაპარაკობდა რუსულად, მაგრამ, ამის მიუხედავად, შესანიშნავად ახსოვდა მშობლიური ენა. დაბეჯითებით შეიძლება ითქვას, რომ შამილის ბრძანებას ასრულებდა და ამიტომაც ჩვენთან ერთი სიტყვაც კი არ უთქვამს რუსულად. ჩვენი თავადის ქალებიც სიფრთხილეს იჩენდნენ და ერთმანეთთან ძირითადად ფრანგულად საუბრობდნენ, ქართულს მხოლოდ მოახლეებთან ლაპარაკში იყენებდნენ.

ჩვენ სანახავად მოვიდა შამილის მესამე ცოლიც – ძალიან ახალგაზრდა და სასიამოვნო გარეგნობის ქალი. საუბარში თითქმის არ ჩარეულა, ჩუმად იდგა ჩვენი ოთახის დედაბოძს მიყრდნობილი.

შამილის ცოლებს სუფთად, მაგრამ უგემოვნოდ ეცვათ. ვერც ერთში ვერ აღმოვაჩინეთ ის, რასაც წინასწარმეტყველის ცოლებისგან ველოდით. მათ თან ახლდნენ შვილები, ისეთი ჭუჭყიანები, შეუძლებელი იყო მიჰკარებოდი.

ერთმანეთის შეთვალიერებამ ნახევარ საათს გასტანა. მერე უფროსი ცოლი წამოდგა და ოთახიდან მედიდური გამომეტყველებით გავიდა. მას შუანეთიც მიჰყვა. მესამე კი ჩვენ სიახლოვეს ჩამოჯდა. ბავშვებს აკოცა, გიორგი ხელში აიყვანა და ჩვენთან მანამდე დარჩა, სანამ კარგად არ შეგვისწავლა. როცა მარტონი დავრჩით, მაშინვე სველი ტანსაცმლის გაშრობა ვცადეთ. თავადის ქალებმა ითხოვეს, რომ მათი მსახურები მოეყვანათ. ჯერ კატერინა გამოჩნდა, მეორე დღეს კი სხვებიც მოვიდნენ.

ძველ ხალიჩებზე დაწოლილებს ძილმა თავი წაგვართვა. ამის შესაძლებლობა

ხომ დიდი ხანია არ მოგვცემია. 8 აგვისტო იდგა. წინანდლიდან წამოყვანის შემდეგ უკვე თვე და ოთხი დღე იყო გასული. მას შემდეგ დაახლოებით ათასი ვერსი გამოვიარეთ, მუდამ თან გვდეგდა ხიფათი. ლიდიას, ევასა და ელოს ჩათვლით რვა ბავშვი გვახლდა. ევა და ელო, შეიძლება ითქვას, თავადის ქალმა ჭავჭავაძემ იშვილა. ელოს დედა მელანოც ჩვენთან ერთად იმყოფებოდა ტყვეობაში, მაგრამ ფეხმძიმესა და ავადმყოფს არ შეეძლო შვილზე ზრუნვა.

მოლას ყვირილმა ადრე გამოგვაღვიძა. როგორც კი ჩვენი ლაპარაკის ხმა გაიგონეს, გუშინდელი მნახველები კვლავ გამოგვეცხადნენ. თავადის ქალის – ანას თხოვნით, მისი ყველა მსახური მოიყვანეს და ჩვენთან დააბინავეს. ოთახში უკვე ოცდასამი ვიყავით და ისეთ სივიწროვეში აღმოვჩნდით, მოძრაობა გვიჭირდა. ამ დროიდან დაიწყო ჩვენი ხელახალი წამება, რასაც მხოლოდ ტყვეობის დასრულებისას მოელო ბოლო. სულის მოთქმა განსაკუთრებით ღამე ჭირდა.

[...]

XXI

ზაიდეთი. შუანეთი. ამინეთი

ჯემალედ-დინის ქალიშვილი, ზაიდეთი თათარია, ოცდაშვიდი წლის. შამილის პირველი ცოლია და დიდი პრივილეგიები აქვს მინიჭებული: ყველა ბავშვი, მოსამსახურე პერსონალი ვალდებულია, მის ნებას დაემორჩილოს. მას აბარია სურსათის, საწყობისა და სამოსის ოთახების გასაღებები. შამილის დანარჩენი ცოლები პატივისცემით ეპყრობიან. როცა რაიმე ისეთი მოუხდებათ, რაც მათ ყოველდღიურ მოთხოვნილებებს აღემატება, ზაიდეთთან გარბიან, თუმცა ხშირად მისი ხელმომჭირნეობითა და სიძუნწით უკმაყოფილოები რჩებიან.

ზაიდეთმა შამილს გოგონა გაუჩინა, სახელად ნაჯავათი. ამთავითვე ჩანს, რომ გოგონა არაჩვეულებრივი სილამაზის ქალიშვილი დადგება. სამწუხაროდ, ფეხები მეტისმეტად დაგრეხილი აქვს. შვიდი წლისაც არ იქნება, მაგრამ გონებრივად განვითარებულია – ყურანს კითხულობს, წერა და თვლავ ეხერხება. შამილს უზომოდ უყვარს შვილები, მაგრამ პატარა ნაჯავათს, მისი სისუსტისა და დაბრეცილი ფეხების გამო უფრო მეტ ყურადღებას აქცევს, მის მიმართ განსაკუთრებულ სინამდეს იჩენს, ხშირად ხელში აყვანილს დაატარებს ეზოში და ფრთხილად სვამს სკამზე. ნაჯავათს უყვარს მრავალფეროვანი თამაშები და ამ მიდრეკილებით ნამდვილ ბიჭს ემსგავსება. სიბრაღეებით გვესება გული, როცა უყურებ, სხვა ბავშვების მსგავსად, რა სწრაფად დარბის და რა მოხერხებულად დაძვრება ტერასებზე. სულ სახაბაზოშია, სადაც წითლად მოგიზგიზე მუგუზლის ხელში ჩაგდებასა და აივანზე გაქცევას ცდილობს: ეს

მისი საყვარელი გასართობია. ზაიდეთი ამის გამო ცოტა ტუქსავს კიდეც, შამილი კი ერთ გამკიცხავ სიტყვასაც არ ეუბნება.

შამილს შვილები მეორე ცოლისგანაც ჰყავს, რომელიც ძალზე უყვარდა. ფატიმა-თი¹⁴ დარდით მომკვდარა, მას შემდეგ, რაც რუსებს მათი უფროსი ვაჟი, 9 წლის ჯემალ ედ-დინი ტყვედ წაუყვანიათ. მისგან, ჯემალ ედ-დინის გარდა, შამილს კიდეც ორი ვაჟიშვილი დარჩა: ყაზი-მაჰმადი, რომელიც ლეკთა იმ ჯგუფს ხელმძღვანელობდა, რომელმაც წინანდლიდან მოგვითაცა, და 15 წლის მაჰმად-შაფი,¹⁵ ასევე ორი ქალიშვილი: მშვენიერი ნაფისეთი, თოთხმეტი წლისა და დედის მოსახელე თორმეტი წლის ფატიმათი. შამილს ახლანდელი მეორე ცოლისგან, შუანეთისგანაც ბევრი შვილი გაუჩნდა, მაგრამ ყველა მოუკვდა; ერთადერთი ზაიდეთი გადარჩა, რომელიც ვედენოში ჩვენი მოსვლიდან რამდენიმე კვირის შემდეგ მოეწვინა ქვეყანას.

შამილის საყვარელი ცოლი, შუანეთი, ოცდათორმეტი წლისაა. ძნელად თუ ნახავთ ქალს, მასზე ლამაზი ტუჩ-კბილი და მასზე ნაზი თმა ჰქონდეს. საშუალო ტანისაა. სამწუხაროდ, დიდი ტლანქი ხელები და ფეხები მის მდაბიო წარმომავლობაზე მიუთითებს. შუანეთი მდიდარი მოზდოკელი სომეხი ვაჭრის ქალიშვილია. 16 წლის წინ, როცა შამილი მოზდოკს თავს დაესხა, ვაჭრის მთელი ოჯახი დარგოში წამოიყვანა. გათავისუფლებაზე მოლაპარაკება გაჭიანურდა. ვაჭარი თავის და ოჯახის წევრებში დიდ გამოსასყიდს სთავაზობდა, მაგრამ უშედეგოდ. შამილს მისი პატარა ქალიშვილი ანა, რომელსაც მოგვიანებით შუანეთი დაარქვეს, ისე შეუყვარდა, რომ არ ეთმობოდა. ანას პირობა მისცა, თუ ცოლობაზე დამთანხმდები, მთელ შენს ოჯახს გავათავისუფლებო. იმ დროს ანა თექვსმეტი წლის იყო. შამილის პირობა მოეწონა – თუ თავს მსხვერპლად შესწირავდა და ამით ოჯახის დახსნას შეძლებდა. თავისიანებთან განშორება გაუჭირდა, მთელი სისავსით იგრძნო, რა ძნელი ყოფილა ასეთი მსხვერპლის გაღება. შამილთან დარჩენილმა ორ წელიწადში ისწავლა ყურანის კითხვა და საფუძვლიანად გაეცნო ისლამისტური მოძღვრების ძირითად დებულებებს. შამილის ცოლი მას შემდეგ გახდა, რაც უარყო თავისი რელიგია და მუსლიმანობას ეზიარა. სულ მალე თვითონაც შეუყვარდა მეუღლე, რომელმაც სახელი შეუცვალა და შუანეთი დაარქვა. ამ სახელით იცნობს მას სერალის ყოველი მკვიდრი. ვიდრე ვედენოდან გამოვემგზავრებოდით, მან თავადის ქალ ორბელიანს სთხოვა, მცირედი სამსახური გამიწიეთო:

– აღარც დედაჩემია ცოცხალი და აღარც მამაჩემი. გადაეცით ჩემს ძმებს, გამომიგზავნონ ჩემი წილი მემკვიდრეობა, შამილს მინდა გადავცე.

14. ფატიმათი – ონსოქოლოგიური აქიმის, აბდულ აზიზისა და ბაკოს ასული. შამილმა ცოლად შეირთო 30-იან წლებში.

15. მაჰმად-შაფი – შამილის მესამე ვაჟი, ლუნიშის კაპიტულაციის შემდეგ მამასთან ერთად ცხოვრობდა რუსეთში.

შუანეთის ძმები რამდენჯერმე მისულან ვედენოში და დის ნახვის უფლება მიუღიათ. გამოსყიდვაც ბევრჯერ სცადეს, მაგრამ ქალი მუდამ უარზე იყო. იმამი უყვარდა და არაფერში სჭირდებოდა თავისუფლება, რომელიც საყვარელ ადამიანს დააშორებდა. ყოველთვის ინტერესდებოდა შამილის საქმეებით და, იმავდროულად, ხელიდან არ უშვებდა შემთხვევას, საბრალო ტყვეებს რამეში გამოსდგომოდა: ჩვენ მიმართაც კეთილი და გულწრფელი იყო. მერგო ბედნიერება, მოვეწონე და ამის წყალობით ერთი წუთითაც არ დავშორებივარ ჩემს ქალბატონებს.

შამილის მესამე ცოლი თვრამეტი წლის ამინეთია. შვილები არ ჰყავს. ვედენოში ჩვენ მოსვლამდე ოთხი თვით ადრე მოიყვანეს. იშვიათად ნახავთ ქალს, რომელსაც მასსავით სრულყოფილი ოვალი ექნება, თან დაუდგარი და მკვირცხლი იქნება. დიდი პირი კი აქვს, თუმცა საუცხოო კბილები ამშვენებს. პატუა ცხვირი აქვს, ლოყები და ნიკაპი – ჩაჩუტული. წარმოშობით ქისტია. ხუთი წლის წამოიყვანეს ტყვედ. დედამისს არანაირი სახსარი არ გააჩნდა, შვილი გამოესყიდა და მასთან ერთად სიცოცხლის ტყვეობაში გატარება ისურვა.

ვედენოში ყოფნისას ამინეთის მშობლიური სოფლიდან მოტაცებული ორი ტყვე ქალი მოიყვანეს. გოგონა ტყვეებს უმაღლეს დამოკიდებულებას ჰქონდა. როცა გამოსასყიდი 200 მანეთი იშოვეს, ამინეთის არ გახარებია მათი გათავისუფლება. მიუხედავად ამისა, ქალებს საკუთარი ხელით მოუმზადა საგზალი, ფეხები მატყლითა და ძველმანებით დაუთბუნა – ციოდა, ხვავრიელად თოვდა – ისინი ხომ საშობაოდ გაათავისუფლეს.

შამილის მცდელობის მიუხედავად, ცოლებს შორის თანასწორობა დაამყაროს, ამინეთი მაინც ყველაზე ნაკლებად ბედნიერია. ბევრის მოთმენა და ატანა უწევს, განსაკუთრებით მაშინ, როცა შამილი წასულია. ზაიდეთი ძალიან მკაცრად ექცევა და გამუდმებით საყვედურობს, ათას რამეს ავალებს. ამინეთი საერთო სამზარეულოში საკვებს ამზადებს და პურსაც აცხობს, და ეს მაშინ, როცა ამას ზაიდეთი და შუანეთია არასოდეს აკეთებენ. ქისტ ქალს შრომას უმსუბუქებს დედა – ნანანი, რომელიც სამზარეულოს განაგებს და იქ მომუშავეთა უფროსია.

ჩამოთვლილ პირთა გარდა, სერალში ცხოვრობს მოხუცი ქალი ბაკო¹⁶, ფატიმათის დედა, ჯემალე-დინისა და მისი და-ძმების ბებია. შამილი მას დიდი პატივისცემით ეპყრობა და დღე არ გავა, არ ინახულოს. ბაკო განმარტოებით ცხოვრობს. თავისთვის აქვს მოწყობილი პატარა სამზარეულო, პურსაც თვითონ იცხობს. მოხუცი ბაკო თავს თვითონვე პატრონობს.

[...]

16. ბაკო - ფატიმათის დედა, ჯემალე-დინისა და მისი და-ძმების ბებია.

XXIII

სამი კაბა. შამილი და ამინეთი

შამილი ცოლებს თანაბარ ყურადღებას აქცევს და თანაბრად ზრუნავს მათზე. ჩვენი ტყვეობისას, თავადებმა ცოლებისთვის საჩუქრები გამოუგზავნეს – ქარვისა და მარჯნის კრიალოსნები და სამი ლამაზი კაბა: მწვანე, ცისფერი და იისფერი. ხარისხითა და ზომით სამივე კაბა ერთნაირი იყო. ზაიდეთმა და შუანეთმა გულდასმით დაათვალიერეს, რამდენჯერმე ჩაიცვეს, ხელში იმდენ ხანს ატრიალეს, გეგონებოდა, წონიანო. მშვენიერ ამინეთს ხელი შეუხია კი არა, კაბები თვალითაც არ უნახავს. შამილი ექსპედიციაში იყო, არავინ იცოდა, რას უზამდა ამ მდიდრულ საჩუქრებს. ზოგი დარწმუნებული იყო, რომ ფუფუნების მოძულე იმამი ცოლებს საჩუქრების მიღების უფლებას არ მისცემდა. როგორც იქნა, შამილი შინ დაბრუნდა, მაგრამ უხასიათოდ. რუსებმა, ბარონ ვრანგელის მეთაურობით, მის ჯარს დიდი ზარალი მიაყენეს; ბედი კარგს არაფერს გვიქადდა. ზაიდეთმა უფლებებით აღჭურვა შუანეთი და შამილთან მიავლინა მათთვის აგრერიგად მნიშვნელოვანი საქმის – კაბების საკითხის გადასაწყვეტად. დაარიგა, შამილისთვის ეთქვა – ამინეთი მესამე ცოლია, ჯერ შვილები არ ჰყავს, სხვა ცოლებს ვერ შეედრება და ამიტომ ერთი კაბა ზაიდეთის რომელიმე ქალიშვილისთვის უნდა გადაინახოს. როცა ამგვარი მნიშვნელოვანი საქმეა მოსაგვარებელი, შამილთან ყოველთვის შუანეთს გზავნიან – ლამაზი და გულკეთილია, თან შამილს ძალიან უყვარს, ეს კი წარმატების საწინდარია. როცა ქალმა ამ საბედისწერო საქმეზე მოახსენა, შამილმა ჰკითხა:

– ვინ არიან ჩემთვის ზაიდეთი, შუანეთი და ამინეთი?

– შენი ცოლები და მონები, – უპასუხა შუანეთამ.

– კარგი, – თქვა შამილმა, – რადგან სამივეს ერთი და იგივე წოდება გაქვთ, უფლებებიც ერთნაირი უნდა გქონდეთ. თუ ამინეთს არ შეიძლება ჰქონდეს კაბა, მასასადამე, ზაიდეთსა და შუანეთსაც არ ეკუთვნით.

ამინეთი შურდულივით შემოიჭრა ჩვენს ოთახში, რათა მოეყოლა თავისი გამარჯვების ამბავი და ისიც, თუ რა სამართლიანია შამილი.

ცოლებს გულმხურვალედ უყვართ იმამი, ოღონდ განსხვავებულად. ზაიდეთი მეტისმეტად ეჭვიანია და სურს, ქმრის გული ერთადერთს მას ეკუთვნოდეს. მაგრამ ვედენოში, ისევე როგორც ევროპაში, ამის მიღწევა რთულია და იშვიათად, რომ მოხერხდეს. ამის მიღწევა განსაკუთრებით მაშინაა რთული, როცა მეტოქე ქალი კეთილი და ლამაზია, მასში ქმრის სიყვარული დღითი დღე ძლიერდება. ყური უნდა დაუგდოთ შუანეთს, როცა შამილზე ლაპარაკობს; უნდა დააკვირდეთ, როგორ ეცვლება გამომეტყველება და როგორ აღებეჭდება სახეზე ფიქრები; უნდა მოუსმინოთ, რა სასოებით წარმოთქვამს მისთვის საყვარელ სახელს.

– თხუთმეტი წელია შამილის ცოლი ვარ, – გვითხრა ერთხელ შუანეთმა, – ვსევდიანდები და ცრემლებს ვღვრი მხოლოდ მაშინ, როცა სალაშქროდ არის წასული და ჩემ წასაყვანად არავის გზავნის. თუ რაიმე მეშლება, არასოდეს მტუქსავს, პირიქით, როგორც პატარა ბავშვს მეაღერსება და შემწყნარებლურად მეუბნება საყვედურს. მისი უკიდევანი გულკეთილობის გამო სირცხვილით ვიწვი.

ამინეთს შამილი მამასავით უყვარს. ეგ არის მხოლოდ, ტყვეობაში ყოფნა აღაშფოთებს და ხშირად იხსენებს უწინდელ თავისუფალ ცხოვრებას. ეჭვიანი ზაიდეთი ხანდახან ეუბნება ხოლმე, რადგან შვილი არა გყავს, იმამი შენთან გაყრას აპირებსო. ასეთ დროს ონავარი ამინეთი ჩვენთან მორბის და გახარებული გვარწმუნებს, აქაურობას მალე მოვშორდებითო. ჭორს ისე ოსტატურად ავრცელებს, რომ შამილის ყურამდეც აღწევს. იმამიც იბარებს თავისთან და მის გადარწმუნებას ცდილობს.

შამილი ცოლებს რიგრიგობით ჩამოუვლის ხოლმე. მაგალითად, დილით ზაიდეთს ეუბნება, დღეს შენთან მოვალო. მომდევნო დღე-ღამეს ლოცვაში ატარებს. სხვა დროს შუანეთს აცნობებ, დღეს შენთან მოვალო და შემდეგ დღე-ღამეს კვლავ ლოცულობს. ბოლოს ამინეთის რიგიც დგება და ასე შემდეგ. ეს წესი ყურანში წერია, რაც მხოლოდ კანონიერ ცოლებს აძლევს უფლებას, ეკუთვნოდეთ ქმრის გული.¹⁷ თუმცა სერალში, სადაც უამრავი ტყვე ქალი იყრის თავს, წესებს ქმრის ნება-სურვილი ადგენს და არა რელიგია.

შამილი ზაიდეთთან ლამის გათევას რომ დააპირებს, წინა დღე ცოლისთვის ნამდვილ დღესასწაულად იქცევა ხოლმე. უცებ ხალისიანი და თავაზიანი ხდება. სურსათის ოთახის გასაღები ტვირთად აწევს, აღარ არის ადრინდელივით ძუნწი, პირიქით, გულუხვობას იჩენს: გვიგზავნის კაკალს და ვაშლს, ხშირად დამპალსაც, აგრეთვე – ბრინჯს, გარგარისა და ქლიავის ჩირს.

შუანეთს იმამის სტუმრობა ახარებს და ამშვიდებს. მასზე უკეთ არავინ იცის, როგორ უყვარს ქმარს; და თვითონ ხომ აღმერთებს შამილს. გაჭიანურებული ლაშქრობისას იმამი ერთ-ერთი ცოლის წასაყვანად კაცს გზავნის. სუსტი ჯანმრთელობის გამო ზაიდეთი რთულ გზაზე მგზავრობას ვერ უძლებს. ამინეთს დედამისთან დარჩენა ურჩევნია. ამიტომ წასვლა ყოველთვის მშვენიერ შუანეთს უწევს. ცხენზე ამხედრებული და ჩადრში გახვეული მიემგზავრება მცველთა დიდი რაზმის თანხლებით. ბანაკში მისული შამილის ბრძანებით გამზადებულ კარავში ელოდება ქმარს.

ამინეთი მთელ დღეს ონავრობასა და ეშმაკობაში ატარებს. მოაწესრიგებს თუ არა თავის ოთახს და ჩაის გააკეთებს, შემდეგ ხან აივანზე დარბის, ხან დედას

17. ყურანში წერია: „...მკაცრად დაიცავით მარხულობა ღამემდე. იმ ხანებში თქვენს ცოლებს არ მიეკაროთ. უმჯობესია დრო გაატაროთ სათნო საქმით ჯამეებში. ასეთია ღვთის საზღვრები“.

ეხმარება სამზარეულოში, ჩვენთანაც ასწრებს შემორბენას, მოხუცი ბაკოს მოკითხვასაც, ვისთანაც ნაფისეთი და ფატიმათი ცხოვრობენ. იცინის, თამაშობს, ეძახიან, ეძებენ... ეუბნებიან, შამილმა მოგაკითხა და რომ ვერ გნახა, შენი ოთახის გასაღები თან წაიღო.

– წადი, გასაღები გამოართვი, – ეუბნება დედა.

– არსადაც არ წავალ. თვითონ წაიღო და თვითონვე გამომიგზავნოს, თუ არაა, დაიტოვოს... ღამეს ნაფისეთსთან გავათევ.

ბოლოს და ბოლოს, შამილი გასაღებს უბრუნებს: უყვარს ეს ქალი, უყვარს მისი ჭირვეულობებითაც.

[...]

XXVIII

ქორწილი ვედენოში

შამილმა წინანდლის ნაალაფარიდან შუანეთს უმშვენიერესი აღმასით შემკული ბეჭედი აჩუქა. ეს ძვირფასი სამკაული მას სერალის სხვა ქალებისგან გამოარჩევდა. თუმცა ბეჭედს თითის ნაცვლად თავზე შემოხვეულ შარფში ჩამაგრებულს ატარებდა. მთიელი ქალის სამკაულებში ბევრია დიდი გემოვნებით დამზადებული ვერცხლის საყურეები, სამაჯურები და ბეჭდები. ნახევარმთვარის ფორმის საყურე, რაც უფრო მძიმეა, მით მეტად ფასობს. ხშირად ნახავთ ბავშვებს, რომლებსაც მძიმე სამკაულების ტარებით ყურის ბიბილოები აქვთ გახეული. სამაჯურები ცხენების შესამკობ რკინის ჯაჭვს წააგავს. მაჯაზე ერთბაშად სამ ცალს იკეთებენ, ისე, რომ საკინძავები ერთ ხაზზე გამწკრივდეს. ბეჭდებიც საყურეებივით მძიმე და სქელია, ზომით კი საფოსტო დამლას ჰგავს. შამილის ცოლები გამუდმებით მარჯნისა და ქარვის კრიალოსნებს დაატარებენ, ხოლო უბრალო ქალები – პარკოსნების ასხმულ მარცვლებს.

ვედენოში ყოფნისას შუანეთის ახალგაზრდა მოახლის ქორწილს შევესწარი. ასეთ დროს შამილის სერალში მომსახურე ქალები საჩუქრად იღებენ კაბებს, აგრეთვე სამკაულებს, რომლებზეც უკვე ვწერდი. თავი შუანეთის ოთახში მას შემდეგ მოვიყარეთ, რაც პატარძალი გამოაწყვეს: პერანგი, შარვალი, რბილი ტყავის წითელი დაბალყელიანი წაღები და მაღალქუსლიანი სანდლები ჩააცვეს. სახეს ახალთახალი რიდე უფარავდა. შუანეთმა სადილობა თავისი ხარჯით გამართა. ჩემდა გასაკვირად, პატარძალი საპატიო ადგილას არ იჯდა, სქელი ხალიჩის მიღმა ისე დაესვათ, საერთოდ არ ჩანდა. აგვიხსენს, რომ ამ დროს პატარძალს ეკრძალება ჭამა, ხოლო საქმრო ქორწილამდე სამი დღე შიმშილობს.

სადილი იატაკზე გააწყვეს: ხორბლის პური, თაფლი, მწვადი (შამფურზე შემწვარი ცხვრის ხორცის პატარ-პატარა ნაჭრები) და ქიშიშიანი ფლავი; ასევე მსხალი, ყურძენი, სუფთა და თაფლიანი წყალი. სადილად სერაღის უკლებლივ ყველა ქალი მოიწვიეს. ქალებს ხელები წითლად ჰქონდათ შეღებილი ონიქსით, რითაც ფრჩხილებსაც იღებავენ ხოლმე. ფლავს ორი პატარა ჩხირით ჭამდნენ, ჩინელებიც დაახლოებით ასეთ ჩხირებს იყენებენ. შუანეთმა გვთხოვა ჩამოვმსხდარიყავით და ჩვენც უხალისოდ დავთანხმდით. მათი ხელშენახების ჭამას ვერიდებოდით. ისე გვეზიზღებოდა ყველაფერი, გვერჩივნა მშვივრები დავრჩენილიყავით. მხოლოდ ცოტა ყურძენი და მსხალი გავსინჯეთ.

სადილი ექვს საათზე დაიწყო. ათი საათი მაინც იქნებოდა, როცა ქალები წამოდგნენ – ეს იმას ნიშნავდა, რომ პატარძალი საქმროსთან უნდა მიეცილებინათ. გამცილებელმა ქალებმა ხელი დაავლეს წყლის თუნგს, მატყლით გატენილ ლეიბის მსგავს ქვეშავსა და ხალიჩებს, თეთრეულის გასარეცხ ხის დიდ ტაშტს და წითელ, მომცრო ზომის სკივრს, რომელშიც ახალდაქორწინებულთათვის ძვირფასი ნივთები ეწყო: ლოგინის გადასაფარებელი, აბრეშუმის თავსაბურავი, ნაირფერი აბრეშუმის საკერავი ძაფები, სარკეები და ორიოდ ფინჯანი. ოთახიდან გამოსული პატარძალი შეჯდა ცხენზე, რომლის ალვირი ჰაჯის ეჭირა. ცერემონია დროებით შეჩერდა, რადგან საქმრომ 25 მანეთის მაგივრად მხოლოდ 20 მანეთი გამოგზავნა მზითვისთვის. ეს თანხა ქვრივისთვის 12 მანეთია, ხოლო თუ ქვრივი მეორედ გათხოვებას გადაწყვეტს, მხოლოდ 6 მანეთი. მოლაპარაკება დიდხანს გაგრძელდა და ბოლოს, როგორც იქნა, დარჩენილი 5 მანეთიც მოიტანეს. როცა პატარძალს კუთვნილი მზითვეი სრულად ჩააბარეს, სტუმრები წასასვლელად მოემზადნენ. ქალები ფარნით იკვლევდნენ გზას. პატარძალს სახლთან ახლოს შეეგებნენ საქმროს მშობლები, რომლებმაც იგი თავიანთ ვაჟს მიუყვანეს.

რამდენიმე დღის შემდეგ ახალგათხოვილი შამილის ცოლებს ესტუმრა. ზაიდეთმა, როგორც მათ შორის უფროსმა, პირველმა უმასპინძლა. აქვე ვიტყვი, რომ მუსლიმი ქალები და კაცები ცალ-ცალკე იკრიბებიან, თუმცა შამილი ხშირად თავის ცოლებთან ერთად ლოცულობს. ლოცვის დაწყებამდე ხალიჩას აფენენ აივანზე, რომელიც სერაღს გარს აკრავს. ფეხშიშველი და თავმოშიშველებული შამილი იჩოქებს. ლოცვის წინ აუცილებელ წესს, განბანვას რომ მორჩებიან, ზაიდეთი და შუანეთი შამილის უკან იჩოქებენ. არც ამინეთს და არც სერაღის სხვა მკვიდრ ქალებს არ აქვთ უფლება, შამილთან ერთად ილოცონ. ამინეთს ამის უფლება შვილების გაჩენამდე არ ექნება. ერთხელ ზაიდეთმა შამილის ლოცვანი გვაჩვენა და თან წვრილი, ერთფეროვანი ხმით ფსალმუნის მსგავსი ტექსტი წაიღიღინა. ლოცვისას მთელი სხეულით თითქოს მისკენ ირხეოდა, ვისაც ლოცვით მიმართავდა. ახალი მთვარიდან დაღმავა-

ლი ნამგალა მთვარის დადგომამდე ქალები და ბავშვები ერთ ადგილას იკრიბებიან სალოცავად, და მაშინ მათი ერთობლივი ხმამაღალი სიმღერა ცას ერწყმის: ენთუზიაზმი ხმის მატებასთან ერთად იზრდება. ქალები ჯერ სხედან, მერე, ექსტაზში შესულნი და მუხლებზე დახოქილნი, მკერდზე მჯილის ცემას იწყებენ. ეს ყვირილი და გოდება მთელ ღამეს გრძელდება.

ჩვეულებრივ, კაცები სადილად ჭამენ ცხვრის მოხარშულ ხორცს, ასევე ხის ჯამებში ჩასხმულ ბულიონს, დაკეპილი საქონლის ხორცი და ხახვით შეზავებულ ღვებელს, ფლავსა და ქონში გამომცხვარ ცომეულს, რომელთა გახსენება ახლაც ზიზღს მგვრის. შამილთან თითქმის სულ სტუმრიანობაა. მათი ვახშმობისას დროს ვიხელოებთ ხოლმე, უშიშრად ვიხსნით რიდეებს და კართან შექუჩებულნი სუფთა ჰაერს ვსუნთქავთ. ხშირად ყოფილა, სერალის მცველებს სტუმრების წასვლის შემდეგ დარჩენილი ხორცის ნაჭრები და ხილი მოუწოდებიათ. მართალია, საფუძველი გვქონდა, ჩვენი ტყვედ წამომყვანების სისასტიკეზე მათ უფროსებთან გვეჩივლა. ამას არ ვაკეთებდით, რადგან ვიცოდით – ისინი გატაცებისას სასტიკად იმიტომ გვეპყრობოდნენ, რომ ნაბიჯი აგვეჩქარებინა, ეშინოდათ, რუსები არ წამოსწეოდნენ და ნადავლი არ წაერთმიათ. ლეკების შეფასებისას ველური უფრო სწორი სიტყვაა, ვიდრე სასტიკი. მე მგონია, რომ მთაში მცხოვრები ჩეჩნები მათზე გაცილებით დაუნდობლები არიან.

სერალის მცველები თანაგვიგრძნობდნენ და ბავშვებსაც გამუდმებით ეფერებოდნენ. ალექსანდრე და გიორგი ისე მიეჩვივნენ მათ შავგვრემან სახეებს, გაბურძენილ წვერსა და გადაპარსულ თავებს, რომ ხელში აყვანისაც აღარ ეშინოდათ. მათ ხშირად მიჰყავდათ თავადის ბავშვები შამილთან, რომელსაც ძალიან უხაროდა მათი ნახვა, ხილით ან ფულით ასაჩუქრებდა. ფულს მალევე ვხარჯავდით – ყველაფერი გვაკლდა, ბავშვებსაც უხეში, მათთვის შეუსაბამო რაციონი ჰქონდათ. დასაჩუქრებული ფულით ქათმის და რამდენიმე კვერცხის ყიდვა განსაკუთრებით გვიხაროდა.

მართალია, მცველები დიდ მზრუნველობასა და ყურადღებას იჩენდნენ, მაგრამ, იმავდროულად, მკაცრად გვდარაჯობდნენ, თვალს არ გვაშორებდნენ. სერალის შიდა მცველები მხოლოდ ხანჯლებითა და დამბახებით იყვნენ შეიარაღებულნი. საკმარისი იყო, შუა ებოს კართან გამოვჩენილიყავით, მაშინვე ავად გვიმზერდნენ, თან თოფს წაატანდნენ ხოლმე ხელს და გვიმიზნებდნენ. ამით გვაფრთხილებდნენ, რა გველოდა, თუკი ზღურბლს გადავაბიჯებდით.

[...]

XXXVI

ჯემალედ-დინი, ზაიდეთის მამა.

დერვიში. გათავისუფლება

ზაიდეთთან სტუმრობის მეორე დღეს ზაიდეთი პირადად გვესტუმრა და გაგვაფრთხილა, რომ მამამისს თავადის ქალებთან მოლაპარაკება სურდა. აივანზე გავედით. კეთილმა მოხუცმა საუბარი ამ სიტყვებით დაიწყო:

– დიდი იმედი მაქვს, რომ ჩემი ვაჟი შამილი, როგორც ადამიანობისა და შვილის მაგალითი, მამის რჩევას ყურად იღებს და ტყვეებს არ გაყიდის, მაგრამ ხალხს ფული სჭირდება. ომმა, რომელსაც ყოველთვის როდი მოაქვს სიკეთე, ის დიდად დააზარალა. იმის გამო, რომ ტყვე ქალები სამეფო ოჯახის წევრები არიან, შამილი დიდ გამოსასყიდს ელოდება. იგი შვილის დასაბრუნებლადც მართავს მოლაპარაკებას. გარდა ამისა, ვალდებულია ერთგული ხალხის მოთხოვნებიც გაითვალისწინოს, თავისი ხალხის სარგებელზეც იზრუნოს, მათი აზრი გაიზიაროს. დაველაპარაკები მას, თქვენს ბედზე ვიზრუნებ. ამიტომ შეიშრეთ ცრემლი! ნუ ტირით, ნაზო ყვავილებო! თქვენს ყლორტებს სულ სხვა ცვარი სჭირდება და არა ის, რითაც დღენიდან რწყავთ. მალე თავისუფლების მზის სხივებში გაეხვევით. ეს მოხუცის სურვილია, ღმერთი კი ბერიკაცის სურვილებს უგულისყუროდ ვერ დატოვებს. შამილი დიდია, შამილი ძლიერია, შამილი სამართლიანია...

შემდეგ ერთ-ერთ ძიძას მიმართა, რომელსაც ცრემლები ღაპაღუპით სდიოდა:

– დედაკაცო, განა თვითონაც არ ვაჭრობ ხოლმე, როცა ქარვასლაში რამეს ყიდულობ? ვაჭარი თავის ფასს გეუბნება, თუ გეძვირება, მიდიხარ. შემდეგ ფასს ოდნავ გიკლებს. შენი მხრიდან ახალ, შენთვის მისაღებ ფასს სთავაზობ, ასე აგრძელებთ ვაჭრობას, სანამ არ შეთანხმდებით. იმედს ნუ გადაიწურავთ!.. ნულარ ტირით.. ჯემალედ-დინი გთხოვთ, აღარ იტიროთ... აჯობებს ილოცოთ და ალაჰს შეევედროთ, რომ ჩემმა შვილმა გულმოწყალება გამოიჩინოს გადაწყვეტილების მიღებისას.

შამილი საბჭოს ხუთშაბათობით მართავს, ხოლო განაჩენს პარასკევს, მეჩეთიდან დაბრუნებისას საზეიმოდ აცხადებს. ჯემალედ-დინთან საუბრის შემდეგ, ხუთშაბათ დღეს, საყოველთაო გაცხოველებულმა ფუსფუსმა და უჩვეულოდ ბევრმა გამომცხვარმა პურმა მიგვახვედრა, რომ ვედენოში უამრავ ხალხს ელოდნენ. ჩვენი მოლოდინი გამართლდა – შამილს ნაიბები ესტუმრნენ, რათა იძულებული გაეხადათ, ჩვენი შემდგომი ბედი გადაეწყვიტა. ნაიბთა უმეტესობა ჩვენს გაყიდვას მოითხოვდა; სხვები ფიქრობდნენ, რომ რუსებმა შამილს თავისი შვილი არ გამოუგზავნეს; ზოგიერთები იმასაც ამტკიცებდნენ, ჯემალედ-დინი თბილისის გავლით იმიტომ წამოიყვანეს, იქ გავრცელებული ქოლერა შეჰყროდა და მისი

მსხვერპლი გამხდარიყო; ზოგი ამბობდა, შამილის შვილი დიდხანს ვერ გაატანს, რადგან რუსებმა მოწამლეს, თორემ რატომ დაგვიბრუნებდნენო. ამდენი სისულელის ლაპარაკი ჩვენს გათავისუფლებას აფერხებდა.

კეთილი შუანეთი, რომელსაც ჭორები გაუვრცელეს მეუღლის ერთგულებასთან დაკავშირებით და ეს მითქმა-მოთქმა საგანგებოდ შამილის ყურამდეც მიიტანეს, ჩვენთან მოსვლას ვეღარ ბედავდა. აშკარად ცდილობდა ჩვენ დაცვას, ოღონდ მოწმეთა დაუსწრებლად აღარ გველაპარაკებოდა. ჩვენც ასე ვიქცეოდით, რათა აღგვეკვეთა აულში დარჩეული არასასურველი ხმების გავრცელება. თავის მხრივ, ეს არც შამილს სიამოვნებდა – როგორც ჩანს, გადაწყვეტილების მიღებაში ხელს უშლიდა. განიზრახა, ერთიანად მოესპო ეს მითქმა-მოთქმა და ხალხი ჩვენდამი კეთილად განეწყო. იმამი რამდენიმე დღით სერალიდან წავიდა და უკან იმ არემარეზე ღვთისმოშიშობით განთქმულ დერვიშთან ერთად დაბრუნდა. მეუღაბნოე განუწყვეტელი ღოცულობდა. ერთი კარი გვყოფდა და ხმა მკაფიოდ გვესმოდა. მისი ღოცვები, სიმღერა, უცაბედი გაშმაგება და წინასწარმეტყველება ვედენოში მცხოვრებ ნებისმიერ ქალს ალაფრთოვანებდა. ქადაგების მოსასმენად საღამოობით იკრიბებოდნენ და თანდათან რელიგიურ ექსტაზში ექცეოდნენ: მიწას თავს ურტყამდნენ და ქვითინებდნენ. შუანეთი ტიროდა, თავის მარჯნის გრძელ კრიალოსანს მარცვლავდა და დერვიშს საათობით უსმენდა. ამ ქალების შეძახილები ძაღლების ყმუილს გვაგონებდა და ძილს გვიფრთხობდა.

როგორც გვითხრეს, ჩვენ სასარგებლოდაც ქადაგებდა ფანტიკოსი დერვიში – ევედრებოდა ალაჰს, გზაბნეულ ლეკებს გონება გაუნათეო. განდეგილი მოუწოდებდა მათ, ეს უბედური ტყვეები შეიბრალებთ და ისეთ გამოსასყიდს ნუ მოითხოვთ, რასაც ვერავინ გადაიხდისო.

– ნუ მიჰბაძავთ ფუფუნების მოყვარულ გიაურებს. მათი ქალები მდიდრულ სამოსში რომ ეწყობიან, ამით კაცებს აცდუნებენ და ალაჰს შეურაცხყოფენ.

– უარი თქვით ყველაფერზე – ჩაიბე, შექარსა და სხვა ათას გამოუსადეგარ რამეზე, რაც რუსეთიდან შემოაქვთ. ნუ მისცემთ ცოლებს ნებას, აბრეშუმი და ოქრო ატარონ. განერიდეთ ყველაფერს, რაც თქვენი მტრების ქვეყნიდან შემოდის.

ქადაგება კი ასე დაასრულა:

– ნუ ითხოვთ მილიონ რუბლს ტყვეთა გასათავისუფლებლად, დააბრუნეთ ისინი თავიანთ სამშობლოში, როგორც კი იმამს იმპერატორის ხელით შვილს გადასცემენ.

პატივცემული დერვიში ან ალაჰის, ან თვითონ იმამ შამილის ჩაგონებით ჩვენთვის სასიკეთოდ ლაპარაკობდა. ძლივს გაიღია ხუთშაბათი დღე, რომელიც საბოლოოდ წყვეტდა ჩვენს ბედს. ყველას ერთი აზრი გვიტრიალებდა თავში: რა შედეგს მოგვიტანდა ეს დღე? კეთილმა ბერიკაცმა, ჯემალე-დინმა იმედი კი მოგვცა, მაგრამ ზაიდეთი და სერალის სტუმარი ქალები თავიანთი ვერსიებით გვაშინებდნენ. ჩვენ ისევ მხურვალედ ევედრებოდით მას, ვისაც ჩვენი ბედი უნდა გადაეწყვიტა.

მესამე დღეს, შუადღისას, შამილი მეჩეთისკენ გაემართა. ორი საათი თუ იქნე-

ბოდა გასული, როცა ჰაჯიმ ჩვენი ოთახის ზღურბლთან მოირბინა და შემოგვცახა: „ჰაიდა! ჰაიდა! მალე, მალე!“ (წადით, წადით, მალე, მალე). ამის დაჯერებას გამბედაობა სჭირდებოდა, ჩვენ კი... ჰაჯის წასვლის მერე მალევე გამოგვეცხადა შუანეთი, თავადის ქალი ორბელიანი გულში ჩაიკრა და უთხრა:

– შამილს ნაიბებმა თანხმობა განუცხადეს. რამდენიმე დღეში გაგათავისუფლებენ.

დავიჩოქეთ და ღმერთს მადლობა შევწირეთ ამ განუზომელი წყალობისთვის. შუანეთი ჩემთანაც მოვიდა და მითხრა:

– ანა! შენი ტირილი დასრულდა. მალე შეხვდები შენს ვაჟს და მოხუც დედას. ძველებურად ისევ ბედნიერი იქნები. ყოველი დღე დარდით სავსე როდია, შენს ცხოვრებაში, ცრემლების ღვრის ნაცვლად, სიხარული დაისადგურებს.

სიკეთის განსახიერება შუანეთი! შენი წინასწარმეტყველება ნაწილობრივ გამართლდა. ბედისწერამ თავისუფლება მარგუნა, მაგრამ დედის ხილვა არ მაღირსა.

[...]

XL

გაცვლა. კურინსკის ციხესიმაგრე

გორაკის წვერზე ვიყავით, ჰაჯიმ რომ წამოიძახა:

– ესეც რუსის ჯარი!

ამ უბრალო სიტყვების გაგონებაზე ტანში ჟრუანტელმა დაგვიარა. ჰაჯიმ მოპირდაპირე შემალლებულ მხარეზე მიგვითითა, სადაც მზეზე მბრწყინავი გრძელი ჯაჭვი შევნიშნეთ – თითქოს ნელ-ნელა მოძრაობდა და ჩვენკენ მოემართებოდა. იგი ჩვენი მოძრაობის მიხედვით იცვლიდა მიმართულებას. ბოლოს, როცა ოთხთვალეებიდან გადმოსვლა გვიბრძანეს, რუსების განლაგება მკაფიოდ გავარჩიეთ. ჩვენგან მარცხნივ შამილისთვის გაშლილი დიდი კარავი იდგა. ლეკები გარს შემოგვერტყნენ, იარაღი ჩახმახებზე შეაყენეს და ჩვენკენ მომართეს: მოულოდნელი თავდასხმის ეშინოდათ და ძალიან ფრთხილობდნენ.

ლეკები და რუსები ერთხანს ერთმანეთს ზვერავდნენ, შემდეგ კვლავ ოთხთვალეებში ჩავსხედით და მდინარისკენ¹⁸ მიმავალ გზას გავუყევით. ეს მდინარე მოწინააღმდეგეთა სამფლობელოს საზღვარი იყო. ჰაჯი უკან მოგვეყვებოდა, ლეკური ტანსაცმელი მოჰქონდა, რომელიც ჯემალედ-დინს მამასთან მისვლამდე უნდა ჩაეცვა. რუსთა ჯარის შორიახლო გავჩერდით და გენერალ-მაიორი ბარონი

18. იგულისხმება მდინარე მიჩიკი, რომლის ახლოსაც ტყვეები გაცვალეს.

ნიკოლაი დავინახეთ. ასევე თავადები: პოლკოვნიკი ბაგრატიონი,¹⁹ დავით ჭავჭავაძე და კურინსკის სამხედრო სიმაგრის²⁰ კომენდანტი. თავად ჭავჭავაძის ახლოს იდგა ჯემალედ-დინი – რუსის ოფიცრის მუნდირში გამოწყობილი. იგი მიუახლოვდა თავადის ქალ ჭავჭავაძეს, პატივისცემის ნიშნად თავი დაუკრა და მოუბოდიშა – უფრო ადრე რომ ვერ შეძლო მოსვლა და მისი დროულად გათავისუფლება. ყაზი-მაჰმადმა ძმური სიყვარულით ჩაიკრა გულში. ოთხთვალეებიდან გადმოვედით. შამილის ნაიბები, დანიელ-ბეგის მეთაურობით, ესწრებოდნენ ტყვეთა გაცვლას და ზანდუკების მიღებას, რომლებშიც ჩვენი გამოსასყიდი ფული იდო.

ყაზი-მაჰმადის წარმოთქმული სიტყვა რუსულად თარგმნეს. შამილმა მას უბრძანა, დაედასტურებინა იმამის უჩვეულო გაცემა, რასაც მასში ტყვე ქალთა კეთილშობილური ხასიათი იწვევდა, ასევე გამოეხატა გულწრფელი სინანული იმის გამო, რომ ვერ შეძლო უფრო ღირსეულ პირობებში ჰყოლოდა ისინი. თავის მხრივ ყაზი-მაჰმადმა დასძინა: „ყოველ შემთხვევაში, მათ არ შეხებიათ არანაირი ბიწიერება, იმამის ცოლები თავს ევლებოდნენ, უფროთხილდებოდნენ როგორც საკუთარ დებს. არც ერთი მამაკაცის მხერას არ შეუღწევია მათ რიდებში. სპეტაკნი არიან, ვითარცა შროშანები და დაცულნი ყველას თვალისგან, ვითარცა უდაბნოს ქურციკები. მათ საყოველთაო პატივისცემა და სიმპათია დაიმსახურეს ჩვენგან და ახლა ისინი უკვე თავიანთ ოჯახებს უბრუნდებიან. ამას გარდა, შამილმა გვიბრძანა მოგახსენოთ: უზომო სინანულს გამოთქვამს, რომ ომის სისასტიკე შეეხო იმ ხალხს, რომელთა მიმართაც მტრული დამოკიდებულება არასოდეს ჰქონია“.

როცა ორივე საჯარისო შენაერთის უფროსები ერთმანეთს დაემშვიდობნენ, ჯემალედ-დინმა თავად ჭავჭავაძეს ხელი ჩამოართვა და სხვა დანარჩენებთან ერთად გაგვშორდა. თავადმა დავით ჭავჭავაძემ დიდი მამობრივი სიყვარულით ჩაიხუტა შვილები და გამზადებული ეკიპაჟებისკენ წარგვიძღვა. პოლკის ორკესტრი რუსულ და ქართულ სიმღერებს ასრულებდა. რუსი გენერლები, უკლებლივ ყველა, ჩვენს შეუსაბამო ჩაცმულობას ყურადღებას არ აქცევდნენ და ჩვენ წინაშე თავს მდაბლად ხრიდნენ, თითქოს ბრძოლის ველზე დაჭრილები ვიყავით. კურინსკის სიმაგრეში მისულთ შემოგვეგებნენ სამხედრო მეთაურთა საზეიმოდ გამოწყობილი ცოლები; ისმოდა დაფდაფების ხმა. მთელი მოსახლეობა გამოფენილიყო ჩვენ შესახვედრად, უამრავ ხიფათს სასწაულებრივად გადარჩენილი და ტანჯვაწამებაგამოვლილი ბავშვების – ამ უცოდველი ანგელოზების დანახვამე ცრემლებს ვერ იკავებდნენ. მამაკაცები ქუდს იხდიდნენ და პირჯვარს იწერდნენ, ქალები სიხარულით გვესალმებოდნენ.

19. ბაგრატიონი – სავარაუდოდ, იგულისხმება ივ. რომ. ბაგრატიონი, დაღესტნის ცხენოსანთა პოლკის უფროსი, მაიორი, შემდეგ პოლკოვნიკი.

20. კურინსკის სიმაგრე – რუსთა გამაგრების ადგილი დაღესტნის ხაზზე, ჰასავიურთთან ახლოს.

სიმაგრეში ფეხის შედგმისთანავე კვლავ მძლავრად გაისმა დაფდაფების ხმა, ატყდა ზარების რეკვა. წაგვიყვანეს მართლმადიდებლურ ეკლესიაში, სადაც ყველა ხატს ვემთხვიეთ და უფალს მადლობა შევწირეთ, რომ არ მიგვატოვა და ტანჯვისგან გვიხსნა. ეკლესია სანთლების შუქს ერთიანად გაენათებინა. მღვდელმა სამადლობელი პარაკლისი გადაიხადა, ჯერ ბავშვები დალოცა, შემდეგ თავადის ქალები და ბოლოს ჩვენ. ეკლესიიდან გამოვედით და პოლკოვნიკ ბაგრატიონის სახლისკენ გავემართეთ – მან სიკეთე გამოიჩინა და თავისი ბინა დაგვითმო, თვითონ კი სხვაგან წავიდა.

[...]

XLI

ხასავიურთი. თბილისი. მოსკოვი.

იმპერატორი ალექსანდრე II

თავადი ჭავჭავაძე ჩვენთან დარჩა. დარბაზში შესვლისთანავე თვალი მოგვტაცა იმპერატორ ნიკოლოზ პირველის პორტრეტმა, რომელსაც შავი კრეპის არშია ჰქონდა შემოვლებული. გავრცელებული მითქმა-მოთქმა მისი გარდაცვალების შესახებ, სამწუხაროდ, სიმართლე აღმოჩნდა.²¹ იმპერატორმა ნიკოლოზმა ყველაფერი გააკეთა ჩვენი გათავისუფლებისთვის, ჩვენ კი მისი სულისთვის ღოცვა და დავითი ყველაფერს მოგვიყვანა მის ხანმოკლე ავადმყოფობაზე, რომელმაც მოგვტაცა ჩვენი მფარველი და დააოხლა მისი ვრცელი იმპერია. მან ასევე გვიამბო იმპერატორ ალექსანდრეს მიერ მისთვის გაღებული მოწყალებაზე, რამაც ასეთ უსაზღვრო ბედნიერებას აზიარა. მთელი საუბრის განმავლობაში თავადი დიდი სიყვარულით იხუტებდა შვილებს გულში და ამ სიყვარულის ძალას ჩვენც ვგრძნობდით.

მეორე დღეს მრავალრიცხოვანი ესკორტის თანხლებით, რომელსაც სათავეში გენერალ-მაიორი ბარონი ნიკოლაი და თავადი ბაგრატიონი ედგნენ, კურინსკის სიმაგრიდან გავემგზავრეთ. დაიწყო ჩვენი უკან დასაბრუნებელი მოგზაურობა. დაწინაურებული მხედრები ყურადღებით ათვალიერებდნენ ბუჩქნარებს, ბორცვებს, თხრილებსა და მთელ არემარეს. ჯერ კიდევ შამილის ჯარის მხედველობის არეში ვიყავით მოქცეული. ვფრთხილობდით, ამიტომ ყურადღება მანამდე არ

21. ნიკოლოზ პირველი (ნიკოლოზ პავლეს ძე რომანოვი) – დაიბადა 1796 წელს, გარდაიცვალა 1866 წლის 18 თებერვალს, ტყვეები კი 10 მარტს გაცვალეს.

მოგვიდუნებია, სანამ არ დავრწმუნდით, რომ ხიფათი აღარ გვემუქრებოდა. რამდენიმე საათში ხასავიურთში ჩავედით.

ჩვენმა ქალბატონებმა აქ, ამ სიმაგრეში შეიტყვეს მამის, მისი ბრწყინვალეების, დიდად პატივსაცემი თავადის, ილია ბაგრატიონის²² სიკვდილის შესახებ, რომელიც ნადირობისას მოულოდნელად გარდაცვლილა. სამწუხაროდ, ამჯერად მას არავინ ახლდა თან, ერთ-ერთი ვაჟის, 12 წლის ნიკოლოზის გარდა. როგორც კი თავადმა გულისრევა და უძლურება იგრძნო, ერთადერთი, რაც მოასწორო, მამობრივი წინდახედულობა გამოიჩინა და თოფიდან ვაზნები ამოიღო – მცირეწლოვანი შვილი იარაღით რომ არ დაშავებულიყო. ამის შემდეგ რამდენჯერმე პირჯვარი გადაიწერა, მიწაზე დაეცა და სული დალია. თავადი ნიკოლოზი მომაკვდავი მამის ყურებამ ისე დაზაფრა, რომ ძლივს მიაღწია შარაპოვოში. იმწამსვე გაეშურნენ თავადის დასახმარებლად, მაგრამ დაგვიანებული იყო. უცნაური დამთხვევაა, რომ თავადი 1854 წლის 4 ივლისს გარდაიცვალა, ზუსტად იმ დღეს, როცა მისი ასულები – თავადი ანა ჭავჭავაძე და ბარბარე ორბელიანი წინანდლიდან გაიტაცეს და ტყვედ ჩავარდნენ. ამ ორმა სამწუხარო ამბავმა მათი უბედური დედა, მისი ბრწყინვალეობა თავადის ქალი ანასტასია ბაგრატიონიც კინაღამ გადაიყოლა. რწმენამ გააძლიერა, თავისი ასულების ტყვედ ჩავარდნის ამბის გაგებისთანავე დაუყოვნებლივ სანკტ-პეტერბურგში გაემგზავრა. გულმოკლულ ქვრივს, გაუბედურებულ დედას იმპერატორმა და მისმა მეუღლემ დიდი თანაგრძნობა და თანადგომა გამოუცხადეს. იმპერატორმა ნიკოლოზმა ჩვენი დახსნის პირობა მისცა, ხოლო იმპერატორმა ალექსანდრემ ღირსეულად დაასრულა მამის, მისი უდიდებულესობის დაწყებული საქმე და მასვე ვუმადლით ჩვენ გადარჩენას. დაე, ამ სიკეთისთვის ღმერთმა დააჯილდოოს ხანგრძლივი და მშვიდობიანი მეფობით. ასე ვლოცავ მე, ფრანგი ქალი მას ჩემთვის მონიჭებული თავისუფლებისთვის.

მამის სიკვდილმა თავადის ქალი ორბელიანი ძლიერ დაამწუხრა. მთელი გულით თანავუგრძნობდი და ვერ წარმოვიდგენდი, მსგავსი უბედურება რამდენიმე კვირის შემდეგ თავადაც დამატყდებოდა და ჩემთვის ერთადერთსა და ამქვეყნად ყველაზე საყვარელ ადამიანს, დედაჩემს ვეღარ ვიხილავდი.

ხასავიურთიდან თათარ მილიციონერთა თანხლებით თემირ-ხან-შურაში გავემგზავრეთ და დალესტნის რაზმის უფროსთან, თავად ილია ორბელიანის ღვიძლ ძმასთან, მისი გულითადი მასპინძლობის გამოისობით, საკმაოდ დიდხანს დავრჩით. აქედან გზა დერბენდის, ყუბისა და ელიზავეტპოლის გავლით გავაგრძელეთ. ყველგან გულწრფელი და გულის ამაჩუყებელი სიხარულით გვეგებებოდნენ. ბოლოს, თბილისს

22. ილია ბაგრატიონი – ილია ბატონიშვილი, საქართველოს უკანასკნელი მეფის, გიორგი XII-ის ძე.

მივუახლოვდით. თავად დავით ჭავჭავაძის ნათესავები დედაქალაქის მისადგომებთან გველოდებოდნენ, რათა მალე ჩაეკრათ გულში თავადის ქალები.

ბაზარიც გავიარეთ. კვირადღე იყო. თავსხმა წვიმის მიუხედავად, იმდენმა ხალხმა მოიყარა თავი, ეკიპაჟები წინ ძლივს მიიწევდნენ. ჩვენი გავლისას მამაკაცები ქუდს იხდიდნენ, ხოლო ქალები თავსაფრებს აფრიალებდნენ. ქართველები, კეთილი და ღვთისმოსავი ქართველები, ზეცისკენ ხელებაპყრობილნი, ჩვენი გათავისუფლებისთვის ღმერთს მადლობას სწირავდნენ. მთელი ქალაქი უკიდევანო სიხარულმა მოიცვა, რადგან ჭავჭავაძეებსა და ორბელიანებს დიდ პატივს სცემენ. ხალხმა სიონის საკათედრო ტაძართან მიგვაცილა, სადაც წირვას დავესწარიტ, ხატებს ვემთხვიეთ, ღოცვა-კურთხევა მივიღეთ და თავად ჭავჭავაძის სახლს მივამურეთ.

იქ მისულს ჩემი საყვარელი თანამემამულე ქალები დამხვდნენ; უცებ თავი სახლში, საფრანგეთში წარმოვიდგინე, რომლის ხილვის იმედიც გადაწურული მქონდა. ყველაფერი უკეთესობის იმედს მაძლევდა. სრული ბედნიერებისთვის მხოლოდ დედისგან წერილის მიღება მრჩებოდა, მაგრამ ღვთის შეუცნობელი განჩენი სხვაგვარი ყოფილა.

დრო გადიოდა. თავადის ქალები დედის სანახავად მოსკოვს გაემგზავრნენ, შემდეგ კი იმპერატორ ალექსანდრესთვის მადლობის სათქმელად პეტერბურგში ჩავიდნენ. გზამ თბილისიდან მოსკოვამდე ოცდახუთ დღეს გასტანა. ამ ქალაქში წილად მხვდა ბედნიერება, გამეცნო თავადის ქალი ანასტასია ბაგრატიონი, რომლის მაგალითმა, მისმა მიდგომამ და რწმენამ განსაცდელის თმენით გადატანა მასწავლა. მის ბრწყინვალეობასთან დავრჩი ჩემს მოწაფეებთან ერთად, როცა თავადის ქალები – ჭავჭავაძე და ორბელიანი დანარჩენ შვილებთან ერთად პეტერბურგში გაემგზავრნენ. იმპერატორმა ალექსანდრემ და მისმა მეუღლემ ექვსი დღით უმასპინძლეს მათ პეტერგოფში. ქვრივმა იმპერატრიცამ ბავშვები საგანგებოდ მათთვის გამართულ საუბმზე მიიწვია, ხოლო თვით იმპერატორმა უმშვენიერესი საჩუქრები გამოუგზავნა. იმავდროულად, მისმა უდიდებულესობამ გულუხვი მატერიალური სახსარი გაიღო თავად ჭავჭავაძის ქონებრივი მდგომარეობის გამოსასწორებლად, რადგან შამილის ხალხის თავდასხმისას წინანდალი მთლიანად განადგურდა.

თავადის ქალები, მას შემდეგ, რაც მთელი ქალაქის და სამეფო კარის ყურადღება მიიპყრეს, მოსკოვში იმპერატორ ალექსანდრეს დაბადების დღისთვის დაბრუნდნენ. ამ დღის აღსანიშნავად მთელი სამეფო ოჯახი იკრიბებოდა. იმპერატორი ყაზანის ღვთისმშობლის მიძინების ტაძრისკენ²³ გაემართა, თავადის ქალებმა მეც წამიყვანეს, რათა ჩემი თავისუფლების მომნიჭებელი დამენახა.

23. ღვთისმშობლის მიძინების, იმავე უსპენსკის ტაძარი – მოსკოვის კრემლის ტაძარი. ამ სახელწოდების ეკლესია რუსეთში ბევრია.

ის-ის იყო მისი უდიდებულესობების უკანა რიგებში შევალწიეთ, რომ ხალხმა მათი მოსვლა ხმამაღალი ვაშას ძახილით გვამცნო. დიდი მთავრები მათ რამდენიმე ნაბიჯით უსწრებდნენ. ხალხი იმპერატორს ირგვლივ შემოერტყა, რათა უკეთესად დაენახათ და ტანისამოსზე მთხვევის შესაძლებლობა მისცემოდათ. იმპერატორს მეუღლე ხელკავით გვერდს უმშვენებდა. მათ მოსვლას კვლავ შეძახილები მოჰყვა. გზაზე კედელივით აღმართულ ხალხში გავერიეთ, გავცემა ძლივს დავფარე, როცა მისი უდიდებულესობები თავადის ქალ ჭავჭავაძის წინ შეყვონდნენ, იმპერატორი კი მას დიდი პატივით, თავაზიანად მიესალმა..

იმპერატორი ალექსანდრე მაღალი კაცია, მისი ცისფერი თვალები ერთობ გამჭოლია, ხოლო მხერა – სანდომიანი. მაღალი შუბლი მის მტკიცე ნებასა და ხასიათზე მეტყველებს. სასიამოვნო ხმა აქვს. მისი უდიდებულესობის მეუღლის მშვენიერებას დიდ ხიბლს სძენს ჭკვიანური და სასიამოვნო გამომეტყველება. იმპერატორის მკლავს მსუბუქად ეყრდნობოდა. ჩემი გადამრჩენელის დანახვისას გული მადლიერებით ამევსო, უცებ მომინდა მის ფეხებთან დამეჩოქა და მეთქვა: მადლობა, თქვენო უდიდებულესობავ, რომ თავისუფლება დამიბრუნეთ... დამკვიდრებული წესებით ამის უფლება არ მექონდა. ამასთან, ჩემი სუსტი ხმით რას შევმატებდი იმ სიყვარულსა და პატივისცემას, რომელსაც რუსი ხალხი თავისი ხელმწიფისადმი გამოხატავდა?! ენით აღუწერელ სიამოვნებას მგვრიდა ეს სანახაობა. ახლა, ჩემს სამშობლოში დაბრუნებული, ვიხსენებ ბედნიერ იმპერატორსა და მის მეუღლეს, რომლებსაც საყოველთაო აღტაცებით ეგებებოდნენ.

საიმპერატორო წყვილმა თავად ჭავჭავაძის შვილები მოიკითხა, განსაკუთრებით უფროსები, რომლებიც პეტერგოფში მისთვის არ წარუდგენიათ. შემდეგ კვლავ თავი დახარეს მომხიბვლელი თავადის ქალ ჭავჭავაძის წინაშე და ტაძრისკენ გზა განაგრძეს.

მთარგმნელი ელენე მარგველაშვილი,
რედაქტორი ელზა ნაბახტველი.

სტატია ითარგმნა შემდეგი გამოცემის მიხედვით:
Les princesses russes prisonnières au Caucase. Souvenirs d'une Française Captive de Chamyl,
Recueillis par Edouard Merlieux 1857, Paris, Ferdinand Sartorius, Éditeur,
rue Mazarine, 9. (თავები: I-VIII, XVIII, XXI, XXIII, XXVIII, XXXVI, XL, XLI).



კარლ სერენა

ანრი ლე ლიერის ფოტო, 1883

ლუიზა ლაფერაბის რეპროდუქცია

ექსკურსია კავკასიაში, შავი ზღვიდან კასპიის ზღვამდე: 1875-1881 წლები

ექსკურსია სამურზაყანოსა და აფხაზეთში:

ნაწილი I

1881. გამოუქვეყნებელი ტექსტები და ნახატები

ჟურნალ *Around the World*-ის მკითხველი, სამეგრელოში რომ წამომყვა, ალბათ გაიხსენებს აფხაზეთში, 1876 წელს, ენგურის გადაკვეთის შემდეგ გადადგმულ ჩემს პირველ ნაბიჯებს. აფხაზეთის შესახებ ფოტოების ნაკლებობამ ამ მოგზაურობის გაგრძელება 1881 წლამდე შეაყოვნა. ეს თითქმის შეუძლებელს ხდიდა მოგზაურობის ილუსტრირებას, რადგანაც კავკასიაში მომუშავე ფოტოგრაფები უარს ამბობდნენ საკუთარი სიცოცხლე საფრთხეში ჩაეგდოთ აფხაზეთში, ამ ველურ და მეამბოხე პროვინციაში მოგზაურობით. გასულ ოქტომბერს, ვენაში ყოფნისას, ჟურნალისაგან კიდევ ერთი ფორმალური და მტკიცე უარი მივიღე. მიუხედავად ამისა, მსურდა რა ჩემს ამბავსა და მის გაგრძელებას დღის სინათლე ეხილა, ფოტოგრაფად ვიქეცი და ხელმეორედ, ახლა უკვე მართოდმართო გავეშურე აფხაზეთისაკენ, რათა მამაცურად გავმკლავებოდი სხვადასხვა და განსაკუთრებით კი, წელიწადის დროთა მიერ მომზადებულ საფრთხესა და სიძნელეს. ჩემი წამოწყება წარმატებით დაგვირგვინდა: აქ დაბეჭდილი სურათები ჩემ მიერ გადაღებული ფოტოების რეპროდუქციებია.

ჩემთვის აფხაზეთი სიდუხჭირის ქვეყანაა. სიტყვის უთქმელად უკვე სამი თვე მქონდა გატარებული.² მოკლე დღეების გამო, იქ სამი კვირა კიდევ დავრჩი თითქმის უძილოდ, ვმოგზაურობდი ღამით, რათა ფოტოებისათვის დღისით, მზისით ვწვეოდი გადასაღებ ადგილებს.

1. ქალბატონი სერენას აფხაზეთიდან დაბრუნების შემდეგ იტალიის მეფემ, უმბერტო I-მა იგი საკუთარ გამოსახულებიანი დიდი ოქროს მედლით დააჯილდოვა. იტალიის ვარსკვლავის ქვეშ იტალიურ ენაზე ამოტვიფრულია წარწერა: „კარლა სერენას, ეთნოგრაფიულ კვლევათა გამორჩენილ სწავლულს, კავკასიის რეგიონის მამაც მკვლევარს, 1882“.

2. იხ. ჩემი წიგნი *Mon Voyage: De la Baltique à la Caspienne, Souvenirs personnelles*. Paris, 1881.

ვენა 16 ოქტომბერს დავტოვე და უკან 23 დეკემბერს დავბრუნდი, გეოგრაფიის საზოგადოების საიუბილეო ზეიმისთვის, რომელზეც მეც ვიყავი მიწვეული. ეს ზეიმი რინგთეატრის თავს დამტყდარი უბედურების [1881 წლის 8 დეკემბერს მომხდარმა ხანძარმა სულ მცირე, 384 ადამიანი იმსხვერპლა] გამო მოგვიანებით გაიმართა.

მგზავრობამ ვენიდან ტფილისამდე და უკან ერთი თვე წამართვა. დანარჩენი დრო ცხენზე ვიჯექი და აფხაზეთში ფოტოებს ვიღებდი. კახეთშიც იმავე მიზნით დავრჩი. წინამდებარე ტექსტში ორიოდ სტრიქონია ჩართული 1881 წლის ექსკურსიასთან დაკავშირებით და თან ერთვის რა 1876 წლის მოგზაურობის აღწერას.

პირველი მცდელობები ფოტოგრაფიაში – გაჩერება ტფილისში, ნოვო-სენაკში, ზუგდიდში – სადილი რუხის ციხის ძირას – ენგურის გადაკვეთა – ისტორიული ხედი – ენგურის მარცხენა ნაპირი და ორსანტიას ციხე – ფოსტიას და მილიციის ცხენების ცვლა – სოფელი საბერიო – სტუმართმოყვარე გამასპინძლება. ცურუშენები – მიწის გაყოფა-განაწილება – ვადგილობრივი თავადები – ზნე-ჩვეულებათა დეტალები – ქალაქი ოქუმი – რეგიონული ტიპაჟები.

რადგან ჩემი გამგზავრება დაგვიანდა და საკმარისი დრო აღარ მქონდა სახიფათო ექსკურსიისათვის კარგად მოსამზადებლად, მინდოდა ვენიდან კონსტანტინეპოლისაკენ მიმავალი გემით მესარგებლა.

როგორც იქნა, გავემგზავრე ნეოფიტი ფოტოგრაფი, არ მქონია საკუთარი უნარის შემოწმების შესაძლებლობა. მომეტებულად ვღელავდი რა საკუთარი პროექტის წარმატებაზე, ბათუმში ხმელეთზე გადმოსვლისთანავე ავირჩიე ჩემი პირველი ნამუშევრის ობიექტი, ავსტრიული ლოიდის გემი ლედა. ამისთვის გამოვიყენე მშრალი, ჟელატინით დაფარული ფირფიტები. ტფილისში ძნელად თუ მოიძებნებოდა ფოტოგრაფი, რომელიც იცნობდა ამ ტექნიკას. მიუხედავად ამისა, მაინც წარმატებით გავართვი თავი და ჩემდა გასახარად, დავინახე, როგორ გამოიკვეთა მკვეთრი და მშვენიერი ლედა მუავა ხსნარში. შემდგომმა მცდელობებმა კიდევ უფრო მეტად წამახალისა.

ტფილისში ხალხი შეეცადა, ჩემთვის აფხაზეთში წასვლა გადაეფიქრებინა; მაგრამ გადაწყვეტილება უკვე მიღებული და ხელისუფალთა მფარველობაც მოპოვებული მქონდა; გენერალი სტაროსელსკი, კავკასიის სამოქალაქო მმართველი თავს ვერ იკავებდა და მიმეორებდა: „თქვენი ჰეროიზმი სიგიჟის ზღვარზეა“.

თავდაპირველად, კოკისპირულმა წვიმებმა ტფილისში შემაყოვნა. მერე კი, გავუყევი ნოვო-სენაკის გზას; გზები ერთმანეთს უერთდებოდა. მაზრის უფროსის, კეთილშობილი ქართველის მასპინძლობით უნდა მესარგებლა, რომელიც შუადღისას ყოველთვის სიგარით ხელში იძინებდა ხოლმე. მისი მსახური კი, ამაყი მეგრელი, მარჯვედ ცდილობდა, ჩიბუხი არ ჩამქრალიყო. მე მოვახერხე და პორტრეტი მძინარეს გადავუღე.

ბაყაყების ბედად, წვიმა ზუგდიდშიც გამოწყვა, თუმცა, მაინც ვიხელთე დრო და ერთ მოწმენდილ დღეს რუხისაკენ გავეშურე, სადაც ჩემი კომპანიონები სადლით გამიმასპინძლდნენ. ერთ-ერთმა მათგანმა ღუმელში შემწვარი ცხელი წიწილა მიყიდა, რომელიც ნაზად, ორი თითით ეჭირა.

დაბოლოს, კიდევ ერთხელ გადავლახე ჩემი რუბიკონი, სახელდობრ, ენგური; ამჯერად, უხეშად გამოჩორკნილი ნავით, რომელსაც ადგილობრივები მდინარის ადიდებისას იყენებენ. მზის ბედნიერი სხივი კი ნაპირზე ფეხის დადგმისთანავე მომესალმა.

სამეგრელოს სამურზაყანოსგან მჩქეფარე ენგური ყოფს. ეს ორი პროვინცია ხშირად ეომებოდა ერთმანეთს, რადგანაც თითოეული მათგანის მმართველი ტერიტორიის გამთლიანებას მეორის ხარჯზე ცდილობდა. სამურზაყანო აფხაზეთის ნაწილი იყო, რომელსაც ესაზღვრება და მას თავადი შერვაშიძეები განაგებდნენ. ამ მთავართაგან, ერთ-ერთმა, ჯიქეშიამ, იმ ოლქის მმართველობა, რომელზეც ახლა გესაუბრებით, თავის ვაჟს, მურზაყანს მიანდო. მამის გარდაცვალების შემდეგ ვაჟი თავად გახდა ამ მიწების მბრძანებელი და უწოდა საკუთარი სახელი – სა-მურზაყან-ო (წინსართი სამფლობელობაზე მიუთითებს).

მურზაყანის შემდეგ ქვეყანას მისი ექვსი ძე განაგებდა. უმცროსი, მანუჩარი 1812 წელს მოკლა ერთ-ერთმა ყმამ. სამეგრელოს მთავრის, ტარიელ დადიანის ქალიშვილისაგან მას ორი ვაჟი დარჩა – ალექსანდრე და დიმიტრი; მაგრამ დედის მხრიდან ბაბუამ თვალი დაადგა სამურზაყანოს და გადაწყვიტა, თავიდან მოეშორებინა დის შვილიშვილები, რაც წარმატებით შეძლო. ის, ვინც პირველად დასაჯა კავკასიის მთავარმართებლის წინააღმდეგ ამბოხისთვის (1808 წლის შემდეგ რეგიონი ემორჩილებოდა რუსეთს), გაციმბირეს და იქვე გარდაიცვალა; რაც შეეხება მეორეს, – მახე დაუგო და მოკლა. მას შემდეგ სამურზაყანოს, რუსული პროტექტორატის ქვეშ, მეგრელი დადიანი განაგებს.

იმავე პერიოდში აფხაზეთში მთავრობდა გიორგი შერვაშიძე, სხვაგვარად, საფარ ბეი და ერთდროულად ორ – ქრისტიანულ და მუსლიმურ სახელებს ატარებდა. ცოლის მხრიდან ისიც ენათესავებოდა სამეგრელოს მთავარს და სწორედ ამიტომ მიიღო სამურზაყანოს მართვის უფლება; მაგრამ, მისი სიკვდილის შემდეგ, ჰამიდ ბეიმ, მისმა მეორე ვაჟმა – ასევე ცნობილმა, როგორც მიხეილ შერვაშიძემ (უფროსი ვაჟი რამდენიმეთვიანი მმართველობის შემდეგ გარდაიცვალა), პროვინცია თავის საკუთრებად გამოაცხადა. ატყდა ბრძოლა, რომელიც რუსეთმა იმით გადაწყვიტა, რომ თავად დაიქვემდებარა სამურზაყანო და იქ საკუთარი მმართველი დანიშნა. ამის საკომპენსაციოდ, სამეგრელომ რეგიონში შემავალი შვიდი სოფელი მიიღო; აფხაზეთი კი მდინარე ლალიძგასა და კოდორს შორის მდებარე მიწებით გაფართოვდა. ამრიგად, 1836 წელს მომხდარი გაყოფის შედეგად, მან დათმო პირველობა და მეორე მდინარედ იქცა, რომელიც სამეგრელოს ყოფდა

სამურზაყანოსგან. დაბოლოს, 1867 წელს, ეს რეგიონი, რომელსაც მანამდე საკუთარი მმართველი ჰყავდა, აფხაზეთს მიუერთდა.

მმართველობის თვალსაზრისით, აფხაზეთი ჯერაც არ არის ასიმილირებული კავკასიის სხვა პროვინციებთან; ნაცვლად იმისა, რომ მათ მსგავსად ჰქონდეს საკუთარი სასამართლო და სამოქალაქო ხელისუფლება, სამხედრო რეჟიმს ექვემდებარება. ამასთან, დავა სამურზაყანოსა და სამეგრელოს საზღვრების შესახებ კვლავაც გრძელდება. ასე რომ, ამას წინათ შერეული კომისია შეიქმნა, რათა დემარკაციის ზუსტი ხაზი განსაზღვროს. ეს კომისია შედგება ქუთაისის გუბერნიის (რომლის გავლენასაც ექვემდებარება სამეგრელო) და აფხაზეთის ადმინისტრაციისგან (რომლის ნაწილიც, როგორც უკვე ვნახეთ, არის სამურზაყანო). მდინარე ენგური, რომელიც მათ შორის მოედინება, ასევე დავის საგანია: რადგანაც მისი თავნება და სწრაფი დინება, დიდი ზიანის მიყენების გარეშე, ნაპირებთან ხშირად წარმოქმნის ხოლმე წყალმარჩხ ადგილებს. კიდევ ერთი საკამათო საკითხია, ამ ორი ქვეყნიდან ვის უნდა მიეკუთვნებოდეს მდინარის მიერ წარმოქმნილი კუნძულები.

ადრე აღვწერე რუხის ციხის ნანგრევები, რომელიც განლაგებულია მდინარის სამეგრელოს კუთვნილ ნაპირზე; მეორე მხარეს კი მდებარეობს ორსანტიის სახელით ცნობილი სიმაგრე. ამჟამად მიტოვებული ორი ნანგრევი ურთიერთსაპირისპირო ნაპირებიდან ჯერაც უცხადებს ერთმანეთს დაუმორჩილებლობას. ვისაუბრე, ასევე, დიდ პოსტებზეც, რომელზეც ამჟამად ინდურ-ბრიტანული სატელეგრაფო ხაზის საჰაერო სადენებია მიმაგრებული, ლონდონიდან კალკუტამდე გაჭიმული და მიჰყვება შავი ზღვის ნაპირებს. სამურზაყანოს მხარეს, სანაპირო, მართალია, ისეთი მაღალი ვერ არის, როგორც რუხისა, მაგრამ 70 ფუტს მაინც აღწევს. ისიც, ისევე როგორც მისი მეგრელი ძმა, დაცულია მდინარის მჩქეფარე შემოტევებისაგან. შორიდან ეს ორი უშველებელი სვეტი წააგავს კოლოსალური გემის ანძებს, ჩამოკონწიალებული სადენებით. ადამიანის ფიქრები მდუმარედ, მალულად მისრიალებს გრძელ ელექტროსადენებში, გასაოცრად მიაპობს ჰაერს, ციებცხელებიანივით მიმოდის აქეთ-იქით და კვეთს ამ მართოსულ რეგიონებს და უხილავი სულების მისტიკურ და დაფარულ დიალოგს ემსგავსება, ფრთხილად რომ საუბრობენ სივრცეში.

იმავე დონეზე, რამდენიმე მეტრის მოშორებით, რკინის ბოძი აღუმართავთ, რომელიც სხვა ხის ბოძებს უკავშირდება და ჭიმავს სადენს. ისინი, თავის მხრივ, დაკავშირებულია რუხის ციხესიმაგრის სიახლოვეს აღმართულ ტართან და შესაბამისად, ორსანტიასთან ორი სხვადასხვა ხაზი მიდის. პილონი ამ ადგილას ატარებს ნომერს – 603 და იმ ადამიანთა სახელებს, ვინც მეთვალყურეობას უწევდა პროექტს, ალბათ, ძალიან რთულად განსახორციელებელს, რადგანაც ეს ქვეყანა მოკლებულია ყოველგვარ რესურსს. ერთი ადგილიდან მეორემდე, ტელეგრაფის

ხაზის გაყოლებაზე, სადარაჯო სადგურებია მოწყობილი უბედური შემთხვევების თავიდან ასარიდებლად. ქერჩიდან (შავ ზღვაზე) ირანის საზღვრამდე ოცი ასეთი სადგურია, სადაც მეთვალყურეობა იწყება დილის შვიდ და მთავრდება საღამოს ათ საათზე. კავკასიის კანტონებში და განსაკუთრებით კი, შავი ზღვის ნაპირებზე, ღამით მომსახურება შეწყვეტილია (მაშინაც კი, თუკი ხაზის დაზიანებაზე შემოვა სიგნალი), რადგან ამ რეგიონში ღამე მოძრაობა შეუძლებელია, რაც გზების ფაქტობრივი გაუვალობით და ურთიერთგადამკვეთი ნიაღვრებითაა გამოწვეული. დამკვირვებლის მოვალეობაა, ყოველი საათის ჩამოკვრაზე შეამოწმოს გალვანოსკოპის ნემსის მოძრაობა; მისმა მდებარეობამ უნდა აუწყოს, არის თუ არა კომუნიკაციაში ხარვეზი და შუამავალი სადგური ვალდებულია თუ არა, შეაკეთოს დაზიანება. ყოველდღიური დაკვირვებების შედეგად იქმნება ჟურნალი, რომელიც ცენტრალურ სამსახურს ტფილისში ყოველთვიურად ეგზავნება.

ყველა, ვინც ორსანტიას სიმაგრეზე ხედების დასანახად ამძვრალი დამინახა, ძალიან გაკვირვებული დარჩა. ორი ჩაფარი (მილიციელი) წამომყვა, რათა უსაფრთხოდ ავეყვანე ზემოთ. ქარი ქროდა და მამაკაცთა გაკვირვება იმის დანახვისას, რომ მე არაფრისაც არ მეშინოდა, შემდეგ შიშში გადაიზარდა, რადგან ეს მართლაც სახიფათო ადგილი იყო.

ორსანტიის ძველი ციხესიმაგრის მდებარეობა მართლაც რომ საუცხოოა: ერთ მხარეს მოჩანს კავკასიონი, მეორე მხარეს კი – სამეგრელოს მინდვრები; შეუძლებელია, რაიმეზე, უფრო დიდებულზე იოცნებო. ნანგრევების ძირითადი ნაწილი გარშემორტყმულია გალავნით, რომელიც მდინარეს მიუყვება. მაღალი, რამდენიმე დონიანი კვადრატული კოშკი და მიწისქვეშა გასასვლელები, სადაც, ტრადიციის თანახმად, ქვეყნის ხელისუფალნი მაღავდნენ თავიანთ საგანძურს, ენგურის მიერ ჩამოტანილი ქვებითაა აშენებული. თუკი აქ ხმელეთიდან მოხვალთ, დიდი გალავნის მარჯვნივ, რომელიც კოშკის ძირს აკრავს გარს, წააწყდებით კამაროვან ოთახს, რომლის შესასვლელიც სრულყოფილად შემონახული თალია. თავად კოშკში კი, კიდევ ერთი, უფრო მოზრდილი დარბაზია, ასევე კამაროვანი, რომელიც, სავარაუდოდ, სამლოცველო უნდა ყოფილიყო. აქედანვე ადიხარტ ზემო სართულზე.

მარცხნივ, მდინარის გვერდით, გალავნის ბოლოში მიადგებით დერეფანს, რომლის გავლითაც შედიხართ წამახვილებულ ოთახში; ის მიწისქვეშა გასასვლელებით რეგიონის სხვა ციხესიმაგრეებთან იყო დაკავშირებული. ყველა ეს თავდაცვითი ნაგებობა, როგორც აფხაზეთსა და სამურზაყანოში, ისე სამეგრელო-სა და იმერეთის ტერიტორიებზე, თარიღდება ჯერ ბერძენთა და, შემდეგ კი, გენუელთა კოლონიების დაფუძნებით კავკასიის ფერდობების ძირას. მოგვიანებით, მუსლიმ (ე.ი. თურქ) დამპყრობლებს მათი წინააღმდეგობის დაძლევა მოუხდათ.

ამ რეგიონში ქრისტიანობის კიდევ ერთი ბურჯი იყო ციხესიმაგრე სათანჯო,

რომელიც იმავე დასახელების ქედზე მდებარეობდა, ორსანტიიდან რამდენიმე ვერსის მოშორებით; ამბობენ, რომ ამ ორ ადგილს შორის საიდუმლო კავშირი ახლახან აღმოუჩენიათ.

მცენარეული საფარი ორსანტიის გარშემო, ისევე, როგორც მთელ ქვეყანაში, მდიდარია; ირგვლივ სხვას ვერაფერს ხედავთ, თუ არა ველურ ყვავილთა ხალიჩებს. ხეხილი იზრდება მხოლოდ ბუნების ძალისხმევით, ვაზის ამონაყარს ყლორტები მძლავრად გადაუხლართავს მუხის, ცაცხვის, კაკლის, წაბლის ხეთა საუკუნოვან ვარჯებზე, რომლებიც კავკასიის ნაყოფიერმა მიწამ კვება. ამ ჯადოსნური სანახების ქვემოთ, მრავლად დატოტვილი ენგური მიგრგვინავს კლდოვან კალაპოტში და თავისი მძლავრი ნაკადებით ქვემოთ ჩამოაქვს აურაცხელი ნაშალი, რომელიც მთათა ხეობებიდან მოუტაცია, ხოლო ტალღების მრისხანე გოდება ზღვაზე შტორმის ხმაურს წააგავს. ეს გოდება მდინარის პირას მცხოვრებთა კოშმარია, რომელთაც კარგად უწყიან მდინარის ხმათა ნიუანსების შესახებ და არც არასოდეს ცდებიან უბედურების მოახლოებისას.

წყლის მჩქეფარე ნაკადების ზემოთ ამოზრდილი მწვერვალები ჰარმონიულად ერწყმის მდინარეს: შორს აღმართულა მარადიული თოვლით დაფარული ქედი, რომელიც საზღვარს ქმნის სამურზაყანოსა და სვანეთს შორის; ამის მიღმა იწყება აბსია საბერიოს (საბერიოს საძოვრები) მაღლობი, სადაც პირუტყვის სათვის საკვები ყოველთვის უხვად მოიპოვება. სახელწოდება საბერიო ჰქვია იმ ადგილსაც და სოფელსაც, რომელიც მთაზე გაუშენებიათ; ადგილობრივთა ენაზე სიტყვა აღნიშნავს „ბერთა კრებულს“; თუმცა, ბერების არანაირი ნაკვაღევი აქ აღარ შეინიშნება. სიმაგრის ახლოს რუსი კამაკების ყოფილი სადგურია. იქვე, სამეზობლოში შეგხვდებით საფოსტო ფუნდუკი, რომელსაც განაგებენ მშვიდობიანი ადგილობრივი მილიციელები და სახელმწიფო სამსახურს ცხენებით უზრუნველყოფენ. დამქირავებელი ცხენში იხდის 5 კაპიკს ვერსზე (უხეშად რომ ვთქვათ, ერთი კაპიკი უდრის ერთ სუს). ეს მილიციელები ასევე ასრულებენ კომისიონერის ფუნქციას. თითოეული მათგანის თვითონი ხელფასი ათი რუბლია, ამას ემატება საკვები და საცხოვრებელი. კავკასიის სხვა მამაკაცთა შორის, რომლებიც ყოველთვის კბილებამდე შეიარაღებულნი არიან ხმლით, პისტოლეტით, რევოლვერითა და ხანჯლით, მხოლოდ მათ აქვთ შაშხანის ტარების უფლება; ესაა ის, რაც სამოქალაქო ჯარისკაცს განასხვავებს უბრალო მოქალაქისაგან. ფოსტის თითოეული ამ სადგურთაგანი, რომლებიც ვლაპარაკობ, შედგება ორი სუსტად ნაგები ქოხისაგან, რომლებსაც აფათუას უწოდებენ და რომელიც დიდ კვადრატულ კალათას წააგავს. სახურავი გაკეთებულია ხმელი ბალახისაგან, რომელიც უხვად მოიპოვება ამ რეგიონის ჭაობებში. ერთ ქოხში ცხოვრობენ ადამიანები, მეორეში კი, ცხენებისათვის თავლა მოუწყვიათ; მაგრამ სიმართლე რომ ითქვას, ცხენები დღედაღამ ან მინდორში არიან, ანდა, მეზობლად მდებარე ტყეებში; ასე რომ,

მოგზაურმა, რომელსაც ცხენების შეცვლა სჭირდება, სადგურის მცველებს წინასწარ უნდა მისწეროს.

მილიციელთა უმრავლესობა კეთილშობილთა კლასს მიეკუთვნება და ეს სამსახური თვით ქვეყნის თავად-აზნაურებისათვისაც კი სასურველად ითვლება. რთული არ არის ამის მიღწევა; ჯარისკაცის გარეგნული ბრწყინვალეობა საკმარისზე მეტია კავკასიელ არისტოკრატთა საცდუნებლად, რომელთაც იტაცებთ უქმად ყოფნა და უყვართ ძონძები. ეს სახელგანთქმული ჩამოძონძილები ასევე იცავენ გზებს, რომლებიც, უნდა აღინიშნოს, ისევე უსაფრთხოა დღეს, როგორც რამდენიმე წლის წინ.

ორსანტიის სადგურზე, გარდა მილიციის რვაკაციანი შემადგენლობისა, დაგვხვდა ასევე დუქნის მეპატრონე ოჯახითურთ. დუქანი საკმაოდ ტიპური დაწესებულებაა, ერთდროულად სასტუმრო, რესტორანი, ღვინის მაღაზია, კვების დეპო, მოკლედ, ის ყოველგვარ რესურსს გვთავაზობს ბუფეტისთვის; სამუშაოდ, ამ სასადილოს სუნიან კედლებზე ჩამოკიდული, სხვადასხვა ფორმის ნივთებისათვის უბრალო თვალის შევლებაც კი საკმარისია ყველაზე მძაფრი შიმშილის ჩასაკლავად. შეუძლებელია ამ ფანტასტიკური ადგილის სანიმუშო სიბინძურის წარმოდგენა; ცხოველთა რასის ყველა სახეობა, ძაღლები, კატები, ქათმები, იხვები და ღორები აქ, ერთად, ტკბილ ჰარმონიაში ცხოვრობენ და მდინარის ორი ნაპირის ერთმანეთს გადამტერებულ მცხოვრებთ მშვიდობიანი თანაცხოვრების მაგალითს აძლევენ. კიდევ ერთი სიურპრიზი ორსანტიის კოშკიდან დაშვებისას მელოდა. დუქნის წინ დავინახე პირდაპირ მიწაზე, სოფლურად გაშლილი გვიანი საუზმე. *Pièce de resistance* (ძირითადი კერძი) უშველებელი შემწვარი ინდაური იყო. ერთ-ერთი თანმხლები აზნაური მის დანაწევრებას ხანჯლით აპირებდა, რისთვისაც მჭრელ პირს ამოწმებდა. თავაზიანმა სამურზაყანოელმა კი თავისი ყაბალახი მოიხსნა და შემომთავაზა, ბალიშის ნაცვლად მასზე დავმჯდარიყავი.

თუკი ორსანტიიდან სოფელ საბერიოს მიმართულებით გაეშურებით, ლანდშაფტი მკვეთრად შეიცვლება. ერთიანად ვაკე მიდამო უფრო მეგობრული და უკეთ დამუშავებული მოგეჩვენებათ, თუმცა კავკასიონის შორეული ფონი დიდად არ იცვლება. სიმიინდი უხვად ხარობს ამ მინდვრებში. აქა-იქ დაინახავთ ხორბლის ყანებსაც, რომელიც იშვიათად გამოიყენება, ისიც ქორწილის ან ქელების სუფრაზე, რათა გამოაცხონ პური, რომელსაც ლავაშს ეძახიან. რაც შეეხება როგორც მდიდართა, ისე ღარიბთა ყოველდღიურ საკვებს, ეს არის სიმიინდის შეჭამადი, რომელსაც აფხაზები უწოდებენ აფსუა აშტას. თუკი სამეგრელოსა და სამურზაყანოში ხორბალი ჯერ კიდევ იზრდება, აფხაზეთში მას ვეღარსად იპოვით. არადა, სიმიინდის ფართოდ მოყვანა იქ, ფაქტობრივად, რამდენიმე წლის წინ დაიწყო; იქამდე, მხოლოდ დიდებულებს მოჰყავდათ ეს მარცვლეული და ნაკლებად ილბლიანნი მხოლოდ სტუმართა გასართობად თუ იყენებდნენ მას. მეორე მხრივ, უხვად მოიხმარდნენ ღვინოსა და ხორცეულს.

სოფელ საბერიოს სიახლოვეს, მაღლობზე აღმოაჩენთ ციხესიმაგრის ნანგრევებს, რომელიც რეგიონის თავდაცვის კორდონის შემადგენელი ნაწილია. ეს ყველაზე სტუმართმოყვარე სოფელია. პირველი მოგზაურობისას ორსანტია დილით დავტოვე და იქ შუადღისთვის ჩავედი. დაახლოებით სამი საათი დავუთმე ხემსსა და სიესტას, რადგანაც განსაკუთრებით ეს უკანასკნელი აუცილებლად საჭირო რამ გახლდათ დღის ამ დროსა და ამ რეგიონში. ამჯერად საბერიოში უფრო დიდხანს დავრჩი. იქ კიდევ ერთხელ მიმასპინძლა ამ რეგიონის უმნიშვნელოვანესმა პირმა, თავადმა ზურაბ ჩხოტუამ და მისმა ოჯახმა, რომელთაც ძველი მეგობარივით მიმიღეს. იგი თავისი უშველებელი სიმიზნის ყანებისკენ გამიძღვა და მაჩვენა ვეებერთელა ბელელი, სადაც მოსავალს ინახავენ. კიბე გჭირდებოდა იმისათვის, რომ ამ ბელელს შეეწვდომოდი, რომელიც განგებ იყო მიწიდან დაშორებული, რათა მოსავალი ნესტისგან დაეცვათ. ყოველდღე მზარეული ადის და იღებს იმ რაოდენობას, რაც მას შეჭამადისთვის სჭირდება.

ბევრის თქმა არ არის საჭირო იმის შესახებ, რომ უცნობი, რომელმაც არც გზები იცის და არც ენა, ამ არაცივილიზებულ რეგიონში მართო მოგზაურობისას ძალიან ბევრს რისკავს; შესაბამისად, მას ჰყავს ოფიციალური ან თავაზიანი მეგზური, ვინც გასაჩერებელ ადგილებს სტუმრობის შესახებ წინასწარ ატყობინებს; რადგან სტუმარმასპინძლობა ღარიბთა და მდიდართათვის ერთნაირად წმინდაა და მთელ კავკასიაში, რომელ ზღურბლზედაც არ უნდა შედგას ფეხი, მას ყველგან გულითადად მიიღებენ.

სტუმარმასპინძლობის ამ წესის მიუხედავად, ხშირად იძულებული ვიყავი, უკუმეგდო ჩემი ცრურწმენები სისუფთავისა და დახვეწილობის შესახებ; უნდა დამეთმო და შიშისაგან არ შევცბუნებულიყავი, მაგალითად, მაშინ, როცა ჭამის დაწყებამდე ფეხშიშველი, დაკონკილი ადგილობრივი მიახლოვდებოდა გაზინტლული და დაჟანგული ლითონის ტაშით. მიუხედავად ამისა, მაინც ვერაფერი მაიძულებდა უცნაური *valet de chamber*-ის მიერ შემოთავაზებულ ფანტასტიკურ ჭურჭელს შევხებოდი. როდესაც მეორე ადგილობრივმა, ზუსტად პირველის ასლმა, დაიწყო კიდევ უფრო გაშავებული რკინის თუნგიდან სუფრის წევრთა ხელებზე რამდენიმე წვეთი წყლის დასხმა, მეორეს კი ქვემოთ ეკავა ჩემ მიერ ზემოხსენებული ტაშით, ვერაფერმა მაიძულა, ყოყმანი შემეწყვიტა და მივკარებოდი ჩემთვის მოწვდილ საოჯახო ხელსაწმენდს. ამ ჭუჭყიანი ჩვრის ნაცვლად შემეძლო ჩემი ცხვირსახოცი გამომეყენებინა, რომელიც არც ერთ გარშემომყოფს არ ენახა.

როგორც კი ეს რიტუალი დამთავრდა, შემოვუსხედით ხის გრძელ მაგიდას, გაწყობილს სიმიზნის ულუფებით, რასაც იმავე რაოდენობის ხორცი მოჰყვებოდა და რომელთა ზომა მეტყველებდა არა მხოლოდ მასპინძლის გულუხვობაზე, არამედ სტუმართა ძლიერ მაღაზეც. ამ მთავარ კერძს ემატებოდა ხბოს ან ქათმის რაგუ და

აქაურ მენიუს, რომელიც არასოდეს იცვლება, ასრულებდა ცომი კამეჩის ყველით (ხაჭაპური) და არაჟანი რძისგან, რომელსაც ისინი მარწვენს (*marcveni*) უწოდებენ. ერთადერთი რამ, რასაც თანამეინახენი სადილობისას იყენებდნენ, იყო თითები. პირალესილი დანით (რომელიც ყველა აქაურს მუდამ თან დააქვს) ხელებით ისე აცლიან ძვალს ხორცს, რომ ბოლოს მხოლოდ ცარიელი ჩონჩხი რჩება. ერთადერთ დოქი, რომელსაც მუდმივად ავსებს ჭიქების დამტარებელი (ორყოლი/*Orkoli*), სუფრაზე წრეს აკეთებს და ყველას ემსახურება. ღვინო, რა რაოდენობითაც არ უნდა დალიონ ის ადგილობრივებმა, აქაურობას დათრობის გარეშე აცოცხლებს. ქეიფი ისევე მთავრდება, როგორც იწყება – ხელების დაბანით იმავე ინსტრუმენტებით, რომლებიც ახლა უწინდელზე კიდევ უფრო მეტად ჭუჭყიანია.

გარეშე სტუმართა გამოჩენისთანავე, მაშინაც კი, თუ მათ შორის ქალიცაა. აქაური ქალები ქრებიან და სუფრას მხოლოდ კაცები შემოუსხდებიან ხოლმე. ეტიკეტი საპირისპირო სქესს ასევე უკრძალავს, ქალი ან მამაკაცი სტუმრების თანდასწრებით დაჯდომას. რაც შეეხება მამასახლისს, ის ფეხზე დგას მანამ, სანამ სუფრა არ დასრულდება და სტუმრებს მასპინძლობს.

სხვა აღმოსავლელთა მსგავსად, კავკასიელებიც ძალისხმევას არ იშურებენ უცხოელთა საამებლად. როდესაც ეს უკანასკნელი ტოვებს მასპინძლის სახლს, ოჯახის თავი მაღალფარდოვანი სიტყვებით ემშვიდობება მის ჭერქვეშ ღამის გათენებისთვის; შეიძლება იფიქროთ, რომ მას სამსახური თქვენ გაუწიეთ.

სოფელ საბერიოს იქით ლანდშაფტი კვლავ იცვლება: მინდვრები ადგილს უთმობს ტყიან მთებს, რომლებიც რაღაცით მოგაგონებენ თვალწარმტაც და ველურ მხარეს, სტირიას ავსტრიაში, რომელიც მარია-ცელში, პილიგრიმთა საყვარელ ადგილას მდებარეობს. დაბალ, ფოთლოვან ტყეებს მოჰყვება მაღალი, ბუმბერაზი ტყეები, სადაც მუხები, ცაცხვები, ჭადრები და კაკლები საკონცერტო დარბაზის მსგავს სიმწვანის გუმბათს ქმნის, ხოლო ბულებულები და სხვა მგალობლები დაუცხრომლად აჟღერებენ ჰარმონიულ ნოტებს. ფრთოსანი მომღერლები ბუნებას მარადიულად უგალობენ თავიანთ მხიარულ ჰიმნებს, არ ეშინიათ რა ადამიანისა, რომელმაც შეიძლება თავისი მომაკვდინებელი მარჯვენიტ შეწყვიტოს მათი აკორდები. ამ ქვეყანაში ხალხი არ ნადირობს ფრთოსნებზე და როგორც აღვნიშნე, მილიციელთა გარდა არავის აქვს შაშხანის ტარების უფლება. პატარა ფრინველთა სასიხარულოდ, შავარდნებით ტრადიციული ნადირობა ნელ-ნელა დავიწყებას ეძლევა. მიუხედავად ამისა, მტაცებელ ფრინველებს ჯერაც წვრთნიან, განსაკუთრებით კი, მთის ტომთა შორის; რაც არ უნდა იყოს, რეგიონის ტყეები და მდინარეები ფრიად ბარაქიანია, მაგრამ აქაურს არც კი ესიზმრება მათი ათვისება; მის ყველა კვებით საჭიროებას სიმინდი აკმაყოფილებს.

ამ ღრმა და მჩქეფარე მდინარეებით დასერილ მიწა-წყალზე მოგზაურისათვის ყველაზე მნიშვნელოვანია ძალ-ღონე და ცურვის გამოცდილება. ეს მაგალი-

თი ყველას გამოადგება: ერთი წყალი, რომელიც სათავეს იღებს გრალაიას მთიდან და ჩაედინება შავ ზღვაში, სოფელ გუდავის სიახლოვეს თხუთმეტი ვერსის მანძილზე, ფონს გასვლით, შვიდჯერ მაინც უნდა გადაკვეთოს ადამიანმა აქ ხსენებულ სოფელ საბერიოდან სოფელ ჭირამდე, რომელიც ამ ტერიტორიის განაპირას მდებარეობს. რაც შეეხება ხიდებს, ისინი აქ არ არსებობს და თუკი მდინარის დონე აიწევს, მაშინ კაცი და მხეცი ერთნაირად ებრძვის დინებას და კარგა ხანს იმასაც კი ვერ იგებენ, თუ ვინ იმსხვერპლა მდინარემ. რამდენჯერ მიმტყუნა მხნეობამ ამ ვეება მდინარეთა ცხენით გადაკვეთისას!

სამურზაყანოს სოფლები არ არის მჭიდროდ დასახლებული თემების მსგავსი; სახლები გაფანტულია, როგორც სამეგრელოში, იმერეთსა და გურიაში, და სიმინდის ყანებითაა გარშემორტყმული. ოღონდ, ნაცვლად ხისა, რომლითაც სხვა სახლებია აგებული ამ ქვეყანაში, ისინი აშენებულია წნულებით, მსგავსად ჩვენი მოწნული ნაკეთობებისა. უწინ ყველა ასეთი ყოფილა; უკანასკნელმა სიუზერენმა, რომელსაც ცოტა უფრო ცივილიზებული სიახლეების შემოტანა სურდა, ააშენა სოფელი, სადაც საცხოვრებლები აგებული იყო ხით და ეწოდებოდა აკვასკი, სახელი, რომელიც მას შემდეგ ჰქვია მსგავს სახლებს. იგი შედგება ოთხი კედლისაგან, რომლებიც ქმნის კვადრატს და ახურავს მზეზე გამხმარი მცენარეებისა და ფოთლების დამრეცი ჭერი; არანაირი ფანჯრები; საცხოვრებელ სივრცეს მაღალი შესასვლელი ანათებს; სუფთა ჰაერი შემოდის ჭერში დატანებული ხვრელიდან და საკვამურადაც გამოიყენება; კერია არის ქვა, რომლის თავზეც, რკინის კაუჭზე კიდია სიმინდის სახარში ქვაბი; ეს ერთადერთი საოჯახო ჭურჭელია. ხის დიდი ბოძები, რომლებზეც ქალების მიერ შეკერილი ძალიან მარტივი ლეიბები იშლება, ღამით მთელი ოჯახისათვის საძინებლად იქცევა. დაბოლოს, ჭერში, რომელსაც იკავებს ხის სვეტები, ზოგჯერ იქმნება ვერანდა, რომელიც დამატებითი ოთახის ფუნქციას ასრულებს.

ჭირში ამის მსგავსი რამდენიმე საცხოვრებელი მოიძებნება. მეორე მხრივ, ბუნება ერთიანად დოვლათით პასუხობს ხალხის პრიმიტიულ ცხოვრებას. იგი მუდმივად აღმოცენება-გახარების პროცესშია. ხე მოჭრილი არ არის, რომ მისი ვარჯი მაშინვე გაფოთვლას იწყებს. სოფლის მიწებს საზღვრებს ოქუმი უდებს. მისი კალაპოტი, შექმნილი უშველებელი ქვებისგან, რომლებიც მთებიდან მქუხარე ნაკადებმა ჩამოიტანა, ზოგჯერ ქუჩას წააგავს, ზოგჯერ კი, ახირებულად დახვავებული ლოდების წყალობით, სხვადასხვაგვარ არქიტექტურულ ფანტაზიებს აღვიძებს. ეს მდინარე ერთისწყლის შენაკადია, რომელსაც იგი შავ ზღვამდე სამასი მეტრით ზემოთ ერწყმის; სათავეს კი სოფელ გუდავასთან იღებს. ოქუმის სამურზაყანოს ნაპირზე იმავე სახელწოდების სოფელი, მხარის ადმინისტრაციული ცენტრი, მდებარეობს ისეთ ალაგას, სადაც მდინარე ფრიად მომხიბლავად მიიკლაკნება.

საბერიოს დატოვებისას თან მახლდა ჩემი მასპინძლის ვაჟი, რომელმაც მათი ადგილ-მამულის საზღვრებამდე მიმაცილა, იქ კი, მეორე სოფელში, ჭირში, რომ-

ელსაც შეღამებისას მივალწი, სტარშინა (მთავარი) მელოდებოდა. ხანდაზმული პირი პატივისცემის ნიშნად თავისი ქობის ზღურბლთან მიცდიდა. მისი ანტურაჟიდან გამოვარჩიე უზარმაზარი ეპოლეტები, რომლებითაც თავისი ძონძები მოერთო. გავიგე, რომ ისინი მოეპოვებინა აფხაზეთის უკანასკნელი აჯანყებისას, როცა მილიციის კორპუსს მეთაურობდა. ეს აზნაური-მილიციელი ფრიად სახალისო მომეჩვენა. „იუნკერი ლაკერბეი გახლავართ“, – მითხრა ცუდი რუსულით, „ჩემი სახით შეგიძლიათ მიესალმოდნენ ქვეყნის მთავარს“. მეორე დღეს დავინახე, როგორ აცლიდა ფუჩიქს სიმინდის ტაროებს, თუმცა, ეპოლეტები მაინც ეკეთა. ფრიად ნასიამოვნები დარჩა, როცა თავის ეპოლეტებში სურათის გადაღება ვთხოვე, მაგრამ ბოლოს მაინც მოიხსნა; ღირსების ეს სიმბოლოები ჩემს სურათს არ შემორჩა.

კავკასიის ამ სამეზობლოთა ბევრმა ჩვეულებამ გამახსენა იტალიის პოპულარულ ადათთაგან ერთ-ერთი; შეიძლება ვივარაუდოთ, რომ ისინი ამ ქვეყანაში გენუელთა გამოჩენიდან იღებს სათავეს. იგივე შეიძლება ითქვას გარკვეულ ცრურწმენებზე, რომლებიც მსგავსი სახით გვხვდება იტალიაში, განსაკუთრებით კი, მიდის პროვინციაში. ამის მაგალითია *jettatore*, ავი თვალის მქონე სული, რომელიც სამურბაყანოსა და აფხაზეთში აღინიშნება სიტყვით როკაპი. ზოგადი იდეა ისაა, რომ ეს რაპაპი, სახლობს იდუმალ ადგილას, ტაბაკონს, ხოლო დედამიწაზე ჰყავს დახელოვნებული მოკავშირეები, რომელთაც მაზაკვალებს უწოდებენ. ყოველ წელს, 14 აგვისტოს, კუდიანების დასს პლენარული სასამართლო აქვს მათი ბელადის საცხოვრისში. შებინდებიდან დაღამებამდე თითოეული ჭინკა მიიპარება გამოქვაბულისკენ, ერთი ამხედრებულია მგელზე, მეორე – გარეულ კატაზე, კიდევ სხვა რკინის ქოთნით ანდაც, მოზრდილი ჩაიდნით მიცურავს: ავბედითი და ხმაურიანი კორტეჟი ფრენისას საშინელ ღრიალს ქმნის. და ყოველი სტუმრობისას ამ რაბმს რაპაპისთვის მიაქვს ადამიანის გული; ეს არის საზეიმო თავყრილობის საგანი. ერთი წელი მაზაკვალი რჩება მიწაზე და ნადირობს სასურველ საგანზე. რწმენა-წარმოდგენის მიხედვით, ამგვარმა არსებამ შეიძლება მძინარე კაცს გული ამოგლიჯოს და მის ნაცვლად ჩვარი ან ნაბდის (აფხაზურში, ოპა) ნაჭერი ჩაუდოს მკერდში. განსაკუთრებული ძალით დაჯილდოებული რაპაპი მთელი სოფლის მოსახლეობას გაანადგურებდა, რომ არა ღმერთი, რომელიც ხელს უშლის მას, თავისი ძალა ბოროტად გამოიყენოს და ის მიწაში ღრმად ჩარჭობილ პალოზე ჰყავს მიჯაჭვული. ის მაზაკვალი, რომელიც ხელგარიელი მივა ტაბაკონის თავყრილობაზე, ვერ გადაურჩება რაპაპის მძიმე უროს, რომლითაც ის არის შეიარაღებული; მაგრამ ამ დროს პაწია ბოლოქანქარა ჩიტი, სახელად სენიტიკა, დაჯდება პალოს თავზე; რაპაპი დააპირებს მის დაჭერას და მისკენ მოიქნევს მკლავს, მაგრამ, ნაცვლად ჩიტისა, უროს ურტყამს პალოს, რომელიც ყოველ ჯერზე უფრო და უფრო ღრმად ერჭობა მიწაში.

მორწმუნენი სენიტიკას, როგორც ღვთაებრივ არსებას, ისე ეთაყვანებიან. საღამოს, როცა მაზაკვალთა საჭაერო კავალკადა ბელადის გამოქვაბულისკენ მიე-

მართება, ცრუმორწმუნენი სიმინდისა და საჭმელად ვარგისი სხვა მცენარეების მოსაგროვებლად მიდიან; იმ საღამოსვე ანთებენ დიდ კოცონს. თოთოეული მათგანი სამჯერ უნდა გადაახტეს კოცონის ალს, რომელმაც ჰაერში მონავარდე ავ დემონებს ფრთები უნდა დაუწვას და ტაბაკონისკენ მოგზაურობა შეაწყვეტინოს. 13-იდან 14 აგვისტომდე, მოსახლეობა მთელი ღამეს ფეხზე, ცეკვა-სიმღერაში ატარებს. ყურადღებით აკვირდებიან, რომ დაღამების მერე არავის ჩაეძინოს, მზაკვალმა დრო არ იხელთოს და რომელიმე გაუფრთხილებელს გული არ ამოჰგლიჯოს. ამასთან, თითოეული ოჯახის თავი ცეცხლს ისვრის ცაში და იმეორებს: „დაე, ამ ბურთმა დაწვას ავსული, რომ ვერაფერი მავნოს“. ყოველი სახლის წინ ჩარგულია ხის ჯვარი, რომლისაც რაპაპსა და მის მოკავშირეებს ძალიან ეშინიათ.

აფხაზეთში მილიციური რეჟიმის შენარჩუნება ძირითადად მატერიალურ და მორალურ პროგრესს ემსახურება. ერთი უფროსი, აღჭურვილი შეუზღუდავი ძალაუფლებით, თავისი ახირებების მიხედვით მართავს მთელ რეგიონს და ყველა ვალდებულია, დაემორჩილოს ამ დიქტატორის ყველაზე ტრივიალურ კაპრიზსაც კი. ფაქტობრივად, ყველას სიცოცხლე და ქონება ამ პირის ხელშია, რომელიც ყოველთვის ნამდვილად არ არის სამართლიანი და პატიოსანი კაცი და რომლის უკანონობის წინააღმდეგ ვერავინ ვერაფერს გახდება; მასზე წინააღმდეგ გამოთქმული მცირე საჩივარიც კი მაშინვე იღებს ამბოხის ელფერს და ერთი წამოცდენილი სიტყვაც საკმარისია ადამიანის გასაციმბირებლად. ხშირად, პირველად სწორედ მასთან ხვდება საჩივრები იქამდე, სანამ მიაღწევდეს სადაც ჯერ არს, რომ ამ ერთი ადამიანის მიერ ჩაგრულთათვისაც აღესრულოს სამართალი.

სამწუხაროა, რომ აფხაზეთის ტერიტორია, ბუნების მიერ ასე უხვად დაჯილდოებული, რჩება მავანი დესპოტის იმედად, რომელიც ყოველივეს, მთელ წვეწვს გამოწურავს და ყველაზე ღამაში სამფლობელოს სიკეთეებს საკუთარ პარაზიტებს უზიარებს. რეგიონში არ არსებობს არანაირი გზა, მაგრამ მისასვლელი მაინც გამოჩნდება ხოლმე, როცა საქმე ეხება უფროსის მამულში სტუმრობას. გენერალმა ჰიმანმა, ერთ-ერთმა ყოფილმა გუბერნატორმა, სამართლიანმა კაცმა, პატივცემულმა ამ ქვეყანაში, თავი მოუყარა გარკვეულ თანხას მადნეულის კარიერთან მისასვლელი გზის ასაშენებლად. რა გააკეთა მისმა მემკვიდრემ? მარტივად გამოიყენა ეს ფული სოხუმ-კალეში საკუთარ ვილასთან მისასვლელი გზის მოსაწყობად. მოკლედ, აფხაზეთი მისთვის არის ქონება, რომელსაც საკუთარი სარგებლისათვის იყენებს, საზოგადო ინტერესებზე ზრუნვის გარეშე.³

მიუხედავად ყველაფრისა, ეს საუცხოო რეგიონი, რომელიც საუკუნეების განმავ-

3. გენერალი კრავჩენკო სწორედ ის კაცია, რომელმაც არაფერი გააკეთა სოხუმ-კალეს დასაცავად, რომლის საგანძურიც წაიღეს თურქებმა ბოლო ომის დროს და ვინც ამხელა ზიანი მიაყენა აფხაზეთს.

ლობაში თითქმის განუვითარებელი დარჩა, შეჭურვებს უკეთესი მომავლის პერსპექტივას. 1876 წელს არსებობდა მიწის განაწილების გეგმა მცხოვრებთა შორის, რომლებიც შედეგად მიწის უბრალო დამუშავებლებიდან მიწის მფლობელებად იქცეოდნენ; ეს დიდი რევოლუცია იქნებოდა ქვეყანაში, სადაც შერვაშიძეთა მოსვლის შემდეგ არც ერთ კერძო პირს მფლობელობაში მიწის ერთი დუიმიც არ ჰქონია, გამეფებული მთავრები კი განსაკუთრებულ მიწებს თავისთვის ინახავდნენ.

შერვაშიძეების ოჯახი წარმოშობით სპარსეთიდანაა. ეს გვარი აფხაზეთში პირველად მმართველის სახით მაშინ გამოჩნდა, როცა ალექსანდრე პირველმა საქართველო თავის სამ ვაჟს შორის გაყო (1440-1442 წწ.). აფხაზებმა მას შეარქვეს აჭუ, რაც ნიშნავს უფროსს. რაც შეეხება შერვაშიძის ეტიმოლოგიას, ის უნდა უკავშირდებოდეს შირვანს. რადგანაც პირველი მმართველი სპარსეთის შირვანის პროვინციიდან იყო, მოგვიანებით კი, საქართველოს დაქვემდებარებული, ამიტომ მას დაამატეს *ძე*, რაც ქართულად ნიშნავს შვილს, მემკვიდრეს და შეიქმნა გვარი შერვაშიძე. მაგრამ, მოდით, დავუბრუნდეთ მიწების საკითხს. ფეოდალური სისტემით დესპოტურად მართულ აფხაზებს, ვიმეორებ, არ ჰქონდათ მიწის ფლობის უფლება. ერთ მშვენიერ დღეს, თუკი მთავარს მოესურვებოდა, შეეძლო მიწას მოეშორებინა გლეხი, რომელმაც საკუთარი შრომა და ოფლი შესწირა მამულს. რუსეთის მიერ განხორციელებული ანექსიის შემდეგ, 1864 წელს კულტივირებული მიწები დარჩა მფლობელთა ხელში, ხოლო დამუშავებელი – მოგვიანებით ქვეყნის მცხოვრებთა შორის განაწილების მიზნით – დროებით კონფისკაციას დაექვემდებარა; ამგვარი დაყოფა ახლაც გრძელდება. ამ ღონისძიების თავდაპირველი შედეგი იქნება იმ გაუთავებელი კამათის შეწყვეტა, რომლის მეშვეობითაც აფხაზები მუდმივად აცხადებენ თავს ამა თუ იმ მიწის მესაკუთრედ, მაშინ, როცა მათ არანაირი კანონიერი მფლობელი არ ჰყავთ; ეს ასევე მნიშვნელოვანწილად გაამდიდრებს ქვეყანას და დამუშავდება ის მიწები, რომლებიც აქამდე არ ყოფილა პროდუქტიული. ყველა ალბათობით, აგრარული კომისია, რომელსაც მიანდეს მიწების გაყოფა-განაწილება, არ იქნება სრულიად უნაკლო; უცდომელი კრიტერიუმების არქონის გამო, ის იმოქმედებს თვითნებურად – ვიღაცას მიანიჭებს უპირატესობას, ხოლო სხვას – დაჩაგრავს. თუმცა მაშინ, როცა ეს ყველაფერი აღსრულდება, ფაქტად იქცევა ის, რომ, ასე თუ ისე, თითოეული ადამიანი იქნება მიწის მფლობელი. თავადებს ექნებათ ტიტულისა და თითოეული მამულიდან გათავისუფლებული ყმების რაოდენობის შესაბამისი პროპორციული წილი. უწინდელი ბატონების შთამომავლები უდავოდ მიიღებენ მათ მიერ დადასტურებულ მამულებს; შემდეგ თითოეული ნაკვეთის საზღვრები დადგინდება და ქვეყნის თავადაზნაურობას რუსეთის იმპერიის დანარჩენ არისტოკრატთა მსგავს პირობებში ჩააყენებენ.

ფეოდალური წყობილების დროს აფხაზეთის მოსახლეობა მრავალ კატეგორიად იყოფოდა. პირველ ყოვლისა, კეთილშობილთა შორის იყო რამდენიმე

კლასი; პირველი შედგებოდა მთავრის, მისი ცოლის, ვაჟებისა და ასულებისაგან; მეორე შედგებოდა აჭუს ოჯახთან დაკავშირებული იმ პირებისაგან, რომელთა სიკვდილ-სიცოცხლეს მის ხელში იყო; მესამეს მიეკუთვნებოდნენ წარჩინებული ოჯახები და მეოთხეს – უბრალო თავადაზნაურობა. არისტოკრატისა და ხალხს შორის იდგნენ უბრალო შინაყმები, ერთგვარი მილიცია, რომელიც ვალდებული იყო, ყოველთვის მზად და შეიარაღებული ყოფილიყო. დაბოლოს, უბრალო ხალხიც, თავის მხრივ, იყოფოდა კატეგორიებად: თავში იყვნენ ანღაივები (Anghaivè), ანუ მშრომელები, რომელთაც, გარდა ხვნა-თესვისა და მოსავლის აღებისა, თავისი დროის ბატონპატრონობა და ბატონის შეცვლაც შეეძლოთ; მეორე რანგს მიეკუთვნებოდნენ დაქორწინებული ანხაიუ (*ankhayu*) ყმები, რომელთა სამუშაო ექვსი დღიდან სამი ბატონის საკუთრება იყო; ისინი წურავდნენ და აბინავებდნენ ღვინოს; ყველაზე ქვემოთ იდგნენ აგკაჩალები (*agkachali*) – უბრალო მონები, რომელთაც ცხოველებზე ნაკლებ პატივს სცემდნენ. ისინი ხშირად ომის ტყვეები იყვნენ ხოლმე. თხუთმეტი წლის ასაკამდე მონები ატარებდნენ ახაშვალას (*akhashwala*) სახელს; დაქორწინებისას, ბატონის მოვალეობა იყო, სქესის შესაბამისად, მათთვის ქმრის ან ცოლის ყიდვა – ამით მათ რანგი უმაღლდებოდათ და ხდებოდნენ ახოუიუ (*akhoyu*) და მხოლოდ ამის შემდეგ შეეძლოთ საკუთრების ქონა.⁴

1871 წლის შემდეგ გათავისუფლებული გლეხები თანასწორნი არიან; თუმცა, რადგანაც დიდად არა უწყიან რა ამ ცვლილების შესახებ, კვლავაც ისეთივე მორჩილნი და შეშინებულნი დარჩნენ, როგორებიც ყმობისას იყვნენ. ისევე, როგორც თავად-აზნაურთათვის, მათ შორის მიწის განაწილება, მათი ადრინდელი სტატუსის მიხედვით უნდა მომხდარიყო. მაშინ, როცა ყოველი წარჩინებული ოჯახი იღებს 100-იდან 250-მდე დესეტინას (ეს ცოტა მეტია, ვიდრე ჰექტარი) და ყოველი თავადი – 25-იდან 150-მდე, ანღაივების (*anghaivè*) თითოეული ოჯახი მიიღებდა 10-იდან 12 დესეტინამდე, ყოველი აგკაჩალი (*agkachali*) კი – ინდივიდუალურად 3-5 დესეტინას. ამ უკანასკნელ კლასს უკეთ ექცევიან, ვიდრე მშრომელებს, იმ მიზეზით, რომ ისინი მიწას ამუშავებდნენ და შეეძლოთ საკუთარი შრომით სარგებლის მიღება, მაშინ როცა უბრალო მონებს არ ჰქონდათ არაფრის უფლება და არც არაფრის დაბოგვა შეეძლოთ.

შარშანდელს შემდეგ ხელახლა გადაანაწილეს მიტოვებული მიწები, რომლებიც ქვეყნიდან წასულ აფხაზებს დარჩათ. აქ გაბატონებული სიღარიბის მიზეზი სწორედ ეს მიწებია, რომლებიც ჯერაც არ მუშავდება.

მინდა აღვნიშნო, რომ ყველა ტრანსკავკასიურ ოლქს შორის აფხაზეთი იქნება უკანასკნელი, რომელიც ინდივიდუალური თავისუფლებისგან სარგებელს

4. აფხაზური სიტყვები აქ წერია მათი უღერადობის მიხედვით, რადგანაც ენას არ აქვს არანაირი წერიითი ფორმა.

მიიღებს; ამის მიზეზი ისაა, რომ უკანასკნელი აჭუ, რომელიც რუსეთის ვასალი გახდა, კვლავაც უფლებამოსილი იყო, გაეგრძელებინა ქვეყნის მართვა და არ აპირებდა რაიმე ცვლილება შეეტანა სისტემაში, რომლითაც ქვეყანა ოთხი საუკუნის მანძილზე იმართებოდა. სწორედ ამიტომ ვერ შეიცვალა რეგიონში წარმოდგენილი სიველურე. აფხაზეთს, როგორც აღვნიშნე, არ გააჩნია დამწერლობა;⁵ მისი სამეტყველო ენა, გაუგებარი თვით უახლოესი მეზობლებისთვისაც კი (სამურზაყანოში მეგრულად ლაპარაკობენ) სხვა არაფერია, თუ არა ხორხისმეირი და მსტვინავი ბგერების ერთობლიობა, ძალიან მცირე სიტყვებისგან შექმნილი კილოკავი, ჰარმონიაში მყოფი ამ ხალხის იდეებისა და საჭიროებების უკიდურეს სილატაკესთან, ჯერაც ნახევრად პრიმიტიულ დონეზე რომ რჩება. არ არსებობს ფრაზები თვით უმარტივესი რაღაცების აღსანიშნავადაც კი. აფხაზებს არ ესმით არც დროის დანაწილება და არც წელიწადის დროებად დაყოფა. ასე მაგალითად, მათთვის დღე იწყება მზის ამოსვლასთან ერთად და მთავრდება ჩასვლით. შეუძლიათ გაარჩიონ ზამთარი ზაფხულისაგან, მაგრამ არა – გამაფხული შემოდგომისგან. მოკლედ, ადგილობრივი თავდაბნაურობა, რომელსაც რუს არისტოკრატიასთან შერწყმას უპირებენ, ვერ შექმნის განსაკუთრებულ ფალანგს იმპერიის ელიტურ საზოგადოებაში.

აფხაზი ბატონი საკმაოდ უნიკალური ინდივიდია, რომლის წარმოდგენა მაშინაც კი ჭირს, როცა თქვენთვის ნაცნობია დაუდევრობის, უმეცრებისა და სიბინძურის ნაზავი, რომელშიც ეს შესანიშნავი არსება ცხოვრობს. არ დაგავიწყდეთ, რომ მიწათმფლობელთა ეს პრივილეგირებული კასტა არ ფლობს არანაირ სიგელ-გურჯებსა და ეტრატებს; ტიტულები სრულიად უბრალოდ მიეწერებათ ქვეყნის ზეპირი ტრადიციით, ასე რომ, ბევრ შემთხვევაში ზემოაღნიშნული კომისიის მუშაობის უამს, ამ მთავრებს ძველმანებში და ამ დაკონკილ თავადებს მათი უფლებების აღიარებისთვის უწევთ მიმართონ იმ ცოცხალ რეგისტრატურას, რომელსაც ეწოდება ხალხის მეხსიერება: *Vox populi, vox Dei!*

თუკი ერთმანეთს შეადარებთ ამ სამ, ერთმანეთის მომიჯნავე პროვინციას: სამეგრელოს, სამურზაყანოსა და აფხაზეთს, შეიძლება თქვათ, რომ მათი ცივილიზაციები ისევე არიან დაწინაურებულნი, როგორც მათ გარშემო აღმართული მთების კულტურა. სამეგრელოს, რომელიც სოციალურად ასე თუ ისე განვითარებულია, აქვს ტყით დაფარული, შემოსავლიანი სიმაღლეები; საკმაოდ ჩამორჩენილი სამურზაყანო ნახევრად ველურ ლანდშაფტს წარმოადგენს. დაბოლოს, აფხაზეთს, რომელიც ყველაზე პრიმიტიულ მდგომარეობაშია, აქვს ადამიანისგან სრულიად ხელშეუხებელი, დაუმუშავებელი მთების უთავბოლო მასივი.

5. იყო ერთგვარი, ამაო მცდელობა დამწერლობის შექმნისა, რომელიც შეესაბამებოდა ამ მსტვინავ ბგერებს.

მიუხედავად იმისა, რომ ხასიათით ბევრად უფრო უხეშები არიან მეგრელებზე, რომლებიც გაშლილ რეგიონში სახლობენ და მეზობელი მიწების მცხოვრებთაც უკეთ უკავშირდებიან, სამურზაყანოს მთიელნი უფრო მეტად ჰგვანან ძველ კოლხებს, ვიდრე აფხაზებს. ზემოთ უკვე ვთქვი, რომ მათი ენაა მეგრული, რომელიც ქართულიდან მომდინარეობს და იმავე ანბანით იწერება. ამასთან, ორივე ხალხი მართლმადიდებელი ქრისტიანია, მაშინ როცა აფხაზეთში გვხვდება რეგიონში გაბატონებული ორი რწმენის – ისლამისა და ქრისტიანობის ნარევი.

თუმცა, სამურზაყანოელები გულში მთლად რელიგიურები არ არიან, კულტის შეგრძნება ნაკლებად აქვთ და ეკლესიაშიც იშვიათად დადიან. თვალწარმატცი სოფელი ოქუმი, გაშენებული იმავე სახელწოდების მდინარეზე, ამ პროვინციის მთავარი დასახლებაა. 1876 წლის მაისში ამ ადგილის მოსახლეობა შეადგენდა სამი ათას სულს. უმრავლესობა იყო მთავარი ან თავად-აზნაური და ყველა მათგანი ფლობდა დიდებულ მამულს, რომლებიც არ იცოდნენ, როგორ გამოეყენებინათ. სიმინდი, აქა-იქ ცოტაოდენი ხორბალი, რაც, ვიმეორებ, სულ ესაა, რაც ამ არაჩვეულებრივად მორწყულ ნიადაგზე მოჰყავთ, რომლის მკერდიდანაც გონივრულ კულტივაციას შეეძლო აურაცხელი სიმდიდრის მოყვანა. რაც შეეხება რეგიონის გლეხობას, მათი ქონება შედგება მსხვილფეხა საქონლისაგან და თუ შეხედავთ მობალახე პირუტყვს, მოგაგონდებათ ბიბლიური ფარა – მათაც თითქმის იგივე თვისებები აქვთ. თხისა და ცხვრის ფარა მუდმივი და ყურადღებიანი თვალთვალის საგანია, ხოლო ძროხა, ცხენი და კამეჩი თავის ნებაზე დაიარება; ესაა მიზეზი ხშირი და იოლი ქურდობისა, რაც ცალმხრივი არ არის და რის შესახებაც უკვე ვისაუბრე.

ზედმეტად ცრუმორწმუნე და ავი თვალის შიშით მუდმივად გატანჯული მწყემსები ჩართულნი არიან სხვადასხვა პრაქტიკაში, რომლებიც უზენაესად ითვლება მათ შორის. სწორედ ამიტომაც, რომ, მაგალითად, როდესაც ცხოველები ზღვისკენ მიჰყავთ მარილის გასალოკად, თვითონაც იწყებენ მარილიანი წყლის დაღევას. თუკი ცხოველს გაყიდიან, მაშინ ცოტა ბალანს ამოაგლეჯენ ხოლმე, როგორც თილისმას, რომელმაც დანარჩენი პირუტყვი ავი თვალისგან უნდა დაიცვას. ფულს არ იყენებენ და ნივთების გაცვლას აგრძელებენ: გარკვეული ოდენობის არაჟანს ცვლიან ქათამში, რამდენიმე ღორს – ტანსაცმელში, რომლისთვისაც ქალები ქსოვილს ართავენ და ქსოვენ.

ზოგადად, ზარმაცი და უსაქმური სამურზაყანოელი, მისი ორი მეზობლის, მეგრელის და აფხაზის მსგავსად, ცხენის ცნობილი ქურდია და ეს ვნება არის კიდევ ქვეყნის ჭირი და რისხვა. ასე რომ, მთავრობამ, იმისთვის, რომ მდგომარეობა შეემსუბუქებინა, აამოქმედა სასჯელი, რაც ამ მთიელთათვის საშინელი რამ არის, კერძოდ – გადასახლება რუსეთში. ადგილობრივს გული მისდის საკუთარი ოჯახიდან შორს, მოშორებულ გუბერნიაში, პოლიციის თვალთვალსა თუ იმ რუსთა შორის ცხოვრების წარმოდგენაზეც კი, რომლებისაც ეშინია. ამ ტიპის

სადამსჯელო კოლონიები დასახლებულია მთავრებითა და თავად-აზნაურებით, საზოგადოების იმ კლასით, რომელიც ზემოხსენებული ქურდობისთვის ბრალდებულებს ამარაგებს დამნაშავეებით. თუკი გადასახლებულს აქვს რაიმე, რითიც ცხოვრობს, მაშინ ის თავად აუდის საკუთარ საჭიროებებს, სხვა შემთხვევაში, სახელმწიფო აჭმევს მას და არც მოელის, რომ იმუშავეს.

ასე გადასახლებულ სამურზაყანოელთა უმრავლესობისთვის, რუსეთში დროებითი გადაცხოვრება ერთგვარად წესრიგთან შეგუების წინაპირობაა, ეს ასევე არის ელემენტარულ ცივილიზაციასთან პირველი შეხებაც. ზოგიერთი მათგანი, მაგრამ ეს მხოლოდ უმცირესობაა, ისე კარგად ეგუება გადასახლებას, რომ როგორც კი უბრუნდებიან თავიანთ მთებს, სხვას ვერაფერს ჰკიდებენ ხელს და ისევ ქურდობენ, იმ ერთადერთი მიზეზით, რომ უკან, რაც შეიძლება შორს გააგზავნონ, რისიც მანამდე ისევე ეშინოდათ, როგორც ციმბირისა.

სამურზაყანოს 24 ათას სულ მოსახლეზე 1876 წელს ჰქონდა ვაჟთა ხუთი სკოლა, იმავე რაოდენობის საცხოვრებელი სახლით იმ ბავშვებისათვის, რომელთა მშობლები არ ცხოვრობდნენ სკოლის ახლოს. თუმცა, ჯერაც არ გაუხსნიათ არც ერთი სკოლა გოგონებისთვის – არც სამურზაყანოში და არც აფხაზეთში, გარდა სოხუმ-კალესი. იმ დროისთვის ოქუშის სკოლაში 76 მოწაფე სწავლობდა; იქ არსებული პანსიონი, რომელიც გარშემო მოსახლე ხალხის შემწეობით აშენდა, საკმარისი იყო მხოლოდ 40 მოწაფის საცხოვრებლად. ეს საცხოვრებელი აუცილებელია ქვეყანაში, სადაც გზების ცუდი მდგომარეობა და ადიდებული მდინარეები ხშირად აბრკოლებს სკოლაში სიარულს. იგი უღატაკესი ბავშვებისთვისაა განკუთვნილი და ნებაყოფლობითი შემოწირულობებით არსებობს, თითოეულისთვის თავისი წილით; მრავალი მტკიცებულება გვაქვს, რომ სწავლის ღირებულებას და ამით მიღებულ სიკეთეს რეგიონის ხალხი გულწრფელად აფასებს.

ოქუშის სკოლაში, რომელიც ახლა ოცდაათი წლისაა და კარგად იმართება, პროგრამები იმდენად საფუძვლიანადაა შედგენილი, როგორც შესაძლოა იყოს ცენტრიდან ასე მოშორებულ სოფელში: კითხვა, წერა, არითმეტიკა, ელემენტარული გეომეტრია, ხატვა, გეოგრაფია, რელიგიის ისტორია, ლექსიკონები, ბიბლიური ნაწარმოებები – ამ საგნებს რუსულად ასწავლის ორი ოსტატი, ტფილისში გაზრდილი სამურზაყანოელი და რუსი. ასევე, ისწავლება სიმღერისა და ფიზკულტურის კურსი. ყოველ დილით, ლოცვის შემდეგ სიას კითხულობენ და თუკი რომელიმე ბავშვი აცდენს საპატიო მიზეზის გარეშე, მაშინ მშობელი ჯარიმის სახით ათ კაპიკს უხდის სკოლის ხაზინას. ჩემი პირველი სტუმრობისას მოწაფეები მღეროდნენ „პუშკინის ოდა იმპერატორს“ და რამდენიმე მეგრულ და ქართულ სიმღერას; მაგრამ, უნდა ითქვას, რომ ქოროს აშკარად აკლდა ჰარმონია; როგორც ჩანს, ეს ხალხის მუსიკალური სმენით არ გამოირჩევა.

ოქუშის სკოლიდან, სადაც სწავლა უფასოა, მოწაფეები, ჩვეულებრივ, გადა-

დიან სოხუმის სკოლაში, იქიდან კი, სტავროპოლში, გარდა იმ შემთხვევებისა, თუ არ სურთ სწავლის გაგრძელება რუსეთის რომელიმე გიმნაზიაში.

ოქუმს, ასევე, აქვს მშვენიერი ეკლესია, სადაც წირვა-ლოცვას ატარებს ორი მღვდელი, ერთი – რუსულად, მეორე კი – ქართულად; ეს უკანასკნელი არის სამურზაყანოს ეკლესიების წინამძღვარი, ყველა მათგანი კი, მსგავსად სკოლებისა, დაფუძნებულია ტფილისური საზოგადოების მიერ. პატარა ქალაქს ასევე აქვს ბაზარი, სადაც დახლის მფლობელების უმრავლესობა მეგრელია. სამურზაყანოელები არ ერთვებიან ვაჭრობაში; მცხოვრები და მჭედელი ბერძნები არიან; თურქებმა, შესაძლოა, აქ ფეხი ვერ მოიკიდონ, თუმცა კი თავს კარგად გრძნობენ აფხაზეთში, სოხუმში, ოჩამჩირეში, გუდაუთასა და ბიჭვინთის რაიონში. თითოეული სამურზაყანოელი ოჯახი მთავრობას წლიური გადასახადის სახით უხდის ორ რუბლს. სამხედრო ბეგარა ჯერაც არ დაუწესებიათ, თუმცა, ომის დროს ყველა ჯარისკაცია. ადგილობრივი მილიცია ცნობილია თავისი სიმამაცით, რაც ბევრჯერ დაუდასტურებიათ. განსაკუთრებით, 1841 წელს, დაღის, ჩერქეზეთის მეზობელი სოფლის (მდებარეობს სოხუმ-კალედან 60 ვერსში) აჯანყების დროს; ამის შემდეგ ისინი თვით იმპერატორის წითელი აბრეშუმის დროშითაც კი დააჯილდოვეს, რომელზეც გამოსახულია წმ. გიორგის მიერ დემონის ძლევა, ქართულ და რუსულენოვანი წარწერებით. არსებობს იდეა, სამურზაყანოშიც ჩამოყალიბდეს რეგულარული მილიცია, ისეთი, როგორიცაა ქუთაისისა და დაღესტანში.

ოქუმი რუსეთის შექმნილია. შერვაშიძეთა ოჯახის უფროსები ცხოვრობენ ნაბაკეში, ენგურის ნაპირზე, ორსანტიასა და იმ ადგილს შორის, სადაც მდინარეს შენაკადი ერთვის. ეს პატარა სოფელი მდებარეობს თვალწარმატად ადგილას; ერთ მხარეს იშლება დაახლოებით 25 ვერსის სიგრძის ველი, რომელიც მთავრდება შავი ზღვით; დანარჩენ სამ მხარეს კი აღმართულია უღრანი ტყით დაფარული მთები; ერთ-ერთ მათგანზე უხვად იზრდება ბალახით მცენარე, რომლითაც ისინი სახლებს ფარავენ და რომლის მოსაგროვებლადაც ყველა მხრიდან მოდიან. ამ მაღლობის სიახლოვეს მდებარეობს ციხესიმაგრე რეჩხის ნანგრევებიც.

უკანასკნელი ომის შემდეგ ოქუმი სავალალოდ შეიცვალა. მოსახლეობა იქ ათჯერ შემცირდა, მინდვრები დაცარიელდა, ბაზარი გაუდაბურდა და სიღატაკე მეფობს. სკოლას აღარ ჰყავს რეზიდენტი ოსტატი და მხოლოდ ინსტრუქტორის იმედადაა, ვინც ბედიაში ცხოვრობს და იმ ცნობილი ცხენის ქურდის ვაჟია, რომელმაც 1876 წელს მიმასპინძლა. ახლა ნანგრევებად ქცეული სახლი სკოლის გვერდით, რუსეთ-თურქეთის 1877-78 წლების ომში საავადმყოფოს ფუნქციას ასრულებდა.

მართალია, ადგილობრივ მთავართა ოჯახებში გულწრფელ მასპინძლობას მიწევდნენ, მაგრამ არანაკლებ გულითადად მიღებდნენ სხვადასხვა ოლქის რუსი მმართველები. და იმ ტურის შემდეგ, როცა გადავეყარე როგორც თავად-აზნაურებს,

ისე გლეხებს, ერთადერთი შიში მეუფლებოდა ხოლმე – სიმინდის უცვლელი შეჭამადისა და ენიგმატური რაგუსი, რომელშიც კრთებოდა სქელი ცომის ნაფლეთები და თითები, და რაოდენ სასიამოვნო სიურპრიზი იყო დაჯდომა მაგიდასთან, სადაც ცივილიზაცია დაბრუნდა. სწორედ ასე მოხდა პირველად ოქუმში, ოლქის მმართველის სახლში, რომელსაც კაზაკი მზარეული ჰყავდა, სახელად ადამი, რომლის კულინარიული ნიჭი დაამშვენებდა კასეროლის ნებისმიერ ცნობილ მზარეულს. ასე რომ, კვლავ მქონდა ნამდვილი თეფში, ნამდვილი საწოლი და არა ხის მორები, სუფთა ფარდები თუ ბალიშის პირი, რომელსაც მანამდე არავინ მიჰკარებოდა და ჯერაც დაულაქავებელი პირსახოცი! და ამ ყველაფერზე უკეთესი იყო ის, რომ გავიცანი ოლქის უფროსის ცოლი, რომელიც ლაპარაკობდა ფრანგულად, მეგრულად, რუსულად და შეეძლო ყოფილიყო ჩემი მეგზური. მან ასევე მაცნობა ზოგიერთი ადგილობრივი სიახლის შესახებ, რომელსაც განიხილავდა ოლქის მმართველი. ამ მიზნით, მის კანცელარიასთან, რომელიც ამავე დროს სასამართლოც იყო, თვეში რამდენჯერმე იკრიბებოდნენ სასამართლოს იქაური მოსარჩელები, რათა თარჯიმნის პირით შეეტყვოთ რუსი მმართველის განაჩენი, რომელმაც ხშირად მათი ენაც კი არ იცოდა. ამ ოლქებში, სადაც უცხოელი დიდი იშვიათობა იყო, ჩემმა ჩასვლამ, გარკვეულწილად, სენსაცია მოახდინა: ჩემს მარშრუტს ყველა ცნობისმოყვარედ აკვირდებოდა, რასაც, უნდა ითქვას, რომ ამსუბუქებდა პატივისცემა და თავაზიანი მანერები, თავშეკავებისა და მოწიწების ატმოსფერო, რაც ამტკიცებდა იმას, რომ ამ ხალხს, ვისაც ჯერაც არ დაუღწევია თავი ბავშვობისთვის, აქვს ზრდილობის ინტუიციური გრძნობა და თანდაყოლილი განსაკუთრებულობა.

სამურზაყანოელ ქალებს აქვთ ლამაზი გარეგნობა, ისეთი, რომ ხშირად ანგლოსაქსებს მოგაგონებთ. კაცები, თუმცა კი ცუდად ნაკვებები, მაგრამ ღონიერები არიან, თეთრი პირისახითა და ლურჯი თვალებით. მეგრელთა მსგავსად, ისინიც იცვამენ ჩერქეზულ ჩოხასა და ყაბალახს (ქუდი). ქალები არ ატარებენ ეროვნულ სამოსს, ისინი ევროპულ სტილზე, მეტად შესაბრალისად იცვამენ. რაც შეეხება თმას, ჩამოკიდებულ კულულებს ან ნაწნავს ზემოდან, თავზე იხვევენ ფერად თავსაფარს ან, როცა თავს იბანენ, თეთრ მანდილს იხურავენ. მათი სქესისთვის ბუნებრივმა სიკეკლუცემ ასწავლა თავის გალამაზების შემპარავი ხერხები, რაც გამოიხატება ფერ-უმარილის ჭარბ მოხმარებაში. მათი „მათეთრებელი“ მზადდება ცხვრის ქონისგან, რომელსაც უმატებენ კალის ფხვნილს და ცოტაოდენი ოქროს ნამცეცებს და იღებენ საცხს, რომელიც აყვითლებს და ანაოჭებს მათ პირისახეს, და როცა არაფერი უსვიათ, სახე კომშს მიუგავთ. წარბების შესაღებად იყენებენ კვიპაროსის ნაყოფის ნახარშს. დაბოლოს, მათი ფერ-უმარილი არის კენკრის წვენი, რომელსაც ამ ქვეყანაში ეძახიან ალაჩისფერს (*alachisperi*). ეს სხვადასხვა ინგრედიენტი საგულდაგულოდ აქვთ შეხვეული ჭუჭყიან ძონძებში და ინახავენ ტანსაცმლის იმ ნაწილში, რომელსაც ინგლისურად ჰქვია „ნიფხავი“. სარკედ ჩვენი ლამაზმანები იყენებენ ახლომახლო

წყაროს და მათთვის ჩვეული რამაა „საქმის საკეთებლად“ განმარტოება და ანკარა წყლის პირას ერთმანეთთან მოულოდნელად შეხვედრა. ნება მიბოძეთ დავამატო, რომ ქალები აქ ჩართულნი არ არიან მძიმე შრომაში, რაც არ უშლის ხელს მათ იყვნენ ძალიან ქმედითები და იმუშაონ უფრო მეტი, ვიდრე – კაცებმა. ასევე, იმედია, განათლების სიკეთეები მალე მათზეც გავრცელდება.

ექსკურსია სამურზაყანოსა და აფხაზეთში:

ნაწილი II

სოფლები ეშქეთი და ბედია – ჟანრობრივი ჯგუფები და სურათები – ქვეყნის მთავართან სტუმრობა – ცეკვა და გართობა – ბედიის ყოფილი მონასტერი – ანტონ შერვაშიძე – მთებითა და უღელტეხილებით – ტყვარჩელის გოგირდის აბანოები – ქორწილი აფხაზეთში.

მართალია, გზები დიდი იშვიათობაა სამურზაყანოში, მაგრამ, სამაგიეროდ, ბუნებას შეუძლია მგზავრი გაართოს თავისი დიდებულებით. არაფერია უფრო მდიდარი და მრავალფეროვანი მცენარეული საფრის თვალსაზრისით, ვიდრე მაღალ ხეტა ეს ტყეები და ვაზით მორთული ეს ტევრები, რომლებიც თითქოს პარკებს ქმნის; ამ სქელ ფოთლეულში კი გზის გაკვლევა გიჭირთ. თითქოს ეს არ იყოს საკმარისი, სოფელ ოქუშის დატოვების შემდეგ გიწევთ იმავე სახელწოდების მდინარის გადალახვა, რომელიც სათავეს მეზობელი მთებიდან იღებს და თავის უშველებელ ღოდებიან კალაპოტში სულ მალე იქცევა ყალყზე შემდგარ, სწრაფ და ბობოქარ დინებად. ის ახალ შესაძლებლობებს აძლევს მოგზაურს, ჯერ კიდევ გამოუცდელ მხედარს, რომ გაიწაფოს და გაუმკლავდეს გასაჭირს; მთები კი, თავ-გადასავლებით რომ კვებავენ ნაკადებს, ყოველთვის ადვილად არ ატარებენ მათ. მეც არ ვყოფილვარ მშვიდად, როცა ნოემბრის ერთ ღამეს გადავკვეთე ოქუში იმისათვის, რომ მზის ამოსვლისას ვყოფილიყავი იმ ადგილას, საიდანაც ხედების ფოტოების გადაღებას ვაპირებდი. ამ გარემოებათა გათვალისწინებით, იძულებული ვიყავი დამექირავებინა ჩაფარი, ბაჩო სურგულაძე, თან რომ მახლდა და თავისი სიმარჯვით იხსნა კიდევ ჩემი სიცოცხლე. მაგრამ, როგორც უკვე აღვნიშნე, რელიეფის სირთულის მიუხედავად, ქვეყანა, მართლაც, სრულიად უსაფრთხოა. არ უნდა გეშინოდეთ კეთილი და მშვიდობიანი მოსახლეობისა. არც ვიგინდარები არიან გზაზე და არც არანაირი ქურდის აჩრდილია ჰორიზონტზე. თვით ხმაურიანი ჩხუბებიც კი ბევრად უფრო ცოტაა აქ, ვიდრე ევროპაში. და მიუხედავად იმისა, რომ ყველა შეიარაღებულია, აქაურთა შორის დავის გადაწყვეტა იშვიათად ხდება პისტოლეტის სროლითა და ხანჯლის მოშიშვლებით.

მართალია, დაუმუშავებელია, მაგრამ ქვეყანა მთლიანადაა დასახლებული; აქ მხოლოდ პატარა, მოშიშვლებულ დასახლებებს შეხვდებით, უბრალო წნულებით აგებული ხის სახლებით ან ქოხებით, რომლებიც უშველებელი მინდვრებითაა გარშემორტყმული; ეს მიწები მამიდან შვილს ისე გადაეცემა, რომ შემდეგი თაობები ბევრს არაფერს ცვლიან.

ოქუმიდან ცოტა მოშორებით, ვაკე ადგილას მდებარეობს ლაკერბეების, ქვეყნის ერთ-ერთი მთავარი ოჯახის საგვარეულო სასაფლაო; მათ მსგავსად, სხვებსაც აქვთ მონიშნული დასამარხი მიწა, რომელიც ისევეა მიმობნეული სოფლების სიახლოვეს, როგორც საცხოვრებლები. ლაკერბეების ოჯახის ახლანდელმა თავმა მაჩვენა მამამისის საფლავი, რომელიც გარდაცვლილის გამზრდელის განსასვენებლის სიახლოვეს იყო მოწყობილი. უკვე აღვნიშნე, თუ როგორ დიდ პატივს სცემენ ამ ქალებს მათი აღზრდილები.

იქვე, სიახლოვეს დაინახავთ მშენებარე ეკლესიას, რომელსაც მთავარი ემუხვარი აგებს.

ამ რეგიონში სასაფლაოები მიანცდამიანც არ აღძრავს მეღანქოლის; მათ არ ფარავს საფლავის ქვები თუ მავზოლეუმები; საფლავები დაფარულია მცენარეებით და ყოველთვის კვადრატული ფორმისაა, თითოეული მათგანი კი გარშემორტყმულია ხის ბარიერებით, ანდა ისეთივე წნულით, როგორიც მათი სახლის კედლებია. ასევე, ხშირად, მიცვალებული დამარხულია ოჯახის მამულში, საცხოვრებელი სახლის სიახლოვეს. შესაძლოა, მათთვის, ვინც დაკარგა საყვარელი ადამიანი, ერთგვარად მეღანქოლიურად მომხიბვლელია იცოდნენ, რომ ის ახლოს განისვენებს.

რადგანაც ამინდი ჯერაც რბილი და ნათელია, ვისარგებლე მთვარიანი ღამით და გზა განვაგრძე ეშქეთისაკენ, მომხიბვლელი ადგილისაკენ. წინასწარ მაცნობეს, რომ ყველაფერი მზად იყო ჩემ მისაღებად სტარშინას (მერის) სახლში, სადაც საკმაოდ გვიან ჩავალწიე. ყველა ჯერ კიდევ ფეხზე იყო და მელოდა. ქოხის შუაგულში დიდი ცეცხლი იყო გაჩაღებული, ოჯახი კი ვახშამს ამზადებდა. მალევე გამიმასპინძლდნენ საუცხოოდ შემწვარი ქათმით, შეუცვლელი სიმინდის შეჭამა-დითა და კარგი ღვინით. მიუხედავად იმისა, რომ ჩემმა ჩასვლამ მნიშვნელოვნად შეაწუხა ყველა, მათ მაინც თავაზიანად უბრწყინავდათ სახე.

ღიასახლისმა სტუმრების ღამისთევისთვის განკუთვნილ საპატიო ქოხში წამიყვანა. ჩემმა თანმხლებმა კაცებმა კი ქოხის გარეთ დალაგებულ ხის გრძელ სკამებზე გაიშალეს ლოგინი. მალევე ჩამეძინა ჩემი მეგზურების მონოტონური სიმღერის ჰანგებზე.

მზის ამოსვლისას, ვისარგებლე ქალებისა და ბავშვების მიერ შექმნილი საოცარი სანახაობით – ზღურბლზე მსხდარნი რომ არჩევდნენ მეზობელ მინდვრებში მოკრეფილ ბამბას. ცოტა გამიჭირდა ფოტოების გადაღებისას ისინი მშვიდად გამ-

ეჩერებინა; პირველი, რაც სურდათ, გაქცევა იყო, რადგან ჩემმა აპარატმა ძალიან შეაშინა.

იმ დილით მეზობლად მდებარე მინდორში ვისაუბმე, სადაც ზაფხულობით თამაში იმართება ხოლმე. ვიჯექი ბალახის გროვაზე, ნაყოფით დახუნძლული ვაზის ქვეშ, რომლის იისფრად დამწიფებულ ნაყოფს ჩემი მეგზურები კრეფდნენ, და ჩინებულ საკვებს ვიმზადებდი (15 ნოემბერი, 1981 წ.).

ყოველი თემის სტარშინა ვალდებულია, ხელისუფლების მფარველობით მოგზაური მოამარაგოს ცხენებითა და ჩაფრებით. ასე რომ, მეც ყველგან მხვდებოდა ცხენი და ესკორტი.

ეშქეთიდან ჩემი გამგზავრების დილას სტარშინამ ჩამაბარა მამაც ჩაფარს, რომელიც რუსულად ლაპარაკობდა და შესაბამისად, მასთან გასაუბრება შეეძელი. ეშქეთის დატოვებისთანავე გზა ხდება ძალიან ოღროჩოღრო და ამასთან, ძალიან თვალწარმტაცი. სოფელ ბედიასთან მიახლოებისას კი ბუნებაც იცვლება, რადგანაც იგი ველზე მდებარეობს. ადგილს, რომელსაც თავისი ეპისკოპოსი ჰყავდა (ვინც ატარებდა ბედიელის ტიტულს), უწინ ერქვა ეგრი, საქართველოს პირველი მეფის, თარგამოსის ვაჟის, ეგროსის სახელი; მოგვიანებით ქვეყნის სხვა ხელმწიფემ, მეფე ფარნავაზმა, ამ მხარის მშვენიერებით მოხიბლულმა, აქ თავისი რეზიდენცია დააფუძნა და თავდაპირველი სახელი შეცვალა სიტყვით – ბედია, რაც ნიშნავს „ბედს“, „ბედნიერებას“. დიდი და ძლიერი მონასტერი, რომლის ნანგრევებიც დღესაც არსებობს, აშენდა საქართველოს მეფის, ბაგრატ მესამის დროს (960-1014წწ.). მეფე აქვეა დამარხული.

როგორც ყველგან სამურზაყანოში, მოსახლეობის შეკრების ადგილი აქაც შენობათა კომპლექსია, რომლებიც ასრულებს სკოლის, მოსწავლეთა საცხოვრებლის და სტარშინას კანტორის ფუნქციას. ისინი ვაკე ადგილასაა აგებული და, ანტიკურ ბერძენთა და რომაელთა მსგავსად, ხალხი აქ იმისთვის იკრიბება, რომ დღის საქმეები და ზოგჯერ, პირადი ამბები განიხილონ. ეს ის ადგილია, საიდანაც ჩანს სტარშინასთან შემსვლელ-გამომსვლელთა სხვადასხვა ჯგუფი. იგი, თავისი გრძელი წვერითა და მცოვანი სახით, თავზე იხურავს თეთრ ყაბალახს უცნაური ნაკერებით, მხრებზე მორგებული აქვს მრგვალი, ბეწვიანი მოსასხამი (ოპა), ქამარში კი იარაღი უბზინავს. ამ ყველაფრით ის მოგაგონებთ თავისი ხალხით გარშემორტყმულ წარსული დროის ბელადს. მოხუცი კაცი ზის კართან, ხის სკამზე, აივანზე, რომელიც სამურზაყანო ყველა სახლის ფასადის განუყრელი ნაწილია, ხალხი კი ქუდმოხდილი, პატივისცემით დგას მის წინაშე.

სადმე, საოცარი კაკლის ხის ქვეშ არანაკლებ თვალწარმტაც სურათს დაინახავთ: ცხენოსანთა ჯგუფი ჩამომსხდარა და ისვენებს: თავადი, აზნაური და გლეხი, ყველანი იქ არიან; თანატოლნი და თანამონაწილენი მეზობელი სოფლიდან, ხშირად იმ განზრახვით, რომ ერთმანეთი დაადანაშაულონ: ამან – ცხენის მოპარ-

ვაში; იმან – ნახირის გარეკვაში; ერთმანეთს შეხვდნენ, მიესალმონ და სანამ გან-
ხილვა-გადაწყვეტილებას ელოდებინ, გულითადად საუბრობენ. ეს ადამიანები
წარსულში ცხენის სწრაფი ტენების დიდოსტატები იყვნენ და მართლა დიდებული
სანახავი იყო, როგორ ჩამოქვეითდა ერთ-ერთი ცხენოსანთა რაზმი. თუკი ვინმეს
ცხენი არ ჰყავს, ის აქ კაცად არც ითვლება; სხვები მას ძირისძირამდე ლატაკად
ჩათვლიან და სწორედ ამიტომ, იგი უყოყმანოდ ისარგებლებს შემთხვევით და
თავს ბედაურით დაისაჩუქრებს იმისგან, ვინც თავისზე უფრო იღბლიანად მიაჩნია.
ბედიას წილად ერგო პატივი, ქვეყანაში ყველაზე უფრო ცნობილი ცხენის ქურ-
დი ჰყავდეს; ის ყოფილი სამეფო შტოს წარმომადგენელია, რომელმაც, როგორც
ჩანს, ავლადიდება სწორედ სხვისი ცხოველების საკუთარ მამულში გადარეკვით
იშოვა. საცხენოსნო გმირობებმა მას რუსეთში ოთხწლიანი გადასახლება მოუტა-
ნა; მაგრამ ამ გაკვეთილს იგი დიდად არ შეუცვლია და ქვეყანაში დაბრუნების
მერე კიდევ უფრო ბედნიერად განაგრძო თავისი სარფიანი ვაჭრობა.

სწორედ ამ კეთილშობილი ცხენის ქურდის სტუმართმოყვარე ჭერქვეშ გა-
ვათენე ღამე ბედიასი ჩემი პირველი სტუმრობისას, 1876 წელს. ოჯახის წევრე-
ბის შინ არყოფნისას, ოჯახის უფროსმა გულითადად მიმიღო. შეძლებულთა და
ღარიბთა საცხოვრებლებს შორის არ არის დიდ სხვაობა; იქვე, სიახლოვეში, სა-
დაც ხეხილი იზრდება, ყოველთვის დგას ხის ქოხების ან პატარა სახლების ჯგუ-
ფი. ერთში ცხოვრობს ოჯახი; მეორეში სტუმრებს აბინავებენ; დანარჩენებში ცხო-
ვრობენ მრავალრიცხოვანი მსახურები. სამზარეულოს, ღვინოს, სურსათ-სანო-
ვარის მარაგს, ყველაფერს თავისი განცალკევებული ადგილი აქვს, რომელთაც,
იმავედროულად, დაქირავებულთა მოსასვენებლადაც იყენებენ. როდესაც ვინმე
უცნობი გამოჩნდება, მას, ჩვეულებრივ, იღებენ ოჯახის უფროსის საცხოვრებელში,
რომელიც, როგორც წესი, ორი უფანჯრო, მაგრამ ერთმანეთის საპირისპიროდ
განლაგებული კარიანი ოთახისგან შედგება. მთავარ ოთახში უმასპინძლებიან
და თუ სტუმარი გამორჩეულია, მაშინ მას იმავე ოთახში ძილის განსაკუთრებული
პატივი ხვდება წილად. ქვედა რანგის უცნობებს კი განცალკევებით აძინებენ.

ამ თავადური სახლების მთელი ავეჯი სხვა არაფერია, თუ არა ხის გრძელი და
ვიწრო სკამები, ზოგჯერ ძველი, გახუნებული და ნახვრეტებიანი ხალიჩით მორთუ-
ლი. თითოეულ ოთახს აქვს მაღალი ბუხარი, რომელთანაც დგას ნაცრითა და ათასი
სისულელით სავსე თასი და რომელშიც ყრია აქა-იქ გამოხრული ძვლები. ამ ქოხ-
ებში ყოველთვის უთვალავი ძაღლია, რომლებიც შემოდინ და იწყებენ ჩიჩქნას.
მათ სიახლოვეს დღედაღამ იღრინებიან ველური მხეცები. ჭამის დროს მსახურებს
შემოაქვთ სიმინდისა და ხორცის ულუფებით სავსე დაბალი მაგიდა და დგამენ
გრძელ სკამებთან, რომლებზეც მოსადილენი სხდებიან. იმ წეს-ჩვეულების მიუხ-
ედავად, რომლის მიხედვითაც ოჯახის უფროსი პურობისას ფეხზე რჩება, რომ სტუ-
მრებს მოემსახუროს, ჩვენმა მასპინძელმა, რომელსაც ძალიან სურდა ეჩვენებინა,

რომ რუსეთმა ცივილიზაციას აზიარა, სუფრასთან ჩვენ გვერდით დაიკავა ადგილი. ყოველთვის მემახსოვრება ახალგაზრდა კავკასიელი, რომელმაც თავადის სახლში მსახურის ფუნქცია შეასრულა. ამ მსახურისთვის „არაფერია იმგვარი, როგორც დიდებული კაცი“. ეს *valet de chamber*, რომელმაც ჩამოატარა ხელსაბანი და რომლის შესახებაც უკვე ვაცნობე მკითხველს, სრულიად განსხვავდებოდა საკუთარი რასისგან. დაახლოებით თხუთმეტი წლისა, გამხდარი, მაღალი, დიდი გაპარსული თავით, წარმოუდგენლად უხეში ფეხებით, ხელებითა და პირისახით, და ამ ყველაფერთან ერთად სიბრიყვის სურნელიც ასდიოდა. ის იყო სრულყოფილი სიმახინჯე იქ, სადაც სიმახინჯე, როგორც წესი, დაფარული რჩება ხოლმე.

ტანისამოსი საერთოდ არ იყო მის ტანზე შეკერილი. ატარებდა ახალუხს, ბამბის თეთრი ქსოვილისგან შეკერილ ერთგვარ პერანგს სახელოებით, რომელსაც ხანგრძლივი ტარების შემდეგ ზედ ყოველგვარი არაბესკი ჰქონდა აღბეჭდილი, ხოლო თავდაპირველი ფონი გაუჩინარებულიყო. ტოტებთან ფოჩებით დაბოლოებული, დაძონძილი ქსოვილის ქვეშ მისი მზით დამწვარი კანი მოჩანდა; ახალგაზრდა მსახურის აღკაზმულობას აგვირგვინებდა თავზე გადაფარებული ქსოვილის ტომარა, რომელსაც ყაბალახის (ამასთან, ხელსახოცადაც იყენებდნენ) ფუნქცია უნდა შეესრულებინა, ყელის გარშემო წითელი ტყავის ზონრით შეკრული და მხრებთან მოკრებილი შავი ოპა. ის, როგორც თავადის ნდობით აღჭურვილი პირი, ეხმარებოდა ჭიქების დამტარებელსაც (მერიქიფე სამეგრელოში), რომელიც ასევე მეტად ჭუჭყიანი იყო, მაგრამ სუფრასთან, ბატონის გვერდით თავის ადგილს მშვენივრად იკავებდა. სწორედ მან შემოიტანა სუფრაზე საპატიო კერძი (ბატკნის თავი და კუჭმაჭი), რომელიც ოჯახის უფროსმა, ღრმა პატივისცემის ნიშნად, საკუთარი ხელით უხვად მიართვა ყველას.

სამურბაყანოს თავადთაგან ყველაზე ქვემოთ მდგომს უამრავი მხლებელი ჰყავს და შეიძლება იკითხოთ, რა ფუნქცია აქვს თითოეულ მათგანს, ვინც, დაკონკილი და ბინძური, თავის ბატონს ფეხდაფეხ დაჰყვება და სტუმრის მიწაზე ფეხის დადგმისთანავე საათების განმავლობაში რჩება მოხრილი და კედელთან, კერიასთან ან კარის ღიობთან უმოძრაოდ ატუზული, მათრახით ხელში, მოკუმული მუშტით ხანჯალზე, რომელსაც აქ ქამარზე ყველა ატარებს. ამ ცოცხალი ქანდაკებების დანახვაზე მავანმა შეიძლება თქვას, რომ ეს ის ფიგურებია, რომლებსაც ვიყენებთ სალონების კუთხეებისა და ლავგარდნის თაროების მოსართავად. სიმართლე ისაა, რომ „მსახურთა“ ასეთი სიმრავლე ფეოდალური სისტემის გადმონაშთია, რომელიც ჯერ კიდევ გუშინ ყვაოდა ამ ქვეყანაში. ეს შეიარაღებული კაცები მახსენებენ შინაყმებს, იმ მცველებს, რომლებიც ყოველთვის იქვე, ხელმისაწვდომნი არიან. როგორც სამურბაყანოში, ისე აფხაზეთში ეს ყოველი თავადისა თუ აზნაურის სახლის დეკორაცია ან სავალდებულო მორთულობაა, თუმცა კი ბევრი მათგანი გარკვეულ წოდებასაც ატარებს. როგორც კი მთავარი სტუმრები დაასრულებენ ჭამა-სმას, და-

ქირავებულები იმავე სუფრასთან სხდებიან, მათი რანგის მიხედვით: ჯერ აზნაურები, შემდეგ კი ისინი, ვისაც არანაირი წოდება არ გააჩნია.

ამის შემდეგ ახალგაზრდა ლაქიამ საპატიო ოთახში ტახტი მომიმზადა, მაგრამ ზეწრის უბრალო შეხედვითაც კი მიხვდი, რომ რაღაც მწერებს წითელი წინწკლები დაეჩნია მასზე, ამიტომაც გადაწყვიტე, სულაც არ დავწოლილიყავი: ამ გადაწყვეტილებას კი შედეგად უძილო, თეთრად გათენებული ღამე მოჰყვა. ბედია ყველასთვის ნამდვილად არ იყო „ბედნიერების“ ადგილი.

სამურზაყანოს ამ კუთხეში, რეალურად, აქამდე შეუსწავლელში, კვლავაც ვიმეორებ, სტუმარმასპინძლობის ისეთი სული მეფობს, რომ ნებისმიერი მოგზაური, ჩამოსვლისთანავე გადააწყდება სტარშინას, რომელიც საკუთარ ჭერქვეშ სთავაზობს თავშესაფარს, თუკი ფიქრობს, რომ სტუმარი მასთან უფრო კომფორტულად იგრძნობს თავს. მასპინძელი, თუკი აირჩევნ, ამ არჩევანს დიდ პატივად მიიჩნევს და ყველაფერს აკეთებს, რომ უცნობის ნდობა გაამართლოს. აქ, 1876 წლის მაისში, კვირადღის მიწურულს მივედი და სამეგრელოს მსგავსად, აქაც მთელ ხალხს მინდორში, ერთად თავმოყრილს წავაწყდი. უბრალოდ, სამურზაყანოში ხალხი ნაკლებად მხიარულია და გართობაც უფრო უფერული. აქ ვერ შეხვდებით კოპწია მეგრელს, რომელიც ყველაფერს იღონებს, რომ თავი გამოიჩინოს და გამოეწყოს თავის ყველაზე ბრწყინვალე და ახალ სამოსში. სამურზაყანოელის საკვირაო ჩასაცმელი ყოველდღიურისაგან დიდად არ განსხვავდება; ეს ყოველთვის ჭუჭყიანი ძონძებია; ამათი შემხედვარე იტყოდით, რომ ორივე სქესს ამ საკითხში შეთანხმებისათვის მიუღწევიაო.

ცეკვის ტრადიციები აქ აფხაზურის მსგავსია. მას ერთი ან ორი ადამიანი ასრულებს. ნაბიჯს, წყვეტილსა და მხტომიარეს (ისინი ყოველთვის ტერფით ხტებიან), მოჰყვება შეყვირება მაყურებელთა მხრიდან, ვოკალური ორკესტრი, რომელიც არასოდეს ჩერდება, თუკი თავად მოცეკვავე არ გაჩერდება. ამგვარი ველური სიარულის მანერა სულაც არ არის ორიგინალობას მოკლებული; მკვეთრი, ხრინწიანი შეძახილები ტყეში ქარის სტვენას მოგაგონებს. რაც შეეხება ამ ქვეყნის ქალებს, ქცევასა და მანერებში ნაკლებად თავისუფალნი არიან, ვიდრე მათი მეზობელი მეგრელი ქალები და იშვიათად თუ აძლევენ თავს თამაშის უფლებას; იმ დღეს ჩემი იქ ყოფნა გახდა საჭირო იმისთვის, რომ ბუნებრივი სიმორცხვე დაეძლიათ.

ჩემ პატივსაცემად გამართულ გართობას თავისებური გემო დაჰკრავდა. სტარშინამ გახსნა ცეკვა და მიუხედავად ზურგზე წამოკიდებული სამოცდაათი წლისა, კარგა ხანს არ ჩამორჩა პარტნიორს, თავისი შვილიშვილის საცოლეს. ეს ქერა გოგონა, ლურჯი თვალებით, სქელი, მხრებზე დაყრილი ნაწნავებით, ცდილობდა რა, მოეშორებინა ნიკაპის ქვეშ გამონასკვული ხელსახოცი, გოეთეს მიერ გაიდევალებული გრეტჰენის სრულყოფილი სახე იყო, ოღონდ, ეს იყო გრეტჰენი

ძონძებში. გაცვეთილი ტანსაცმლის ნახევებში შეამჩნევდით მისი ქალწულებრივი გულის ფეთქვას. თეძოზე შემოდებული მარცხენა ხელით ქვედაბოლო აიწია; მარჯვენაში ეჭირა ხელსახოცი, რომლითაც ცდილობდა სახის დამალვას, რადგან სწორედ ასეთია აფხაზური ცეკვის წესი.

პირველი წყვილი სხვებმა შეცვალეს და დღესასწაული კი ღამემდე გაგრძელდა. არც ერთი საცეკვაო დარბაზი არასოდეს ყოფილა ისე განათებული, როგორც ჩამავალი მზის სხივებით გაცისკროვნებული ბედიის მდელო იყო იმ საღამოს. ამ თვალისმომჭრელი ჯადოსნური ცის აღწერა, რომელიც მრავალფერ და მუდმივად ცვალებად ანარეკლებს აფენდა მათათა ელვარე ფერდობებზე, ერთნაირად რთული იქნებოდა ფუნჯისა და კალმისათვის. ის ჰორიზონტი თავისი ფანტასტიკური მოცულობით, ის უზარმაზარი მინდორი, მომინანქრებული ყვავილებით, რომელიც იატაკის მაგივრობას უწევდა მოცეკვავეთ, იმ ჯადოსნურ ხეთა კორომები, რომლებიდანაც ვაზის გრძელი ტოტები ჩამოკიდებულიყო, და შემდეგ, ამ მდიდარი დეკორის შუაგულში გაცხოველებულ მაყურებელთა წრე, წყვილებს ხმითა და ჟესტებით რომ ახელებდა, ეს ყველაფერი ისეთი უცნაური და შთამბეჭდავი იყო, რომ სრულიად დამაკარგვინა რეალობის შეგრძნება და იდეალურ სამყაროში გადამიყვანა.

ამ ყველაფერთან კონტრასტს ქმნიდა მინდვრის მეორე მხარეს, მაღალი მთის წვერზე აღმართული ბედიის ყოფილი მონასტრის სათაყვანო და სიზმარეული ნანგრევები.

მინდვრიდან მონასტრისაკენ ციცაბო და რთული ბილიკი მიდის; მაგრამ ზოგან ისეთი მიხვეულ-მოხვეული ხდება, რომ ცხენები წინ ველარ მიიწევენ და იძულებული ხართ, აცოცდეთ ნაპრალიან კლდეზე, რომლის წვერშიც უძველესი ეკლესია დგას.

ეს ეკლესია, თავისი დიდებული არქიტექტურით, პატარა ჰაგია-სოფიას მოგაგონებთ. როგორც გარე, ისე შიდა სკულპტურები კარგადაა შემორჩენილი და რთული არ იქნებოდა აღდგენა ამ ძველი ნაგებობისა, რომელიც თავისი სილამაზით აღემატება გელათის ტაძარს იმერეთში და მარტვილს – სამეგრელოში. ერთ-ერთი გვერდითი სამლოცველო ხელუხლებელია. მხოლოდ ის კამარაა დაზიანებული, რომელიც მთავარი შესასვლელის თავზე მდებარეობს და უყურებს საკურთხეველს; ღრიტოში, სადაც სუროს გამოუყვია ყლორტები, ისევე როგორც უზარმაზარ ლეღვის ხეს – ტოტები, რომლებიც კედლის ქვეშ ეკვრის, როგორც ფოთლებიანი გობელენი, თავშესაფარი მოუწყვია უთვალავ ფრინველს, ერთადერთ მომღერლებს, რომელთა გალობას ექოს აძლევს დაცარიელებული ტაძარი.

მდებარეობს რა ნაკლებად ცნობილ რეგიონში, გაკვალული გზებისგან შორს, ეს უძველესი საყდარი შეუმჩნეველი დარჩა კავკასიის მკვლევართა უმეტესობას; და მაინც, რამდენი რამ მიუთითებს ხელოვანის ცნობისმოყვარეობაზე! ყველა

ქართული წარწერა სრულყოფილად იკითხება, ზოგიერთი ფრესკაც ხელშეუხებელია, განსაკუთრებით ერთი, რომელიც ასახავს სამარიტელ დედაკაცს, იესოს რომ სთავაზობს წყალს. სამარიტელი დედაკაცი დგას; მარცხენა ხელი ყვითელი ფერის ამფორაზე უდევს, რომელიც წითელი ქვისაგან აგებული ჭის კედლის პირდაპირ დგას; ჭის თავი თეთრად დაძარღვული მარმარილოსაგანაა გამოკვეთილი და დიდი ხით დაჩრდილული; მარჯვენა ხელი კი გულმკერდზე უდევს. ლურჯ კაბას აქვს ორი ფენა, ზედა – უფრო მუქი, ვიდრე ქვედა, ნაცრისფერი, ოქრომკედით დამშვენებული ფოჩებით. ლურჯებში ჩაცმული მაცხოვარი, ზემოთ აღმართული მარჯვენა ხელით, ჭის წინ ზის. შესასვლელი კარის თავზე დახატული ეს სურათი ნახევარ კედელს იკავებს, რომელსაც ვიწრო, ისრული ფანჯარა ორ ნაწილად ყოფს. ქვემოთ მოჩანს წმინდანთა ექვსი თავი, რომელთაგან მარცხნივ მესამე დაუზიანებელია; თუკი სახის ნაკვთების დახვეწილობით ვიმსჯელებთ, ეს ქალის სახე უნდა ყოფილიყო; მის მოსახამს აქვს მოყავისფრო თავსაბურავი, შეერთებული ხელებით კი ჯვარი უკავია.

ეკლესიის ექსტერიერი – გუმბათი, ფანჯრები, დიდი კარი, გვერდითი შესასვლელები საოცარი დახვეწილობის ნიმუშია და კარგადაა შემონახული. მოკლედ, უბრალოდ განსაცვიფრებელია ამ ველურ და კულტურას მოკლებულ პროვინციაში არქიტექტურის შეუდარებელი შედეგის, დაკარგული ცივილიზაციის მოწმის აღმოჩენა. ეკლესიის ირგვლივ სასაფლაოა, სადაც ქვის რამდენიმე მაგზოლეუმს დაინახავთ, რომლებზეც ქვეყნის წინა მმართველი ოჯახების გვარებია ამოტივტივებული; ერთ ასეთ საფლავს ჩარდახად ადგას ოცმეტრიანი დიამეტრის ცაცხვის ხე.

ეკლესიის მოპირდაპირედ სხვა შენობა დგას, რომელიც, სავარაუდოდ, ბერთა საცხოვრებელს ჰგავს და რომელშიც თალიანი კარით შედიხართ. ასევე, შეამჩნევთ გალავნის ნაკვალევს. ირგვლივ ხედები თვალწარმტაცია. მოშორებით ფონად აღმართულა თითქმის ყოველთვის თოვლით დაფარული აფხაზეთის მთები; 1876 წლის 25 მაისს, ჩემი პირველი ვიზიტის დღეს, მიუხედავად იმისა, რომ ძალიან თბილოდა, ეს მწვერვალები მაინც თეთრად მოჩანდა; ცოტა ქვემოთ, მყინვარების ხაზის დაბლა, ნაყოფიერი ველებიდან ამოზრდილი, ტყით დაფარული მთები იკვეთებოდა. კლდოვანი რელიეფის მეორე მხარეს, რომელზეც უძველესი მონასტერი მდებარეობს, უთვალავი შავი ცხვარი ძოვდა ბალახს. ამ ქვეყნისთვის დამახასიათებელი ჯიში, რომელიც შეუიარაღებელი თვალით დანახული, უშველებელი ჭიანჭველების ლეგიონს წააგავს, საკუთარ თავს უცნაურად რომ მიეზიდება მწვანე, ფაფუკ ხალიჩაზე.

დასავლეთისკენ მოჩანს ზღვის შორეული ჰორიზონტი, რომლის მჩქეფარე ტალღებს აქედანაც გაარჩევდით. ამ მხარეს, მინდვრების გადაღმა, მდინარე ოქოდჯი/Ōchodji (ფრანგულად, ხარის მდინარე) მიიკლავნება, რომლის ვერცხლისფერი ნაკადები სიმინდის დიდ მინდვრებს რწყავს, ხოლო ვარჯები – ადა-

მიანის სიმაღლე იზრდება. შავი ზღვის მარცხნივ იშლება გორაკები, რომელთა ზემოთაც გამოარჩევთ ენგურის სანაპიროზე მდებარე მთა სათანჯოს, სადაც მი-სივე სახელობის ციხესიმაგრე მდებარეობს.

ჩემი ჩაფარი სოფელ ბეღიაში ცხოვრობდა. სურდა, მასთან გავჩერებულიყავი და ამის შესახებ თავის ცოლს წინასწარვე აცნობა. ეს უკანასკნელი ქოხის ზღურბლზე შემომეგება, მათ პატარა, მომხიბვლელ ქერა და ლურჯთვალა გოგონასთან ერთად, რომელიც ისეთი განცვიფრებით მიყურებდა, რომელიც მხოლოდ დედამისის სიმორცხვეს თუ შეედრება. ათი წლის ბიჭი პატივისცემით მიუახლოვდა ჩემს მასპინძელს. ყმაწვილი მისი მოწაფე იყო, მისი ერთ-ერთი მეგობრის ვაჟი, ასევე აზნაური.

სანაცვლოდ, მეგობარს ეშვილებინა ჩაფრის უფროსი ქალიშვილი; ამგვარი შვილობილობა საკმაოდ გავრცელებულია. მსგავსი არანათესაური ურთიერთობების შედეგად ჩამოყალიბებული კავშირები კი ხშირად უფრო ძლიერია, ვიდრე თავად ოჯახის შიგნით წარმოქმნილი. მოწაფე რამდენიმე წლის განმავლობაში რჩება გამზრდელის ოჯახში, რომელიც მასზე ისევე ზრუნავს, როგორც საკუთარ შვილზე.

ბეღიაში დღის ბოლოს ჩავედით. ჩემი მასპინძლის მსახურები უკვე ამზადებდნენ ვახშამს. ერთი მათგანი ქოხის წინ იჯდა და სიმიდს ტაროს აცლიდა. დანარჩენები შიგნით შექუჩებულიყვნენ და სხვადასხვა საქმე გაენაწილებინათ. მისმა ცოლმა, უეჭველია, პატივისცემის ნიშნად, შემომთავაზა ფერუმარილი, რომელსაც ტანსაცმლის შიგნით, ბამბის ქსოვილში გამოკრულს ინახავდა. თავის მხრივ, ჩაფარი წავიდა, დაკრიფა და თავისი ყაბალახით მომიტანა ყურძენი. კარგი შესახედაობის კაცი იყო, გარუჯული პირისაბით. სიმამაცემ თურქეთის წინააღმდეგ 1877-1878 წლების ბრძოლაში ორი მედალი მოუტანა.

ყოველ საღამოს, იმ ქოხში მისვლისას, სადაც ღამე უნდა გამეტარებინა, ფოტოაპარატში ფირფიტას ვცვლიდი ისე, რომ მეორე დღისთვის ახალი ფოტოები გადამეღო. ამ ოპერაციის შესასრულებლად წითელშუშიან ფარანს ვიყენებდი, რადგანაც, როგორც ცნობილია, ჟელატინი დიდი რუდუნებით უნდა იქნეს სინათლისაგან დაცული. ჩემი ჩაბნელებული ოთახი ყველგან დიდ გაცეხას იწვევდა. მაგრამ ეს გაკვირვება არსად ისე მძაფრი არ ყოფილა, როგორც ჩემი მამაცი ჩაფრის ქოხში, როცა დამინახეს ფოტოაპარატთან მოფუსფუსე. ეს ხალხი ძლივს დავარწმუნე, რომ ბელზებელთან არ ვიყავი შეკრული.

ჩემი ჩამოსვლის ამბავი მალევე გავრცელდა და უკლებლივ ყველა მცხოვრებს უნდოდა, ვენახე. დარწმუნებულნი იყვნენ რა ჩემს სატანასთან კავშირში, ყველაზე მშოშარაც კი ისე გამამაცდა, რომ უსაშველოდ გამიჭირდა მათი მოგერიება ფოტოაპარატისგან, რომლის შეხებისა და დათვალიერებისგან თავს ვერ იკავებდნენ. თავიდან რომ მომეშორებინა, ვთხოვე, მონასტრის შესასვლელთან

დამდგარიყვნენ, რათა მათი პორტრეტები გადამეღო. მელოდნენ მორჩილად, სანამ მთელი ნანგრევებისა და მისი შემოგარენის ფოტოებს ვიღებდი.

რადგანაც ბედიის მონასტერი ფოტოგრაფის განსაკუთრებული ინტერესის საგანია, მიხდოდა, რაც შეიძლება სრულყოფილად მეკეთებინა ეს საქმე. ამდენად, სოფელი განთიადისას დავტოვე თანმხლებ ჩაფართან ერთად, რომელიც ჩემი აღჭურვილობით იყო დატვირთული. სწორედ მზის ამოსვლისას მივაღწიე პლატოს, რომელზეც მდებარეობდა საყდარი და მისი მიმდებარე ნაგებობანი. ვერასოდეს შევძლებ აღვწერო და არც არასოდეს დამავიწყდება ჩემ თვალწინ გადაშლილი ეს ამაღლებული დიდებულება! ელვანაკრავივით ვიდექი!

სასაფლაოს კიდესთან აღმოვჩნდი. ჩაფარი მომყვებოდა, მაგრამ წინ ნაბიჯსაც ვერ ვდგამდით, რადგანაც მაღალი მცენარეები და გაუვალი ბუჩქები გვიფარავდა ბილიკს. აუცილებელი იყო მათი მოჭრა და წინ წაწევა, რომ ფოტოაპარატი დამეყენებინა; და ეს არ იყო ადვილი საქმე. ჩემი მეგზურიც მიხვდა ამას და შემოერთავა, რომ დამხმარეთა საძებნელად წავიდოდა. მეც დავთანხმდი და ველოდი მის დაბრუნებას.

კარგა ხანს დავრჩი მარტო, ამ უძველესი განსასვენებლის ნაპირას და ნებანება მიყვებოდი ჩემი ფიქრების მატარებელს, აღძრულს ჩემი მდგომარეობის უკიდურესი ორიგინალობითა და იმ ადგილით, სადაც აღმოვჩნდი. რამდენიმე საათი გავიდა, რადგან მზე უკვე ჩემ თავს ზემოთ მოქცეულიყო, როცა ჩაფარი კაცების მთელ ბატალიონთან ერთად დაბრუნდა, რომლებიც მაშინვე შეესივნენ საქმეს და უმოწყალოდ გაკაფეს მცენარეები, ბილიკს რომ ფარავდა. ხისმჭრელებმა იქამდე არ შეწყვიტეს საქმიანობა, სანამ მზე ჰორიზონტს მიღმა არ გაუჩინარდა. ასე რომ, მთელი ის დღე დავკარგე.

იძულებული ვიყავი, სოფელში დავბრუნებულიყავი და მეორე დღეს კვლავ ავსულიყავი ზემოთ; თუმცა მეორე დღეს უკვე ცნობისმოყვარეთა მთელი პროცესია მომყვებოდა.

როგორც იქნა, დავიწყე მუშაობა, რაც უკიდურესად რთული აღმოჩნდა. ამჯერად, ეკლესიის შიგნით დახვავებული ნაგავი უნდა მომეშორებინა, რათა არასწორ ნიადაგზე ფოტოაპარატს ყანყალი არ დაეწყო. დროდადრო, კედლების ფრაგმენტები ქვემოთ ცვიოდა და ჩაფარს უნდა ვუმაღლოდე, რომ მიხსნა დიდი ქვის დაცემისაგან, რომელიც ვარდნისას შეაჩერა.

მიუხედავად იმისა, რომ გარეთ, სასაფლაოზე, მაღალი მცენარეები მოჭრეს, მაინც დარჩა ისეთები, რომლებშიც ჩემი ფოტოაპარატის ფეხები იხლართებოდა. ასევე, შევნიშნე მაღალი ზიზილების გროვა; ეს ერთადერთი ადგილი იყო ამ რეგიონებში, სადაც ეს ყვავილები შევამჩნიე.

ჩემმა ფოტოგრაფულმა ძალისხმევამ წარმატებით ჩაიარა. ამის შედეგს აქვე გთავაზობთ. ბედიის ეკლესიის რამდენიმე სურათი გადავიღე, რომლებიც ინტერი-

ერს სხვადასხვა მხრიდან საკმარისად კარგად აჩვენებს, რაც ადრე არავის წარმოუდგენია და არქეოლოგებისთვის საკმაოდ საინტერესოა.

დღე უკვე სრულდებოდა, როდესაც გავეშურე ცნობისმოყვარეთა ჯგუფისაკენ, რომლებიც ორი დღე მორჩილად მელოდნენ მონასტრის შესასვლელთან. ისინი ჩამომსხდარიყვნენ ლოდებსა და კლდეებზე, რომელთა შორისაც იზრდებოდა უთვალავი სურნელოვანი ბალახი (ამ რეგიონებში ფლორა ერთობ მდიდარი და მრავალფეროვანია). ჩემს მოდელთაგან ზოგიერთნი ისე წარმტაცად დაჯგუფებულიყო, რომ ისევე გადავიღე, როგორც დამხვდნენ. თუმცა, ზოგიერთ მათგანს ცერა და საჩვენებელ თითებს შორის მოქცეული ცხვირით დაინახავთ. ამგვარად და საკმაოდ ხშირად სწორედ ასე იხოცავენ ცხვირს. ამ შემაწუხებელ ჟესტს რომ გავმკლავებოდი, ვაიძულე, ხელები ზურგს უკან წაეღოთ და პოზა არ შეეცვალათ, რასაც ადვილად დამორჩილდნენ.

1881 წლის 16 და 17 ნოემბრის ეს ორი დღე, რომლებიც ბედიის მონასტრის ნანგრევებში გავატარე, ჩემი, როგორც დამწყები ფოტოგრაფის მოგზაურობისას, ყველაზე საინტერესო აღმოჩნდა.

ციცაბო კლდეზე დაშვებისას უკან მომყვებოდა კაცების, ქალებისა და ბავშვების პატარა არმია. ჩემი ცხენის უკან მოდიოდა კაცი, რომელიც ხელმძღვანელობდა ფოტოალჭურვილობის ყუთებს. შემდეგ მოდიოდა ჩაფარი, რომლის დახმარებაც ჩემთვის ასეთი სასარგებლო გამოდგა. თუმცა, მისი ერთი თვისება ძნელად ასატანი იყო: ყოველთვის ჩიბუხით პირში მოდიოდა ჩემთან ახლოს, რომელიც სულ კბილებს შუა ჰქონდა გაჩრილი. არ მჯერა, რომ თუნდაც ძილის დროს იშორებდა. როცა ძირს უვარდებოდა და სხვებს გზავნიდა მოსაძებნად, ისინი, უმეტესწილად ვერ პოულობდნენ და როგორც თვითონ ამბობდა, ეს მისი ცხოვრების ერთი დიდი იმედგაცრუება იყო.

მთის ძირში დაინახავდით განმარტოებულ, პატარა ქოხს. ეს იყო უბრალო სახლი, სადაც ცხოვრობდა იმ კაცის შვილთაშვილი, ვისი სახელიც დაერქვა სამურბაყანოს. მთავართა ეს შტო, სახელად ანტონ შარვაშიძე, ორი რამის გამო იმსახურებს აღნიშვნას: ბედიაში დაბადებული, ოცდასამი წლის ასაკში გაემგზავრა რუსეთში და ერთი იმათგანია, ვინც 1812 წელს, მოსკოვში, ნაპოლეონის დიდი არმიის უკანდახევის აღსანიშნავი ფეიერვერკები იხილა.

ეს მოხუცი, რომელმაც 1876 წელს საინტერესო დეტალები მამცნო თავისი ქვეყნის შესახებ, მარტო და ღარიბულად ცხოვრობდა ამ ქოხში, რომელიც სულ რაღაც 6 ფუტის ფართობის იქნებოდა; რამდენიმე გადასაფარებელი და ბალიში, ქოთნის კაუჭი, რკინის ჩაიდანი სიმინდის ფქვილის მოსახარშად – სულ ეს იყო მისი ავლადიდება. კედლებზე ეკიდა ხეზე ამოკვეთილი ორი სურათი: ერთზე გამოსახული იყო ნაპოლეონი, მეორეზე კი – პეტრე დიდი; მისი ახალგაზრდობის და შესაძლოა, ბედნიერების სუვენირები, რომლებზეც განდევნილის მეოცნებე

მზერა ჩერდებოდა ხოლმე. ორი კვირა საკმარისი იქნებოდა მისი ქობის ირგვლივ მდებარე ორიოდ აკრი მიწის დასამუშავებლად. უძველესი ოჯახის ეს შთამომავალი, რომელიც მიატოვა მისმა ხალხმა, უმრავლესობა მათგანმა, მდიდარმა, ჯერაც ელოდა ოდესღაც დაპირებული პენსიის დანიშვნას. ერთადერთი გასართობი ჰქონდა – დედის საფლავზე გასვლა, რომელიც იქვე, მავზოლეუმისა და გიგანტური ცაცხვის ძირში იყო დამარხული. მისი საკუთარი საფლავის ბორცვი ბევრად უფრო მოკრძალებული იქნებოდა. მოგვიანებით შევიტყვე მისი გარდაცვალების შესახებ, და აფხაზეთში მეორე სტუმრობისას, 1881 წელს, მის მიტოვებულ სახლსაც შევავლე თვალი.

როდესაც ბედიდან აფხაზეთისკენ მიდიხარ, უნდა გადაკვეთო სამურზაყანოს საზღვარი, მდინარე ოხურეი. ფიცრებით ნაგები პატარა ხიდი წაიღო მდინარემ, რომელიც ამჟამად ძალიან ვიწროა. მომხიბლავი მინდორი, საუკუნოვანი ხეებით დაჩრდილული, აფხაზეთის შესასვლელი გზაა. ბუნების მიერ მორთულ ამ პერსიტილს, შეჰყავხარ დიდრონ ტყეში, სადაც ვაზის გირლანდები მუხისა და კაკლის ხეთა ტოტებში ჩაწნულა.

აფხაზეთის მხარეს მდებარეობს ყარსოულა (საგუშაგო პოსტი): ეს არის ტოტებით გაკეთებული ქობი, ჩალით დახურული დამრეცი ტერიტორია. ეს სამხედრო პოსტი აფხაზეთმა რუსეთ-თურქეთის ომის (1877-1878 წწ.) დროს დაიპყრეს. ოხურეის ორივე ნაპირი მშვენიერია. ხიდიდან ორიოდ ვერსში მდებარეობს 170 მცხოვრებით დასახლებული პირველი აფხაზური სოფელი პოკვეში.

ტყეებში დავინახე ამ რასის რამდენიმე ოჯახი და გამაოცა განსხვავებამ მათსა და სამურზაყანოელებს შორის; ისინი ერთსა და იმავე ენაზე კი აღარ ლაპარაკობენ.

ბედია სამურზაყანოს ბოლო სოფელია აფხაზეთის მხარეს. ირგვლივ აღმართული მთები კარგი საძოვრებია და ზაფხულში მათი ფერდობები საცხეა ფარებით, ნახირებითა და მწყემსებით, რომლებიც იქ ძმურად ცხოვრობენ. ადამიანები ცხოველებივით უმრუნველნი არიან და ბედნიერებისთვის სხვას არაფერს ითხოვენ. კამეჩის ჯიქანი იძლევა ძროხაზე უკეთეს რძეს; მას იყენებენ ჭყინტი ყველის ამოსაყვანად, რაც სიმინდის შეჭამდთან, ნაღულთან და ადგილობრივ თაფლთან ერთად მწყემსთა ძირითადი საკვებია.

სამურზაყანოსა და სვანეთის მთებს შორის მდებარეობს მაღალი პლატო და დიდი გუბურა სახელად მოგასქერჩოუა (Mogascherchoua), რომელსაც ცრურწმენები უკავშირდება. ვერავინ ბედავს მის ყინულოვან ტალღებში ბანაობას, რომლებიც, მათი რწმენა-წარმოდგენით, მიწის გულიდან ამოდის, რათა მოსავლისთვის საბედისწერო ავდარი და ქარიშხალი გამოიწვიოს. საინტერესოა, რომ ამ წყალში გაზავებული რძე რამდენიმე წამში ცხელდება და დუღდება. კარგი იქნებოდა, ამ წყაროს წყლის ანალიზის ჩატარება, რადგანაც მთის მრავალი სხვა წყაროს მსგავსად, შესაძლოა, მასაც გააჩნდეს სამკურნალო თვისებები.

ბედის მინდვრის დატოვებისთანავე გზა უფრო და უფრო ოღროხოლო და ველური ხდება და თხების ბილიკად იქცევა. რაღაც მონაკვეთში ადამიანმაც, მარდი სახეობების მსგავსად, ოთხით უნდა იაროს. ზოგიერთ ადგილას მცენარეული საფარი ისეთი გაუვალია, რომ ხანდახან საჭიროა გასასვლელის გაწმენდა ხანჯლით, რომელსაც აქაურები მუდამ თან ატარებენ. მთავარი ამოცანა ამ ქვეყნის გამხედარი ცხენების ტარებაა უფსკრულზე გამავალ ამ ვიწრო ბილიკებზე. მხდალი მოგზაურისათვის შესაფერისი ასამხედრებელი ცხოველი კამეჩია, თავისი ზოზონა სიარულით. ეს უსწორმასწორო უღელტეხილები მთავრდება თვალწარმატატი ტყეებით, სადაც ყველანაირ ხილს გადააწყდებით: ჭერამს, ატამს, ყურძენს; ბუნებრივი რესურსების ასეთი სიუხვის დანახვისას გაიფიქრებთ, რომ ედემში ხართ, თუმცა ასე დაუშუშავებლად გაბრდილ ამ ხილს განსხვავებული არომატი აქვს, ვიდრე სახლისას და ევაც უარს იტყოდა მათ მოკრეფაზე, რითიც კაცობრიობას ბევრ უბედურებას აარიდებდა თავიდან.

მთიდან მთამდე, ნაკადულების ნაპირების გასწვრივ, ცხენზე გადამჯდარი მიუყვები გზას და ტკბები ჩანჩქერთა მომხიბვლელობით; და რაც უფრო ღრმად შეაღწევ აფხაზეთში, მით უკეთ გაიცნობ მიწისა და მის მცხოვრებთა ორგვარ სიველურეს; მაშინვე შეამჩნევთ, რომ რუსებმა აქ უფრო გვიან შეაღწიეს, ვიდრე სამურზაყანოში. ქედის სიღრმეში მდებარეობს სოფელი ტყვარჩელი, რომელმაც თავისი სახელი ახლომდებარე მინერალურ აბანოებს უბოძა, და რომლის მთავარი სიმდიდრე ირგვლივ მდებარე ტყეებში ფუტკრის უთვალავი ნაყარის თაფლია. თუკი ბედიას დილით უთენია დატოვებთ, ამ სოფელს შუადღისკენ მიაღწევთ. რადგანაც ჩაფარი, რომელსაც სოფლის სტარშინასთვის ჩემი ჩასვლის შესახებ უნდა ეცნობებინა, დროულად ვერ ჩავიდა ადგილზე, მასპინძლის გასაკვირად, ჩემი ამალით გავეჩრდი ოჯახში, რომელთანაც პირველი ჩასვლისას გავათენე ღამე. ვულგარულ გამოთქმას თუ გამოვიყენებ, ამას შედეგად მოჰყვა ალაღბებზე გაშლილი სადილი, რამაც შემაძლებინა ეროვნული სამზარეულოს საუკეთესო მხარეები დამენახა. ჩემი მასპინძელი იყო იმ ანჩაბადის შთამომავალი, რომლის ბრძოლამ სამეგრელოს მთავრის, ლევან დადიანის წინააღმდეგ, ამ უკანასკნელის მოთხოვნის საფუძველზე, შექმნა წინაპირობა ქვეყანაში რუსეთის შემოჭრისათვის. ორ მთავარს შორის მტრობის მიზეზი პირველის მიერ მეორის მორჩილებაზე უარი იყო. გაჯავრებულმა დადიანმა ხელჯოხი აღმართა თავისი დაქვემდებარებულის (ამ დროს აფხაზეთი ემორჩილებოდა სამეგრელოს მთავარს) მიმართ. თავდაცვის მიზნით ანჩაბადემ ხანჯალი იშიშვლა; ის უმაღ დააპატიმრეს და ციხესიმაგრეში გამოამწყვდიეს. თუმცა, საპატიმროს თავი დააღწია და სამურზაყანოში გაიქცა, საიდანაც რამდენჯერმე შეუტია სამეგრელოს. დადიანმა, რომელიც უფრო სუსტი აღმოჩნდა, საშველად უხმო წებელდელ მთიელებს, მაგრამ ამაოდ; ეს უკანასკნელნი თავად ანჩაბადეს შეეკრნენ და ლევანი იძულებული გახდა, დახმარება

რუსეთისთვის ეთხოვა. სწორედ მაშინ (1832 წ.) ააგეს რუსებმა მდინარე ენგურის ნაპირას ათანგელოს ციხე, რომელსაც ადგილობრივები სათანჯოს უწოდებენ, მაგრამ ეს ციტადელი უძლური აღმოჩნდა, დაეცვა სამურზაყანოს საზღვრები. ომით დაღლილმა სამეგრელოს მთავარმა დადიანმა საკუთარ ვასალთან მშვიდობის დამყარება გადაწყვიტა. და რა იყო ამ დავის შედეგი? ერთით მეტი ციხესიმაგრე კავკასიის ტერიტორიაზე, რუსი ჯარისკაცების შეჭრა ქვეყანაში, შესაძლოა, დიდი უსიამოვნების ფასად იმისთვის, ვინც ისინი მოიწვია!

ტყვარჩელელი მთავარი ანჩაბაძე, რომლის სახლშიც მიმასპინძლეს, ამ რეგიონისთვის ტიპური თავადი იყო. დაახლოებით სამოციოდე წლის, მაღალი, გამხდარი, თეთრი თმითა და გრძელი, თეთრი წვერით, რომელიც კარგად გამოკვეთდა მის გარუჯულ პირისახეს. ლურჯი თვალები – ეს ფერი გაბატონებულია ამ ქვეყანაში და არაპროპორციულად გრძელი ცხვირი განსაკუთრებულ შესახედაობას ანიჭებდა. მის ტანისამოსში არაფერი იყო თავადური: დაკონკილი ჩოხა ნაცრისფერი შალის შარვლის თასმებამდე ეშვებოდა; ცხვრის ტყავის უძირო სანდლები, ასევე თასმებით შეკრული, ვერ მაღავდა ფეხის თითებს (წინდა აქ უცხო რამაა); შავი ქსოვილის, კრაველით შემკული მაღალი ფაფახი, – ამგვარი იყო მისი ყოველდღიური მორთულობა, და ეს ალკაზმულობა შთამბეჭდავ ფიგურას კიდევ უფრო მაღალს აჩენდა.

მისი ცოლი, თავადის ასული, ასევე იყო ჩაცმული; მკერდთან აქაურ მოდაზე ამოღებული, ხმარებისგან გაცვეთილი ნაცრისფერ-შავი ჩამოძონძილი კაბიდან მოკლესახელოებიანი პერანგი უჩანდა, რომლის თავდაპირველი ფერის გარკვევა ახლა უკვე ყოვლად შეუძლებელი გამხდარიყო. კაბის შესაფერისი თავსაფარი თავსა და შუბლს უფარავდა. ამ პრიმიტიული წყვილის შთამომავალი, ასე თუ ისე, მამის მსგავსად იყო ჩაცმული, გარდა იმისა, რომ დაუვარცხნელ თავზე თხის ტყავის ქუდი განსხვავებულად ეხურა, რაც რობინზონ კრუზოს ამსგავსებდა.

ჩვეულებრივ, უცხოელი ქალი სტუმრის გამოჩენა დიდ ინტერესს იწვევდა და მოგროვდა ყველა წოდების თავად-აზნაური და ქალბატონი, ოჯახის სხვა მცხოვრებლები თუ მეზობლები, მსახურები და გლეხები, ჩამოკონკილთა უცნაური ნაბავი, რომლის აღწერაც ჩემს კალამს არ ძალუძს. ყველა ქალი ატარებდა თურქული სტილის გრძელ, თავისუფალ შარვალს/პანტალონს, რაც, როგორც აღვნიშნე, *par excellence*, ტანსაცმლის ნაწილია, მისი ჩამცმელის რეპუტაციაზე მიუთითებს და ადვილი გასარჩევია ნახვრეტებით, რომლებიც ქვედაბოლოზეა ამოქარგული. ევროპული სტილის, ცუდად გამოჭრილ ამ ქვედაკაბებს ყოველთვის მიკერილი აქვს შლეიფისმაგვარი ძონძი, რომელიც მტვერსა და ტალახში ეთრევა. ზოგჯერ, ქალებს აცვიათ ყელთან ამოჭრილი კაბებიც, რომლებიც ლამაზი ღილებით იკვრება. ყველა მათგანის თავსაბურავი შედგება რამდენიმე ფერადი ნაჭრისაგან, რომლებიც თავზე თავსაფარვით აქვთ შემოკრული. ფეხები ან შიშველი აქვთ,

ან აცვიათ უძირო, ხშირად ქალების მიერვე შეკერილი ფეხსაცმელი, იმ ქალები-სა, რომლებიც ვაჭრობით განთქმულ ამ რეგიონში უფრო მეტ სიყოჩაღესა და ინტელექტს ავლენენ, ვიდრე კაცები.

სწორედ ისინი ქსოვენ შალისა და ტილოს ქსოვილებს, რომლისგანაც კერავენ ტანსაცმელს კაცებისათვის და გადასაფარებლებს – სახლისათვის, რომლებიც, სხვათა შორის, უკეთეს მდგომარეობაში და უფრო უხვადაა გლეხების, ვიდრე თავად-აზნაურების სახლში; კერავენ საჯირითო შარვლებსა და უნაგირებს და წნავენ კალათებს ყურძნის დასაკრეფად. ამ კალათებს ერთობ მოხერხებულად ღებავენ, კიდებენ რა მათ სიმინდის შეჯამადის ქვაბის თავზე ისე, რომ კვამლი ღებავს.

აფხაზი მთავრის მეურნეობა ისეთივე იყო, როგორიც ყველა დანარჩენისა ამ ქვეყანაში; სწორედ მაშინ აშენებდნენ ხის სახლს (აკვასკი / *akwaski*), რაც თავადისთვის დიდ თავის ტკივილად ქცეულიყო. სანამ მის აშენებას ელოდნენ, ოჯახი ფაცხაში ან პატარა ქოხში ცხოვრობდა, ყველა ერთად, განურჩევლად სქესისა, ერთსა და იმავე ოთახში. სატმლის დროს სადღესასწაულო ქათამი არ შემოუტანიათ. ამის შემდეგ კი მდელიზე მოაწყვეს თამაში, რომელშიც მთავრის შთამომავლებიც მონაწილეობდნენ.

სოფელ ტყვარჩელიდან ათ ვერსში იმავე დასახელების გოგირდის აბანოები მდებარეობს. მას მიაღწევთ გზით, რომელსაც ორივე მხრიდან ესაზღვრება უფსკრული, თვით დაღმართი კი ისეთი ციცაბოა, რომ ცხენს უჭირს გზის უსაფრთხოდ გაგრძელება. წყარო კლდიდან, მთის გვერდიდან გადმოდის და ჩადის ექვსი მეტრის მოშორებით მდებარე ქვის წყალსატევში, რომელსაც ხის კიბე აქვს ჩასასვლელად და სიღრმით ერთი მეტრი ან ცოტა მეტი იქნება. ადგილობრივი ჩვეულების თანახმად, ამ გადახურულ აუზში რამდენიმე ადამიანმა ერთად უნდა იბანაოს. იქვე, გვერდით აშენებულია გამოსაცვლელი ოთახი, რომელსაც საჭიროების შემთხვევაში ათბობენ კიდეც. ეს აბანოები უფასოა და მოეწყო აფხაზეთის უკანასკნელი აჰუს, მიხეილ შერვაშიძის მიერ, რომელიც აქ განიკურნა კენჭებისაგან და რომელსაც იქ, მწვერვალის თავზე, ჰქონდა საცხოვრებელი, აწ უკვე ხანძრის მიერ განადგურებული. იგივე აჰუს სურდა, რომ აქაურებს ესარგებლათ ამ წყლების სამკურნალო ძალით, რომელიც შედეგიანი იყო ძალიან ბევრი ავადმყოფობის წინააღმდეგ და ეს შენობა მობანავეთათვის ააგო, წყალსატევიდან დაახლოებით თორმეტი მეტრის მოშორებით.

ტყვარჩელის ეს წყარო თერმულია და, გარკვეულწილად, წააგავს ტფილისის წყლებს: ამ უკანასკნელის მსგავსად, მასაც ძალიან მძაფრი სუნი აქვს. აუზის სიახლოვეს, ორ მაღალ მთას შორის ჩამოედინება მდინარე ღალიძგა, რომელიც გამაყრუებელი ხმაურით გადმოდის ციცაბო კლდეებიდან და ამ ადგილს კიდეც უფრო მეტ სიველურეს მატებს. ყოველ ზაფხულს, სიცხის შემოტევისას (ივნისი, ივლისი და აგვისტო) ავადმყოფები ეწვევიან ხოლმე ამ პირველყოფილ სპას; აქ განსა-

კუთრებით მეგრელები იყრიან თავს. მობანაკეთათვის სიამოვნების მინიჭება არ არის რთული რამ; კლდე ტახტის მაგივრობას უწევს, მღვიმე კი – თავშესაფრისას. მომვლელი, რომელიც იქვე მდებარე ქოხში ცხოვრობს, რესტორატორის როლშია – განა მთის მწყემსები არ არიან ისინი, ვინც შედედებული რძითა და კამეჩის ყველით ამარაგებენ მის *table d'hôte*-ს? ამას დაამატეთ დიდი ქვაბი, რომელშიც სიმინდის შეჭამადი იხარშება და კიდევ ერთი დიდი ჭურჭელი, რომელშიც ახლად დაკლული ცხვარი თუხთუხებს და თქვენ თვალწინ გადაიშლება ამ სოფელსა-ბრალოთა პატარა კოლონიის ხედი, რომლებიც ერთად ჭამენ ბალახზე, ანდა რომელიმე დიდი მუხის ჩრდილში. ორკესტრიც კი არ აკლიათ – სულ მცირე, მეგრულ ჩონგურსა და აფხაზურ აფხაიარცას (*apkhayartsa*, გიტარა აბრეშუმის ორი სიმით) ბანს აძლევს ხეობის ექო. ყოველ პურისჭამას თან ახლავს თამაშით გართობა.

რა შემოძლია ვთქვა? ადგილობრივების წესიერების წყალობით შეიქმნა რეგულაციების მთელი წყება, რათა ტყვარჩელის საცურაო აუზთან ქვევის წესები დაცული ყოფილიყო: წყალსატევის ერთი მხარე მამაკაცებისთვისაა გამოყოფილი, ხოლო მეორე – ქალებისათვის; ორივე სქესი ერთად ბანაობს, მაგრამ ერთმანეთისგან ზურგშექცეულნი ისე, რომ ვერ ხედავენ ერთმანეთს. უფრო მეტიც, წყალში ჩასვლისა და ამოსვლის წესებიც წინასწარაა განსაზღვრული: უნდა ჩახვიდეთ ზურგით და ამოსვლისასაც ზურგით იყოთ მობანაკეებისაკენ; ეს ყველაფერი საცურაო კოსტიუმის გარეშე ხდება. განა მართალი არ არის, რომ აქ ყველაზე უბრალო აძლევს მითითებებს ყველაზე დახვეწილს?

ტყვარჩელის აბანოებს გასულ ნოემბერს ვერ ვეწვიე, რადგანაც მათკენ მიმავალი გზა ზამთარში ჩაკეტილია. ამიტომ იმ ადგილების არც ერთი ფოტო არ მაქვს.

მდინარე ლალიძგა, რომელიც სათავეს ტყვარჩელის თერმული წყლების სიახლოვეს იღებს, კვეთს აფხაზეთის ნაწილს და ჩაედინება შავ ზღვაში, ოჩამჩირესა და ილორს შორის. დინება სწრაფი აქვს, ხოლო კალაპოტი – კლდოვანი; როდესაც პატარა სოფელ ფოქვეშიდან სოფელ ტყვარჩელში ჩადიხართ, ექვსი ვერსის მანძილზე იგი ექვსჯერ უნდა გადალახოთ. ფოქვეში საკმაოდ გაშლილი რეგიონია და ფლობს მდინარის განაპირა მდიდარ მიწებს; იქ ყველა საცხოვრებელი ერთგვაროვანია: წნულებით აშენებული ქოხები შემოღობილი ეზოს შუაგულში. მინდორზე მდებარე სასაფლაო საკმაოდ მომხიბვლელად გამოიყურება მწვანე კვადრატებით და საფლავებით, რომლებიც გარშემორტყმულია ხის გალერეებით, მათი სურვილების შესაბამისად, ვინც მოაწყო.

რადგანაც ფოქვეშს არ აქვს ბაზარი, სადაც მიმდებარე რეგიონის მცხოვრებლები გაყიდდნენ პროდუქტს, ამიტომ ხალხს სთავაზობენ აქ ყოველწლიური ბაზრის გამართვას; ეს ახალი მიმართულება იქნება ქვეყნისთვის. უფრო მეტიც, ადგილობრივებმა, რომელთაც პროგრესის შეგრძნება აქვთ, სურვილი გამოთქვეს, საკუთარი სახსრებით აეშენებინათ იპოდრომი და ბაზრობის დროს გამართული

დოლისათვის დაეწესებინათ პრიზები; ეს კიდევ ერთი სიახლეა კავკასიაში, რადგან ამ დრომდე ამგვარი გასართობი კავკასიაში ოფიციალურად ჯერაც არ დაკანონებულა. 1881 წლისთვის ამ პროექტთან არც ერთი არ განხორციელებულა. თუმცა, ეს ადამიანები უფრო მეტად იყვნენ მზად ამისთვის, ვიდრე ის ადგილობრივები, რომელნიც, როგორც ვნახეთ, ბრწყინვალე ცხენოსნები არიან (ნამდვილად, ეს ერთადერთი ხელოვნებაა, რომელსაც ისინი ფლობენ); ნუთუ, მათრახს, მათი მხედრობის სიმბოლოს, არასოდეს მოიქნევენ? ამ მხრივ, ქალები ტოლს არ უდებენ საწინააღმდეგო სქესის წარმომადგენელთ, თავდაჯერებით მოახტებიან რა ყველაზე ფიცხ ბედაურებს, დაინახავთ, როგორ მხიარულად სხედან მამრთა უბრალო უნაგირზე და დოლში ხშირად თანმხლებ მამაკაცებსაც კი სჯობნიან. აქ დღესასწაული არ გაიმართება საცხენოსნო თამაშების გარეშე და მათი ჯირითი უკან ჩამოიბრუნებს ცხენის გაწვრთნის ხელოვნებას, რომელსაც ჩვენ ცირკში ასე მონდომებით ვუკრავთ ტაშს. თუმცა, ისინი ბარბაროსულ და ველურ ტრადიციებს მისდევენ, რომელთა წინააღმდეგაც ღირს პროტესტის გამოთქმა. თითოეული ვერსის ბოლოს დგანან პიკადორები, რომლებიც ბრძოლაში ჩართულ ცხენებს არა მხოლოდ შეძახილებით, არამედ თოფის სროლითა და მათრახის ცემითაც აჩქარებენ. არაერთი მხედარი დაღუპულა ასეთი სასტიკი, დაბრკოლებიანი დოლის შედეგად, აღტაცებას რომ ჰგვრის როგორც მოხუცებს, ისე ახალგაზრდებს.

რადგან ღალიძგა ფოქვეშის ველზე მოედინება, დღის განმავლობაში თქვენ დაინახავთ სოფლელი ქალების მომხიბვლელ ჯგუფებს, დოქებით ხელში, რომლებიც ეს-ესაა მდინარეში აუვსიათ. როგორი წელგამართული კეთილშობილება, როგორი შინაგანი სინარჩუნე აქვთ ამ გაუთლელ ქალებს და როგორ განსხვავდებიან ისინი ბევრი დასავლელი გლეხი ქალისგან. უკვე ვთქვი, რომ განსხვავებით მეგრელი და სამურზაყანოელი ქალებისაგან, აფხაზი ქალები ნაკლებად ჩანან საჯაროდ; ამის მიზეზი ისლამი, ამ ქვეყნის წინა რელიგია, უნდა იყოს; გარდა ამისა, მისი კვალი ჯერაც ჩანს სხვა ადამიან-წესებშიც, ერთგვარად რომ შერევია ქრისტიანობას, რომელსაც ახლა აღიარებენ. ამის მიუხედავად, ქალს, რომელსაც არ მოსწონს საკუთარი ქმარი, უფლება აქვს მიატოვოს ის და დაუბრუნდეს საკუთარ ოჯახს, მიუხედავად ქმრის წინააღმდეგობისა. ამასთან, ქალი დედოფალია საკუთარ ოჯახში, ქმარი კი მას გულისხმიერებითა და პატივისცემით ეპყრობა და ზოგავს თითქმის ყოველგვარი დამღლელი საქმიანობისაგან. ამ რეგიონში ქორწილი დიდი დღესასწაულია.

როგორც სამეგრელოში, აქაც, ქორწილამდე ცხენზე ამხედრებული შიკრიკები ჩამოუვლიან ნათესავებსა და მეგობრებს. სწორედ იმ დროს ფოქვეშის სტარშინა ათხოვებდა თავის თხუთმეტი წლის ქალიშვილს და შესაძლებლობა მომეცა, ყველა რიტუალი ახლოდან მენახა. როცა სახლს უახლოვდებიან, თავიანთი მისვლის შესახებ სროლით და ერთ-ერთი იმ მონოტონური, უსიტყვო სიმღერით აც-

ნობებენ ხოლმე, რომლის მახვილიც ვითარების მიხედვით იცვლება: საზეიმო ცერემონია ცხენის ქურდისათვის, ვინც თავისი ნადავლი მშვიდობით მოიყვანა სახლში; იარაღის ასხმისაკენ მოწოდება, როცა მტერი უახლოვდება; ხმაურიანი, მხიარული წამოყვირება საქორწინო პროცესიისას; ისიც სიმართლეა, რომ შეუჩვეველი ყური ადვილად ურევს სხვადასხვა ტონს ერთმანეთში და განმასხვავებელ მახასიათებლებს ყოველთვის ვერ იჭერს.

წეს-ჩვეულების თანახმად, მამულში მისვლისთანავე ცხენოსნები მასპინძელს ესალმებიან ცხენის ყალყზე შეყენებით და თითოეული ახალმოსული იმავეს იმეორებს. ყველანი სხდებიან ხეების ქვეშ — საპირისპირო სქესი მაგიდის სხვადასხვა მხარეს, სხვაგვარად, ზრდილობის წესები დაირღვეოდა. პურობის დასრულებისას რქა, რომელიც ღვინის სამ ან ზოგჯერ მეტ ბოთლსაც კი იტევს, ხელიდან ხელში გადადის; თითოეული სტუმარი ვალდებულია დაცალოს იგი, თუკი არ სურს, სუფრიდან გააპანდურონ. სასმისების ცლა შემაშინებლად ბევრი საკვების მიღების შემდგომ (მეოთხედი ძროხა, ცხვარი, ბატკანი, ქათმები, სიმინდი, კამეჩის ყველი) თავის საქმეს აკეთებს — ვერ ვიტყვი, რომ სტუმრები ძალიან თვრებიან, რადგან აფხაზებს თავი ღირსეულად უჭირავთ, არამედ იმ მხიარულების გამო, რომელიც ამგვარ შემთხვევებში მეფობს ხოლმე.

შემდეგ ტაშის შემოკვრით იძლევიან ცეკვის დაწყების ნიშანს. დროსტარება ერევა ცხენოსანთა ფანტაზიას, რომლის შესახებაც ადრე ვლაპარაკობდი და თამაშები, ცეკვები, ქეიფი გვიან ღამემდე გასტანს. მეორე დღეს დღესასწაული ისევ გრძელდება. სტუმრები საჩუქრებს მიართმევენ ახალდაქორწინებულ ქალს, რომელიც ფეხზე მდგომი და თავდაბურული იღებს მათ. თავსაბურავს იქამდე არ იხდის, სანამ მშობლები სათითაოდ არ მიუძღვნიან საკუთარ საჩუქარს. ახალი პატარძალი მაშინვე არ ტოვებს მშობლების სახლს; ქმარი გადმოდის მასთან საცხოვრებლად იქამდე, სანამ სიძის სახლს პატარძლისთვის მოამზადებენ. ასევე, ზოგჯერ სიძე პატარძლისგან შორს რჩება და მისი ნამდვილი ქმარი იქამდე არ ხდება, სანამ საკუთარ სახლში არ წაიყვანს. ასეთ შემთხვევაში საქორწინო ზეიმი, ზოგჯერ არანაკლებ მშვენიერი, სიძის ოჯახში ისევ თავიდან იწყება ხოლმე.

პატარძალს მოაქვს თავისი მზითვეი, თავისი ხელით და მეგობრების დახმარებით შეკერილი ლოგინი; ავეჯის დახვედრება სიძის მოვალეობაა; როგორც თავადი, ისე გლეხი ერთნაირად უბრალო ავეჯს ახვედრებს ცოლს იმ განსხვავებით, რომ ჩვეულებრივ, შეძლებული გლეხის ოჯახი უფრო მეტად სუფთა და კეთილმოწყობილია, ვიდრე თავად-აზნაურისა. მაგალითად, ჩემი მასპინძლის სტარშინას სახლს ფოქვეშიში არაფერი ეცხო მსგავსი დაუდევრობისა და სიბინძურისა, რამაც, სამწუხაროდ, სხვა დიდებული აფხაზების მასპინძლობა წაახდინა.

მოგზაურობა ფოქვეშიდან ბესლახუბამდე, ოჩამჩირის თემს მიბმულ სოფლამდე, მხოლოდ რამდენიმე ვერსს მოიცავს, მაგრამ დიდებული რამ არის, გან-

საკუთრებით საღამოს, მზის ჩასვლის უამს. როცა მათათა აელვარებული მწვერვალები ანარეკლს მოისვრის მდინარის ნაკადების, ტყეებისა და მდელოებისკენ, ყველაფერი ზღაპრული სინათლით გაცისკროვდება. ბესლახუბაში ჩამოვქვეითი მდიდარი გლეხის ოჯახში, ოლქის მერის მეზობლად და რაოდენ კმაყოფილი ვიყავი, როცა დღის ბოლოს, ამ ახალ ჭერქვეშ აღმოვაჩინე ამდენი საინტერესო ამბავი, თეთრი პირსახოცი, კრიალა ჭურჭელი, ბრწყინვალედ შემწვარი ფრინველი და მასპინძლები, რომელთაც დაკონკილი ტანსაცმელი არ ეცვათ.

მეორე დღეს სოფელში ტარდებოდა ცერემონია, რომელიც, ჩვეულებრივ, გვალვის დროს, წვიმის მოყვანის მიზნით იმართებოდა ხოლმე. ვიმეორებ, აფხაზები ცრუმორწმუნე ხალხია. ესაა პურობა ცეკვებსა და სიმღერებთან ერთად, რის შემდეგაც დამსწრეთა პროცესია მიემართება მდინარისაკენ ჯორზე ამხედრებული თოჯინით, რომელსაც გვერდით მიჰყვებიან ახალგაზრდა გოგო-ბიჭები თანაბარი რაოდენობით. გზად ისინი მღერაინ ლოცვას მდინარის ღმერთისადმი: „აგერაა თოჯინა, თოჯინა. აჰუს ქალიშვილს სურს, რომ დალიოს. ის არ სვამს ღვინოს და სწყურია წყალი, რადგანაც მდინარე ღამის მთლიანად დამშრალია. იგი არ მოდის, რადგან მდინარეში ცოტა წყალია“. ამგვარად მღერისას ისინი ჯორს შეაგდებენ მდინარეში და მთელი პროცესიაც თან მიჰყვება. თითოეული მათგანი წყალს ასხამს თოჯინას, რომელსაც მერე ტალღებში ჩააყურყუმელავებენ ხოლმე. ეს ცერემონია მთელი დღის განმავლობაში მეორდება. ბოლოს, საღამოს, მეორე სუფრა იშლება ჩვეული გართობის თანხლებით. თუკი წვიმა გაჟიუტდება და მაინც არ წამოვა, ისინი სხვა პრაქტიკას მიმართავენ, რომელსაც მხოლოდ უკიდურესი სასოწარკვეთისას ატარებენ, რადგან ცოდვად ითვლება: მინდორში აგდებენ ორ ბაყაყს. ეს ცხოველი უშმინდურად ითვლება და ეჭვი არავის ეპარება, რომ ასეთი მოწოდების შემდეგ ღმერთი მოინდომებს დაბინძურებული დედამიწის წყალდიდობით გარეცხვას.

მავანმა შეიძლება თქვას, რომ ნაივური უმეცრებისა და ცრურწმენების მდგომარეობაში დარჩენილა აფხაზი ხალხი იმ იზოლაციის წყალობით, რომელშიც ისინი ამდენი საუკუნის მანძილზე ცხოვრობდნენ.

ოჩამჩირე ბესლახუბიდან ათი ვერსის მანძილზე მდებარეობს; მისკენ მიმავალი გზა კვეთს ეროვნულ პარკს, რომლის წარმტაცი სილამაზის გადმოცემა ნებისმიერი ხელოვნების ძალას აღემატება. შეუძლებელია იოცნებით უფრო მშვენიერ ხეივნებზე, უფრო მწვანე და ფოთლოვან ტევრებზე, როგორებსაც ამ მარშრუტის გავლისას შეხვდებით. დიდრონი მუხები, ჭადრები და ცაცხვები ქმნიან ჩრდილს ოქროსფერი აბალიების ტერასისთვის და ეს ყველაფერი უცნაურად უპირისპირდება უკან დარჩენილ ერთიანად ველურ ადგილებს. ასე რომ, აღტაცებიდან განცვიფრებისკენ გადავინაცვლეთ; და უცებ, მოულოდნელად, ამ სიმწვანიდან გამოსვლისთანავე თვალწინ გადაგვეშალა შავი ზღვა – ჩვენ უკვე ოჩამჩირეში ვართ.

როდესაც გასულ ნოემბერს აქ ვიმოგზაურე, ღალიძგაში დაღამებისას ჩავაღწიე.

ჩემმა ჩაფარმა დაიწინა, დღეს დავლოდებოდით და მდინარე ისე გადაგვეკვეთა. მაგრამ მე მინდოდა გზა გაგვეგრძელებინა, დრო არ დამეკარგა და მიმესწრო ფოთისაკენ მიმავალი ნავისათვის. ჩემი უსაფრთხოებისათვის მან წელზე მათრახით მიმიბა. ამგვარად დაცული, უნაგირზე მუხლებით დავდექი, რომ არ დავსველებულიყავი. მეორე ნაპირს რომ მივალწიეთ, ჩაფარმა დამარწმუნა, რომ ძალიან საშიში ფონი გადავკვეთეთ. კიდევ ერთხელ უნდა ვუმაღლოდე მის გამჭრიახობას, ეს სირთულეც წარმატებით რომ გავიარეთ.

ექსკურსია სამურზაყანოსა და აფხაზეთში:

ნაწილი III

ძველი ოჩამჩირე და აჭუ მიხეილ შერვაშიძის ყოფილი სასახლის ნანგრევები – პატარა სოფლის მოსახლეობა – ოლქის ზოგადი ხედი – ჩემი ჩასვლა ახალ ოჩამჩირეში – ექსკურსია მიმდებარე მიდამოებში – ილორის ეკლესია და წმ. გიორგის ხარი – ღამე აფხაზი ქვრივის სახლში – მუხურთან – კავალკადა – დღესასწაული მოქვში; საყდრის ნანგრევები და ეკლესია – მთა აღარდა.

დაახლოებით ნახევარი საუკუნის წინ იმ ადგილას, სადაც ახლა პატარა სოფელი ოჩამჩირე მდებარეობს, სხვას ვერაფერს ნახავდით, გარდა კავკასიური ბზის ტყეებისა, რომლებიც ეკუთვნოდა თავად ანჩიბაიებს, ჩერქეზული წარმოშობის ოჯახს და რომლის შტოც დღესაც არსებობს სამურზაყანოში. ამ თავადებმა, რომელთაც საკუთარ ქვეყანაში უწოდებენ ლოონს, თავიანთი სახელი (ჭილოონი, რაც ნიშნავს ლოონების საცხოვრებელ ადგილს) დაარქვეს ამიერკავკასიის პატარა სოფელს, სადაც ისინი დასახლდნენ; შემდეგ ქონება მიჰყიდეს მიხეილ შერვაშიძეს, უკანასკნელ აჭუს, რომელმაც მოჭრა მაღალი ხეები და სოფელს დაარქვა ოჩამჩირე (ბზების ადგილი). აჭუს სურდა, შავი ზღვის ამ უდაბურ ადგილას, აზიური სტილის მდიდრული რეზიდენცია აეშენებინა. ამ მიზნით მან თურქეთიდან მოიწვია არქიტექტორი და მშენებლები, რომელთაც გაამართლეს მისი მოლოდინი და ამ დავალებას კარგად გაართვეს თავი. გავრცელებული ლეგენდა იმასაც კი ამბობს, რომ როდესაც სასახლე დასრულდა, არქიტექტორი სიკვდილით დასაჯეს სულთნის ბრძანებით, რადგანაც თავისი ხელოვნება უცხოეთში გაიტანა; მეორენი ამბობენ, რომ თავად აჭუმ დასაჯა, რათა მისი ნაგებობის ახლებური ვერსია აღარ შეექმნა.

ეს დიდებული შენობა მდებარეობდა ვეებერთელა ვაკის შუაგულში, რომლის

განაპირასაც მოედინება აძიკვა (აფხაზურად ეს სიტყვა მდინარეს ნიშნავს). მას ჰქონდა კვადრატის ფორმა ორი სართულით, ბელვედერით, აივნით, ვერანდით – მთლიანობაში ძალიან მომხიბვლელი, დახვეწილი ქანდაკებებითა და ნაზი არაბ-ესკებით მორთული. პირველი სართული – ქვისა, დანარჩენი შენობა კი წაბლის ხის ნატიფი ნაკეთობაა, ხოლო ვერანდის მზიდი კოლონადა მაჰაგონისგან გაეკეთებინათ. ინტერიერი შეესაბამებოდა ექსტერიერის ელეგანტურობას. ურიცხვ სალონებს ჰქონდა ფაქიზად დეტალიზებული ჭერი, კარები კავკასიის წითელი ბზისგან იყო დამზადებული, ხოლო ბუხრები – თეთრი მარმარილოთი ნაკვეთი. ასეთი ნაგებობა ნებისმიერ ადგილს დაამშვენებდა; ამ პრიმიტიულ ქვეყანაში ეს ნამდვილი საოცრება იყო. სურათს ერთადერთი რამ აფუჭებდა – მარნები სატუსალოს დანიშნულებას ასრულებდა იმ უბედურთათვის, ვინც გაბედავდა და განარისხებდა მთავარს, ვისი ახირებაც კანონი იყო.

როგორც კი ეს შესანიშნავი სასახლე დასრულდა, აჰუმ იჩქარა, დატოვა ექვსი ვერსის მოშორებით მდებარე თავისი იმუამინდელი საცხოვრებელი და ოჩამჩირეში გადმოსვლით მტრები განარისხა. დარჩენილი ოცი წელიწადი ქვეყანას სწორედ აქედან მართავდა. იმისთვის, რომ ეს ადგილი დაესახლებინა, გადმოატანინა მთელი ხე-ტყე ყველას, ვისაც კი ხის მოჭრა შეეძლო, რათა გარშემო თავადურისთვის შესაფერისი ხის ქოხები აეშენებინათ, რის შედეგადაც ახლანდელი სოფელი წარმოიქმნა.

ეს სასახლე, ოდესღაც მდიდრული ავეჯით გაწყობილი, ახლა დაცარიელებულ-გაუდაბურებულიყო. ქარი ყველა მხრიდან იჭრებოდა ჩამსხვრეულ ფანჯრებში (პირველი შუშები, რომლებიც აფხაზეთში ნახეს); მდუმარე ოთახებში ყველა შესაძლო სახეობის ფრინველს დაეუბდებინა, ხოლო ძაღლების, კატებისა და ვირთხების მთელი სამხეცე ერთი პირდაპირილი კარიდან მეორეში თავისუფლად დაპარპაშებდა. 1876 წელს შენობა ასეთ მდგომარეობაში ვნახე. ამ მშვენიერი სასახლის ავი ბედი მისი ამაყი მფლობელი თავადის ბედისწერას მოგაგონებთ. 1864 წელს აჰუ, რომელიც რუსეთის ვასალი იყო, შეეცადა, სუზერენის ძალაუფლება შეერყია. დატყვევების შემდეგ მას რუსეთის ქალაქ კალუგაში დაუპირეს გადასახლება, სადაც წლების შემდეგ ცნობილი შამილი გაამწყესეს; მაგრამ მიხეილ შერვაშიძემ გადასახლების ამ ადგილს ვერ მიაღწია, რადგანაც გზაში გარდაიცვალა; ზოგიერთნი ამბობენ, რომ ბუნებრივი სიკვდილით, სხვების თქმით კი, საკუთარი ხელით დაღია საწამლავი. მისი სხეული უკან, აფხაზეთში გადმოასვენეს და მოქვის ტაძარში, ოჩამჩირის მახლობლად დაკრძალეს. მისი ვაჟი და მემკვიდრე გიორგი, პეტერბურგში იყო გადასახლებული და ცხოვრობდა პენსიით, რომელიც რუსეთის მთავრობამ დაუნიშნა და რომელმაც მას რამდენჯერმე შესთავაზა მამის აშენებული სახლი მისთვის მიეყიდა. მაგრამ მან გაყიდვაზე უარი განაცხადა. თუმცა, რუსეთ-თურქეთის 1877 წლის ომამდე, როდესაც კიდევ ერთხელ შესთავაზეს გაყიდვა, იგი დაყაბულდა, მაგრამ ფასთან დაკავშირებულ შეთანხმებას ვერ

მიღწეის; ის მოითხოვდა 1100 რუბლს, ხოლო მთავრობა კი 900 რუბლზე მეტის გადახდას არ აპირებდა. როგორც ცნობილია, ომის დროს აფხაზეთი აჯანყდა რუსების წინააღმდეგ და მხარი თურქებს დაუჭირა. თურქებმა, რომლებიც გადმოსხდნენ ოჩამჩირესთან, რუსები გააძევეს და სოფელს ცეცხლი წაუკიდეს, რამაც იქაურობა მთლიანად გაანადგურა. მშვენიერმა სასახლემაც ეს ბედი გაიზიარა; მისგან აღარაფერი დარჩა, გარდა ნანგრევებისა, რომელიც მე გადავიღე.

ქვის ეს ჩონჩხი, ერთადერთი ნაშთი სასახლისა, რომელიც მისი გაფურჩქნის პერიოდში ვიხილე, დაჰყურებს უშველებელ გაუდაბურებულ ვაკეს ზღვის პირას. ველარსად ნახავთ ყვავილებით მორთული ბორცვების კვალს, სამაგიეროდ, უხვად წააწყდებით ნამსხვრევების გროვებს და დამწვარი სახლების ნარჩენებს.

ამრიგად, თავადმა გიორგი შერვაშიძემ ის თანხაც დაკარგა, რომელიც რუსეთის მთავრობამ ამბოხებამდე შესთავაზა. ბუნტის დროს მხოლოდ ერთადერთი სახლი გადარჩა თავისი მკვიდრებითურთ. იგი ეკუთვნოდა მეგრულ ვაჭარს, გვარად ბარკალაიევს და მასში სახლობდა ჰუსეინ ფაშა, აფხაზეთში თურქეთის არმიის სარდალი. ეს შენობა აჰუს (რომელსაც ასევე ეძახდნენ ვლადიტელს) სასახლის ახლოს მდებარეობს. 1881 წელს ყოფილი სიუმერინის ვაჟი აფხაზეთში დაბრუნდა, სადაც იგი ქვეყნის რამდენიმე უმდიდრეს ტყეს მართავს ბელგიური კომპანიისთვის.

1876 წლისთვის ოჩამჩირის მოსახლეობას, უმთავრესად, წარმოადგენდნენ მეგრელები და თურქები; ეს უკანასკნელნი, ძირითადად, ლაზები არიან, ანდა კოლონისტები ტრაპიზონიდან. ამ ბირთვის მცირეოდენი ბერძნებიც ემატებიან. რაც შეეხება რუსებს, გარდა მთავრობის მოხელეთა ჯგუფისა, რამდენიმე მათგანს თუ შეხვდებით; მიუხედავად ამისა, აღსანიშნავია სამსახურიდან გადამდგარი რამდენიმე სამხედრო და ორიც ის ოჯახი, რომლებსაც უწინდელ აჰუს ჰყავდა დატუსაღებული და ახლა აქ დამკვიდრებულან. სოფელს აქვს კაფე, თურქულის მსგავსი, რამდენიმე მსგავსი ტიპის სადალაქო და ასევე, პატარა მეჩეთი. აქაური აფხაზები, რომელთაც არ გააჩნიათ რაიმე პროფესია და არც ვაჭრობით არიან დაკავებულნი, ცხოვრობენ მეზობელ, პატარა სოფლებში, სადაც ამუშავენ სიმინდის მიწებებს. რაც შეეხებათ ქალებს, ოჩამჩირეში მხოლოდ რამდენიმე მათგანს თუ დაინახავთ; თითქმის ყველა თურქმა, რომლებიც აქ დასახლდნენ, საკუთარი ქალები თურქეთში გაამგზავრა; ხოლო ვინც ისევ აქ ცხოვრობს, ისინი გარეთ იშვიათად თუ გამოჩნდებიან ხოლმე.

ოჩამჩირეში, ასევე, აქვთ ქრისტიანული ეკლესია და სკოლა, მაგრამ არც ერთი მათგანი არ ყვავის. სამურზაყანოს ოქუმიდან განსხვავებით, აქაური სკოლა ცუდადაა მართული. ოჩამჩირის სკოლაში მხოლოდ ბიჭები სწავლობენ და გოგონებისათვის აქამდე არაფერი გაკეთებულა. უნდა აღვნიშნო, რომ ოლქის ადმინისტრაცია აშენებს ჰოსპიტალს, რისთვისაც კონტრიბუციას ადგილობრივი მოსახლეობა ნებაყოფლობით იღებს. მართალია, კლიმატი ნელ-ნელა უმჯობესდება,

მაგრამ ჯერ მაინც ციებ-ცხელების ბუდეა ჭაობების წყალობით, რომლებსაც ნელ-ნელა აშრობენ. ყველა ავადობის საწინააღმდეგო ადგილობრივი საშუალება ქინინია; წამლის ეს სახეობა ფართოდაა გავრცელებული კავკასიის პროვინციებში და განსაკუთრებით დიდი დოზით მას ოჩამჩირელები გამოიყენებენ. საინტერესო ისაა, რომ თურქები, დიდწილად, არ ავადდებიან რეგიონული მალარიით. ნუთუ ეს იმუნიტეტი მათი მოლების იდუმალებით მოცულ მეცნიერებას უნდა მივაწეროთ? თუკი წინასწარმეტყველის სექტის რომელიმე წევრი მაინც დასნებოვნდა, იგი ქინინით არ მკურნალობს, რადგანაც მათი ღვთისმსახური ამას კრძალავს. ამის ნაცვლად, ის დახმარებისთვის მიმართავს მუჰამედის მსახურს; მოლა ყურანიდან რომელიღაც სტროფებს ირჩევს, ქაღალდზე წერს მათ, წვავს ქაღალდს, შემდეგ კი ფრთხილად აგროვებს ფერფლს, გახსნის წყალში და ავადმყოფს ამ წამალს ასმევს. ამბობენ, იშვიათად თუ მოხდება, ნაყენმა ავადმყოფს არ არგოსო. მხოლოდ ბედისწერაა ერთადერთი, რომელიც აქ მონაწილეობს, ანდა ხელმარჯვე ჯადოქარი წმინდა ჩაის რაღაც საიდუმლო საშუალებებს ურევს. ეს ის საკითხია, რომლის ახსნაც ჩემს ძალებს აღემატება.

ზღვის თვალწარმტაც სანაპიროზე მდებარე ოჩამჩირე ორი მდინარით ირწყვება. ერთი მათგანია ლალიძგა, რომელიც ისეთი მდიდარია თევზით, რომ ანკესიც კი არაა საჭირო მათ დასატერად; შესაძლებელია მათი დახოცვა შაშხანით, როდესაც ისინი ტალღის ზედაპირზე თამაშს დაიწყებენ, ანდა მავანს შეუძლია ისინი ხელითაც კი დაიჭიროს. მეორე, ძალიან ტალახიანი მდინარე აძიქვა კი, პირდაპირ სამოთხეა ბაყაყებისთვის, წყლის სახეობისათვის, რომელსაც ადგილობრივები ასეთ საშინელებად მიიჩნევენ. აძი აფხაზურად ნიშნავს წყალს, ქვა კი მდინარეს, ხოლო ქართულში ეს უკანასკნელი აღნიშნავს „გასატირს“. სოფლის გარშემო, დაახლოებით ოცი ვერსის მანძილზე ამოზრდილა მთათა ქედები, რომელთა მწვერვალებიც წელიწადში ათი თვე თოვლითაა დაფარული. მხოლოდ ივნისსა და აგვისტოში გამოჩნდება ხოლმე მათი შუბლი, მაგრამ როგორც კი ოჩამჩირეში გაწვიმდება, მათი მწვერვალები კვლავ თეთრი ქურქით იმოსება. ქედის ზედა დონეზე, ძირითადად, მუხა, ჭადარი და ბზები ხარობს; ქვემოთ კი – წაბლი. ჰაერი კამკამაა, ხოლო ნიადაგი – არაჩვეულებრივი.

ოჩამჩირის ოლქი ორ ნაწილად, სამურზაყანოდ და კოდორად არის გაყოფილი; ეს უკანასკნელი ასე იწოდება მდინარის გამო, რომელიც იქ მიედინება. ოლქის თავს, რომელიც ოჩამჩირეშია გამწესებული, ჰყავს ორი მოადგილე, ერთი კოდორისთვის, რომელიც ასევე ოჩამჩირეში ცხოვრობს, მეორე კი, სამურზაყანოსთვის, რომელიც ოქუმში ცხოვრობს. გადასახლებული აჭუ, მიუხედავად მისი დესპოტიზმისა, გარკვეული პრესტიჟით სარგებლობდა, სავარაუდოდ, მისი ძირძველი ოჯახის გამო, რომელიც ამ ქვეყანაში მეთხუთმეტე საუკუნის შემდეგ ბატონობდა. შესაბამისად, რუსეთის მთავრობას გაუჭირდა ამ მთიელთა ენერგიული, დარაზმული და

არაცივილიზებული რასა დაემორჩილებინა, რომელიც ისედაც მტრულად იღებს ახალ რეჟიმს და სამუშაოს, ხოლო ვაჭრობის ნებისმიერ ფორმას პატივის აყრად მიიჩნევს. როდესაც რეგიონში ინდურ-ბრიტანული ტელეგრაფი დაამონტაჟეს, საკმაოდ გართულდა ადგილობრივი მუშახელის მოძიება; ახლახან კი, როცა ოლქის თავმა გადაწყვიტა ოჩამჩირის სიახლოვეს გზის გაკეთება, გლეხებმა ჯიქურად გაუწიეს წინააღმდეგობა მიწის საშენებლო სამუშაოებს და განაცხადეს, რომ ისინი მიწას მხოლოდ მაშინ თხრიან, როცა მასში საკუთარ მკვდრებს მარხავენ; თუმცა, დათანხმდნენ ხიდების ასაშენებელი მორების მოჭრასა და გამოთრევას.

ხელისუფლების ავტოკრატიული და მილიტარისტული სისტემა, რომელსაც, როგორც ვთქვი, ემორჩილება აფხაზეთი, ნაკლებად ცდილობს აქ ცივილიზაციის სიკეთეების განვითარებას და არც ინდუსტრიისა და ბიზნესის წინსვლას უწყობს ხელს. მთელი ვაჭრობა აქ ბერძნებისა და თურქების (უპირატესად, ამ უკანასკნელთა) ხელშია და ბათუმისა და ტრაპიზონის მიმართულებით გააქვთ ამ ქვეყნის მცირეოდენი პროდუქტი – სიმინდი, ცვილი, თაფლი, კაკალი და მერქანი. ამასთან, რუსული სანაოსნო კომპანიის პატარა გემი რეგულარულად მოძრაობს სოხუმ-კალესა და ოჩამჩირეს შორის. ის საუკეთესო საშუალებაა მოგზაურისათვის, რომელსაც სურს რომელიმე ამ ადგილიდან მეორეში ჩასვლა; ზღვით მგზავრობას სჭირდება ექვსი საათი, მაშინ როცა ხმელეთით გადაადგილებას მნიშვნელოვნად მეტი დრო მიაქვს.

1876 წლის მაისში, სოხუმ-კალედან ოჩამჩირეში მეც სწორედ ამ გემით გავემგზავრე. როდესაც ნაპირზე გადავედი, ისევ მეგრელ ვაჭართან, ბარკალაიევთან წამიყვანეს, ვისი სახლიც ისტორიული გამხდარიყო, რადგან თურქი ფაშა სწორედ იქ ცხოვრობდა.

იმ განსაკუთრებულ დილას დავინახე, როგორ იღვიძებდა და დგებოდა მთელი ოჯახი. არასოდეს დამავიწყდება, რა ეფექტი მოახდინა ჩემზე აქაურობის „ვაჭრობის პრინცი“ სახლის ინტერიერის დათვალიერებამ. სახლში აფხაზეთისთვის დამახასიათებელი არეულობა და სიბინძურე სუფევდა. მთავარი დარბაზი გამოირჩეოდა ერთობ უცნაური თვისებით: მშობლებსა და შვილებს, მამლებსა და დედლებს, ძაღლებსა და კატებს ყველას აქ მოეყარა თავი, რამაც ნოეს კიდობანი მომაგონა. მაგრამ ამ პრიმიტიულმა დაუდევრობამ ოჯახის თავს არანაირად არ შეუშალა ხელი მასპინძლობაში და არც სტუმრები დაუბრკოლებია, ესარგებლათ მისი სტუმართმოყვარეობით.

გასულ შემოდგომაზე, ოჩამჩირეში ჩემი მეორე სტუმრობისას, სასიამოვნოდ გაცემული დავრჩი ძველი ნაცნობების აღმოჩენით.

უბრალო გამვლელ მოგზაურს დრო არ აქვს იმის მისახვედრად, სტუმართმოყვარული ღიმილი, რომლითაც პირველი სტუმრობისას შეხვდნენ, შეიცვლება თუ არა უკან დაბრუნებისას. მაგრამ მე კმაყოფილი ვიყავი იმით, რომ გულლიად შემხვდნენ, ისე, როგორც მეგობარს. მათ შორის იყო ოჩამჩირის ოლქის უფრო-

სი და მისი ცოლი. ჩემი ჩასვლისას (ამჯერად, ცხენით) მეგობრულად მომეგებნენ და შემომთავაზეს თავიანთი საცხოვრებელი, როგორც ჩემი შტაბი. თუკი ზოგჯერ მაინც უბედურებას კარგი რამ მოაქვს თან, ოჩამჩირემ ნანგრევებად ქცევის შემდეგ იმით იხეირა, რომ გაიზარდა და ახლა უკეთაა გაშენებული. ბაზარი, საჯარო შენობები უფრო დიდია, სახლები კი – სტუმართათვის უფრო კეთილმოწყობილი.

ოლქის მმართველის სახლი, რომელიც ზღვას გადაჰყურებს, ერთ-ერთი ყველაზე მშვენიერი შენობაა. ბაზარი მეორე მხარეს იშლება. სათვალთვალო კოშკი-შუქურა მეზღვაურებისათვის წყლის პირასაა აღმართული. მის ძირას მდებარეობს კოტეჯი, რომელშიც სახლობენ სამეზობლოს თურქი ხუროები. მინდოდა მათთვის სურათები გადამეღო და ამისათვის ჯგუფიც კი განვალაგე (რომელშიც გამოირჩეოდა წინდის მქსოველი მოხუცი კაცი), მაგრამ ამასობაში გამოჩნდა მოლა, რომელმაც უბრძანა, ამდგარიყვნენ და შეახსენა, რომ, რელიგიური პრინციპების თანახმად, არავის უნდა მისცენ საკუთარი პორტრეტის შექმნის უფლება.

ოჩამჩირე ჩემი სადამკვირვებლო პოსტი იყო, აქედან მივდიოდი ახლომდებარე ადგილების სანახავად და აქედან ვაწყობდი შთამბეჭდავ ექსკურსიებს.

ამჯერადაც თან მახლდა რუსი ოფიცერი, რომელიც პირველი სტუმრობისას უკვე იყო ჩემი მეგობრი; ამჯერადაც ისეთივე თავაზიანი და ზრდილობიანი გახლდათ, როგორც ადრე; ენა და ქვეყანა იცოდა, ჩემთვის უკიდურესად სასარგებლო აღმოჩნდა. თან მოგვყვებოდა ჩემი ფოტოგრაფიული აღჭურვილობით დატვირთული ჩაფარი. ამ ოფიცრის, მ.ვ.ს.-ს თავაზიანობას უნდა ვუმადლოდე, რომ შავი ზღვის სანაპიროზე ამდენი საინტერესო რამ მოვინახულე.

ერთ-ერთი მათგანი იყო ჯამიშის ყურე, რომელშიც მისივე სახელობის მდინარე ჩაედინება, ოჩამჩირესა და მდინარე კოდორს შორის. ეს ყურე, რომელიც თვალწარმტაცი ხედებით გამოირჩევა, წარმოქმნის ხშირად ნახსენებ ნამგაღს. დაბლობი, რომელიც მას გარს აკრავს, მწყემსთა სანატრელი ადგილია. ისინი დიდი რაოდენობით საქონელს ერეკებიან აქ, სადაც პირუტყვს არწყულებენ და კარგ საძოვრებასაც ადვილად პოულობენ.

ასევე, შევჩერდი ყურედან არცთუ ისე შორს მდებარე გზაზე, სადაც როდოდენდრონის ტოტებით შეკრულ ქოხში ჩაფრების პოსტია განთავსებული. ამ ბუჩქის ტოტები, მისი სიმტკიცის გამო, დიდადაა დაფასებული. ამაში დავრწმუნდი, როცა გავიგე, რომ ერთი შეხედვით უკიდურესად ფაქიზი ქოხი, თურმე, ნახევარი საუკუნის განმავლობაში უძლებდა ქარიშხალს. მათ ამის რამდენიმე მაგალითი მოიყვანეს. როდოდენდრონი ძალიან გავრცელებულია კავკასიაში და გასულ ნოემბერს იგი რამდენიმე ფერად აყვავებული ვიხილე.

ოჩამჩირიდან დაახლოებით რვა ვერსში მდებარეობს ტაძარი, რომელსაც

ხალხის ცნობიერებაში კარგა ხანს გარკვეული ცრურწმენები უკავშირდებოდა; ეს ილორის ეკლესიაა, უწინ პილიგრიმთა საყვარელი ადგილი. მასთან მისასვლელად უნდა გაიაროთ დაბლობი, რომელიც მდინარე ლალიძგამდე იშლება, შემდეგ კი, ხიდის უქონლობის გამო, მდინარის გადალახვა მოგიწევთ. მდინარის მეორე ნაპირზე მოხვედრით თქვენ უკვე ილორის თემში ხართ და გზაც არაჩვეულებრივი ხდება; ეს სამხედრო გზაა, რომელიც გარკვეული ხნის წინ გაიჭრა ოქუშის სამურზაყანოსთან დაკავშირების მიზნით. გზის მარჯვენა და მარცხენა მხარეს მცენარეული საფარის სიმდიდრე და ხეთა სიდიადე მკვეთრად უპირისპირდება აქა-იქ გაფანტული საცხოვრებელი სახლების სილატაკეს. გაღავნიტ გარშემორტყმული ტაძარი უშველებელი დაბლობის ცენტრშია წამოშორებული; კარის სიახლოვეს დაინახავთ ნიშას, რომელიც გვირგვინდება ამ ეკლესიის მფარველის, წმინდა გიორგის გამოსახულებით. ძველი სპილენძის სამფეხაზე შესაწირავის ყუთია განთავსებული: გატეხილი სახურავი და დაკარგული ბოქლომი ადასტურებს, რომ კარგა ხანია, შესაწირი აღარავის ჩაუგდია.

მონასტრის საცხოვრებელთა შედარებით უფრო ახალი ჩანს ეკლესია, რომლის გუმბათი მშვენიერი ბიზანტიური სტილითაა ნაგები; ხვეულ კიბეს ოცდაექვსი ჩამონგრეული საფეხურით კოშკში აჭყავხართ; აქ ხუთი რომაული თალი გამოუკვეთავთ, რომლებზეც ჯერაც კიდია, უხმოდ და უძრავად, ბრინჯაოს ხუთი დიდი ზარი, რომელთაგან ერთი შერვაშიძის სახელს ატარებს. დაბლა დაინახავთ ეკლესიაზე გადაბმულ სასაფლაოს; წარმოსადგენია, როგორი მეღანქოლიური იქნება ეს შემოღობილი ალაგი, სადაც მხოლოდ უყვავილო ბორცვების მწკრივი თუ მიუთითებს ადგილზე, სადაც მიცვალებულნი განისვენებენ.

თავისი სტილით ტაძრის ინტერიერი მოგაგონებთ სამეგრელოს მარტვილის მონასტერს: ორივეს აქვს ბიზანტიური ჯვრის ფორმის კამარა და ორივეს კედლებზე შეამჩნევთ ფრესკების კვალს. ეს ტაძარი, მრავალგზის აოხრებული თურქების მიერ, რომელთაც გაიტაცეს ვერცხლის ჩუქურთმებით შემკული კარი და სხვა მრავალი ძვირფასი ნივთი, დღეს მხოლოდ იმ გაშიშვლებული კედლების სახითაა წარმოდგენილი, რომლებიც ნესტს მწვანე ხავსითა და ობით მოუხატავს. კანკელი, რომელსაც, როგორც ამბობენ, ამშვენებდა ძვირფასი ქვებით მოოჭვილი ფიგურები, გაუჩინარებულია. მის ადგილას დგას ტიხარი, ზედ უხეშად გამოსახული წმინდანებით; ორივე მხარეს განლაგებულია ორი პატარა საკურთხეველი, რომლებიც მოგაგონებთ პატარა მაგიდებს და მორთულია უკანასკნელი აჭუს ცოლის მიერ მოქარგული წითელი ქიშმირის ქსოვილით. ხელმარცხნივ კიდევ ერთხელ ვხედავთ ძალიან ძველ წმინდა გიორგის; შემდეგ, გამოსახულების ზემოთ ძვირფასი ქვებით მოჭედილი ორი ოქროს მახვილი კიდია; მათს ბასრ პირებს შენიშნავდით თვით ქარქაშებიც კი, ლალებით რომ შეუმკიათ და ღია ლურჯი ხავერდის ზონრებით მიუმაგრებიათ; ამბობენ, რომ ეს იარაღი მუსლიმი სარდლის ძღვენია,

რომელიც ტაძრის ასაოხრებლად მოვიდა, მაგრამ ამ საქმის აღსრულებაში ხელი წმინდანის მიერ ჩადენილმა სასწაულმა შეუშალა.

ნება მიბოძეთ, კიდევ ერთხელ აღვნიშნო საეკლესიო საღაროს, ხის მოუხეშავ კარადაში შელაგებული ერთგვარი ანტიკვარული ნივთების შესახებ, სადაც უზანგის, მათრახისა და ცხენის ლაგამის გარდა ინახებოდა ბეჭდები, სხვადასხვა ვალუტა, უძველესი სამკაულები და თვით მაწვნის საჭმელი რქის კოვზებიც კი. ყველა ეს ნივთი იმ მადლიერ მორწმუნეთა ძღვენია, რომელთაც საკუთარ თავზე გამოსცადეს წმინდანის შემწეობა.

ილორის ეკლესიის დღესასწაული სათავეს იღებს სასწაულიდან, რომელიც, საუკუნეების განმავლობაში, ყოველ წელს ხდებოდა წმ. გიორგის დღეობის წინა საღამოს. ამ დღეს, ბერძნული სტილით 9 ნოემბერს, ზღვიდან ამოდიოდა მოოქრულრქებიანი ხარი და ტაძარში შედიოდა, არავინ იცის, როგორ, რადგანაც კარს საგულდაგულოდ კეტავდნენ და მეორე დღემდე არავინ უნდა შეხებოდა. კვამლის ღრუბელი, ტაძარს გარშემო ათავრ რომ ეხვეოდა, მორწმუნეთ სასწაულებრივი ცხოველის გამოჩენის შესახებ აუწყებდა; თუკი ღვთაებრივი ნისლი არ გამოჩნდებოდა, ეს ნიშნავდა, რომ წმინდა გიორგი უარს ამბობდა მფარველობაზე. დილით მღვდელი, ქვეყნის მნიშვნელოვან ადამიანთა თანხლებით, უნდა შესულიყო ეკლესიაში და მიახლოებოდა ხარს; თუკი იგი გვერდზე გახტებოდა, ეს ავბედითი ნიშანი იყო; თუკი პირიქით, მათ მშვიდად შეხვდებოდა, მაშინ წინ სასიკეთო და ბედნიერი წელი ელოდათ. წმინდა ცხოველს მსხვერპლად სწირავდნენ დიდ სასაკლაოზე, თუმცა არავის ჭამდა. მისი ხორცი მორწმუნეებს შორის ნაწილდებოდა, ისინიც ინახავდნენ სხვა მრავალთა შორის, როგორც წმინდა ნაწილსა და ამულეტს ავი თვალის წინააღმდეგ. საუბედუროდ, მრავალი წლის განმავლობაში, აღნიშნულ დღეს ეკლესიის შესასვლელს კეტავდნენ და მთელი ღამე ამაოდ ელოდნენ: ზემოდან კვამლი აღარ ეშვებოდა ხოლმე და არც აპისი-ხარი აღწევდა იდუმალად კედლებში, რათა საკუთარი თავი მსხვერპლად მიეტანა სამღვდელთა დანის ქვეშ. ადგილობრივების თქმით, წმინდა გიორგიმ შეწყვიტა ქვეყნის მფარველობა და მიუთითებდნენ, რომ წმინდანმა მაშინ მიატოვა ქვეყანა, როცა თურქმა ფაშამ ტაძარში დაიბანაკა და წაბილწა იგი.⁶

1881 წლის ნოემბერში აქაური მცხოვრებლები მონაწილეობდნენ ილორის ეკლესიის აღდგენაში. იქ ჩასულს სრული რია-რია დამხვდა, მიწაზე საგანძურის შემადგენელი ნივთები ეყარა. მღვდელი სოსიმ ღელაია მათ ერთად მოგროვებაში მომეხმარა. დიდი იყო მისი განცვიფრება, როდესაც დამინახა, ამ *ex votis* სა-

6. სიმართლე ის არის, რომ ზედმეტად ბევრი ხალხის შეკრების თავიდან არიდების მიზნით, რეგიონის სიმშვიდე რომ შეენარჩუნებინათ, ხელისუფლება ხელს უშლიდა წმინდა ხარის გამოჩენას ილორში.

მრეკლოს ძირში, კედელთან როგორ ვალაგებდი და რომ ვთხოვე, მათ გვერდით დამდგარიყო.

როდესაც ეს მოქმედება დასრულდა, მოხუცმა მღვდელმა ის იშვიათი ნივთები, რომლებიც მისი სამწყსო ეკლესიის სიმდიდრეს შეადგენდა, უკან, კუთხეში დაა-
ლაგა. კიდევ უფრო მეტად გაოცდა, როცა ნახა, რამხელა მნიშვნელობას განიჭ-
ებდი ამ მცირე საგანძურის რეპროდუქციას, რომელსაც ჩემთვის ღირებულება
ჰქონდა ნაივური ორიგინალობისა და დიდი უბრალოების გამო. შემდეგ მიმანიშნა
თავის საცხოვრებელზე, სადაც უნდა დაგვესვენა. ამ საკმაოდ კოხტა სახლს ჩრ-
დილავდა უშველებელი ხეები, რომელთაც მთელი თავისი მდიდრული სიმწვანის
დიდებულება, მიუხედავად გვიანი შემოდგომისა, სახლზე გადაეშალათ. საცხო-
ვრებელში შეიძლებოდა ერთგვარი კომფორტის პოვნა, რაც ბევრად აღემატებო-
და იმ ეკლესიის კეთილმოწყობას, სადაც ეს სოფლის მღვდელი მსახურობდა. მან
შემომთავაზა სიმინდის შეჭამადი, ყურძენი და დიდებული ღვინო, მისი მინდვრე-
ბისა და ვენახების ბრწყინვალე მოსავალი.

თუმცა, მოდით, დავუბრუნდეთ ილორს, რომელიც ახალი და მომხიბვლელი
სოფელია, მდებარე იმავე სახელწოდების მდინარეზე, დაახლოებით ორი ათასი
მოსახლით. საცხოვრებელი სახლები საკმაოდ შორი-შორსაა განლაგებული და
თითოეულ მათგანს კარგა გვარიანი მამულიც აკრავს ირგვლივ.

ძველ სოფელში, რომელიც ეკლესიიდან რამდენიმე ვერსის მოშორებით
მდებარეობს, მავანი ძნელად თუ აღმოაჩენს რამდენიმე ნასახლარს.

ღამე გავათენე ერთ-ერთი აფხაზი ბატონის ქვრივის სახლში, რომელთაც არ
გააჩნდათ მათი თავადაზნაურობის დამადასტურებელი რაიმე სიგელ-გუჯარი,
თუმცა ეს ყველაფერი აღბეჭდილიყო მოხუცთა მეხსიერებაში; და რადგანაც ამ-
ჟამად ისინი მიწების განაწილებით იყვნენ დაკავებულნი, მათი ვაჟი, რომელიც
ახლა მილიციელად მსახურობდა ოჩამჩირის ოლქის უფროსთან, რეგიონში მოგ-
ზაურობდა, რათა ხალხს მისი არისტოკრატიული წარმომავლობა ელიარებინა.
ამ სახლს, შედარებით, არ აკლდა კომფორტი; გონივრულად მართული მამული
აყვავების გზას ადგა და ახალგაზრდა კაციც, მიუხედავად სავალდებულო ძონ-
ძებისა, საკმაოდ კარგად იყო გამოწყობილი.

მოხუცი ქალი, რომელსაც სხვა შვილი არ ჰყავს, გარშემორტყმულია რამდენიმე
ახალგაზრდა გოგონათი, მოწაფეებით, რომლებიც დედას ეძახიან; სწორედ ის
აძლევს განათლებას. მართლაც, ხშირად ხდება, რომ მშობლები საკუთარი შვილ-
ების აღზრდა-განათლებას მესამე მხარეს ანდობენ ხოლმე და სახლში იქამდე
არ მიჰყავთ, სანამ მათი ქორწინების ჟამი არ დადგება. ამ ძვირად ღირებული
სწავლების საფასურს, *ex post facto*, ცხენის, საქონლის ან მიწის ჩუქებით იხ-
დიან. მიუხედავად იმისა, რომ ანაზღაურება ზოგჯერ სასამართლო დავის საგანი
ხდება, ოჯახებს შორის ეს ორმხრივი შეთანხმება, სისხლით ნათესაური კავშირის

გარეშეც კი, მათ შორის ამყარებს ახლო და გულმხურვალე ურთიერთობას, რომელიც ხშირად სისხლით ნათესაობაზე უფრო ძლიერია. მაგრამ ყველაზე წმინდა კავშირი აფხაზებისა და მეგრელებისათვის ძუძუმტეობაა; გამზრდელი ითვლება არა მხოლოდ მეორე დედად და ოჯახში ძალაუფლების მქონედ, არამედ მისი შვილებიც ისეთივე მიღებული არიან ბატონის ოჯახში, ვის შვილსაც ძუძუ აწოვა.

ამ ქვეყანაში, სადაც მიწა მიწათმოქმედს არ ეკუთვნის და აჭუს ერთი ახირების გამო, შეიძლება, მის მიერ აყვავებული მიწიდან გამოაძევონ, მცხოვრებლებს ჩვეულებად აქვთ ქცეული ერთი ადგილიდან მეორეზე გადასვლა და თავიანთ საცხოვრებელს დროებით სამკვიდრებლად თვლიან. დღესაც კი, თუკი ადგილი აღარ მოსწონთ ან იმის გამო, რომ მათი საყვარელი ახლობელი გარდაიცვალა, ანდა ადგილობრივთა ცრუმორწმუნე გონება რაიმე ავს მიაწერს ამა თუ იმ ალაგს, სხვაგან გადასახლების გადაწყვეტილებას ადვილად იღებენ და არანაკლები სისწრაფითაც აღასრულებენ ხოლმე. რადგანაც სახლები მოძრავი ოთახებია, მათ მხოლოდ ჩალის სახურავის, მოწნული კედლებისა და საყრდენი ბოძების მოშლა და კამეჩებზე ან ცხენებზე შემოწყობა სჭირდება, მსუბუქ ავეჯთან – ხის გრძელ სკამებთან, ლეიბებთან, ბალიშებთან, გადასაფარებლებთან, ზედადგარსა და ქვაბთან ერთად. არ ავიწყდებათ ეროვნული გიტარაც (აფხაიარცა), რომელიც, ოჯახის ახირების გამო, ავეჯთან ერთად მოგზაურობს ხოლმე. დარწმუნებით შემოიძლია ვთქვა, ეს ამ ხალხის პრიმიტიული ცხოვრების ყველაზე მომხიბლავი და მოსახერხებელი ასპექტია; ისინი ჩვენგან განსხვავებით, არ არიან კომფორტს მიჯაჭვულნი და სრულებითაც არ იცნობენ ჭარბ დოვლათს, ცივილიზებული ხალხისთვის ასე „გარდაუვალს“; სავსებით კმაყოფილნი არიან, თუკი დღევანდელი საჭიროებისათვის სამყოფი ჯამ-ჭურჭელი გააჩნიათ. გზად არ უჭირთ ღამის გასათევი ადგილის მოძებნა, პირუტყვს საძოვარზე უშვებენ, ზოგჯერ ალკაზმულსაც კი, ხოლო მეორე დილას, გამთენიისთანავე, მოგზაურთა ქარავანი კვლავ მთებსა და ველებს შეეფინება.

ოჩამჩირის გარშემო მოგზაურობისას, გამაკვირვა სომეხ ოჯახთან შეხვედრამ. ისინი უკან, საქართველოში ბრუნდებოდნენ მას მერე, რაც აფხაზეთში არეულობა მიწყნარდა.

სომხებს, როგორ საყოველთაოდ ცნობილია, აქვთ ვაჭრობის ნიჭი. ასე რომ, გასაკვირი არაა მათი ხილვა ოჩამჩირეში, სადაც აღმშენებლობა დაიწყო. სომხები, ჩართულები არიან რა ყოველგვარ ვაჭრობასა და მომარაგებაში, კარგა გვარიან ფულს შოულობენ და ოჯახებს მხოლოდ ამის შემდეგ უბრუნდებიან. ეს იყო ერთ-ერთი ასეთი ვაჭრის ოჯახი, რომელსაც გზად, მდინარის ნაპირას სადილობისას გადავეყარეთ.

ჩვენი მოგზაურობების გაგრძელების წინ ვთხოვე, ფოტოს გადაღების ნებართვა მოეცათ, სადაც მათი საცოდაობისა და სიმდიდრის ნაზავი გამოჩნდებოდა.

კარგად ჩაცმული და ცხენზე ამხედრებული ოჯახის თავი ატარებდა დიდებულ იარაღს, რაც იშვიათობას წარმოადგენს სომეხთა შორის, რომლებიც, ჩვეულებრივ, არ არიან ხოლმე შეიარაღებულნი.

ბედაურზე მჯდომს ხელთ უპყრია ჩონგური, ეროვნული გიტარა, რომელსაც დაუნახავთ როგორც მდიდარს, ისე ღარიბს და რომლის სიმეხსაც შეუძლია როგორც სუფრის გამხიარულება, ისე ავადმყოფისათვის ძილის მოგვრა.

სომეხი, რომელმაც გესაუბრებით, ჩონგურს უკრავდა, რათა თავისი მემკვიდრის ტირილი შეეჩერებინა. ბავშვი დედას კაბაზე ეჭიდებოდა და ასე თრევა-თრევით მიჰყვებოდა, რადგანაც, სავარაუდოდ, არბაზე (ტრადიციული ქართული ურემი) უნდოდა დაჯდომა, რომლისკენაც უხმოებდა მისი გამზრდელი მსახური (ქვეყნის ადათ-წესების მიხედვით). ამ პატარა აზიური გარეგნობის ყმაწვილის შესახედაობა, რომელსაც თავი დიდი ფაფახით დაეფარა, – ეს იყო ერთადერთი რამ, რაც მას ემოსა, მაგონებდა იმ პირველ ადამიანს, დარვინმა რომ აღწერა. დედამისის ნაყოფიერება სადავო არაგვისთვის უნდა ყოფილიყო, რადგანაც პერანგის ქვეშ კიდევ ჰყავდა ერთი ჩვილი, რომელსაც მკლავებით არწევდა, მესამე კი მხრებზე ეჯდა და მისი გაბმული სიცილი ძმის ტირილს უერთდებოდა. ეს ქალი სადღაც, ფილტვების ზედა ნაწილით, გამყინავი ხმით მღეროდა სომხურ დატირებას, რომლის ხორხისმიერი სიტყვები ნაკლებად თუ მატებდა ჰარმონიას ამ ოჯახის უკიდურესად მრავალფეროვან კონცერტს, რომელიც ფოტოს გადაღებისასაც არ შეწყვეტილა და მაშინაც კი ჩამესმოდა, როცა ისინი საკმაოდ დაგვშორდნენ. ამ სანიმუშო დედის ტანისამოსი არ ტოვებდა სისუფთავის შთაბეჭდილებას, მაგრამ ასეთი დაუდევრობა გასაგები იყო ამ პირობებში. მას არ ჰქონდა ქართული თავზე წასაკრავი (თავსაკრავი) პირბადით; ლამაზი, შავი თმა თხელ კულულებად ეყარა მხრებზე, აბრეშუმის ჭრელყვავილებიანი მოსასხამით რომ ჰქონდა დაფარული. ყელი, მკლავები, წელი, ერთიანად ჰქონდა მორთულ-მოკაზმული ნამდვილი სახელოვნებო ღირებულების მქონე სამკაულებით. ეს ძვირფასი ნივთები ქალის უბადრუკ ფეხსაცმელთან მართლაც რომ თვალში საცემ განსხვავებას ქმნიდა.

ხელმარცხნივ მიდიოდა მისი უფროსი ქალიშვილი, ღარიბად ჩაცმული და ჩემოდნებით დატვირთული. ოჯახის წევრები ურმის წინ მიდიოდნენ. მთელი ავლადიდება ორი უზარმაზარი ხარისთვის აეკიდებინათ, რომლებსაც ახალგაზრდა მსახური მიუძღოდა, იუმორითა და სომეხთათვის ასე დამახასიათებელი მოთმინებით სავსე, ვინც მეეტლისა და მზარეულის როლსაც ასრულებდა და თან ატირებული ბავშვის ძიძობასა და აღმზრდელობასაც ითავსებდა. მის დამშვიდებას თბილი სიტყვებით ამაოდ ცდილობდა.

ურემში მოეთავსებინათ მოგზაურობისთვის აუცილებელი ნივთები. ზემოდან იდო ქვაბი, შეუცვლელი ჭურჭელი სიმინდის შეჭამანდის მოსამზადებლად. ერთ მხარეს კონწიალობდა ბასკური დოლი, სავალდებულო ინსტრუმენტი, ეროვნული

ცეკვის, ლეზბიანკას შესასრულებლად, რომლის გარეშეც ვერ ნახავდით ვერც ერთ ოჯახს – ვერც შეძლებულსა და ვერც ღარიბს.

ძირითად ეკიპაჟს უკან მოჰყვებოდა მეორე მსახური, ნაბადში გახვეული და ფაფახში გამოწყობილი. ის წინ მოუძლოდა ორ ცხენს, მრავალი ფუთით დატვირთულთ ლოგინითა და კავკასიური სახლის მოსართავად საჭირო ნივთებით.

ჩემი პირველი ვიზიტისას დავგვემე ვწვეოდი მუხურს, რათა თავად ანჩაბადის ღვინის მარანი მენახა.

ილორსა და სამურზაყანოს ამ სოფელს შორის მდებარეობს განცალკევებული დაბლობი, დასერილი ბილიკებით, სადაც სრულიად ველური ფლორა ხარობს. მაშინ ადმინისტრაცია აშენებდა გზას, რომელიც სოხუმ-კალემდე, აფხაზეთის მთავარ ქალაქამდე უნდა მისულიყო. ნებით თუ ძალდატანებით, ადგილობრივებმა თავიანთი წვლილი ამ პროექტში სრულიად უფასოდ შეიტანეს. ახალი გზის სიახლოვეს, რომლის კიდემც ოხურეი მიედინება და სამურზაყანოსა და აფხაზეთს შორის საზღვარს ქმნის, ჩაფრების პოსტიდან არცთუ ისე შორს, წააწყდებით წყაროს, რომლის მაღალ ტყეთა შორის მორბენალი გამჭვირვალე ჩქერალები, არემარეს მუდმივი სიგრილით ავსებს. სწორედ აქ ველოდი ცხენების შეცვლას, რომლებიც იქვე, მიმდებარე საძოვრებიდან უნდა მოეყვანათ. დავტოვეთ რა ილორი მზის ამოსვლისას, მუხურში შუადღისას ჩავაღწიეთ და თავად ანჩაბადის ნათესავის სახლში დავბინავდი, რომლის ბრძოლაც სამეგრელოს მთავრის, დადიანის წინააღმდეგ უკვე აღვწერე. მისი სამფლობელო ერთობ კარგად გამოიყურებოდა, თავისი უშველებელი ხეხილის ბაღითა და კარგად მოვლილი ვენახით, რომლის რიგები თვალუწვდენელ სიგრძეზე იყო გაჭიმული, მისი მარანი კი ამფორებით (ღვინის ჭურჭელი) იყო გადატეხილი, რომ აღარაფერი ვთქვათ კედლის გასწვრივ ჩამწკრივებულ კასრებზე, რომლებზეც შენიშნავდით რუსულ წარწერას „იზაბელა“.

ეს განსაკუთრებული ღვინო, ვარდისფერი ელფერი, ოდესის შემოგარენში მოდის. ჩემმა მასპინძელმა მუხურში შემთხვევით აღმოაჩინა კასრი, ჩაასხა ღვინო და ამავე დროს ამფორაც აავსო, რათა ენახა (რადგანაც იგი გურმანი და პროგრესული ადამიანი იყო), თუ რომელი მეთოდით დავარგება იქნებოდა უფრო წარმატებული. ამ შემთხვევაში კასრმა აჯობა და მას შემდეგ მოხერხებული სამურზაყანოელი, თურმე, თავის გამორჩეულად საყვარელ მოსავალს კასრში ინახავს.

მოულოდნელი შემთხვევის გამო, მუხურში რამდენიმე საათით მომიხდა გაჩერება. თავადის ქალიშვილი, თხუთმეტი წლის მომხიბვლელი გოგონა, დაქორწინებული ამდენივე დღის წინ, ჩემი ტანსაცმლის ჩაცმის გიჟურმა სურვილმა შეიპყრო და მოინდომა, საკუთარი მზითვიდან ჩემთვის ყველაზე ლამაზი ტანსაცმლის ეჩუქებინა.

შევცადე, მისთვის ამეხსნა, რომ მთებში მოგზაურობისას არ შემეძლო ამ გრძელმკლავიანი, მკერდთან ღრმად ამოჭრილი ფარჩის ჩაცმა, მაგრამ სულ ამაოდ. მან მოირგო ჩემი ტანსაცმელი, რომელშიც მომნუსხველად გამოიყურებოდა და აღარ უნდოდა მისი გახდა. შევთავაზე, რომ შევუკერავდი ასეთივეს, თუკი ქსოვილს მიშოვიდა; ამის გაგონებისას სიხარულით შეხტა. მაშინვე გაგზავნეს მოსამსახურე და მოატანინეს წითელი ქსოვილი, დიდი ფოთლოვანი მოხატულობით. მეც გამოვჭერი კაბა თავადურ ყაიდაზე. ქალბატონები მომეხმარნენ მის შეკერვაში. კაბა მოვაბოძე და ისე კარგად მოერგო ჩემი ლამაზი კლიენტის წელს, რომ მისით თვით ცნობილი უორტის⁷ სახლიც კი აღფრთოვანდებოდა.

რუსი ჯარისკაცების მიერ გაკეთებულ სტრატეგიული გზა მუხურიდან მიგიყვანთ პატარა სოფელში, რომელსაც ჰქვია „წაბლის ხიდი“ ანუ ადგილობრივთა ენაზე – ჭუბურ-ხინჯი. დღეს ხიდი აღარ არსებობს, ვერ გაუძლო დინების ძალას. სახლი კი, სადაც იმ ღამისათვის თავშესაფარი ვიპოვე, ამ რეგიონში ყველაზე შეძლებულ თავადს ეკუთვნოდა; მას საერთო არაფერი ჰქონდა იმ მოწულ ქოხმასებთან, რომლებში ღამის გათენებასაც ასე შევეჩვიე. ეს იყო მშვენიერი ორსართულიანი შენობა, არაჩვეულებრივი ვერანდისაყენ ამაველი ორმხრივი კიბით. მიწაზე ფეხიც კი არ დაგვედგა, რომ „მხლებელთა“ ამაღამ მოირბინა და ჩამოგვართვა ცხენის აღვირი და თვით თავადიც კი გამოგვეგება. სახლიდან აღწევდა გიტარის აკორდები, შერწყმული ქალთა ხმებთან, რაც იქ სათუთი სქესის მყოფობაზე მიუთითებდა. საკუთარ თავს უკვე ვულოცავდი ამ მომხიბვლელ სახლში მოხვედრას; მაგრამ რაოდენ დიდი იყო ჩემი იმედგაცრუება, როგორც კი ზღურბლს გადავაბიჯე! ეს სახლი, რომელმაც გარედან ასეთი კარგი შთაბეჭდილება მოახდინა, შიგნით შემაშინებელი სიბინძურით იყო სავსე. ყველაზე უარესი კი ის იყო, რომ ქალბატონებიც იქვე იყვნენ. მიუხედავად ახალგაზრდობისა, მათ, შესაძლებელს შორის ყველაზე გადაფითრებული პირისახეები ჰქონდათ, ცუდად შენიღბული ფერუმარილით, რომელიც თაბაშირივით ეცხოთ ღაწვებზე. დაუდევრად შემოსილნი, წელში გამართულნი ეყუდებოდნენ ჭუჭყიან კედელს, რომელსაც მათი სამოსი კიდევ ერთ ჭუჭყიან ლაქად ემატებოდა. ძნელი იყო იმის დაჯერება, რომ ეს ფეთხუმები თავადის ასულები იყვნენ.

სიბუნძურის გამო არც ის ვახშამი, რომელმაც თავად მასპინძელმა გასწია მომსახურება, გამოდგა დიდად სასურველი.

მიუხედავად ამისა, თავადს ცივილიზაციის გარკვეული ელფერი დაედო რუსეთში, სადაც რამდენჯერმე ყოფილა გამწესებული ცხენის ქურდობისათვის. ცხენის ამ არაკეთილსინდისიერ ვაჭარს თავის უზარმაზარ მამულში ჰყავდა ცხენთა

7. შარლ ფედერიკ უორთი (1825-1895) – ინგლისური წარმოშობის ცნობილი ფრანგი მკერავი (მთარგმნ.).

მოდგმის ყველაზე მშვენიერი წარმომადგენლები. ამასთან, იგი ფლობდა ბამბის, სელის, კანაფისა და ჭვავის პლანტაციებს, ყველა იმ პროდუქტს, რომელიც იზრდება სამურბაყანოში, მაგრამ, გავიმეორებ, არა აფხაზეთში.

„წაბლის ხიდის“ შორიახლოს, სათანჯოს მთაზე მდებარეობს ათანგელოს ციხე, რომელიც უკვე ვახსენე.

აფხაზეთში პირველი სტუმრობისას, 1876 წლის ზაფხულში, ისევე, როგორც გასულ შემოდგომაზე, ჩემი ძირითადი სადგური ოჩამჩირე იყო. ოლქის უფროსმა, რომლის სტუმარიც მაშინ ვიყავი, ყველაფერი გააკეთა იმისათვის, რომ ქვეყანა კარგად დამეთვალეოებინა და მოგზაურობა სასარგებლოსთან ერთად სასიამოვნოც ყოფილიყო.

როგორც ვნახეთ, ცხენოსანთა წვეულებები ერთობ მოდური რამ იყო. ჩემ გასამხნევებლად ხშირი, სასიამოვნო წვეულებები ტარდებოდა. შედეგად, ექსკურსიების ნაწილი სწორედ რომ ურიცხვ თანმხლებთან ერთად გავატარე. ადგილობრივებისთვის ეს კარგი გასართობიც იყო.

ცხენოსანთა ერთ-ერთი საყვარელი ადგილი იყო მოქვი, უკანასკნელი აჭუს საზაფხულო რეზიდენცია, რომელიც მდებარეობს ოჩამჩირიდან 15 კერსის დაშორებით, მდინარე მერკულაზე; მისი სახელიდანაც მომდინარეობს სახელწოდება მოქვი. ეს მდინარე დასაბამს იღებს შვიდი კერსის მოშორებით მდებარე პანარას მთიდან, სოფელ გუფის სიახლოვეს და ზღვაში ჩაედინება ოჩამჩირიდან დაახლოებით ოთხ კერსზე მდებარე სოფელ არადუსთან. იქამდე კი კვეთს ცაცხვების, მუხების, ბზებისა და ჭადრების თვალწარმტაც ტყეებსა და მინდვრებს, სადაც უჩვეულოდ მაღალი სიმიწი იზრდება.

მოქვისაკენ მიმავალი გზის ნახევარი შავ ზღვას მიუყვება; აქა-იქ, მავანი იძულებულია, გადალახოს ტბების მსგავსი გუბურები, რომელთა ნაპირებზე დაინახავთ კუებს, მშვიდად რომ მიუყვებიან თავიანთ სიზმრისეულ გზას. უკვე აღვწერე ფერადოვანი და ერთგვარად კარნავალური ჩაცმა-დახურვის ყაიდა, რომლითაც ცხენოსნები გამოირჩევიან. აქ, აფხაზეთში, კაცები, მსგავსად კავკასიაში მიღებული წესისა, იცვამენ ჩერქეზულ სამოსს, ოღონდ ჩერკას უხეში ყავისფერი შალით შეკერილი ყაბალახით (აფხაზურად, ახტარპათი) ანაცვლებენ, მათი სამასრეებით (ახუმუვი) გაწყობილი ტანსაცმელიცა და ფეხებთან ზონრებიანი ვიწრო შარვალის (აიქუა) იმავე ქსოვილისაა. რაც შეეხება სახელოებიან პერანგს (აკაბა), რომელსაც ატარებენ აქმგიუს ქვეშ, იგი ღია ფერის ანდა თეთრი ბამბის ქსოვილითაა შეკერილი. ტყავის წინდები აცვიათ, რომლებიც ამოდის კოჭებს ზემოთ და ანაცვლებს გეტრებს; დაბოლოს, ფეხზე მოსავთ უძირო ფეხსაცმელი წვრილი წვერით, რომელსაც უწოდებენ ა-იმასს, ხოლო ცხენის ტარებისას კი, ტყავის მაღალი გეტრები; ყველა ამ საგანს, კიდევ ერთხელ ვიმეორებ, ქალები ამზადებენ. იარაღი, ხშირად ცუდ დღეში მყოფი, ასრულებს ამ აღკაზმულობას. სუსტი სქესისთვის, როგორც უკვე ვთქვი,

საერთოდ არ არსებობს ეროვნული სამოსი და ორიგინალობას მათ ვარცხნილობა (ზურგზე ჩამოკიდებული ნაწნავები, თავსახვევი და თეთრი პირბადე) თუ მატებს.

კავალკადა, რომელსაც ახლა აღვწერ, იმის გამო, რომ ქვეყნის ხელისუფალთა მიერ იყო ორგანიზებული, კიდევ უფრო მეტად ბრწყინავდა. მოქვის მთელი მოსახლეობა, დაახლოებით ექვსასი ადამიანი, ორ რიგად ჩამწკრივებულიყო ჩვენს შესახვედრად, ერთ მხარეს – კაცები, მეორე მხარეს კი – ქალები. სადილი გაიმართა სოფლის მღვდლის ეზოში, სადაც, წინა დღიდან მოყოლებული, მომმარაგებელთა, მზარეულთა და მათ დამხმარეთა მთელი ლეგიონი ერთად შეყრილიყო და ფუსფუსებდა. მწვანე მდელოზე, სტუმრებისათვის წინასწარ განესაზღვრათ დიდი წვეულების ათასობით წვრილმანი.

მღვდელი, ვისაც ახლა უნდა შეესრულებინა maître d'hôtel-ის შრომატევადი სამუშაო, პატივცემული მოხუცი, მუქი ფერის ტანისამოსით, და რაც ასე იშვიათია მეგრულ და ქართველ სამღვდელოებას შორის, ერთიანობაში სულაც არ იყო განათლებას მოკლებული. მას რამდენიმე წიგნი ჰქონდა, ხოლო მოკრძალებული ოთახის კედლებზე, სხვადასხვა მეფის პორტრეტთა გვერდით დავინახე ილუსტრირებული ჟურნალებიდან ამოჭრილი ლითოგრაფიები გოეთეს, შექსპირის, მანძონის, ბეთჰოვენისა და გარიბალდის გამოსახულებებით.

ევროპულ ყაიდაზე გაწყობილი სუფრა განსაცვიფრებელი სანახაობა იყო ადგილობრივებისთვის, რომელთაც აქამდე მსგავსი წვეულება არასოდეს ეხილათ. კედლის მოპირდაპირედ ჩამწკრივებული აფხაზები, გულუბრყვილო მთიელები, მათრახით ხელში და მუშტით ხანჯალზე, მათთვის სრულიად ახალი რაღაცის დანახვისას ყველაზე გულწრფელ გაცეხას გამოხატავდნენ. როდესაც უცხოთა წვეულება დასრულდა, ოჩამჩირის ოლქის უფროსმა სუფრასთან დამხმარეები მოიწვია; ქვეყნის ეტიკეტის თანახმად, აზნაურები მთავრებისა და თავადების შემდეგ მიირთმევდნენ, მერე – ოჯახის წევრი ქალბატონები; მერე – მოსამსახურეები; მერე – ქალები და გლეხის ქალები, შემდეგ იმავე კლასის კაცები სხდებოდნენ, სულ ბოლოს კი – სახლის შინამოსამსახურეები. ყველა სტუმარი, მიუხედავად იმისა, თუ რა ადგილს იკავებდა სოციალურ სკალაზე, ერთნაირად იძაბებოდა, როდესაც მათთვის სრულიად ახალ და უცხო მომსახურებას სთავაზობდნენ. პირველი, რაც გააკეთეს, დანა-ჩანგალი და ხელსახოცები გადადეს გვერდზე, რათა უფრო მოხერხებულად ეჭამათ.

დრო, რომელიც 1876 წელს ჩემდა პატივსაცემად გამართული წვეულების შემდეგ გავიდა, სავალალო იყო ქვეყნისათვის, რადგანაც უკანასკნელი ამბოხისას (1877-78 წლების რუსეთ-თურქეთის ომი) მოქვი⁸ აფხაზთა წინააღმდეგ გამართუ-

8. აფხაზურად მოქ ნიშნავს წვიმას. ამბობენ, რომ სახელი მოქვი (წვიმიანი ადგილი) ამ ადგილმდებარეობას ხშირი წვიმების გამო ეწოდა.

ლი სისხლიანი ბრძოლების მოწმე გახდა. მაჩვენეს დაბლობი, სადაც ამბოხებული პარტიის მეთაური, ხირიფს მარშანია დააპატიმრა (1877 წლის 21 ივნისი) მისმა ბიძამ, რუსეთის სამსახურში მყოფმა გენერალმა გრიგოლ შერვაშიძემ. საკმაო ძალის სათავეში მყოფი ამბოხებული მოქცი დარბევას ვერ გადაურჩა და ეკლესია და მღვდლის სახლიც გაძარცვეს. მღვდელი 1881 წელს, ჩემ ჩამოსვლამდე გარდაიცვალა; მე კი არანაკლები პატივით მიმიღო მისმა ვაჟმა, რომელიც კვლავაც მამისეულ, დანგრევის პირას მისულ სახლში ცხოვრობდა; მითხრა, რომ მართალია, ქვეყნის ერთ-ერთი დიდკაცთაგანი იყო, მაგრამ სახლის აღდგენის საშუალება არ ჰქონდა.

ჩემი ჩამოსვლის საღამოს სამგლოვიარო განწყობა დამეუფლა, რადგან გაუჩივრებლად, კოკისპირულად წვიმდა.

ჩემი მასპინძელი და მისი ცოლი, თავადის ქალი, ყველაფერს აკეთებდნენ, საპატიო დარბაზში თავი კარგად რომ მეგრძნო – შეძლებისდაგვარად იზრუნეს, რომ რუსეთ-თურქეთს ომის დროინდელი ამბოხებისას კედლებში გაჩენილი ხვრელები ამოეგმანათ.

ამისთვის პატარა ნაჭრებად დაჭრილ ცხვრის ტყავს იყენებდნენ. ჩემი ტანსაცმლის გასაშრობად კი დიდი ცეცხლი დაანთეს. ამ ღამეულ ფუსფუსში ძილი გამიტყდა და ღამე თეთრად გავათენე. უძილობისას ადამიანის არსებობის წარმავლობაზე ვფიქრობდი და ერთმანეთს ვადარებდი მოქცეში გატარებულ მხიარულ წარსულსა და ნაღვლიან აწმყოს.

არც შემდეგი დღე ყოფილა ბევრად ხალისიანი.

იმედგაცრუებული მოუთმენლად ველოდი მზის პირველ სხივს, რომელიც შემაძლებინებდა ყველაზე თვალისმომჭრელი კადრები გადამეღო, ასეთს კი ბევრს ვხედავდი ჩემ გარშემო.

კვირა დღეს ახლომდებარე დასახლებების მცხოვრებლებმა სტარშინასთან თავი სხვადასხვა საქმეზე სასაუბროდ მოიყარეს. რადგანაც გარდაცვლილი მღვდლის შვილი ამ არემარეში ყველაზე გამორჩეული კაცი იყო, სწორედ მის სახლში გადაწყვიტეს ვახშმობა. ამ სამზადისს კი მეც ვესწრებოდი. თემმა ხარის დაკვლაც მოინდომა.

სასაკლაოდ დაბლობი გამოიყენეს. რამდენიმე კაცმა ხარი ჯერ გაატყავა და მერე ორად გააპო. ერთი ნახევარი, გამოშიგნული, გასუფთავებული და შამფურზე აგებული, რაც მის ხის ტოტზე ჩამოცმას ნიშნავს, ცეცხლზე მოათავსეს. რამდენიმე კაცი მიწაზე ჩაცუცქულიყო და ასე ამზადებდა სურნელოვან მწვადს, რომლის მაცდუნებელი სურნელი ჩემს საპატიო დარბაზშიც აღწევდა ისე, რომ ამ გემრიელად შებრაწული ხორცის გასინჯვა მომინდა.

ამასთან, ის-ის იყო დაასრულეს ყურძნის ბოლო მტევნების მოკრეფა და შემეძლო მენახა, თუ როგორ წურავდნენ წვენს.

მიუხედავად წვიმისა, შევძელი ჩემი მასპინძლის სახლის გადაღება, სადაც მოსადილეთ მოეყარათ თავი. წესის თანახმად, დიასახლისის ვალდებულებაა, სტუმრებს ხელი დააბანინოს და ხელსახოცი შესთავაზოს. საძინებელში თავადის ასული და მისი და მემსახურებოდნენ. ზოგადად, ქალები ყველანაირად ცდილობდნენ, ღირსეულად მოჰქცოდნენ სტუმრებს და გაერთოთ ისინი. ამჯერადაც ერთი ხმა ქართულ სიმღერას ასრულებდა გიტარაზე (ე.ი. ჩონგურზე), დანარჩენები კი ბანს აძლევდნენ. ეს სიმღერები სამგლოვიარო რიტმებით არცთუ ისე ჰარმონიული მოსასმენია.

ყოფილი მღვდლის შვილი მამამისის კვალს არ გაჰყოლია. იგი ვაჭარი და ადგილობრივი დუქნის (ჩემი მკითხველი უკვე კარგად იცნობს ამ დაწესებულებას) მფლობელია და მრავალფეროვან მომსახურებას სთავაზობს იქ მცხოვრებლებს, ისევე როგორც ადგილობრივ მოგზაურებს.

ახლანდელი მღვდელი, ვინც ჩემი მეგზურიც იყო, მოქველი ქართველია. ომის დროს ის სოფლის ეკლესიაში მსახურობდა, სადაც იქაურთა ფანატიზმმა ის და მისი სამწყსო საფრთხეში ჩააგდო. მან გამანდო, რომ საკუთარმა მოხერხებულობამ გადაარჩინა სიკვდილს.

იმ სოფლიდან ოჯახი და მოსამსახურეები უკვე გაეხიზნა და ხელსაყრელ შემთხვევას ელოდა, რომ შეერთებოდა მათ და რადგანაც ასეთი შესაძლებლობა არ ეძლეოდა, შეეცადა, რაღაც მოეფიქრებინა.

ერთ მშვენიერ დილას, ერთად შეყარა რეგიონის ყველაზე მეამბოხე კაცები, აჩვენა კონვერტი დიდი ბეჭდით, რომელიც თითქოს ის-ის იყო კონფიდენციალურად მიიღო ტფილისიდან, და უთხრა, რომ მშვიდობა დამყარდა და მოითხოვდნენ, რომ მღვდლებს, ყველა ადგილიდან მათთვის შეეტყობინებინათ, თუ როგორ იქცეოდა ხალხი. ბუნებრივია, დაჰპირდა, რომ ბრწყინვალე ანგარიშს მოამზადებდა იქ დამსწრეთა შესახებ და რომ ამავე მიზნით ემზადებოდა ტფილისში წასასვლელად, საიდანაც თავის ოჯახთან ერთად დაბრუნდებოდა უკან. იგი, ასევე, აპირებდა შეეძინა ურემი, რომლითაც მისი შინამოსამსახურეები უკვე გაპარულიყვნენ; ამისთვის კი სახლიდან ბევრი ნივთის იაფად გაყიდვას აპირებდა. აფხაზები მახეში გაეხიზნენ. მათ შეუძენიათ ყველაფერი, რისი თავიდან მოშორებაც მღვდელს სურდა და ღირსეულად რომ წარმდგარიყო, სადაც ჯერ არს, ცხენიც კი ათხოვეს, რადგანაც თავისი ოჯახი, მსახურთან ერთად, უკვე თბილისში გაეგზავნა.

მეორე დღეს, როცა მღვდელი ცხენს მიაჭენებდა სამეგრელოსკენ, სადაც მისი ოჯახი იყო გახიზნული, ამბოხებული აფხაზები თურქებს დაეხმარნენ სოხუმ-კალეში შესულიყვნენ და აეოხრებინათ.

ამ სასულიერო პირმა მაცნობა დეტალები მოქვის მონასტრის შესახებ, რომელიც საკმაოდ ცნობილი და ერთ-ერთი უძველესია აფხაზეთში; მისი ეკლესია, მსგავსად ბედიისა სამურზაყანოში, ოდესღაც მდიდარი ეპისკოპოსის საყდარი

ყოფილა. მერკულა ანუ მოქვი, ნანგრევების ძირში მიედინება; ეზოში, ნაგებობის წინ აღმართულა წაბლის ხე, რომლის ვარჯიც, სუროს გიგანტური პწკალებით, ხის ზომის კაპებს უშვებს ირგვლივ. სამრეკლოს გუმბათისაგან მხოლოდ დიდებული თალილა შემორჩენილა, რომლის ნაპრაღშიც ათასნაირი ველური მცენარე იზრდება. ეკლესია 1861-63 წლებში აღადგინეს და ქვისფრად შეეთეთრებული ახლა სავალალო შესახედია, მიუხედავად მშვენიერი ბუნებისა მის ნანგრევებთან. პერისტილის სვეტები, თეთრი ბათქაშით, ამ უსიამოვნო კონტრასტს კიდევ უფრო შესამჩნევს ხდის. გემოვნებისა და ჰარმონიის ასეთი შებღალვა, როგორც იტყვიან, ცუდად ჭრის თვალს. ასევეა შებათქაშებული ინტერიერიც და არა მხოლოდ ფრესკებისა და მოზაიკების კვალია გამქრალი კედლებიდან, არამედ დაუმუშავებელი ქვებიც შეუცვლიათ თეთრი მარმარილოს ნამტვრევებით, რომელთაც ტროტუარების მოკირწყვლისთვის იყენებენ ხოლმე. დაბოლოს, შიდა ეზოში ყრია გამოქანდაკებული სვეტების ნარჩენები, რომლებიც მოწმობს როგორი სიმაღლისთვის მიუღწევია იმ დროისთვის ხელოვნებას, როცა ეს ტაძარი აუშენებიათ. რაც შეეხება საკუთხეველის კანკელს, მსგავსად ილორისა, მისგან აქაც აღარაფერი შემორჩენილა, გარდა უხეშად მოხატული შირმისა.

მოქვის ეკლესიას, სადაც უკანასკნელი აჰუ თავის ცოლთან და ქალიშვილთან ერთად განისვენებს, არანაირი საგანძური არ გააჩნია; ერთადერთი სიძველე, რასაც იქ ხედავთ, პატარა სურათია, ქართული წარწერითა და სახარების სცენით, აღმოჩენილი მდინარე დობაში (Doubah), მერკულას შენაკადში. ეკლესიის მომიჯნავედ იდგა დიდი ქვის შენობა ორი სართულით, ამჟამად დანგრეული; აქ, სავარაუდოდ, მონასტერი უნდა ყოფილიყო. მის მოპირდაპირედ მდებარეობს საეპისკოპოსო რეზიდენცია, შემორჩენილია სამრეკლოს ნანგრევებიც; დაბოლოს, არცთუ ისე მოშორებით, მიწის თხრისას, რამდენიმე სახლისა და ძველი ეკლესიის ნანგრევები იქნა აღმოჩენილი, რაც გვაფიქრებინებს, რომ უწინ ეს ქვეყანა დასახლებული ყოფილა ცივილიზებული მოსახლეობით, რომლის სახელიც ისტორიამ ვერ შემოინახა.

სასაფლაოზე, ძველი ეკლესიის ნანგრევების ირგვლივ და ახალი ეკლესიის სიახლოვეს, ვერ ნახავთ ვერც ერთ უბრალო მავზოლეუმს, რომლებიც ადრე აღვწერეთ. ის, რაც საფლავის არსებობაზე მიუთითებდა, დაინგრა მაშინ, როცა ეს წმინდა სავანე თვით ადგილობრივთა მიერ გაუდაბურდა.

1881 წლის შემოდგომაზე, ძველი ნანგრევების გვერდით ახალიც შევნიშნე, 1877 წლის რუსეთ-თურქეთის ომის დროინდელი, უკანასკნელი აჯანყების შემდგომი დარბევის შედეგი. მაგრამ, იქ მცხოვრებთა სასიკეთოდ, საყდარი შეაკეთეს...

მოქვის შემოგარენი, რომელიც უხვად ირწყვება, წარმოუდგენლად მდიდარია მცენარეული საფრით, ბორცვები კი დაფარულია პირუტყვისათვის უბადლო საძოვრებით. მიუხედავად ამისა, აფხაზი მწყემსები, ცრუმორწმუნეთა რასა, ვერ

ბედავენ ოლქის მიყრუებულ ადგილებში გადასვლას. მაგალითად, პატარა სოფლიდან ათი ვერსის მოშორებით, სოფელ ტი-ლოონის / Tchi-loon (ასე წოდებული ჩერქეზული ოჯახის მიერ, რომელმაც, როგორც ამბობენ, თავისი კერპები აღმართა იქ) მიჯნაზე, მდებარეობს ავი სულით დასახლებული მთა: ნებისმიერი პირუტყვი, რომელიც მას მიუახლოვდება, იკარგება. ეს არის აღარდა, პანარას ქედის ყველაზე მაღალი მწვერვალი, საიდანაც მდინარე მერკულა იღებს სათავეს. დაახლოებით ორი ათასი ფუტის სიმაღლის მთას აქვს უნაგირი, რვა მეტრის ვერტიკალური პროექციის კლდე, გაბურღული თხრების შედეგად, რომელიც მღვიმეში შესასვლელს ქმნის. ღიობი დაახლოებით სამი მეტრია სიმაღლით და ერთი მეტრი – სიგანით. მიწიდან ამოდის წყარო, სახელად აჩიკითისგუ (გამანაყოფიერებელი მდინარე), რომლის წყალიც, ოდნავ მოშორებით, წისქვილს ამუშავებს. ადგილს მღვიმის ახლოს ეწოდება სქარჩუმულა.

როდესაც ამ იდუმალებით მოცულ მღვიმეში შეაღწევთ, წყალი მუხლამდე მოგწვდებათ, ზოგიერთ ადგილას – მკერდამდეც კი. ასე რომ, თუ გსურთ, იგი გამოიკვლიოთ, აფხაზს უნდა მოაჯდეთ ზურგზე. მისი სიგანე ადგილ და ადგილ იცვლება. ზოგიერთ ალაგას კი ორი ადამიანი ძნელად თუ გაეტევა. გრუნტი, რომელიც მუდმივად მაღლდება, ისეთი უხეშია, ზოგან კი, ძალიან მოლიპული, რომ იძულებული ხართ, წყაროს კალაპოტს მიჰყვეთ. ასევე, იცვლება სიმაღლეც: აქ თუ კამარა თქვენს თავს ზემოთ 300 მეტრით მაღლდება, იქ პირიქით – მხოლოდ წელში მოხრილი თუ გაივლით. კამარიდან ეშვება სტალაქტიტები, ყველაზე ზღაპრული ფორმების მქონენი, რომლებსაც ზოგჯერ ერთმეტრიანი გარშემოწერილობის სვეტის ფორმა აქვთ.

ჩირალდნის ან სანთლის შუქზე სამ-ოთხი საათის სიარულის შემდეგ, მიაღწევთ მცირე შემაღლებას, დაფარულს წითელი თიხანარევი მიწით. მერე მიადგებით ორ ხვრელს, სტალაქტიტებით დაჩხვლეთილს. როგორც კი ამ წანაზარდებს გაეცევიტ, ორ გალერეას დაინახავთ; სწორედ ერთ-ერთი მათგანიდან გადმოდის თითქმის ყინულოვანი წყარო, მეორიდან კი თბილი წყალი ამოედინება.

სანდო მეგზურის დახმარება და ღონიერი მამაკაცი სავსებით აუცილებელია უცხოელისათვის, ვინც, ჩემ მსგავსად, მოისურვებს, ეწვიოს ამ მისტიკურ მღვიმეს; ასეთ დროსაც კი, ზოგჯერ, მაინც შეიძლება გადააწყდეთ მოულოდნელ საფრთხეს. მეორე მხრივ, შეუძლებელია უფრო არამიწიერი და ზღაპრული რამის წარმოდგენა, ვიდრე ეს მოგზაურობა მთის წიაღში, ორმოცი თუ ორმოცდახუთი ცვილის სანთლის შუქზე, რომელიც კლდეზე აბრჭყვიალებულ წყლის მირიად წვეთს გარდაქმნის იმავე რაოდენობის პაწია მზედ და მათ მთრთოლვარე ანარეკლებს მოაფენს გალერეათა ნამიან სვეტებს; იფიქრებთ, რომ აღმოჩნდით მიწისქვეშა პაგოდას გულში, რომელსაც ინდუსები შივას სათაყვანებლად აღმართავენ ხოლმე. ამას დაამატეთ აფხაზთა თავსაბურავიანი თავები, მათი მოეღვარე იარაღი, მა-

თი კონკები (რომლებიც სანთლის შუქზე ოქროსფერი ბზინებით დაფარულს წააგავდა), და არ გაგიჭირდებათ წარმოიდგინოთ, რომ ამგვარი გასეირნება თვით მრავლისმნახველი ტურისტის ემოციებსაც გადაფარავს, რომელმაც უკვე ბევრი სხვა უცნაური სანახაობა იხილა. და რაოდენ შთამბეჭდავია, როცა ამ ცივი ტარტაროსიდან გამოძრომისთანავე გადაეყრებით ლურჯ ცასა და დასავლეთის ქარის თბილ სუნთქვას! არც მეტი, არც ნაკლები, გეგონებათ, რომ სიცოცხლეს თავიდან დაუბრუნდით. განა საჭიროა დავამატო, რომ ამ ქვეყნის მცხოვრებთ არ უყვართ ამ მღვიმეში ჩასვლა? უფრო ხშირად, მხოლოდ ზემდგომთა ბრძანებით თუ გაჰყვებიან იშვიათ მოგზაურს; ამ ცრუმორწმუნე ადგილობრივთათვის პირქუში მღვიმე ავსული ჯინების სამფლობელოა, რომელთა არსებობაში ეჭვი არ ეპარებათ და რომლებზე ფიქრიც კი შიშით აღავსებთ.

აღარდას მთიდან ოჩამჩირემდე მანძილი დაახლოებით 30 ვერსია. სანუკვარი მგზავრობა უკეთესია საღამოს, მთვარის შუქზე, როცა ბარაქიანი ჩერქეზული მხარე მთლიანად გამტკირვალე ორთქლში ჩაფლულა და ტკბილად ჩაძინებული დიდრონი ტყეები კი პოეტურ სიჩუმეში გახვეულა. ეს განსვენების უნივერსალური წამია. მწერთა არანაირი ფაჩუნი ბალახსა თუ ბუჩქებში, ზანტად რომ ჩაურგავთ თავი მიწაში. მხოლოდ ცივინათელები (*lampyris italica*) დაფუსფუსებენ ურიცხვ გუნდებად ირგვლივ მდებარე ხე-ტყის ლაბირინთებში, მათი ფრთების ფართქალი ყურს იოლად ესმის. ეს მწერები თავიანთი მბრწყინავი სხეულებით ერთდროულად ხეთა ვარჯებსაც ანათებდნენ და ყველაზე მაღალ ტოტებსაც; როცა ისინი გაუჩინარდებიან, მზეც ამოანათებს. თითქოს ცთომილი ალი ყოფილიყოს, რომელიც სივრცეს ღამით იპყრობს და დღისით კი უჩინარდება.

ოჩამჩირიდან ათ ვერსში, იგივე მხარე, რომელზეც მერკულა მიიკლაკნება, ირწყვება კიდევ ერთი, უფრო ღრმა და სწრაფი მდინარით. ეს არის ჯუკუზბურ (*djukuzbur*), მდინარე, რომლის გადალახვა შესაძლებელია იქ, სადაც იგი შავ ზღვას ერთვის და თურქებს მოძრავი ხიდი გაუკეთებიათ.

მზის ჩასვლის ჟამი იდგა, როცა ის გასულ შემოდგომაზე გადავლახე. მებორნის ფარდულთან შევიჩერდი, სადაც ყველაზე კარგი რამ შემომთავაზა, რაც კი ებადა – ახალმოკრეფილი ყურძენი მიმდებარე ტყეებიდან. მივიღე მათი შემოთავაზება და მტევანს ნება-ნება ვაგემოვნებდი, გაოცებული ვერ ვწყვეტდი თვალს ტალღების დიდებულ სანახაობას, ბრწყინვალედ განათებულთ ჩამავალი მზის უკანასკნელი სხივებით. ასეთი სურათის ხილვის შემდგომ ამ ზღვას შავი კი არა, ოქროსფერი უნდა ერქვას.

ექსკურსია სამურზაყანოსა და აფხაზეთში:

ნაწილი IV

გრემლების რიტუალი ქვითაულში – კესარია დიდი, შერვაშიძე – გამგზავრება ატარაში – ბებერი ტყეები. დამეული ნავიგაცია – ქალაქი სოხუმ-კალე და მისი არემარე – კელასური და მისი ციხე-სიმაგრე – საერთაშორისო საუზმე – ექსკურსია სანაპიროზე: ლიხნი და ბიჭვინთის ეკლესია; გაგრის ციხე; ჩემ პატივსაცემად გამართული წვეულება სასაფლაოს ბაღში – დასკვნა.

მართალია, აფხაზეთის საინტერესო ნაწილი უკვე ვნახე, მაგრამ ჯერ კარგად არ ვიცნობდი მის უცნაურ ადათ-წესებს. მიწვევამ, რომელიც გლოვის ცერემონიაზე დასასწრებად მივიღე, რასაც კავკასიელები ტირილს უწოდებენ, შემადლებინა, მისი მოსახლეობისთვის სხვა თვალით შემეხედა.

დაკრძალვის ცერემონია გაიმართა ქვითაულში, ოჩამჩირიდან თორმეტი ვერსის დაშორებით, ყოფილი აჭუს ოჯახის მამულში, რომლის ახლანდელი თავია თავადი გრიგოლ შერვაშიძე, რუსეთის არმიის სამსახურში მყოფი ის გენერალი, რომელიც უკვე ვახსენე.

ამჯერად, ტირილი მიეძღვნა დედამისს, თავადის ქალ კესარია შერვაშიძეს, დადიანის ასულს და მის სხვადასხვა დროს გარდაცვლილ ორ ვაჟს.

უკვე ვიცით, რომ აფხაზეთის მმართველები, მონაცვლეობით, იყვნენ ქრისტიანები და მუსლიმები; ამდენად, ქვეყანაც შერეული რელიგიისა გახლდათ. მიხეილის ბაბუისა და მამის ქელიშ ბეისა და სეფერ ბეის (ორივენი თურქეთში იყვნენ აღზრდილები) დროს, სამთავროში ისლამი აღორძინდა; შემდეგ, სეფერ ბეი დაქორწინდა ლევან დადიანის დაზე და მეგრული შტოს მართლმორწმუნე მართლმადიდებელი მეუღლის გავლენით ქრისტიანად მოინათლა. აფხაზეთის სხვა მმართველმა ოჯახებმაც უარი თქვეს ისლამზე. მათ შორის იყო ასულ კესარიას ქმარი ალექსანდრე შერვაშიძე (მუსლიმური სახელით, ალი ბეი).

შერვაშიძეთა სხვადასხვა შტო ერთმანეთს მუდმივად ექიშპებოდა, თუმცა, მოგვიანებით მოახერხეს და ქვეყანა დაინაწილეს. აჭუ სეფერ ბეის მმართველობისას, ჰასან ბეიმ, მისმა ძმამ, მიიღო სოხუმ-კალესა და მდინარე კოდორს შორის მდებარე ტერიტორია; ალი ბეიმ, მისმა ბიძაშვილმა – კოდორიდან ოხურიმდე გადაჭიმული მიწები. მიუხედავად იმისა, რომ საკუთარი ოლქების მართვისას, არსებითად, დამოუკიდებელნი იყვნენ, ეს ორი თავადი ალიარებდა აჭუს აღმატებულებას, რომელიც გუდაუთასა და ბიჭვინთას შორის დამკვიდრებულიყო. გარე აგრესიის შემთხვევაში ვალდებულნი იყვნენ, მისი დროშის ქვეშ ებრძოლათ.

ალი ბეის გარდაცვალების შემდეგ, რუსეთის პროტექტორატის ქვეშ, რეგენტობა მის ქვრივს, კესარიას ერგო. თორმეტი წლის განმავლობაში, მისი უფრო-

სი ვაჟის, გრიგოლის (1838-1848) სრულწლოვანებამდე, იგი ქვეყანას ბრძნულად მართავდა და საკუთარი თავი მიუძღვნა ცივილიზაციის გავრცელებასა და განსაკუთრებით კი, ქრისტიანობის გაბატონებას; პრობელიტიზმის ამ მცდელობამ მეფე ნიკოლოზის ჯვარიც კი მოუტანა და ქვეყანაში იცნობდნენ, როგორც „კესარია დიდს“. შემდეგ, ძალაუფლება გადაეცა მის ვაჟს, რომელმაც იგი რუსეთის იმპერიის მიერ აფხაზეთის 1864 წლის ანექსიამდე შეინარჩუნა.

ჰასან ბეი 1837 წელს გარდაიცვალა და მისი მიწები გადაეცა ჯერ მის ვაჟს, საიდ ბეის (დიმიტრი შერვაშიძეს), ხოლო მოგვიანებით კი, შვილიშვილს, გიორგის, ვინც ახლაც მისი დიდი ნაწილის მფლობელია. რაც შეეხება აჭუ სეფერ ბეის, მას დარჩა ორი არასრულწლოვანი მემკვიდრე, დიმიტრი და მიხეილი, ხოლო მისი ქვრივი, მეგრელი დადიანის და – დესპოტი და ამბიციური ქალი, გარკვეული დროის განმავლობაში რეგენტი იყო. დიმიტრი, მისი უფროსი ვაჟი, მმართველობის ერთი წლის თავზე, დაუქორწინებელი გარდაიცვალა. მისი ძმა, მიხეილი, ეჭვმიტანილი იყო ძმის მოწამვლაში და ეს ეჭვი, როგორც ჩანს, დადასტურდა აღიარებით, რომელიც 1876 წელს სასიკვდილო სარეცელზე მის ერთგულ მსახურს, კლაგურზა ჩირიკბას წამოსცდა; როგორც ამბობენ, მას დიმიტრისათვის საწამლავი საკუთარი ხელით მიუტანია. ამგვარად, მიხეილ ბეი, როგორც იმპერატორ ალექსანდრე მეორის მიერ აღიარებული აფხაზეთის აჭუ, მთავრობდა 1866 წლამდე; უკვე მოგიყევით, როგორ დაამთავრა მან სიცოცხლე.

მამამისის, სეფერ ბეის საფლავი ლიხნის იმ სოფლის ეკლესიაშია, სადაც ცხოვრობდა და რომელიც თურქებმა ააოხრეს. ალი ბეი განისვენებს ქვითაულში, სადაც მისმა ვაჟმა, გრიგოლმა, ამჟამად ჯერაც ცოცხალმა, ეკლესია ააშენა. მისი ინაუგურაცია სწორედ იმ დღეს მოხდა, როცა დედამისი და მისი ორი ძმა დაიტირეს.⁹ ეს იგივე მთავარი გრიგოლია, რომელსაც გენერლის ჩინი მიანიჭეს უკანასკნელი აჯანყების შემდეგ, როგორც უკვე ვნახეთ, თავისი დისშვილის, ამბოხებულთა ბელადის, ხირიბს მარშანას დაპატიმრების გამო.

ქვითაულში თავად გრიგოლსა და მის ოჯახთან ერთად ერთი კვირა გავატარე. დავესწარი ძალიან მნიშვნელოვანი ცერემონიის სამზადისს, ღრმად პატივცემული თავადის ქალის, კესარიას მოსაგონებლად რომ გაიმართა. ამდენად, ვნახე ამ უცნაური ცერემონიის როგორც პროლოგი, ისე ეპილოგი.

აქ აღარ დავუბრუნდები საზეიმო დატირების ტრაგიკომიკურ ეპიზოდებს, რომლებიც დეტალურად უკვე აღვწერე სამეგრელოსთან დაკავშირებით. საკმარისი

9. თავადის ქალის, კესარიას პატივისცემის გამო, მისმა შვილიშვილმა, ხირიფს მარშანიამ, ამბოხების მეთაურმა და მისმა მოწაფემ, ქვითაული იხსნა აოხრებისაგან, მსგავსად მისი ოჯახის კუთვნილი სხვა სამფლობელოებისა. უკვე ცნობილია, რომ აფხაზეთისათვის მოწაფე-გამზრდელის ურთიერთობა უფრო წმინდათაწმინდაა, ვიდრე მშობელშვილობა.

იქნება იმის თქმა, რომ ტირილის რიტუალი მოეწყო დიდ ვაკეზე, სადაც, ეკლესიის მოპირდაპირედ, დგას პატარა სახლი, რომელშიც ერთ-ერთი გარდაცვლილი თავადი ცხოვრობდა. ამ დანგრევის პირას მისული, ოროთახიანი საცხოვრებლის წინ თავი მოეყარა მოტირალთა ჯგროს – მშობლებს, მეგობრებს, მსახურებს, ყოფილ ვასალებს – ნაირფერ კრებულს, რომლის გლოვის მისიასაც დიდი კულინარიული ფაციფუცი ართულებდა. საბანკეტო მაგიდები მდელოზე მოწყობილი ფანჩატურების ქვეშ დადგეს; მცენარეთა კიდეც ერთი გუმბათის ქვეშ, რომელიც ახლა შავი ძაძით შეემოსათ, გრძელი ხის სკამები ქვეშაგებით დაეფარათ და ზედ სამი გარდაცვლილის ტანსაცმელი გაეშალათ. სპეციალური სამგლოვიარო კარავია გამოყოფილი ოჯახის ქალებისთვის, მოტირალთათვის, მოზარეთათვის; სწორედ აქ გაიმართება ტირილის ძირითადი სცენა.

ღმერთმა იცის, რამდენ დაკონკილ მგლოვიარეს მოეყარა აქ თავი, მიუხედავად იმისა, რომ გაუჩერებლად წვიმდა – თვით ზეცა მონაწილეობდა ამ პროცესიაში – დილიდან იკრიბებოდნენ სველ მიწაზე! შვიდ საათზე პირველი პურობა, დამკრძალავი პროცესიის სავალდებულო პროლოგი, შესთავაზეს უამრავ დამსწრეს. ორ ჯანმგაგარ ადგილობრივს მხრებზე შემოედო დიდრონი ფიცარი ორი უშველელებელი ქვაბით: ერთი სიმინდის ბულიონით/შეჭამადით, მეორე კი – ცხვრის კერძით სავსე. ამ საჭმლის შთანთქმისთანავე, ყველა წავა-წამოვა და გამოსასვლელ ტანსაცმელს ჩაიცმევს.

როგორც კი საათი რვას ჩამოჰკრავს (ამ მამულის ბატონის მიერ აშენებული ქვითაულის ეკლესია, გამონაკლისია იმ მხრივ, რომ საათი აქვს), ყველა თავის ადგილასაა გამწყვებული. თავადი, როგორც ოჯახის უფროსი, შავ ჩოხაში გამოწყობილი, იმავე ფერის ვაზნებიანი ქაბრით წელზე, ხის ქვეშ, თავის ვაჟებს შორის იდგა და იღებდა სტუმართა სამძიმარს. ორი ქვრივი უკვე შესულა სამგლოვიარო კარავში და მუხლებით დამხობილან მიწაზე, ტახტის წინ, რომელზეც მათ გარდაცვლილ ქმართა ტანისამოსია გაშლილი. ერთ-ერთი მათგანი, რომელიც უკვე სამი წელია ქვრივია, მშვიდად შეჰგუებია მდგომარეობას; აღარ არის სრულად სამგლოვიაროდ შემოსილი; აცვია შავი ალპაკას კაბა, თავზე უკეთია შავი ფიშუს მსგავსი თავსამკაული, ხოლო მხრებსა და თავზე კი თეთრი რიდე (veil) მოუსხამს. მისი რძალი ქვრივის სამოსს ატარებს: ბამბის შავი კოფთა, რომელიც საკუთარი ხელით შემოიფხრიწა ქმრის დასაფლავების დღეს და რომელიც ერთი წლის განმავლობაში არ უნდა გაიხადოს; დაუვარცხნელი თმა კი მხრებზე აყრია. მოტირალთ, ასევე რომ დამხობილან მიწაზე, ქვრივების მსგავსად ხელში უჭირავთ გარდაცვლილთა ძველი ფეხსაცმელები და თავში ირტყამენ ყოველი მისამღერი-სას, რომელსაც ცრემლსა და ტირილს უნაცვლებენ.

სცენის დანარჩენ ნაწილს მკითხველი უკვე იცნობს. ოღონდ, ნება მიბოძეთ, შევნიშნო, რომ ჩვეულების მიხედვით, ასეთ დროს (ტირილი შეიძლება გაგ-

რძელდეს რამდენიმე დღეს) მიძღვნილი საჩუქარი აღწევს 5 000 რუბლს (17-18 ათას ფრანკს), რომ აღარაფერი ვთქვათ 50 ცხენსა და 150-მდე მსხვილფეხა პირუტყვსა და ცხვარზე; ეს პატარა ცხოველებიც, ასევე, ატარებენ სამგლოვიარო სიმბოლოებს ორი მიზეზის გამო: მათ თითქმის მაშინვე დაკლავენ, რათა გამოკვებონ მოზარეთა და მოტირალთა ეს ბრბო, რომელიც ძალიან დაიღალა შეკვეთილი გლოვის ამ ველური სანახაობით.

დაკრძალვის დღესასწაულის მოთავე და წარმმართველი იყო თავად გრიგოლის გამზრდელი, რომელიც აფხაზთათვის წმინდა მოვალეობას სულით და გულით აღასრულებდა. დიდი კვერთხით შეიარაღებულმა ორად გააპო ბრბო, რომელმაც მის წინაშე ქედი მოიდრიკა. შემდეგ მოტირალებს მიუახლოვდა და მათაც მის ნიშანზე დატირების კილო შეცვალეს, რაც გამოიხატებოდა „ოვ“ და „ვა“ მარცვლების სხვადასხვა ინტონაციით, კრეშენდოთი წარმოთქმით. ქვითაულში გატარებული ამ კვირის მერე, კიდევ კარგა ხანს ჩამესმოდა დაკრძალვის ეს მისამღერები, რომელთა სამგლოვიარო ორიგინალობა არასოდეს დამავიწყდება.

ქვითაულს ხელმეორედ ნოემბერში ვეწვიე. მოხუცი მღვდელი ჩემთან შესახვედრად გამოეშურა; კვლავაც ფრიად საპატივცემულო იერი ჰქონდა და ცხვირისმიერი ხმაც შეენარჩუნებინა, ასე რომ გამაოცა გარდაცვლილთა ღოცვის წარმოთქმის დროს.

თუმცა, ადგილი სრულიად განსხვავებულად გამოიყურებოდა. ის ვაკე დაცარიელებულიყო. სხვა ხმა არა ისმოდა რა, გარდა ბატკნების ბლავილისა. ეს შესაბრაალისი ბგერები მაგონებდა მელანქოლიურ „ოვ“ და „ვა“ ნოტებს, მოზარეთა გუნდის მიერ დატირების დღეს შესრულებულს, გაბმულად უთვალავჯერ რომ მქონდა მოსმენილი. სამგლოვიარო აქცენტების ამ გახსენებამ თითქოს გამიცოცხლა ის დატირება.

თავადის სახლი, რომელშიც ადრე გავათიე ღამე, მიეტოვებინათ მისი სავალალო მდგომარეობის გამო; მღვდელმა და მისმა არისტოკრატმა, მეგრელმა ცოლმა შემომთავაზეს, დავრჩენილიყავი მათ ზამთრის ქოხში, სადაც ერთ ჭერქვეშ იყო განთავსებული სასადილო, სასტუმრო, საძინებელი ოთახები, სამზარეულო და თვით საქათმეც კი. აქ იმიტომ ცხოვრობდნენ, რომ მათ პატარა სახლში, სადაც ცეცხლის ანთება არ შეეძლოთ, ძალიან ციოდა. ამ კეთილმა წყვილმა, რომელთა ასაკმა და ურთიერთისყვარულმა ფილემონი და ბავკიდე გამახსენა, ყველაფერი ილონეს იმისათვის, რათა მათ ღარიბულ საცხოვრებელში თავი შეძლებისდაგვარად კარგად მეგრძნო.

დიასახლისს სამეგრელოდან მზითევში (აღბათ, ნახევარი საუკუნის წინ) მოეტანა საოჯახო ნივთები, ჯერ კიდევ მაშინ რომ იყენებდნენ მის სამშობლოში, მაგრამ ამდენი ხნის შემდეგაც უცხო იყო აფხაზთათვის, რომელთაც ჯერაც არ მიეღწიათ ცივილიზაციის იმ საფეხურისთვის, თანამედროვე კოლხები რომ იმყოფე-

ბოდნენ. ასე რომ, მან დიდი ყვავილებითა და ტოტებით მოხატული სკივრიდან ამოალაგა ფინჯანი, თეფშები და ჭურჭლის თვით სრული ნაკრებიც კი, რომელიც მისი ოჯახის წევრთა შორის მხიარულებას იწვევდა.

მღვდელი, რომელსაც მთელი თავისი ცხოვრება აფხაზეთში გაეტარებინა, მხოლოდ თავისი ქვეყნის ზნე-ჩვეულებებს, ძველ ადათებს იცნობდა. ის დაბადებულიყო და გაზრდილიყო ქვითაულში და მრავალი წლის განმავლობაში შერვაშიძეების კარზე ასრულებდა მოწყალების გამცემის ფუნქციას. აფხაზეთა შორის ჯერაც შეხვდებით ყველაზე შორეულ წეს-ჩვეულებათა შენარჩუნების მაგალითებს, განსაკუთრებით კი, ქვეყნის ძნელად მისაღწევ შუაგულსა და მთაში. ხშირად, როცა მათ ვაკვირდებოდნენ, თავს ვგრძნობდნენ ჰომეროსის დროში, რამდენადაც კავკასიელთა პრიმიტიულ ეთნოსთა შორის უძველესი ჩვეულებების მიმართ ყველაზე ერთგული აფხაზეთი დარჩენილიყო.

ასე გავატარე ღამე მღვდლის ჩალით დახურულ ჭერქვეშ. მეორე დღეს ის და მისი ცოლი დილით ადრიანად ადგნენ და მომიმზადეს საუზმე, რომლითაც დიდი რუდუნებით გამიმასპინძლდნენ. გვერდით ჩემი მეგზური და სტარშინას ვაჟი მოვისვი, რაც ადათ-წესებს ეწინააღმდეგება, რადგანაც კაცები არ სხდებიან იმ სუფრასთან, სადაც ქალი ზის. მიუხედავად ამისა, გამომდარებითა და ნათელი დღით მესარგებლა. სწორედ ამიტომ სუფრა ქოხის წინ გავაშლევინე, რათა დავმტკბარიყავი დაბლობით, რომელსაც წიფლისა და რცხილის ბორცვები ერტყა გარს, რომელთა სიმწვანე და განსაკუთრებული სილამაზე, ბუნების მიერ ასე უხვად დასაჩუქრებული მხარის ერთ-ერთ საოცრებად შეიძლება ჩაითვალოს.

სურათი, რომელიც ასახავს ჩემს საუზმეს ქვითაულში, განსაკუთრებული აღნიშვნის ღირსია. ჩემი მასპინძლის შვილობილს ვაჩვენე, როგორ გაესხნა და დაეხურა კამერა ობსკურა, რომლის წინაც დავდექით მე და ჩემ მიერ წინასწარ განლაგებული ჯგუფი და მანაც ფოტო ხუთ წამში წარმატებით გადაგვიღო.

ამინდმა ასევე მაცალა ვაკეზე მდებარე ეკლესიის გადაღება, რომელშიც რამდენიმე წლის წინ ინაუგურაციას დავესწარი, იმ დაუვიწყარი ტირილის დროს.

ეკლესიაში არის თავადის ქალის, კესარიას საფლავი, რომლის ხსოვნასაც დიდ პატივს მიაგებენ. საფლავის ქვა კი კანკელიდან რამდენიმე მეტრში მდებარეობს.

ქვითაულიდან უკვე მეორედ გავუყევი ატარის გზას, წინანდელთან შედარებით უფრო მოკრძალებული კავალკადით. მაშინ, ტირილის მერე, ატარაში მახლდა შერვაშიძეების ოჯახი, რომელთაც საკუთარ კოდორისპირა რეზიდენციაში მიეჩქარებოდათ.

მანამ, სანამ ქვითაულის თავადის ქალებს დავტოვებდი, ჩემთვის სრულიად ახალი გამომშვიდობების სცენის მომსწრე გავხდი.

ოთახში, კეთილშობილ მანდილოსნებთან ერთად თავი მოეყარათ რანგით ქვემდგომ ქალებს, მორჩილად რომ ელოდნენ ამ ბოლო მისალმებისათვის შესა-

ფერის წუთს. ისინი, წესისამებრ, კედლის საპირისპირო მხარეს დახრილიყვნენ, ზოგიერთს ხელები დაეკრიფა, სხვებს კი ერთმანეთისათვის ხელი წელზე მოეხვიათ; ამგვარად ფრიად მომხიბლავ ჯგუფს ქმნიდნენ.

გაუნძრევლად მდგომნი, თვალს აყოლებდნენ ქალბატონის მოძრაობას. მისგან ნიშნის მიღებისთანავე მათაც დაიწყეს ეს ინტიმური ცერემონია. ყველაზე პატივსაცემ მისაღმებად ითვლება ხელების შემოხვევა იმ ადამიანის თავის გარშემო, რომლის წინაშეც ქედს იღრეკთ, სულერთია — კაცია თუ ქალი; ამის შემდეგ თავი მკერდზე, გულის მხარეს უნდა მიაყრდნოთ და ღრმად დაუკრათ თავი მას, ვისაც ემშვიდობებით. გამგზავრებამდე ქვითაუღელი ქალბატონი და ოჯახის სხვა მანდილოსნები ასე გამოემშვიდობნენ თითოეულ ქალსა თუ ახალგაზრდა გოგონას.

ინდიფერენტულობა, რომლითაც ამ ღრმა პატივისცემის გამოხატულებას იღებდნენ, ერთადერთი რამ იყო, რაც მათ მორჩილებას არ შეესაბამებოდა.

დიდი სიამოვნებით მივიღე თავადის წინადადება, ატარაში გავყოლოდი, რადგან მეგზურობა შემომთავაზა თავის მამულში, რომელიც შავი ზღვიდან ანტიკურ, ისტორიულ ტერიტორიებამდე იყო გადაჭიმული.

ასე რომ, ჩვენმა დიდმა ჯგუფმა ქვითაული დატოვა. შერვაშიძის ქალბატონებს სიამოვნებით გამოჰყვა რამდენიმე სხვა ქალი. ყველა მანდილოსანი საუცხოო ცხენზე იჯდა. მათ შორის მე ვიყავი ერთადერთი, რომელიც გვერდულად იყო ამხედრებული ჯორზე. ქალთა ჯგუფს წინ მიუძღოდა და თან ახლდა ბატონთა ბატალიონი და უკან მიჰყვებოდა მსახურთა არმია. ზოგიერთი მათგანი მიჰყვებოდა ცხოველებს, რომელთაც ტირილის ცერემონიის დროს მიღებული ხურდა ფულით სავსე ტომრები ჰქონდათ აკიდული. რაღაც თვალსაზრისით, ეს კავალკადი მდიდარი ალაფით დატვირთული ყაჩაღები დასის შთაბეჭდილებას ახდენდა ჩემზე. მაგრამ ეს ექსკურსია საბედისწერო აღმოჩნდა ჩემთვის. ჯერ ისევ გზაში ვიყავით, როდესაც კოკისპირულმა წვიმამ დასცხო. როცა ქოლგა გავხსენი, ჩემი ჯორი დაფრთხა და ყალყზე შედგა. მე გადმოვვარდი და კლდეს მივეხეთქე, რამაც ისე სერიოზულად დამაზიანა, რომ ატარაში რამდენიმე თვეს უმოძრაოდ მყოფს მომიწია დარჩენა.¹⁰

იმ გულუხვი მზრუნველობისათვის, რომლითაც მანებივრებდნენ, საკმარისად ვერასოდეს შევაქეხე ჩემს სათნო დიასახლისსა და მის მომხიბლავ ვაჟს, რომელიც მაშინ თორმეტი წლის იყო და ახლა, როცა რამდენიმე თვის წინ კიდევ ვნახე, მისი სილამაზე და ახალგაზრდობა კიდევ უფრო გაიფურჩქნა. მაგრამ, მიუხედავად მათი გულითადი მზრუნველობისა, ჩემი ხვედრი სულაც არ იყო შესაშური.

10. ჩემს ტომში სათაურით „ბალტიიდან კასპიის ზღვამდე“, დეტალურად აღვწერე ჩემი სევდიანი ცხოვრება კოდორის ნაპირას, სადაც, გარდა იმისა, რომ ბევრი რამის ნაკლებობა უნდა ამეტანა, ყველაზე მძიმე იყო მდუმარედ ყოფნა, რადგანაც ჩემი არავის ესმოდა.

ჩემი კომპანიონებისათვის, რომელთაც არ ენახათ სხვა არაფერი, გარდა ატარის ჰორიზონტისა, ზაფხულის ნაწილის იქ გატარება სულაც არ იყო ისეთი სასოწარ-მკვეთი, როგორიც ჩემთვის. ბოლოს, ისევ მოვიკრიბე ძალა და მასპინძლის თანხლებით ვეწვიე შემოგარენს. ის რუსულად ლაპარაკობდა, ასე რომ, შევძელი მისი ოჯახისა და ქვეყნის ტრადიციების შესახებ ზუსტი ინფორმაცია მიმეღო.

სტრაბონი გვიყვება, რომ ენგურიდან კოდორამდე არსებობდა ბერძნულ კოლონიათა ჯგუფი, რომელიც ქმნიდა პატარა, აყვავებულ რესპუბლიკას, რომლის ცენტრი¹¹ იყო ქალაქი დიოსკურია, საითკენაც ყველა მხრიდან მოედინებოდნენ ვაჭრები. ახლა აქ, იმ ცივილიზაციის მცირეოდენი ნიშანწყალიც კი აღარ დარჩა. სტრაბონი ასევე ლაპარაკობს ქვეყნის ამ ნაწილის ადგილობრივებზე, რომელთაც ის *Pteriophages* (ტილისმჭამელებს) უწოდებს მათი სიბინძურის, სიგამხდრისა და ავადმყოფური იერის გამო. უძველესი მოსახლეობის აღწერა სავსებით მიესადაგება თანამედროვე აფხაზებსაც, რაც გვაფიქრებინებს, რომ ისინი იმავე წარმომავლობის არიან. მოგვიანებით, როდესაც ქვეყანაში ქრისტიანობამ შემოაღწია, აყვავების ახალი ხანა უნდა დამდგარიყო, რასაც, მიუხედავად ისტორიის დუმილისა, ადასტურებს ამ მიწაზე აღმოჩენილი შესანიშნავი ნაგებობების ნანგრევები (ეკლესია-მონასტრები). შემდეგ ქვეყანა კიდევ ერთხელ დაიქცა; ამჯერად, იგი უკვე ვეღარ აღდგა.

თუმცა, რომელი რეგიონია ბუნებისგან ასე გამორჩეული, ასე ნაყოფიერი, ასე კარგად მორწყული, ვიდრე აფხაზეთი, რომლისთვისაც შავ ზღვას გასასვლელიც მიუცია? თუკი აქაურებს, ამ თაობებამდე, ვერ აუთვისებიათ მათ მიერ დასახლებული ნაყოფიერი ნიადაგი, რატომ არ მოვლენ უცხოელი კოლონისტები, მსგავსად ანტიკური ხანისა, კავკასიის ეს დაბლობები ნაყოფიერი რომ გახადონ? რატომ არ ასწავლიან გაკვეთილს ამ მიწის ზარმაც შვილთ? დაუმუშავებელი მიწის უშველებელი ფართობის ხილვა ამ რეგიონში ნამდვილად გულის მომკვლეელია. ცივი წყაროს (წყურღილი Tskurghili, როგორც ისინი ეძახიან) მამულში, რომელიც ეკუთვნის ალი ბეის ერთ-ერთ ვაჟს, ექვს მილიონზე მეტი კვადრატული მეტრი მიწის ნაკვეთიდან მხოლოდ მცირე ნაწილზეა გაშენებული სიმინდის ყანები, დანარჩენში კი ერთ დამუშავებულ კვალსაც კი ვერ წააწყდებით. ეს მამული გადაჭიმულია კოდორიდან შავი ზღვის სანაპიროს იმ ადგილამდე, სადაც ადრე დიოსკურია ყოფილა აშენებული. ამ უკანასკნელს ახლა ჰქვია წყურჩის (Tskurcha) კონცხი; აქ ბუნებრივი ნავსადგურია შექმნილი, რომელსაც, ცუდ ამინდში, ოცამდე პატარა ნავი შეაფარებს თავს.

11. ტრაბონის (ძვ. წ. I ს. – ახ. წ. I ს.) თანახმად, დაახლოებით ასი ადამიანი მოსულიყო სავაჭროდ, სადაც გაცვლის მთავარი საგანი იყო მარილი.

ამჟამად, მთელ ამ არემარეს ველური უდაბნოს იერი დაჰკრავს. ვრცელ ბუჩქნარს ფესვი გაუდგამს როგორც ელინთა დროინდელი ქალაქის, ისე გვიანი პერიოდის ნანგრევებში. როცა გაშიშვლებულ ქანებზე ხეები მოჭრეს, ეკლესიის ნარჩენები აღმოაჩინეს, თუმცა, თარიღის განსაზღვრა ვერ მოხერხდა. ცოტა უფრო შორს, კოდორის მიღმა, მისი მარჯვენა სანაპიროდან რვა ვერსში, ორი მეტრი გარშემოწერილობისა და შვიდ-ნახევარი მეტრი სიმაღლის ანტიკური კოშკი მდებარეობს, რომელსაც უცნაური და აუხსნელი სახელი „სათამაშა“ (გართობის ადგილი) ჰქვია. ადგილობრივი ტრადიციის მიხედვით იქ საგანძურია დამალული, მაგრამ ახლახან მისმა მფლობელმა მის ძირში სულ ამაოდ აწარმოა გათხრები; მან მხოლოდ კლდესა და ქვიშას მიაკვლია.

კოდორი, ერთ-ერთი ყველაზე მნიშვნელოვანი და სწრაფი მდინარე აფხაზეთში, სათავეს იღებს მთა მარუხიდან, მწვერვალიდან, რომელიც თითქმის ყოველთვის თოვლითაა დაფარული. ხოლო მას მერე, რაც რწყავს წებელდის ველს, რამდენიმე ტოტად იყოფა და შავ ზღვაში ჩაედინება სოფელ ყარაჩაის (Karatchai) სიახლოვეს; 5 ვერსის მოშორებით წყაროდან, რომლის სახელიც დაერქვა წყურღილის (Tskurghili) მამულს. ორი კონცხი, რომლებთანაც მისი დინება მთავრდება, კოდორისა და ისტურიას კონცხებია; ეს უკანასკნელი ასე იწოდება იმ შენაკადის გამო, რომელიც კოდორს ერთვის იქვე, მის შესართავთან. გზა ქვითაუღსა და ატარას მამულს შორის მიუყვება ამ მდინარის კალაპოტს, გაივლის ტყიან მაღლობებს და ტევრიან მინდვრებს. როგორც ყველგან მთელ აფხაზეთში, ატარაშიც¹² აქვთ შემოღობილი ალაგი, ეკლესიით, სასაფლაოთი და სხვა საცხოვრებელი ნაგებობებით (მოწნული ფაცხები, ხის ქოხები), გამიზნული სტუმრებისა და ოჯახისათვის. წყურღილისაგან განსხვავებით, აქ ბოსტნეულისა და ხილის კულტივირების კვალსაც კი ვერსად მოჰკრავთ თვალს. სანაცვლოდ, მდინარის მეორე ნაპირზე, ამწვანებულ ნაპრალთან აღმოაჩინო დრანდის (იგივე კოდორის) მონასტრის სამრეკლოს. ამ ბიზანტიური სტილის ნაგებობის ნანგრევებთან მომხიბლავ, დაკლაკნილ ბილიკებს მიჰყავხართ. ერთადერთი, რაც შემორჩენილა, თეთრი მარმარილოს სვეტებია, რომლებიც ეკლესიის ინტერიერის ნაწილი იყო.

აფხაზები, რომლებიც ლითონებისადმი ვნებით არიან შეპყრობილები, მიუხედავად იმისა, რომ წარმოდგენა არ აქვთ, რა უნდა მოუხერხონ მათ, ლურსმნის ან რაიმე პატარა ნაჭრის დანახვისთანავე მის წაგლეჯას ცდილობენ. ასევე გამოაცა-

12. თურქების მიერ აფხაზეთის დაპყრობისას (1877 წ.), ჰუსეინ-ფაშა, არმიის სარდალი ატარაში ცხოვრობდა. ის იმდენად მოიხიბლა ვითარებით იმ კარ-მიდამოში, რომ სულთანს სთხოვა, საჩუქრად მიეძღვნა მისთვის. მაგრამ აფხაზთა აჯანყებისას ატარა მთლიანად გადაიწვა და ჰუსეინ-ფაშას თხოვნას აღსრულება აღარ ეწერა. მე ატარას 1881 წლის ნოემბერში ვეწვიე და სხვა ვერაფერი ვნახე, თუ არა ნანგრევები. დიდრონი ტყის ნაწილიც კი დამწვარიყო.

ლეს საყრდენ სვეტებს ლითონის ნაწილები, რამაც მათი მტვრად ქცევა გამოიწვია. თავად ეკლესიას, ოდესღაც ეპისკოპოსის საყდარს, დუღაბის გაღავანი აქვს: ბერძნები ფრთხილობდნენ, რადგანაც გზა, რომელზეც ის მდებარეობს, გზა, რომელსაც სოხუმ-კალესკენ, სამეგრელოსა და წებელდის მთებისაკენ მიჰყავხართ, იმ ტომთა მარშრუტზე იყო, რომლებიც აჭუს წინააღმდეგობას უწევდნენ და აფხაზეთს დროდადრო აოხრებდნენ.

აფხაზეთის მდიდარი ბუნება კარგად მოიხანს ამ მონუმენტის ნანგრევებიდან, რაც მოწმობს მის წარსულ დიდებულებას. *კლემატისი* და ყურძენი ამ სათაყვანო ნანგრევებს გარს შემოხვევია და ქმნის ნაზ, გირლანდისებურ გუმბათს, რომლის შიგნითაც ლელვის, წიფლისა და რცხილის უშველებელ ხეთა კენწეროები ამოწვერილა, თავის მდიდრული, ფოთლოვანი საფარვლის მშვენიერებას ხილით დატვირთულ ტოტებს რომ მატებენ.

ამ არემარის პატრონს, გარდა ატარისა, კიდევ ერთი რეზიდენცია აქვს ზღვის ნაპირას; ორ, ვრცლად გაჭიმულ ახალგაზრდა ტყეს შორის, რომელთა ათვისება ეს-ესაა დაუწყია ინგლისურ კომპანიას. ალბათ, მრავალი საუკუნის განმავლობაში პირველად გაისმა ხისმჭრელის ცულის ექო ამ კორომებში, რომელთა სქელ, მწვანე გუმბათებში მზის სხივი ძნელად თუ აღწევს. გარდა მამულის მბრძანებლისა და მისი მსახურებისა, მხოლოდ რამდენიმე უცხო თუ იმოგზაურებს ამ მართლ-სული ტყის გავლით, რომელიც წყურჩამდე (ყოფილი დიოსკურია) გადაჭიმული.

ვაზისა და სხვა მცოცავ მცენარეთა წნულები, ტოტებისა და გიგანტური ბუჩქების ხლართები ჩვენს სვლას მეტად შრომატევადს ხდის. ყოველ წუთს ცხენებს ფეხები ეხლართებათ მცენარეთა გზაბნეულ და წებოვან პწკალებში, რომლებიც თითქოს ამბოხებულან და რომელთაგან თავის დახსნის ერთადერთ გზად ხანჯლის მოხმობაღა დარჩენილა. ამ მზაკვარ ტყეებში, ქვეწარმავალთა გარდა, ღამლამობით მგლები, ტურები და დათვებიც მართავენ ხოლმე კონცერტს, რომელსაც ზოგჯერ პისტოლეტის გასროლით აწყვეტინებენ ხოლმე. არცთუ იშვიათად, ცხენოსნები ქუსლებს ქვემოთ ხედავენ ნახევრად მშვიერ ხორცის მჭამელთა ხროვას, რომელთა მანათობელ თვალებსაც ადვილად შეამჩნევთ სიბნელეში და რომელნიც ტყის პირამდე არ წყვეტენ ველურ დევნას. სწორედ ასე მოხდა მაშინაც, როცა ჩემი მასპინძლისა და მისი ამაღის თანხლებით გადავიარეთ იგი. ერთ-ერთმა მათგანმა ისე გულმოდგინედ დაუმიზნა, რომ დააბრმავა დათვი, რომლის ტყავიც მერე მე შემომთავაზეს. რამდენიმე დღე წყურჩაში გავატარე, დაცარიელებულ პლაჟზე, სადაც უწინ მდიდარი დიოსკურიელები იდგნენ. ტყის პირას, ხის სახლში გავჩერდი, საიდანაც ვხედავდი ველურ ცხოველებს, რომლებიც ღამლამობით თვით ჩემს სამყოფლამდეც კი აღწევდნენ ხოლმე. ამასთან, მის საზღვრებს იცავდა მყეფარე ძაღლების ხროვა, რომლებიც ზღვასთან მდებარე ტყეშიც ბატონობენ. ამ საცხოვრებელიდან არც ისე შორს, ტლანქი სათვალთვალ კოშკი აუშენებიათ, რომლი-

დანაც ხედი ისტორიის კონცხის უღრან დეზამდე იშლება. მინდოდა მესარგებლა იმ ფაქტით, რომ ყოფილი სტუმართმოყვარე ზღვა (Euxine Sea), წელიწადის ზოგიერთ დროს ეგზომ საშინელი, ასე ნაზად ელაპუნებოდა წყურჩის მდუმარე ნაპირებს და მომეწყო ღამეული ექსკურსია თვით სოხუმ-კალემდე, აფხაზეთის მთავარ პორტამდე. პატარა აფრიანი ნავი ამ მგზავრობას სულ რამდენიმე საათს ანდომებდა.

ზღვიდან დანახული მზის ჩასვლა ენით აღუწერელი საოცრებაა. ვარსკვლავი უჩინარდება კონუსისებური მთის მიღმა, რომელსაც აქაურები „სეფერ ბეის ქოხს“ უწოდებენ. ზღვის ხავერდოვანი ზედაპირი, რომელშიც მისი სხივები ჩაყურყუმელავდა, ცეცხლოვნად ანათებს და სანაპიროს ტყიდან ამოწვერილი მთვარის ფერმკრთალ სხივებთან კონტრასტს ქმნის. საათები მიიპარებიან აწმყოს ამ სანახაობათა ცვლისას და ერევიან წარსულის განურჩეველ ოცნებებს; მერე, გარიჟრაჟზე, შორს დაინახავთ მოციმციმე შუქს: ეს სოხუმ-კალეს¹³ პორტის შუქურაა.

ჯერ კიდევ ყველაფერს სძინავს მშვიდობიან ქალაქში, რომელსაც ეს-ესაა ეხება დილის ვარდისფერი არილი; სანაპირო მდუმარებს; ქუჩები ცარიელია და მძინარე სახლების ირგვლივ, განთიადის კამკამა ჰაერში, შორს გაფრენილი სიზმრების ფრთების იდუმალი ფრთქიალი მოგესმებათ. ევროპული სტილის ეს სახლები უმაღლეს აუწყებენ უცნობს, რომ თანამედროვე, ახლანდელ აფხაზეთში შედის, რომელიც ცივილიზაციას¹⁴ დაუბყრია. მთლიანი ხედი მომხიბლავია. საცხოვრებელ სახლთა ჯგუფები ბორცვებისა და გორაკების ფონზე გაუშენებიათ. სანაპიროზე, ყურის პირას, თურქული თუ ბერძნული კაფეები ბუტიკებს ენაცვლება; ბოლოს, ნავსადგურის მოპირდაპირედ, დგას ორი შენობა; ერთი მათგანია ძველი ციხესიმაგრე, წარსულს რომ ინახავს, მეორე კი, ახალი საბაჟო სახლი – აწმყოს.

ციტადელი, აფხაზეთის მთავარი ბურჯი, 1578 წელს, სულთან მურად მესამის მეფობისას ააშენეს. სამმა სხვადასხვა რეჟიმმა თავისი კვალი დააჩნია ამ ოთხკუთხა ნაგებობას, დღეს რომ ნანგრევებადაა ქცეული: უშველებელი ლოდი ერთ-ერთი ჭიშკრის ზღურბლზე, არაბული წარწერით, ოტომანთა მოსაგონარია; აფხაზ სარდალთა საფლავები შემდეგ პერიოდს გაგახსენეთ, ხოლო რუსული ზარბაზნები მოგითხრობენ, თუ ვინ არიას ქვეყნის ამჟამინდელი ბატონი. სოხუმ-კალეს ახლანდელი მოსახლეობა თურქების, ლაზების, ბერძნების, სომხებისა და რუსების ნარევია; აფხაზები აქ მხოლოდ უმცირესობას წარმოადგენენ; ისინი მიმდებარე პატარა სოფლებში ცხოვრობენ და ქალაქში ცხენოსანთა რაზმებად მოედინებიან, როცა ამას საქმე მოითხოვს; შემდეგ კი ისევ მინდვრებს უბრუნდებიან. ზაფხულში, ირგვლივ მდებარე ტაობიანი ნიადაგი იწვევს საშინელ ცხელებას, რომელსაც ლა-

13. სოხუმ-კალეს დიდი ყურე 15 ვერსზეა გადაჭიმული სოხუმის კონცხიდან კოდორის კონცხამდე.

14. ჩვენ აღვწერთ რუსეთ-თურქეთის ომამდელ სოხუმ-კალეს. ამის შემდეგ იგი ნაწილობრივ დაინგრა.

მის ყველა უხდის ხარკს და არავინ ცდილობს, საშველად რაიმე იღონოს. ექიმების გაჭირვებასა და ხშირად, ქინინის ნაკლებობასაც განიცდიან, რადგანაც ეს წამალი კავკასიაში ყველა ავადმყოფობის სამკურნალოდ ინიშნება.

არემარეს სასიამოვნო ელფერი დაჰკრავს, მაგრამ ჩრდილის ნაკლებობაა და, მიუხედავად ზღვის სიახლოვისა, სულის შემხუთველი სიცხე ჩამოწვება ხოლმე. ბოლო ხანს, უცხოელმა მცხოვრებლებმა დაიწყეს გარეუბანში მდებარე მიწების დამუშავება; და მაინც, აქამდე სამერქნე მასალისთვის ხეები არავის დაურგავს. მეორე მხრივ, ძველი ციხესიმაგრის მეზობლად, ფართო ბარაკები და სამხედრო ჰოსპიტალი აშენდა. როგორც წინა ხაზზე მდებარე პორტი, სოხუმ-კალე, უპირველეს ყოვლისა, ჯარისკაცების ქალაქია; ყოველ კვირას, როდესაც ოდესიდან ფოთში ორთქლმავალი ჩამოდის, გარნიზონის ორკესტრი სპეციალურად ამისთვის დადგმულ პავილიონში ასე თუ ისე მხიარულ ფანფარას ასრულებს. ორთქლმავალი, საუბედუროდ, ერთადერთი რგოლია, რაც ქალაქს ევროპასთან, ტფილისსა და კავკასიის სხვა ოლქებთან აკავშირებს; სხვა სახმელეთო მარშრუტები, ფაქტობრივად, არც არსებობს.

აქ, როგორც ყველგან აფხაზეთსა და სამეგრელოში, მოსახლეობის უპირატესი გასართობი წმინდა კავალკადები, ქეიფისა და თამაშების მსუყე ამბებია, რომლებიც ხშირად რეგიონის ცნობილ ეკლესია-მონასტრებში ტარდება. ერთ-ერთი მათგანი, მაგალითად, ქალაქიდან სამი ვერსის დაშორებით, არის წმინდა გიორგის სოფლური სამლოცველო, სადაც შეგიძლიათ ნახოთ აღმასცებითა და ფირუშებით შემკული მებრძოლის გამოსახულება, და რომელსაც სასწაულების აღსრულებას მიაწერენ. ამ წმინდანის დღესასწაული, რომელსაც 28 აპრილს (9 მაისი ახალი სტილით) ზეიმობენ, პირველი საგაზაფულო დღესასწაულია და ათასობით ადამიანს იზიდავს. ჩემ მიერ ზემოთ აღწერილი ადათ-ჩვეულებების გათვალისწინებით, ადვილად წარმოიდგენთ, რომ იმ დღეს, ეკლესიასთან მდებარე სასაფლაო გარდაიქმნება საზეიმო სასადილო დარბაზად, სადაც ბრბო ნადიმობს და ცეკვავს ორგის მსგავსი ცხოველმყოფელობით, რასაც, ამ ადგილის სიწმინდე, ასე თუ ისე ეგუება; საღამოს, ყველა ბრუნდება – სიმღერით, ჭენებით და ამ ქვეყანაში პოპულარული საცხენოსნო ტრიუკებით. დღის სავალდებულო დასასრული, ბუნებრივია, ცხენების დოღია, რომელიც ტარდება ზღვის პირას, ქალაქის და წმ. გიორგის სამლოცველოსთან დამაკავშირებელ გზაზე.

სოხუმ-კალეს ნაპირებიდან შესაძლებელია პატარა სანაპირო ადგილის დანახვა, რომელთანაც სასიამოვნო მოგონებები მაკავშირებდა: ეს არის სოფელი კელასური, რომლის სახელიც ნიშნავს „გალავნიან ციხესიმაგრეს“. აქ გულუხვი სადილი გამიმართეს სხვადასხვა ეროვნების წარმომადგენლებმა, რომლებიც ქალაქში სახლობენ. საათზე ნაკლებ დროში პაწაწინა ნავებით მივაღწიეთ ამ ამბისთვის არჩეულ ალაგს.

[...]

კელასურის ციხის მდებარეობა ერთობ თვალწარმტაცია. მის უკანა ფონზე მოჩანს მარადიული მყინვარით დაფარული მწვერვალები, რომელთაგან შვიდი გამოურჩევიათ ადგილობრივებს: მარუხა, შაუდუთი, აბსიძო, ამთაქალი, აჭადო-პა, მუმფისტო და ჯურივი – სავარაუდოდ, მათი სახელწოდებები უცნობია ჩვენი გეოგრაფებისათვის. მეორე მხარეს, სადაც გზები ნახევარმთვარეს ქმნის, მოჩანს სოხუმი თავისი თეთრი სახლებით. ციხესიმაგრის ახლოს მდებარეობს მამულის ახლანდელი მფლობელის საცხოვრებელი; ესაა ევროპული სტილის, ბალით გარშემორტყმული ვილა. უფრო შორს, ზღვისკენ, წააწყდებით მუსლიმ ოჯახ-თა სახლებს, რომლებიც უკიდურესი სისუფთავის გამო, სრულ კონტრასტს ქმნის აფხაზთა ფეთხუმი სახლების ფონზე. თეთრი გადასაფარებლებით დაფარული ლოგინი, სპარსულხალიჩებიანი გრძელი სკამები, თვალისმომჭრელი ფერებით მოხატული ზანდუკები და მოწესრიგებულად დაკიდებული ტანსაცმელი, – ყველა-ფერს მზრუნველი დიასახლისის ხელი ეტყობა.

ერთ-ერთ ასეთ მომხიბვლელ საცხოვრებელს ვეწვიე, რომლის დიასახლისიც სახლის ინტერიერის მორთულობასავით ჩინებულად გამოიყურებოდა. კედლებ-ზე დაკიდული სამი სარკე მოწმობდა, რომ მათი ქალბატონი თავისი სასიამოვნო გარეგნობისადმი გულგრილი სულაც არ უნდა ყოფილიყო. ასევე, კედელზე, ნაცვლად ქრისტესი, ყურანის ერთ-ერთი სურა გაეკრათ. შეძლებისდაგვარად სტუმართმოყვარულად შემოთავაზებულმა ხემსმა მას საშუალება მისცა, გამოემ-ზეურებინა ტყავის ყუთში ჩალაგებული, ვარდისფერბათფიან ქალაღდის ხელსა-ხოცში საგულდაგულოდ გახვეული, ბრწყინვალედ მოვარაყებული ჯამ-ჭურჭელი. უნდა დავამატო, რომ ნაცვლად სტუმრის წინაშე დამორცხვებისა, ეს ქალები გულ-გახსნილები ჩანან, გიტარაზე უკრავენ და მღერიან.

ამგვარად, ის ინტერნაციონალური სუფრა კელასურის უზარმაზარ მწვანე მოლ-ზე, უშველებელი ხეხილის ჩრდილქვეშ გაიშალა. მას შემდეგ, რაც იქვე მოაწყვეს სამზარეულო, როგორც აქ, ამ ქვეყანაში იციან, ჩემმა მასპინძლებმა სწრაფად მოამ-ზადეს საჭმელი. ახლაც ცხადად ვხედავ მიწაზე დადებულ მაყალს, რომელზედაც ჯერ კიდევ სისხლიანი ხორცი (შაშლიკი) შიშხინებდა. არ დაგავიწყდეთ, რომ ბატ-კნისა თუ თიკნის მეოთხედი კი არ არის, არამედ მთლიანი ცხოველი, შეკრების ადგილას დაკლული და შემოდებული ცეცხლის ტკაცუნა ალზე. ყველაზე ხშირად მონიშნული მსხვერპლი სამგლოვიარო კოცონის დანთებისას იქვე ჰყავთ ხოლმე და ამტკიცებენ, რომ შაშლიკი მაშინაა კარგი, როცა ცხოველს ყელს ბოლო წუთას გამოსტრიან. სამზადისს ორი კაცი ხელმძღვანელობს: ერთი, მიწაზე ჩაცუცქული, გაუჩერებლად ატრიალებს შამფურებს; მეორე იქვე დგას და კარაქის, წიწკისა და მარილის ნაზავს ფრთების კონით უსვამს ხორცს. თანდათან ხედავთ, როგორ ოქ-როსფერდება ხორცი და უშვებს მადის აღმძვრელ არომატს, ხოლო ერთი საათის

შემდეგ შაშლიკი სრულყოფილადაა მომზადებული. ამის მერე იგი მონადიმებთან მიაქვთ ან შამფურით, ანდაც მის გარეშე, როგორც უფრო მოსახერხებელი იქნება.

მაგრამ, მოდით, ამ ჰომეროსული ნადიმის დეტალებს უფრო თანმიმდევრულად მივყვეთ. ისინი, ბუნებრივია, იწყებენ რუსული „ზაკუსკით“ ანუ „კბილში ამოსადები ნამცეცებით“, რომელიც მალევე მოგვითანეს, როცა მოლზე ახალგაზრდა რუსის გვერდით ვიჯექი, რომელსაც ეროვნული ტანისამოსი ეცვა, ე.ი. წითელი კოფთა გაფუყული სახელოებით და მაღალ ჩექმაში ჩატანებული პანტალონები. ეს პატარა, საწყისი ხემის ლამის რელიგიური დუმილით გადავყლაპეთ. შემდეგ მოიტანეს სუფი (ჩიხირთმა), ქათმის ცხარე ბულიონი, რასაც მოჰყვა ტოლმა, ვაზის ფოთოლში გახვეული, ფარშირებული ბატკნის ხორცის რაგუ, ზაფრანით შეზავებულ არაჟანთან ერთად; ორი ქართული კერძი, რომლებსაც უცხოელის სასა გაჭირვებით ეჩვევა. რაც შეეხება ინდაურს, ის ფლავთან ერთად მოგვართვეს. მოკლედ, თითოეულმა ქვეყანამ თავისი კულინარიული წვლილი შეიტანა ბაბილონის წვეულებაში, რომელშიც ყველანი ერთად მონაწილეობდნენ, ბალახზე ჩამუხლულები, ეროვნული კერძებითა და ტანისამოსით წარმოდგენილები: ერთი თეთრ ქუდს ატარებდა, მეორე – თურქულ ფეხს, მესამე – აფხაზურ ყაბალახს, ბერძნულ ბერეტსა თუ ქართულ ფაფახს; ყველაფერი სრულყოფილ ჰარმონიაშია ერთმანეთთან. ეს ჰარმონია მაშინაც გრძელდება, როდესაც ჯანმრთელობის სადღეგრძელოს სვამენ: მართლმადიდებელი ქრისტიანი სვამს თურქთან, ბერძენი ლათინთან, პროტესტანტი აფხაზთან; თამადის (სადღეგრძელოების ხელმძღვანელი) წარმოთქმულმა სადღეგრძელოებმა კიდევ უფრო გამოაცოცხლა სუფრა და ქართველებმა, აბუხად რომ იგდებდნენ ამ მომცრო ჭურჭელს, ჭიქად წოდებულს, მოითხოვეს გიგანტური ყანწები (ველური ჯიხვის რქები), რომელთაც მალევე აღასრულეს საკუთარი მისია. ეს პანტაგრუელური საოცრება ცეკვა-სიმღერით დაგვირგვინდა: აქაურობას, ალბათ, დიდი ხანია აღარ სმენია ასეთი მხიარულება.

მეორე მხრივ, უკან თუ მივიხედავთ, ამ მწვანე მდელოს სიმშვიდე, ალბათ, ბევრჯერ დარღვეულა ბრძოლის ხმაურით. ტოპოგრაფიულად, ხმელეთის ეს კუთხე დიოსკურიის ბერძნული რესპუბლიკისთვის ბუნებრივ დაცვას ქმნიდა დაულალავი მეზობლების წინააღმდეგ. იგი, ფაქტობრივად, ევქსინის ზღვის სანაპიროზე ერთადერთი ადგილია, სადაც კავკასიის ქედი ზღვამდე ჩამოდის – განივი დეზი, რომელიც ორად ჭრის რეგიონს და გრძელდება აზოვის ზღვისკენ. ეს ხსნის ქალაქ კელასურის მნიშვნელობას ჯერ კიდევ უძველესი დროიდან, რომლის კედელიც ქართული ქალაქის, ცხუმის (ახლანდელი სოხუმ-კალეს) საზღვარს ქმნიდა. ჯერ კიდევ თხუთმეტი წლის წინ ეს სოფელი, ახლა გაუდაბურებული, სიცოცხლით იყო სავსე; მისი თურქების მიერ მართული ბაზარი პატარა საქმიანი ცენტრი იყო, სადაც გარშემო მდებარე ყველა სავაჭრო დაწესებულების მფლობელები მოდიოდნენ საქონლის საყიდლად; 1866 წლის აჯანყების შემდეგ აქაურობა მცხოვრებთაგან

დაიცალა. საქმიანი მოსახლეობა საცხოვრებლად სოხუმ-კალეში, გუდაუთასა და ოჩამჩირეში გადავიდა; ასე რომ, ძველი სავაჭრო დაბის სამუდამოდ გაუჩინარებულ კეთილდღეობაზე მხოლოდ მეღანქოლიური მოგონებებიღა თუ შემორჩა.

სოხუმ-კალეში ყოველთვის მოძრაობს პატარა რუსული ხომალდი, რომელიც აფხაზეთის კუთვნილ სანაპიროს ემსახურება. ჩემი მოგზაურობისას შხუნა „სალგირი“, კაპიტან კრაკინის მეთაურობით, დაადგა გზას. გემბანზე შესაძლებლობა მქონდა, მცირე სანაპირო ექსკურსიით დავმტკბარიყავი. მგზავრობას, გარდა ჩემს მასპინძელ ოფიცერთა დახვეწილი თავაზიანობისა, საამოს ხდიდა ასევე ისიც, რომ პორტიდან პორტში ვჩერდებოდით ისე, რომ მეორე დღეს მივაღწიეთ გაგრას, მაშინ, როცა კომერციული ნაგები ამას მხოლოდ რამდენიმე საათს ანდომებენ.

სოხუმის შემდეგ პირველი ადგილი ამ მიმართულებით არის გუდაუთა, რომელიც უწინაც ვახსენე, პატარა, ლაზებით დასახლებული ქალაქი, გამორჩეული თავისი თურქული კაფეებით. უფრო შორს, დაბლობზე, მიაღვებით ლიხნის, საუცხოო მწვანე ბუდე, რომელმაც ყველანაირი პრესტიჟი უკანასკნელი აჭუს გარდაცვალების შემდეგ დაკარგა. მისი რეზიდენცია გორაკის თავზე იდგა, სადაც ჯერაც აღმოაჩენდით იმ ანტიკური კოშკის ნანგრევებს, რომელიც თურქებს გადაეწვათ; ისინი აფხაზეთის ამ ნაწილს ხშირად ესხმოდნენ თავს. 1830 წელს, სწორედ ამგვარი თავდასხმებისას, რუსეთის ვასალი მიხეილ შერვაშიძე დაიცვა მისი სიუზერენი ქვეყნის ჯარმა, რომელმაც დაიკავა სოხუმი, ბამბორა, ბიჭვინთა და გაგრა; ერთი სიტყვით, სანაპიროს ყველა გამაგრებული წერტილი.

უკვე ვთქვი, რაოდენ თვალწარმტაცი იყო შავი ზღვის ქვედა წელში მდებარე ტყეები, მაგრამ არ შემიძლია არ აღვნიშნო, როგორ გამოგონა ზედა ნაწილის მცენარეული საფრის სიმდიდრემ, განსაკუთრებით კი, ლიხნიმ.

ლიხნის ეკლესია იმავე შემოგარენში მდებარეობს, სადაც ოდესღაც აჭუს სახლი (თურქების მიერ დანგრეული) იდგა. ამ რეგიონის ანტიკური რელიგიური მონუმენტები ბიზანტიური სტილითაა ნაგები. ლიხნის ტაძარი ბევრად უბრალო და პატარაა და, როგორც ჩანს, ბიჭვინთის ეკლესიის ასლია. იგი ახლომდებარე მთებიდან ჩამოტანილი, მოყვითალო კირქვითაა ნაშენი. გუმბათი რვაკუთხაა, მასში ჩადგმული ფანჯრებით. ინტერიერი საკმაოდ კარგადაა შემონახული, განსაკუთრებით კი, ფრესკები, რომელთაც ადრე ნანახი ყველა კედლის მოხატულობა მომაგონეს. ნაგებობა გარშემორტყმულია მრავალგზის აღდგენილი კედლით. წლის გარკვეულ დროს, განსაკუთრებით კი მაშინ, როცა მე ვეწვიე, საყდარი ისეა დაფარული მცოცავი მცენარეებითა და ფოთლოვანი ბუჩქებით, რომ გაჭირვებით გავიკვლიე გზა ფოთლეულისა და ყვავილების ლაბირინთში.

ბიჭვინთის ეკლესია მდებარეობს ყურეში და ჩრდილოეთის ქარებისაგან საკმაოდ კარგადაა დაცული. ქვიშიან დაბლობზე ფიჭვის დიდრონი ტყე წამომართუ-

ლა. მისი გადაკვეთს შემდეგ მიაღებოთ ამ ქვეყნის საოცრებას, მე-ნ საუკუნის შუა წლებით დათარიღებულ ეკლესიას, რომლის აგებაც იმპერატორ იუსტინიანეს მიეწერება.¹⁵

[...]

შავი ზღვის პორტების გავლით ჩემს ექსკურსიას რომ დავუბრუნდე, ალბათ შეუძლებელი იქნება, აღვწერო ყველა შთამბეჭდავი მომენტი. თოვლიანი მწვერვალები და მათი ამწვანებული ქვედა ფერდობები, მშვენიერი თხიერი ზეწარი, მათ სიდიადეს რომ ირეკლავს და სამხედრო ხომალდის ეკიპაჟის მოწესრიგებული, დისციპლინებული ცხოვრება – ეს ყველაფერი წარუშლელი მოგონებებით მავსებს. განსაკუთრებით, ღამის დადგომისას, გემბანზე გამართული სანახაობა იყო ამაღელვებელი. მეზღვაურთა ვახშმის შემდეგ – ჩვეულებრივ, ეს ქერის ფაფაა (რუსულად კაშა), რომელსაც კაპიტანი ყოველთვის პირველი სინჯავს, ყველანი მლოცველთა კაიუტასთან იკრიბებიან, რის შემდეგაც გემზე მყოფნი საღამოს ჰიმნს მღერიან. ამ გულში ჩამწვდომ ხმათა ჰარმონია იკარგება უსაზღვრო ცის კამარაში და ყველაზე განსაცვიფრებელ მელოდიას ქმნის, რომელიც კი ცასა და წყალს შორის გაჟღერებულია.

ბოლოს გაგრას მივაღწიეთ. პირველ ყოვლისა, იფიქრებდით, რომ ნორმანდიის რომელიღაც სოფელს მიაღექით. გიგანტური ალგების ხეივანი მშვიდ ტალღებში ირეკლებოდა და ამ ადგილას შავ ზღვას ერთიანად ამწვანებდა. თუმცა, თუ მხერას უფრო შორს გადაიტანდით, 50 ვერსის იქით დაინახავდით ჯადოსნურ პეიზაჟს მაღალი მთების ქედით, აფხაზეთს ჩერქეზეთისგან რომ გამოყოფს. მის მწვერვალებზე ასვლა მეტად რთულია და შესაძლებელია მხოლოდ დაკლაკნული გზებით, რომელთა გავლითაც ინგლისურ კომპანიას ხე-ტყე ჩამოაქვს და, ასე ვთქვათ, ექსპლოატაციას უწევს ამ რეგიონის ტყეებს; ჩერქეზთა დამარცხების შემდეგ მათ ტერიტორია დატოვეს და ამის შემდეგ მიწები რუსებსა და უცხოელებს შორის გადანაწილდა.

როდესაც გაგრაში ნაპირზე გადმოვედით, დავინახე ზღვის კიდესთან, სანაპიროზე დალაგებული ხის მორები, რომლებიც მოეჭრათ და ტრანსპორტირებისთვის გაემზადებინათ. გაგრა სევდიანად არ გამოიყურება, თუმცა, სოფელი დაცარიელებულია. საქმიანი სამყარო აქ სულ სამი დუქნით (მაღაზიები ცხაურებით), *შემოიფარგლება*, რომელთა მეპატრონეებსაც შეთანხმება დაუდვიათ რუსეთის მთავრობასთან 250 ახალწვეულისაგან შემდგარი გარნიზონის მომარაგების თაობაზე. კლიმატის შედარებითი სირბილის გამო, ციხესიმაგრეში მოუწყვიათ შა-

15. იხ. Procopius, De Bella Gothica II 471, 472, 473.

ვი ზღვის სანაპიროს სამხედროთა საზაფხულო ჰოსპიტალი. აქ ორასი საწოლია ავადმყოფთათვის; რაც შეეხება გამოჯანმრთელებულებს, მათი საწოლები ციტადელის შიდა ეზოში, კარავში გაუშლიათ.

ციხესთან ახლოს მდებარეობს პატარა, ათასწლოვანი და კარგად შემონახული ეკლესია. კამარას ერთი ქვაც კი არ აკლია; მხოლოდ საკურთხეველი გაუჩინარებულა. საეკლესიო საღარო, ასევე ხელშეუხებელი, ბურახის (ხორბლის ან ხილისგან დამზადებული სასმელი) შესანახ მარნად გადაუკეთებიათ. ეს ტაძარი მიუძღვნიათ წმ. იპათიასთვის, მახარობლისა და მოწამისათვის, რომელიც, როგორც ამბობენ, ქრისტიანობის გასავრცელებლად მოსულა ქვეყანაში. აქაურები შორიახლო მთის კალთაზე ახლაც გაჩვენებენ მღვიმეს, სადაც იგი გაურბოდა ბარბაროს კერპთაყვანისმცემელთა დევნას. რუსები მას თაყვანს სცემენ, როგორც იპათია გაგრელს.

ბიზანტიის იმპერიის დროს, გაგრა გადასახლების ადგილი იყო; გარკვეულწილად, ეს ახლაც ასეა სამხედროებისათვის, ვისაც აქ აგზავნიან მარტოობისა და მოწყენილობისათვის. თუმცა, რაც უნდა სევდიანად გამოიყურებოდეს ეს ადგილი აქ ცხოვრებისათვის განწირულთა თვალში, ტურისტებისათვის მაინც დიდად მომხიბლავია. გაგრანსკა, კალმახით მდიდარი მშვენიერი ნაკადული, ქალაქს რწყავს; წყლის ნაკადს ქმნის თოვლი, ხოლო უშველებელი ლელქაში გარს შემოჯარვია. ციხესიმაგრიდან ორ ვერსში კი იგი ხევიდან გადმოდენილ ჩანჩქერად ეშვება.

[...]

ვიხსენებ ციტადელთან ახლოს მდებარე დიდი ბაღს, რომელიც 1850-იდან 1864 წლამდე ჩერქეზებსა და რუსებს შორის სისხლიან ბრძოლათა სცენა იყო; ყოველი ხე საფარი ყოფილა, რომლის უკან დამალული მთიელები სასიკვდილო ტყვიებს ესროდნენ სიმაგრიდან გამოსულ ჯარისკაცებს. პაქტის თანახმად, ყოველი მოკლული ჩერქეზის სანაცვლოდ, ცხრა რუს ჯარისკაცს უნდა შებრძოლებოდა ჩერქეზის ოჯახის გადარჩენილი წევრი. ამ ადგილას მოკლული რუსი ოფიცრების საფლავები გაუთხრიათ ბაღის ყვავილებით დაფარულ ნაწილში, რომელიც, ამავე დროს, წინააღმდეგობის ცენტრიც ყოფილა. ვინ იეჭვებდა, რომ ამ თვალწარმტაცი ტალავრების ადგილას მოხდა საშინელი ბრძოლები, ამდენი სიცოცხლე რომ იმსხვერპლა! ჩემი სტუმრობისას საუცხოო ამინდი იდგა. ციხისთავი და მისი ცოლი, ორივე ქართველი, ჩემდამი ფრიად ყურადღებებიანი აღმოჩნდნენ და ყველაზე შესანიშნავი ადგილებისაკენ ცხენებით წამომყვნენ. სუფრა, რომელიც მათ გაუშალეს საღვრიის კაპიტანს, ოფიცრებსა და მათთან ერთად მეც, დიდებული იყო. ვერასოდეს წარმოვიდგენდი, თუ დანარჩენი სამყაროსაგან ასე მოწყვეტილ ადგილას ამდენ დელიკატესსა და გასტრონომიულ საგანძურს აღმოვაჩენდი.

რამდენიმე დახვეწილი კერძი, უგემრიელესი ღვინოები, არაჩვეულებრივი ხილი და ყვავილების სიჭარბე რაოდენობითა და ხარისხით ერთმანეთს მეტოქეობდა სუფრაზე, რომელიც აყვავებული ბაღის ჩრდილში ელეგანტურად გაეშალათ.

ამ სიამოვნების დასაგვირგვინებლად, ბატალიონის რამდენიმე ხელოვანი არმიელი, ორი დოლის თანხლებით ეროვნულ მელოდიებს გვიმღეროდა; ყავით ფანჯატურში გამასპინძლების შემდეგ, ჯარისკაცებმა შეასრულეს რამდენიმე ორიგინალური ცეკვა, მათ შორის, კაზაკური და ჩერემისულ-გლეხური არხანგელსკის პოსტიდან, რაც იმას ადასტურებს, რომ გაგრის გარნიზონის რეკრუტები რუსეთის იმპერიის შორეული პროვინციებიდან ჩამოუყვანიათ. დასასრულს მხიარულება დააგვირგვინა ასევე არმიიდან წამოყვანილმა იმპროვიზატორ მსახიობთა დამა და პატარა ვოდევილის ბუნებრივი და ცოცხალი შესრულებით გაგვახალისა. დეკორაციის როლს გულუხვი ბუნება ასრულებდა; მოკლედ, შემოიღვია ვთქვა, რომ თეატრალურ წარმოდგენას იშვიათად თუ მოუხდენია ჩემზე ისეთი წარმატებული შთაბეჭდილება, ვიდრე ამ შეგირდი მეომრების მიერ გათამაშებულ უპრეტენზიო სცენას, რომელთა თეთრი კოსტიუმები სურნელოვანი ვარდების ტევრის ფონზე კიდევ უფრო ქათქათებდა. დაე, მშვიდობა სუფევდეს რუსეთში! – ვეუბნებოდი საკუთარ თავს მხიარულ ახალწვეულთა გართობის შემხედვარე. ამ სურვილს ასრულება არ ეწერა, რადგანაც სულ მალე კავკასიაში ომი ისევ გაჩაღდა.

ცოტა ხნის წინ კვლავ ვიმოგზაურე ენიგმატურ კავკასიაში, რომელმაც ასე დამაინტერესა. ასე რომ, ორჯერ გავრისკე, მარტოდმარტომ, თავდაჯერებულმა და საკუთარი რესურსების იმედად.

არანაირი მიზეზი არ მექონია, რომ ეს მენანა. ყველგან და ყველა სახლში, კავკასიელთათვის დამახასიათებელ ერთნაირად გულითად, გულწრფელ სტუმართმოყვარეობას ვხვდებოდი. ამას არასოდეს დავივიწყებ.

ჩემი მეორე მოგზაურობა აფხაზეთში უფრო სახიფათო აღმოჩნდა, ვიდრე პირველი. თუმცა, სინანულისთვის არანაირი მიზეზი არ გამაჩნია. მიუხედავად იმისა, რომ მას რისკისა და ხიფათის გარეშე არ ჩაუვლია, იმ პილიგრიმობად ჩავთვალე, რომლის განხორციელებაზეც უარს ვერ ვიტყოდი.

დროის სიმცირემ გარკვეული დაღი დააჩნია იმას, რაც შეიძლებოდა, უფრო სრულყოფილი ყოფილიყო. მაგრამ თუკი *Around the World*-ის მკითხველი ინტერესით მომყვებოდა, საფრთხე, რომელიც აფხაზეთში ფოტოგრაფის იმპროვიზებულ, ხანმოკლე მოგზაურობას ახლდა თან, სრულიად გამართლებულია.

V

ახალციხის რეგიონი

ახალციხე: ნახევრად გამოქვაბული ქალაქი

მოდით, ახლა ახალციხის გზას გავეყვით. დილიჯანსით 5-ნ- საათიანი მგზავრობის შემდეგ ეს მხარე უფრო და უფრო მრავალფეროვანი ხდება. საშინელი იაკობი, ანუ საშინელი თხრილი გაჩერებაა ბორჯომის ტერიტორიის ბოლოს; ადრე ის თურქეთსა და საქართველოს შორის საზღვარი იყო. ტრადიცია გვიყვება მრისხანე ბანდიტის, საშინელი იაკობის შესახებ, ვინც თავს ესხმოდა ხალხს და გასაყიდად ახალციხეში გადაჰყავდა.

გაჩერების შემდეგ, თითქოს, ახალი ზონა იწყება. მარადმწვანე ტყეები ადგილს უთმობს მოშიშვლებულ ანდა მუხით, წაბლითა და არყის ხეებით დაგვირგვინებულ კლდეებს. ზოგიერთი ველი და დაბლობი შორიდანაც ადვილი გასარჩევია; მათ უკან აღმართულია მაღალი მთები ვიწრო ხეობებით, თითოეულ ფლატეზე კი აშენებულია ციხესიმაგრე, ქვეყნის თავდაცვითი აბჯრის ნარჩენები ნახევართვარესთან წინააღმდეგ ბრძოლაში. ამ რეგიონის ახლანდელი მკვიდრნი, თავისებური ფიზიონომიით, არიან აჭარლები (Ajaran, ქართველი მუსლიმები), რომელთაც მგზავრობისას მუდმივად შეხვდებით პატარა საპალნე ცხენებით ანდა, როგორც დღიურ მუშებს. მათი ტანსაცმელი წააგავს ბათუმელი ლაზების სამოსს: მოკლე პერანგი, ფესი და თურქული ჩალმა. ბორჯომსა და ახალციხეს შუა მდებარე აწყურის შემდეგ ისეთი შეგრძნება დაგეუფლებათ, რომ თურქეთში ხართ. პატარა ქალაქი აწყური (ქართულად ნიშნავს „ახლა ყური!“) მდინარე მტკვარზე, ხეობის შესასვლელთან მდებარეობს. მარჯვენა ნაპირზე დაინახავთ ქართველთა სახლებს, მარცხენა ნაპირი კი სომეხ ვაჭრებს აუთვისებიათ და ქრისტიანული თემი ჩამოუყალიბებიათ; ეს გარეგნობით, ტანისამოსითა და ცხოვრების ყაიდით ერთმანეთისაგან სრულიად განსხვავებული ორი სამყაროა.

აწყური იყო თორმეტთაგან ერთ-ერთი საეპისკოპოსო სამცხეში (ზემო ქართლი), რომელსაც თურქები ახლა აჭარას ეძახიან იმ მთების გამო, მას რომ ესაზღვრება. ახლახან, ყირიმის ომის დროს, იგი თურქული და რუსული ჯარების ბრძოლის ველად ქცეულიყო, რომელიც ამ უკანასკნელის გამარჯვებით დამთავრდა.

აქედან ახალციხემდე მხოლოდ თურქულ სოფლებს თუ შეხვდებით. ზოგიერთ მათგანს მეტად თვალწარმატებლად მდებარეობა აქვს, განსაკუთრებით, ცხენისს – ბაღებისა და ბაღჩების ანტურაჟით მტკვრის ნაპირებზე. ჩადრში გახვეული ქალები კი, გამვლელთა დანახვაზე რომ იმალებიან, უმაღ გეტყვიან, თუ სად იმყოფებით.

შორიდან ისინი თეთრ ქსოვილში გახვეულ მოჩვენებებს ჰგვანან. გზაში ყოფნისას შევნიშნე, რომ ზოგიერთი გლეხი ცხენზე უკუდმა იყო ამხედრებული, ზურგით ცხენის თავისაკენ და ისე ჩანდა, თითქოს პირუტყვს მიჰყავდა ისინი. ამ სანახაობამ გამახსენა ტანჯულ სულთა გარკვეული კატეგორია დანტეს ჯოჯოხეთიდან.

რაც უფრო მეტად უახლოვდებით ახალციხეს, მით უფრო მეტად მოშიშვლებულია რეგიონი და მთებიც უფრო მეტადაა მოტიტვლებული. აქაურები ამბობენ, რომ აჭარის მთების პირველი მცხოვრებნი ყოფილან იაფეთიანები, ანუ იაფეთის ვაჟთა შთამომავლები, მესხებად წოდებულნი, რომლებიც კავკასიაში, ახალციხის სიახლოვეს მესოპოტამიიდან ჩამოსახლებულან. სწორედ ამიტომ, ამ ადგილს ჯერაც ჰქვია მესხეთი, ანუ მუშტი. მესხეთის დამახინჯებული ვერსიაა *სამცხე*, რომელიც ასევე ცნობილია, როგორც ზემო ქართლი. ანტიკურობის რამდენიმე ისტორიკოსი ამბობს, რომ იაფეთის შთამომავალნი მეტად მამაცი და მეომარი ხალხი ყოფილა. უნდა დავამატო, რომ სოფელ მუსხის მკვიდრთა მტკიცებით, ამ სოფელში იშვა მითრიდატე პონტოელი (ეს, შესაძლოა, კამათის საგანი იყოს), ხოლო კიდევ ერთი სოფელი, ნი ვერსის მოშორებით მდებარე კოლა კი, კიდევ ერთი მონარქის, ნაბუქოდონოსორის სამშობლო ყოფილა. იმასაც კი ამტკიცებენ, რომ მას შემდეგ, რაც იგი ასურეთის ტახტზე ავიდა, იმპერიას თავისი სოფლის, კოლას სახელი დაარქვა. დაბოლოს, პოეტ რუსთაველს, ადრეული საქართველოს ჰომეროსსა და დიდებული თამარ დედოფლის¹⁶ მომღერალს სურდა, რომ მეფის ასულიც აქ, სამცხის ერთ-ერთ სოფელში ყოფილიყო დაბადებული. აქ ჩანს, თუ რაოდენ უცნაური სურვილი აქვს კავკასიის ამ რეგიონს, ცნობილი ადამიანების სამშობლოდ ჩათვალონ.

სხვა ტრადიციები, რომლებსაც აქ ვრცლად ვერ შევხებით, გვიყვება, რომ სახელი მესხეთი წარმოდგება მცხეთოსისგან, საქართველოს მამამთავრის, ქართლოსის ვაჟის სახელიდან. ფაქტია, რომ ზემო ქართლი გააქრისტიანა ანდრია მოციქულმა, რომელიც აქ სამეგრელოდან, მთების გამოვლით შემოვიდა. ერთ-ერთ იმ მთას, რომელზეც ის ხალხს ქრისტიანებად ნათლავდა, დღემდე ჰქვია ანდრიას წვერი. სწორედ აწყურში დააარსა მოციქულმა პირველი ქრისტიანული ტაძარი. მოგვიანებით, აქ აშენდა საკათედრო ტაძარი, რომელიც თურქებმა დაანგრეს (ნანგრევები დღემდეა შემორჩენილი). ამბობენ, რომ ეს იყო ყველაზე ლამაზი ეკლესია ქვეყანაში და რომ მასაც, სხვა საკათედრო ტაძრების მსგავსად, მრავალი სასწაული მიეწერებოდა. ერთ-ერთი მათგანი უკავშირდება აწყურის

16. ამ პოეტის ნაშრომი „ვეფხისტყაოსანი“ უმღერის საქართველოს სილამაზესა და ტრადიციებს, ყველაზე მეტად კი განადიდებს მშვენიერ ხელმწიფეს, თამარ დედოფალს, რომელსაც იგი უიმედოდ ეტრფოდა. რუსთაველი, მისი ცხოვრების უკანასკნელ წლებში, გახდა ბერი და განდგეილად ცხოვრობდა იერუსალიმში, სადაც 1216 წელს გარდაიცვალა.

ღვთისმშობლის ხატს, რომლის ისტორიაც ერთიანად ამაღელვებელი ეპოსია. იგი 1488 წელს იაკუბ ხანმა გაიტაცა, თუმცა, მოგვიანებით, დიდი საფასურის ფასად, მანუჩარ ათაბაგმა დააბრუნა უკან; შემდეგ, 1548 წელს, იმერეთის მეფემ, ბაგრატ მესამემ დაისაკუთრა და ციხისკვრის კოშკში გამოკეტა, საიდანაც მან 1562 წლამდე, ათაბაგ ყვარყვარესა და იმერთა მეფე გიორგი მეორეს შორის სამშვიდობო ზავის დადებამდე, ვერ გამოაღწია. არავინ იცის, რა დაემართა ამის შემდეგ წმინდა გამოსახულებას.

როდესაც ახალციხეს, თანამედროვე ეკლესიათა სამრეკლოებიან და ძველი მინარეთის ნანგრევებიან ქალაქს შორიდან შეხედავთ, მიხვდებით, რომ თქვენ წინაშეა ადგილი, სადაც ჯვარი და ნახევარმთვარე საბოლოო ტრიუმფისათვის დიდი ხნის განმავლობაში ებრძოდა ერთმანეთს. ახალციხე მდებარეობს 3124 ფუტის სიმაღლეზე შავი ზღვის დონიდან, მდინარე ფოცხოვისწყლის ნაპირას. უწინ სამთავრო შედიოდა ზემო ქართლის შემადგენლობაში და მის მმართველ ჯაყელს ახალციხელი ეწოდებოდა. მე-12 საუკუნეში ჯაყელმა მიიღო ათაბაგის წოდება და სამთავროს ეწოდა საათაბაგო. 1579 წელს, როდესაც ქვეყანა თურქებმა დაიპყრეს, მმართველობა ტიტულოვან მთავრებს დაუთოვეს; მოგვიანებით, სულთან მურად მეოთხემ (1623-1640 წწ.) ჩამოაყალიბა საფაშო, ახალმა ფაშამ კი თავისი რეზიდენცია ოლთისიდან (პატარა ქალაქი სამხრეთ-დასავლეთით) ახალციხეში გადმოიტანა, რომელიც კარგად იყო გამაგრებული და ძველი სამცხის სამხედრო თუ სავაჭრო ცენტრად ითვლებოდა. აქ ყარსიდან და ერზურუმიდან მომავალი საქონელი მოედინებოდა, აქვე იყო გაჩაღებული მონათა ბაზარიც. 1810 წელს ახალციხეს ალყა შემოარტყა გენერალმა ტორმასოვმა, ხოლო 1828 წელს ფელდმარშალმა პასკევიჩმა აიღო. 1829 წელს, ადრიანოპოლის (თურქეთისთვის ედირნეს) ზავის ფარგლებში ქალაქი რუსეთს გადაეცა. 1831 წელს პასკევიჩი გახდა მეფისნაცვალის პოლონეთში. უფრო მოგვიანებით კი, 1853 წელს, გენერალ-პრინცი ივანე ანდრონიკოვი კვლავ შეებრძოლა თურქებს ქალაქ სუფლის სიახლოვეს, სადაც მემორიალური მონუმენტი განადიდებს ამ გადამწყვეტ ბრძოლას, რომელმაც მეფის იმპერიის მიერ სამთავროს ანექსია დააგვირგვინა.

ადრე საქართველო, ზემო ქართლის ქრისტიანებით დასახლებული მხარე, იძულებული გახდა, ისლამი მიეღო მას შემდეგ, რაც როსტომ ათაბაგი, იმისთვის რომ ამ მხარის ფაშად გაემწყესებინათ, თავად გამუსლიმანდა. ქართულ ენას ეს მხარე ყოველთვის ინარჩუნებდა; თუმცა, ამ ბოლო ხანებში თურქულმა ენამ კვლავ დაიწყო აქ გზის გაკაფვა.

ახალციხე ორი ქალაქისგან შედგება: ძველი – უფრო ქართველებით, თათრებითა და თურქებით, და ახალი – სამი-მეოთხედი სომხებით, მცირე რაოდენობა ებრაელებით და კიდევ უფრო ცოტა ქართველებითა და რუსებით (20 ათასამდე სული) დასახლებული. როსტომ ათაბაგის ოჯახი ჯერაც არსებობს, რომელმაც

თავისი გვარი განავრცო და ეწოდება კობლიანსკი, ახალციხიდან 12 ვერსში მდებარე ქობლიანის მამულის პატივსაცემად. ოჯახის ყველა წევრი მუსლიმია, ხოლო ერთ-ერთმა წინაპარმა, აჰმედ ფაშამ ძველ ციხესიმაგრეში ააგო მეჩეთი, რომელიც რუსებმა, მოგვიანებით, ეკლესიად გადააკეთეს. მეორე მხრივ, იმავე აჰმედმა გამუსლიმებამდე თავის ორ ძმასთან ერთად, ქალაქიდან რვა ვერსის მანძილზე, ააგო საფარის მონასტერი. სამონასტრო ტაძარი მთელი წლის განმავლობაში დაკეტილია და ახალციხელი მომლოცველებისთვის მხოლოდ ღვთისმშობლის მიძინების დღეს იხსნება¹⁷.

მთელ ამ რეგიონს, აწყურისა და სამხრეთ-აღმოსავლეთით მდებარე გამაგრებული სოფლის, ხერთვისის ჩათვლით, არაჩვეულებრივი ვაშლი მოჰყავს და ძალიან მდიდარია ხეხილის ბაღებით. მტკვრის ერთ-ერთი შენაკადი, ფოცხოვის წყალი თვალწარმტაცად მიიკლავნება და მათაა ორმაგი ბასტიონი, ერთ მხარეს გურიაში და მეორე მხარეს კი, ერზურუმამდე, ჯაყელთა ყოფილ სამფლობელოს გარს შემორტყმია. შავი ჭირი, აქ რომ ხშირად იცოდა ხოლმე, 1830 წლის შემდეგ აღარ გავრცელებულა. დღეს მის კვალსაც ვეღარ ნახავთ, თუ არ ჩავთვლით კარანტინსა და სპეციალურ სასაფლაოს ციხესიმაგრის გარეთ.

1844 წელს, მსგავსი ეპიდემია კავკასიაში რამდენიმე ადგილას გავრცელდა, განსაკუთრებით, ალექსანდრეპოლოში. გადის კიდევ ოცი წელი და რუსეთის მთავრობა ახალციხის საკარანტინო პუნქტის ექიმს აგზავნის სპარსეთის ქუროთის-ტანში, რომელმაც ამ მომაკვდინებელი სენის მიზეზები და გარემოებები უნდა შეისწავლოს. კვლევის შედეგად იგი დაადგენს, რომ დაავადება წარმოიშვა მთის გამოქვაბულებში, რომელთაც ცხვრის თავშესაფრად იყენებდნენ. განიავების მიზნით ადგილობრივებმა ისინი ზედა მიმართულებით გაბურღეს, სადაც შავი ჭირის მსხვერპლთა სასაფლაო იყო. ამ გათხრითი სამუშაოებისას, ორმოცი წლის წინანდელ მიცვალებულთა ძვლები ჩაგვივდა მღვიმეში, და მეცხვარე, რომელმაც პირველმა იპოვა ისინი, შავი ჭირით დასნებოვნდა. ეს აღმოჩენა მნიშვნელოვანი იყო იმდენად, რამდენადაც მან დაგვანახვა ვირუსის შეუპოვარი მედეგობა თვით ნახევარი საუკუნის შემდეგაც კი. ეს ფენომენი შეიძლება იმით აიხსნას, რომ ჰერმეტიკულად შენახული ორგანული ნაწილები, ჰაერთან შეხების შემდეგ ავლენენ გაცოცხლების უნარს, მსგავსად ეგვიპტურ პირამიდებში ნაპოვნი მარცვლეულისა, რომელიც ახლა დათესვისას უმაღლესი გავრცელება ხოლმე.

ფოცხოვე გადებული ხიდი ერთმანეთთან აკავშირებს ძველ და ახალ ახალციხეს. მარცხენა სანაპიროზე მდებარეობს მეტწილად კათოლიკე ქართველებით, ასევე თათრებითა და ებრაელებით დასახლებული ძველი უბნები; მეორე ნაპირ-

17. ეს ინფორმაცია მომავლად თავად ათაბაგის ოჯახმა, რომელიც ჩემი მასპინძელი იყო ახალციხეში.

ზე გაშენებულია ახალი ქალაქი, სომეხთა მიერ 1830-1833 წლებში დაარსებული. ქუჩები ყველგან მიხვეულ-მოხვეულია და სიბინძურითა და სილატაკითაა სავსე. მდინარის პირას აგებულ, ყოფილ ციხესიმაგრეში ახლა სამხედრო ჰოსპიტალია განთავსებული; თაღოვან ქარვასლაში, უწინ რომ დერვიშები სახლობდნენ, ახლა ტანსაცმლის საწყობი მოუწყვიათ; დაბოლოს, უძველესი მეჩეთი დღეს მართლმადიდებლებს ემსახურება და სამრეკლოში დაკიდებულმა რკინის ზარმა შეცვალა მუეძინის ძახილი.

ზუსტად არ ვიცი, როდის ააშენეს ახალციხის ციტადელი. ერთ-ერთი ტრადიცია გვეუბნება, რომ ამ ადგილას უწინ ანდრია მოციქულის მიერ აგებული ეკლესია მდგარა; კედლების რაღაც ნაწილი, ზოგიერთი ქვა, მართლაც რომ მისი ნარჩენი უნდა იყოს. ცხადია, სიმართლეა, რომ უკანასკნელი ალყისას სწორედ ამ ციხიდან გასროლილმა ჭურვებმა გააცამტვერა ქალაქის ძველი უბნები. დღეს, საცხოვრებლების უმრავლესობა მიწურია და განლაგებულია ტერასებად ისე, რომ ერთის ჭერი მის ზემოთ მდებარე მეორე ოჯახის წინკარია. პირველი კითხვა, რასაც ამ ნახევრად დამარხულ ქალაქში მოხეტილ უცნობი იკითხავს, არის ის, თუ სად ცხოვრობენ ადგილობრივები? აქ სახლების კვალს ვერსად ნახავთ. აქა-იქ შეიძლება შეეჯახოთ აყალო მიწაზე ამოშვრილ დაახლოებით ერთიდან ექვს მეტრამდე სიმაღლის კონუსებს, ზედა ნაწილში გაქონილი ქალაქით დაფარული სარკმლის მსგავსი ღიობი რომ აქვს, საიდანაც ამ უცნაური გამოქვაბულის მთავარი ოთახი ნათდება, რომელსაც პატივს სდებენ და „სახლს“ უწოდებენ. თუკი ცნობისმოყვარე მოსეირნე კარს შეაღებს, ქვემოთ, მიწაში დაინახავს დარბაზის შუაგულში ერთად შეკრებილ მთელ ოჯახს. დარბაზს ისინი საცხოვრებლის საპატიო ოთახს უწოდებენ.

მოდით, ახლა შიგნით შევიდეთ: უხეშ კარს, საკეტის ნაცვლად დიდი ხის ურდული რომ აქვს, ბნელი დერეფნით მიჰყავხართ მთავარი საცხოვრებელი სივრცის კართან. იატაკის მოვალეობას ასრულებს ნესტიანი ქვა, რომელიც ხალიჩით დაუფარავთ. მრგვალი ოთახის ირგვლივ, კედლებზე ღრმულებია ხის კარებით; ეს ამ ბინის გარდერობებია, ერთადერთი ავეჯი კი მხოლოდ რკინის ღუმელია. ჭერი ყველაზე ორიგინალური რამაა ამ სახლში. მისი რვაკუთხა გუმბათის კედლები, ზემოთ რომ ერთობ ვიწროვდება, ხის 20 საფეხურითაა დაფარული; თითქოს, ამ კიბემ ცაში უნდა აგიყვანოთ.

იმავე დონეზე, ოდნავ დაბლა, სხვა ოთახებიცაა, კვადრატული ღიობებითა და მათზე აკრული გაქონილი ქალაქდებით, ფანჯრების მოვალეობას რომ ასრულებს. ამ კატაკომბებში, რომელთა კედლებიც დაფარულია წმინდანთა გამოსახულებებით, სახლობენ ქართველები ან სომეხი კათოლიკეები, ზოგჯერ საკმაო კეთილდღეობით რომ ტკბებიან. ეს ხალხი, საცხოვრებლების პირქუში ინტერიერის გამო, ხშირად გარეთ, შესასვლელთან ყოფნას ამჯობინებს. მთელი დღის

განმავლობაში აქ სტუმრობენ ერთმანეთს, აქ ცეკვავენ დაირის ჰანგებზე და აქვე ჭამენ გომინაყსა და სხვა ტკბილეულს. პაწაწინა მისაღებ ოთახში მავანი თავს ძნელად თუ შეიქცევს იატაკიდან ამოშვერილი კვადრატული კოშკების, მიწისქვეშ მცხოვრებთა ბუხრის საკვამურების გამო. მონაცრისფრო ოთახის ეს საკვამურები ზემოდან დაფარულია ცხვრის ტყავში გამოკერილი ქვის სარქვლით, რომელსაც სახლის მკვიდრნი ცეცხლის დანთების შემთხვევაში აიღებენ ხოლმე.

ახალციხეში ერთადერთი შენობა, რომელიც ამ ერთგვაროვანი საცხოვრებლებისაგან გამოირჩევა, არის სინაგოგა, ქვის თანამედროვე ნაგებობა, თუნუქის დახრილი გადახურვით. რუსული ეკლესიებივით ისიც ღია მწვანედაა შეღებილი. ისრაელის შვილთ კი, სხვათა მსგავსად, მიწურებში დაუდვიათ ბინა. უნდა აღვნიშნო, რომ ახალციხელი ებრაელები უფრო ქართველებსა და სხვა კავკასიელებს ჰგვანან, ვიდრე თავის პოლონელ, რუს ან იერუსალიმელ თანამოძმეებს. მათი ქალებიც, მსგავსად მუსლიმი და სომეხი ქალებისა, უცხო მიახლოებისთანავე იმალებიან.

თანამედროვე ქალაქი, მიუხედავად იმისა, რომ სხვაგვარი ელფერი დაჰკრავს, სიუშნოვით ძველ ქალაქს არ ჩამოუვარდება. ადრიანეპოლის ზავის (1829 წ.) შემდეგ თურქეთიდან ახალციხეში გადმოსახლებულ სომეხთა მიერ აშენებული სახლები თიხისა და უფორმო ქვათა მოკრძალებული ქოხმახებია, რომელთაც ფანჯრების ნაცვლად გაქონილი ქაღალდით დაფარული ხვრელები აქვს დატანებული. არაფერია ბინძურ, მოუკირწყლავ და გაუნათებელ ქუჩებზე მდებარე ამ საცხოვრებლებზე უფრო სევდიანი. თვით ბაზარიც კი უფრო თანამედროვეა, ვიდრე ეს ნაგებობები.

ჩემი მოგზაურობის ჟამს, ტფილისის მსგავსად, ახალციხეც (თურქეთის საზღვრიდან რამდენიმე ვერსში და ალექსანდრეპოლის გზაზე მდებარე) სავსე იყო ოფიცრებითა და ჯარისკაცებით, რომლებიც რუსეთის მეფესა და სულთანს შორის მტრული მოქმედებების დაწყებას ელოდნენ. შესაბამისად, ქალაქის სამხედრო კლუბი დილიდან საღამომდე ხალხითაა სავსე. უმრავლესობა რუსი ეროვნებისაა; სამოქალაქო კლუბებში მეტწილად ქართველებს შეხვდებით; აქაც, ისევე როგორც ტფილისსა თუ კავკასიის სხვა ადგილებში, მიუხედავად ამკარა ერთობისა, სხვადასხვა ეთნოსისა და ჯურის ხალხი მაინც წარმატებით აყალიბებს ამდენ დახურულ საზოგადოებას. რუსები ერთგვარად აბუჩად იგდებენ ქართველებს, ქართველი ქედმაღლურად დაჰყურებს სომეხს, რომელიც, თავის მხრივ, სიბრალულთ უყურებს ებრაელს. რაც შეეხებათ ქალებს, ისინი საჯარო შეხვედრების ადგილას საერთოდ არ ჩანან; თავისიანთა შორის ცხოვრობენ და შეხვედრებს ცალკე მართავენ, რომლებიც სულაც არ არის ორიგინალობას მოკლებული. სომეხი ქალები, მიუხედავად მათი სამკვიდრებლის ღარიბული ექსტერიერისა, შიგნით ბინას საკმაოდ კომფორტულად აწყობენ და, ტრადიციუ-

ლი ტახტის გარდა, ევროპული სკამებიც აქვთ. ბავშვები მონაწილეობას იღებენ წვეულებებში, სადაც ძალიან დაუძაბავი თავისუფლება სუფევს და სადაც ტკბილეულისა და ჩაის შემდეგ კვლავ და კვლავ მეორდება მონოტონური ნოტი – ცეკვა და კვლავ ცეკვა!

თითქმის ყველა აღმოსავლელის მსგავსად, სომხებსაც აქვთ ლამაზი თვალები, ლამაზი თმა, ლამაზი კბილები; ეს ისაა, რაც მათ გამოარჩევთ. რაც შეეხება სახის კანს, იგი ახალგაზრდა ასაკშივე უნაოჭდებათ, წელში კი უღაზათოდ იხრებიან, რაც შეიძლება აიხსნას ცხოვრების მჯდომარე წესითა და დახურულ კარს მიღმა მუდმივად მოხრილი დგომით. მათი ერთობ ელევანტური ტანისამოსი შედგება მკერდთან კვადრატულად ამოჭრილი აბრეშუმის ხიფთანისაგან, რომლის სწორი, მჭიდრო სახელოების ქვემოდან გამოდის შიგნითა პერანგის სახელოები. ეს შიდა კაბა ალამაზებს მკერდთან ამოჭრილ ზედა კაბას, ოქრომკედით ნაქარგ წითელი ქსოვილის წინსაფარს, ბოლომდე რომ ეშვება; და ასევე, წითელი ფესისაგან, რომელიც გრძელი ფოჩებითა და ზონრით შეკრული ყვავილებიანი ფერადი აბრეშუმის მოსახვევითაა მორთული. ორივე მხარეს, ლოყების გასწვრივ ჰკიდიათ მარგალიტის ასხმულები, რომელთა ბოლოებზე მიმაგრებულია ფულის უთვალავი მონეტა, რომელთა ღირებულება მათი სიძველეა. შუბლიც ნაწილობრივ დამალულია ასეთივე მონეტების რამდენიმე მწკრივით, რომლებიც გრძელდება ნიკაპის ქვემოთ და ფარავს ყელსა და მკერდს. რაც შეეხება თმას, ისინი ნაწნავებად ეშვება ზურგზე. ახალგაზრდა გოგონები პირბადეს არ ატარებენ, მაგრამ გათხოვილი ქალები ფესიზე იმაგრებენ ოქრომკედით ნაქარგ, თითქმის ყოველთვის წითელ, თხელ ქსოვილს. ფეხზე კი ტარსიკონით შეკერილი უძირო თურქული ფლოსტები აცვიათ.

ახალციხელი სომეხი ქალი საზოგადოებაში არასოდეს ჩნდება დაუბურავი პირისაბით. თურქი ქალების მსგავსად, როცა იგი გარეთ გადის, იხურავს დიდ მოსასხამს, რომელიც მას თავიდან ფეხებამდე ფარავს და რომელსაც ეწოდება ლჩარმი. ეს თხელი, გამჭვირვალე ქსოვილი დამზადებულია თეთრი შალისგან და გარს შემოვლებული აქვს ლურჯი არშია, რომელსაც მხოლოდ ახალციხეში ამზადებენ და რომელიც, სურვილის შემთხვევაში, ჩაცმულობის სიმდიდრესაც უსვამს ხაზს.

თავისთავად, ახალი წლის დღე საყოველთაო დღესასწაულია; ყოველი თემი, თვით თათართა ჩათვლით, ცდილობს, ზეიმით სხვას აჯობოს. რუსი ჯარისკაცები, ქართველები, მუსლიმები და სომეხი ვაჭრები ერთმანეთს ეჯიბრებიან, ვინ უფრო ურიცხვ ჭიქა არაყს დალევს. ზოგადად, ისინი პირველი იანვრის გათენებას სხვადასხვა კლუბში ელიან; წვეულების დამსწრე თითოეული პირი იხდის გარკვეულ თანხას, რაც მათ შუალამის ვახშამზე დასწრების, შამპანურისა და კანფეტების მიღების უფლებას აძლევთ. ამის შემდეგ იწყება ცეკვები, რასაც მოჰყვება ბანკეტი

და გართობა დილაზე გრძელდება. 1877 წლის პირველივე დღეს ვიხილე, ამომავალი მზის მეწამულმა სხივებმა როგორ ააფერადა ირგვლივ მდებარე მთათა მწვერვალები. მაგრამ მოდით, ამ მოგონებებიდან ჩემი მოგზაურობის შემდეგ ნაწილზე გადავინაცვლოთ.

VI

ხერთვისი და ახალქალაქი:

დაბრუნება ტფილისში

[...]

ახალციხის შემდეგ პირველი, სადაც გავჩერდი, იყო ხერთვისი, თოფორავან-წყლისა (რედ. ფარავანწყალი) და მტკვრის შესართავთან ხუთ ვერსში მდებარე სოფელი. ოფიციალურმა წერილმა თუ რეკომენდაციამ შესაძლებლობა მომცა, იქაური მერის სახლში გამეთენებინა ღამე. დაძინებამდე მცირე დრო მექონდა იმისათვის, რომ მტკვრის მეორე ნაპირზე საცხოვრებლებს ვწვეოდი. ხიდს გადაღმა საკმაოდ კარგი, ზიგზაგისებური გზა ადის მაღლობზე. მიწისქვეშა დარბაზები, რომელთაც ბორცვის ფერდობი ფარავს, ყველაზე საინტერესო რამაა, რაც კი ოდესმე გიხილავთ: რამდენიმე ჭეშმარიტად სამეფო სალონი გიორგი მესამეს დაუწყია და მის ქალიშვილს, თამარ დედოფალს, მე-12 საუკუნის გამოჩენილ ხელმწიფეს დაუსრულებია.

ამ მხარის კიდევ ერთი საოცრებაა ვარძიის მონასტერი, სადაც ზემოაღნიშნული გიორგი მეფე და მისი რამდენიმე შთამომავალია დაკრძალული. გვარწმუნებენ, რომ ეს მიწისქვეშეთი იმდენივე ოთახისგან შედგება, რამდენი დღეცაა წელიწადში. ამ სენაკების გარდა, ამ გასაოცარ მრავალსართულიან ლაბირინთში ეკლესიაც არის, გვერდით – სამლოცველოებით. ეკლესია ტევადი და კამაროვანია; კედლებზე შეამჩნევთ მხატვრობის კვალს, მათ შორისაა თამარ დედოფლის პორტრეტიც. რაც შეეხება ორნამენტებს, რომლებითაც, ქართული მატრიანის თანახმად, მდიდარი ყოფილა ეს მხარე, აქ მათი კვალიც კი აღარ შემორჩენილა; დროსა და ომებს ყველაფერი გაუნადგურებია.

ვარძიის ეს ქვაბულები მოგაგონებთ ჩუფუდ-კალეს (ებრაელთა ქალაქი), რომელიც მდებარეობს ბახჩისარაის შემოგარენში და მრავალ სხვათ, რომლებიც ყირიმშია. მართალია, ისინი თამარ დედოფლის დროით თარიღდება, მაგრამ, შესაძლოა, უფრო ადრეულიც კი იყოს. ამ მრავალრიცხოვანი მართოსული მღვი-

მეების მცველი აუცილებლად გაჩვენებთ ადგილს, სადაც ხელმწიფეს ჰქონდა თავისი საზაფხულო დარბაზები, საძინებელი, სალონი და სხვა. რაც შეეხება სახელს „ვარძია“, იგი მომდინარეობს სიტყვებისგან „ვარდ-ციხე“, რაც ნიშნავს ვარდების ციხეს. მდიდრული ფლორა მართლაც რომ აღამაზებს ამ საუცხოო ადგილს, საიდანაც თქვენ თვალწინ მტკვრის მიერ კარგად მორწყული, მშვენიერი ხეობა იშლება.

წელიწადის გარკვეულ დროს ამ მხარის მღვდელი მსახურებას აღავლენს ყოფილ საკურთხეველში, სადაც ხალხი ძველ ფრესკას ახლოდან ათვალიერებს ხოლმე. ამბობენ, რომ თამარ დედოფლის საფლავი, შესაძლოა, იყოს პატარა, გუმბათით დაგვირგვინებულ, ოთხკუთხა სამლოცველოში, ახლა რომ ნაწილობრივ დანგრეულა და სვეტების გაღერებითაა გარშემორტყმული. ახლა მორწმუნენი გულმოდგინედ სწირავენ ფულსა და სანთლებს დანგრეულ საკურთხეველზე. რაც შეეხებათ უცხოელებს, ცდილობენ, ამ გაუდაბურებული აკლდამის სიჩუმეში, ოდესღაც მდიდრული სამეფო კარი რომ აცოცხლებდა, არსად გადაეყარონ ღრმულებიდან გამომძვრალ წარსულის აჩრდილებს.

წლის ამ დროს, გზასთან დაკავშირებული სირთულეების გამო, იძულებული ვიყავი რა, ღამე ხერთვისში გამეთენებინა, უარი ვთქვი სოფლის სტარშინას მიერ შემოთავაზებულ ტრადიციულ შავ პურზე; მეორე დღეს მოგზაურობა გავაგრძელე ნაქალაქევისკენ, კიდეც ერთი ღატაკი, პატარა ქალაქისაკენ, რომელიც უწინ მნიშვნელოვანი ქალაქი ყოფილა და სადაც ძველ ტაძარში მაჩვენეს ლურსმანი, რომლითაც იესო ქრისტე ჯვარზე მიაკრეს. აქედან ახალქალაქამდე გზა არცთუ ისე ცუდია. შეუმჩნეველი აღმართით ადიხართ პლატომე, 5545 ფუტის სიმაღლეზე ზღვის დონიდან.

ახალქალაქს (ახალი ქალაქი) არაფერი აქვს განსაკუთრებული, გარდა მდებარეობისა. კლდეზე წამომართული ციტადელი გადაჰყურებს თოფორაგნისწყალს, რომელმაც სახელი ქალაქისგან მიიღო. ყველაზე მაღალი მწვერვალი გარშემორტყმულ მთათა შორის არის აბული, რომლის სიმაღლე ზღვის დონიდან 11 ათასი ფუტია.

ახალქალაქი, ახალციხის მსგავსად, დასახლებულია ისლამზე მოქცეული ქართველების, სომხების, ებრაელებისა და რუსების ნარევისაგან; ირგვლივ მდებარე სოფლებში შეხვდებით დუხობორებს (*Douchoborszki*, სულისთვის მებრძოლები), რომელთა სექტაც საუკუნის დასაწყისში ყირიმში ჩამოყალიბდა. ისინი რელიგიის ყოველგვარ რიტუალსა და მატერიალურ ნიშანს უარყოფენ; არ ჰყავთ არც მღვდელი, არ აქვთ არც ხატები და არც წმინდა წიგნი; არც არანაირი მსახურება; ქორწინება მათთან ყველაზე მარტივად ხდება მსოფლიოში; წყვილს, რომელსაც შეერთება სურს, შეუძლია თემს უბრალოდ აცნობოს ამის შესახებ, და თუ მეორე დღეს განქორწინებას გადაწყვეტენ, საქორწინო კვანძი ისევე ადვილად იმსხვრე-

ვა, როგორც ფორმდება. ხოლო ამ ეფემერულ გაერთიანებებში დაბადებული ბავშვები ან მშობლებს შორის ნაწილდებიან, ანდა, საზოგადოების ხარჯზე იზრდებიან; უფრო ნაკლებია ტვირთი მშობლებისათვის, როგორც თქვენც წარმოიდგენდით. ამ სექტის წევრებს შორის ყველაფერი მეგობრულად გვარდება და წყდება. მართალია, მათი რელიგიური საქმეების შესახებ არაფერი ვიცით, და არაფრის თქმა არ სურთ; მართლაც, ისინი, ვინც შეწყვიტა ზიარება, ძალიან თავშეკავებული არიან; იფიქრებთ, რომ ფიცით შეკრულან და მდუმარების აღთქმა დაუდვიათ.

ახალქალაქიდან ათ ვერსში, სოფელ გორელოვკაში სახლობს დუხობორების მეთაური. იგი ერთობ მდიდარი ქალია, სექტის დამფუძნებლის ნათესავის ქვრივი. ისინი მას დედოფლად მიიჩნევენ. წმინდა ქალწული, ღვთისმშობელი, ან ბოგოროდიცა, როგორც მას უწოდებენ, ყველა გამვლელ უცხოელს გულუხვად და კეთილად უმასპინძლდება და ასეთ შემთხვევაში, მის სუფრაზე შამპანურიც ყოველთვის მოიძებნება. მეტიც, ამ ქვეყანაში დუხობორები სარგებლობენ პატიოსანი და წესიერი ხალხის რეპუტაციით. ისინი დაკავებული არიან სოფლის მეურნეობითა და უცხოელთა თუ ვაჭართა ტრანსპორტირებით; აქ საფოსტო ცხენებით მომსახურება სწორედ მათ აქვთ მინდობილი; კერძოდ – ახალქალაქისა და ალექსანდრეპოლის მარშრუტები. ტანისამოსით, ცხოვრების ყაიდითა და სახლების ინტერიერის მომხიბლავი სიფაქობით ისინი გერმანელ კოლონისტებს უფრო ჰგვანან, ვიდრე რუსებს. გზის იმ ნაწილზე, რომელსაც ისინი ემსახურებიან, ე.წ. პერკლადნაია შეცვლილია დაახლოებით იმგვარი შარაბანით, გერმანელი გლეხები რომ იყენებენ.

ტფილისიდან უთვალავი გზა სხივებივით გამოემართება სხვადასხვა მიმართულებით; დავიწყოთ საფოსტო გზით, რომელიც დილიჟანსით ვლადიკავკაზში ჩაგიყვანთ. იქიდან მატარებლით შეგიძლიათ ჩააღწიოთ როსტოვში, შემდეგ კი აზოვისა და კასპიის ზღვებამდე (ვოლგისა და დონის მეშვეობით); რკინიგზის სხვა ხაზი ტიფლისს აკავშირებს რუსეთთან და ყუბანთან; ასევე, ფოთის ხაზი მიუყვება რიონს და მთავრდება შავ ზღვასთან, საიდანაც ან რუსეთში, ანდაც ანატოლიასა და კონსტანტინეპოლში შეიძლება ჩაღწევა. ამას ემატება მაგისტრალები: ერთი, რომელიც მიემართება სიღნაღისაკენ, კახეთში და ლეზგისტანის გავლით, ბაქოში; საფოსტო მაგისტრალი აღწევს ერევნამდე, სომხეთში და (შედარებით ცუდი გზა) გრძელდება ჯულფამდე, სპარსეთის საზღვრამდე; დაბოლოს, ალექსანდრეპოლისა და დაღესტნის დიდი მაგისტრალები.

ეს ძირითადი გზები, თავის მხრივ, იტოვება და მიემართება, ერთი მხრივ, ასტრახანისა და პეტროვსკისაკენ და, მეორე მხრივ, სამეგრელოს, იმერეთისა და გურიისაკენ, ყველა მათგანი უერთდება ფოთის რკინიგზას ისე, რომ რომელიც მხრიდანაც უნდა მოდიოდეთ და საითაც უნდა მიდიოდეთ, ტფილისი რჩება საბოლოო დანიშნულების ან გამგზავრების ადგილად.

კავკასიის უმთავრესი ქალაქისაკენ, ტფილისისაკენ მიმავალმა აღმოვაჩინე, რომ თურქეთის წინააღმდეგ მოახლოებული ომისთვის სამზადისი ჩამცხრალა, თითქოს ეს ორი თვე საკმარისი გამხდარიყო თავდაპირველი ციებ-ცხელების დასამშვიდებლად. ყველა დაჰბრუნებოდა თავ-თავის ყოველდღიურ ყოფასა და წვრილმან საბრუნავს; კლუბებში კი კვლავ დაეწყოთ ვისთვის პარტიების კიდევ უფრო ხალისიანად თამაში; ქალებს კი გულმოდგინე ქსოვა შეეწყვიტათ და ლოტოს ტომრები მოემარჯვებინათ, რათა თავიანთი საყვარელი გასართობით შეექციათ თავი.

ქალაქის ქუჩებსაც სხვანაირი ელფერი დაჰკრავდა; ისინი გავსებულიყო პროვინციელებით, რომლებიც ომის მოლოდინს თურქეთის საზღვრებიდან შორს გამოჰქცეოდნენ და დედაქალაქში საცხოვრებელს ეძიებდნენ. შემდეგ, აქვე წააწყდებოდით მუშათა მთელ რიგებს, ზურგზე წამოკიდებული კარადებით, მაგიდებითა თუ სხვა ავეჯით. განსაკუთრებით სომხებს, რომლებსაც სულ თვალი უჭირავთ ფულის შოვნაზე და ცდილობენ, თავიანთი ქონება რაც შეიძლება ძვირად მიაქირაონ მიგრირებულთა ახლად ჩამოსულ ოჯახებს; ახლა კი მათი მთავარი საბრუნავი გამხდარა კარგი ავეჯის ბინებიდან გატანა, რადგანაც ითვლება, რომ დაუდევარი მდგომარეობის ხელში ამ ნივთებს საფრთხე ემუქრება. თავის მხრივ, მრავალ ლტოლვილს თან საკუთარი ქონება მოჰქონდა და ჩვეულებრივ მშვიდი ქალაქის ქუჩები დამსგავსებოდა ბობოქარი მდინარის კალაპოტს, წყალდიდობას ნარიყით რომ აუვსია.

როგორც კი ჯარის ნაწილები სათანადოდ შეიარაღდა, ისინი მაშინვე თავიანთ პოზიციას დაუბრუნდნენ; იმ დროისთვის ერთ ჯარისკაცსაც კი ველარ ნახავდით ქალაქში, თუ არ ჩავთვლით გარნიზონელებს. ეს ახალწვეული ჯარისკაცები, რეგიონებიდან საბაზისო წვრთნის მისაღებად რომ ჩამოსულიყვნენ, ეროვნული მილიციის გლეხები იყვნენ, რომლებიც კავკასიის ყოველი ადგილიდან მოჰყავდათ (ასზე 2 კაცი), გარდა სომხეთისა – იგი იარაღით არ დაუპყრიათ და რუსეთს ნებით დანებდა, რათა თავიდან აერიდებინა სპარსთა დევნა. ეს პროვინცია დამორჩილების სანაცვლოდ თავისუფლდებოდა სამხედრო სამსახურისგან. თუმცა, ახლანდელი მდგომარეობის გათვალისწინებით, როცა რეგულარული არმია საომარ კამპანიაში იყო ჩაბმული, საკუთარი სახლების დაცვის მიზნით, სომხები ფულს უხდიდნენ ქართველებს, რათა მათ ნაცვლად ემსახურათ და ამგვარად ითავისუფლებდნენ თავს გაწვევისაგან. ამასთან, მიუხედავად ხელშეკრულებების ძალაში შესვლისა, რუსეთის მთავრობამ მოხალისეობრივი კონტრიბუცია მაინც მოითხოვა; მათ კი დახმარებაზე უარი არ უთქვამთ.

მოსახლეობითა და გლეხებით ფორმირებული და საკუთარი სათემო ხარჯებით შეიარაღებული ქართული მილიციის გარდა, ასევე ჩამოყალიბდა კავკასიის მეფისნაცვლის, დიდი ჰერცოგის, მიხეილ ნიკოლაევიჩის პირადი გვარდია, რე-

გიონის 400 თავადის შემადგენლობით. თუმცა, როგორც ამბობენ, ეს ჟესტი მაინც გარდამავალი აღმოჩნდა; ტფილისში გავიგე, რომ ჯანსაღი, მაგრამ დამღლედი წვრთნების დაწყებიდან რამდენიმე კვირის შემდეგ ისინი დაუსხლტნენ მეთაურს და შორეულ რეგიონებში მდებარე საკუთარ სახლებს დაუბრუნდნენ. „ჩვენ აქ საბრძოლველად მოვედით და არა მწყობრით სიარულისა და შაშხანის სატარებლად“, – უთქვამთ მათ. ამის გამო ხელისუფლების კომპეტენტურ პირებს ჩვენთვის კარგად ნაცნობი ჩაფრები გაუმწესებიათ დეზერტირთა მოსაძებნად. ზოგიერთი გაქცეული დაუჭერიათ და დაუპატიმრებიათ, მაგრამ სხვები ჯერაც გაქცეულნი არიან!

ასეთი სული სუფევდა კავკასიის დედაქალაქ ტფილისში მანამ, სანამ აღმოსავლეთში სამხედრო დრამა გათამაშდებოდა. იმ დროს ვერავინ განჭვრეტდა მოახლოებული საბრძოლო მოქმედებების მოულოდნელ და ცვალებად ვითარებას, თუმცა კი, ყველა გრძნობდა, რომ დიადი სლავური იმპერიისა და ისლამის საუკუნოვანი დუელის ამ ახალ ეტაპს რაღაც სხვაგვარი, მშფოთვარე და საშინელი ელფერი დაჰკრავდა.

მთარგმნელი თამარ ონოფრიენკო,
რედაქტორი ნინო ბექიშვილი.

სტატია ითარგმნა შემდეგი გამოცემის მიხედვით:
Carla Serena, Excursions in the Caucasus from the Black Sea to the Caspian Sea: 1875-1881, Narikala Publications, Inc. New York. London. Tbilisi, 2015 (pp: 55-126, 181-197)



ბერტა ფონ ზუტნერი, 1873
ლუიზა ლაფერაძის რეპროდუქცია

საზოგადოებაში გასვლა

აი, უკვე „საზოგადოებაში“ უნდა გავსულიყავი. ჩვენი გვარი გვაძლევდა უფლებას, რომ უმაღლეს არისტოკრატიაში გვეტრიალა. არ არსებობდა ავსტრიელ წარჩინებულთა ოჯახი, ჩვენი ნათესავი ან მოყვარე არ ყოფილიყო. მაგრამ ამ წარჩინებულთ ცუდად იცნობთ, თუკი გჯერათ, რომ მათ წრეში მოსახვედრად სახელი და ნათესაობა კმარა. ამისთვის საჭიროა, – სახელდობრ, ასე იყო ჩემს ახალგაზრდობაში, ამჟამად ასეთი შეზღუდვა აღარაა, – უწინარეს ყოვლისა, ექვსი თაობის წინაპრის არსებობა, ანუ სამეფო კარზე დაშვების უფლება. ეს ჩვენ არ გვქონდა – დედაჩემი არ იყო „წარმოშობით“ დიდგვაროვანი; თანაც, სიმდიდრითაც დიდად ვერ დავიკვებნიდით. ამდენად, ვერ ვხვდებოდით ვენის პირველ Societe-ში, როგორც ისინი საკუთარ თავს უწოდებდნენ. ეს ამბავი გულს ძლიერ მტკენდა – ოჰ, მაინც რა ქარაფშუტა და პატივმოყვარე ვიყავი! როგორ მჯეროდა, რომ რჩეულ საზოგადოებაში მოხვედრაზე დიდი ბედნიერება ცხოვრებაში არ არსებობდა; მჯეროდა იმისაც, რომ დაუმსახურებელ უსამართლობას შევეჯახე, რაკი ამ ბედნიერებაში მონაწილეობის უფლება არ მომცეს!

ისე მოხდა, რომ, მწერალ იოზეფ ფონ ვაილენის შუამდგომლობით, რომელიც ჩვენთან სტუმრად დადიოდა, ვენის ერთ-ერთმა უმდიდრესმა პიროვნებამ ხელი მთხოვა. დედაჩემმა და ჩემმა მეურვემ თანხმობა განაცხადეს. ხელის მაძიებელი, მართალია, არისტოკრატი არ იყო და თანაც უკვე ორმოცდათხუთმეტი წელი შესრულებოდა, მაგრამ, სამაგიეროდ, ჩემი და დედაჩემის ცხოვრების გაბრწყინებას აპირებდა – ვილებით, ციხესიმაგრეებით, სასახლეებით... მე დაბრმავებული ვიყავი და ვთქვი: „დიახ“. არ ვცდილობ არაფრის შელამაზებას. საზიზღარი ფაქტია: თვრამეტი წლის გოგოს უნდა მასზე ამდენად უფროს მამაკაცს, რომელიც არ უყვარს, ცოლად მხოლოდ იმიტომ გაჰყვეს, რომ მილიონერია! ეს იგივეა – ყველაფერს თავის ნამდვილ სახელს თუ დავარქმევთ – საკუთარი თავი გაყიდო. რომანს რომ ვწერდე, ასეთ გმირზე, თუკი იგი სიმპათიას უნდა აღძრავდეს, ამ ეპიზოდს არ მოვყვებოდი; მაგრამ, რასაც ახლა აქ ვწერ, ესაა განცდები რეალური პიროვნებისა, რომლის ქცევაზეც პასუხს უკვე დიდი ხანია აღარ ვაგებ, განსხვავებით რომელიმე წარმოსახვითი ფიგურისგან, რომელიც ყალიბდება ჩემი ახლანდელი

შეხედულებებისა და შეგრძნებების მიხედვით; თვრამეტი წლის ბერტა კინსკი კი – მიუხედავად იმისა, რომ ეს მე ვარ – სხვა არაფერია, თუ არა მკრთალი მოგონება; ის, რაც გონებაში წარმოდგენილი ფიგურის ორიგინალმა სინამდვილეში გამოიარა, გაცრეცილ აჩრდილად შემორჩა ჩემს მეხსიერებას. განვლილმა ცხოვრებამ ხელი შეუწყო აგრეთვე ჩემი ახლანდელი ხასიათის ჩამოყალიბებას; მაშინდელი ხასიათი კი ჩემთვის ახლა ისევე უმნიშვნელოა, როგორც, მაგალითად, კლეოპატრას ან სემირამიდას გუნება-განწყობა.

რამდენიმე სცენა ამ ნიშნობის ეპიზოდებიდან:

წარდგენა: ჰერ ფონ ვაილენს ჩემი ხელის მაძიებელი დილის ვიზიტით ჩვენთან მოჰყავს. თავდაჭერილი საუბარი სალონში. ერთმანეთის შეთვლიერება. მომწონს? არა, სიბერეშეპარული ბატონია; ვერ ვიტყვი, რომ მომწონს, მაგრამ არც იმის თქმა შეიძლება, რომ არ მომწონს. სადილად მოპატიჟება მეორე დღისთვის; ფურსტენბერგი ისევ თან ახლავს. ჩემი ხელის მაძიებელი კვლავ თავდაჭერილია. მეოთხე თუ მეხუთე დღეს წერილობითი შეხმიანება დედაჩემთან. მე ვყოყმანობ. იმავე საღამოს ბალზე უნდა წავიდეთ – ჩემი დებიუტია. თავადაზნაურული პიკნიკია. ამ ბალს ესწრება Crème საზოგადოება – მაგრამ არა მხოლოდ; „დაბალ-დაბალი ელემენტებიც“ გამოერევიან ხოლმე. ახლაც თვალწინ მიდგას ჩემი თეთრი კაბა ვარდის პატარ-პატარა კოკრებით მოჩითული. სიხარულით აღსავსე მოლოდინით შევდივარ დარბაზში, შეურაცხყოფილი და იმედგაცრუებული გამოვდივარ იქიდან; სულ რამდენიმე მოცეკვავე ვიხილე. კადრილზე გაუწვეველი დავრჩებოდი, ბოლოს ერთ საზიზღარ ქვეით ოფიცერს, რომელსაც ყველა უარს ეუბნებოდა, რომ არ შევცოდებოდი. წარჩინებული დედები ერთად სხედან, დედაჩემი მარტოა. გასათხოვარი გრაფინიები მცირე ჯგუფებად იკრიბებიან და ერთმანეთში საუბრობენ – მე არავის ვიცნობ. ვახშამზე ისინი პატარ-პატარა, მხიარულ საზოგადოებებს ქმნიან, მე ყურადღებას არავინ მამცევს. შინისკენ რომ მივდიოდით, დედაჩემს ვუთხარი:

„დედა, გადავწყვიტე, შემოთავაზებას ვიღებ“.

შემდეგი სურათი: ფრთაშესხმულმა სასიძომ, რახან ჩემი თანხმობა მიიღო, მოიტანა ერთი საპალნე საპატარძლო საჩუქრები, მათ შორის საფირონებით მორთული სამკაული და მარგალიტის ყელსაბამი. თავისი ქალიშვილიც მომიყვანა, მალე თექვსმეტი წლის რომ გახდება – ის ხომ ქვრივია – და გოგონამ, „ჩემო საყვარელო, ლამაზო დედიკო“ – ასე მომმართა, რამაც ძალიან გამამხიარულა.

შემდეგი სურათი: ბრწყინვალე ბალი Haute Finance-ში, სადაც ვმონაწილეობთ როგორც დანიშნულები. ახლა ყურადღების ცენტრში ვარ მოქცეული, ბრწყინვალე

კავალერისტი ოფიცრები მეარშიყებიან – მათგან ერთ-ერთი მთხოვს უფლებას, ქორწილის მერე შინ მეწვიოს ხოლმე. აშკარად ფიქრობს, ამას ხომ ბებერი ქმარი ეყოლება და ჩემთვის საინტერესო რამესაც შეიძლება გამოვკრა ხელიო. ჩემი საქმრო ცოფდება და იქვე ეჭვიანობის სცენას მიმართავს, რადგან ვიღაც ულანელთან ერთად ხელკავით დამინახა წვეულებაზე. მე ვიცინი, ვტოვებ ჩემს კავალერს, გაბრაზებული საქმროს მკლავს ვეყრდნობი და ვამშვიდებ:

„ყველაფერს დაგიჯერებ“.

კიდევ ერთი სურათი: ქალაქში დავდივართ სამნი: დედაჩემი და ჩვენ, დანიშნულები, სახლის მოსაწყობად სხვადასხვა ნივთის შესარჩევად, ეკიპაჟებისა და ტუალეტის საგნების შესათვალიერებლად; ქალაქგარეთაც გავდივართ, ნამდვილი თავადური ვილა უნდა ვნახოთ, რომელიც განკუთვნილია ჩემთვის – ეს იქნება პირველი „დილის საჩუქარი“ ქმრისგან.¹

კიდევ ერთი სურათი: ნაშუადღევია ჩვენთან. მე და ჩემი საქმრო მარტონი პირველად ვრჩებით.

„ბერთა, იცი, რა მომხიბვლელი ხარ?“ – მეხვევა და ტუჩებზე მეკონება. ჩემთვის ესაა პირველი სასიყვარულო კოცნა. ბებერი კაცი... მამაკაცი, რომელიც არ მიყვარს. სუნთქვა შემეკრა, ზიზღით სავსე ყვირილი აღმომხდა... თავს ვითავისუფლებ და ჩემში ზვირთდება უკიდევანო პროტესტი: არა, არასოდეს...

მეორე დღეს საჩუქრებს უკან ვუგზავნი; ნიშნობა ჩავშალე. მართალია, ჩემებმა სცადეს გაპროტესტება: – უბატივცემულობაა – სიტყვის გატეხაა – არ უნდა დათანხმებულიყავი, ხომ არავინ გაიძულებდა – ახლა უკან დახევა არ შეიძლება – ცოტა ხანს მაინც გეფიქრა...

„არა, არა!.. არ შემიძლია, არ შემიძლია!.. მირჩევნია, მოვკვდე!“

და ასე გაიგზავნა უარის წერილი.

რამდენიმე საათის შემდეგ მოვარდა მისი ქალიშვილი და ტირილით ფეხებში ჩამივარდა: მემუდარებოდა, მამამისისთვის ასეთი შეურაცხყოფა არ მიმეყენებინა და ეს საშინელი გადაწყვეტილება უკან წამეღო...

მაგრამ მე შეუვალი ვიყავი. ჯიუტად ვიდექი ჩემს აზრზე: „არ შემიძლია, არ შემიძლია!“

მაღე მთელი ეს ეპიზოდი დავიწყებას ისე მიეცა, როგორც ავი სიზმარი, საიდანაც გამოფხიზლება ღვთის წყალობად მივიღე. ჩემი ნიშნობა და მისი ჩაშლა ყველგან დროს დავმთხვავებ. რამდენიმე თვეში ეს ამბები აღარც მახსოვდა. ის ზაფხული ბადენში, ვენასთან ახლოს გავატარეთ, სადაც დედაჩემმა პატარა ვილა შეიძინა. მხიარული პერიოდი იყო – ბუნების წიაღში გასვლით, საკურორტო მუსიკით, საცეკვაო გვირგვინებით...

მომდევნო ზამთარი რომში იცხოვრა ჩვენმა ოჯახმა, ანუ დედაჩემმა, ჩემმა ძმამ და მე. ეს ასე მოხდა: ნეაპოლის იმჟამად უგვირგვინო დედოფალმა² ის

ბაფხული, ერცჰერცოგ ალბრეხტის მიწვევით, ბადენის ვაილბურგში გაატარა თავის ამალასთან ერთად. ის ისტორიული ტრაგედია, რომელიც მას მანამდე შეემთხვა, – გაეტას დაცვა თუ დაკარგვა – მე ნაკლებად მალეღვებდა. დიდი ინტერესით კი ვისმენდი, თუ როგორ ჰყვებოდა ამას დედოფლის უფროსი ჰოფმაისტერი, მოხუცი Principe, რომელიც ხშირად გვსტუმრობდა. სწორედ ის გვიხატავდა ასე სასიამოვნოდ უცხოელთა ცხოვრებას იტალიაში, კერძოდ კი რომში; ჩვენც აქტიურად მოგვიწოდებდა, მომავალ ზამთარს იქ წავსულიყავით და... მის რჩევას დავყევით. პირადად მე უზომოდ მხიბლავდა ეს პერსპექტივა. ჩემდა სამარცხვინოდ უნდა გამოვტყდე: მარადიული რომის მომაჯადოებელი ისტორია კი არ მიზიდავდა, არამედ იმდროინდელი რომაული საზოგადოების ყოფა და ეს ინტერესი ასევე გამყვა იქ ყოფნის განმავლობაში; ის, რამაც ჩემზე ყველაზე დიდი შთაბეჭდილება მოახდინა, რაც ჩემთვის „მნიშვნელოვანი“ აღმოჩნდა, იყო არა ვატიკანი ან Castel Sant'Angelo თუ ფორუმი, არამედ Monte Pincio თავისი ელეგანტური კორსოთი, კონსტანცის თეატრი (Teatro Constanzi) საოპერო სეზონით (Opernstagione), რომლის დროსაც ორი ოპერა ერთმანეთს ენაცვლებოდა – მახსოვს, ერთ-ერთი „ტრუბადურები“ (Trovatore) იყო, ასევე ბალები და საღამოები, რომელიც დიდებულების სასახლეებსა და უცხოელ კოლონისტთა სალონებში რომ ვესწრებოდით. რომს მაშინ ჩემზე დიდი შთაბეჭდილება არ მოუხდენია; მხოლოდ მრავალი წლის შემდეგ აღვიქვი და განვიცადე ამ კლასიკური მიწის ჯადოსნური ზემოქმედება, რაც ოდნავ მაინც შემთვისებელ გონებაში წარუშლელ კვალს ტოვებს.

რომიდან ბადენში დავბრუნდით, სადაც წინა წლის სეზონური ცხოვრება ახალი ძალით გაჩაღებული დავცხვდა, ხოლო მომდევნო, 1864 წლის ზამთარში ვენეციაში წავედით, რათა იქ ისევ „მაღალ საზოგადოებაში“ გავრეულიყავით...

ოჰ, ვენეცია... მიცვალებულივით გაფითრებული ლაგუნების მშვენიერო დედოფალო, შენი გაგებაც და შეყვარებაც მხოლოდ მრავალი წლის შემდეგ შეეძელი. ამ სილამაზისადმი ბოლომდე უგრძნობი არც მაშინ ვყოფილვარ, მაგრამ იმ დროს ჩემთვის „მნიშვნელოვანი“ ხომ საზოგადოებრივი ურთიერთობები იყო. ჩემს გულს ფრიად სიამოვნებდა აგრეთვე ჩემი საყვარელი ბიძაშვილის, ელვირას გვერდით ყოფნა. მისი ქმარი იმჟამად ვენაში იყო გამწესებული და წყვილი განცალკევებულად, მართლაც ბედნიერ ოჯახად ცხოვრობდა. ორი რამე ჩრდილავდა ამ ბედნიერებას: პირველი – ახალგაზრდა ქმრის გემზე გამოძახება, რაც ერთწლიანი განშორების საფრთხეს ქმნიდა, და მეორე – ელვირას მერყევი ჯანმრთელობა; ხშირად ახველებდა, არცთუ იშვიათად, შიშის პანიკური შეტევებიც ემართებოდა, რადგან ფიქრობდა, რომ ფილტვების დაავადება სჭირდა. მისი გარემოცვა, ექიმები – ყველანი არწმუნებდნენ, ეს შიში უსაფუძვლოაო, და მასაც კვლავ უბრუნდებოდა სიცოცხლის ხალისი.

ცხოვრება ასე მიდიოდა: შუადღისას მარკტპლატცზე სამხედრო მარში უკრავდა და ხალხი ზევით და ქვევით ისევე დასეირნობდა, როგორც ბადენის კურპარკში, თანაც დამსვენებლების – ძირითადად საზღვაო ოფიცრების – თანხლებით; ამ დროს გრძელდებოდა წინა საღამოს, ბალის დროს დაწყებული საუბრები. თუ წვიმდა, პროკურაციების³ პირველ სართულზე, კაფეებში სხდებოდნენ და ერთმანეთს იქ ნახულობდნენ. ნაშუადღევს შემდეგ, 5 საათიდან იწყებოდა ურთიერთვიზიტები; ყოველ საღამოს იმართებოდა ბალები და მიღებები. ერთი დიდი, კოსტიუმირებული ბალიც მოეწყო; ერთხელ კი, მგონი, ვიმპფენის სახლში, სამოყვარული თეატრის წარმოდგენა გაიმართა ცოცხალი სურათების თანხლებით.

ტუალეტი, რომელსაც ამ ღონისძიებებზე ვატარებდი – კვლავ თვალწინ მიდგას. მის აღწერას არ ვაპირებ, ამ აღიარებით მხოლოდ იმის თქმა მინდა, თუ რა ღრმად იბეჭდება ხოლმე ასეთი რაღაცები გოგონას სულელ თავში; არადა, ყველაზე სულელებს შორის არ მოვიპოვებ. მე ხომ ჩემი გონებით მაფასებდნენ; საერთოდაც, იმ სეზონზე ვენეციაში ისეთი პატივისცემით მეპყრობოდნენ, რომ თავს დედოფლად ვგრძნობდი. ნამდვილად დიდ სიამოვნებას განვიცდიდი. ეს ისე ამივარდა თავში, ამ უპირატესობას იმისთვის ვიყენებდი, რომ რამდენიმე ხელის მთხოვნელი გვარიანად გავაწილე. ამას მოჰყვა ჩემების ამასოფლურ-ბრძნული საყვედურები. არადა, რა კარგი ვქენი, ასე რომ მოვიქეცი, თორემ ხომ ვიქნებოდი ახლა ვიღაც ადმირალის თუ კომენდანტის ცოლი და არ მეყოლებოდა მეუღლე, რომლის არსებობაც ჩემთვის ღვთის წყალობის ტოლფასია; ვეღარც სამშვიდობო მოძრაობას დაუვკავშირებოდი, რომელიც ჩემი შემოქმედებისა და მისწრაფებების მგზნებარე შთაგონების წყაროდ იქცა. რაოდენ ქარაფშუტობად შეიძლება შეფასდეს ერთი ყმაწვილი მდედრის ქცევა, რომელიც მთელი თავისი არსებით არის გადაშვებული მაღალი საზოგადოების გართობებში; რომელსაც საერთოდ არ აინტერესებს მსოფლიო საჭირბოროტო საკითხები; სამაგიეროდ, თავისი ტუალეტის დეტალები, სადღესასწაულო შემთხვევების დროს რომ ატარებს, ორმოცი წლის მერეც ზედმიწევნით ახსოვს... ამას წინათ ერთ ხანში შესულ, თუმცა ჯერ კიდევ ყოჩაღ გენერალს ვკითხე, ახსოვს თუ არა იმ ხმლის წკრიალი, რომელიც პირველად შეარჩია და გააღესინა; ასევე საზოგადოებრივ-პოლიტიკური დარგის ყველაზე განსწავლული პროფესორისგანაც მაინტერესებდა გამეგო, შემორჩა თუ არა მის მეხსიერებას იმ ბაფთის ფერი, სტუდენტობისას ქუდზე რომ ებნია. ყოველივე ამაში – ბალის თაიგული იქნება თუ ლეიტენანტის დაშნა ან სტუდენტური ქუდის ბაფთის ფერი – იმაზე მეტი იგულისხმება, ვიდრე არის – მასში სურნელს აფრქევს, წკრიალებს და ბრწყინავს სიმბოლო: ბალზე შესასვლელი ბილეთები საზეიმო ცხოვრების ყველაზე დიდი განაცხადია; დიდი ლატარიის გათამაშების ბილეთები მთავარი პრიზის იმედის განსახიერებაა; ბრწყინვალე მომავალი, ბალზე მიღწეული გამარჯვებები – ახლაც კი მესმის, თუ რა მძლავრი ეიფორია

ახლავს თითოეულ მათგანს. ვამბობ „მძლავრი“ – არადა, ბედნიერი და უზრუნველი ახალგაზრდული ურთიერთობები ხომ ისედაც ეიფორიაა. თუმცა საზოგადოებრივ სიამეთა მორევში თავდავიწყებით და კმაყოფილებით რომ გადაეშვები, „ამპარტავნობამ“ – ზედაპირული და მარტივი გაგებით – დიდხანსაც არ უნდა შეგიყოლიოს: ამ დროს შენი ნაპერწკლებით სავსე ელექტრული ფლუიდი ვიბრირებს და ეს ნაპერწკლები ან ბედნიერებად უნდა გარდაიქმნას და განიმუხტოს, ან სიყვარულად, სიხარულად – ეს გარდაუვალია; რაც უფრო სავსეა გოგონას ცხოვრება სათუთი განცდებით, მით უფრო მძაფრად იკვებება მისი გონება პოეტური სამრდოთი, მით უფრო ამაყად აცნობიერებს, რომ ძალუძს ბედნიერების განძის სახით დარიგება; რაც მეტ ძალას გრძნობს საკუთარ თავში თავდადებული სიყვარულისთვის, მით უფრო მზადაა იმ იდუმალი ნაპერწკლიდან გაჩენილი ტკაცატკუცის გასაგონად... ვისაც ამ ტკაცანის ხმა არ ესმის, ვისაც საპნის რგოლები თავბრუს არ ახვევს, ვინც ბედნიერების მგზნებარე იმედებს არ დაუწვავს – ის მთელ ამ ალიაქოტს უხამსობად და უგვანობად მონათლავს, უნდობლად და ათვალწუნებით შეხედავს იმ სულელ გოგონებს, რომლებიც ამით იქნებიან გატაცებულნი. რამდენიმე სეზონის შემდეგ ყველას ცხოვრებაში დგება გამოფხიზლების ჟამი. ვინც ამის მერე კვლავ მხოლოდ ასეთი საზოგადოებრივი ზეიმებით დაკმაყოფილდება – მით უმეტეს, თუ ნორჩ ასაკში აღარაა და წინასწარმეტყველებათა აღსრულებაც უგვიანდება – ვინც მერე სხვა მიზნებში, სხვა ვალდებულებებში, სერიოზულ საქმიანობაში „მნიშვნელოვანს“ არ აღმოაჩენს, ის უცილობლად გამოუსწორებელ „ამპარტავნად“ დარჩება. სხვათა შორის, ახლა ჩემი ახალგაზრდობისდროინდელი მაღალი საზოგადოების ყმაწვილი ქალების შეგრძნებებზე ვსაუბრობ. დღეს უკვე ყველაფერი სხვაგვარადაა. ზრდასრული ქალიშვილისთვის ბალი დღეს აღარ არის მაშინდელივით უმაღლესი სიხარულის წყარო და იმის ერთადერთი შესაძლებლობა, რომ შეიძინოს პროფესია – ბედნიერი მონაპოვარი. ცეკვა სპორტმა შეავიწროვა; დღითი დღე მრავლდება პროფესიები, რომლებიც ქალისთვის ხელმისაწვდომია. მაღალი საზოგადოების ცხოვრებაც მოსაწყენი გახდა – ყმაწვილი კაცები საბალო დარბაზებს თავს არიდებენ; სეზონი იმდენ ხანს არ გრძელდება, ხალხმა ერთმანეთი კარგად გაიცნოს და, შესაბამისად, კეთილგანწყობილი ურთიერთობა დაამყაროს; საზოგადოება მთელი სეზონი ვერც ქალაქად იკრიბება ზამთრობით და ვერც საკურორტო ადგილას ზაფხულობით – ისინი დაფრინავენ ერთი ადგილიდან მეორეზე, მთიდან ზღვაზე, ჩრდილოეთის ქალაქიდან სამხრეთისკენ, შევენიგენიდან სან-მორიცამდე, პირენეებიდან ეგვიპტემდე და არც ისე შორსაა ის დრო, როცა უაითის კუნძულიდან წამოსული გზად იაპონიის მოდურ თერმულ კურორტზე შეივლი.

სეზონი ბად-ჰომბურგში⁴

1864-ში ავსტრიული ჯარები გერმანელებთან ერთად დანიის წინააღმდეგ ომობდნენ. როდესაც მეხსიერებიდან ამ წელს გამოვიხმო, ეს მოვლენა საერთოდ არ მახსენდება. არა, რაღაც ხმაურს უეჭველად გავიგონებდი, მაგრამ ამ ომში არცერთი ჩემი ახლობელი ან ნათესავი არ მონაწილეობდა, ამიტომაც ეს ხმაური ისეთი ხმამაღალი არ ყოფილა, რომ ჩემი სულის ფონოგრაფში კვალი დაეტოვებინა. ჩვენ გავემგზავრეთ ბად-ჰუმბორგში. ბინა წინასწარ შევუკვეთეთ „კურზალის“ მოპირდაპირე მხარეს მდებარე სახლში, რომლის მფლობელი იყო ბანკირი, სახელად ვორმსერი. ფრაუ ვორმსერი იყო საყვარელი, გონიერი, სანდომიანი ქალბატონი. ახლა აქ მას სიყვარულით მოვიხსენიებ და ამგვარად მოკითხვას გავუგზავნი აჩრდილთა სამეფოში.

არ ვიცი, ჰომბურგი მას შემდეგ როგორ განვითარდა. ახლაც თვალწინ მიდგას: ტრამვაის ხაზის გასწვრივ უსასრულობამდე გადაჭიმული გრძელი, ფართო ქუჩა, რომელიც მარჯვენა მხარეს იმ მოედნით სრულდება, სადაც კურზალი დგას. ქუჩის გაყოლებაზე ჩარიგებული ყველა შენობა ან რომელიმე ჩვეულებრივი – ინგლისური, რუსული ან მსგავსი – სასტუმროა, ან ყველა მათგანზეა წარწერა: Appartements meublés.⁵ კურზალს რომ გასცდები, სასტუმროთა რაოდენობა იკლებს; ეს უსასრულო ქუჩა პატარა ქალაქს ემგვანება და მას პატარა-პატარა ქუჩებიც უერთდება, რომლებიც ჰესენ-ჰუმბორგის მმართველი ლანდგრაფის რეზიდენციას ეკუთვნის. ამ ტახტის მაშინდელი მფლობელი ლანდგრაფი უკანასკნელი მარტო იმიტომ კი არ აღმოჩნდა, რომ ორი წლის შემდეგ მის გარდაცვალებასთან ერთად ეს შტო შეწყდა და ჰესენ-დარმშტადტის ლანდგრაფთა მმართველობა დამთავრდა, არამედ იმიტომაც, რომ 1866 წლის 3 სექტემბრის ზავის პირობების თანახმად, ეს საგრაფო, ჰესენის პროვინციის ნაწილის სახით, პრუსიის სამეფოს შეუერთდა.

ჰესენჰომბურგულ პატრიოტიზმს, თუკი ასეთი რამ არსებობდა, სასწრაფოდ დარმშტადტულ, ნასაურ⁶, პრუსიულ და რაიხსდოიტშურ პატრიოტიზმად მოუწია გარდაქმნა.

დიდი ქუჩა კურჰაუსპლატცთან წყდებოდა, გვერდითი ქუჩა მარჯვნივ, კურზალის მოპირდაპირედ, პარკამდე ჩადიოდა. აქ იყო იმ არემარეზე ყველაზე სასიამოვნო სასტუმრო, რომელსაც Bellevue ერქვა; იქვე, უკვე პარკის ზონაში, იდგა დიდი სამსართულიანი შენობა Wedterlin, რომლის პირველ სართულზეც უამრავი მხიარული დრო გამიტარებია, მაგრამ ამის შესახებ – მოგვიანებით.

ჩვენი ცხოვრების ყოველდღიურობა ასე იყო განაწილებული: დილიდან შუადღემდე დედაჩემი „სამუშაოზე“ მიდიოდა, ამ დროს მე სახლში ვრჩებოდი. კატეგორიულად გამაფრთხილეს, რომ სათამაშო დარბაზებში არ უნდა შევსულიყავი,

ამიტომ ამ დროის განმავლობაში ძირითადად პიანინოზე დაკვრითა და წიგნების კითხვით ვიყავი დაკავებული. პიანინო ჩასვლისთანავე ვიქირავებო, ხოლო ფასიან ბიბლიოთეკაში, რომელიც გვერდით შენობაში მდებარეობდა, აბონემენტი ერთბაშად ექვს სხვადასხვა ტომეულზე გავხსენით. ყოველთვის წიგნების ჭია ვიყავი: მხატვრული ლიტერატურის სამი ტომი (მაშინ მრავალტომეული რომანები იყო მოდაში), ტაუჩნიცის⁷ ორი ტომი და გერმანული მეცნიერების ენციკლოპედიის ერთი ტომი – ამაზე ნაკლებით როგორ დაგვამყოფილდებოდი! საერთოდაც, ახლა რომ ვიხსენებ, ყოველთვის, ყველა სიტუაციასა და ყველა მდგომარეობაში სულ ორი ცხოვრებით ვცხოვრობდი, საკუთრივ ჩემი ცხოვრებით და ჩემი საკითხავის ცხოვრებით – ამით იმის თქმა მინდა, რომ განცდილმა და აღწერილმა მოვლენებმა თანაბრად გამომდიდრა მოგონებათა სკივრი. ჩემთვის რეალურად ცნობილ პიროვნებათა რიცხვი გაიზარდა ჩემი ავტორების გმირთა წყალობით; ეს ორმაგი გამოცდილებაა. სწორედ მისგან ამოიზარდა ის პიროვნება, რომელსაც მე დღეს წარმოვადგენ. „ათას ერთი ღამის“ ზღაპრები ზუსტად ისევე მიეკუთვნება ჩემს აღმოსავლურ შთაბეჭდილებებს, როგორც ჩემი რეალური ყოფნა კავკასიაში და არცერთ ცოცხალ დამსვენებელს ისე არ აუჩქროლებია ჩემთვის გული, როგორც მარკიზ დე პოზას⁸ წარმოსახულ სახებას. თითქოს შენ თავად განიცდი იმ წამს, როცა მოაზროვნის ან მეცნიერის სიტყვებიდან იზადება ახალი ჭეშმარიტება, როცა უეცრად გადაიწევა იმ ფარდის კუთხე, რომელიც სამყაროს დიდ მისტერიას ფარავს...

მაშ ასე, დილიდან მოყოლებული შუადღემდე დაკავებული ვიყავი სახლში საქმიანობით. დედაჩემი პირველი საათისთვის მოდიოდა „სამსახურიდან“ (ოჰ, როგორ დაძაბულად და ზიზღით წარმოთქვამდა ხოლმე ამ სიტყვას!) და ჩვენს ოთახში ვსაუბრობდით. ნაშუადღევს კონცერტისთვის ლამაზად გამოვეწყობოდით. 7 საათზე კურაშუბრესტორანში იწყებოდა წვეულება, უმეტესად, რჩეული საზოგადოების მონაწილეობით, კვირაში სამჯერ ოპერა იყო; სწორედ მაშინ სტუმრობდა იქაურობას ახალგაზრდა, მაგრამ უკვე საყოველთაოდ ცნობილი ადელინა პატი (Adelina Patti). იგი ყოველ გამოსვლაზე ჰონორარის სახით ხუთი ათას ფრანკს იღებდა. მას შემდეგ კიდევ რამდენჯერ მოვუსმინე ოპერებში: „სომნამბულა“, „ფაუსტი“, „ლუჩია“, „დონ პასკუალე“, „ტრავიატა“, „ლინდა“, Crispino e la comare.⁹ ალბათ როგორი შესანიშნავი გრძნობაა, იდგე სცენაზე, როგორც იდეალური პერსონაჟის განსხეულება, და ხელოვნების ჯადოსნობით ამდენ გულს ატყვევებდე, ამდენ ბრწყინვალეებას, ღირსებას, სიმდიდრეს მოიპოვებდე და თან საკუთარი ხმის კეთილხმოვანებით ტკებოდდე... ეს შურის გრძნობით შეზავებული ფიქრები მიტრიალებდა თავში, ვიდრე პატი მღეროდა და მაშინ მივხვდი, თუ რატომ ამბობდა დედაჩემი – ჩემი ცხოვრებისეული ბედნიერება მაშინ დაინგრა, როცა ხელი შემიშალეს, მეორე მალიბრანი¹⁰ გავმხდარიყავიო. მალიბრანი ხომ, როგორც ირწმუნებოდნენ, პატიზე ასჯერ დიდი მომღერალი მაინც იყო, ხოლო დედაჩემის

ხმა, მცოდნეთა განმარტებით, ზუსტად იმავე საფეხურს შეესაბამებოდა. ნეტავ, მე ხომ არ გამომყვა ღვთის ეს საჩუქარი?! ერთი კაპელმაისტერი მოვიყვანეთ ჩვენთან, მას უნდა შეემოწმებინა, მქონდა თუ არა ხმა და თუკი მქონდა, მაშინ ჩემთვის სიმღერის გაკვეთილები ჩაეტარებინა. მოვიდა, გამსინჯა, კარგი მასალააო, თქვა და მეცადინეობებიც დამინიშნა. რა თქმა უნდა, ეს იყო ხმის დასაყენებელი ვარჯიშები, რაც ცოტათი მოსაწყენი აღმოჩნდა ჩემთვის – თავიდანვე დიდი სიამოვნებით შევისწავლიდი ვირტუოზულ არიებს. როგორ გამიცრუვდა იმედი მაშინ – ან ე ფორტისიმოდე მშვენივრად რომ ავწიე და მერე ასევე ყოჩაღად ნელ-ნელა ჩავანავლე – კაპელმაისტერი რომ არ წამოხტა და აღფრთოვანებულმა რომ არ შესძახა: „ეს ხომ პატისაც სჯობს!“ ამიტომ ერთ კვირაში მეცადინეობას თავი დავანებეთ, მით უმეტეს, რომ დედაჩემისთვის – რამდენადაც მის სამუშაოს რატომღაც უფრო ხშირად არავითარი შემოსავალი არ მოჰქონდა – თითო გაკვეთილში ოცი ფრანკის გადახდა საკმაოდ მაღალი საფასური აღმოჩნდა.

ერთ საღამოს, მუსიკას რომ გუსმენდით, სწორედ ჰერ ფონ კონიგსვარტერმა, რომელიც ჩვენსავით ბანკირ ვორმსერთან იყო გაჩერებული, გვითხრა: „სამეგრელოს“ გრაფინია დიდი სიამოვნებით გაიცნობდა ქალბატონებს“.

ჩვენ კარგა ხანია ვიცოდით, ვინ იყო სამეგრელოს გრაფინია, რადგან ყოველდღე ვხედავდით კურპარკშიც და თეატრშიც; თანაც ჰერ კონიგსვარტერი უამრავ რამეს გვიამბობდა მის ცხოვრებაზე. ეკატერინე დადიანი, ადრე კავკასიური, ახლა კი რუსეთს მიერთებული ქვეყნის – სამეგრელოს ყოფილი მმართველის მეუღლე, უაღრესად დახვეწილი ქალბატონი ბრძანდებოდა; მაშინ 46-47 წლის იქნებოდა, ჯერ კიდევ შემორჩენოდა მშვენიერი აღნაგობა და ეტყობოდა, ახალგაზრდობაში თვალისმომჭრელი, ნამდვილი ქართული სილამაზის უნდა ყოფილიყო. შვილების გამო, მათთვის საუკეთესო განათლების მისაცემად, ბოლო რამდენიმე წელი სულ ევროპაში გაეტარებინა, პეტერსბურგსა და პარიზს მონაცვლეობით სტუმრობდა. ზაფხულობით სისტემატურად ჩამოდიოდა ჰომბურგში სამკურნალო წყლებისთვის. ყოველ დილით, 7 საათზე წყაროზე მიდიოდა; სათამაშო დარბაზებში შეისეირნებდა ხოლმე, თუმცა არასდროს თამაშობდა; საღამოს კონცერტებზე სულ ერთსა და იმავე ადგილზე, კურპაუსის ტერასაზე იჯდა, ყოველთვის თავისი რამდენიმე მხლებლით გარემოცული. ჰყავდა სამი შვილი: ორი ვაჟი და ქალიშვილი. უფროსი ვაჟი, ნიკალაუსი, ნიკოდ წოდებული, მაშინ 17 წლის იყო, ქალიშვილი სალომე – 16-ის, და უმცროსი ანდრე – 14-ისა. სასტუმრო Weckcrlin inne-ს მთელი პირველი სართული მის განკარგულებაში იყო. ჰყავდა მდივანი, გუვერნანტი ქალი სალომესთვის, გუვერნიორი ყმაწვილთათვის, კამერდინერი და ორი მოახლე.

მეუღლის გარდაცვალების შემდეგ, როგორც ვაჟიშვილის მეურვემ, მმართველობის სადავეები ხელში აიღო. თურქებისგან შევიწროებულ ქვეყანაში ერთხელ თავად წარუძღვა თავის რაინდებს მტრის წინააღმდეგ ბრძოლაში. თუმცა შეუძ-

ლებელი აღმოჩნდა დამოუკიდებლად თავის გადარჩენა და იძულებული გახდა რუსეთის პროტექტორატი მიეღო; პროტექტორატი, რაც სინამდვილეში ანექსიას ნიშნავდა. მემკვიდრე სამეგრელოს მთავრის ტიტულს და მიწებს ინარჩუნებდა, ოღონდ მაიორატის სახით, ტახტს კი უნდა დამშვიდობებოდა. მთავრის ქვრივს, დედოფალს, გამოეყო მნიშვნელოვანი აპანაჟი¹² და მიენიჭა რუსული ტახტის უცხოელი სუვერენის წოდება. კმაყოფილი იყო ამით, რადგან სხვა კავკასიურ სათავადოებს და სამეფოებს – საქართველოს, იმერეთს, სამეგრელოს და სხვ. – გამუდმებით მაჰმადიანების შემოსევა ემუქრებოდათ; ხოლო რუსეთის მფარველობაში ესენი შეძლებდნენ მშვიდად განვითარებას, აყვავებას და თავიანთი უნიკალური წეს-ჩვეულებების, ენებისა და სამოსის შენარჩუნებას.

დედოფლის გარშემო შემოკრებილ საზოგადოებაში დაინახავდით რამდენიმე კავკასიელ ქალბატონს, რომელთაც ფერადი მშობლიური ტანსაცმელი ემოსათ. თავად ეკატერინე ტუალეტის მოწყობილობებს უორთთან¹³ იძენდა და დიდი ქალბატონის შესაფერისი ბრწყინვალეობითა და ელეგანტურობით ატარებდა. თავისუფლად ლაპარაკობდა ფრანგულად, თუმცა შესამჩნევი რუსული აქცენტით. შვილებს ძირითადად ქართულად ესაუბრებოდა.

სასურველი გაცნობის დროც დადგა. ამ საინტერესო ქალს მე ჩემი ბავშვური აღტაცება შევაგებე და იმანაც თავის გულში ადგილი მომიჩინა. მალე მათი სახლის თითქმის შვილობილად ვიქეცი. თავიდან მხოლოდ კონცერტის დროს ვიჯექი ხოლმე დიდ წრეში. მერე გრაფინიამ მთხოვა, დილას წყაროზე ვხლებოდი, შინ ვსტუმრებოდი, ერთად გვესადილა. დედაჩემს თავი შორს ეჭირა, მხოლოდ რამდენჯერმე სტუმრობა და მასპინძლობა, სულ ეს იყო. მე, პირიქით, გრაფინიას ყველაზე დაახლოებულ წრეში აღმოვჩნდი, სადაც ახალგაზრდობა განსაკუთრებით უყვარდათ. სალომე, მისი ქალიშვილი, რომელიც წლოვანებით უფრო შემეფერებოდა, ნაკლებად დამიახლოვდა, ვიდრე დედამისი. მას თექვსმეტი ახლახან შესრულებოდა, ჯერ კიდევ ბავშვად მიაჩნდათ და ამიტომ უფრო ხშირად აღმზრდელთან ერთად იყო ხოლმე.

დიდი თავადის ქვრივს მისი თანამემულეები მიმართავდნენ ქართული სიტყვით „დედოფალი“. მე კი ყველა La Contessina-ს მეძახდა.

სიმრავლითა და განსაცვიფრელი სიმუსტით გამოირჩევა სურათები, რომლებიც მესიერებაში ჩამებეტდა დედოფლის სიახლოვეს და მის საზოგადოებაში ყოფნის შედეგად. აღმოსავლური, ეგზოტიკური სამყარო, რუსული და პარიზული ელფერი, ზომიერი რომანტიკულობით და მოჩარჩოებული მდიდრული ელეგანტურობით – ერთგვარ ჯადოსნობად მესახებოდა. მართლა ბედნიერი ვიყავი ამ ურთიერთობით, ყოველივე ეს გაურკვეველი და სანუკვარი ოცნებების ახდენას ჰგავდა. როგორც კი ვეკერლინის სახლში შევიდოდი, – სულერთია, რომელი საათიც უნდა ყოფილიყო, – მაშინვე ამაღლებული და ხალისიანი განწყობა მეუფლებოდა. ფოიედან გადიოდი

დიდ, სამფანჯრიან და აივნისან სასადილო ოთახში, მარჯვნივ კუთხის სალონი იყო, სადაც დედოფალი ბრძანდებოდა ხოლმე, იმის იქით – საძინებელი ოთახი. სასადილო ოთახს მარცხნიდან ბავშვების ოთახი ესაზღვრებოდა, რომელიც ჩვეულებრივი, თუმცა საკმაოდ სასიამოვნო appartement meuble¹⁴ იყო. მას თავადური ბრწყინვალეობის არაფერი ეტყობოდა, მაგრამ აქა-იქ მიმოფანტული ათასნაირი საგნის, ყვავილისა თუ ავეჯის განლაგების მანერის გამო აქაურობას მაინც ინდივიდუალური, დამახასიათებელი ბეჭედი ესვა. ჯერ მარტო როგორი პიროვნული იყო ეს სურნელება, მთელ ამ სივრცეს რომ ავსებდა – ფორთოხლის ყვავილის სუნამოს, რუსული სიგარეტისა და ტყავის სუნის ნაზავი. წლების განმავლობაში დედოფალს სხვადასხვა ადგილას შევხვედრივარ და ყველგან, სადაც კი გაჩერებულა, ეს სურნელება იგრძნობოდა – მისი პალატები და ყველა მისი ნივთი ამით იყო გაჟღენთილი. უამრავ საათს ვატარებდი კუთხის სალონში და ვისმენდი დედოფლის სიტყვებს, თავისი ცხოვრების რომელიღაც რომანტიკულ ამბავს რომ მიყვებოდა. კიდევ რამდენიმე წლით აპირებდა ევროპაში დარჩენას და მერე თავის ვაჟებთან ერთად შშობლიურ ქვეყანაში დაბრუნებას. ამასობაში ქალიშვილიც გათხოვდებოდა, ალბათ... „და ერთხელაც, საყვარელო კონტესინა, თქვენც მესტუმრებით კავკასიაში თქვენს ქმართან ერთად, ხომ ასეა?“

„უკვე 21 წლის ხართ, თანაც ასეთი ლამაზი – მალე ალბათ ბრწყინვალე საქმროს მონახავთ და ბედნიერი იქნებით... მოიწით აქეთ, მინდა განახვოთ, საქორწილო საჩუქრად რა შეგიჩივით“.

თავის საძინებელ ოთახში წამიყვანა, მოახლეს სამკაულების ზარდახშა მოატანინა და მაჩვენა თავისი განძეულობა – ბრილიანტების, ძვირფასი ქვებისა და მარგალიტების ბრწყინვალე კოლექცია. ერთი ლამაზი ბრილიანტის გულსაკიდი ამოიღო:

„ნახეთ, ეს არის Cadeau de noce, mais d'abord il faut avoir >le promis“.¹⁵

მერე მკითხა, ნუთუ თაყვანისმცემელი არ გყავსო, ნუთუ არავინაა ისეთი, რომ მოგწონდესო. არა, ჩემი გული თავისუფალი იყო. თავად სულ ახლახან ბეწვზე გადარჩა, რომ თავიდან არ დანიშნულიყო. წინა ზაფხულს ბიარიცში¹⁶ ესპანეთის უდიდესმა და უმდიდრესმა დიდებულმა, ჰერცოგმა ფონ ოსსუნამ ხელი სთხოვა, მაგრამ დედოფალმა გათხოვება ვერ გადაწყვიტა. იგი თავისი შვილების მომავლით ცხოვრობდა და ერთი სული ჰქონდა დაბრუნებულიყო თავის ქვეყანაში, საიდანაც განდევნილი იყო ნიკოს სრულწლოვანებამდე.

ერთ ნაშუადღევს, საკურორტო კონცერტის მიმდინარეობისას, ყველანი კვლავ ტერასაზე, დედოფლის ჩვეულ ადგილას ვისხედით. ამბობდნენ, მეფე ალექსანდრე მეორე ჩამოვიდა ჰომბურგშიო. სავარაუდოდ, კურპარკშიც მოვიდოდა. მართლაც, უცბად ჩოჩქოლი ატყდა და ყველა მხრიდან გაისმა შეძახილები: L'Empereur... L'Empereur... და ქვევით, პარკში გამოჩნდა ალექსანდრე მეორის შთამბეჭდავი ფიგურა, რომელიც თავისი ადიუტანტის თანხლებით ტერასის ქვემოთ მოსეირნობდა. როგორც კი მან დე-

დოფალს თვალი მოჰკრა, მაშინვე ჩქარი ნაბიჯით კიბეებზე ამოვიდა. დედოფალი წამოდგა, რომ რამდენიმე ნაბიჯი გადაედგა და მეფეს შეჰგებებოდა; მეფემ ხელზე აკოცა. ჩვენ ყველანი მოწიწებით გავშეშდით შორიასხლოს. თუმცა გავიგონე, ხანმოკლე საუბარში კაიბერმა ხმის აწევით და ფრანგულად როგორ შესთავაზა დედოფალს:

„დარბაზებში ხომ არ გავგესიერნა?“

და თავისი მკლავი გაუწოდა. ჩვენ ყველანი უკან გავყევით. რუღეტის მაგიდასთან ალექსანდრე მეორემ თავისი თანმხლები ქალისგან რამდენიმე ოქროს მონეტა ისესხა. ალბათ ფული არ ჰქონდა თან, ან ფიქრობდა, რომ ნასესხები ფული იღბალს მოუტანდა; ფსონი წითელზე დადო, მოიგო, რამდენჯერმე კიდევ დადო, მაგრამ ბოლოს ამ პატარა უძლეველმა კენჭმა თვით ავტოკრატი მმართველიც უკუაქცია.

მეორე ეპიზოდზე შემორჩა ჩემს მეხსიერებას, კერძოდ, ადელინა პატის ვიზიტი სამეგრელოს დედოფალთან. ადელინა თავის კომპანიონ ქალთან ერთად მოვიდა და კუთხის სალონში სულ ნახევარ საათს დაჰყო. სრულიად შემთხვევით მეც გავხდი ამ საუბრის მოწმე. ის კრძალვანარევი მოწიწება, რუსთა თვითმყრობელმა რამდენიმე დღის წინათ რომ აღმიძრა, ახლაც ვიგრძენი, ოღონდ სულ სხვა ხარისხით და თითქმის იმავე სიძლიერით, როცა სიმღერის სამეფოს ამ თავდაჯერებულ, თუმცა ამჯერად ბავშვურად დარცხენილ დედოფალს ვუმბერდი – ეს იყო სამყარო, რომელიც ბავშვობიდან განსაკუთრებულად დიადად მესახებოდა. სალონში საუბარი ძირითადად მუსიკას უტრიალებდა და როცა მის საყვარელ როლზე ჰკითხეს, ადელინა პატიმ დაასახელა მარგარეტე „ფაუსტიდან“.

ხელოვნების ნოვაციები

ბადენში ვბრუნდებით – ორივენი უკიდურესად იმედგაცრუებულნი; დედაჩემის დიდ მოგებასთან დაკავშირებული მოლოდინი არცთუ უმნიშვნელო წაგებით დასრულდა; მე დამენგრა სასიყვარულო ოცნებები ქართველი პრინცის მიმართ, რომელიც დედოფალთან გავიცანი; ამიტომაც ვაპირებდით ჩვენი სოფლის სახლში წყნარად და ხელმოშვინედ ცხოვრებას და ზამთრის ყველასგან მოშორებით გატარებას.

მაგრამ თანდათანობით მუსიკა იქცა ჩემი ცხოვრების მიზნად, ყველაზე „მნიშვნელოვან“ რამედ. ეს ასე მოხდა:

სახლში მდგომრად გვყავდა ერთი ხანში შესული მუსიკის მასწავლებელი, ყოფილი კაპელმასტერი. ერთ დღესაც ასე მოგვმართა:

„მომიტევით, ფრანგ გრაფინია და თქვენც, ახალგაზრდა გრაფინია, თქვენთან მოსვლა რომ გავბედე, მაგრამ მე ჩემს მოვალეობად მიმაჩნია – და საქმე ეხება რაღაც დიადს, იშვიათს... რაღაც განსაკუთრებულს.. რაც ახალგაზრდა გრაფინიას ბედ-იღბალს... რაღაცას, რაც...“ და სიტყვებს დაუწყო ძებნა.

„აბა, რისი თქმა გინდათ?“ – ჰკითხა დედაჩემმა და მეც არანაკლებ შემიპყრო ცნობისმოყვარეობამ (რაღაც დიადი, იშვიათი... – სიცოცხლემოწყურებულები ხომ მუდამ ამას შენატრიან).

„ხშირად მომისმენია, როგორ მღერის ახალგაზრდა გრაფინია – საერთოდ არ იგრძნობა რაიმე სკოლის კვალი, მაგრამ ნამდვილად აქვს ისეთი ხმა, ას წელიწადში ერთს რომ გამოაჩნდება, ჯენი ლინდის¹⁷ მერე რომ აღარ გამოგონია და სულ ჯენი ლინდს რომ მაგონებს. ისეთივე მორაკრაკე, ისეთივე ძალისა, ისეთივე რაღაც... მოკლედ, ახალგაზრდა გრაფინიას მილიონები აქვს ყელში დამალული, წინ დიდება ელის, თუკი თვითონ მოინდომებს – ეს აუცილებლად უნდა მეთქვას“.

მამ ასე: ბრწყინვალეობა და ბედნიერება გამოწერილი მქონდა – მუსიკის მასწავლებლისა და გამოცდილი კაპელმაისტერის პროფესიული ალლო ჩემში იოტი-სოდენა ეჭვს არ იწვევდა. დედაჩემიც აღფრთოვანებული იყო. მაშინვე შეუთანხმდა კაპელმაისტერს, რომ ყოველდღე გაკვეთილი ჩაეტარებინა. პროფესორი ბერანეკი მართლაც ასწავლიდა ვოკალს კონსერვატორიაში და რამდენიმე გამოჩენილი საოპერო მომღერალიც გაეზარდა. ასე რომ, თავისუფლად შეიძლებოდა მას ჩემი „ხმის დაყენება“ ჩაჰბარებოდა. ერთი წელი უნდა ვემეცადინებინე, რომ მუსიკალურად სრულყოფილი გავეხადე, ხმისთვის სათანადო კონდიცია, სილალე და ბუნებრიობა მიენიჭებინა. ამის მერე კიდევ ერთ ან ორ წელიწადს იტალიელ მანსტროსთან ვიმეცადინებდი და პირველი სიდიდის ვარსკვლავადაც ავკაშკაშდებოდი მუსიკალურ ცის კაბადონზე.

ასე დადგა ჩემს ცხოვრებაში ისეთი დრო, მთელი წელი, როცა მე უმეტესად ერთი რამისთვის ვცხოვრობდი: ეს იყო სიმღერა. შეთანხმების მეორე დღესვე დავიწყეთ მეცადინეობა. წინ სწრაფად რომ წავსულიყავი და ერთ წელიწადში მომესწრო ის, რასაც სხვები კონსერვატორიის რამდენიმეწლიანი კურსის შემდეგ აღწევდნენ, ყოველდღიურად ოთხსაათიანი მეცადინეობა დაინიშნა: ორი საათი – შუადღემდე და ორიც – ნაშუადღევს, შუალედში სავალდებულო დასვენებით. გამები, ვოკალიზები, პარტიტურის კითხვა, ჰარმონიის სწავლება: საფუძვლიანი მუსიკალური განათლება უნდა მიმეღო. ყოველმხრივ ფენომენალური: როგორც სახელოვნებო განათლების, ისე ხმის მონაცემთა მიხედვით; მოკლედ, საუკუნის უდიდესი მომღერალი ქალი უნდა გავმხდარიყავი. ჰერ ბერანეკი ყოველდღიურად ექსტაზში ვარდებოდა და ჩვენც ილუზიაში გვამყოფებდა, რომ რაღაც ჯადოსნობა მოხდა, რომ ლატარიაში ჯეკპოტი მერგო... ან უფრო სწორად, უეჭველად დიდი საგანძურის პოვნა მელოდა, ოღოდ ჯერ გათხრა იყო საჭირო... და მეც ვთხრიდი და ვთხრიდი ისეთი სიბეჯითით, მოთმინებით, სიხარულით, რომ სისტემად ვაქციე. აღარაფერი არსებობდა დილიდან საღამომდე, არც შემოდგომის, ზამთრის, გაზაფხულის გრძელი თვეების განმავლობაში – გარდა ნამღერი, დაკრული, წაკითხული, დაწერილი ნოტებისა – ეს იყო მთელი სამყარო – აღსავსე სიტკბოებითა

და მშვენიერებით, ალტაცებით, სიამაყით გამსჭვალული კმაყოფილებით. არ ვიცი, მართლა მოაქვს თუ არა პრიმადონას წარმატებულ კარიერას ამხელა ბედნიერება (მე ხომ ამისთვის არასდროს მიმიღწევია), რასაც გულმოდგინე მეცადინეობისას, უეჭველი გამარჯვებისთვის მზადებისას განვიცდიდი.

ჩვენ ყველასგან მოშორებით ვცხოვრობდით. ჩემი მეურვე თვეში ერთხელ თუ ორჯერ თუ მოვიდოდა. ჩემს მომავალ მომღერლობაზე არაფერს ვეუბნებოდით. მხოლოდ *Fait accompli*¹⁸ – მას შემდეგ გაიგებდა, რაც სცენაზე თავბრუდამხვევ წარმატებას მივალწვდით. ურთიერთობა არ გვქონდა ოჯახებთან, რომლებიც ზამთარს ჩვენსავით ბადენში ატარებდნენ და ვენაშიც კი ერთხელაც არ წავსულვართ. ეს იყო მკაცრი სახელოვნებო ნოვიციიტი – არაფერს უნდა მოვეცდინე მეცადინეობისგან, ჩემი დრო სხვას არაფერს უნდა დაეკავებინა; მხოლოდ სწავლა, სწავლა, სწავლა. მე ხომ უკვე პატარა აღარ ვიყავი და ერთ წელიწადში უნდა ამენაზღაურებინა ის, რასაც სხვები 4-5 წელს ანდომებდნენ. მხოლოდ ერთადერთ ოჯახს ვხვდებოდით ხანდახან – ეს იყო ორი ხანში შესული გენერლის ქალიშვილი და მათი ძმა, ასევე უკვე ჭარმაგი, ჰუსართა პოლკის პენსიონერი ობერლეიტენანტი, ბარიტონი, რომელიც, მისდა სამწუხაროდ, ამ პროფესიას – ოპერის მომღერლობას – ვერ გაჰყოლოდა. მასთან ერთად ვასრულებდი – ჩემი გეგმების გაუმხელად – იტალიურ დუეტს. უფრო ზუსტად, ერთ დუეტს, რადგან რეპერტუარში მეტი არც ჰქონდა. ეს იყო დუეტი და-ძმას შორის „ლუჩია ფონ ლამერმურიდან“.¹⁹ ჩვენ ამას დრამატულად წარმოვადგენდით, ზეპირად და გამომსახველად, ამ დროს მე ჩემს მყიფე მომავალში გადავსახლდებოდი ხოლმე, ჩემი პარტნიორი კი თავის წარსულში ბრუნდებოდა. დარწმუნებული იყო, რომ იქ დიდი მომღერალი იყო, ისევე როგორც მეც დარწმუნებული ვიყავი ჩემს მომავალ სიდიადეში... ალბათ მისი მელანქოლიური თავდაჯერება ისეთივე ილუზორული იყო, როგორიც ჩემი ხალისიანი ოცნება. ვიხსენებ, რამდენი მეცადინეობა დაგვჭირდა იმ დუეტისთვის, ვიდრე გამოგვივიდოდა. ობერლეიტენანტი არცთუ ისე მუსიკალური იყო და ტაქტსაც ხანდახან ასცდებოდა ხოლმე, მეც კარგად ვფორხილობდი, რადგან არიების შესრულება ჩემს პედაგოგთან ჯერ არც დამეწყო – იგი დაბეჯითებით მოითხოვდა, რომ გამეხისა და სოლფეჯიოს გარდა არაფერში მევარჯიშა – ლუჩია-დუეტი, რომელიც დები კორტეზების სახლში სრულდებოდა, ჩემი მაესტროსთვის ჩვენს დანაშაულებრივ საიდუმლოდ დარჩა.

დაახლოებით წელიწადნახევრიანი მოსამზადებელი კურსის შემდეგ პროფესორმა ბერანეკმა გამოაცხადა, რომ უკვე დამდგარიყო დრო, ჩემი განსწავლა ერთ ცნობილ სიმღერის პედაგოგთან გამეგრელებინა. ჩვენი არჩევანი შეჩერდა პოლინა ვიარდო-გარსიაზე.²⁰ გაგონილი მქონდა, რომ მაღამ ვიარდო ძალიან წუწნია იყო და მასთან მეცადინეობის ბევრი მსურველი უარით გაუსტუმრებია. განსაკუთრებული, მართლაც ნამდვილი ტალანტისთვის გაღებული ნამდვილი წყალო-

ბა იქნებოდა მასთან მოხვედრა. ამიტომაც შევეცადე წერილით დამეყოლიებინა. ჩემს სასიძღვრო ტალანტზე ბევრს ვერაფერს ვიტყვოდი (თუმცა ჩემი მაცესტროს თავდებობის წყალობით ამაში ეჭვი არ მეპარებოდა), ამიტომ უფრო მეტად, ეტყობა, ხელოვნებით გატაცებაზე, პროფესიულ მგზნებარებასა და მსგავს გაცვეთილ/მაღალფარდოვან რაღაცებზე ვწერდი. რა თქმა უნდა, ისიც ვახსენე, რომ მსოფლიოს უდიდეს მაცესტროსთან მოხვედრა მინდოდა. მაღამ ვიარდომ მიპასუხა, შემძლო მივსულიყავი და გამომცდიდა.

ჩვენც წავედით, მე და დედაჩემი დაუყოვნებლივ ბადენ-ბადენისკენ გავემართეთ. განსაზღვრულ დღეს და განსაზღვრულ საათზე ვიყავით ვიარდოს ვილაში. პირველ სართულზე სალონისკენ მიგვითითეს და ცოტა ხნით მოცდა გვთხოვეს. ახლაც თვალწინ მიდგას ფანჯარასთან, ოთახის მარჯვენა კუთხეში მდგარი პიანინო. უამრავი თარო – პარტიტურებით სავსე. კედელზე – ხელოვანთა სურათები და ფოტოგრაფიები, აივნის გამოღებულ კარში – ბალის ხედი. ბალის უკან პავილიონი – ალბათ იქ იყო ივანე ტურგენევის, მაღამ ვიარდოს დიდი ხნის მეგობრის ბინა.

ლოდინისას ჯერაც განუცდელი ჯოჯოხეთური შიში დამეუფლა, სუნთქვას რომ შეგიკრავს და გაგაწამებს. ის ხომ არ არის, რასაც სცენის ციებ-ცხელებას – le trace – ეძახიან? იმაზე ნაკლები არაა, გილიოტინაზე ასვლისას რომ ეუფლებათ! ღმერთო, მიშველე... – ამ მდგომარეობაში რომელ სიმღერაზეა საუბარი?

„დედა, – ამოვიკნავლე, – ერთ ბგერასაც კი ვერ ამოვთქვამ“.

„ბავშვივით ნუ იქცევი! ასეთი ხმის პატრონს რისი უნდა გეშინოდეს? ეს ვიარდო თავს ბედნიერად იგრძნობს, შენნაირი მოსწავლე თუ ეყოლება“.

გვერდით ოთახის კარი გაიღო და შემოვიდა ის, ვისიც მეშინოდა. სიცოცხლით სავსე, ელეგანტური ქალი, ორმოც წლამდე ან ცოტა მეტისა, არცთუ ისე ლამაზი, თუმცა საინტერესო ნაკვთებით. ერთი-ორი სიტყვით გაბაასება – საერთოდ არაფერი დამმახსოვრებია – და მივყავარ ეშაფოტზე, მინდოდა მეთქვა, პიანინოსთან.

„ნოტები თან გაქვთ? რას შემისრულებთ?“

„მე მხოლოდ გამები... სავარჯიშოები ვიცი“.

„მაგით ხმას კი შევაფასებ, მაგრამ თქვენს ნიჭსა და შესაძლებლობებს – ვერა“.

„მაშინ დუეტი ბარიტონთან ერთად „ლუჩიადან““.

„დუეტი?“

„დიახ, მოწყალეო ქალბატონო, აქამდე ჯერ არც ერთი ნაწარმოები არ შემისრულებია. მართო ეს ვიცი... შემთხვევით“.

„როგორც გენებოთ“. მაღამ ვიარდომ პარტიტურა მონახა და შესავალი დაუკრა. ყელი ერთიანად დამეხშო. კანკალი ამივარდა. ცოტა ხანში ხმა მომივიდა და რამდენიმე ტაქტის შემდეგ ჩემი თავით თვითონაც კმაყოფილი ვიყავი. დედაჩემი სულ თავს მიქნევდა – მეც მეგონა, რომ ჩემი თავი საუკეთესოდ წარვადგინე.

მაცესტრომ კი პარტიტურა შუა ტაქტში დახურა და თქვა:

„სინამდვილეში არაფერი იცით“.

ისეთი შეგრძნება მქონდა, თითქოს ლოყაში სილა გამაწნეს და მკერდში დაშნა ჩამცეს ერთდროულად.

„მოდით, ახლა ვცადოთ notes filees... რომ ვნახო, რისი გაკეთება შეიძლება ამ მასალისგან – ხმა კი არის...“

და მან დაუკრა ყველაზე დაბალი C.²¹ ეს გამოცდა თითქოს უფრო მეადვილა. თუმცა ყველაფერი მაინც ვერ წარმოვაჩინე, რაც შემეძლო – ბგერები ხრინწიანი მქონდა და სუნთქვა მოკლე. მას შემდეგ, რაც ორი ოქტავა მაღალ C.-მდე გავიარე, მაესტრო წამოდგა.

„რამდენი წლის ხართ?“

„ოცს გადავცდი“, – ნახევრად ტყუილი ვუთხარი, სინამდვილეში უკვე ოცდაო-რის ვიყავი.

„უკვე დაგვიანებულია ყველაფრის თავიდან დაწყება. ოცი წლისა უკვე განსწავლული უნდა იყოთ. მითხარით, რატომ გინდათ სცენაზე გამოსვლა? თქვენ ხომ, როგორც თქვენი გვარით ჩანს, მაღალ საზოგადოებას ეკუთვნით?“

მე რაღაც ვუპასუხე ამბიციასა და ხელოვნების სიყვარულზე.

„ყოველივე ეს ძალიან კარგია, მაგრამ მე მხოლოდ ის შემიძლია გირჩიოთ, რომ არ დათმოთ თქვენი მდგომარეობა. თქვენი ხმა ცუდი არაა, მაგრამ არც განსაკუთრებულია, და ისწავლით თუ არა რამეს, ჯერ კიდევ საკითხავია“.

„ნიჭი ნამდვილად აქვს, მაღამ, – სცადა დედაჩემმა მისი დარწმუნება, – და თქვენი ხელმძღვანელობით ნამდვილად კიდევ უფრო მეტად წარმოაჩენს თავის შესაძლებლობებს“.

„მაგრამ დღეს ვერ ვიტყვი, რამდენად ვიტვირთებ ამ ხელმძღვანელობას. ჯერ ფროილაინი ჩემთან რამდენიმე გაკვეთილზე უნდა მოვიდეს და მხოლოდ ამის შემდეგ გადავწყვეტ, რამდენად მომინდება გაგრძელება – ან ჰო იქნება, ან არა. დღევანდელი შთაბეჭდილებით ნაკლები შანსია ჰოსთვის“.

„აჰ, დღევანდელი გამოცდით ნუ შეაფასებთ, საწყალი ბავშვი ისეთი შეშინებული იყო... ველარ ვცნობ“.

„თუ შიში ახასიათებს, ხელოვანის ასპარეზისთვის არ გამოდგება – კიდევ ერთი საფუძველი უარის სათქმელად!“

„შიში გაუქრება, როგორც კი ჩვევებს გამოიმუშავებს“, – მიუგო დედაჩემმა.

„კარგი. დაე, ასე იყოს. მაშინ, მობრძანდით მომავალ ორშაბათს ამავე საათზე!“ – და გამოგვიშვეს.

დავბრუნდით სასტუმროში; იქ კი გასაქანი მივეცი ჩემს დაგუბებულ ტკივილს და ცრემლებად დავიღვარე.

„აღარასოდეს, აღარასოდეს მივალ ვიარდოს ვილაში! გავემგზავროთ აქედან,

დედა, ამ ქალს აღარასოდეს დავენახვები – მორჩა... ყველაფერი დამთავრდა!...“
ჩემი სამყარო დაინგრა, „მნიშვნელოვანი“ განადგურდა.

წელი 1866

ამ წელმა ორი მძიმე დანაკარგი განმაცდევინა: ჩემი ბიძაშვილი ელვირა და ჩემი საყვარელი უფროსი მეგობარი ფურსტენბერგი. ეს უკანასკნელი გარდაიცვალა ხანმოკლე ავადმყოფობის შემდეგ თავის ბინაში, ვენაში; კიდევ ერთი რამე მოიტანა ამ დაწყევლილმა წელიწადმა: ომი.

ძალიან მრცხვენია კიდევ ერთხელ იმის თქმა, როგორ იმოქმედა ამ მოვლენამ ჩემზე... საერთოდ არ უმოქმედია! ეს ამბავი, როგორც ამბობენ ხოლმე, ცნობად მივიღე, თითქოს გამეგოს, რომ სადღაც, შორს წყალდიდობა ან ხანძარი მომხდარა, ნამდვილი სტიქიური უბედურება, მართლაც სამწუხარო ფაქტი, მაგრამ ჩვენ რას ვუშველით?! კაცმა რომ თქვას, უინტერესო ნამდვილად არაა, ისტორიული ფაქტია. პრუსიელებს, რა თქმა უნდა, კარგად მოხვდებოდა და რომც წავაგოთ, მერე ხომ მაინც ისევ მშვიდობა დაისადგურებს. ჯარში ჩვენთვის ძვირფასი და ახლობელი ადამიანი არ გვყავდა, ამიტომაც მშვიდად ვიყავით. მე გაზეთებს არ ვკითხულობდი, უფრო ხშირად მიყვებოდნენ ხოლმე – პრუსია იმარჯვებს ჰანოვერში, ფრანკფურტში, მერე უკვე ბოჰემიაშიცო, – ბევრი რამ ჩვენს ყურამდე არც აღწევდა. ან იქნებ აღწევდა და დამავიწყდა. მთელი ამ ამბებიდან მეხსიერებაში არაფერი შემომრჩენია, რაც ამტკიცებს, თუ როგორი უმნიშვნელო იყო ყოველივე ეს ჩემთვის. დღეს მიჭირს გავიგო, როგორ შეიძლებოდა ასეთი ბრიყვი ვყოფილიყავი, რომ აღარაფერი ვთქვათ იმაზე, შემდგომ როგორი მგზნებარე პაციფისტური იდეები დამეუფლა, რომლებიც მაშინდელი ოცდასამი წლის გოგოს ცნობიერებაში, წესითა და რიგით, მთვლემარე მდგომარეობაში ხომ მაინც უნდა არსებულიყო, ამ საბაბით მაინც ხომ უნდა გამოღვიძებულიყო?! ანდა, ამხელა მოვლენას ცოტათი მაინც ხომ უნდა აველეღვებინე, რაღაც გრძნობებით ავევსე, იქნებოდა ეს პატრიოტული აღფრთოვანება თუ ადამიანური თანაგრძნობა, ან თუნდაც მხოლოდ შიში და ძრწოლა?! – მაგრამ არაფერი, სრულიად არაფერი.

ალბათ არ იყო აუცილებელი ომის წინააღმდეგ მომავალი მეგრძოლისთვის ორმაგად სამარცხვინო ფაქტის ამ მემუარებში ჩართვა, მაგრამ სწორედ ეს გამოვლენილი შეუსაბამობა მოითხოვს განმარტებას. მე მგონია, რომ მემუარების მკითხველისთვის ყველაზე საინტერესოა იმაზე დაკვირვება, თუ როგორ მზადდება და ვითარდება ამა თუ იმ ადამიანის ბედისწერა, ტალანტი თუ ქმედება, რაც მან მემუარისტის შესახებ იცის; მკითხველს სურს თვალი გაადევნოს, თუ რომელმა შინაგანმა მისწრაფებამ ან გარეგანმა ფაქტორმა მოახდინა გავლენა საერთო სურათის ჩამო-

ყალიბებაზე. აქედან ყოველთვის შეიძლება სასარგებლო ინფორმაციის ამოკითხვა და სხვისი გამოცდილებისა და ცოდნის გაზიარება, ოღონდ, რა თქმა უნდა, თუკი ავტობიოგრაფი პატიოსანია. სასარგებლო ცოდნა უტყუარ ფაქტებს უნდა ეფუძნებოდეს. რაკი თვითონ ვასაჯაროებ მაშინდელი ომის ჩემეულ განცდას, პირადად მე ამაში ვხედავ საინტერესო დაკვირვებას, საყურადღებო გაკვეთილს. მთლიანად კაცობრიობის ისტორიაში, ისევე როგორც ცალკეული პიროვნების ცხოვრებაში, ყოველთვის არის იდეების, ცოდნის, აღქმისა და შეფასების ცვლილებათა ასეთი პერიოდები. განა ბოლომდე არ უნდა მესმოდეს და უპირობოდ არ უნდა ვეგუებოდე, რომ კაცობრიობის უმეტესობა ომს (თუკი უშუალოდ მას არ შეეხება) ისევე გულგრილად, ისევე უდარდულობით ეგებება, როგორც მე შევხვდი ამას რამდენიმე ათწლეულის წინ? განა უნდა მიკვირდეს, რომ იგივე საზოგადოება ომის შემთხვევით დაწყებას ბუნებრივ მოვლენად, კანონზომიერებად აღიქვამს? ამის გამო უნდა ივიწიშო, მაგრამ არ უნდა დაგმო და არ უნდა შეებრძოლო? გარდაუვალს ვერ დაგმო, ვერ შეეწინააღმდეგები. და თუკი რომელიმე ინდივიდი (ამ შემთხვევაში მე) გამოცდილების საფუძველზე და განსჯის შედეგად შეძლებს ძირფესვიანად შეიცვალოს შეხედულებები, მაშინ კაცობრიობაც მოახერხებს ამას და შესაბამისად იმოქმედებს. დღეს, როცა სამშვიდობო მოძრაობის მიმართ გარკვეულ წრეებში ფესვგადგმულ მიუღებლობას ვაწყდები, როცა მოჰყავთ საწინააღმდეგო არგუმენტები ომის ბუნებრივი კანონზომიერებისა და ისტორიული აუცილებლობის შესახებ, როცა ბრაზი და უმწეობა ერთდროულად მიპყრობს, მაშინ უნდა დავფიქრდე ჩემს წარსულზე, რათა სიბრაზემ გამიაროს და მხნეობა მომემატოს. თანაც, ომთან და მშვიდობასთან დაკავშირებით საზოგადოება ძველებურად ხავსმოდებული იდეების ტყვეობაში აღარ არის, რადგან უკვე თითქმის ყველამ იცის ამ მოძრაობის შესახებ და ყოველდღიურად იბრდება მათი რიცხვი, ვინც ამ მიმართულებას თანაუგრძნობს ან უკვე ჩართულია კიდევ ამ მოძრაობაში. სულ უფრო მეტი ადამიანი გამოხატავს თავის პოზიციას – ან მომხრეა, ან მოწინააღმდეგე. მაგრამ იმ დროს, რომელზეც ახლა მოგითხრობთ, სამშვიდობო მოძრაობის შესახებ მართლა არავინ არაფერი იცოდა, რადგან არც არსებობდა; აქა-იქ ცალკეულ პირთა გამოჩენა, ყოველგვარ ძალადობას რომ გმობდნენ, ომის მოსპობას ქადაგებდნენ, „მოძრაობად“ ვერ იწოდებოდა.

1866 წლის ზაფხული კვლავ ჰომბურგში გავატარეთ და მიუხედავად იმისა, რომ ომი თითქმის კარს მოგვადგა, ამ კოსმოპოლიტური კურორტის ცხოვრებას არაფერი დასტყობია. საკურორტო მუსიკა უკრავდა, პატი მღეროდა, თამაშში საარაკო გამართლების შემდეგ სახელგანთქმული ესპანელი გარსია აგრძელებდა Trente-et-quarante-მაგიდასთან ყოველდღიურად ასიათასობით ფრანკის მოგებას, ვიდრე ერთ მშვენიერ დღეს წაგება არ დაიწყო, მოგებული ფული თანდათანობით მთლიანად არ დაკარგა და ზედ საკუთარიც არ მიაყოლა.

სამეგრელოს დიდი მთავრის ქვრივი კვლავ აქ იყო თავისი ოჯახით და მის

საზოგადოებაში მეც მრავალ საათს ვატარებდი ყოველდღე. მისი ქალიშვილი, პრინცესა სალომე, 18 წლის იყო, ბავშვი აღარ ეთქმოდა და ახლა უკვე მასთანაც ისეთივე აქტიური ურთიერთობა მქონდა, როგორც დედამისთან. წლოვანებით ჩვენ, გოგოები, უფრო მეტადაც ვეწყობოდით ერთმანეთს. ისე მოხდა, რომ საცხენოსნო გაკვეთილებზეც ერთად დავდიოდით და ცხენოსნობის მასწავლებლის ზედამხედველობით პარკის ხეივანში ცხენით ვსეირნობდით. თან ჭორაობაც გამოგვდიოდა და მალე გულითადი მეგობრობაც დავამყარეთ. სალომეს ზამთარში უკვე პეტერბურგში, სასახლის საზოგადოებაში გამოყვანა ელოდა – იგი იმედითა და სიხარულით აწყობდა სამომავლო გეგმებს. მე კი, პირიქით, სულ მეღანქო-ლიური და იმედგაცრუებული ვიყავი, თითქოს ცხოვრებისგან კარგს აღარაფერს მოველოდი. ორი საყვარელი არსების გარდაცვალებამ ნამდვილი მეღანქოლია შემყარა, ხოლო ხელოვნებასთან დაკავშირებული ოცნებების დამსხვრევამ ღრმა დეპრესიაში ჩამაგდო; თუმცა ამაზე არაფერს მოგიყვებით.

პარიზში ყოფნა

შემოდგომაზე შინ რომ დავბრუნდით, ომი უკვე დამთავრებული იყო. ჩვენს ბადენურ ვილაში ერთი საქსონელი ოფიცერი დაბინავებულიყო. თავაზიანი ვიზიტით გვეწვია. არა მგონია, დასრულებულ სამხედრო კამპანიაზე დიდხანს გვესაუბროს, რადგან მართო ის მახსოვს, მეორე ვიზიტისას, რომელიც ამავე დროს გამოსათხოვარიც იყო, ლეიტენანტს რაღაც ვუმღერე; ისიც კი ვიცი, ეს რა იყო; ადაჯიო დიდი არიიდან „მთვარეული“²²: Ah non crcdea... საქსონელი მეომარი აღფრთოვანდა:

„მოწყალე პატარა გრაფინია ისე მღერის, როგორც პატი!“

„ამ ახალგაზრდა ყმაწვილს კარგად ესმის ხელოვნება“, – შენიშნა დედაჩემმა, როცა ლეიტენანტი წავიდა.

„მართლა არ შეგიცვლია აზრი? – მომმართა ცოტა ხნის შემდეგ, – ისევ უარს ამბობ ხელოვანის სარბიელზე? – განა ეს გონივრულია? განა ეს გამართლებული საქციელია?“

„მაგრამ ვიარდოს შეფასება...“ – ყოყმანით ვთქვი.

„არც ვიარდოა შეუმცდარი... ისე, ცოტა ხნით მასთან რომ დარჩენილიყავი...“

„არაფრის გულისთვის აღარ დავენახვებოდი მაგ ქალს!“

„სხვა პედაგოგებიც არსებობენ. ბერანეკს უნდა ვკითხოთ“.

ჭერ ბერანეკი ჯერ კიდევ ჩვენი მდგმური იყო და, რა თქმა უნდა, მზადყოფნა გამოთქვა, სიმღერასთან დაკავშირებული გეგმების განახლებაში აგვეყოლოდა. ვოკალის პედაგოგებს შორის საუკეთესოდ დავვისახელა ვინმე ლამპერტი მილანიდან, დუპრეცი პარიზიდან და მარჩეზი ვენიდან. ვენაზე არაფრის გაგონე-

ბა არ მინდოდა, თუმცა, როგორც კი ეს დათქმა საჯაროდ გამოვხატე, შინაგანად უკვე თანახმა ვიყავი, ბადენ-ბადენში ხელის ერთი დაკვრით გაწყვეტილი ძაფი მილანში ან პარიზში კვლავ გამება. დროთა განმავლობაში მართლაც ასე გამოვიდა. გადაჭრით აღარ ვუარობდი, როცა ჩემს სახელოვნებო მომავალზე საუბრობდნენ; ბერანეკთან მეცადინეობებიც განვაახლე. კვლავ გამეღვიძა სიმღერისადმი ადრინდელი სიყვარული, ძველი ამბიციური გეგმები; ძველებური თვითრწმენაც გამიახლდა და კიდევ უფრო გამძლიერდა; ჩემში მომწიფდა გადაწყვეტილება, გულმოდგინედ მეცადინა და მერე რომელიმე სახელგანთქმულ მაესტროსთან გამეგრძელებინა სწავლა. მივწერე მაესტრო დუპრეცის პარიზში იმის საკითხავად, მიიღებდა თუ არა ამბიციურ, სწავლამოწყურებულ მოწაფეს, რაზეც თანხმობა მომივიდა, და ჩემმა ცხოვრებამ კვლავ იპოვა „მნიშვნელოვანი“.

1867 წლის დასაწყისში პარიზში გავემგზავრე.

ნებისმიერი ადამიანი, პირველად რომ მოხვდება მეტროპოლიაში – რომელზეც უამრავი რამ წაუკითხავს და მოუსმენია – წარუშლელი შთაბეჭდილებებით უნდა ივსებოდეს, მე კი ბევრი არაფერი აღმიქვამს, ისე ძლიერად იყო ჩემი გონება ამ „მნიშვნელოვანით“ დაკავებული. თვით სამეგრელოს ოჯახის, დადიანების კვლავ ნახვის შესაძლებლობაც კი დიდად არ გამხარებია – ერთადერთი, რაზეც ფიქრი შემძლო, რის გამოც შიშისა და დაძაბულობისგან მაკანკალებდა, იყო კითხვა: როგორ შეაფასებს მაესტრო დუპრეცი ჩემს ხმას, რა პროგრესს მივაღწევ და როგორ წარიმართება ჩემი, როგორც ხელოვანის კარიერა?

მაესტროს Rue Laval-ში ჰქონდა საკუთარი სახლი, სადაც მოწყობილი ჰქონდა თეატრალური დარბაზი სცენითურთ. მიმდებარედ განლაგებული იყო პატარ-პატარა სასწავლო ოთახები, სადაც მაესტრო და მისი ვაჟი, ლეონ დუპრეცი, კერძო მეცადინეობებს ატარებდნენ. ყოველ პარასკევს წარჩინებული მოწაფეები სცენაზე წარმოადგენდნენ არიებს და საოპერო სცენებს, დარბაზში ისხდნენ მათი ნათესავები, კონცერტს გარეშე ხალხიც ესწრებოდა. ეზოს მეორე მხარეს იდგა პატარა სასტუმრო, რომელსაც დუპრეცების ოჯახი – დედა, მამა, ვაჟი და რძალი – კერძო ბინად იყენებდნენ. Rue Laval-ში ჩვენი პირველი სტუმრობისას თეატრის შენობაში წაგვიყვანეს. ჯერ შედიოდი მრგვალ მოსაცდელ ოთახში, რომლის კედლებსაც საოპერო პარტიტურებით სავსე წიგნის თაროები მიუყვებოდა. მოწაფე გოგონები და ბიჭები იქვე ისხდნენ, დადიოდნენ ან ერთმანეთში საუბრობდნენ. თეატრის დარბაზშიც იჯდა ხალხი და უსმენდა ერთი მთლად ნორჩი გოგონას სიმღერას, რომელიც სახლის აკომპანიატორ მუსიე მატონთან ერთად სწავლობდა როზინას არიას. Una voce poco fa... მუსიე მატონმა მას ურთულესი კოლორატურა ჩამოუწერა; გოგონამ ისე იმღერა, თითქმის ნაპერწკლებს აფრქვევდა... ნუთუ ასეთი ვირტუოზულობა ამ სკოლაში მიიღწევა? ეს მე გამბედაობასა და მოტივაციას მმატებს, რომ ძალ-ღონე არ დავიშურო და ვიბეჯითო. ნეტავ რა განაჩენს გამომიტანს მაეს-

ტრო გამოცდის შემდეგ – ისეთივეს ხომ არა, როგორიც უღრესად მომთხოვნმა ვიარდომ გამომიტანა? გულის ფანცქალით ავუყევი სცენის კიბეებს, გავემართე მის უკან მდებარე ოთახისკენ, სადაც ჰერ დუბრეცი მელოდებოდა. შემეგება, სა-
მოცდაათს ბევრად გადაცილებული, მაგრამ მხნე და ყოჩაღი კეთილი მოხუცი ბა-
ტონი – თეთრი ხვეული თმით, წითელი ლოყებითა და მოცინარი თვალებით.

„მაშ, თქვენ მომწერეთ ენთუზიაზმით აღსავსე წერილი, მადმუაზელ? ან დი-
დი ვინმე გინდათ გამოხვიდეთ ან საერთოდ არავინ? მაშ, მოვისმინოთ, როგორ
ჟღერს თქვენი ხმა! საინტერესოა, ნოტების კითხვა თუ შეგიძლიათ“.

მომაწოდა მის მიერ შედგენილი სოლფეჯიოების ნაკრები და მიუჯდა პიანინოს.
გამოცდამ ამჯერად მშვიდობიანად ჩაიარა:

„მშვენიერი ხმაა – თქვენგან რაღაცას გამოვიყვან – ორ წელიწადში première
force²³ იქნებით“.

ბედნიერი ვიყავი, ძალიან ბედნიერი. გაკვეთილები დამინიშნა. კვირაში ორჯერ
უნდა მქონოდა მეცადინეობა. ეს ჩემთვის საკმარისი არ იყო:

„ყოველდღე მინდა ვიარო, მანესტრო“.

„შეგიძლიათ კიდევ; სხვა დღეებში ჩემი ვაჟი ან მუსიე მატონი გაივლის თქვენ-
თან რეპეტიციას. მე კი მხოლოდ ორი საათი შემიძლია კვირაში გამოვიყოთ, ეს
სავსებით საკმარისია“.

დავიქირავეთ პატარა ბინა Rue Laval-ში და ასე დაიწყო ჩემთვის ამაღელვე-
ბელი და იმედებით აღსავსე სწავლის პერიოდი. ყოველ დილას ვატარებდი დუბ-
რეცის სასტუმროს თეატრალურ ფლიგელში – დედაჩემი სულ თან მახლდა, რაც
სკოლის სხვა სტუმრებს მუდამ მოსაწყენ და სრულიად ზედმეტ მოწადინებად ეჩ-
ვენებოდათ. მთელი არსებით გადავეშვი – დო, რე, მი-ს ვარჯიშსა და მანესტროს
შერჩეული პატარა არიის შესწავლაში, რომელიც მან პირველი ტექსტის სახით
შესასწავლად მომცა. განსაკუთრებულად მაინტერესებდა სწავლების სხვადასხვა
საფეხურზე მყოფი ჩემი ამხანაგები, უდიდეს სიამოვნებას მანიჭებდა პარასკევის
წარმოდგენები, მით უმეტეს, რომ მე ჯერ არ მქონდა მასში მონაწილეობა მიღე-
ბული. იმაზე ფიქრი, რომ მოგვიანებით იქ, ზევით, სიმღერა მეც მომიწევდა, ჩემ-
თვის იყო სატანჯველი – მეშინოდა, რომ კვლავ შიშის შეტევა დამემართებოდა
და ტაშს არავინ დამიკრავდა. თუმცა ეს საკმაო ხნის შემდეგ მოხდა. ჯერჯერო-
ბით მხოლოდ სწავლაში ვიყავი ჩაფლული და ეს სიხარულს მანიჭებდა. საჯარო
წარმოდგენებში მანესტროს ისეთი მოწაფეებიც მონაწილეობდნენ, რომლებიც უკ-
ვე თეატრებში მუშაობდნენ და სახელმოხვეჭილნიც იყვნენ: ტენორი ენგელი (ან-
ჯელს ეძახდნენ), ფროილან მარიმონი, შანტო ლეგალი პარიზის კომიკური ოპე-
რიდან და ჟან დევლიე ბრიუსელიდან – სამივენი უმაღლესი რანგის არტისტები
იყვნენ. ბოლოს დასახელებულის უმცროს დას, ფიდე დევლიეს, სწავლა სულ ახ-
ლახან დაეწყო და, მთელი კლასის გასაოცრად, უკვე მანესტროს საყვარელი მოწა-

ფე გამხდარიყო. მისი დაუფარავად მშურდა. ნახატივით ლამაზი იყო – ამას კიდევ ვაპატიებდი, მაგრამ მისი ასაკი – თექვსმეტი წელი ჩემს ოცდასამს ამუნათებდა; თან ელვისებურ წარმატებას მიაღწია – სულ ცოტა ხნის მოსული, უკვე ვირტუოზულად მღეროდა და იოტისოდენა შიშსაც კი არ ამჟღავნებდა. მოგვიანებით პარიზის გრანდ-ოპერაში აიყვანეს, სადაც წარმოუდგენლად წარმატებული დებიუტი ჰქონდა ოფელიას როლში. თავად ვიყავი მოწმე, როგორი სიმსუბუქით სწავლობდა ეს ნორჩი ფიდე ურთულეს კოლორატურებს, როგორი თავდაჯერებით კითხულობდა ფურცლიდან, რა უნიკალურად და განსაცვიფრებლად ჟღერდა მისი ხმა, რა თავისუფლად და თავდაჯერებულად მოძრაობდა სკოლის სცენაზე, მუდამ მოწაფეებისა და მასწავლებლების ტაშით გამხნევებული; ამის შემხედვარემ ჩემს თავს ვუთხარი: ეს არის ტალანტი, განსაკუთრებული ნიჭი, სწორედ ის „რალაც“, რაც პატივმოყვარეობისა და სიბეჯითის მიღმაა, რასაც ვერ მოიპოვებ, რაც იმთავითვე უნდა გქონდეს და რაც მე არ გამაჩნია...

სამეგრელოს დედოფალთან ხშირად დავდიოდი. მისთვის ჩემი არტისტობის განზრახვასა და გეგმებზე არაფერი მითქვამს. მას სჯეროდა, რომ Contessina პარიზში იმიტომ ჩამოვიდა, რომ მასთან და მის ქალიშვილთან ერთად ყოფილიყო. ყველა მიღებასა თუ წვეულებაზე მეპატიჟებოდა. თავის მრავალრიცხოვან ოჯახთან ერთად სასტუმრო du Louvre-ს ერთი ფლიგელი ეკავა, ცალკე სამანქანო შესასვლელითა და სადარბაზოთი. მისაღები ოთახების გაყოფებაზე და, განსაკუთრებით კი ყვავილებითა და ფაიფურის პატარა ფიგურებით სავსე სალონში, სადაც დედოფალი დიდ დროს ატარებდა, კვლავ რუსული სიგარეტისა და ფორთოხლის ყვავილების სურნელი იდგა. თითქოს წარსულში, ჰომბურგის ვილა ვეკერლინში დავბრუნდი, სადაც თავს საყვარელი ადამიანისგან უარყოფილად ვგრძნობდი და გამახსენდა, როგორ ვოცნებობდი ქართველ უფლისწულზე. მოვიკითხე, სად არის-მეთქი.

„რაო? მისი ხატება ისევ გულში გაქვთ, პატარა კონტესინა? აბა, ჩამოვა ამ დღეებში პარიზში... და ეგ თუ არა, აუცილებლად მოგიძებნით სხვა საქმროს, უკვე კარგი დროა შენ დასაქორწინებლად – ოცდასამი წელი – ეს ხომ თითქმის შინაბერობაა. ჩემს სალომეს იქამდე გავათხოვებ, ვიდრე ოცის გახდება. – რა სამწუხაროა, ჩემო საყვარელო, მნიშვნელოვანი Dot²⁴ რომ არ გაქვთ. აქ, პარიზში ეს ყველაზე მთავარია. მხოლოდ სილამაზე და ეშხი არ კმარა. სალომე მიიღებს 50-ათასიან შემოსავლს, თავისი ძმა ნიკო აჩუქებს, და ეს გაადვილებს მისთვის კარგი პარტიის მონახვას. უკვე შერჩეულიც მყავს ერთი, იმპერატორის ოჯახის წევრია“.

„რუსეთის?“

„არა, საფრანგეთის“.

დედოფალი და მისი ქალიშვილი იმპერატრისა ეუჟენიის არც ერთ petits lundjs²⁵-ს არ აკლდებოდნენ და სწორედ იმპერატრისამ შეიმუშავა სალომეს გათ-

ხოვების გეგმა. დედოფალი ჯერ მხოლოდ მიანიშნებდა, უფრო მეტის თქმა ჯერჯერობით არ უნდოდა და სალომესაც რომ ვკითხე, იმანაც არაფერი ვიცო.

მომდევნო ზაფხულს – მეგრული ოჯახი უკვე კვლავ გერმანულ წყლებზე იყო წასული – დუპრეცების მამულში გავემგზავრეთ, რათა პარიზში შეწყვეტილი მეცადინეობა იქ გაგვეგრძელებინა. ოქტომბერში ქალაქს დავუბრუნდით და მეგრულმა ოჯახმაც ისევ სასტუმრო du Louvre-ს აპარტამენტები დაიკავა. წინა წლების მსგავსი ცხოვრება განმეორდა: შემოქმედებითი ინტერესები და სიამოვნებანი Rue Laval-ში, დახვეწილი ინტერესები და სიამოვნებანი ჩემს აზიელ მეგობრებთან.

ერთ დღეს, ზაფხულის მიწურულს, პრინცესა სალომესგან მივიღე დეპეშა: „გაიზიარეთ ჩემი ბედნიერება: სწორედ ახლა დავინიშნე პრინც აშილ მიურატზე“.

მერე მიაბმეს, ეს როგორ მოხდა. ჯერ კიდევ წინა ზამთარში იმპერატრისა ეუჟენიასა და კნენა ეკატერინას მიერ თვალში ამოღებული საქმე ამ ბოლო კვირაში გარემოებათა წყალობით ბოლომდე მისულა. იმპერატორმა თავად იკისრა თავისი ძმისწულისთვის ყოველწლიურად ორმოცდაათი ათასი ფრანკი აპანაჟის გაღება, რაც პატარძლის ამავე რაოდენობის შემოსავალთან ერთად შესანიშნავ ჰარმონიას ქმნიდა; იმპერატორმა იკისრა ასევე მოგვიანებით მისი ვალების გადახდაც... ეს ახალგაზრდა მამაკაცი რომ პარიზის ერთ-ერთი ყველაზე მფლანგველი დარდიმანდი იყო, მთელმა ქალაქმა იცოდა. არც ის იყო საიდუმლო, იმ დროს ასე პოპულარული „მშვენიერი ჰელენას“, იმავე ჰორტენზია შრაიდერის ბრილიანტებს შორის პრინც აშილ მიურატის ნაჩუქარიც რომ ერია. პრინცი მაღალი საზოგადოების ახალგაზრდებს შორის ერთ-ერთ ულამაზეს წარმომადგენლად მიაჩნდათ. პრინც ლუსიენისა და ამერიკელი ქალის შთამომავალი მთელი თავისი ჰაბიტუსით, აქცენტითა და თავისი ღია ფერებით ნამდვილ ინგლისელს ჰგავდა. ყოველივე ამის შესახებ ჭორად ნიშნობამდეც მსმენოდა. პატარძალს სურდა, პეტერბურგელი და პარიზელი ნაცნობებისთვის რაც შეიძლება სწრაფად ეცნობებინა თავისი ბედნიერების ამბავი და მთხოვა, კონვერტებზე მისამართების დაწერაში დამეხმარეო. მთელი გულით ხარობდა და მართლაც უსაზღვროდ ბედნიერი იყო. მართალია, ეს ქორწინება მთლიანად ორივე მხარის ნათესავებმა მოაგვარეს და საპატარძლოს საქმრო სამ-ოთხჯერ თუ ჰყავდა ნანახი, მაგრამ ასეთ წრეებში, კერძოდ საფრანგეთში, ეს არავის აკვირვებდა – ქორწინება სწორედ ასე ხდებოდა. საქმროს თვალისმომჭრელ გარეგნობას მისი გული მაშინვე მოენადირებინა. მართლა შეჰყვარებოდა ეს ახალგაზრდა მამაკაცი და მთელი გულით უხაროდა, „პრინცესა აშილ მიურატი“ გავხდებო. ახლა ერთი საინტერესო საქმე იყო კიდევ მოსაგვარებელი – Trosseau²⁶-ს შედგენა, ელისეს უბანში პატარა სასახლის მოწყობაზე თვალყურის მიდევნება და საქმროს საჩუქრების მიღება-დაბინავება. სალომეს პირველი სამკაული Diamantenriviere²⁷ დედამ აჩუქა, ხოლო მარგალიტის სამაჯური საქმრომ მიართვა დიდი პატივით. ასე რომ, საპატარძლოს

უკვე ჰქონდა „ბრილიანტები და თვალ-მარგალიტი ულევო“, როგორც ძველ სიმღერაშია, ლამაზი თვალებიც, ორმაგი თავადობის გვირგვინი, ასე ათასი ფრანკი ყოველწლიური შემოსავალი, ცხრამეტი წელი და, რაც მთავარია, ჰყავდა მოხდენილი მეუღლე: „საყვარელო, მეტი რაღა გინდა?“ ეს მაშინ მეც მიწიერი ბედნიერების მწვერვალად მესახებოდა და ჩემს მეგობართან ერთად სულითა და გულით ვხარობდი. გვიან, გაცილებით გვიან გავაცნობიერე, რომ არსებობს „ბევრად მეტი რამ“, არსებობს ნამდვილი ბედნიერება, რომელიც თავისი შინაგანი ბუნებით სრულიად უბრალო პირობებში ყველანაირ გარეგნულ კეთილდღეობას გადაწონის, ყოველგვარ სიმდიდრეს შეგიცვლის. ოჰ, ჩემო უსახელო ქორწინების ბედნიერებავ... მაგრამ არ გავუსწრებ მოვლენებს.

1868 წლის მაისის პირველ დღეებში გადავიხადეთ ქორწილი, რომელსაც წინ სამი ნიშნობა უძღოდა: ჯერ იყო სამოქალაქო ნიშნობა მერიასი, მერე – ნიშნობა კათოლიკური წესით ტიუილრიში საიმპერატორო წყვილის თანდასწრებით, და იმავე საღამოს, 9 საათზე, ბერძნულ ეკლესიაში – მართლმადიდებლური წესით. ამ ბოლო ცერემონიაში მეც მივიღე მონაწილეობა, როგორც პირველმა ხელისმომკიდემ. ჩემს მოვალეობას წარმოადგენდა, მთელი ჯვრისწერის ცერემონიის დროს პატარძლის თავზე გვირგვინი მტეროდა. საზეიმოდ გამოწყობილმა საზოგადოებამ შეავსო გადაბრდღვიალებული, ყვავილებით მორთული სამლოცველო. ქალბატონთა ტუალეტი უაღრესად მდიდრული იყო. პატარძლის შლეიფზე, რომელიც საგანგებოდ ბრიუსელში დამზადდა, ამოქარგული იყო საოჯახო გერბი – ოქროს საწმისი. ფატა ეშვებოდა ბრილიანტის დიადემიდან, რომელიც იმპერატრისა ეუჟენიას საჩუქარი იყო. პატარძლის დედა ორდენით და ორდენების ლენით იყო მორთული. აქ გამოფენილ განძეულობაში ყველაზე მეტად თვალში მომხვდა ისტორიული ზურმუხტის სამკაული, რომელიც სიძის დას, სახელგანთქმულ და მშვენიერ ანა მიურატს, ჰერცოგ მუში-ნოაის მეუღლეს ამ ღირსშესანიშნავი მოვლენის აღსანიშნავად გაეკეთებინა. ეს ტუალეტი და მორთულობა მეხსიერებაში ასე ღრმად რომ ჩამრჩა, დღესაც რომ თვალწინ მიდგას, ცოტა სირცხვილი ხომ არ არის? ის კი არადა, იმასაც ვაღიარებ, რომ მახსოვს, თავად მე რა მეცვა: უორთსის მიერ დამზადებული თეთრი ტიულის კაბა ვარდისფერი აბრეშუმის სარჩულით, მორთული უამრავი პატარა რუშით, რომლებიც წელიდან იწყებოდა და შლეიფით მთავრდებოდა... იმედია, ასეთ მნიშვნელოვან და საზეიმო საათებში, როცა ჩემი მეგობარი საკურთხეველთან იდგა, რათა ახალი ბედისგან წყალობა მიეღო, მე სხვა რაღაცებზე ვფიქრობდი და არა მართო უამრავ რუშსა თუ არშიაზე; მაგრამ ფაქტს ვერსად გავექცევი: ახლაც ვხედავ, თუ როგორ ბზინავს ტიულის თეთრი კაბა ვარდისფრად და როგორ ეშვება რუშების წყება ჩანჩქერებად.

ახალგაზრდა წყვილი რამდენიმე კვირით ჯერ მუშის (Mouchy) ჰერცოგთა საგ-

ვარეულო ციხესიმაგრეში გაემგზავრა, ზაფხულის დანარჩენი დროის გატარებას კი ბადენ-ბადენში აპირებდა. ამიტომ მეც დავიყოლიე დედაჩემი ბადენ-ბადენში წასვლაზე. დუპრეცის სკოლაში მუსიკის გაკვეთილებზე ბოლო დროს გული ამიცრუვდა; თანდათან ვხვდებოდი, რომ ისე დიდი ტალანტით დაჯილდოებული არ ვიყავი, როგორც მეგონა, და ვიმედოვნებდი, ბრწყინვალე მეგობრის წრეში ტრიალი ჩემს ბედს სხვა, უფრო ილბლიან მიმართულებას მისცემდა. დედაჩემსაც ალბათ იგივე იმედი უტრიალებდა, ან კიდევ კვლავ Trente-et quarante²⁸-ბანქოს მიენდო, რათა კიდევ ერთხელ დარწმუნებულიყო, ჰქონდა თუ არა შერჩენილი გამოცნობის უნარი; მოკლედ, ბადენ-ბადენში გავემგზავრეთ.

სეზონი ბადენ-ბადენში

ბინა ვიქირავეთ დიდ, კურზალის მოპირდაპირედ მდებარე ვილა მესმერში,²⁹ სადაც დედოფალი ავგუსტა პრუსიელი³⁰ კურორტზე ყოველწლიური სტუმრობისას ჩერდებოდა ხოლმე. რამდენიმე კვირაში აპირებდა ჩამოსვლას და მანამდე მისი აპარტამენტების ნაწილი ჩვენ დაგვითმეს, მათ შორის დიდი სალონიც, რომლის ფანჯრებიც კურპარკში გადიოდა. მოუთმენლად ველოდი მიურატების გამოჩენას, რომელთაც ბინა ვილა სტეფანიაში უკვე დაეჯავშნათ. საინტერესო ცხოვრება ხომ მაშინ დაიწყებოდა, როცა ჩემი მეგობრები ჩამოვიდოდნენ. ამ პერიოდში გავიცანი ერთი სანდომიანი ქალბატონი, ბარონესა სოტერი (Seutter), რომელიც ბადენ-ბადენში ცხოვრობდა; მას ძალიან შეეუყვარდი და ხშირად მეპატიჟებოდა თავის სახლში, სადაც ადგილობრივი ბადენური საზოგადოება ტრიალებდა.

ერთ დღეს მივიღე სამუშაო ცნობა, რომ მიურატების ახალგაზრდა წყვილმა გეგმები შეცვალა — ისინი ამ ზაფხულს ბადენ-ბადენში აღარ ჩამოვიდოდნენ. ბინის ჯავშანი ვილა სტეფანიაში გაუქმდა, ჩვენც უნდა დაგვეტოვებინა ვილა მესმერი, რადგან დედოფალ ავგუსტას ჩამოსვლას ელოდნენ. წესით, შინ უნდა დავბრუნებულიყავით, რადგან ჩვენი აქ ჩამოსვლის მიზანი ხომ მიურატებთან ერთად ყოფნა იყო. მიუხედავად ამისა, მაინც ვარჩიეთ ერთხანს კიდევ დავრჩენილიყავით.

ჯერ დედოფალი ავგუსტა ჩამოვიდა, მალევე ხანში შესული მეფე ვილჰელმ პირველიც ეწვია ბადენ-ბადენს; იგი დაახლოებით ერთი კვირით აპირებდა აქ დარჩენას. ჩვენი ფანჯრებიდან შეგვეძლო დაგვენახა ვილის მთავარი ფლიგელი და მეფის სამუშაო ოთახი. მეფე ყოველ დილით იჯდა საწერ მაგიდასთან, რომელიც ფანჯარასთან ახლოს იდგა; ასე ვუყურებდით, როგორ მუშაობდა.

1866 წლის გამარჯვებული აუცილებლად ახლოს უნდა მენახა და პირადად გამეცნო. ისე, მე, როგორც ავსტრიელი, წესით, ჩვენს მძლეველზე გაბრაზებული უნდა ვყოფილიყავი, მაგრამ ვალიარებ, რომ ამის მსგავსს არაფერს ვგრძნობ-

დი – მხოლოდ უდიდეს პატივისცემას სწორედ ამ გამარჯვებულის მიმართ. ცნება „ბრძოლის მომგები“, „მიწების დამპყრობი“, ჯერ კიდევ ისტორიის გაკვეთილებიდან, ყველაზე დიადის, ყველაზე პატივსაცემის იდეალად მესახებოდა. ვილაცა ხომ უნდა დამარცხებულიყო, რომ სხვა გამარჯვებული ყოფილიყო. ის, რომ ახლა შემთხვევით ჩემი მშობლიური ქვეყანა დამარცხდა, ეს გარემოება მეფისადმი კეთილგანწყობას ვერ შემმატებდა – ასე ეგოისტი და უსამართლოც ვერ ვიქნებოდი. საერთოდ, ხანდაზმული მეფე ცნობილი იყო საოცარი თავაზიანობითა და კეთილშობილებით – მოკლედ, მის წინაშე პატრიოტული ბოლმით თავგამოდებას არ ვაპირებდი.

ფრაუ ფონ ზოიტერმა ერთ საღამოს თავის ლოჟაში იტალიური ოპერის წარმოდგენაზე დამპატიჟა. ვერ ვიხსენებ, ზუსტად რა იდგმებოდა. მარტო ის ვიცი, რომ დიდი ჰერცოგის ლოჟის გვერდით ვისხედით და იქ მეფე ვილჰელმი იჯდა. იგი ფრაუ ზოიტნერს თავის დაკვრით მიესალმა, მერე კი ხშირ-ხშირად გადმოგვხედავდა ხოლმე. მეორე დღეს ბარონესამ დამპატიჟა დილის სპექტაკლზე ვიარდოს სახლში – იქ ყოველთვის სასიამოვნო პუბლიკა იკრიბებოდა; ამაზე ვერ დამითანხმა – მაღამ ვიარდოს ვერ დავენახებოდი. ნაშუადღევს ფრაუ ზოიტნერი მომიყვა, რომ დილის წარმოდგენას ბრწყინვალედ ჩაუვლია, პრუსიის მეფეც დასწრებიან და ჩემზე უკითხავს, ვინაა ის ყმაწვილი ქალი, გუშინ ოპერაში რომ გახლდათო. მგონი ვიცანი, ჩემი მეზობელია, ფანჯარაში ხშირად ვხედავო.

რამდენიმე დღის მერე მეფე კვლავ ვნახე წვეულებაზე, რომელიც მაღალი საზოგადოების ერთ-ერთმა ცნობილმა ქალბატონმა – სამწუხაროდ, სახელი არ მახსენდება – მის პატივსაცემად გამართა. იქ ცოცხალი სურათებიც დადგეს. საღამოზე ფრაუ ზოიტნერმა მონარქთან წარმადგინა.

„ოჰ, – წამოიძახა მან და ხელი ღიმღილით გამომიწოდა, – ჩვენ ხომ ერთმანეთს დიდი ხანია ვიცნობთ – ფანჯრიდან“.

ამის მერე, არცთუ იშვიათად, პარკში ნაშუადღევს მუსიკის დროს, მეფე სხვა სტუმრებს შორის კურზალის წინ აქეთ-იქით სეირნობისას გამომელაპარაკებოდა ხოლმე; ასე გვერდიგვერდ ვსეირნობდით და ვსაუბრობდით. იმ დროს დღიურებს არ ვაწარმოებდი და ამიტომ ამ საუბრის შინაარსს ველარ აღვადგენ. მარტო ის მაგონდება, რომ ფოტოსურათი ვთხოვე და მისგან გამოგზავნილი, მეგობრული წარწერით დამშვენებული გადმომცეს. ჩემი სურათიც მიწოდდა გადამეცა, მაგრამ არ მოეწონა, ცუდად გამოსულხართო, და სხვა მომთხოვა. რამდენიმე დღეში ბადენ-ბადენიდან გაემგზავრა. სწორედ იმ დილას გავუგზავნე მოთხოვნილი ფოტო და წერილიც დავურთე. რა ეწერა ბარათში, უკვე აღარ მახსოვს, მაგრამ რაღაცას ვწერდი დაპყრობის შესახებ – ალბათ, 1866 წელს ვგულისხმობდი. მეფის საპასუხო გზავნილი კი დღემდე მაქვს შენახული. შიკრიკმა ხელიდან ხელში ზუსტად იმ დროს გადმომცა, როცა ბარონესა ზოიტნერსა და სხვა ქალბატონებთან ერთად

სადგურზე წასასვლელად ვემზადებოდი, რათა მიმავალი მეფისთვის ყვავილები გადამეცა. აი, აქ მომყავს იმ ხელნაწერის ასლი:

ბადენი, 23.10.1868

ბუსტად ახლა მივიღე ოდნავ უკეთესი ფოტოსურათი, მოწყალეო გრაფინია, ვიდრე გუშინ ინებეთ, გამომდინარე თქვენი გულკეთილობიდან. ამავე დროს, მინდა გამოვხატო ჩემი გულწრფელი მადლობა პირადად თქვენდამი და კიდევ უფრო მეტად იმ სტრიქონებისადმი, რომლებიც ამ ფოტოგრაფიას დაურთეთ. როგორც ჩანს, დაპყრობის პუნქტში ერთი შეცდომა გაიპარა: თქვენ ნამდვილად იმის თქმა გსურდათ, რომ ერთი გამარჯვება უკვე მოიპოვეთ – და ეს შესანიშნავად იცით – კერძოდ, დაიპყრით 72 წლის მოხუცი, რომლის სენტიმენტებიც ხშირად დაუფარავია, მით უმეტეს, როცა ისინი ვიზავისგან – თუნდაც უიშვიათესად – მხარდაჭერილია!

მომავალში თქვენი მოგონების მსურველი,
დავშთები მარად თქვენს ერთგულად,
ვილჰელმ რექსი

კვლავ პარიზი

ბადენ-ბადენის სეზონი დასასრულს უახლოვდებოდა. პრინცესა მიურატისგან წერილი მივიღე – რახან ბაფხულის გეგმები წყალში ჩაგვეყარა, აჯობებს დამდეგი ზამთარი პარიზში გაატაროთ, სადაც გაცდენილსაც ავინაზღაურებთ და მეც ბევრ რამეში მონაწილეობის შესაძლებლობა მომეცემაო. ჩვენც ვისარგებლეთ ამ მოწოდებით და ბადენ-ბადენიდან პარიზში დავბრუნდით.

დუპრეცის სკოლაში მეცადინეობის განახლება აღარ მინდოდა. სიმღერა ჩემთვის აღარ იყო „მნიშვნელოვანი“. რადგან დავკარგე რწმენა იმისა, რომ ჩემი ნიჭი ხელოვნების ოლიმპზე ამიყვანდა, ამიტომაც მის საჯარო გამოყენებაზე უარი ვთქვი. მომავალში მხოლოდ ჩემი სიამოვნებისთვის თუ ვიმღერებდი. გონება ახლა უფრო მეტად მიმართული იყო „დიდი სამყაროსკენ“. ურთიერთობა ყველა ამ თავადურ, საიმპერატორო და სამეფო უდიდებულესობასთან, ეტყობა, თავში ამივარდა. მოწიფულობაში გაჩენილ დემოკრატიულ განწყობას, როგორც ჩანს, ჯერ ისევ ეძინა.

ბადენ-ბადენში ყოფნის ბოლო პერიოდში გამაცნეს ახალგაზრდა, ძალზე ახალგაზრდა მამაკაცი, რომელიც დაუფარავად გამოხატავდა ჩემდამი თაყვანისცემას, ყოველდღე მიგზავნიდა ყვავილების თაიგულს. იგი იყო ინგლისელი, დაბადებული ავსტრალიაში, სადაც მამამისს, როგორც ამბობდნენ, ენით აღუწერელი ქონება ჰქონდა. მე არც კი მიფიქრია ამ მშვენიერ ჭაბუკზე, რომელიც მხოლოდ 18 თუ 19 წლის იქნებოდა და ამიტომ ოცდახუთი წლის ქალის საქმროდ ვერ მოიხზებოდა;

ერთ მშვენიერ დღეს ჩვენს პარიზულ ბინაში გვესტუმრა და გვთხოვა, ნება მომეცით წარმოგიდგინოთ მამაჩემი, რომელიც მეღბურნიდან საგანგებოდ თქვენ გასაცნობად ჩამოვიდაო. ჩვენც დავთანხმდით და მეორე დღეს სტუმრად გვეწვია მოხუცი, დაუძლურებული ბატონი, რომელიც ვიწრო ხის კიბეებზე ამოიყვანეს.

„ძვირფასო ქალბატონებო, მინდა მიუკიბ-მოუკიბავად მოგახსენოთ, რამ მომიყვანა თქვენთან. სავარაუდოდ, დიდი ხნის სიცოცხლე აღარ მიწერია; ერთადერთი ვაჟი მყავს, მინდა ბედნიერი და უზრუნველყოფილი დავტოვო. მართალია, დასაქორწინებლად ჯერ კიდევ ძალიან ახალგაზრდაა – ჯერ მხოლოდ ოცი წლისა, მაგრამ ჩვენთან ადრეული ქორწინება ჩვეულებრივი ამბავია. თქვენ, my dear young lady, მას მგზნებარედ შეუყვარდით და მთხოვა თქვენი ხელი მეთხოვა, რასაც ახლა საზეიმოდ ვაკეთებ. ასეთი ხანმოკლე ნაცნობობის შემდეგ ამას ალბათ არცთუ შესაფერის ქმედებად მიიჩნევთ, მაგრამ, ჯერ ერთი, ამდენი დრო არა მაქვს, ნებისმიერ წუთს შეიძლება „გამომიძახონ“, და მეორეც, იმდენი რამ მაქვს შემოსათავაზებელი, რომ გაუზვიადებლადაც შემიძლია წარმოგიდგინოთ თავი. მე ვარ ავსტრალიის უმდიდრესი ადამიანი. მეღბურნში ბევრ სხვა ქონებასთან ერთად მთელს ქუჩასაც ვფლობ. ჩემი ვაჟი არის მემკვიდრე ამ ყველაფრისა – თუმცა ჩემს სიცოცხლეშიც მზად ვარ, ისიც და ჩემი რძალიც მეფურად უზრუნველვყო. ადგილის არჩევა, სადაც დავასახლებ, ჩემს რძალზეა. ყოველი შემთხვევისთვის უკვე ვიყიდე სასტუმრო პარიზში. თქვენ ასევე შეგიძლიათ გაიკითხოთ ჩვენ შესახებ. მიმართეთ როტშილდების სახლს, რომლის საკრედიტო ბარათებითაც ვსარგებლობ. ახლა გთხოვთ, პასუხის გაცემამდე ერთი კვირა დაიცადოთ და ამ დროის განმავლობაში ჩემს ვაჟს უფლება მისცეთ, ყოველდღიურად საღამოს რამდენიმე საათი თქვენს სახლში გაატაროს, რათა ახალგაზრდებმა ერთმანეთი გაიცნონ. მე თვითონ საკმაოდ ავადმყოფი ვარ საიმისოდ, რომ კიდევ შევძლო მოსვლა“.

ამ მშვენიერი გამოსვლის მერე, რაზეც მე ვერაფერი ვუპასუხე, ხოლო დედაჩემმა მხოლოდ რამდენიმე სიტყვის თქმა მოახერხა და „სიურპრიზი“ თუ „დაფიქრება“ ახსენა, მოხუცი ბატონი წავიდა და გაოგნებულები დავტოვა. იმავე საღამოს ყველაფერი ჩემს მეგობარსა და მის მეუღლეს ვუამბე.

„რამხელა ბედნიერებაა, კონტესინა! ეს ხელიდან არ უნდა გაუშვათ...“

მე ცოტათი გავაპროტესტე: „ჰო მაგრამ, საერთოდ არ ვიცნობ ამ ყმაწვილს, არ მიყვარს, თან ბევრად უფროსი ვარ...“

მაგრამ ეს მიზეზები ჩემმა მეგობარმა არ მიიღო. განსაკუთრებით პრინცი აშლი იღებდა თავს. მთავაზობდა, რომ მზად იყო გაეკითხა და თავისი უძრავი ქონების აგენტის, ჯონ არტურის მეშვეობით ჩვენთვის დიდებული სასახლე ეყიდინებინა. თუნდაც ამ ყმაწვილს არისტოკრატიული გვარი არ ჰქონოდა – მე ხომ მქონდა და ეს მილიონები, ამდენი მილიონი ხომ დღეს ყველა სახელსა და ტიტულზე უფრო მნიშვნელოვანი იყო! ყოველივე სასიამოვნოდ მოსასმენი იყო. დედაჩემსაც

გამართლებად მიაჩნდა ეს ამბავი; ყმაწვილიც ელეგენტური ჩანდა და აშკარად ეტყობოდა, რომ ნამდვილად მალმერთებდა. მოკლედ: „თანხმობა“ ვთქვით.

მამამისი ისევ გამოჩნდა და სასეირნოდ დაგვპატიჟა, რამაც ნამდვილი ათას ერთი ღამის ხასიათზე დამაყენა. გავუყევით შანზ-ელიზეს, სადაც ოთხი თუ ხუთი დიდებული სასახლე იყიდებოდა და მათგან ერთ-ერთი უნდა ამომერჩია. არჩევანი შევაჩერე Hotel Paix-ზე, ნამდვილ განძეულის ზარდახშაზე, რომელიც გრაფმა ჰენკელ-დონერსმარკმა მშვენიერი მადამ პალვასთვის ააშენა. შანზ-ელიზეს მინდვრებიდან წავედით Rue de la Paix-კენ. დიდი ოქროულობის მაღაზიის წინ ჩემმა მომავალმა მამამთილმა გაჩერება ბრძანა. მისი მსახური მიეხმარა ეტლიდან გადმოსვლასა და მაღაზიაში შესვლაში, სადაც სავარძელი მიაგებეს. ჩვენც იქვე დავდექით. მან ბრძანა, ყველაზე ღამაში სამკაული ეჩვენებინათ, რაც კი ჰქონდათ. იუველირმაც მაშინვე გამოიტანა და წარმოგვიდგინა თავისი დიდებული განძეული. თავახდილი ხავერდის კოლოფებიდან გადმომეფრქვა ათასფრად აელვარებული უმაღლესი სინჯის ბრილიანტების ბზინვარება და ბარდისხელა მარგალიტების დაბურული ციალი.

„რამდენად ძვირფასია ეს ყელსაბამი, რა ღირს?“ – იკითხა ავსტრალიელმა.

„ორასი ათასი ფრანკი“, – იყო პასუხი.

მერე მე მომიბრუნდა: „მოგწონთ?“

დიახ, მომწონდა. ამის მერე მარგალიტის კოლიეს დასწვდა.

„ცუდი არ არის“, – თქვა მან, – „მაგრამ მხოლოდ სამ რიგადაა. არ შეიძლება, ხუთ რიგად იყოს?“

„ამავე სიდიდის? ასე გაძნელებდა“.

„კარგი, დღეს ნუ მივიღებთ გადაწყვეტილებას“, – თქვა მოხუცმა ბატონმა და მაღაზიიდან გამოვედით.

„სხვა ოქრომჭედლებთანაც ვნახოთ“, – გვითხრა, როცა ეტლში ავედით, – „მაგრამ დღეს არა. თქვენი გემოვნება უკვე ვიცი. სხვათა შორის, ავსტრალიიდან ჩამოვითანე ქვები, ამათზე ბევრად უფრო დიდი და ღამაში – დიადემას ავაწყობინებ“.

დღესაც კი სიხარულს მგვრის ამ პარიზული გასეირნების გახსენება. მაშინ ისეთი შეგრძნებები გამოვცადე, როგორიც მხოლოდ რამდენიმე ადამიანს თუ რგებია; სახელდობრ, გაცნობიერება იმისა, რომ აურიცხავ სიმდიდრეს ფლობ – საკმარისია ხელი აიქნო, რომ მიიღებ ყველაფერს, რაც ფულზე იყიდება. პირველ ხანებში ამას თრობის ეფექტი ახლავს, მაგრამ ჩემთვის ძვირფასი თავად ეს შეგრძნებაა:

თრობა მალე გადის და ადგილს უთმობს გარკვეულ გულგრილობას; თითქოს დაღლილობა გეუფლებს; თუ რასაც ნატრობ, ასე უცებ აგიხდება, მაშინ რაღა დაგრჩება სანატრებელი? თანაც ფულის იქითაც ხომ არსებობს ათასნაირი სიკეთე, უამრავი რამ, რასაც ვერ იყიდი... სიყვარული, დიდება, პატივისცემა, ხალისი, ჯანმრთელობა... რაში არგია ახლა ამ საცოდავ კაცს თავისი მეღბურნული სახლები? მე კიდევ, ნაც-

ვლად იმისა, რომ ვინმე ძლიერ, მნიშვნელოვან, საყვარელ მამაკაცს ვეკუთვნოდე, რომელსაც ავხედავდი, რომელსაც დავეყრდნობოდი – ეს ბიჭუნა მერგო...

პრინცი აშილი ჩემი თავყვანისმცემლის გასაცნობად გვეწვია. საკმაოდ უმნიშვნელო ვინმედ შეაფასა, თუმცა ეს ერთით მეტ კარგ თვისებად მიიჩნია.

მეორე დღისთვის თავის სახლში დაპატიჟა სადილად. მომდევნო საღამოს კი, როცა საათის მეოთხედი სტუმარს ამაოდ ვუცდიდით, მოვიდა შიკრიკი: მისტერ ფ. თავს ცუდად გრძნობს და პატიებას ითხოვსო. – საბედნიეროდ, ავადმყოფი ერთ დღეში გამოძვინდა. როტშილდებთან ამბის გარკვევას ზუსტი დეტალების განმარტება არ მოჰყოლია – შეფი ამ დროისთვის ნიცაში იმყოფებოდა და თანამშრომლებმა მხოლოდ იმის თქმა მოახერხეს, რომ შესაბამის სახელზე საკრედიტო ბარათი მართლაც იყო წარდგენილი და ანაზღაურებული. აი, ნიშნობის დღეც მოახლოვდა. მისი აღნიშვნა სადმე საზეიმოდ უნდა მომხდარიყო... პრინც აშილის მშობლებმა თავაზიანობა გამოიჩინეს და შემოგვთავაზეს, ეს ღონისძიება მათ სახლში ჩატარებულიყო და მოსაწვევებიც დაავგზავნეს. ლაჟვარდოვან ცისფერ კაბაში გამოწყობილი (რომელიც ამ მოვლენასთან დაკავშირებით უორთთან შევიკერე) და გულაჩქროლებული შევდივარ მიურატების სალონში. გზად ეტლი გაგვიჩერდა და მე და დედაჩემმა ისედაც დავაგვიანეთ. მთელი საზოგადოება უკვე შეგროვილიყო, სასიძო კი არ ჩანდა. უხერხული თხუთმეტი წუთი გავიდა და რადგან ის, ვისაც ელოდნენ, კიდევ არ გამოჩნდა, ხალხი სუფრას მიუსხდა. მე დამსვეს უფროსი მასპინძლის მარჯვენა მხარეს – ჩემს მარჯვნივ ადგილი ჯერ ისევ თავისუფალი იყო. უკვე მესამე კერძი ჩამოატარეს – მეტად უხერხული სიტუაცია შეიქმნა – როცა ბარათი შემოიტანეს; ბატონი ფ. ბოდის თხოვნით გვატყობინებდა, რომ უეცრად ცუდად გახდა. ვახშამმა უღიმღამოდ ჩაიარა. ნიშნობისთვის მომზადებული სადღეგრძელოები, რა თქმა უნდა, აღარ წარმოითქვა და შამპანურიც ავადმყოფის სწრაფი გამოჯანმრთელების სურვილით დაიცალა.

გული კარგს არაფერს მეუბნებოდა: ორჯერ უარის თქმა ჩემი მეგობრებისთვის, თვით ნიშნობაზეც კი – თანაც ასეთი გულგრილი ტონით: ეს რას უნდა ნიშნავდეს? – რასაც ნიშნავდა, მეორე დღით გავიგე საფოსტო გზავნილით. ეს იყო მამამისის წერილი. მხოლოდ რამდენიმე სტრიქონი, რომ ორივე ბატონი ინგლისს გაემგზავრა. ისინი მივიდნენ მტკივნეულ გადაწყვეტილებამდე, რომ ეს ნიშნობა უნდა გაეუქმებინათ, მეტისმეტად დიდი ასაკობრივი სხვაობის გამო – ეს ყმაწვილი, როგორც ახლა გამოტყდნენ, ოცი წლის კი არა, მხოლოდ თვრამეტის ყოფილა. Farewell, and may you be as happy as you deserve. Yours truly,³¹ – ეს იყო და ეს. ოცნებები სიზმარივით გაქრა. მოგვიანებით გავიგეთ, რომ მელბურნის სახლები და მილიონები ზღაპარი ყოფილა.

რა თქმა უნდა, რაღაც პერიოდი ვიდარდე. ცხადია, უზომოდ მრცხვენოდა, მიურატების მთელი ოჯახის წინაშე თავი მომეტრა... მაგრამ ჩემი მეგობრები მამხნე-

ვებდნენ და მარწმუნებდნენ, რომ სირცხვილი და გაკიცხვა მხოლოდ იმ ორ ინგლისელს ეკუთვნოდა და საერთოდაც გამიმართლა, ამ ავანტიურისტებს რომ არ ჩავვუვარდი ხელში და მეც მალე დავმშვიდდი.

წელი 1870-1871

პრინცი აშილ მიურატი ფრანგული არმიის ოფიცერი იყო; ერთ დღესაც მიიღო ბრძანება, რომ ალჟირის გარნიზონში გამოცხადებულიყო. რა თქმა უნდა, მეუღლეს გაჰყვა და პარიზი ჩემთვის კვლავ დაცარიელდა. ჩემი გულიც ცარიელი იყო და მომავლის იმედებიც – დანგრეული. ჩვენი პატარა ქონებაც სულ შემოგვადნა ამ გაკვეთილებისა და მდიდრულ ყოფასთან დაკავშირებული სხვა უამრავი ხარჯის გამოისობით... ისე მოხდა, რომ მე კვლავ სიმღერას მივუბრუნდი. ჩვენ გავემგზავრეთ მილანში, რათა იქ მანქანით ლამპერტი როლენთან მევლო და როგორმე ლა სკალაში მოვხვედრილიყავი. ლამპერტიმ გამსინჯა, ჩემი ხმა ძალიან მოეწონა – თუმცა სულ ცოტა ერთი წელი მაინც მასთან უნდა მესწავლა, ვიდრე იმაზე ვიფიქრებდი, რომ კონცერტზე ან ოპერებში გამოვსულიყავი. რაღას ვიზამდი – კვლავ დო, რე, მი, ფა, სოლ, ლა, სი...

ბეჯითად ვსწავლობდი და ვვარჯიშობდი, მაგრამ ის „მნიშვნელოვანი“ – რომ იტყვიან, სამყაროს შემავსებელი, როგორადაც ნანატრ სახელოვნებო სარბიელს ჩემი სწავლის დასაწყისში ვისახავდი – უკვე გამიქრა.

ამ დროს ატყდა გერმანულ-ფრანგული ომი. სალომე მიურატისგან მივიღე ცნობა, რომ ალჟირში ვაჟი შეეძინა – პირველ ივლისს, ომის გამოცხადების დღეს. მე საავდრო ღრუბლებს ვერ ვამჩნევდი და როცა ქარიშხალი ამოვარდა, მას ზუსტად ისეთივე გულგრილობით შევხვდი, როგორადაც 1866 წლის ქარიშხლებს. მე სულ სხვა დარდი მქონდა: სახელოვნებო სარბიელზე არაფერი გამომდიოდა. როგორც კი გასინჯვაზე გასვლას გადავწყვეტდი, შიში ყელში ჩამაფრინდებოდა და... ვეღარ გავდიოდი. ეს „მონოტონური სიმღერა“ სატანჯველად მექცა, მაგრამ ბრძოლას კვლავ ვავრძელებდი – სხვები გამუდმებით მარწმუნებდნენ, რომ შიშის დაძლევა შესაძლებელი იყო და ამის შემდეგ ჩემი ტალანტიც გაიფურჩქნებოდა. ამასთან, მაშინ საერთოდ არ მაინტერესებდა ის დიდი ტრაგედია, მთელ მსოფლიოს რომ აზანზარებდა. ჩემი პირადი ტანჯვის გარდა, სხვა განსაცდელიც არსებობდა – იმდროინდელ სამყაროს სხვა შიში აკანკალებდა! ამ ისტორიულ კატაკლიზმებს კვლავ ისე დავხვდები, პატარა პროტესტის ან შინაგანი მღელვარების ნასახივ არ გამჩენია. გერმანიის ერთმანეთს მიყოლებული გამარჯვებები დიდ პატივისცემას იმსახურებდა, თან გულწრფელად მენანებოდა ნაპოლეონის დინასტიის დამხობაც, რომლის წარმომადგენლებსაც ასე დავუახლოვდი. მეორე მხრივ, ჩემს მე-

ფურ უდიდებულესობა ვიზავისაც გულით ვულოცავდი ამაყ კაიზერულ გვირგვინს. ყველა იმ ჭირ-ვარამის გარდა, რაც გერმანულ-ფრანგულს ომს ახლდა, ცოტა რამეს თუ ვამჩნევდი, ან მინდოდა გამეგო. ყველაფერს თავიდან ვიშორებდი ფატალისტური გამონათქვამით: *C'est la guerre!*³² პოლიტიკა არასდროს მაინტერესებდა, ყოველდღიურ გაზეთებს არ ვკითხულობდი. სამაგიეროდ, წიგნებს უფრო მეტად ვეწაფებოდი. სწორედ ისინი მიქმნიდნენ მეორე სამყაროს, სადაც ჩემი ცხოვრების პარალელურად კიდევ ერთი სიცოცხლით ვცხოვრობდი. ჯერ კიდევ ღრმა ბავშვობიდან შემიპყრო კითხვისა და სწავლის ვნებამ და მას არასდროს, არც ერთ გარემოებაში აღარ მივუტოვებია. სახლში ვიყავი თუ ბადენში, ვმოგზაურობდი, საოპერო სკოლაში ვსწავლობდი თუ მაღალ საზოგადოებაში წვეულებებსა და მეგობრებს შორის ვტრიალებდი, შეყვარებული, დანიშნული თუ კვლავ თავისუფალი ვიყავი, ყოფა ჩემთვის ბრწყინვალეობას და სიხარულს, თუ დარდს და საზრუნავს იმეტებდა – ყოველთვის დღის უმეტეს ნაწილს მაინც წიგნების გარემოცვაში ვატარებდი. მხატვრულზე არანაკლებ, თუ უფრო მეტად არა, სამეცნიერო ლიტერატურა მიზიდავდა. მაინტერესებდა ეთნოგრაფია, ქიმია, ასტრონომია, ყველაზე საყვარელი დისციპლინა კი ფილოსოფია იყო. კანტი, შოპენჰაუერი, ჰარტმანი³³ (არაცნობიერის ფილოსოფია), შტრაუსი, ფოიერბახი, პასკალი, კომტი,³⁴ ლიტრე,³⁵ ვიკტორ კუზენი,³⁶ Jules Janet, ალფრედ ფულე³⁷ (ბოლო სამი იყო ჟურნალიდან *Revue des deux Mondes*, რომელსაც პირველი გვერდიდან ბოლომდე დაწვრილებით ვკითხულობდი); ესენი და კიდევ სხვა მრავალი, რომელთა სახელებს ვერ ჩამოვთვლი, იყვნენ ჩემი სულიერი მეგობრები. მათ საზოგადოებაში ვატარებდი ბედნიერ, ჩემს პირადულ ამბებს დაშორებულ ცხოვრებას, სადაც ჩემი სული ნებივრობდა. მაშინ ჯერ არ დამდგარიყო ხატმებრძოლთა და ძველის მგმობელთა დრო, მერე გაძლიერდა თანდათან და ძველი პოეტების შემოქმედების გადაფასება მოჰყვა... ანუ ჯერ კიდევ შეიძლებოდა ამ ურთიერთობას სიამაყისა და სიხარულის განცდა მოეტანა. ამის საპირისპიროდ, მეცნიერების დარგთა შორის ყველაზე საუკეთესო – ნატურფილოსოფია – ჯერ კიდევ არ ასულიყო იმ სიმაღლემდე, იმ ზეგავლენამდე და გონების რევოლუციურად გარდაქმნამდე, რომელსაც მოგვიანებით განვითარების თეორიის შემუშავების წყალობით მიაღწია. გონებრივ და სოციალურ ფენომენებზე მისი გავლენის გამოყენება ჯერ კიდევ არ იყო ცნობილი. სოციალურ ფილოსოფიასა და სოციოლოგიაზე არაფერი ვიცოდი. დარგინს უკვე ემცნო მსოფლიოსთვის თავისი აღმოჩენა სახეობათა წარმოქმნის შესახებ, ლასალის³⁸ და ენგელსის შრომებში უკვე დასახულიყო ეკონომიკის პრობლემები, ბუკლმა (Henry Thomas Buckles) უკვე გამოაქვეყნა შესავალი ცივილიზაციათა ისტორიისთვის, კამათი/დავა ბიუხნერის შრომაზე „ძალა და მატერია“ უკვე გაჩაღებულიყო, ჰერბერტ სპენსერის მთავარი ნაწარმოებები უკვე გამოეცათ, მაგრამ ჩემამდე ამათგან ჯერ არაფერს მოეღწია. ცოდნის წყურვილით ვეწაფებოდი ყველაფერს, რასაც ბუნებისა და საზოგადოე-

ბის შესახებ წიგნები მიყვებოდნენ, როგორც უკვე არსებულზე და არა სამომავლოდ მოსახდენზე. კერძოდ, მაკლდა იმის აღქმა, რომ სოციალური მდგომარეობები უნდა შეცვლილიყო, ხოლო ამ პროცესში განათლებულ ადამიანს ბრძოლა და მასში თავისი წვლილის შეტანა მართებდა.

გერმანულ-ფრანგული ომი რომ დამთავრდა, შემთხვევით ბერლინში აღმოვჩნდი.

ჩემმა სწავლა-განათლებამ – გერმანული ვოკალური ხელოვნების გაცნობის სურვილმა – პრუსიის დედაქალაქში ჩამიყვანა.

უნტერ დენ ლინდენზე გამავალი აივნიდან ვუყურე საფრანგეთიდან დაბრუნებული ძღვემოსილი არმიის მსვლელობას. მეხსიერებაში ცოცხლად აღმებეჭდა სურათი – მზით გაჩახჩახებული არემარე, სიხარულის ყიჟინა, მოფრიალე დროშები, ყვავილთცვენა, ტრიუმფალური თალი – დიდი, ისტორიული ზეიმი... რა სხვანაირად აღვიქვამდი დღეს ყოველივე ამას! ...მაგრამ ამ გარდაქმნის ისტორია ბევრად გვიან იწყება!

პრინცი ვიტგენშტაინი

კიდევ ერთი ეპიზოდი მახსენდება ახალგაზრდობიდან – კვლავ ნიშნობის რომანი. როცა ვამბობ „ახალგაზრდობა“, ეს ფარდობითი ცნებაა. რომანი გათამაშდა 1872 წლის ზაფხულში, მაშასადამე, ოცდარვა წლის ვიყავი და გოგოსთვის ამ ასაკს აღარავინ მიიჩნევს ახალგაზრდულად.

ეს იყო ვისბადენში. ერთ დღეს გამოგვეცხადა ახალგაზრდა მამაკაცი – სახელად ადოლფ პრინც საინ-ვიტგენშტაინ-ჰოჰენშტაინი (Adolf Print SaynWittgenstein-Hohenstein). თურმე მგზნებარე მომღერალი ყოფილა – ტენორი ფენომენალური ხმით, რაც, რა თქმა უნდა, ჩვენი გაცნობისა და მოგვიანებით დაახლოების საბაზად იქცა. მას ერთხელ მოესმა, ღია ფანჯარაში რომ ვმღეროდი და ამან უბიძგა, ახლოს მოსულიყო. ვუთხარით, გვწვეოდა თავის ნოტებთან ერთად. სიამოვნებით დაგვთანხმდა. გაოცებული დავრჩი, როცა მის მიერ მოტანილ ნაწარმოებთა უმეტესობა სიმღერები კი არა, საოპერო არიები იყო; არც მას გაჰკვირვებია, ჩემთან პარტიტურების საცავი რომ აღმოაჩინა. პირველი, რაც წაიმღერა, იყო ფაუსტის არია: *O dimora casca e pura*.³⁹ მე პიანინოზე აკომპანირება გავუწიე. არია რომ დაამთავრა – დიდებულად იმღერა – „ფაუსტის“ ჩემი პარტიტურა გადავშალე და დავიწყე სოპრანოს პარტია დუეტისთვის; ისიც მაშინვე ამყვა და ორი საოპერო მომღერალივით გავასრულეთ ეს დუეტი.

„თქვენ სასცენო განათლება მიიღეთ, გრაფინია?“ – მკითხა გაოცებით.

„მეც შემოძლია იგივე შეკითხვა დაგისვათ, პრინცი!“

ეს კითხვა პირველ ჯერზე უპასუხოდ დატოვა. ორივეს ისე მოგვეწონა ერთობლივი სიმღერა, რომ შევთანხმდით, ერთად ბეჯითად ვიმეცადინებდით. ისიც ყოველდღე დადიოდა; „ფაუსტის“ დუეტს მოჰყვა დუეტი „რომეო და ჯულიეტადან“, ⁴⁰ ამის მერე დუეტი რაულსა და ვალენტინს ⁴¹ შორის. მალე ახალგაზრდა კაცმა გაგვიმხილა, რომ მართლაც სურდა თავი ხელოვნებისთვის მიეძღვნა. ერთ თვეში ამერიკაში მიემგზავრებოდა და გამოგონილი სახელით კონცერტებზე და თეატრში გამოსვლას აპირებდა. დიდი ჯაფა დაადგა, მშობლები ამაზე დაეთანხმებინა. მისი ჟინი და სიმღერის სურვილი იმდენად დიდი იყო, არაფრის წინაშე უკან არ დაიხევდა, რომ საყვარელი ხელოვნება პროფესიულ დონეზე შეესწავლა. ამისგან ფინანსური სარგებლის მიღებასაც იმედოვნებდა. მაიორატის მემკვიდრეობაში მას, როგორც უმცროს ძმას, არანაირი ქონება არ ერგებოდა, ამერიკაში კი სახელგანთქმულ ტენორებს დოლარები თავზე საყრელად ჰქონდათ. მეც მოვუყევი, რა გეგმებს ვისახავდი თავიდან, მაგრამ ყოველ ჯერზე, როცა ხალხის წინაშე ან გადამწყვეტ გამოცდაზე გასვლა მიწევდა, გადაულახავ შიშს ვეჯახებოდი, ერთიანად რომ მაღამბლავებდა. თურმე მასაც იგივე ემართებოდა, მაგრამ დროთა განმავლობაში დაუძლევიდა.

შესანიშნავად გავუგეთ ერთმანეთს. ჩვენი ხმებიც შესანიშნავად ჟღერდა ერთად. და ამის ბოლო იყო... – განა თითოეული თქვენგანი ვერ ხვდება, თუ რა იყო ბოლო? თოთხმეტი დღის განმავლობაში, ყოველდღიურად ორ-ორი საათი, მაჟორშიც და მინორშიც, ნაზ ცეცხლოვან ტონალობაში ერთმანეთს სიყვარულს ვეფიცებოდით: *Io t'amo, je t'adore* – „მოვკვდები – სიამოვნებით... შენთვის!“ ეს ხომ, წარმოუდგენელია, დაუსჯელი დარჩეს – მით უმეტეს, თუ ისედაც კეთილგანწყობა არსებობს. და ასეც მოხდა – შევთანხმდით, რომ ჩვენ ჩვენი ცხოვრება, ასე ერთნაირი, ერთმანეთთან დაგვეკავშირებინა.

პრინც ადოლფ ვიტგენშტაინს ჩემი ხელი ეკავა და მის შემოთავაზებას დედა-ჩემის მხრიდან თანხმობა მოჰყვა. ჩემი თანხმობა ჯერ კიდევ იმ კოცნით მოიპოვა, რითაც დავამთავრეთ დუეტი, ტკბილ ტერციებში გაშეშებულებმა.

ჩვენი უახლოესი მომავალი ასე დალაგდა: შემუშავდა ამერიკაში მოგზაურობის გეგმა. უფრო მეტად, ვიდრე ოდესმე, გაჩნდა ქონების მოპოვების საჭიროება. თავის მშობლებსაც მაშინვე აცნობა ჩვენი ნიშნობის შესახებ. აქეთ, როგორც მისი გამოცხადებული საცოლე, ისე უნდა დავრჩენილიყავი და როგორც კი იგი ოკეანის გადაღმა კარიერას აიწყობდა, ჩემ წასაყვანად მაშინვე დაბრუნდებოდა. მშობლებისგან მალე მოვიდა თანხმობის წერილი; ასე გავხდით საქმრო და საცოლე.

მომავალს შევყურებდი – მართალია, არცთუ მშვიდად, მაგრამ მაინც – სიხარულით საცხე მოლოდინით; არცთუ მშვიდად იმიტომ, რომ არავინ უწყოდა, რა მოხდებოდა, თუკი ადოლფს გეგმები გაუცრუვდებოდა ან ზღვის გადაღმა აზრი შეეცვლებოდა – ასეც ხომ ხდება... და სიხარულიანი მოლოდინით – რადგან შესაძლებელი იყო საინტერესო, ბედნიერი ცხოვრება მქონოდა ხელოვნებაში თანა-

მოაზრესთან ერთად; საყვარელ ადამიანთან, რომელსაც დიდი სახელიც ჰქონდა და პოეტური, კეთილშობილი სულითაც გამოირჩეოდა; კაცთან, რომლის მიმართ შეიძლება არც ისე მგზნებარე გრძნობები გამიანდა, მაგრამ გულწრფელად კეთილგანწყობილი ვიყავი.

ბრემენიდან გამომიგზავნა სიყვარულით სავსე გამოსათხოვარი დეპეშა – ახლა კი რამდენიმე კვირა უნდა გასულიყო, ვიდრე წერილს ნიუ-იორკიდან მივიღებდი.

მაგრამ იქამდე, ბევრად ადრე, ვიდრე მოველოდი, შევიტყვე საშინელი ამბავი. გაზეთში ვიპოვე რამდენიმესტრიქონიანი შენიშვნა სათაურით: „გზაში სიკვდილი. როგორც ვიტგენშტაინთა ციხესიმაგრეში, თავად ვიტგენშტაინების ოჯახში სადენიანი ტელეგრაფით მისული დეპეშა იუწყება, ამერიკისკენ გამგზავრებული პრინც ადოლფ ვიტგენშტაინი გემბანზე უეცრად გარდაიცვალა. მისი ცხედარი ზღვაში იქნა ჩაშვებული“.

მე ყვირილი აღმომხდა და მთელი ღამე ჩემს ლოგინთან დაჩოქილი ვქვითინებდი.

ეს იყო ჩემი ცხოვრების მტკივნეული და მაინც მშვენიერი ეპიზოდი – სიმღერის ჯადოსნობის და იმედგაცრუების მოკლე რომანი. გემის – Rhein-ის გემბანზე ასწიეს სამგლოვიარო დროშა, ქორალი შეასრულეს, გემი გაჩერდა და სალუტის თანხლებით ცხედარი ზღვაში ჩაუშვეს. ტალღებში გაუჩინარდა – ხელოვანი, პრინცი, კეთილი სულის ადამიანი. მას საცოლის სურათი დადუმებულ გულზე დაადეს; ზღვის ტალღები ქვითინით უმღეროდნენ საქორწილო სიმღერას მიცვალებულს და ჩემს სურათს.

ზუტნერების სახლში (1873-1876)

1873 წლის ზაფხულია. ხანმოკლე რომანის დავიწყება, უფრო სწორად, მისი გადატანა შეეძელი. „სიმღერის ფრთებზე“ გამოტარებულ სიყვარულს არცთუ ისე ღრმად შეეღწია გულში – უცბად მოვიდა და სიზმარივით გაქრა. რამდენიმე კვირა გავატარე ნამდვილ, ღრმა ტრაურში, მერე თანდათანობით ვაჯობე ცრემლებს და ცხოვრებამ დაიბრუნა თავისი უფლებები. ეს მით უფრო, რომ აუცილებლობის წინაშე დავდექი – თავი უნდა მერჩინა. ჩვენი ქონება საბოლოოდ ამოიწურა და მე ბედის ანაბარად აღმოვჩნდი. დედაჩემს შეეძლო თავისი აპანაჟით⁴² ეცხოვრა, მაგრამ ტვირთად ხომ არ დავაწვებოდი, კი მეხვეწებოდა, მასთან დავრჩენილიყავი და ხელოვანის კარიერის განახლება მეცადა. ამის გაგონებაც კი არ მინდოდა. ოცდაათი წელი ის ასაკი არაა, როცა ხელოვანის კარიერა უნდა დაიწყო. თანაც, შიშის პანიკური შეტევები რომ მახსენდებოდა, ყველა გამოსვლას თუ გასინჯვას რომ ახლდა და ყველგან მამარცხებდა, ამ „სიმღერ-ნამღერის“ – როგორც

მე ვეძახდი – ხსენებაც კი შემძულდა. მაგრამ ასე, ვილაცის კმაყოფაზე და უქმად ყოფნა არ მინდოდა. ჩემი სრულყოფილი ფრანგულით, ინგლისურით და იტალიურით, არაპროფესიონალისთვის შესანიშნავი მუსიკალური განათლებით, ზოგადი ცოდნის მარაგით ყველგან შემეძლო თავი გამეტანა და თან მეზრწყინა კიდეც. ასე მივიღე ერთი შემოთავაზება, რომელიც გულისხმობდა ოთხი მოზრდილი ქალიშვილისთვის აღმზრდელისა და კომპანიონის ფუნქციების შესრულებას ფრაიჰერ⁴³ ზუტენერის სახლში. თურმე, აქ მეწერა ჩემი ცხოვრების გვირგვინით შემკობა. დალოცვილი იყოს ის დღე, როდესაც ამ სახლში შევედი; ეს იყო ყლორტი, საიდანაც ჩემი ბედნიერების ასფურცელა ვარდი გაიფურჩქნა. იმ დღემ გახსნა აგრეთვე კარიბჭე, რომელშიც ის ბერტა ზუტენერი შეაბიჯებდა – უბედნიერესი ქორწინების და მწარე ქვრივობის გამოცდილებით, საჭირობოროტო საკითხებში მისი მონაწილეობით, – როგორადაც თავს ჯერ კიდეც ვგრძნობ; ამ დროს კი მაშინდელი ბერტა კინსკი, ვისზეც ახლა გიყვებით, მესახება რომელიღაც სურათებიანი წიგნის გმირად, რომლის განცდებიც – მკრთალად – კი ვიცი, მაგრამ ნაკლებად მალეღვებს.

ზუტენერების ოჯახი ცხოვრობდა ვენის კანოვაგასსეში (Canovagasse) მდებარე საკუთარ სასახლეში. სასახლის ერთი ფასადი გადაჰყურებდა კარლსკირხეს ვენის მდინარის გადაღმა, მეორე – მუსიკალური გაერთიანების (Musikverein) შენობას. პირველ სართულზე ვცხოვრობდით ჩვენ, ანუ ბარონი, ბარონესა, მათი ოთხი ქალიშვილი და მე; მეზანინი⁴⁴ დაკავებული ჰქონდათ უფროს ვაჟ კარლს, რომელიც რამდენიმე თვის დაქორწინებული იყო მშვენიერ ქალზე, გრაფ ფირმიანის ქალიშვილზე, და მესამე, ყველაზე უმცროს ვაჟ არტურ გუნდაკარს. მეორე ვაჟი, ასევე დაქორწინებული, ყოფილი კავალერიის კაპიტანი, 1866 წელს ბოჰემიაში რომ იბრძოდა, ახლა შტოკერნის მამულში დამკვიდრებულიყო.

„მამა“ – მამა-ზუტენერი, მაშინ 51 წლის, წარმოსადეგი მამაკაცი, ძველი ყაიდის ავსტრიელი კავალერისტი, კონსერვატორი, რომ არა ვთქვათ რეაქციონერი თავისი პოლიტიკური შეხედულებებით, სასახლის კარზე კარგად მიღებული. „დედა“ – დედა-ზუტენერი, დაახლოებით ამავე ასაკის, დიდი სილამაზის ნაკვალევით, ცოტა ხისტი და ცივი მანერებით. ქალიშვილები: ლოტი, მარიანე, ლუიზე და მათილდე – ოცი, ცხრამეტი, ჩვიდმეტი და თხუთმეტი წლისანი, ერთმანეთზე უფრო ლამაზები. განსაკუთრებით, მათილდე, დედის ნებიერა, ხვეული ქერა თმით, სახის კანის დამაბრმავებელი სითეთრით და სწორი ნაკვთებით მართლა ანგელოზს ჰგავდა. კიდეც ორი არსება მიეკუთვნებოდა ოჯახს: შნაპსელი, ყვითელბეწვა პინჩერი, „მამას“ და „დედას“ მუდმივი თანამგზავრი, და ამიე, პატარა გონიერი პუდელი გოგონების საკუთრება.

დიდი მეურნეობა ჰქონდათ; მსახურთა შემადგენლობაში შედიოდნენ: კამერდინერი, მონადირე, მსახურები, მოახლე გოგონა, შიდა (ოთახების) მოახლე, მზარეული, მზარეულის დაშმარე გოგონები, მეეტლე და პორტიე. ჰყავდათ ეკიპაჟი, ჰქონდათ საოპერო ლო-

ჟა. ახლაც თვალწინ მიდგას ბინა – დარბაზისწინა მისაღები კედლებზე გობელენებით, ჩაყოლებამე სამი სალონი: მწვანე, ყვითელი და ლურჯი; „დედას“ ლაჟვარდისფერი საძინებელი, „მამას“ საწერი ოთახი, რომელიც მოსაწევ ოთახადც გამოიყენებოდა, ტყავის ავეჯით და ხისპანელებიანი კედლებით; მერე კიდევ ორი ოთახი გოგონებისთვის – ლოტის და მარიანეს ერთად ეძინათ, ისევე როგორც ლუიზესა და მათილდეს; მათ გვერდით ჩემი ოთახი იყო.

მე და გოგონები მალე დავმეგობრდით. აღმზრდელის როლს არცთუ მკაცრად ვასრულებდი, მაგრამ დილის რამდენიმე საათი რეგულარულად ეთმობოდა ენისა და მუსიკის მეცადინეობას, რაც საბოლოოდ ნამდვილი სიამოვნება, ხუმრობა და გართობა უფრო იყო. მე არანაირად არ გამოვხატავდი ჩემი ასაკის – ოცდაათი წლის ვიყავი – უპირატესობას, მით უმეტეს, არც ჩემი პოზიციის ავტორიტეტს. დღის წესრიგი თითქმის არ იცვლებოდა. თანამოთამაშეები ხუთნი ვიყავით. დილის საუზმემდე – სეირნობა ახლომდებარე პარკში; ცხრა საათზე – ერთობლივი ყავის სმა „მამას“ საწერ ოთახში; ამ დროს „დედა“ გვეკითხებოდა ხოლმე სწავლის მიმდინარეობის შესახებ და გვამარაგებდა მრავალნაირი მოქცევის წესით თუ სხვა სასარგებლო რჩევებით. ათიდან თორმეტამდე – მეცადინეობა; შუადღისას – მეორე ერთობლივი საუზმე სასადილო ოთახში; პირველი საათიდან, მონაცვლეობით – მუსიკა, გაკვეთილები და ა.შ.; სადილისთვის, ხუთი საათისთვის – თავის მოწესრიგება; ამას უკვე ესწრებოდნენ მეზანინის ბინადარნიც – კარლი თავის ცოლთან ერთად და არტური. ეს უკანასკნელი, მაშინ ოცდასამი წლისა, დების ნებიერა იყო... და არა მარტო დებისა, ფაქტობრივად – ყველასი. არ მეგულებოდა ადამიანი, რომელიც არტურ გუნდაკარ ფონ ზუტენერთ არ მოიხიბლებოდა. თეთრი ყვავივით იშვიათნი არიან ასეთი არსებანი, რომლებიც ისეთ მოუგერიებელ charme-ს ასხივებენ, რომ ყველას – მოხუცს თუ ახალგაზრდას, მაღალს თუ დაბალს, – ბადეში აბამენ. არტურ გუნდაკარი ასეთი იყო. მე სპეციალურად არ ვთარგმნი სიტყვა charme-ს ჯადოსნობად, რადგან ფრანგული სიტყვა charme მისგან ნაწარმოებ charmeur-საც გვახსენებს, ესაა შინაარსი, რომელიც „ჯადოსნობით“ ადეკვატურად ვერ გადმოიცემა. თუ რისგან შედგება ასეთი charme, ძნელი სათქმელია; ეს თვისებების კომპლექსი კი არ არის, თავად თვისებაა. იგი ზემოქმედებს აუხსნელი და მოუგერიებელი მაგნიტური და ელექტრული ძალით. ფიქრობ ხოლმე, როგორ უნდა მიხვდე, რატომაა ზოგიერთი პიროვნება ასეთი სასიამოვნო და მიმზიდველი, როგორ იწვევს იგი ამხელა ნდობასა და კეთილგანწყობას, და ყოველივე ამას მიაწერ მის ხალისიანობას, მეგობრულობას, სილამაზეს, ნიჭს, მაგრამ ჩამოთვლილთაგან არცერთი არ გამოდგება; სხვებსაც აქვთ ყველა ეს თვისება, ალბათ უფრო მეტიც კი, მაგრამ მათთან იგივე ეფექტი არ შეინიშნება; ისინი არ არიან ე.წ. charmeurs. ისინი არ არიან სხივოსანი ადამიანები. არტურ გუნდაკარი კი სწორედ ასეთი იყო. როგორც კი ოთახში შემოვიდოდა, მაშინვე სით-

ბო და სინათლე ისადგურებდა. ვერ ვიტყვი, რომ იგი დანახვისთანავე შემეყვარდა, მხოლოდ იმ სიხარულს ვიზიარებდი, რასაც მისი ოთხი და გრძნობდა, როცა საყვარელი ძმა მათ ხუმრობებსა და სიამეებში ჩაერთვებოდა ხოლმე, როცა შუაში ჩავიკვდებოდა და ჭორაობდა, როცა დროდადრო ჩვენს გართობებსა და ექსკურსიებში მონაწილეობდა. ამას ხშირად ვერ ახერხებდა – სახელმწიფო გამოცდისთვის უნდა მომზადებულიყო, რასაც შეძლებისდაგვარად თავს არიდებდა: მართალია, ადვილად სწავლობდა, მაგრამ არცთუ დიდი სიამოვნებით, ხოლო სამართალი არ ყოფილა მისი ძლიერი ლტოლვის საგანი. „უქნარა“ – ასე ეძახდა ყოფილი ჰოფმაისტერი, ამჟამად კონცერტმაისტერი; „ცანცარა ონავარი“ – ასე ეძახდა მამამისი; „მძიმე ჯვარია ნამდვილი“ – ოხრავდა დედამისი; თან ყველა მის მშეს იფიცებდა. ლამაზი და მოხდენილი იყო – უსაზღვროდ და უკიდევანოდ; ზებუნებრივი მუსიკალური მონაცემები ჰქონდა; ყოველგვარი სწავლის გარეშე ყველაფერს უკრავდა სმენით და გასაგებებელ მელოდიებს იგონებდა. და მისი ხასიათის მთავარი თვისება – იქნებ ესაა კიდევ მისი მშესხივოსნობის საიდუმლო? – მთავარი ნიშანი იყო სიკეთე.

დღის წესრიგზე გიყვებოდით და გადავუხვიე. ნასაუზმევს დედა პრატერში სეირნობდა ხოლმე რომელიმე ქალიშვილთან ერთად. ყველაზე ხშირად მატყლდე გამოეხმაურებოდა მის შეთავაზებას, ყველაზე უმცროსი; სხვებს დიდად არ ხიბლავდათ „კეთილშობილთა ხეივანში“ წინ და უკან ფეხით სიარული. დანარჩენები, ჩვენ ყველანი, პრატერის გავლით გამოფენაზე მივდიოდით. 1873 ხომ მსოფლიო გამოფენის და, იმავდროულად, „კრაზის“⁴⁵ წელიც იყო. ამ კრიზისის დროს ბარონმა ზუტნერ სენიორმა საგრძნობი წაგება ნახა, მაგრამ ოჯახისთვის არაფერი შეუტყობინებია. მხოლოდ გვიან გახდა ცნობილი.

ექსკურსიები და გამოფენა ფრიად სასიამოვნო იყო ყველასთვის; კვირაობით ამას დილას ვუძღვნიდით. არტურ გუნდაკარი და ზოგიერთი მისი მეგობარიც შემოგვიერთდებოდნენ ხოლმე. საღამოობით, კვირაში ორჯერ, მონაცვლეობით დავდიოდით ოპერის ლოჟაში; ჩაიზე ყოველდღე რამდენიმე სტუმარი მოდიოდა; მუზიკირება, ერთობლივი თამაშები და საუბრები თერთმეტ საათამდე გრძელდებოდა. ამ პირველ ზაფხულს, ვინაიდან გამოფენის ზაფხული იყო, ოჯახი ქალაქად ივლისის შუა რიცხვებამდე დარჩა. მხოლოდ მერე გავიდა ქალაქგარეთ, ჰარმანსდორფის ციხესიმაგრეში. ჩვენთვის ზეიმი იყო ეს გადასახლება, რადგან გოგონებს ათასწილად ერჩივნათ სოფლად ყოფნა, ვიდრე ვენაში, ისევე როგორც ვაჟებს. იმას რა სჯობია, როცა გახურებული, მტვრიანი ქალაქიდან მოდიხარ მშვენიერ სასახლეში, სადაც ყველა ოთახში „სუფთა და ხალასი“ ჰაერია, ირგვლივ ტყე და პარკი გარტყია და ბუნების სიკეთეებით ხანგრძლივი ტკობა და დასვენება გელის.

ჰარმანსდორფი ფლობს მშვენიერ, ძველისძველ სასახლეს, რომელსაც შუაში ერთი და გვერდებზე თითო-თითო კოშკი აქვს; დიდი ქვის ტერასა მიემართება პარკისკენ, რომლის წინა ნაწილი ფრანგული ლეჟუნის (Lejeune) – შერნბრუნის

(Schonbrunn) შემოქმედის – სტილით არის გადაწყვეტილი, ვაზებითა და სტატუებით მდიდრულადაა მორთული. აქ თავს იყრის ყველა ხეივანი, ოთხასწლოვანი ფიჭვებისა და ალაგ-ალაგ ინგლისურიც, მათ შორის სრულიად ველურიც, რომელსაც „პატარა ტყეს“ უწოდებენ. მაგრამ ამ პატარა ტყეზე უფრო მეტად ჩვენ ნამდვილი ტყე გვიყვარდა. იქ ნაშუადღევს გავდიოდით ხოლმე. როგორც კი სოფელში სასმელ-საჭმლით დატვირთულ ვირის ოთხთვალას დავინახავდით, მაშინვე საპიკნიკო განწყობა გვეუფლებოდა; ვიყავით ბედნიერები, ბედნიერები ვიყავით. არტურ გუნდაკარი ამ ზეიმების სული და გული იყო. ასე ცოტაობით კი დაგვემართა ეს ამბავი: ერთმანეთი შეგვიყვარდა. დები სიცილ-კისკისით გვაძლევდნენ კურთხევას. მშობლებმა არაფერი იცოდნენ – ქორწილზე ლაპარაკიც არ იყო, ამ საქმეს იმ წუთშივე მოაშთობდნენ. რატომ უნდა ჩაეშალა ვინმეს ეს უწყინარი ბედნიერება, რატომ უნდა გამოვსულიყავით ამ „ზაფხულის ღამის სიზმრების“ განწყობიდან? ამიტომაც ვუფრთხილდებოდით ჩვენს საიდუმლოს და დებიც მხარს გვიჭერდნენ. საუკეთესო დრო იყო. ვერ ვიტყვი, რომ მთლად უზრუნველი, რადგან ვიცოდით, რომ ერთმანეთს სამუდამოდ ვერ დავუკავშირებდით ჩვენს ბედს, მაგრამ ჯერ დაშორებაზე ფიქრიც არ გვინდოდა, ვხარობდით ამ ღვთიური საჩუქრით, რაც ჩვენი გულების ერთობლივ ფეთქებასა და იქ სიყვარულის გაფურჩქვნაში გამოიხატებოდა. ერთმანეთი ყოველგვარი სიყალბისა და ეგოიზმის გარეშე, უსაზღვრო ნდობით, უნაზესი გულწრფელობით გვიყვარდა.

თავიდანვე ავუხსენი მას, რომ სამი წლის შემდეგ ევროპიდან უნდა გავმგზავრებულიყავი და ერთმანეთს დავშორებოდით. კერძოდ, რა ხდებოდა: ჩემს კავკასიელ მეგობრებთან აქტიურ მიმოწერას განვაგრძობდი და მათ შევატყობინე ჩემი შეცვლილი საცხოვრებელი გარემოებების შესახებ. უკვე ხანდაზმული სამეგრელოს დედოფალი, რომელიც ახლა სამშობლოში იმყოფებოდა, მთავაზობდა, ჩემთან მიგიღებო, პირადად გიმასპინძლებო, ოღონდ იმ სასახლის აშენებისა და კეთილმოწყობის შემდეგ, რომელიც ზუგდიდის რეზიდენციაში უკვე მიმდინარეობდა. ძველი სასახლე, თავის დროზე სამეგრელოს მთავარმა ევროპულ ყაიდაზე რომ ააშენა და დიდი ბრწყინვალეობით მორთო, დედოფლის დევნილობაში ყოფნისას თურქ მოთარეშეებს გაენადგურებინათ; ახლა აპირებდნენ ახალი და კიდევ უფრო მშვენიერი სასახლის აგებას. ესკიზები მინახავს და გაწყობის დეტალებზე საუბრებიც ხშირად მომისმენია. ერთი დარბაზი სპარსული სტილისა იქნებოდა, მეორე – ლუი XIV-ისა; ავეჯს, ნივთებს, ხელოვნების ნიმუშებს დედოფალი ევროპაში ცხოვრებისას თანდათანობით იძენდა და ზუგდიდში აგზავნიდა. ძძიმე ყუთებს უკვე აევსოთ იქაურობა და დაცლას უცდიდნენ. ერთხელ მეც მომიწია მისთვის რაღაცის შოვნა, კერძოდ, დიდი მუსიკალური ყუთის (დაახლოებით 13 000-მდე უნდა ღირებულიყო), რომელიც საორკესტრო

მუსიკას დაუკრავდა. მაგონდება, როგორ დამყვებოდა ამ საქმეზე არტური. ნაწარმოები შეარჩიეს და საცდელად ვალსი დაუკრეს:

„ამ ვალსზე მე ალბათ ზუგდიდში ვიცეკვებ“, – ვთქვი მე.

„თითქოს იქ ვინმე გიშვებდეს!“

„ჰო, მაგრამ მაინც ასე იქნება. მე უკვე გადავწყვიტე“.

„ამაზე ნულარ ვილაპარაკებთ“.

სალომესთანაც მქონდა მიმოწერა. იგი პარიზის შემოგარენში ცხოვრობდა და ამასობაში მეორე ვაჟიც შესძენოდა. იმპერატრისა ეუჟენია იყო ამ ბავშვის ნათ-ლია, რომელსაც ნაპოლეონი დაარქვეს.

აქ მაქვს წერილი, რომელიც სამშობლოსკენ მიმავალმა დედოფალმა ერთ-ერთი სადგურიდან მომწერა:

„იალტა, 11 სექტემბერი, 1873

ჩემო საყვარელო კონტესინა!

აი, უკვე თოთხმეტი დღეა, რაც აქ ჩამოვედი. თვალწარმტაც ვილაში ვცხოვრობ; ის ყურეს გადაჰყურებს და კარგად მოჩანს მთელი არემარე, მათ შორის წინა მთაზე განლაგებული იმპერატრისას სასახლე – ლივადია. წინა კვირადღეს, წირვის დამთავრების შემდეგ, მისმა უდიდებულესობამ საუბრეზე დამპატიჟა, სადაც შეგ-ხვდი დიდ მთავარს, მიხაილს (კავკასიის მეფისნაცვალს) და გრაფინიას, ასევე სა-ბერძნეთის დედოფალს და სხვებს. აღმოვაჩინე, რომ გრაფინია მარია ალექსან-დროვნა, იმპერატორის ერთადერთი ქალიშვილი, რაც არ მინახავს, გაზრდილა და გალამაზებულია. მის საქმროს, პრინც ალფრედს მომავალ კვირაში ელოდე-ბიან. ნიკო და ანდრე სამეგრელოში არიან და მოუთმენლად მელიან. სალომე ამ თვის 24-ში ჩამოდის იალტაში, ერთხანს აქ გაჩერდება კნიაჟნა ორბელიანთან,⁴⁶ ჩემი ბიძაშვილის ქვრივთან, რომელსაც აქვე, ახლოს, პატარა მამული აქვს და მე-რე ჩვენ შემოგვიერთდება სამეგრელოში. მე იალტიდან 3 ოქტომბერს გავემგზავ-რები და ფოთში მხოლოდ ოთხი დღის შემდეგ ჩავალ. ადიოო, საყვარელო კონ-ტესინა, გისურვებთ იმხელა ბედნიერებას და კარგად ყოფნას, რასაც იმსახურებთ.

თქვენი დიდად მოყვარული ეკატერინა“

1874 წლის გაზაფხულზე დედოფალმა სიხარულით მაუწყა, რომ მისი ვაჟი რუ-სეთის ხელმწიფის ახალგაზრდობის მეგობარ გრაფ ადელბერგის ქალიშვილზე დაინიშნა.

მომდევნო წერილში აღწერილი იყო ქორწილი, შემდეგში – ახალგაზრდა წყვი-ლის ჩასვლა გორდში, სამეგრელოს საზაფხულო რეზიდენციაში. აქვე მოვიყვან ამ ამბების აღწერას, რადგან იგი იძლევა იმ ქვეყნის თვალსაჩინო სურათს, სადაც მოგვიანებით ჩემს მეუღლესთან ერთად დიდხანს მომიწია დარჩენა:

„ახალდაქორწინებულთა მოგზაურობა დიდებულად წარიმართა. მათთვის საგანგებოდ იყო დაქირავებული გემი – ოდესიდან ფოთამდე პირდაპირი რეი-

სისტვის, ასევე მატარებელიც – ფოთიდან ქუთაისში ჩასაყვანად. მთელი გზა მათ უსაზღვრო ოვაცია მიაცილებდა: ხალხი იდგა გზის გასწვრივ, ყველა სადგურში ხვდებოდნენ თავადები, წარჩინებულები და მოსახლეობა სიმღერითა და თოფების სროლით. ძალაუნებურად უწევდათ გაჩერება, რომ ყვავილების ტაძარში შესულიყვნენ – იქ წასახემსებელი სუფრა ხვდებოდათ, თავიდან იწყებოდა სიმღერა, ცეკვა და მოლხენა. მოგზაურები ორი დღით დარჩნენ ქუთაისში, სადაც ბოლო არ უჩანდა ქეიფებს, ბალებსა და საზეიმო მიღებებს; ბოლოს, ახალგაზრდა წყვილი იძულებული გახდა, იქიდან გაპარულიყო, რომ გორდამდე ჩაეღწია.

უღელტეხილის შესასვლელთან არის ხიდი, რომელიც აბოხოქრებულ მდინარე ცხენისყალბეა გადაჭიმული. იქ ტოვებენ ხოლმე ეტლს, რადგან აღმართზე ასვლა მხოლოდ ფეხით ან პალანკინითაა⁴⁷ შესაძლებელი.

ეკიპაჟები ერთიანად დაიცალა. გადაკვეთეს ხალიჩებდაგებული და ყვავილებით უხვად მორთული ხიდი, ტრიუმფალური თალი – სამეგრელოს საზღვრის მანიშნებელი. აქედან გზა მიდიოდა გემოვნებით დეკორირებული პავილიონისკენ, სადაც წყვილს შეეგება ჩემი ვაჟის თანამშრომელთა და მსახურთა ჯარი, ასევე და, უპირველეს ყოვლისა, იქაური თავადაზნაურობა. ახალყოილთა სადღეგრძელო ითქვა და ყველანი, ვისაც ცხენი ჰყავდა, ამხედრდნენ, მერის პალანკინს გარს შემოერთყნენ; დაიძრა დიდებული პროცესია, იმ გზის მთელი სავალი ნაწილი დაიფარა, რომლის შვიდი კილომეტრი სულ ზემოთ, მთაში ადის.

ზარბაზნის პირველ გასროლაზე, რაც მათ მოსვლას მოასწავებდა, ჩემს მხლებლებთან ერთად სახლის აივანზე გამოვედი. პირველად მივიღე ლეჩხუმელ თავადთა ცხენოსნები თავადი გრეგორის, ნიკოს ოჰაიმის, წინამძღოლობით. მერე დავინახე ახალყოილნი, რომლებიც საეკლესიო ზარების, სამხედრო ორკესტრის მუსიკისა და მთიდან ექოდ დაბრუნებული ქვემეხის კანონადის ფონზე მიახლოვდებოდნენ. ხალხს გამოეყო ინტენდანტი⁴⁸ და წყვილს, მშობლიური წეს-ჩვეულებების შესაბამისად, პურითა და მარილით შეეგება. მერე ორივენი ჩემკენ გამოეშურნენ, ჩემ წინ დაიჩოქეს, რათა თავიანთი ახალი სახლის ზღურბლზე დალოცვა მიეღოთ. ეს ისეთ ამაღელვებელ და საზეიმო მომენტად იქცა, რომ მოჟრიაშულე ბრბოს ხმაური უეცარმა მდუმარებამ შეცვალა; ყველას ცრემლი მოერიო; განსაკუთრებით აღელვებული იყო მერი, იმდენად აღელვებული, რომ იძულებული გავხდი, სახლში შემეყვანა – დამშვიდება და დასვენება სჭირდებოდა.

ბოლოს ეკლესიისკენ გავემართეთ, სადაც ღვთის სადიდებელი (Te Deum) აღსრულდა და არქიმანდრიტმა⁴⁹ და, ამავე დროს, ჩემმა მოძღვარმა⁵⁰ ვითარების შესაბამისი სიტყვა წარმოთქვა. დასრულებულ საეკლესიო ღონისძიებათა შემდეგ ჩემი რძალი შევიყვანე დიდ დარბაზში, რათა იქ გადაამეცა მისტვის ჩემი საჩუქარი – ბრილიანტის სამკაული; რაც შეეხება მათ საცხოვრებელს, მათთვის საგანგებოდ რომ მოვაწყობინე, ნამდვილი ზარდახშაა.

ცოტა ხანს შევისვენეთ, მერე დაიწყო ნადიმი, რაც გვიან ღამემდე გაგრძელდა. ერთმანეთს ენაცვლებოდა: საორკესტრო შესრულება, ნაციონალური სიმღერები და ცეკვები, სიხარულის სალუტები, თამაშები, შეჯიბრებები. სტუმართა რიცხვი სამასს აღწევდა, რომელთა ნაწილი პარკში, დიდი ხეების ქვეშ სუფრასთან იჯდა. მეორე დღეს ყველაფერი თავიდან დაიწყო, რადგან ახლა უკვე მერის დაბადების დღეს აღვნიშნავდით და ამასთან დაკავშირებით საღამოსთვის მოვამზადე ერთი სიურპრიზი, სახელდობრ, ფეიერვერკი და ბენგალური ილუმინაციით მთების განათება, რაც ჯადოსნური სანახაობა გამოდგა“.

როგორც კი ასეთ ბარათს მივიღებდი, მაშინვე ზუტენერების ოჯახს ვუკითხავდი. ჩემს გადაწყვეტილებას ვერაფერი შემაცვლევინებდა – დამთავრდებოდა თუ არა სასახლის მშენებლობა, კავკასიაში წავიდოდი. სამუშაოები მართალია ძალიან გაჭიანურდა, მაგრამ მაინც კმაყოფილები ვიყავით. ბედნიერად ვცხოვრობდით, ხან ჰარმანსდორფში ვიყავით, ხან – ვენაში. განსაკუთრებით ჰარმანსდორფი გთავაზობდა დაუსრულებელ ბედნიერებას. ნადირობის სეზონზე უამრავი სტუმარი გვყავდა, იყო ცეკვა-თამაში და თეატრალური წარმოდგენები. პარკში მდებარეობდა დიდი თეატრალური დარბაზი, სცენით და გარდერობით. იქ ვდგამდით სხვადასხვა შოუსა თუ კომედიას, რომელსაც არა მხოლოდ ჰარმანსდორფისა და ახლომახლო სასახლეების პუბლიკა ესწრებოდა, არამედ მეზობელი სოფლებიდან გლეხებიც მოდიოდნენ და ავსებდნენ მაყურებელთა დარბაზს. მერე მოსავლის აღებისა და რთვლის ზეიმები იწყებოდა, გასვლები მეზობელ საცავებში (Stockern), სადაც იყო მხიარული ახალგაზრდობა, ვირის ოთხთვალათა პარტიები და ძვირფასი tête-à-tête მოპარული საათები. ერთადერთ დისონანსს ქმნიდა სახლში ცუდად წარმართული სამეურნეო საქმიანობა. ცოგელსდორფის მამულში, რომელიც ჰარმანსდორფს მიეკუთვნებოდა, განლაგებული იყო ქვის სამტეხლოები, რომლებიც აქტიურად, თუმცა არცთუ რენტაბელურად მუშაობდა. კერძოდ, ცოგელდორფის ქვებით აიგო ვენის ახალი მუზეუმები, ჰერკულესის პატარ-პატარა სტატუებიც ამ ქვისგანაა გამოთლილი, მაგრამ უნამუსო დირექტორმა საწარმოს მოგების ნაცვლად ვალები დაადო. შექმნილი პრობლემის ტვირთი უფრო მეტად მშობლებს დააწვათ კისერზე; ბავშვებმა ეს ამბავი ყურმოკვრით თუ იცოდნენ და ისინიც თავს არ იწუხებდნენ ამავნე დარდით. მათი ცხოვრების წესს გარეგნულად არაფერი დასტყობია, თავი არაფრით შეუზღუდავთ და კვლავ გრძელდებოდა ხალისიანი ყოფა. ნაღვლიანი საათები ჩემსა და არტურ გუნდაკარს შორის მაშინ დგებოდა, როცა აუცილებელ განშორებაზე ფიქრს თავს ვერ ვაღწევდით... „ოჰ, მოდი, თავი დავანებოთ ამას, – წამოიძახებდა ხოლმე ერთ-ერთი ჩვენგანი ასეთი შემოტევების დროს, – სამუდამო არაფერია, მადლობა ვუთხრათ ჩვენს ბედისწერას, რომ ზეციური ბედნიერების ეს პატარა ულუფა მაინც გვაჩუქა...“ და ეს გრძელდებოდა თითქმის სამი წლის განმავლობაში. ჩემი გულისნადები გავუზიან-

რე დედაჩემს, რომელიც გრაცში თავის დასთან იყო სტუმრად. დედა, რა თქმა უნდა, მარწმუნებდა, ან ქორწინებისთვის მიმეღწია, ან მაგ სახლიდან წამოვსულიყავი. ბოლოს, არტურის დედამაც შეგვატყო რაღაც. ყინულივით ცივად, მაგრამ მაინც თავაზიანად მაგრძნობინა, რომ ყველაფერს მიხვდა. ჩვენს დაქორწინებას რომ არავინ დაეთანხმებოდა, ეგ ხომ ისედაც ყოველთვის ვიცოდით. ამაზე არც მიფიქრია. არტურისთვის ასეთი მეწყვილის უგუნურებას ვაღიარებდი – ყოველგვარი ქონების გარეშე, შვიდი წლით უფროსი ქალი... ან ის თვითონ: ჯერ კიდევ სამსახურის გარეშე, ქონების გარეშე, მაგრამ იმის უფლება და საშუალება კი ნამდვილად ჰქონდა, რომ ბრწყინვალე საცოლე მოენახა – ყველა გოგო ამაზე ოცნებობდა. ნუთუ მისი ბედი ასე უნდა წამეხდინა? ეს გეგმად არასდროს დამისახავს – ერთ დღეს უნდა დავცილებულიყავით, და ახლა, როდესაც საიდუმლო სანახევროდ გამჟღავნდა, დადგა მომენტი, როცა ურთიერთობა სამუდამოდ უნდა გამეწყვიტა. ძალიან მტკივნეული იყო. მთელი ჩემი ძალ-ღონე მოვიკრიბე და ბარონესას ვუთხარი: „ამ სახლიდან წავალ. სამეგრელოში ჯერ ვერ მივდივარ, სასახლე მხოლოდ ერთ წელიწადში დასრულდება. ხომ არ მომცემთ რეკომენდაციას ლონდონში? იქ მინდა ადგილის მონახვა – ვენისგან რაც შეიძლება შორს“.

„კარგი ამრია, ძვირფასო, – მითხრა გულთბილად, – თქვენი მესმის... ნახეთ, დღევანდელ გაზეთში ერთი განცხადება ვნახე, ეს ალბათ ხელს გაძლევთ, ხომ არ მისწერდით?“

განცხადება იუწყებოდა: „ძალიან მდიდარი და უაღრესად განათლებული, პარიზში მცხოვრები ერთი ხანდაზმული ბატონი ეძებს ასეთივე პატივსაცემი ასაკის და ენების მცოდნე ქალბატონს, როგორც მდივანს და სახლის საქმეების მეთვალყურეს“.

მართლაც მივწერე და მივიღე პასუხი, რომელსაც ხელს აწერდა მაშინ ჩემთვის უცნობი პიროვნება, სახელად ალფრედ ნობელი.

ეს წერილი ბარონესას ვაჩვენე. იმან გაიკითხა და გაიგო, რომ დასახელებული პიროვნება იყო საყოველთაოდ პატივცემული და სახელგანთქმული დინასტიის დამფუძნებელი. მე და ჰერ ნობელმა რამდენიმე წერილი კიდევ მივწერეთ ერთმანეთს. იგი წერდა მახვილგონივრულად და იუმორით, თუმცა ნალვლიანად. როგორც ჩანს, თავს უბედურად გრძნობდა; მიზანტროპი ჩანდა, თან დიდი განათლება და ფილოსოფიური სიღრმეც ეტყობოდა. შვედი იყო, თუმცა მეორე დედაენად რუსული მიაჩნდა, უმცედომოდ და ელევანტურად წერდა ასევე გერმანულად, ფრანგულად და ინგლისურად. ჩემი წერილებიც, ეტყობა, მოსწონდა. ცოტა ხანში შეთანხმებასაც მივაღწიეთ: მუშაობას უნდა შევდგომოდი. პარიზში ჩემი გამგზავრების თარიღი ზუსტად განისაზღვრა. ეს ნიშნავდა იმას, რომ უნდა გამოვთხოვებოდი ჩემთვის ყველაზე საყვარელს, რაც კი შეიძლება ადამიანს ჰქონდეს... „განშორება ტკივილიანია“ – ხალხში გავრცელებული ამ გამონათქვამის სიმართლე ჩემს თავზე ვიწვინე.

ახლაც შემძლია დამშვიდობების საათების გამოხმობა. ეს იყო ჩემი გამგზავრების წინა საღამოს. რამდენიმე დღე ვენაში გავატარე, ჩემს ნაცნობთან. გასამგზავრებლად ვემზადებოდი. ბოლო დღეს არტურიც ჩამოვიდა ჰარმანსდორფიდან, რათა ბოლოჯერ ჩემთან ერთად ყოფილიყო. ჩემმა მასპინძელმა მართო დაგვტოვა – იცოდა, რომ ერთმანეთისთვის კიდევ ბევრი გვქონდა სათქმელი, მაგრამ ლაპარაკი გავგიჭირდა. ერთმანეთს ვეხუტებოდით და ვტიროდით. უნდა დავშორდე! ნუთუ ეს შესაძლებელია? გვეყოფა კი ძალა? იქნებ, რამე მოხდეს, რომ დავრჩე? ოჰ, ეს მეტისმეტად კარგი იქნებოდა... არაფერიც არ მოხდება... არ შეიძლება... და კიდევ რამდენიმე უხმო, მარილისგემოიანი კოცნა, კვლავ ამოოხვრა და ხელახლა ჩივილი, ტკივილით გაჯერებული მოსაფერებელი სიტყვები. წასვლამდე არტური ჩემ წინ დაეცა და კაბის კალთაზე მეამბორა.

„ერთადერთო, მეფურად დიდსულოვანო, მადლობას შემოგწირავ, მადლიერი ვარ მთელი ჩემი არსებით. შენი სიყვარულით ისეთი ბედნიერება განმაცდევინე, რაც ჩემს ცხოვრებას დიდებულებას მიანიჭებს. ბედნიერი იყავ!“

ბედნიერების ზენიტი

ადრე დილით უკვე პარიზში ვიყავი. ბატონი ნობელი სადგურზე დამხვდა და კაპუცინების ბულვარზე გრანდ-ჰოტელში მიმიყვანა, სადაც ჩემთვის ოთახი იყო შეკვეთილი. ჭიშკართან დამტოვა და მითხრა, რამდენიმე საათში მოვალ. იქამდე უნდა დამესვენა. მაღაკოფის ქუჩაზე მდებარე მის პატარა სასახლეში ჯერ ვერ შევიდოდი – იმ ნაწილში, სადაც მე უნდა მეცხოვრა, ახლა შპალიერს აკრავდნენ. სანამ მოაწყობდნენ, ჯერჯერობით, სასტუმროში უნდა დავრჩენილიყავი. ალფრედ ნობელი ძალიან სასიამოვნო შთაბეჭდილებას ახდენდა. „ხანდაზმული ბატონი“, როგორც განცხადებაში ეწერა და როგორადაც ჩვენ, ყველას წარმოგვედგინა – თეთრთმიან, მოტეხილ მოხუცად, სინამდვილეში ასეთი არ აღმოჩნდა. 1833 წელს დაბადებული ნობელი მაშინ 43 წლის იყო, აგებულიებით საშუალოზე დაბალი, მუქი ხშირი თმა ჰქონდა, კარგი ტუჩ-კბილი, ცოტა პირქუში გამომეტყველება, რასაც ლამაზი ცისფერი თვალები აწონასწორებდა; მის ხმაში მელანქოლიური და სატირული ინტონაციები ერთმანეთს ენაცვლებოდა. ნაღვლიანი და დამცინავი – ასეთი მანერა გამოარჩევდა. ამიტომ ხომ არ იყო ბაირონი მისი საყვარელი პოეტი?

მაშ ასე, რამდენიმე საათში, კარგად რომ დავისვენე, მოვსულიერდი და ჰარმანსდორფისკენ დეპეშაც ვაფრინე, ბატონი ნობელიც მესტუმრა. ჩვენი ურთიერთგაცვლილი ბარათები დაგვეხმარა, ერთმანეთთან თავი მთლად უცხოდ არ გვეგრძნო და ჩვენ შორის მაშინვე გაცხოველებული და საინტერესო საუბარი გაჩაღდა. ქვემოთ, დარბაზში, საუზმობის შემდეგ ეტლში ჩავსხედით და ელისეს მინ-

დვრებისკენ გავისეირნეთ. მერე მან თავისი სახლი მაჩვენა და ჩემთვის განკუთვნილი ოთახებიც დამათვალიერებინა.

ამ ოთახებში არასდროს მიცხოვრია. სანამ ისინი კეთილმოეწყობოდა, პარიზიდან მანამდე გავემგზავრე. ეს ასე მოხდა. უბედური ვიყავი. უკიდევანოდ უბედური. ტკივილი სახლის მონატრების გამო, სასიყვარულო ლტოლვის გამო... განშორების სიმწარე ისე მტანჯავდა, რომ ვერც კი წარმომედგინა, ასეთი ტანჯვა თუ შეიძლებოდა. დეპრესიები არტურისგან, აგრეთვე მისი და გოგონების წერილები ყოველდღიურად მოფრინავდა ჩემკენ. დები მწერდნენ, რომ არტურს ვეღარ ცნობენ, სიტყვას აღარ ამბობს, თითქოს მეღანქოლიამ დარია ხელიო. მარტო როცა ვიყავი, იმასღა ვახერხებდი, რომ მეტირა, ან სახლში მიმეწერა, ან დარდისგან მეკვნესა. ალფრედ ნობელთან ყოფნისას მაშინვე სხვა რამეზე გადავერთვებოდი ხოლმე, რადგან ისე მეტყველებდა, ისე ჰყვებოდა, ფილოსოფიურად ისე ჩაუღრმავდებოდა ხოლმე საკითხს, რომ მისი ლაპარაკი ერთიანად გითრევდა. მასთან ერთად სამყაროსა და ადამიანებზე, ხელოვნებასა და ცხოვრებაზე, დროისა და მარადისობის პრობლემებზე საუბარი ნამდვილი სულიერი ნეტარება იყო. საზოგადოებრივი ცხოვრებისგან თავი შორს ეჭირა – უგემოვნობის, სიყალბის, უხამსობის გარკვეული ფორმები ზიზღს ჰგვრიდა. ის მთლიანად ენდობოდა მომავალს, უფრო მაღალი დონის კაცობრიობის აბსტრაქტულ იდეალს – „როცა ერთხელ უფრო მაღალგანვითარებული ხალხი მოვა ამქვეყნად“ – მაგრამ სრულ უნდობლობას უხცადებდა მედროვეებს, რადგან, თავისი საქმიანობიდან გამომდინარე, უამრავ სულმდაბალ, ეგოისტ, უპატიოსნო ადამიანს იცნობდა. იტყვებოდა იყო საკუთარი თავისადმი, მორცხვი და დაკომპლექსებულიც კი. თავი მიაჩნდა საძაგელ არსებად და დარწმუნებული იყო, რომ სიმპათიას არ იმსახურებდა; სულ ეშინოდა, რომ მხოლოდ მისი სიმდიდრის გამო ეპირფერებოდნენ. ალბათ ამიტომ არ დაქორწინებულა. საკუთარი ნაშრომები, წიგნები, ექსპერიმენტები – ეს ავსებდა მის ცხოვრებას. იგი იყო ასევე მწერალი და პოეტიც, მაგრამ თავისი პოეტური ნამუშევრები არასდროს გამოუქვეყნებია. როგორღაც წამაკითხა თავისი ინგლისურ ენაზე შექმნილი, ფილოსოფიური შინაარსის ასგვერდიანი პოემის ხელნაწერი – უბრალოდ დიდებული რამე, ჩემი აზრით.

დაფარულ ნაღველს რომ ვატარებდი, მალევე მიხვდა.

„თქვენი გული ჯერაც დაუპყრობელია?“ – მკითხა ერთხელ.

„არა“, – ვუპასუხე გულახდილად.

გამოკითხვა გააგრძელა და მეც მოვუთხრე ჩემი სიყვარულისა და მარცხის მთელი ისტორია.

„გაბედულად მოქცეულხართ, მაგრამ ბოლომდე გმართებთ გამბედაობა – უნდა შეწყვიტოთ მიმოწერა... გაივლის დრო, ახალი ცხოვრება, ახალი შთაბეჭ-

დილებები და ორივენი დაივიწყებთ ერთმანეთს, ის, ალბათ, თქვენზე უფრო მალეც კი“.

მიმოწერის შეწყვეტა? ამას ვერ ვიზამდი. ეს იყო ჩემი ნუგეში. რა უნდა მექნა, მარტო რომ ვიყავი, თუ არა ჩემი ძვირფასისთვის წერილი მიმეწერა – განა არ უნდა მომეთხრო დაწვრილებით, რას განვიცდიდი და რას ვგრძნობდი?!

ალფრედ ნობელს ჩემთვის დღეში მხოლოდ ერთი ან ორი საათის დათმობა შეეძლო, რადგან სამუშაოთი იყო დაკავებული. ამჯერად კიდევ ერთ, ახალ გამოგონებაზე ფიქრობდა.

„მინდა შევქმნა ახალი მასალა ან მანქანა, – გამანდო მან თავისი ახალი იდეა, – ისეთი საშინელი, დამანგრეველი ზემოქმედების ძალის მქონე, რომ მისი წყალობით ომები შეუძლებელი გახდება“.

ჩემი ჩასვლიდან დაახლოებით ერთი კვირის მერე ბატონი ნობელი ცოტა ხნით შვედეთში უნდა გამგზავრებულიყო, სადაც დინამიტის ქარხანა ჰქონდა; იგი თვით მეფემ გამოიძახა.

სრულიად მარტო დავრჩი. ჩემი საყვარელი მამაკაცის მონატრება აზვირთდა და აუტანელი გახდა. ორი დეპეშა მივიღე. ერთი სტოკჰოლმიდან: „კარგად ჩავედი. რვა დღეში ისევ პარიზში ვიქნები“ – და მეორე ვენიდან: „უშენოდ სიცოცხლე არ შემიძლია!“ – „მე კიდევ უშენოდ!“ – წამოიძახა ვიღაცამ ჩემში და ამის შემდეგ მოქმედების დროც დადგა. კიდევ ერთი უძილო ღამე და გეგმა მომწიფდა; მეორე დღესვე გავგზავნე ბარათი სტოკჰოლმში, რომ ამ გარემოებაში ჩემთვის შეუძლებელი იყო მალაკოფის ქუჩაზე მოვალეობის შესრულება – მას მადლობას ვუხდიდი გაწეული ნდობისა და კეთილგანწყობისთვის – მაგრამ უკან, ვენაში უნდა დავბრუნებულიყავი.

ბრილიანტებით მოოჭვილი ძვირფასი ჯვარი მქონდა, ჩემი მეურვის, ფურსტენბერგის საგვარეულო ნივთი; წავედი მის გასასხვისებლად; საფასური მეყო სასტუმროს ნომრის ანგარიშის გადასახდელად და ვენისკენ სწრაფი მატარებლის უახლეს რეისზე ბილეთის ასაღებად; და ცოტა ნაღდი ფულიც დამრჩა. ისე ვმოქმედებდი, თითქოს სიზმარში ან ჰიპნოზში ვყოფილიყავი. აზრმა, რომ ეს ნამდვილი სიგიჟე იყო, რომ ამით ალბათ ბედნიერებიდან პირდაპირ უბედურებაში ვვარდებოდი, სადღაც არაცნობიერში კი გამიელვა, მაგრამ არ შემეძლო, არ შემეძლო სხვანაირად; და ის ნეტარება, რასაც კვლავ შეყრის მომენტისგან ველოდი, ყველაფერს გადასწონდა, რაც შეიძლებოდა დამმართნოდა, მათ შორის სიკვდილსაც.

არტურისთვის ჩემი ჩასვლა არ შემიტყობინებია – სიურპრიზი მინდოდა მომეწყო. სადგურიდან სასტუმროში წავედი; გავგზავნე ბარათი შეცვლილი ხელწერით კანოვაცასეში, რომელშიც ბარონ არტურს ვთხოვდი მობრძანებულიყო სასტუმრო მეტროპოლში, მე-20 ოთახში, სადაც ერთი ქალბატონი პარიზიდან მას გადასცემდა გრაფინია ბერტას გზავნილს.

ნახევარ საათში შეიძლება უკვე მოსულიყო. გულაძგერებული ვაყურადებიდა ყველა ნაბიჯს დერეფანში, დიდხანს ცდაც არ დამჭირვებია, ვიცანი საყვარელი ნაბიჯები; კარზე დააკაკუნეს და – „მობრძანდით“, – მიიწვიეს, მაგრამ ხმა არ მემორჩილება! კარი მაინც გაიღო და – ის იყო!

სიხარულით ატაცებული მივვარდი.

„შენა ხარ, შენ თვითონ ხარ!“ – ყვიროდა ისიც, და ზუსტად ისევე ქვითინით ვეხუტებოდით ერთმანეთს, როგორც გამოთხოვების საღამოს, მაგრამ ამჟამად არა ტანჯვის, არამედ უსაზღვრო ბედნიერების გრძნობით აღვსილნი.

„კვლავ აქ მყავხარ, ისევ აქ მყავხარ – აღარასდროს გაგიშვებ აქედან!“

„აღარასდროს წავალ!“

ახლა დივანზე ვისხედით, ერთმანეთს ჩახუტებულები; მოყოლის დროც მოვიდა. როგორ ვეწამე, როგორ ეწამა... როგორ ფიქრობდა უკვე თვითმკვლელობაზე... „არა, არა, ჩვენ ერთმანეთს ვეკუთვნი, ერთმანეთს ველარაფერი გაგვყრის...“

მაგრამ ახლა? ამიერიდან რა უნდა გვექნა?

გეგმების შედგენა გადავდოთ, შემეხვეწა. მე ისე სავსე ვიყავი კვლავ შეყრის ზეიმით, რომ გეგმის შესადგენად შეკითხვების დასმისა თუ ეჭვების გამოთქმის თავი აღარ მქონდა. ყველა იმ ნაბიჯს მიმართავს შორის, რაც კი შეყვარებულებსა თუ პოეტებს გამოუყენებიათ – ანგელოზი ხარ – ჩემი სასოება ხარ – და სხვა მსგავსი – ყველაზე ლამაზი და გამომხატველი აღმოჩნდა: „შენ ხარ ჩემი სიმშვიდე!“

მან კი ამ „სიმშვიდიდან“ გამომაფხიბლა:

„მომავალზე უნდა ვისუბროთ. ერთი რამ ცხადია – ასეთი რამ აღარ უნდა განმეორდეს, რომ უბადრუკი საზოგადოებრივი ამრის გამო ერთმანეთს დაგვაშორონ, ან თვითონ ჩვენ დავშორდეთ ერთმანეთს. უნდა დავქორწინდეთ – ამას წყალი არ გაუვა“, – მითხრა მტკიცედ.

დიახ, ამას წყალი არ გაუვიდოდა. პატიოსნად ვეცადეთ ერთმანეთს დავშორებოდით და ვნახეთ, რომ ეს შეუძლებელი, უბრალოდ შეუძლებელი იყო: ერთმანეთს ეკუთვნოდნენ სამუდამოდ – ეს იყო ენით გამოთქმული ბედნიერება; ერთმანეთზე უარი თქვა სამუდამოდ – ეს იყო იგივე სიკვდილი. ამ არჩევანის წინაშე ეჭვის ნასახივს აღარ დაგვრჩა – უნდა ვიცოცხლოთ, ვიცოცხლოთ და ვინეტართ!

ასე შევუდექით გეგმების დაწყებას. ჯვარს დავიწერთ – ფარულად – და მერე გამოვჩნდებით! თავს როგორ ვერ გავიტანთ: ვიმუშავებთ, ჩვენს უნარ-შესაძლებლობებს გამოვიყენებთ – ადგილს ვიპოვით... მოდი, კავკასიაში წავიდეთ! – შევთავაზე მე, – იქ გავლენიანი მეგობრები მყავს. დედოფალმა ხომ ჯერ კიდევ რამდენი წლის წინ ჩამომართვა პირობა, რომ ქმართან ერთად ვესტუმრებოდი. მაშასადამე, ეს იქნება ჩვენი საქორწილო მოგზაურობა! რუს იმპერატორთან ურთიერთობების წყალობით შეიძლება მეფის კარზე ან სახელმწიფო სამსახურში რამე ადგილი გვიპოვონ კიდევ.

გეგმა აღვასრულეთ. არავის უნდა შეეტყო პარიზიდან ჩემი დაბრუნების შესახებ. რამდენიმე კვირით დავიმალე ლუნდენბურგის ერთ-ერთ ოჯახში, ჩემთვის უსაყვარლეს ხალხთან; „ჩემომ“ (მისთვის არტური არასდროს მიწოდებია, სულ „ჩემოს“ ვეძახდი და ამ მოგონებებშიც ასე ვუწოდებ) მოაგვარა ჯვრისწერის განაცხადის საკითხი, შეარჩია სანდო მესაიდუმლე მოწმეები, მოაწესრიგა ყველა საჭირო საორგანიზაციო საკითხი, რომლებიც ეხებოდა საბუთებს, სამგზავრო ფულს, ბარგს და სხვ. ბედიც გვწყალობდა. ქალაქისგან მოშორებულ პატარა ეკლესიაში შეტანილი განაცხადი ოჯახის ყურამდე არ მისულა – და ერთ მშვენიერ დილას – ეს იყო 1876 წლის 12 ივნისი, გავემგზავრე მე, სამოგზაურო კაბასა და ქუდში გამოწყობილი, გუმპოლდსკირხნერის სამრევლო ეკლესიაში; ჩემი დაწინდული იქ მელოდებოდა ჩვენ-ჩვენს მეგობრებთან ერთად, და გვერდითა ეკვდერში მივეახლეთ მცხოვან მოძღვარს ჯვრის დასაწერად. მალე უკვე ცოლ-ქმარი ვიყავით.

საქორწილო მოგზაურობა (1876-1885)

ჩვენს თავს ჯერ იმ გემის გემბანზე ვხედავ, რომელსაც ოდესიდან შავი ზღვით ფოთის ნავსადგურში გადავყავართ. მე ზღვით პირველად ვმგზავრობ, მას კი ზღვა ვნებიანად უყვარს. თურმე, ყოველთვის ოცნებობდა ასეთ მოგზაურობაზე და ახლა მის სიხარულს საზღვარი არ აქვს, რაკი ოცნება აუხდა... ჩვენი მიზანი იყო იმ ქვეყანაში ჩასვლა, საიდანაც იაზონმა ოქროს საწმისი მოიპარა. იმ მომენტში, მგონი, ორივე ჩვენგანში იძალა იაზონის განწყობამ: ერთმანეთში ირეოდა სათავგადასავლო ჟინი, დამპყრობლის თავდაჯერებულობა, იმედებით გაბრუება. წინ გველოდა ახალი, მოულოდნელობებით აღსავსე სამყარო; ისეთ მიწაზე უნდა დაგვედგა ფეხი, რომელიც გამორჩეული იყო ყველაზე უფრო კლასიკური დიდებულებით; უამრავი ისეთი განცდა გველოდა, რომელთა ბოლომდე წარმოდგენაც კი არ შეგვეძლო. ვიცოდით, რომ გველოდებოდნენ და ხელგაშლილი შემოგვეგებებოდნენ. ჩვენი რომანის ამბავი ვენიდან დაწვრილებით მივწერე დედოფალსაც და თავად ნიკოსაც, რომელიც ასევე კავკასიაში ბრძანდებოდა და ჩვენი სტუმრობის შესახებაც ვამცნე. სიხარულით სავსე „კეთილი იყოს თქვენი მობრძანება!“ მოგვივიდა ტელეგრაფით. ის, რომ ნიკო, ჩემი ძველი მეგობარი, „ჩემოს“ იმპერატორის კარზე ადიუტანტის ან რაიმე მსგავსის თანამდებობას გაუხერხებდა, ამაში ორივენი სრულიად დარწმუნებულნი ვიყავით. საერთოდაც, ერთად ყოფნით აღტაცებულებს ჩვენი სითამამე ისეთი ძალით გვახარებდა, – აქამდე ყველაფერი ისე შესანიშნავად გამოგვდიოდა, – როგორც sur des roulettes,⁵¹ რომ მომავალშიც ჩვენი ბედნიერებისა თუ გამართლების მეტ დადასტურებას მოველოდით. ერთ

დღესაც ტრიუმფით დავბრუნდებოდით უკან! ისე, შინ დაბრუნებას კარგა ხანს არც მოვისურვებდით. ჭერჯერობით გვინდოდა გვენახა ეს მშვენიერი, მდიდარი, საოცარი სამყარო, ჩვენც მოგვეპოვებინა ოქროს საწმისი. თუმცა, სიმართლე ითქვას, ის არც გვჭირდებოდა – ეს იყო ყველაზე კარგი მთელ ამ ამბავში. სამყაროს რაც უნდა დიდი განძი შემოეთავაზებინა ან დაემალა, ჩვენ უკვე გვქონდა აუწონავი სიმდიდრე ერთმანეთის სახით, და ჩემზე უფრო ძლიერად ამას „ჩემო“ შეიგრძნობდა. იგი ხომ ახლახან გახდა სულ რაღაც ოცდაექვსი წლისა და ეს იყო მისი პირველი მოგზაურობა უცნობ მომავალში. მე უკვე ბევრი იმედგაცრუება მენახა და 33 წლის ასაკში უკვე წარსულში დავტოვე თავბრუდამხვევი მდგომარეობა, რასაც ახალგაზრდობას ეძახიან. მაგრამ მისი ახალგაზრდული აღტაცება ჩემზეც დამატორობლად მოქმედებდა და მეც მასავით ბავშვურად აღტაცებული ვიყავი.

უხიფათო გადაცურვის შემდეგ ჩვენი გემი აზიურ სანაპიროს მიაღება. სამყაროს სხვა ნაწილში მოხვედრა – ეს ხომ მოგზაურს გარკვეულწილად სიამაყით აღავსებს; სიამაყით, რომელიც ძველ მოგზაურებს სიცილადაც არ ეყოფოდათ. „ჩემმა“ ფეხი ევროპის მიღმა მიწას პირველდამპყრობლის სიამაყით დაადგა.

„ესეც ასე“, – წარმოთქვა საბეიმოდ, – აი, უკვე აზიაში ვართ!“

აზიაა თუ ავსტრალია, მიწაა თუ მარსი – მეც ვბეიმობ, იმიტომ რომ ერთად ვართ და მთავარი ესაა.

დედოფლის გამოგზავნილი კაცი შეგვეგება გემიდან გადმოსხმის ადგილას. მან გადმოგვა თავისი ქალბატონის წერილი ჩვენი ჩამოსვლით გამოწვეული სიხარულისა და ერთი თხოვნის თანხლებით, რომ ჩვენი ჩასვლა გორდში (საზაფხულო რეზიდენციაში) კიდევ რვა დღით უნდა გადაგვეწია, რადგან ამჟამად ზუგდიდში მყოფ ჩვენს მასპინძლებს მთაში ასაბარგებლად ამდენი ხანი დასჭირდებოდათ. ჩვენ უნდა გავყოლოდით მათ მიერ მოვლენილ პიროვნებას, ის წავგიძღვებოდა ქუთაისისკენ და ამ პერიოდს სასტუმროში გავატარებდით. ასე მივანდეთ თავი ამ ნდობით აღჭურვილ ადამიანს, ეკონომიკური სამსახურის ქართველ თანამშრომელს, რომელსაც ცოტ-ცოტა ფრანგულიც ეხერხებოდა. მას ემოსა ადგილობრივი ნაციონალური ტანსაცმელი: გრძელი ჩოხა, სამკერდე ღილაკებში ჰილზები ეწყო, თავზე ყაბალახი⁵² ეხურა, ხმალი საქმრეში ჰქონდა გარტობილი. იმავე დღეს ქუთაისისკენ მატარებელი აღარ გადიოდა და ამიტომ ის ღამე ფოთში უნდა გაგვეთენებინა. იქ ერთადერთი უბრალო სასტუმრო ჰქონდათ, მაგრამ *que faire*⁵³ – ამ რუსულიდან თარგმნილ გამოთქმას აქ ხშირად გაიგონებდი; იგი მოიცავს მხრების აჩეჩვასთან დაკავშირებულ უარყოფას, რომელიც გამოხატავს არა იმდენად კითხვას, თუ რა უნდა გააკეთო იმისთვის, რომ რაღაცა პრობლემა დაძლიო, არამედ უფრო მეტად ნიშნავს: ვერაფერს იზამ!

მართლაც, ძალიან უბრალო სასტუმრო იყო: ღამე სავარძლებზე გავატარეთ, რადგან თავისუფალი საწოლები და ლოგინი არ ჰქონდათ; თავის მოსაწესრიგებლად პირსაბანის მაგიდა მოვითხოვეთ, მაგრამ ასეთი რამე ვერ აღმოვაჩინეთ.

ნომრის მოსამსახურე გოგო გამოვიძახე და ფეხშიშველა გლეხის ბიჭი გამომეცხა-და, წვერგაჩეჩილი, შავი გრუზა თმით. იმას ჩვენი სურვილი ვერ გავაგებინეთ და დასახმარებლად ვუხმეთ ჩვენს მეურვეს, რომელიც ამავე სასტუმროში, ფოთის ამ „პალასჰოტელში“ (Palacehotel) იყო გაჩერებული. აღმოჩნდა, რომ ამ სახლში მხოლოდ ერთადერთი კალის ვარცლი მოიპოვებოდა, რომელსაც მოთხოვნის მიხედვით ერთი ოთახიდან მეორეში დაატარებდნენ და თან ერთადერთ პირსახოცსაც მიაყოლებდნენ (წარმოიდგინეთ მისი მდგომარეობა!).

მეორე დილით, არცთუ ისე დასვენებულებმა და ძალამოკრებილებმა, მაინც საუკეთესო განწყობით განვაგრძეთ გზა, რათა მიგვეღწია ჩვენი მოგზაურობის შემდგომ ეტაპამდე – ქუთაისამდე, ამავე სახელწოდების გუბერნიის დედაქალაქამდე. იქაც გველოდა მეგრული ოჯახის მიერ წარმოგზავნილი პიროვნება – ახალგაზრდა თავადის ინტენდანტი, მსუქანი და როხროხა სომეხი, რომელიც ფრანგულს ასევე ძლივს ამტვრევდა, ოღონდ იგი უკვე ევროპულად იყო გამოწყობილი. წაგვიყვანა ქუთაისის საუკეთესო სასტუმროში, რომელიც მთლად „პალასჰოტელი“ ჯერჯერობით ვერ იყო, მაგრამ წუხანდელ ბუნატთან შედარებით მართლა ასეთად წარმოგვიდგა – აქ ყველა სტუმარს თავისი პირსახიანი მაგიდა და საკუთარი პირსახოციც კი ჰქონდა, თანაც ოთახებიც და ლოგინებიც სუფთა იყო. ყველაფერი ისე საშინლად ეგზოტიკურად გვეჩვენებოდა, რასაც კი ვუყურებდით, ვისმენდით და ვცნოსავდით: უცხო ტიპაჟები, უცხო ჩაცმულობა, ნაგებობათა სხვა სტილი... რაც შეეხება ყნოსვის შეგრძნებებს: სრულიად თავისებური, არცთუ უსიამო სუნი მზეზე გამხმარი კამეჩის ნეხვისა; ეგზოტიკა იყო ჩვენთვის კამეჩიც, რომელსაც აქ საზიდრებში შესაბამელად და საწველ ფურადაც იყენებდნენ და რომელიც ქუთაისისკენ მიმავალ გზაზე ბევრგან ვნახეთ გუბეებში ჩაწოლილი.

აუტანლად ცხელოდა. ოთახში გაჩერება შეუძლებელი იყო. დღეებს ვატარებდით ხის აივანზე, რომელიც მთელ სახლს გარშემო ერტყა და სადაც გვიმასპინძლებდნენ (საკვები ერთფეროვანი იყო – მხოლოდ ცხვარი, ცხვარი, ცხვარი). ორი დღის შემდეგ ჩვენი სომეხი გაემგზავრა და მოგვევლინა კიდევ მესამე პიროვნება იმისთვის, რომ ჩვენი ფარი და მახვილი გამხდარიყო. ამჯერად ეს იყო დადიანთა ოჯახის მეგობარი, ხანში შესული წარჩინებული ფრანგი de vieille roche⁵⁴ „ძველი რეჟიმის“ (de l'ancien regime) ნატიფი მანერებით. კომტ დე როზმორდუკი (Comte de Rosmorduc) წარმოშობით ბრეტანელი იყო; კავკასიაში 25 წლის წინ ჩამოსულა (რა მიზეზით, უცნობია) და მერე აქ დასახლებულა. მეგრულ ქალზე იყო დაქორწინებული და ზუგდიდში ჰქონდა სახლი, რომელიც თავად აუშენებია. დედოფალთან და მის შვილებთან კარგად იღებდნენ, მოგვიანებით ჩვენთვისაც ძვირფასი მეგობარი გახდა.

ჰოდა, დაიწყო ქუთაისის უმაღლესი საზოგადოებისთვის ჩვენი გაცნობა. ფრანგმა წარგვადგინა გენერალ წერეთელთან – ქალაქის უპირველეს სახლში. წერეთელები კავკასიელები არიან – დადიანების ნათესავები. მათ დიდი სტუმართმოყვარეობა გა-

მოიხინეს და ჩვენ პატივსაცემად იმ საღამოსვე დიდი მიღებაც გამართეს, რომელზეც ყველა ადგილობრივი ცნობილი პიროვნება და წარჩინებული ოჯახი დაპატიჟეს. მათ ქალიშვილ ნინას, სახელგანთქმულს თავისი სილამაზით, ოცდახუთი შესრულებოდა და უკვე შინაბერად მიიჩნევდნენ. კავკასიელები ძირითადად 15-16 წლის ასაკში თხოვდებოდნენ. მაგალითად, გრაფინია როზმორდუკი, აშუამად 35 წლისა, უკვე ოცი წელია ქორწინებაში იმყოფება. ეს ულამაზესი ქალბატონი მხოლოდ მომდევნო წელს გავიცანით. წერეთლების სახლში მოწყობილმა საღამომ (Soiree) ჩვენზე წარუშლელი შთაბეჭდილება მოახდინა, რადგან პირველად მოგვეცა შესაძლებლობა, ქვეყნის საზოგადოებრივ ცხოვრებას დავკვირვებოდით. აქ ვიხილეთ ნაციონალურ სამოსელში გამოწყობილი ქალები და პირველად დავესწარიტ კავკასიური ნაციონალური ცეკვის – ლეკურის – წარმოდგენას. პირველად ვუსხედით აქაურ სამეიმო სუფრას, – ტანწერწეტა ვერცხლის სურებიდან ცეცხლოვანი კახური ღვინო დიდ ყანწებში ისხმებოდა, საგანგებოდ არჩეული თამადა ჯანმრთელობის სადღეგრძელოს სვამდა – და ამ შემთხვევაში, უპირველეს ყოვლისა, ავსტრიელი სტუმრების ჯანმრთელობისას. სახლის უფროსი და მისი მეუღლე მაგიდასთან კი არ ისხდნენ, არამედ სუფრის მომსახურებაში მონაწილეობდნენ. იქ დამსწრეთა შორის ბევრი ვნახეთ ფრანგულის მცოდნე. თუკი ვინმემ არ იცოდა, თარჯიმნობას უწევდა გრაფი როზმორდუკი, რომელსაც ადგილობრივთა ენა შეესწავლა. დარბაზში იდგა პიანინო. ჩემი ქმარი დაჯდა და თავისივე დაწერილი რამდენიმე ვალსი დაუკრა, რამაც კავკასიური საზოგადოება აღაფრთოვანა და ამ მუსიკაზე იცეკვეს კიდევაც სრულყოფილი გრაციოზულობით. ყველაზე გაბედულად თავს მაინც ლეკურის ცეკვისას წარმოაჩენდნენ. ამ ცეკვას, ჩვეულებრივ, მხოლოდ ერთი წყვილი ასრულებდა, სხვები იდგნენ და ტაქტს ტაშს აყოლებდნენ. თანმხლებ მუსიკას უზრუნველყოფდა პატარა ადგილობრივი ინსტრუმენტი, რომელიც რაღაც სამტაქტიან მელოდიას გაუთავებლად იმეორებდა; ასევე ზანზალაკებშემოვლებული დოლი, რომელზეც მარჯვე ხელების დარტყმით მელოდია თანდათანობით ჩქარდებოდა და ამ რიტმში გრძელდებოდა. თავად ცეკვა უძველესი სასიყვარულო თამაშის წარმოდგენა იყო: გამოკიდება, გაქცევა, ცდუნება. კაცებს დახვეწილი „პა“ გამოჰყავთ, ქალები თითქოს დასრიალებენ, მძიმე აბრეშუმის კაბა ფეხებს ფარავს და ისე ჩანს, თითქოს უჩინარ ბორბლებზე დგანან; თავსაბურზე დამაგრებული პირბადე თავის უკან, ზურგზე ეშვება, რკალებად ზეაწეულ მკლავებქვეშ კი გრძელი, ორმაგი სახელოები დაფრიალებს. ზეიმის დასასრულს ურთულესი იტალიური არია ვიმღერე და ამას მოვაცოლე სიცილის არია⁵⁵ ობერის კომიკური ოპერიდან „მანონ ლესკო“ – შარლოტა პატის საუკეთესო ნომერი – ამღერებული სიცილი გადამდები აღმოჩნდა და ყველანი გაამხიარულა.

და აი, მეორე დილით გავემგზავრეთ ჩვენი მოგზაურობის საბოლოო მიზნისკენ, მთის პლატოზე მდებარე გორდისკენ. გრაფმა როზმორდუკმა გვიჩირავა „ტროიკა“ და მეგზურობაც იკისრა. მხიარული მგზავრობა გამოგვივიდა. რაც უფრო ირწეოდა

ბეწვგამოუკრავი ეტლი, მით უფრო ვერთობოდით. დიდებული გზა იყო, ყველა ბუჩქი და ჩანჩქერი ველური ვარდით გადაპენტილიყო. თან აუტანლად ცხელოდა და ამიტომაც ხედების მონაცვლეობა გვახარებდა – მთებს მალლა-მალლა მივუყვებოდით, სადაც, როგორც გრაფი რომმორდუკი ირწმუნებოდა, გრილი კი არა, გამუდმებით სუსხიანი ნიავი უბერავდა.

ვაკებე მრავალსაათიანი მგზავრობის შემდეგ პომპეუსის ხიდამდე მივედი, ადგილამდე, სადაც ეტლი უნდა დატოვო და გზას ცხენით გაუყვე. იწყებოდა ვიწრო ბილიკი, მოჩანდა ლურჯი ციდან ციცაბოდ დაშვებული მთის მწვერვალები, სადაც უნდა ავსულიყავით; მდინარე, რომელიც პომპეუსის ხიდქვეშ ხმაურობდა და ქაფებს იდებდა, ჩვენი ყურისთვის კიდევ უფრო ძლიერად ახმაურდა, რადგან გვითხრეს ძველებურად „ჰიპოსი“⁴⁵⁶ ჰქვიაო. რა კლასიკური ხომალდი არ უქანავებია მას თავის ტალღებზე – თვით იაზონის გემიც კი, როცა იგი ოქროს საწმისის მოსაპოვებლად მოდიოდა! ეს იყო ადგილი, როგორც დედოფლის წერილებიდან მახსოვდა, სადაც სახლისკენ მიმავალი ახალგაზრდა თავადების წყვილი ეტლიდან გადმოვიდა, სადაც ხიდი ხალიჩებით იყო მოფენილი და ყვავილებისგან დაწნული ტრიუმფალური თალი სამეგრელოს საზღვარს აღნიშნავდა. ჩვენ პომპეუსის ხიდზე ტრიუმფალური თალი არა, მაგრამ მშვენიერი სიურპრიზი კი გველოდა: თავადი ნიკო, დიდი ამაღის თანხლებით შეგვეგება თავისი სამეფოს ზღურბლთან, რათა „კონტესინას“ და მის მეუღლეს მისაღმებოდა. ერთ კარავში გამზადებული იყო სუფრა წასახემსებლებით. ჯერ ვისაუბმეთ, ჩვენი სტუმრობის სადღეგრძელო შეისვა და მერე შევუდექით აღმართს. ჩვენთვის და გრაფ რომმორდუკისთვის ცხენებიც იყო გამზადებული; ჩემთვის – თვინიერი იორლა; თავადმა ნიკომ სადავე დამიჭირა, რომ ცხენზე დავმჯდარიყავი და ახლა 7 კმ უნდა გვევლო აღმართ-აღმართ მიხვეულ-მოხვეული გზებით, თავადის ჯარის წარმომადგენელთა თანხლებით, რომლებიც მაღალ უნაგირებზე ამხედრებულნი თავიანთ მხედრულ ოსტატობას ჩვენ წინაშე წარმოაჩენდნენ, ამ ციცაბო ქარაფების პირას ცხენებს ხან იქიდან მოახტებოდნენ, ხან აქედან და საოცარ სანახაობას გვთავაზობდნენ.

რაც უფრო ზევით მივიწევდით, ჰავა სულ უფრო და უფრო გრილდებოდა და ხეობებისა და მინდორ-ველის დიდებული ხედები იშლებოდა. მზე უკვე მთების იქით გაუჩინარდა, როცა მიზანს მივალწიეთ. გორდი მდებარეობს დიდ პლატოზე, რომლის უკან, მთის ერთ ფერდზე აუშენებიათ თავადის სასახლე – ორთავე მხრიდან კოშკებით შემოსაზღვრული და უამრავი აივნითა და ტერასით მორთული უზარმაზარი ნაგებობა. იქვე განლაგებულია პატარა, გულმისავალი ხის ვილები. ერთში დედოფლის დედა ცხოვრობდა, მეორეში – თავადი ნიკო, რადგან მისი სასახლეს არ იყო ჯერ დამთავრებული, მესამე კი ჩვენთვის იყო განკუთვნილი; დანარჩენებში სხვა სტუმრებმა თუ მებობლებმა დაიდეს ბინა. თავისი ვილის ტერასაზე იდგა დედოფალი, რათა მოგვსაღმებოდა. გარშემორტყმული იყო თავისი

სეფექალებით, იქვე იყო მოძღვარი, პირადი მდივანი და პირადი მავრი. იგი ხელ-გაშლილი შემეგება და ჩემს ჩამოსვლას მიესალმა.

„Presentez-moi votre cher mari, ma petite contessina, ou faut-il dire: baronessina maintenant“⁵⁷

დედოფალმა ჩემს ქმარს, რომელიც წარდგენის შემდეგ მას ხელზე ემთხვია, რუსული წესისამებრ შუბლზე აკოცა.

მაღევე შეგვიყვანეს ჩვენს სახლში, სადაც დავისვენეთ და სადილისთვის მოვწეს-რიგდით. პატარა, ერთსართულიან სასტუმრო კოტეჯში იყო ჭრელი კრეტონის ქსოვილის შპალიერიანი და ამავე ქსოვილით გადაკრული ავეჯით გაწყობილი მისაღები და საძინებელი, აგრეთვე – მომცრო ოთახები მოსამსახურე გოგოსა და ბიჭისთვის, რომლებიც მთლიანად ჩვენს განკარგულებაში იქნებოდნენ. სადილი დედოფლის ვილაში გაიმართა და სუფრა ვრცელ, ღია ვერანდაზე გაიწყო. ნასადილევს მთელი საზოგადოება – სუფრასთან დაახლოებით 30 კაცი ვისხედით – გარეთ, პლატოზე გავედით, რომელიც მთვარის შუქზე დღესავით იყო განათებული და დაიწყო კვლავ ცეკვები, რაკეტები გაფრინდა ცისკენ, საგუნდო სიმღერები გაისმა... ზეიმი მხოლოდ ნაშუალამევს ჩაწყნარდა. ასეთი მიღება მოგვიწყვეს გორდში.

ქუთაისში (1877)

ჩვენი კავკასიური საქორწილო მოგზაურობა-ექსკურსია ცხრა წელიწადს გაგრძელდა. ხანგრძლივი თაფლობის თვე გამოგვივიდა!

პირველი ზაფხული უწყვეტად გორდში გავატარეთ, სადაც იქამდე დავრჩით, ვიდრე თავად მასპინძლებმა არ დატოვეს იქაურობა: ნიკო პეტერბურგში გაემგზავრა, დედოფალი – ზუგდიდში. რუსეთის მეფის კარზე თანამდებობის ილუზია ილუზიადვე დარჩა. მართალია, ნიკომ ეს იდეა თავიდან აიტაცა, მაგრამ მალე აღმოჩნდა, რომ მისი განხორციელება, ფაქტობრივად, შეუძლებელი იყო. მაშ, რა უნდა გვექნა? აქ, მთებში, მოლხენა და ხალისიანი ცხოვრება სულ ვერ გაგრძელდებოდა და ყოველთვის „სასურველი“ სტუმარიც ხომ, ბოლოს და ბოლოს, პროფესია ვერ იქნებოდა. ჰარმანსდორფთან კავშირი გავწყვიტეთ – უფრო სწორად, მშობლებმა გაწყვიტეს ჩვენთან. ამ თავქარიანობას არ გვპატიობდნენ. პატიებას არც ჩვენ ვითხოვდით. ჯიუტად გამოვაცხადეთ, რომ თავს თვითონვე გავიტანდით და ასეც უნდა მოვქცეულიყავით. დებთან საუკეთესო ურთიერთობა შევინარჩუნეთ და მიმოწერაც გვქონდა, მაგრამ მშობლებისგან იმ ერთი ბრაზიანი, საყვედურებითა და შეურაცხყოფით სავსე წერილის გარდა არაფერი მოგვსვლია. დედაჩემი, რომელსაც „ჩემო“ აქ გამომგზავრებამდე წარუდგინე, მართალია, ამ არ-

ჩვენსა და ავანტიურისტულ გაქცევას არ იწონებდა, მაგრამ რამდენიმე დღეში „ჩემო“ გულში ჩაიხუტა და დედის დალოცვა გამოგვაცოლა.

მაშასადამე, გადავწყვიტეთ ქუთაისში დავმკვიდრებულიყავით და პირველ ხანებში, ვიდრე თავადი ნიკო შესაფერის სამსახურს გამოგვინახავდა, რის შესაძლებლობასაც იგი არ გამოიჩინებდა, თავი ენებისა და მუსიკის სწავლებით გავვეტანა. დედოფლის ერთი ბიძაშვილი, რომელიც ჩვენთან ერთად იმყოფებოდა გორდში, თუმცა ქუთაისში ცხოვრობდა, შეგვპირდა, ჩემს გარემოცვაში გაკვეთილების მსურველებს მოგიძებნითო. ეს, რა თქმა უნდა, სასიხარულო პერსპექტივა არ ყოფილა, სამაგიეროდ, ჩვენი შინაგანი სიხალისე იყო შეურყეველი. მთელი ცხოვრება, მთელი ქვეყანა ისე საინტერესოდ გვეჩვენებოდა, რომ თავდაპირველი ამალგებული სამოგზაურო და სათავგადასავლო შეგრძნება ჩვენში მუდამ გიზგიზებდა; ამას გარდა, უსაზღვროდ ბედნიერებს ყველა გვეცოდებოდა, რადგან წარმოუდგენლად მიგვაჩნდა, სხვა ჩვენსავით ბედნიერი ყოფილიყო. გვახარებდა, რომ ასეთი სიყვარული, ჩვენივე აღქმით, კი არ ნელდებოდა, უფრო და უფრო მძაფრდებოდა.

გორდის დაცლის შემდეგ ქუთაისში ჩავედით, სადაც დედოფლის კიდევ ერთმა მეგობარმა – გენერალმა ჰაგემაისტერმა შემოგვთავაზა დროებითი მასპინძლობა. და იძულებული გავხდით, ამ წინადადებას დავთანხმებოდით, ვიდრე ბინას ვიქირავებდით და გაკვეთილებს ვიშოვიდით. რამდენიმე კვირაში, გადავედით თუ არა ჩვენს ბინაში, ქუთაისელ წარჩინებულთა რამდენიმე ქალიშვილი ჩაეწერა ჩემთან სიმღერისა და ფორტეპიანოს გაკვეთილებზე. ჩემმა მეუღლემაც მოიწადინა ამ საქმეში ჩართვა და რამდენიმე მეცადინეობაც ჩაუტარა მათ გერმანულ ენაში.

მაღე დაირხა ხმა ომის შესახებ, ათასნაირი ჭორ-მართალი ვრცელდებოდა. წინა წელს ბულგარეთში მოხდა აჯანყება⁵⁸ (არარუსულ ქვეყნებში ამტკიცებდნენ, რომ ეს რუსეთის აგენტებმა მოაწყვეს). რუსეთმა მოითხოვა თურქეთისგან რეფორმები და ქრისტიანთა უსაფრთხოების დაცვის გარანტიები. გაიმართა უმაღლეს ხელისუფალთა კონფერენციები (1876 წლის ნოემბერი-1877 წლის იანვარი – კონსტანტინეპოლში; 1877 წლის მარტი – ლონდონში), მაგრამ მათი გადაწყვეტილებები თურქეთმა უარყო. გამოუცხადებს თუ არა მას რუსეთი ომს? ყველას ეს კითხვა აწუხებდა და ყველა ამაზე ლაპარაკობდა. ჯარები მობილიზებული იყო საზღვართან.

და მართლაც, 24 აპრილს გამოცხადდა ომი რუსეთის მხრიდან, მაშინვე გადაილახა მდინარე პრუტი და სომხეთის საზღვარი. ეს ცნობა შემადრწუნებელი იყო იმის გამოც, რომ კავკასია ომის ერთ-ერთ პლაცდარმად განიხილებოდა და ქუთაისში თურქთა შემოჭრა შესაძლებელ საფრთხედ სახელდებოდა.

ვერ ვიხსენებ, რომ დიდად გვეშინოდა. საერთოდ, ომის წინააღმდეგ საპროტესტო გრძნობაც ზუსტად იმდენივე მქონდა, რამდენიც 1866 და 1870 წლებში, ანუ არ მქონდა. „ჩემოც“ ამ ახალგაჩაღებულ ომს მხოლოდ ბუნებრივ, ოღონდ განსა-

კუთრებული ისტორიული მნიშვნელობის მოვლენად აღიქვამდა. მის შუაგულში ყოფნა ხომ მასაც ამ მნიშვნელოვანის რაღაც ანაბზინს ანიჭებდა.

დედაჩემისგან, ჩემი მულებისგან წერილს წერილზე, დეპეშას დეპეშაზე ვიღებდით: უნდა გავცეულიყავით. ამაზე არ ვფიქრობდით. პირიქით, გვინდოდა გამო-სადეგები ვყოფილიყავით და მმართველს, თავად მირსკის შევთავაზეთ, როგორც მოხალისეები, დაჭრილებს დავეხმარებოდით; ოღონდ იმ პირობით, რომ ერთსა და იმავე ქალაქში, ერთსა და იმავე ჰოსპიტალში უნდა გვემუშავა. ეს შეუძლებელი აღმოჩნდა; მე სხვაგან მიშვებდნენ, იმას – სხვაგან. ამიტომ ჩვენი შეთავაზება უკან გამოვითხოვეთ, რადგან ერთმანეთისგან დაშორება – თან ასეთი სახიფათო პერ-სპექტივით – არაფრის ფასად არ გვიღირდა! ასე დავრჩით ქუთაისში. ჩვენი სიმპა-თია (მაშინ ჯერ კიდევ გვქონდა ომთან დაკავშირებული „სიმპათია“) რუსულ მხარეს ეკუთვნოდა. „სლავი ძმები უნდა გაათავისუფლონ“ – ასეთი მოწოდება ვრცელდე-ბოდა ჩვენ ირგვლივ და ჩვენც ვირწმუნეთ მისი. სხვათა შორის, იმავდროულად გაჩ-ნდა კიდევ ერთი მოწოდება – აჯანყება და რუსული უღლის გადაგდება – რომლის ინიციატორები იყვნენ კავკასიაში მცხოვრები მუსლიმანები, თავისუფლების მოყვა-რე მთიელები, შამილის ამხანაგები. ყოველივე ამას გმირული ელფერი დაჰკრავდა, მაგრამ საქმე აჯანყებამდე არ მისულა. კავკასია საკმარისად რუსიფიცირებული და ლოიალური აღმოჩნდა. ამ ქვეყნის შვილები – თავიანთ კაზაკურ სამხედრო სამოს-ში კოხტად გამოწყობილნი – ერთსულოვნად გაემართნენ საომარი მოქმედებების თეატრისკენ, რათა შეეცაოთ თურქებისთვის. „სოტნია“ (ასეულის) – ასე იწოდებოდ-ნენ წარჩინებულთა ჯგუფები ასი კაცის შემადგენლობით, რომლებიც ნებაყოფლო-ბით უერთდებოდნენ ჯარს და ჩვენი ფანჯრებიდან ვხედავდით მათ მსვლელობას.

რა თქმა უნდა, ყველა ზურგში დარჩენილი „წითელი ჯვრის“ ციებ-ცხელებით იყო ატანილი: სახვევების წარმოება, ჩაისა და თამბაქოს მარაგის გაგზავნა, ტრანზიტუ-ლი პოლკების საკვებით და საწვავით მომარაგება, ფულის შეგროვება, საქველმოქ-მედო ღონისძიებათა დაგეგმვა და განხორციელება... ყველაფერი – საწყალი მეომ-რების სასიკეთოდ! ახლა რომ ვფიქრობ, მათთვის კიდევ უფრო მეტის გაკეთება შეიძლებოდა: ისინი საომრად საერთოდ არ უნდა გაეგზავნათ! დღეს ტოლტოისგან – ამ გაბედული სიმართლის მოქმედლისგანაც ვიცი, თუ რა გარემოება უკავშირდე-ბოდა „ამ საყვარელ სლავ ძმებს“:

აი, რას წერს ლევ ტოლსტოი ომისშემდგომ გამოცემულ წიგნში *L'esprit chretien et le Patriotisme*:⁵⁹

„ისევე როგორც ახლა, რუსეთ-თურქეთის ომის დაწყებამდეც, თითქოს მოუ-ლოდნელი სიყვარულის ალით აღიგზნენ ჩვენი რუსები რომელიღაც სლავი ძმების მიმართ, რომელთაც საუკუნეების განმავლობაში არავინ იცნობდა. და ეს მაშინ, რო-ცა გერმანელები, ფრანგები, ინგლისელები ყოველთვის იყვნენ და კვლავაც იქნებიან ჩვენთვის შეუდარებლად უფრო ახლობლები, ვიდრე მონტენეგროელები, სერბები

თუ ბულგარელები. და უცხად დაიწყო ზეიმების აღნიშვნა და მიღებების მოწყობა, რომლებიც კატკოვებმა და ასკაკოვებმა კიდევ უფრო გააბუქეს, რასაც პარიზში სამართლიანად აღიარებენ პატრიოტიზმის ნიმუშად. მაშინ, ისევე როგორც ახლა, სხვა არაფერზე ლაპარაკობდნენ, თუ არა მოულოდნელ ურთიერთსიყვარულზე, რუსებსა და სლავებს რომ გაუღვივდათ. თავდაპირველად – ზუსტად ისევე, როგორც ახლა პარიზში – შეიკრიბნენ მოსკოვში, სვამდნენ, ჭამდნენ, ერთმანეთზე უარეს სისულელეებს როშავნენ, გული უჩუყდებოდათ თავიანთი ამაღლებული გრძნობების გამო, ლაპარაკობდნენ მშვიდობასა და ერთიანობაზე და არაფერს ამბობდნენ თურქეთის საწინააღმდეგო ბრახვებზე. გამეთები ამ მგზნებარებას კიდევ უფრო აღვივებდნენ; თამაშში ნელ-ნელა მთავრობაც ჩაერთო. სერბეთმა თავი წამოსწია. გაჩნდა დიპლომატიური ნოტები, ნახევრად ოფიციალური სტატიები. გამეთები სულ უფრო და უფრო ჩაიძირა ტყუილსა და გამონაგონში. ისე გახურდნენ, რომ ბოლოს მეფე ალექსანდრე მეორე, რომელსაც ომი მართლა არ უნდოდა, იძულებული გახდა თანხმობა გაეცა. და მერე მოხდა ის, რაც ყველამ ვიცით: ასეულათასობით უდანაშაულო დაიღუპა, მილიონობით ადამიანი გამხეცდა და გამოთაყვანდა“.

ჩვენ ორმაც მაშინ სწორედ ასევე ვირწმუნეთ სლავთა ძმური სიყვარულის ამბავი. ჩემი ქმარი ვენის „ახალ თავისუფალ პრესას“ კორესპონდენციებს აწვდიდა ომზე, რომლის ექო ჩვენამდეც აღწევდა და ისინიც მაღლიერებით ბეჭდავდნენ. მოგვიანებით, გამოცემამ ეს წერილები რუსებისადმი ზედმეტად მეგობრულად მიიჩნია – „ახალი თავისუფალი პრესა“ თურქეთს უჭერდა მხარს – და აღარ მიიღო.

ჩემი მხრივ, მეც, რახან დაჭრილებს ვერ ვუვლიდი, ქუთაისელ ქალთა მიერ მათ დასახმარებლად მოწყობილ საქველმოქმედო საღამოებში ბეჯითად ვმონაწილეობდი. მაგონდება ერთ-ერთი საღამოს წარმოდგენა, რომელიც მოეწყო ე.წ. „ბულვარში“ – ასე ჰქვია ქალაქის ცენტრში ხეებით შემოსაზღვრულ სასაირონო მოედანს; ადგილობრივები შეიკრიბნენ ლამპიონებით განათებულ ადგილას, უკრავდა საორკესტრო მუსიკა („ღმერთო, დაიფარე მეფე“, პოპური გლინკას ოპერიდან „სიცოცხლე მეფისათვის“, ბალკანური მარში, სლავური სიმღერები და სხვ.), მუშაობდა სავაჭრო ჯიხურები და გათამაშდა საჩუქრები... ორ ხეს შორის, საგანგებოდ განათებულ ადგილას გამოიფინა დიდი ნახატი, რომელზეც გამოსახული იყო ამაღელვებელი ბრძოლის სცენა: წინა პლანზე – საოცრად ლამაზი რუსი მოწყალების და, თვალცრემლიანი დახრილია დაჭრილი თურქი ჯარისკაცისკენ, თავს მაღლა უწევს, რომ მაწონი დააღვეინოს; უკანა პლანზე მოჩანს ტყვიის კვამლში გახვეული კარვები, დახოცილი ცხენები და აფეთქებული ყუმბარები. ამ სურათთან მეც უამრავი ცრემლი დავღვარე. სპეციალურად იმდენ ხანს ვითამაშე ლოტო, ვიდრე ქისა სულ არ დამიცარიელდა; მოვიგე პატარა თიხის ლარნაკი, რომელიც მაშინვე გასათამაშებლად გავუშვი – ასე ვფიქრობდი ბალკანეთის ტრაგედიაში ჩემი წვლილის შეტანას.

ომი გრძელდებოდა. დედოფლისგან ვიღებდით საოცრად ნაღვლიან წერილებს, რადგან მისი ორივე ვაჟი ომში მონაწილეობდა და ამას უზომოდ განიცდიდა.

მოულოდნელად გავრცელდა ჭორი, რომ იქვე, მახლობლად, შავი ჭირი გაჩნდა. ამ ამბავმა ძრწოლვით აღგვავსო. ეს ცნობა რომ შევიტყვე, თავის დამუნათება დავიწყე:

„ოჰ, ეს სად წამოგიყვანე – ჩემი ბრალია, აქ რომ ჩამოხვედი, „ჩემო!““

მამშვიდებდა: „ერთი წუთითაც კი არ მინანია აქ წამოსვლა, ოღონდ შენ არაფერი მოგივიდეს! მაგრამ თუნდაც ორივე ახლავე დავიხოცოთ, ჩვენ-ჩვენი წილი ბედნიერებისა უკვე ვიგემეთ!“

მაგრამ ეპიდემია არ გავრცელდებულა. გადავურჩით ბოროტ ბედისწერას, რასაც თითქოს უკვე შევეგუეთ და გვეგონა, საშინელი მახრჩობელა ანგელოზის წერა გავხსებოდით.

სხვა მხრივ, ყველანაირად ცუდად ვგრძნობდით თავს. ომის ქარცეცხლში არავის ჰქონდა იმის თავი, რომ გაკვეთილებზე ეფიქრა და ქესატად ვიყავით. მაშინ რამდენიმე დღით ანრდილი, სახელად „შიმშილიც“ კი გავიცანით. მაგრამ ყველაფერი, რაც კი შეგვემთხვა, სიხარული იქნებოდა თუ დარდი, ერთმანეთს კიდევ უფრო გვაახლოებდა და მოგვიანებით ბედს ვუმაღლოდით, რომ ასეთი გამოცდილებით გავგამდიდრა. ეს ხომ იმიტომ მოგვეცა, რომ ჩვენი ხასიათი გამოეწრთო, ჩვენში კაცობრიობის ტანჯვისა და ხალხის სიღუბნის მიმართ თანაგრძნობა აღედგა. ამ პერიოდის გამოცდილებამ მოგვიანებით შექმნა კაცობრიობის საკეთილდღეოდ ჩვენი თანამშრომლობის საფუძველი და გაგვიღვიძა ერთმანეთზე უფრო სასიკეთო შეხედულებები.

ომი დასასრულისკენ მიდიოდა. 1878 წლის 3 მარტს ხელი მოეწერა სან-სტეფანოს ზავს. დედოფლის ორივე ვაჟი უვნებელი დაბრუნდა. უფროსი – პოლკოვნიკის წოდებით იბრძოდა იმპერატორის ამაღლაში პლევნასთან; უმცროსი, მაშინ კაპიტანი, ყარსის აღებაში მონაწილეობდა. ქუთაისში ბევრი ოჯახი იყო მგლოვიარე. დაბრუნებული „სოტნიას“ წევრთა რაოდენობაც ერთ ასეულს ბევრად ჩამორჩებოდა. ჩვენთან, სახლში, ძალიან უხაროდათ, რომ ომს გადაურჩნენ. ჩემი დედამთილი თავის ორ ქალიშვილთან, ლუიზასა და მათილდესთან ერთად ზამთრის გასატარებლად ფლორენციაში გაემგზავრა, რადგან მათილდეს ძლიერი ხველება ტანჯავდა და ექიმმა რბილი ჰავა ურჩია. გაზაფხულზე, უკანა გზაზე მერანოში შეჩერდნენ. იქიდან შეგვატყობინეს, რომ მათილდეს მდგომარეობა გაუარესდა, რომ ძლიერი ცხელების შეტევების გამო მის სიცოცხლეს საფრთხე ემუქრებოდა. რამდენიმე დღეში მისი გარდაცვალების ცნობაც მივიღეთ. ჯერ ოცი წლისაც არ იყო, თანაც ასეთი მშვენიერი... დედამისი ხომ მას საერთოდ აღმერთებდა... როგორ უნდა გადაეტანა ასეთი დარტყმა! ნამდვილ ანგელოზს ჰგავდა თურმე თავის ჩასასვენებელში, გაშლილ, ორივე მხარეს ჩამოშლილ ოქროს თმაზე ვარდის გვირგვინი ეკეთა. ცხედარი ჰარმანსდორფში მისვენეს – რა საშინელი გზა იქნებოდა უბედური დედისთვის! – და იქიდან ჰოფლაინში, ზუტენერების საგვარეულო აკ-

ლდამაში გადაასვენეს. ამ ამბავმა გაგვანადგურა და მთელი გულით დავითირეთ ასე უდროოდ გამქრალი დაიკო, რომელთანაც ამდენი მხიარული საათი გავატარეთ და რომელიც ყოველთვის სიყვარულით გვეპყრობოდა.

გაკვეთილებთან დაკავშირებით მიქცევა-მოქცევის სიტუაციაში გვიწევდა ყოფნა. ჩემმა ქმარმა მწერლობა სცადა. ომის თემაზე მისმა წერილებმა, რომლებსაც პრესა აქვეყნებდა, დიდი მოწონება დაიმსახურა და თავადაც აღმოაჩინა თავის თავში ეს ნიჭი – მსუბუქად და ხატოვნად წერდა. ასე თხზავდა სტატიებს, რომლებშიც აღწერდა კავკასიის ქვეყანას და ხალხს; მათ გერმანულ ყოველკვირეულ გაზეთებში გზავნიდა. ნარკვევებს სიამოვნებით იღებდნენ და ჰონორარსაც იხდიდნენ.

მეც მომინდა გამეგო, შემეძლო თუ არა რამის დაწერა. ეს ნიჭი ჩემში მანამდე არასდროს შემიმჩნევია. თექვსმეტი წლის რომ ვიყავი (მაშინ ეს იყო შური და მიბაძვის ჟინი, რომელიც ჩემში ელვირას წარმატებამ გააღვიძა), ერთი ნოველა დავწერე – „მიწიერი ოცნებები მთვარეში“, რომელიც გამოქვეყნდა აწ უკვე დიდი ხნის გაუქმებულ ჟურნალში „გერმანელი ქალი“. რედაქციამ მთხოვა, ახალი ნიმუშები ფოსტით გამეგზავნა: თურმე „მე არ უნდა დავმარხო ჩემი განძი“. რატომღაც, მას შემდეგ წერილების გარდა არაფერი დამიწერია (მათი წერა კი ნამდვილად უზარმაზარ სიამოვნებას მანიჭებდა). ახლა კი, 1878 წელს, ჩემი კალმის გამოცდის დრო დამდგარიყო („მიწიერი ოცნებები“ სათვალავში ჩასაგდები არ იყო). ყველასგან მალულად დავწერე ფელეტონი „სპეციალობები და წინსაფარი“, გავგზავნე ვენაში, ძველ Presse-ში და, ერთი დამიხედეთ! – თითქმის მაშინვე, უკანა ფოსტით მივიღე დაბეჭდვის პირობის დამადასტურებელი დოკუმენტი და 20 გულდენი. ოჰ, მწერლის პირველი ჰონორარი – როგორი სიამაყე და კმაყოფილებაა – ენით აღუწერელი! მოკლე სტატია ხელმოწერილი იყო ფსევდონიმით B. Oulot (აღუზია მეტსახელზე Boulotte,⁶⁰ რომელიც მე შემარქვეს ზუტენერების სახლში). როდესაც ეს ექვსი ასო დაბეჭდილი ვიხილე ფელეტონის ქვემოთ, რომელიც მართლა საუკეთესოდ მეჩვენებოდა, ვიფიქრე: ახლა მთელ ცენტრალურ ევროპას მხოლოდ ერთ შეკითხვაზე უნდა ემტვრია თავი – მაინც ვინ შეიძლებოდა ყოფილიყო ეს ბულოტი?

ამის მერე განვაგრძე წერა და დღემდე არ გავჩერებულვარ.

ტფილისი

1878 წლის ზაფხულში კვლავ მეგრულ საზაფხულო რეზიდენციას ვსტუმრობდით.

ორივე ვაჟი, რომლებზეც დედოფალი ასე ნერვიულობდა, სულ ნაირნაირი ორდენებით დამშვენებულნი, გორდში ჩამოვიდა. იქ იყო ასევე თავადი ნიკოს მეუღლე, მერი. ამათ გარდა, იმყოფებოდა აგრეთვე აშილ მიურატების წყვილი, თავიანთ ორ შვილთან ერთად. დიდი სიხარული მომგვარა ჩემი მეგობარი სალომეს

კვლავ ნახვამ და ისევ დადგა მშვენიერი დრო, რომელსაც ჩვენ ამ სასიამოვნო, მხიარულ წრეში ვატარებდით. გრაფი რომზმორდუკი არანაკლები ხალისით მონაწილეობდა ჩვენს საუბრებში, არც გართობაში ჩამოგვრჩებოდა. ამ ხანდამულ ფრანგს ჰქონდა იმის ნიჭი, რომ დაუსრულებლად მოეყოლა თავისი ცხოვრების ანეკდოტური თავგადასავლები, საინტერესო, ამაღელვებელი და სახალისო ამბები და ერთხელაც კი არ გაემეორებინა რომელიმე.

„ჩემოს“ სამსახურთან დაკავშირებით კვლავ არაფერი იყო ახალი. ისევ იწყებოდა გეგმები და ისევ იგებოდა ესპანური კოშკები. მაღაზიები უნდა გახსნილიყო, კოლონისტები უნდა გამწესებულიყვნენ, ხე-ტყით ვაჭრობა უნდა გაჩაღებულიყო... ამ პროექტებში, რომლებშიც ჩემს ქმარს სულ შემოსავლიანი თანამდებობები ელოდა, განსაკუთრებით ნიკო და რომზმორდუკი გამოირჩეოდნენ ფანტაზიის დიდი უნარით. ბევრი რამე წამოიწყეს, მოლაპარაკებებიც დაიწყეს, ხანგრძლივ მიმოწერას აწარმოებდნენ, მაგრამ საბოლოოდ არაფერი გამოვიდა.

ასე დადგა ისევ ზამთარი, გორდის კოლონია დაიშალა და ბედის საცდელად უკვე ტფილისს მივაშურეთ, ამჯერადაც საუკეთესო რეკომენდაციებით ჩავედით. აქ ცხოვრობდა დიდი თავადის ქალი თამარი. ქმარი ხანგრძლივი ავადმყოფობის შემდეგ გარდაცვლოდა და ეს ახალგაზრდა მშვენიერი ქვრივი, დიდმთავარ გუბერნატორის თქმით, ღირსეულად უძღვებოდა დედაქალაქის გამორჩეულ სასახლეს. აქაც დიდი კეთილგანწყობით მიგვიღეს. ტფილისი ნახევრად აღმოსავლური, ნახევრად დასავლეთევროპული ქალაქია. ევროპულ ნაწილში ისეთივე ცხოვრებაა, როგორიც ჩვენს ევროპულ ქალაქებში: ევროპული ტუალეტები, ევროპული წესები, ფრანგი მზარეულები, ინგლისელი გუბერნანტები, სტუმართა მიღებები (Jours), საღამოები (Soireen), საუბრები ფრანგულად და რუსულად. კნიაგინია თამარს ჰქონდა დახვეწილი გემოვნებით გაწყობილი სასახლე. მის სალონებში ტრიალებდა რჩეული საზოგადოება, რომელშიც შედიოდნენ დიდმთავრის კარის დიდებულები (დიდმთავარიც სდებდა ხოლმე პატივს მობრძანებით), რამდენიმე გუბერნატორი, გენერალი თუ ადგილობრივი თავადაზნაურობა. თამარის უმცროსი და, მასავით მომხიბვლელი, ერთ-ერთ გენერალზე იყო გათხოვილი და ისიც ტფილისში ცხოვრობდა. საზოგადოებრივი ადგილი, რომელსაც ჩვენ იქ ვიკავებდით, განსაკუთრებული იყო. ჩვენ უნდა გვემუშავა, რათა გვეცხოვრა – მე დილაობით დავდიოდი მუსიკის გაკვეთილებზე, რაშიც კარგ გასამრჯელოს მიხდიდნენ. ჩემს ქმარს ჰქონდა სამუშაო ადგილი ერთ ფრანგ ხალიჩების ფაბრიკანტთან და თან მშენებელთან, ვისთვისაც ანგარიშს აწარმოებდა და ხალიჩების ნიმუშებსაც ხატავდა. გაწეულ სამსახურში ყოველთვიურად 150 რუბლს იღებდა; გარდა ამისა, ფაბრიკანტის, მარსელელი მუსიკ ბერნეს ლამაზ სახლში გარანტირებულად გვქონდა ბინა და საკვები. ჩვენი სამუშაო ბარი რეკავდა დილის 5 საათზე. ამ დროს „ჩემო“, საკუთარ სახლში აგრერიგად განებივრებული და მკრეხელურად ზარმაცი პიროვნება, ლოგინიდან დგებოდა, რაოდენ გა-

საკვირიც უნდა იყოს – დიდი კმაყოფილებით. მაშინვე მიდიოდა სამანქანო სივრცეში, რომ მუშებისთვის თვალი ედევნებინა. 8 საათზე „პატრონთან“ და ოსტატებთან ერთად პირველ საუბრეს მიირთმევდა – ერთ ფინჯან წყალწყალა რძიან ყავასა და შავ პურს – და საკმარისად ნაყრდებოდა; მოგვიანებით, ბიუროში წასული, პირველ საათამდე ანგარიშობდა და ხაზავდა. ამასობაში, მე რამდენიმე ლექციას მოვითავებდი და მერე ყველანი ერთად ვსადილობდით ბერნეების სუფრასთან. ნასადილევს „ჩემოს“ უნდა ევლო საწარმოს საქმეებზე – კლიენტებთან, საბაჟოზე, სადგურზე... საათობით გზას იყო გაკრული; ყველაფერს ხალისით აკეთებდა. საღამოს ნ საათიდან უკვე თავისუფლები ვიყავით; გამოვიცვლიდით, გამოვეწყობოდით და თითქმის ყოველ საღამოს ვსადილობდით en ville-ში – სასახლის გარეთ, ხან თავადის ქალ თამართან, ხან მის დასთან ან ქალაქის რომელიმე დიდგვაროვანთან. ყველამ იცოდა ჩვენი რომანის შესახებ, იცოდნენ დადიანების ოჯახთან ჩვენი მჭიდრო კავშირების შესახებაც და საზოგადოებაში გვექცეოდნენ არა როგორც ფაბრიკანტის დაქირავებულსა და მუსიკის მასწავლებელს, არამედ როგორც არისტოკრატ ემიგრანტებს; არა მხოლოდ როგორც ტოლსა და სწორს, არამედ გამორჩეული თავაზიანობით, რასაც განსაკუთრებულად წარჩინებული უცხოის მიმართ იჩენენ ხოლმე. ამაზე ხანდახან გვეცინებოდა კიდევ.

მწერლობანას ვაგრძელებდი, რამდენადაც დრო ამის საშუალებას მაძლევდა. ვწერდი ნოველებს – „დორას აღსარება“, „ჯაჭვით გადაბმულნი“, ვადგენდი უფრო დიდ სამუშაო გეგმას, რომელსაც „სულის არსენალი“ ერქმოდა. ჩემი ქმარი იშვიათად ახერხებდა წერას, რადგან „პატრონმა“ სამშენებლო მოედნების ხატვაც დაავალა... და ისიც ასრულებდა. როგორ ახერხებდა ამდენს, დღესაც ვერ ვიგებ; ფაქტი ისაა, რომ მისი დაპროექტებით ბევრი სახლი და სასახლე აიგო ტფილისის შემოგარენში. როგორც პიანინოს უკრავდა ყოველგვარი მეცადინეობის გარეშე, ზუსტად ასევე, სამშენებლო საქმის შესწავლედა, არქიტექტურულ პროექტებს ქმნიდა. ქართული ენა იმდენად აითვისა, რომ ადგილობრივ მუშებთან და საქმიან ხალხთან მშვენივრად ურთიერთობდა. მეც გავიწაფე რუსულში – მისი შესწავლა ჯერ კიდევ ვენაში დავიწყე იმის გათვალისწინებით, რომ დედოფლის მიწვევით ზუგდიდში წასვლა მელოდა. ის სასახლე ჯერაც დაუმთავრებელი იყო და დედოფლის სიცოცხლეში არც დამთავრებულა.

ტფილისში ყოფნისას ვიავადმყოფე, ერთადერთხელ ჩემს ცხოვრებაში. შეუძლოდ ყოფნის პერიოდი ჩემს მშვენიერ, საყვარელ მოგონებებს მიეკუთვნება. სიარული არ შემეძლო, რამდენიმე ნაბიჯს რომ გადავდგამდი, ვეცემოდი. ბევრმა შეიძლება იფიქროს, სასიამოვნოდ გასახსენებელი რა არისო, მაგრამ ღმერთმა იცის, თუ რა სანეტარო დრო იყო. მისუსტებულს წოლა სიმშვიდესა და კმაყოფილებას მანიჭებდა, „ჩემოს“ ზრუნვა და სინაზე ღრმა ბედნიერების შეგრძნებას მიჩენდა და მშვიდი რწმენის შთაბეჭდილებას მიქმნიდა. ეს დაახლოებით ექვს კვირას გაგრძელდა, მერე გამოვჯანმრთელდი და ერთმანეთი კიდევ უფრო შეგვიყვარდა.

ზუგდიდი

თბილისში ცხოვრება კვლავ ქუთაისში, შემდეგ გორდში, შემდეგ ზუგდიდში და კიდევ რამდენიმე სხვა ადგილით შეცვალეთ. არ შემოძლია ზუსტად გავიხსენო ქრონოლოგია და დაწვრილებით მოვყვე ჩვენს თავგადასავლებსა და ხეტიალზე, რაც კავკასიაში ცხრაწლიანმა ცხოვრებამ დაიტია; თანაც, ეს გარეგნული მოვლენები „მნიშვნელოვნად“ არ მიგვაჩნდა, ხოლო შინაგანმა მოვლენებმა ამ ლტოლვილობაში ჩვენგან ორი ახალი ადამიანი შექმნა. ორი ხალისიანი ადამიანი, ორი კარგი ადამიანი.

რამდენიმე მშვენიერი წელი გავატარეთ ზუგდიდში, სამეგრელოს მთავარ ქალაქში. უფრო გამართლებული იქნებოდა, მეთქვა – მთავარ სოფელში. ეს იყო ადგილი, ჩამწკრივებული აღმოსავლური სახლებითა და გარეთ გამოტანილი დახლებით, რომ იტყვიან, მაღაზია მაღაზიაზე; ამიტომ ერქვა აქაურობას „ბაზარი“, მაგრამ „ბულვარსაც“ ეძახდნენ, ვინაიდან ქუჩის გასწვრივ, ორ რიგად ხეები გაეშენებინათ და თან რა ხეები! თქვენ წარმოიდგინეთ, მიმოზაზე ნაკლები – არც ერთი! მათი ყვავილობისას გარემო მათრობელა სურნელით იყო გაჯერებული. ამ აღმოსავლური რიგის გარდა, ნახავდით ერთად თავმოყრილ პატარ-პატარა გლეხურ ქოხებს, რომლებშიც ვურტემბერგელი გლეხები ცხოვრობდნენ – ეს იყო „გერმანული კოლონია“. შემდეგ მოდიოდა დიდსა და პატარა შემოღობილ ეზოებსა თუ ყანებში ჩადგმული კავკასიური სტილის ერთსართულიანი ხის სახლები, გარშემო აივნებით. მოშორებით გრაფ როზმორდუკის ვილა იდგა, მერე – დედოფლის დროებითი სახლი დიდი პარკის განაპირას, პარკის ცენტრში კი წამომართულიყო ახალი სასახლის დაუმთავრებელი ნაგებობა – სულ ეს იყო ზუგდიდი.

აშილ და სალომე მიურატებმა გადაწყვიტეს კავკასიაში დასახლებულიყვნენ. მათთვის შეარჩიეს დიდი, ყამირი ადგილი, სადაც უნდა აგებულიყო სოფლის სახლი, სამეურნეო ნაგებობა, საჯინბოები, ასევე გაშენებულიყო დეკორატიული და ხეხილის ბაღები, ორანჟერეები და დამუშავებულიყო მინდვრები. ოთხ წელიწადში ეს ჩანაფიქრი განხორციელდა, რაც ჩვენი თვალით ვნახეთ. გერმანელი კოლონისტისგან პატარა, ჩვენი გაგებით, სამოთხის მსგავსი ერთსართულიანი სახლი ვიქირავეთ. თავისთავად, დიდი არაფერი: სამი დაბალჭერიანი ოთახითა და პატარა სამზარეულოთი, შესასვლელში ხის ვერანდით. პირველი ოთახი ჩვენი სალონი იყო. ბაზარში საკმაოდ ხელსაყრელ ფასად ვიშოვეთ წითელი ქსოვილი – სალონის კედლებს შპალიერად ავაკარით და ფარდებდაც გამოგვადგა. შპალიერი თვითონ გავაკარით – ქსოვილი დავეჭერით, ერთმანეთს გადავაკერეთ, მერე კედლებზე გავჭიმეთ, დავამაგრეთ და მორჩა. სალონისთვის გადმოგვცეს ერთი დიდი მაგიდა, რომელსაც საწერ მაგიდად ვიყენებდით, რამდენიმე სავარძელი, კიდევ ერთი მაგიდა და ერთიც ტახტი. ნებისმიერ კავკასიურ სახლშია ასეთი ავეჯი: გრძელი, ფართო

დივანი, გადასაკრავისა და საბურგის გარეშე. ზემოდან მხოლოდ ხალიჩას აფენენ, ესაა და ეს. ხალიჩის მსგავს ქსოვილის პირში გამოკრული ოთხი გრძელი მუთაქითა და ფანტაზიით შექმნილი ბალიშებით გაწყობილი დივანი გამოდგება დასაჯდომად, დასაწოლად და სანებივროდაც. იქვე დავკიდეთ წიგნის თაროები, სარკე – ბუხრის თავზე, იატაკზე დავაფინეთ ნოხები, რამდენიმე ლარნაკში მუდამ ეწყო ცოცხალი ყვავილები... წითელ სალონს უკვე თითქმის ელევანტური შესახედაობა მიეცა. ამით ძალიან ვამაყობდით! დანარჩენი ორი ოთახი საძინებელ და გარდერობის ოთახებად მოვაწყვეთ და შესაბამისი დიდებულებით მოვრთეთ. ამავე ჭერქვეშ ცხოვრობდა სახლის პატრონის ქალიშვილი. მათ მეორე საცხოვრებელიც ჰქონდათ ჩვენ გვერდითვე, ბალახგადავლილი ეზოს უკან. Fundus instructus⁶¹-იც, ხუთი ბატიც, ჩვენ გვეკუთვნოდა – ყოველ დილით მინდორში გადიოდნენ და საღამოს მედიდურად ბრუნდებოდნენ. ბატები, რა თქმა უნდა, კულინარიული მიზნებისთვის იყო მოშენებული, მაგრამ იქ ყოფნის პერიოდში მათ სიცოცხლე ვაჩუქეთ – ჩვენ ხომ ყოველდღე ვუყურებდით აივნიდან, რა ნდობითა და სიმშვიდით სავსენი მოემართებოდნენ სახლისკენ და როგორ შეგვეძლო, მათთვის ნდობა გაგვეცრუებინა?! ბოლოს და ბოლოს, თეფშზე დადებულ, შებრაწულ ფრინველთან პირადი ნაცნობობა ხომ არ უნდა გაკავშირებდეს...

ბუგდიდში დამკვიდრებას იმიტომ ვცდილობდით, რომ პრინცმა აშილ მიურათმა ჩემი ქმარი თავისი მშენებლობებისა თუ სხვა საქმეების უფროს ზედამხედველად დანიშნა. ესკიზების ხაზვა და სამუშაოს ხელმძღვანელობა მის მთავარ საქმიანობად იქცა. პრინცი მიურათი თავადაც მოყვარული არქიტექტორი, მოყვარული მეურნე და მოყვარული მებაღე იყო; ასე ინაწილებდნენ საქმეებს გეგმების შედგენისა თუ განხორციელებისას. გაერთიანებული ძალებით ცდილობდნენ ბაღის გაშენებას, ხის პლაფონების მოწყობას, არხების გაჭრას, შპალიერის გაკვრას, ქურდებისგან საიმედოდ დაცული საჯინიბოების აგებას... ხშირად ვხედავდი ორივეს, მშენებლობის პატრონს და მშენებლობის ხელმძღვანელს, ერთად – როგორ დგანან კიბის თავში სახეებზე კმაყოფილი გამომეტყველებით, როგორ დააბოტებენ არხებში ფუნჯით, ნიჩბით ან წერაქვით შეიარაღებულები, უხეში ბამბის ქსოვილისგან შეკერილ ტანსაცმელში, და პრინცესაც სულ მათ გვერდითაა; მე სხვა სამუშაო ასპარეზი მქონდა: მათ ორ ბიჭუნას, ლუსიენსა და ნაპოს ყოველდღიურად ორ საათს ვამეცადინებდი – გერმანულსა და ფორტეპიანოს დაკვრას ვასწავლიდი. პრინცების ოჯახის მომსახურე პერსონალი ამ ყოფას ბატონებივით იოლად ვერ ეგუებოდა; ხშირად გამოთქვამდნენ უკმაყოფილებას, ხშირად იცვლებოდნენ; კორექტული ინგლისელი მეეტლეები და მეჯინიბეები, საუკეთესო ფრანგი შეფ-მზარეულები ვერაფრით ეგუებოდნენ ამ პრიმიტიულ, ჯერ კიდევ დაუმთავრებელ ნაგებობებში მუშაობას; ასეთ ველურ გარემოსა და უწყსრიგობაში გაჩერება არ უნდოდათ. გარდა დიდი ხნის ერთგული კამერდინერისა და ასეთივე პირადი

მოახლისა, რომლებიც თავს აგრეთვე წამებულებად აღიქვამდნენ, ყველა აჯანყდა. სამზარეულოსა თუ საჯინიბოსთვის კვლავ აჭყავდათ მათი შემცვლელები, რადგან საუკეთესო ფრანგული სამზარეულოს და ინგლისური საცხენოსნო, სამონადირეო და სპორტული ეკიპირების გარეშე პრინც აშილს ცხოვრება არ შეეძლო.

კვირაში ორჯერ მშენებარე ვილაში ვსადილობდით, სადაც, განსხვავებით დილანდელი სამუშაო ფორმებისა, evening-dress-ით ვცხადდებოდით და საღამოებს საუბარში, მუზიკირებასა და ჭადრაკის თამაშში ვატარებდით. დიდად გვამხიარულებდა კარიკატურებიც, რომლებსაც ჩემი ქმარი ხატავდა და რომლებზეც წარმოდგენილი იყო სამშენებლო სირთულეების მთელი ქრონიკა – მასში მონაწილე ყველა პერსონის, მართალია, გაშარჟებული, მაგრამ კოლორიტული პორტრეტების გალერეა. იმ მრავალ ტალანტს შორის, რითაც „ჩემო“ იყო დაჯილდოებული, მისი განსაკუთრებულად იუმორისტული ფანქარიც იგულისხმებოდა. ერთხელ მან Fliegenden Blatter-ის რედაქციაში გაგზავნა თავისი ილუსტრაციების სერია ოლენდორფის გრამატიკის ისეთ მაგალითებზე, როგორიცაა: „ბიძაშენის შანდალი უფრო დიდია, ვიდრე დეიდაჩემის კატა“; „ხაბაზის ბეჯითმა შეგირდმა ნაღვლიანი კაპიტანი დაინახა“; „ფრანგ ბატონს აქვს გრძელი სასეირნო ტროსტი და საწყალ რუსს სცივა“ და სხვა, რაც დიდი აღტაცებით მიიღეს.

ზამთარში, ზუგდიდში ყოფნისას, ყოველ კვირადღეს დედოფალი თავის შვილებსა და ჩვენ სისტემატურად გვეპატიუებოდა სუფრასთან. ზაფხულობით აქ სულ მართონი ვრჩებოდით და ამ მდგომარეობით უსაზღვროდ ვხარობდით. ჩემი ქმარი დილის რამდენიმე საათს მიურატის მამულში სამუშაოს ზედამხედველობას უძღვნიდა, დანარჩენი დრო კი მთლიანად მე მეკუთვნოდა; ამდენად, შეგვეძლო ორივეს ბეჯითად გვეწერა. ასე შეიქმნა რომანები: „ცუდი ადამიანი“, „ჰანა“ და წიგნი „ერთიანობა სულისა“, რომლებსაც ვაქვეყნებდით სხვადასხვა ხელმოწერით – ბ. ულოტი და „დარეჯანი“, „აზნაური“, „კავკასიის შვილები“, ა.გ. ზუტენერისა. ამასთანავე, ერთობლივად კითხვამ თუ მეცადინეობამ, ხანგრძლივმა საუბრებმა ყოველივეზე, რაც ცასა და დედამიწას შორის არსებობს, ჩამოგვიყალიბა ცხოვრების ფილოსოფია, ახალი მსოფლმხედველობა. სხვაგვარ პირობებში თუ ერთმანეთის გარეშე ამას ვერასდროს მივაღწევდით – ჩვენ მოვიპოვეთ ნამდვილი ედემი ურთიერთთანხმობისა ახალი, ფართო, ნათელი ჰორიზონტებით.

მაგრამ შეუძლებელია გამუდმებით ამაღლებულ აზრებში ლივლივებდე, აუცილებელია, დედამიწაზეც გქონდეს შენი პატარა კუთხე, შენი თავშესაფარი... და ამ მხრივაც თავს ასე კარგად იმიტომაც ვგრძნობდით, რომ ჩვენ სრულიად უნებურად აღვასრულეთ მაცხოვრის მოწოდება: „და იქმნეთ ვითარცა ყრმანი“.

ვტიტინებდით ათას სისულელეზე, ვიქცევდით უგუნურად, გამოვიგონეთ „ჩვენი ენა“, ბრალდებებს ვაყრიდით ერთმანეთს, ვასრულებდით ყველაზე ველურ ცეკვებს და უცნაურ სიმღერებს, ვთამაშობდით... თუ თოჯინებით არა, ჩვენი ფანტაზიით

წარმოდგენილი არსებებით... მოკლედ: ბრიყვი, ბრიყვი, ნეტარი ბავშვები! ჩემი ცხოვრების ეს ფაზა აღვწერე მონოგრაფიაში სახელწოდებით Es Lowos, რომელიც პირველად მიუნხენის ყოველთვიურ ჟურნალ Die Gesellschaft-ში დაიბეჭდა, მერე წიგნების ბაზრობაზეც გამოჩნდა. ზოგიერთი მსაყვედურობდა, ასეთი ინტიმი სახალ-ხო არ უნდა გახადო. თითქოს სულ ხალხისთვის ვწერდე! შენს მკითხველად ყოველთვის იმას წარმოიდგენ, ვისთვისაც იმავე ჰანგზე მომართულ სიმებს აჟღერებ. ასეთს ხალხში სულ რამდენიმეს თუ იპოვი. Es Lowos-ში გამოვიგონე „ერთი“ ასეთი არსება, სიმპათიური და გულისხმიერი, რომელიც ზუსტად იგებს ყველაფერს და რომელსაც მივმართავდი ხოლმე... მართლაც, დროთა განმავლობაში ასობით წერილი მივიღე მკითხველისგან – ისინი ირწმუნებოდნენ, რომ ჩემთან ერთად იგრძნეს ყველაფერი და ბოლოს ხელსაც ასე აწერდნენ: „ერთი“.

ჩვენმა შტუდიებმა ახალი ჰორიზონტი გაგვიხსნა-მეთქი, ვწერდი წინაზე. ეს ცოტათი უნდა განვავრცო. უპირატესად, საბუნებისმეტყველო საგნებმა მოულოდნელი შუქი მოჰფინა ჩვენს გონებას, მაგრამ არა ისე, როგორც მათ სკოლაში ასწავლიან – მცენარეთა უბრალო დაყოფა სახეობებად და ჯიშებად, მინერალოგიური და გეოლოგიური წარმონაქმნების უბრალო ჩამოთვლა, ფიზიკისა თუ ქიმიის მხოლოდ ციფრებითა და ნიშნებით დატვირთული ფორმულები – არა, ცოდნას ვიღებდით საბუნებისმეტყველო დარგის იმ თანამედროვე მეცნიერთა შრომებიდან, რომლებიც, ამავე დროს, ნატურფილოსოფოსებიც არიან და რომელთა კვლევებიდან ახალი, ელვარე აღმოჩენა გამომდინარეობს: მთელი ჩვენი დიდებული სამყარო განვითარების კანონზომიერებას ემორჩილება. იგი ყველაზე მარტივი სათავეებიდან დაიწყო და განვითარების წყალობით დღევანდელ სირთულეებამდე მოვიდა; მას გარანტირებული მომავალი. თანამედროვე ცოდნის სხვა შედეგებსაც გადავხედოთ: ყველა ძალის შექცევადობა, მიზეზშედეგობრივი კავშირის ურღვევი ჯაჭვი, ატომის დაუშლელიობა, ორგანულ და არაორგანულ თუ ფიზიკურ და ფსიქიკურ სამყაროთა შორის უწყვეტი კავშირი – მოკლედ, სამყაროს ერთიანობა და აქედან გამომდინარე დასკვნა: კაცობრიობაც ამავე კანონების შესაბამისად ვითარდება და მისთვისაც გარანტირებულია მომავალი აქვს. ვულრმავდებოდით ისეთი ავტორების შრომებს, როგორებიც არიან: ჩარლზ დარვინი, ერნსტ ჰეკელი, ჰერბერტ სპენსერი, უილიამ უეიველი (მეცნიერების ისტორია), კარუსი, ლორეს სტერნი და სხვა. უწინარეს ყოვლისა კი, უნდა დავასახელო ნაშრომი, რომელიც ჩემთვის გამოცხადებასავით იყო: Buckle, History of civilisation. ჯერ კიდევ ჩემს გათხოვებამდე წავიკითხე ეს წიგნი და ბევრი სხვა დასახელებულიც, და აქ ჩემოდნით ჩამოვიტანე. ახლა მათ „ჩემოც“ უნდა გასცნობოდა. მე მასზე წინ ვიყავი იმით, რომ უფრო მეტი საბუნებისმეტყველო წიგნი მქონდა წაკითხული, ის ჩემზე წინ იყო იმით, რომ ბუნება ჩემზე უფრო ვნებიანად უყვარდა. მშვენიერი ლანდშაფტების დიდებულება, ზღვის სიდიადე, ცის კაბადონის გარდამავალი ციალი მას ატკობდა და აღაფრთოვანებდა, იგი მოწიწებით თრთო-

და მათ წინაშე... ისე შეეძლო ჩასწვდომოდა ბუნებას, მის გასაოცარ და ძლიერ მომ-
ხივლელობას, რომ ამით ბუნების აღწერის ძალა ეძლეოდა და ამ ძალმოსილებას
კავკასიაზე დაწერილ თავის წიგნებს ახმარდა. პეიზაჟები, რომლებსაც იგი ფონად
იყენებდა თავის რომანებში – „დარეჯანი“ და „აზნაური“, დახატული იყო მცხუნვარე,
კაშკაშა ფერებით და დაიმსახურა კიდევ კრიტიკის ერთსულოვანი ქება. ხასიათე-
ბის აღწერა, სიუჟეტების გამოგონება თუ განვითარება ნაკლებად გამოსდიოდა, ამი-
ტომაც ვერ დაიმკვიდრა ლიტერატურაში მისთვის განსაზღვრული ადგილი, მაგრამ
ბუნების მშვენიერებას მართლაც ოსტატურად გადმოსცემდა. ამ უნარის საიდუმლო
ბუნებისადმი მისი სიყვარულია, და ყოველი სიყვარული ხომ აათმაგებს ძალას! რო-
გორც ერთხელ უკვე ვახსენე, ჩვენ ერთმანეთს ვავსებდით, ერთმანეთს ვეხმარებო-
დით. მან ბუნებით ტკბობა მასწავლა, მე მის გაგებაში დავეხმარე. ჩემი სურვილით
და ჩემთან ერთად წაიკითხა ყველა ნაწარმოები, რომელთაც კი ვიცნობდი, მაგრამ
მხოლოდ ახლა ჩავუღრმავდი საფუძვლიანად. როცა ჭეშმარიტებას სხვასთან ერ-
თად ჩასწვდები, ორმაგად თავდაჯერებულს ხდის ამ წვდომას, ხოლო გულისთქმას
– ორმაგად მკვეთრს.

მდიდრულად ვცხოვრობდით მიყრუებულ გლეხურ ქოხში, რომლის ირგვლი-
ვაც ლამაზობით ტურების კივილი ისმოდა. მდიდრულად, იმის მიუხედავად, რომ
მინიმალურ შემოსავალს ვიღებდით. პატარა მეურნეობა გვქონდა, ისეთი პატარა,
რომ ზოგჯერ (როცა ერთადერთი მოსამსახურე ქალი ავად გახდებოდა) სადილს
თავადვე ვამზადებდით და ერთხელ – სიცილ-კისკისის ფონზე – ქვიშით და ჯაგ-
რისით შეიარაღებულებმა იატაკიც კი მოვხეხეთ. ჩვენი ცხოვრება მდიდარი იყო
მოვლენებით, შეგრძნებებით, გამოცდილებებით, თუმცა რამდენიმე კვირა ისე გა-
ვიდოდა, ერთ ადამიანსაც კი ვერ ვხედავდით. განცდებით გვავსებდა ჩვენი წიგნე-
ბი და ჩვენი გულები. წილად გვხვდა დედამიწაზე ყველაზე იშვიათი რამ: მყარად
ფესვგადგმული სრული ბედნიერება.

უკანასკნელი დღეები კავკასიაში

1882 წლის ზაფხულში დედოფალი ავად გახდა. სწორედ იმ დროს მისი სტუმ-
რები ვიყავით გორდში. შვილმა თბილისიდან ჩამოაყვანინა ექიმები, რომლებმაც
კარლსბადში მკურნალობა ურჩიეს. თუმცა დედოფალი უარობდა, სამშობლოს
ვერ დავტოვებო.

„იმედი მაქვს, რომ გამოვჯანმრთელდები“, – მითხრა მაშინ, – მაგრამ თუკი ეს
ჩემი სასიკვდილო ავადმყოფობაა, აქ მინდა მოვკვდე, მარტვილის ტაძრის მახ-
ლობლად, სადაც უნდა დავიკრძალო. არ მინდა, ევროპიდან ამხელა გზაზე ყუთით
ვიმოგზაურო“.

მისი მდგომარეობა თანდათან უარესდებოდა. შემოდგომაზე, როცა გორდი-დან წამოვედით, თითქმის გადაწურული გვექონდა იმედი, რომ კვლავ ვნახავდით; და მართლაც, მალე თავადი ნიკოსგან მივიღეთ სატელეგრაფო შეტყობინება, რომ დედამისი ღვთისმორჩილად და მშვიდად მიიცვალა. ამ ცნობას თითქოს მომზადებული უნდა დავხვედროდი, მაგრამ მაინც მტკივნეულად აღვიქვი და გულით დავიტირე ჩემი დიდი ხნის მეგობარი. მარტვილის მონასტრის აკლდამაში დედოფლის დაკრძალვა იქცა მასშტაბურ სამგლოვიარო ღონისძიებად, რომელშიც მებობელი პროვინციების მოსახლეობა მონაწილეობდა; ათასობით ხალხმა მოილოცა ძველი მონასტერი, სადაც დიდი თავადის ძვალთშესალავი იყო განთავსებული, რათა „დედა-დედოფალისთვის“ ბოლო პატივი მიეკოთ.

1884 წლის დასაწყისში კიდევ უფრო დიდი დარტყმა და დანაკარგი მელოდა: დედაჩემი. ეჭვიც არ მეპარებოდა, რომ მალე ვნახავდი, რადგან უკვე გადაწყვეტილი იყო უახლოეს მომავალში ჩემი შინ დაბრუნება და ისიც ამ შეხვედრას უდიდესი სიხარულით ელოდა; ხანმოკლე ავადმყოფობის შემდეგ სიკვდილმა უეცრად გამომტაცა მისი თავი. „ჩემო“ თანაგრძნობითა და სიყვარულით ცდილობდა ჩემს გამხნევებასა და დამშვიდებას.

ჩვენი დევნილობა დასასრულს უახლოვდებოდა. მშობლებმა დაინახეს, როგორ ერთგულად და აღმაფრენით ვექცეოდით ერთმანეთს, რა მამაცურად ვუმკლავდებოდით ცხოვრებას და არავის ვუხმობდით დასახმარებლად, ამიტომაც უარი თქვეს სიჯიუტესა და წყენაზე და ჰარმანსდორფში გვიხმეს. ჩვენ უკვე მყარად ვიდექით ფეხზე და თავაწეულებს შეგვეძლო დაბრუნება. მართალია, რუსეთის მეფის კარზე ნანატრი სამსახურისა და დაწყებული სხვადასხვა სამეწარმეო საქმიანობისგან, რასაც ჩვენთვის ქონება უნდა მოეტანა, არაფერი გამოვიდა, მაგრამ ორივემ ლიტერატურაში მოვიპოვეთ ის ადგილი, რომელიც მომავალში საკმარის და მზარდ შემოსავალს გვპირდებოდა და ღირსეული პოზიციის გარანტიას იძლეოდა; კრიტიკა გვაქებდა, რედაქტორები სტატიებს გვიკვეთავდნენ, გამომცემლობები ხელნაწერებს გვთხოვდნენ. ჩემი მეუღლის კავკასიურმა ნოველებმა და რომანებმა დიდი მოწონება დაიმსახურა, ხოლო თხზულება „ერთიანობა სულისა“, რომელშიც მე მთელი ჩემი შეხედულებები ბუნებასა და ცხოვრებაზე, მეცნიერებასა და პოლიტიკაზე ჩამოვყალიბე, საკმაოდ დიდი აჟიოტაჟი გამოიწვია; ასეთივე მოთხოვნა იყო ჩემს ბელეტრისტულ ნაწარმოებებზე. ამასთანავე, ორივე ვგრძნობდით, რომ კიდევ ბევრი გვექონდა სათქმელი, რომ გამოგონების წყარო კვლავაც ხვავრიელად ჩუხჩუხებდა – ახალი ხელობა ჩვენთვის „მნიშვნელოვანი“ გახდა.

მაისის თვისთვის დავგეგმეთ დაბრუნება; კიდევ სამი თვე გვექონდა წინ. ეს დრო იმაზე სამუშაოდ უნდა გამოგვეყენებინა, რაც ჩემი ქმრის მეგობარმა, ტფილისელმა ჟურნალისტმა გვთხოვა, კერძოდ, ქართული ნაციონალური ეპოსის, შოთა რუსთაველის „ვეფხისტყაოსნის“ ფრანგულად და გერმანულად თარგმნა. ვინაიდან

ქართულში ძლიერები ვერ ვიყავით, ეს სამუშაო ასე უნდა შესრულებულიყო: დედნის მიხედვით, ბატონი მ. (სახელი დამავიწყდა, მხოლოდ საწყისი ასო მახსოვს) იმ ფრანგულით, როგორიც მას შეეძლო, სიტყვასიტყვით გადმოსცემდა პოემას – ამას მერე ჩვენ ჯერ კარგი ფრანგულით ჩავწერდით და მერე იქიდან გერმანულად ვთარგმნიდით. დაგეგმილი იყო „ვეფხისტყაოსნის“ საიუბილეო გამოცემაც, რომლისთვისაც მხატვარმა ზიჩიმ შესანიშნავი ილუსტრაციები დახატა. მუშაობის პროცესში რაიმეს რომ არ შევეფერხებინეთ, მიეყვით მ-ს თხოვნას და გადავსახლდით სრულიად მიყრუებულ მეგრულ სოფელში, სადაც მამამისი მღვდლად იყო გამწესებული. იქ ედგათ პატარა ქოხი, სადაც მცირე ანაზღაურების ფასად მიგვიღეს კიდეც. „ვეფხისტყაოსანს“ დილას და საღამოს ორ-ორ საათს ვუძღვნიდით, დარჩენილ დროს სეირნობაში, კითხვასა და შინ დაბრუნების „სიხარულში“ ვატარებდით (ესეც თავისებური საქმიანობაა)... ვიდრე ისევ ევროპული ცივილიზაციის მორევში გადავეშვებოდით, ვტკბებოდით კავკასიური სიმარტოვის პირველყოფილებით, პრიმიტიულობით... ჩვენს საცხოვრებელ ქოხში ავეჯი არ დაგვხვედრია. თავად ჩამოვიტანეთ ტახტი და რამდენიმე რეკვიზიტი, მათ შორის ციტრაც; კაცმა რომ თქვას, ეს სულაც არ იყო კომფორტისთვის აუცილებელი ინსტრუმენტი, მაგრამ, ვინაიდან ფორტეპიანო არ გვქონდა, ჩვენს მუსიკალურ მოთხოვნილებას პატარა შტირიული დაფით ვიკმაყოფილებდით: მე თან ვუკრავდი და სენტიმენტალურ სიმღერებს ვმღეროდი, ხოლო „ჩემო“ ბავარიულ ხალხურ საცეკვაოს – schuhplattlerische Ländler – უკრავდა.

მღვდელი, მისი ვაჟი, ვაჟის ყოფილი ძიძა და ჩვენ საჭმელს მივირთმევდით ოთახში, სადაც ერთი მაგიდისა და სკამების საჭირო რაოდენობის გარდა სხვა არაფერი იდგა. მენიუში ორი კერძი მონაცვლეობდა (ერთ დღეს – ქათმის ხორცი, მეორე დღეს – ცხვრის), ხელსახოცები მხოლოდ თოთხმეტ დღეში ერთხელ იცვლებოდა; მღვდელი წვნიან კერძს ისე ხმაურით ხვრებდა, გეგონებოდა, ვეშაპები ერთობიანო. ჩვენი ოთახის ქვეშ იყო სარდაფი, სადაც კომბოსტოს ამჟავებდნენ და მისი სუნი ქვის იატაკის ნაპრალებიდან ჩვენამდე ამოდიოდა. განწყობილებას ვერაფერი გვიფუჭებდა და ქართული პოემის ცოცხლად თარგმნის პროცესი სიამოვნებას გვგვრიდა. ჩვენ წინაშე წარმოგვიდგა დიდი ხნის გამქრალი სამყარო – მეთორმეტე-მეცამეტე საუკუნეები დედამიწის ამ მივარდნილ კუთხეში. ეპოქა, რომელსაც ქართველები სიამაყით იხსენებდნენ, რადგან ქვეყნის ბრწყინვალე ხანად მიაჩნდათ; ეპოქა, როცა მეფობდა დიდი თამარ მეფე, ხოლო შოთა რუსთაველი, სამეფო კარის მგოსანი, ხოტბას ასხამდა მის დიდებას, ძალაუფლებას, სილამაზეს... მაგრამ ქართველი პოეტის პოემიდან იმდენი არ გავგვიგია, რამდენიც ჩვენი პატრიოტულად განწყობილი ჟურნალისტისგან, რომელიც სინანულით იგონებდა თავისი ქვეყნის წარსულსა და თამარ მეფის ჩამქრალ ბრწყინვალეობას. ამ სახელს ქართველები კრძალვით ახსენებენ, თითქოს რაღაც ამაღლებული და უკვდავი ცოცხლობდეს მათ მოგონებაში ამ ძველი, რუსთაველის მიერ განდიდებული

ბული ეპოქის შესახებ. ქართველები გაჰყურებენ თავიანთ წარსულს, ოცდასამი საუკუნის წინანდელ ისტორიას: პირველი მეფე, სახელად ფარნავაზი, ქრისტეს შობამდე 302 წელს აირჩიეს მეფედ; ქრისტიანობა საქართველოში შემოიტანა წმინდა ნინომ ქრისტეს შობიდან მეოთხე საუკუნეში. როგორც ყველა ძველი ისტორია, ქართველთა წარსულიც ომების ისტორიაა. ქვეყანას, გარშემორტყმულს მტრული ერებითა და ტომებით, განსაკუთრებით ხშირად ოსმალოები და სპარსები ესხმოდნენ თავს. რა თქმა უნდა, მათიანეებმა შემოინახა ბრძოლაში გამარჯვებებიც, რომლებიც ქართველებმა თავიანთი მტრების წინააღმდეგ მოიპოვეს; მათი სიამაყე ამასთან დაკავშირებით გამოიხატება მისალმების ფორმაშიც – იქაური „დილა მშვიდობისა“ არის „გამარჯობა“ – და ეს ნიშნავს „გამარჯვებას“. პასუხია – „გაგიმარჯოს“ – „მან (ღმერთმა) გაგამარჯვებინოს“.

თამარ მეფის მმართველობა ქვეყნის ოქროს საუკუნედ მიაჩნიათ. ისტორიული ქრონიკების თანახმად, მისი მეფობა იყო ხალხის კეთილდღეობისა და ხელოვნების გაფურჩქნის ხანა, როცა შენდებოდა დიდებული ნაგებობები... ყველაფერი ისეა, როგორც ძველ, მაამებლურ მათიანეებშია ხოლმე, როცა ყველა მიღწევას იმდროინდელ გვირგვინოსანს უკავშირებენ. თუ მბრძანებელი სასტიკი არ არის, მის სიმკაცრეს განადიდებენ; თუ ასეთი არ არის, მაშინ ეს ნეგატიური სათნოება ცამდე აჰყავთ. აი, რა წერია თამარზე ქრონიკებში: „მისი ბრძანებით არავის დაუკარგავს სხეულის ნაწილი ან თვალის ჩინი – და ეს მით უფრო გასაოცარია, რომ მისი მეფობისას სრული ძალით მოქმედებდა პრინციპი, რომელიც ერთ-ერთმა მისმა წინამორბედმა, გმირმა ვახტანგ გორგასლანმა დაადგინა: ვინც ომში სიკვდილს დაუსხლტება და მტრის თავს ან ხელს თან არ მოიტანს, იგი ჩვენი ხელით მოკვდება“.

რა ცოტა რამ არის საჭირო მეფის მემკვიდრის აღსაფრთოვანებლად! ჩვენ შორისაც ბევრი არ გამოირჩევა კიდურების მოჭრისა თუ თვალების დათხრის სიყვარულით და ამის გამო ქება-დიდებათ არავინ გვამკობს!

თამარ მეფეს, მმართველობის დასაწყისში, დაემუქრა საფრთხე ხალიფა ნაზერ-ლი-დინისგან, რომელიც უთვალავი ჯარით დაიძრა ქართული სამეფოს საზღვრებისკენ. მეფემ უხმო თავის ლაშქარს – ათ დღეში ყველა მხრიდან შეკრიბა ბრძოლამოწყურებული მხედრობა, ერთად თავმოყრილ მეომრებს მიმართა შემდეგი სიტყვებით: „ძმებო, გული არ გაგიტყდეთ, როცა თქვენი მტრის ურიცხვ რაოდენობას თქვენს მცირერიცხოვნებას შეადარებთ. უთუოდ გსმენიათ გედეონის სამასი მეგრძოლის შესახებ, რომელთაც უთვალავი მიდიელი დაამარცხეს. იყავით მამაცნი და ენდეთ თითოეული თქვენგანის ვაჟკაცობას!“ მერე გადასცა თავის წინაპართა დროშა, გორგასლანის/გორგასლის (ზემოხსენებული ბრძანების „ვინც ომში სიკვდილს დაუსხლტება და სხვა“ შემქმნელის) დროშა; რა თქმა უნდა, ჯარები დაიძრნენ და ბრწყინვალედ სძლიეს მტერს; გამარჯვებულებს თამარ მეფე შეეგება და

ჯარისკაცებმა, ამით აღფრთოვანებულებმა, რომ მას თავიანთ რიგებში ხედავდნენ, სპარსელთა არმიის ყველა მეთაური აიძულეს თამარის წინაშე მუხლი მოეყარა; სავარაუდოდ, სპარსულ ქრონიკებში ეს ამბავი სხვანაირადაა მონათხრობი.

რამდენიმე წლის შემდეგ მცირე აზიის სულთანმა, რუქნადინმა შეკრიბა ოთხმოცი ათასი კაცი და საქართველოსკენ დაძრა. თავისი ელჩის ხელით თავხედური წერილი გაუგზავნა თამარ მეფეს, რომელშიც ეწერა: „საქართველოს მბრძანებელო თამარ, ყოველი დიაცი რეგვენია. შენ გიბრძანებია ქართველებისთვის ხმლის აღება და მუსლიმანთა ხოცვა... ახლა მე მოვდივარ, რათა დაგსაჯო შენ და შენი ერი, რომ ქართველობამ აღარასდროს გაბედოს ხმლის ხელში აღება, რომელიც ღმერთმა მხოლოდ ჩვენ გვიბოძა...“.

ბარათი ხელმოწერილი იყო სახელითა და ტიტულებით, მათ შორის: ყოველი ცისქვეშეთის მფლობელი, ანგელოსთა დარად თანამდგომი ღმერთისა, მოვლინებული დიდისა მოჰამედისგან.

თამარმა გზავნილი „აუჩქარებლად“ წაიკითხა, ბრძანა ლაშქრის შეყრა, ვარძიის ღვთისმშობელს შეავედრა მხედრობა, წინ წარუძღვა ლაშქარს და ქალაქის კარიბჭემდე მიაცილა. ასე გაემართა ქართული ჯარი მტრის დასახვედრად. რა თქმა უნდა, ქართველებმა მტერი სასტიკად დაამარცხეს. ამ გამარჯვების აღსანიშნავად ტფილისის ქუჩები საზეიმოდ იყო მორთულ-მოკაზმული, თამარ მეფე მოუძღოდა ლაშქარს და მზესავით ანათებდა...

ის, რომ მათიანეებში მმართველის ღვთისმოსაობასა თუ სიმამაცეზე ამდენს ჰყვებიან, ეს სავსებით გასაგებია. „ხმლებისა და აიაზმის სასხურებლის“ კავშირი ისევე ძველია, როგორც თავად ეს სიმბოლოები, რა ფორმისაც უნდა იყოს თითოეული. არსებობს ერთი ხალხური თქმულება, რომელიც ყველა გლეხმა იცის: ეს ამბავი ერთ-ერთი მორიგი გამარჯვების დღეს მოხდა. მეფე თამარმა ყველა თავისი სამკაული (ძვირფასი ქვების გვირგვინი, ოქროს სამაგრები და მარგალიტის მძივები) აისხა. მზესავით ბრწყინავდა. მეჭურჭლეთუხუცესს დაავალა საჩუქრებისა და მოწყალების დარიგება დიდ-პატარისთვის. „შეასრულე ჩემი ბრძანება? ხომ ყველა კმაყოფილია?“ – ჰკითხა მეფეთმეფემ. მეჭურჭლეთუხუცესმა უპასუხა: „მბრძანებელო, შენი ნების თანახმად საჩუქრები გავეცი. მხოლოდ ერთმა დედაბერმა არ ისურვა არაფერი, რადგან შენკენ მოიწევდა, აუცილებლად შენგან უნდოდა საჩუქრის მიღება. ჩვენ არ შემოვუშვით და გაბრაზებული წავიდა“. შეწუხებულმა თამარმა ბრძანა, მოეძებნათ მათხოვარი დედაბერი და მასთან მიეყვანათ. ამაოდ ელოდა – წარგზავნილმა მსახურებმა დედაბრის კვალს ვერსად მიაგნეს. მოულოდნელად მეფეს ერთმა აზრმა გაუელვა; დაიჩოქა წმინდანთა ხატების წინაშე, პირჯვარი გადაიწერა და აღტყინებულმა წამოიძახა: „ვიცი, ვიცი, ვინაა ეს მათხოვარი – შენ, წმინდაო ღვთისმშობელო, შენ გამომიგზავნე იგი“. და მან მოიხსნა ყველა სამკაული და მთელი თვალ-მარგალიტი შესწირა გელათის ღვთისმშობლის სახელობის ტაძარს.

ამ მონასტერში, რომელიც ქუთაისთან ახლოს მდებარეობს, უნდა იყოს დაკრძალული თამარ მეფე.

„ვეფხისტყაოსნის“ ჩვენი თარგმანი არ გამოქვეყნებულა, მაგრამ არ ვნანობთ დროს, რაც ამ საქმეს მოვანდომეთ. თვითონ პოემისა და იმ მონათხრობებისა თუ დაკვირვებების წყალობით, რომლებსაც ეს გულანთებული პატრიოტი (იონა მეუნარგია) გვიზიარებდა, ღრმად ჩავწვდით ამ ხალხისა და ამ ჯადოსნური ქვეყნის რაობას, ისტორიასა და სულისკვეთებას, სადაც ამდენი წელი გავატარეთ; ჩვენ გავეცანით ყველა იმ ოჯახის ქრონიკებს, რომლებთანაც ურთიერთობა გვქონდა. მათი გვარები – ორბელიანები, წერეთლები, გრუზინსკები, დადიანები, მუხრანსკები, ჭავჭავაძეები – იქ ისევე საამაყოა, როგორც ჩვენთან მონმორნსები, მანჩესტერები, ბორგეზები, ლიხტენშტაინები (Montmorency, Manchester, Borghese, Liechtenstein) და სხვა. ამ ხალხის ადათ-წესებს ვაკვირდებოდით სოფლიდან საკმაოდ დაშორებულ ფუნდუკებში, სადაც ჩვენი სახლის პატრონს დავყავდით ქორწილებში, დასაფლავებებსა და ნათლობებზე...

მთარგმნელი ლია ვიტეკი,
რედაქტორი ელზა ნაბახტეველი.

სტატია ითარგმნა შემდეგი გამოცემის მიხედვით:
*Bertha von Suttner, Memoiren, Carl Schunemann Verlag,
Bremen, 1965 (pp: 40-120)*

შენიშვნები

1. გერმ. Morgengabe – დილის საჩუქარი. ევროპული ტრადიციის თანახმად, ქორწინების მეორე დილას ქმარი ცოლს უძღვნის საჩუქარს, რაც სიმბოლურად ნიშნავს ქონების გაზიარებას (მთარგმნელის შენიშვნა).
2. ფრანგ მეორის მეუღლე, რომელიც გარიბალდიმ და მისმა რამდენიმე 1861 წლის თებერვალში გაეტასთან შეიპყრეს და ტახტზე უარის თქმა აიძულეს.
3. ოდესღაც პროკურატორების საცხოვრებელი სასახლეები მარკუსპლატცზე, მოგვიანებით – სურათების გალერეები.
4. ჰომბურგი – Bad Homburg vor der Höhe – ქალაქი გერმანიაში, ჰესენის მხარეში, რაიონული ცენტრი, კურორტი (მთარგმნელის შენიშვნა).
5. კეთილმოწყობილი ბინები (თარგმ. ფრანგულიდან).
6. Das Herzogtum Nassau – ნასაუს საგრაფო, მოგვიანებით საჰერცოგო დამოუკიდებლად არსებობდა დღევანდელი ჰესენის მხარის ტერიტორიაზე, გერმანიაში. დედაქალაქი იყო ვისბადენი (მთარგმნელის შენიშვნა).
7. Carl Christoph Traugott Tauchnitz (1761-1836) – გერმანელი წიგნის მბეჭდავი (მთარგმნელის შენიშვნა).
8. Marquis von Posa – ესპანელი უფლისწულის, დონ კარლოსის მეგობარი ფრიდრიხ შილერის პიესიდან „დონ კარლოსი“ (Jugendfreund vom spanischen Kronprinz Don Karlos) (მთარგმნელის შენიშვნა).
9. Somnambula (Die Nachtwandlerin) – Vincenzo Bellini (1901-1835);
Faust – Charle Gounod (1818-1893);
Lucia von Lammermoor – Gaetano Donizetti (1797-1848);
Don Pasquale – Gaetano Donizetti;
La Traviata – Giuseppe Verdi (1811-1901);
Linda di Chamounix – Gaetano Donizetti.
10. María de la Felicidad Malibran, geb. García (1808-1836), ფრანგი საოპერო მომღერალი (მთარგმნელის შენიშვნა).
11. სამეგრელო Mingrelien, ანუ „ათასი ტბის“ ქვეყანა, დაახლოებით ათასი კვადრატული მილის სიდიდის, მაღალმთიანი და წყლით მდიდარი პროვინცია, რომელიც სპარსეთსა და რუსეთს შორის 1813 წელს დადებული ზავის შედეგად რუსეთის მფარველობაში გადავიდა. დასავლეთიდან მას შავი ზღვა ესაზღვრება, ჩრდილოეთიდან – აფხაზეთი, სამხრეთიდან იმერეთი (ამ მხარესთან ერთად დღეს იგი წარმოადგენს ქართლ-იმერეთის გუბერნიის ერთ-ერთ ნაწილს, რომლის დედაქალაქიცაა ტფილისი), ხოლო აღმოსავლეთიდან – კავკასიონის მაღალმთიანეთი. ალაგ-ალაგ იალბუზი ჩანს. სამეგრელოს ყოფილი მთავარი დადიანი, რომელიც ახლა რუსების სამსახურშია, საკუთარ თავს უწოდებდა შავი ზღვის თავადს და სრულიად შეუზღუდავად ბატონობდა (F. A. Brockhaus, Allgemeine deutsche Real-Encyklopädie für die gebildeten Stände, Leipzig 18n). დღეს სამეგრელო იმერეთთან და საქართველოს სხვა კუთხეებთან ერთად ეკუთვნის საქართველოს საბჭოთა რესპუბლიკას.
12. Fr. Apanage საფრანგეთსა და ევროპის სხვა ქვეყნებში – საუფლისწულო მიწათმფლობელობა, რომელიც ეძლეოდათ სამეფო ოჯახის უგვირგვინო წარმომადგენლებს მეცამეტე-მეჩვიდმეტე საუკუნეების საფრანგეთში (მთარგმნელის შენიშვნა).
13. Charles Frederick Worth, წარმოშობით ინგლისელი, 1849 წელს 14 წლისა ჩავიდა პარიზში; იქ დააარსა არა მარტო მოდის მაღაზია, არამედ შექმნა „მოდის დინასტია“ და ამით საფუძველი ჩაუყარა პარიზის Haute-couture-ის მსოფლიო აღიარებას.

14. კეთილმოწყობილი ბინა (თარგმნ. ფრანგ.-იდან).
15. საქორწილო საჩუქარია, მაგრამ ჯერ საქმრო უნდა გყავდეს (ფრანგ.).
16. ბიარიცი (ფრანგ. Biarritz – „ორი კლდე“) – ზღვისპირა კლიმატური და ბალნეოლოგიური კურორტი სამხრეთ-დასავლეთ საფრანგეთში (მთარგმნელის შენიშვნა).
17. Jenny Lind (1820-1887) – შვედი საოპერო მომღერალი (მთარგმნელის შენიშვნა).
18. პოსტფაქტუმ
19. Lucia von Lammermoor – გაეტანო დონიცეტის ტრაგიკული ოპერა (მთარგმნელის შენიშვნა).
20. პოლინა ვიარდო (Pauline García Viardot, 1821-1910), ესპანელ-ფრანგი მომღერალი, პედაგოგი და კომპოზიტორი.
21. იგულისხმება კონტროქტავის დო.
22. იტალ. La Sonnambula – მელიოდრამა ორ აქტად, კომპოზიტორი ვინჩენცო ბელინი (მთარგმნელის შენიშვნა).
23. პირველი ძალა (თარგმნ. ფრანგ.-იდან).
24. მზითვი (ფრანგ.).
25. პატარა ორშაბათები – მუდმივი შეხვედრები ორშაბათობით, სადაც შესვლა სასახლის კარის წევრებსა და მათ მიერ მიყვანილ სტუმრებს მიწვევის გარეშე შეეძლოთ.
26. მზითვი, სამემკვიდრეო წილი.
27. ბრილიანტის სამკაული.
28. Trente et quarante (ფრ. 30 და 40) – ბანქოს ნაირსახეობა.
29. ცნობილი სასტუმრო, რომლის მფლობელიც იყო რაინჰოლდ შნაიდერის, ცნობილი გერმანელი პოეტის ბაბუა დედის მხრიდან და მოგვიანებით – მამაც.
30. Prinzessin Christine Friederike Auguste von Preußen (მთარგმნელის შენიშვნა).
31. კარგად ბრძანდებოდეთ და ისეთ ბედნიერებას სწეოდეთ, როგორსაც იმსახურებთ. მარად თქვენი... (ინგლ.).
32. ეს ომია! (თარგმნ. ფრანგ.-იდან).
33. კარლ რობერტ ედუარდ ფონ ჰარტმანი (გერმ. Karl Robert Eduard von Hartmann) (1842-1906) – გერმანელი ფილოსოფოს-იდეალისტი, ირაციონალისტი (მთარგმნელის შენიშვნა).
34. ისიდორ მარი ოგიუსტ ფრანსუა ქსავიერ კომტი (ფრანგ. Isidore Marie Auguste François Xavier Comte; 1798-1857) – ფრანგი ფილოსოფოსი, პოზიტივიზმის დამაარსებელი, სოციოლოგიის, როგორც დამოუკიდებელი მეცნიერების ფუძემდებელი (მთარგმნელის შენიშვნა).
35. Émile Maximilien Paul Littré (1801[-1881) – ფრანგი ფილოსოფოს-პოზიტივისტი, ფილოლოგი და ლექსიკოგრაფი (მთარგმნელის შენიშვნა).
36. ვიქტორ კუზენი (ფრანგ. Victor Cousin; 1792-1867) – ფრანგი ფილოსოფოსი, პოლიტიკური მოღვაწე, ისტორიკოსი, ეკლექტიზმისა და სპირიტუალიზმის დოქტრინების შემქმნელი (მთარგმნელის შენიშვნა).
37. Alfred Jules Émile Fouillée (1838-1912) – ფრანგი ფილოსოფოსი (მთარგმნელის შენიშვნა).
38. Ferdinand Lassalle (1825-1864) – გერმანელი ფილოსოფოსი, იურისტი, ეკონომისტი, პოლიტიკური მოღვაწე (მთარგმნელის შენიშვნა).
39. შარლ გუნოს „მარგარეტედან“.
40. შარლ გუნოს ოპერა.
41. ჯაკომო მეიერბეტრის Giacomo Meyerbetr (1791-1864) ოპერა „ჭუგენოტები“.
42. სამეფო ოჯახის არაგვირგვინოსანი წევრებისთვის განკუთვნილი დახმარება (მთარგმნელის შენიშვნა).
43. ბარონის ტიტულის გერმანული ანალოგი (მთარგმნელის შენიშვნა).
44. ნახევრად პირველი სართული, ნამდვილ პირველ სართულზე დაბალია, ხშირია ბაროკოს პერიოდის ნაგებობებში (მთარგმნელის შენიშვნა).
45. იმ დროისთვის ძალიან მაღალი რეპარაციების შემოდინების შედეგად, რასაც საფრანგეთი ფრან-

- კფურტის ზავის საფუძველზე გერმანიას უხდიდა, შეიქმნა ისეთი კაპიტალისტური წარმოება, რომლისთვისაც არსებული ეკონომიკური ფორმები მზად არ აღმოჩნდა. 1873-1874 წწ. გერმანიაში მძიმე კრიზისი იყო, რაც ავსტრიასაც მისწვდა.
46. ამ ვიზიტის წყალობით მოგვიანებით დაინიშნა პრინც ლუი მიურატზე, პრინც აშილის უმცროს ძმაზე.
 47. იმ დროს აზიაში ფართოდ გავრცელებული ტახტრევანი, ოთხფეხიანი, მოაჯირშემოვლებული და ხალიჩაგადაფარებული, ცენტრში მუთაქები და ბალიშები აწყვია, ასე რომ, იქ დაძინებაც შეიძლებოდა. ოთხ კაცს გადაჰქონდა.
 48. გამგებელი
 49. მაღალი საეკლესიო ტიტული მართლმადიდებელ ეკლესიაში.
 50. Almosenier – ისტორიულად – ორდენის სასულიერო პირი, რომელიც მოწყალებისთვის განკუთვნილ ფულს არიგებს; მოგვიანებით – სასულიერო პირი, რომელიც ამავე მიზეზით იყო დაქირავებული თავადის მიერ.
 51. ძალიან კარგად, კოჭი რომ აღჩუმე დაგიჯდება, ისე.
 52. Basmlık – ბამბის კაპიუშონი
 53. Что подлаещь! რას იზამ! (თარგმნ. რუს.-იდან).
 54. „ძველი კლდე“ – 1789 წლის რევოლუციამდე სამეფო კარზე მაღალი კლასის წევრისადმი მიმართვის ნატიფი ფორმა.
 55. იგულისხმება დანიელ ობერის სამაქტიანი ოპერა „მანონ ლესკო“ (მთარგმნელის შენიშვნა).
 56. ჰიპოსი – იგულისხმება მდინარე ცხენისწყალი (მთარგმნელის შენიშვნა).
 57. გამაცანი შენი ძვირფასი ქმარი, ჩემო პატარა კონტესინა, ან ახლა უკვე უნდა ითქვას: ბარონესინა?
 58. 60-იანი წლებიდან დაიწყო ბულგარეთა ორგანიზებული ბრძოლა თურქეთის ბატონობის წინააღმდეგ, 1876 წელს აჯანყდნენ მთელ ბულგარეთში. დროებითი მთავრობა ჩამოყალიბდა, მაგრამ თურქებმა შეძლეს აჯანყების ჩახშობა. შედეგად, ატყდა რუსეთ-თურქეთის ომი, რომელიც 1878 წლის 3 მარტს სან-სტეფანოს ზავით დასრულდა. ბულგარეთი გახდა დამოუკიდებელი, თუმცა თურქეთის მოხარკე სამთავრო; იგი ორი წელი რუსებს ჰქონდათ დაკავებული.
 59. „პატრიოტიზმი და ქრისტიანობა“.
 60. მსუქანა
 61. იურიდიული ტერმინი ქონებისთვის „ყველაფერთან ერთად, რაც მასში შედის“.



მარჯორი სკოტ უორდროპი და ჯონ ოლივერ უორდროპი
ლუიზა ლაფერაბის რეპროდუქცია

ნმინდა ნინოს ცხოვრება

შესავალი

ტექსტს, რომელსაც ამ თარგმანისთვის ვიყენებთ, ეწოდება „საქართველოს სამოთხე“ (რედაქტირებული გობრონ (მიხეილ) საბინინის¹ მიერ, სანკტ-პეტერბურგი, 1882), სტანდარტული კრებულიდან „ქართველი წმინდანების ცხოვრება“. თან დავურთეთ ამონარიდები რუფინუსის², მოსე ქორენელის თხზულებებიდან, აგრეთვე ხელნაწერის ტექსტიდან, რომელსაც ეწოდება „მოქცევაი ქართლისაი“.

საბინინის ტექსტის სიკეთედ შეიძლება მივიჩნიოთ მწყობრი თხრობა, მაგრამ დაუდევარი წერის მანერა და პუნქტუაციის უგულებელყოფა ხშირად ტექსტის ბუნდოვანი და მცდარი აღქმის საფრთხეს ქმნის.

ახალი ვარიანტი. შექმნილ ვითარებაში საუკეთესო ტექსტად შეიძლება მივიჩნიოთ ბეჭდური გამოცემა „ახალი ვარიანტი წმ. ნინოს ცხოვრებისა, ანუ მეორე ნაწილი ქართლის მოქცევისა“ (ე. თაყაიშვილის რედაქციით, ტფილისი, 1891). ამიტომ, სადაც ტექსტი არსებითად განსხვავდება საბინინის ტექსტისგან, შენიშვნები სქოლიოში ჩავიტანეთ (მითითებით ა.ვ., ანუ ავტორისეული ვერსია.)

ამ „ახალი ვარიანტის“ არსებული ხელნაწერი ქმნის „შატბერდის კრებულის“ ნაწილს, არაერთგვაროვანი ეტრატების წიგნს, რომელიც ადრე კლარჯეთის მხარეში, ჭოროხის უღელტეხილზე მდებარე შატბერდის მონასტერს ეკუთვნოდა, და, სავარაუდოდ, დაწერილია მეცხრე ან მეათე საუკუნეში. მასთან ერთადაა აკინძული სამი „ისტორიული ქრონიკა“ და მოკლე ხელნაწერი სათაურით „მოქცევაი ქართლისაი“. დღესდღეობით, ოთხივე ისტორიული წყარო გამოქვეყნებულია. ავტორიზებული ვერსიის ყველაზე თვალში საცემი თავისებურებაა ის, რომ მასში ყველა მთხრობელი პირველ პირში ლაპარაკობს; თითქმის დანამდვილებით შეიძლება ითქვას, რომ ის უძველესია ჩვენამდე მოღწეულ ხელნაწერთაგან და, როგორც ჩანს, გაცილებით უფრო ძველი (იქნებ იმდროინდელი) ორიგინალის ასლს წარმოადგენს. სამწუხაროდ, ის არასრულია. შემთხვევათა თანმიმდევრობა განსხვავებულია სხვა ვერსიებისგან და ზოგი ამბავი მთლიანად გამორჩენილია.

სხვა ვერსიები. სხვა ხელნაწერთა შორის შეიძლება აღინიშნოს:

1. არსენ კათალიკოსის მიერ მეათე საუკუნეში დაწერილი „საქართველოს წმინდანები“ (ინახება სანკტ-პეტერბურგის მეცნიერებათა აკადემიაში). ავტორის განმარტებით, იგი დაეყრდნო როგორც ზეპირ, ისე წერილობით მასალას.

2. შიომღვიმის მონასტრის ხელნაწერი, 1733 წელს დაწერილი.
3. ნათლისმცემლის (ბაპტისტური) მონასტრის ხელნაწერი, 1713 წელი.
შიომღვიმის და ნათლისმცემლის მონასტრების ხელნაწერები აშკარად ერთი და იმავე წყაროდანაა ნასესხები, ოღონდ ერთი მეორიდან არ არის გადაწერილი.
4. დედოფალ მარიამის ხელნაწერი (დაწერილი 1636-1646 წლებში) „ქართლის ცხოვრება“ („ქართული ქრონიკა“), რომელიც არ შესულა ვახტანგ VI-ის რედაქციით გამოცემულ ვერსიაში.
5. „ქართლის ცხოვრება“, დიდი საქართველოს ქრონიკა, მეფე ვახტანგ VI-ის რედაქტირებული (მეთვრამეტე საუკუნის პირველი წლები), მაგრამ მის გამეფებამდე ბევრად ადრე შეკრებილი. ტექსტი და ფრანგული თარგმანი გამოსცა მ. ფ. ბროსემ, პეტერბურგის მეცნიერებათა აკადემია.

ხელნაწერი „მოქცევაჲ ქართლისაჲ“ (ქვემოთ, გვ. 378-380) გადმოსცემს წმინდა ნინოს ლეგენდას მშრალად, მოკლედ, და ისტორიას მოჰყვება მეცხრე საუკუნემდე; ხელნაწერის უძველესი ნაწილი არ უნდა იყოს მეშვიდე საუკუნეზე გვიანდელი. ის არ უნდა განვიხილოთ, როგორც ფესვი, საიდანაც სხვა ვერსიები აღმოცენდა, არამედ როგორც მხოლოდ უფრო ადრეული მასალების საფუძველზე შედგენილი ისტორიული ქრონიკების კომპილაცია.

ვერსიების თანხვედრა. როგორც ირკვევა, სხვადასხვა ვერსიაში, დაახლოებით ათასი წლის განმავლობაში, არ ვლინდება არსებითი განსხვავებები. მათ კიდევ უფრო ამყარებს რუფინუსი, დამოუკიდებელი ავტორიტეტი, რომლის ნაშრომი, როგორც ჩანს, საქართველოში პირველად მეთერთმეტე საუკუნეში გახდა ცნობილი **ეფრემ მცირეს**³ მიერ **თეოდორეტუსის**⁴ თარგმანის მეშვეობით. ალბათ სწორედ რუფინუსს უნდა მივაწეროთ ჩამატება ჭაბუკის განკურნების შესახებ; ამგვარ წარმომავლობაზე უნდა მიაწინებდეს სიტყვა *cilicī*⁵-ს გამოყენება და ის, რომ ეს შემთხვევა ავტორიზებულ ვერსიაში გამოტოვებულია.

ქრონოლოგია. „მოქცევაჲ ქართლისაჲს“ სხვადასხვა ავტორი განსხვავებულად ათარიღებს: ვახუშტი – 317 წ., ბარონიუსი – 327 წ., ბროსე – 328 წ., „ქართლის ცხოვრება“ – 338 წ. ამათგან პირველის და ბოლოს დათარიღება დაუსაბუთებელია. 332 – წელიწადი, რომელსაც „მოქცევაჲ ქართლისაჲ“ მიუთითებს, აშკარად სწორია, თუ „დაბადებას“ წავიკითხავთ როგორც „ამაღლებას“... სწორედ ამ თარიღს ადასტურებს *Chronique Arménienne* (ანუ, მხოლოდ მეთორმეტე საუკუნის სომხური თარგმანის სახით შემორჩენილი „საქართველოს ქრონიკა“, რომელიც მ. ბროსემ გამოაქვეყნა ფრანგულ ენაზე ნაშრომში *Additions et éclaircissements*, Pgb. 1851). ასე რომ, შეგვიძლია დავადგინოთ შემდეგი თარიღები: ნინოს მობრძანება საქართველოში – 324 წ., მეფე მირიანის ნათლობა – 332 წ., ნინოს გარდაცვალება – 338 წ.

ქართული ავტოკეფალიური ეკლესია. ამტკიცებენ, და არცთუ უსაფუძვლოდ, რომ

საქართველოს პირველ ეპისკოპოსს მხოლოდ იმიტომ ერქვა იოანე (იოვანე), რომ ის „ნათლისმცემელი“ იყო, და რომ სინამდვილეში ის იყო ევსტათი, ანტიოქიის პატრიარქი 325-იდან 331 წლამდე, ვიდრე ერეტიკოსებმა არ გამოაძევეს. ჩანს, რომ 1051 წელს ანტიოქიის სამღვდელოება პრეტენზიას აცხადებს საქართველოს პატრიარქობაზე და დაახლოებით იმავე დროს ეფრემ მცირე ევსტათი ანტიოქელს მოიხსენიებს, როგორც საქართველოს პირველ ეპისკოპოსს. ასეა თუ ისე, დანამდვილებით ვიცით, რომ ვახტანგ გორგასლანის გამეფებამდე (მეხუთე საუკუნის ბოლო) ქართული ეკლესია ანტიოქიას ექვემდებარებოდა; ვახტანგმა კი ის ეროვნულ ეკლესიად აქცია და შეექვსე საყოველთაო კრებამ საზეიმოდ გამოაცხადა ქართული ეკლესიის ავტოკეფალია. დღეს ქართული ეკლესიის ავტოკეფალია, პრაქტიკულად, რუსულმა ეკლესიამ შთანთქა და წმინდა ნინოს აკლამას და ბოდბის მონასტერს შემზარავი თანამედროვე შენობები შემოარტყეს გარს, მასზე ზრუნვა მიანდეს დედათა მონასტრის რუს მონაზვნებს, რომელთაც არ იციან ქართული ენა და წარმოდგენა არა აქვთ ამ ქვეყნის ისტორიაზე.

დამატებითი შენიშვნები. იქნებ ზედმეტიც კია ყურადღების გამახვილება ებრაელებისა და ქალების დამსახურებაზე საქართველოში ქრისტიანობის დამკვიდრებაში, ისევე როგორც სხვა ადგილებში. ებრაული კოლონიები (გვ. 355), მრავალრიცხოვანი და შეძლებული, როგორც ჩანს, აქ უძველესი ხანიდან არსებობდა; და რაბინმა აბიათარმა, რომელიც საკუთარ თავს თავმომწონედ უწოდებდა „ახალ პავლეს“, ამ ამბავში მნიშვნელოვანი როლი შეასრულა. დედოფალი ნანა კი ბიზანტიელ ელენეს, ფრანგ კლოტილდას და ქრისტიანობის სხვა სამეფო წარმომავლობის ბანოვანებს მოგვაგონებს.

ინფორმაცია წინაქრისტიანული რელიგიების თაობაზე, სპარსეთიდან ნასესხები არმაზის და ზადენის ღვთაებები და ქალდეველთა მუდამ სამტროდ განწყობილი ქალდეველთა ღმერთი ითრუჯანი, „ნებროთის წიგნი“ და განსაკუთრებით, გაცი და გაიმი, თუ გა, „ქართველი ხალხის“ ღმერთები, ნამდვილად იმსახურებენ ყურადღებას. იგივე შეიძლება ითქვას ფოლკლორის მწირ ფრაგმენტებზე, რომელთაც 353-ე და 367-ე გვერდებზე ვხედავთ. ლინგვისტური თვალსაზრისით, ფილოლოგებისთვის მეტად საყურადღებო უნდა იყოს „ბრანჯულ“ და ძველსპარსულ ენებზე არსებული ფრაგმენტები 351-ე და 352-ე გვერდებზე. უბრალო თარგმანი, რომელსაც აქ გთავაზობთ, დარგის დაინტერესებულ მკვლევრებს ასპარეზს უხსნის განმარტონ ამ ლეგენდაში არსებული ბუნდოვანებით მოცული მრავალი საკითხი.

ტექსტი

მეფე მირიანის და მასთან ერთად მთელი საქართველოს მოქცევა ჩვენი წმინდა და კურთხეული დედის, მოციქული ნინოს მიერ

მისი მოხსენიების დღე აღინიშნება 14 იანვარს

გვინდა გიამბოთ ჩვენი ყოვლად წმინდა და კურთხეული დედის, სრულიად საქართველოს განმანათლებლის, მოციქული ნინოს ამბავი, ისე, როგორც სიკვდილის სარეცელზე მან თავად მოუთხრო ყოველივე მორწმუნე სალომე უჯარმელს, მეფე მირიანის რძალს, რომელმაც ჩაიწერა ის.

იმ დროს, როცა წმინდა გიორგი კაპადოკიელმა⁶ თავი ქრისტეს მოწმედ აღიარა, ქალაქ კაპადოკიაში იყო მავანი კეთილმორწმუნე მთავართაგანი, სახელად ბაბულონი, რომელიც რომში გაემგზავრა, რათა მეფე მაქსიმიანეს⁷ სამსახურში ჩამდგარიყო და ძღვენი მიერთმია მისთვის. სწორედ იმ დღეებში, კოლასტრაში⁸ ცხოვრობდა ერთი კაცი, რომელსაც ორი შვილი ჰყავდა: ვაჟი, სახელად იობენალი და ქალიშვილი, სოსანა; და ის და მისი ცოლი გარდაიცვალნენ, ხოლო და-ძმა დაობლდა. ბავშვები აღდგნენ და წმინდა ქალაქ იერუსალიმისკენ გაემშურნენ, რადგან, ყველა ქრისტიანის მსგავსად, წმინდა აღდგომა იწამეს. ერთხანს იქ დაჰყვეს; იობენალმა, სოსანას ძმამ, ვიკონომოსის⁹ თანამდებობა მოიპოვა, ხოლო სოსანა ბეთლემელ სარა ნიამფორს¹⁰ დაუდგა მოახლედ.

ამასობაში, კაპადოკიელი ჭაბუკი ბაბულონი, რომელიც ზემოთ ვახსენეთ, წარდგა მეფის წინაშე, როცა ბრანჯები¹¹ აჯანყდნენ რომაელების წინააღმდეგ პატალანის¹² ველზე. უფლის ნებით ბაბულონი უძლეველი შეიქნა და ის ბრანჯებს წინ აღუდგა ურიცხვი ლაშქრით და კუდით ქვა ასროლინა, დაატყვევა მათი მეფე და ყველა მისი მხედართმთავარი. შემდეგ ისინი (რომაელთა) მეფეს მიჰგვარა, რომელმაც ყოველი მათგანის სიკვდილით დასჯა გადაწყვიტა. ბრანჯები აქვითინდნენ და ბაბულონს შეევედრნენ: „ჯერ დაგვრთეთ ნება თქვენი რელიგია გავიზიაროთ, და შეგვიძეხით თქვენი ღმერთის ტაძარში; მერე კი, დაე, სიკვდილს შევეყაროთ, რადგან შენ დაგვატყვევე ჩვენ. ო, გმირო! თუ ასე მოიქცევი, შენ აღარ დაგბრალდება ჩვენი სისხლისღვრა“. როცა ბაბულონმა გაიგონა მათი ვედრება, სასწრაფოდ გაემშურა პატრიარქთან¹³ უჩუმრად და მოახსენა, რა უთხრეს ტყვეებმა. ბაბულონმა ისინი მონათლა, შეიყვანა ტაძარში, სადაც ბრანჯები ქრისტეს წმინდა სისხლსა და ხორცს აზიარეს და წმინდა მოციქულთა დიდება გაცხადდა მათზე.

თავიანთი აღსასრულის მომლოდინე ბრანჯები დილაუთენია აღდგნენ. სასიკვდილო სუდარაში შემოსილები მიიყვანეს იქ, სადაც სიკვდილით უნდა დაესაჯათ.

გზად ლოცულობდნენ და ადიდებდნენ უფალს ნათლობის და წმინდა ნაწილებით ზიარების გამო და თან ამბობდნენ: „ჩვენ ამ სიკვდილით უკვდავებას მოვიპოვებთ, რადგან უფალმა გაგვხადა ღირსი, გვცხილა მისი დიდება და მიგველო უღევი საგზალი გასამგზავრებლად, რათა შევიცნოთ უკვდავი ღმერთის – ქრისტეს სისხლი და ხორცი, ღმერთისა, რომელიც ყველა მწვერვალზე უფრო მაღალია და ყველა უფსკრულზე უფრო ღრმაა, ღმერთისა, რომელიც კურთხეულია სამარადისოდ. მაგრამ ვაი, მათ, ჩვენს თანამოძმეთ, სიმწარეში დაბადებულთ, წყვდიადის მემკვიდრეთ!“ ამის შემდეგ, მათ ჯალათს მიანდეს თავი. ნანახმა ამჯერადაც მთელი არსებით შეძრა ბაბულონი და ცხარედ ატირდა – ტყვეები ჰგავდნენ ცხვრებს, რომელთაც სასაკლაოსკენ მიერეკებიან და ისე დასტიროდნენ საკუთარი შვილების ბედს, როგორც კრავებისას. მათი საცოდაობით გულაჩუყებული ბაბულონი მივიდა მეფესთან და შეევედრა, რომ შეეწყალებინა ისინი. მეფემ თავისუფლება უბოძა მათ.

ბრანჯები ემუდარებოდნენ ბაბულონს, გაჰყოლოდა მათ სამშობლოში, რათა ესწავლებინა ქრისტეს სახარება მათი ხალხისთვის, წყლით მოენათლა მთელი ერი. ბაბულონმა შეისმინა მათი მუდარა და პატრიარქს სთხოვა მღვდელი გაეყოლებინა მისთვის. შემდეგ მეფისგან აიღო წასვლის ნებართვა და ასე გაუდგნენ გზას გახარებულები. როცა ბრანჯების მიწა-წყლამდე ერთი დღის სავალია ჰქონდათ დარჩენილი, ახალმა ამბავმა მეფის მშვიდობით დაბრუნების თაობაზე, მეფისა, რომელსაც მთელი მისი მხედართმთავრები წინ მიუძღოდნენ, უფრო ადრე მიაღწია ბრანჯთა ქვეყანას და მათ შესაგებებლად გამოემართა ათი ერისთავი¹⁴: ხოზამაი, ხოზაბა, ზაკაი და ხენებაგი, ტიმგარაგი დაზაკაი¹⁵, გაზაი, ზარგაი, ზარდა, ზამრაი და თმონიგონი¹⁶, და მათთან ერთად მთელი სამეფო, და ყველანი ღრმა მდინარის პირას¹⁷ შეიყარნენ. მეფემ ორად გაყო ხალხი, ნაწილი მდინარის ერთ მხარეს დააყენა და დანარჩენი – მდინარის მეორე მხარეს, მღვდელმა კი მდინარე აკურთხა. შემდეგ მთელი ხალხი შევიდა მდინარეში და განიბანა, და ერთად ამოვიდნენ და მღვდელმა¹⁸ **[ბრანჯთა ნათლობა]** თითოეულს თავზე დაადო ხელი. ათ დღეს დაჰყვეს იქ, მდინარის პირას, და კარვები გამართეს. მღვდელმა უსისხლო მსხვერპლი შესწირა და ერმა ქრისტეს წმინდა ზიარება მიიღო. მღვდლებმა მათ ქრისტიანობის ყველა მცნება გააცნეს. მას შემდეგ, რაც ბაბულონი გამოეთხოვა მათ, მშვიდობით განერიდა და დიდი ძღვენით ხელდამშვენებული რომისკენ გაემშურა.

მან იერუსალიმში წასვლა განიზრახა, და როცა იქ ჩავიდა, **[ბაბულონი ჩადის იერუსალიმში]** ღარიბ-ღატაკებს დაურიგა თავისი მონაგარი უფლის მცნებისამებრ. მოინახულა ვიკონომოსი იოხენალი, რომელიც ამასობაში პატრიარქი გამხდარიყო, და ბაბულონი და პატრიარქი გულითადი მეგობრები გახდნენ. მაშინ სარა ნიამფორმა პატრიარქს უთხრა: „ვინაიდან ბაბულონი ბრანჯების მამა და ნათლია, სიბრძნით სავსე კაცი და დაუღალავი მსახურია ღვთისა, შერთე მას ცოლად შენი და, სოსანა“. წმინდა პატრიარქს ეპმა სარას რჩევა.¹⁹ **[და ცოლად ირთავს სოსანას]**

წმინდა ნინო,²⁰ საქართველოს განმანათლებელი, მათი ერთადერთი შვილი, დედამ უპოვართა მსახურად²¹ აღზარდა. როდესაც ნინო თორმეტი წლის გახდა, მისმა მშობლებმა გაყიდეს ყველაფერი, რაც კი ებადათ, და იერუსალიმში წავიდნენ. როცა წმინდა ქალაქში შევიდნენ, ზაბულონი პატრიარქმა აკურთხა, და მან დაუტევა მეუღლე. ხოლო ნინო, ქალიშვილი, გულში ჩაიკრა, სახე თვალითაგან გადმომსკდარმა ცხარე ცრემლმა დაუსველა და უთხრა: „ჩემო ერთადერთო ქალიშვილო! გტოვებ ობლად, და გაბარებ შენ შენს მამას, რომელიც არის ცათა შინა, ყოველთა არსთა ღმერთს, ვინაიდან ის არის ობოლთა მამა და ქვრივთა განმკითხავი. ნუ შეშინდები, შვილო ჩემო, ბაძავდე მარიამ მაგდალელს და ღაზარეს ქრისტესმიერ დებს. თუ შენ მას ისე შეიყვარებ, როგორც მათ უყვარდათ ის, მოგცემს ყველაფერს, რასაც შენ შესთხოვ“. ასე დაარიგა შვილი, სამარადისო დამშვიდობების ამბორი უძღვნა და წავიდა იორდანეს გაღმა, ადამიანებთან, ქვეყანას, მაგრამ ყოვლისმცოდნე უფალმა უწყოდა მათი შეკრების ადგილი.

ხოლო პატრიარქმა ნინოს დედა ღარიბი და უძლური ქალების მსახურად დააყენა, და წმინდა ნინო ორ წელიწადს ემსახურებოდა სომეხ დვინელ ნიაფორს, გამუდმებით კითხულობდა ჯვარზე გაკრული ქრისტეს ვნებათა ამბავს, მისი დაკრძალვის, მისი აღდგომის, მისი სამოსის, მისი ცხედრის შესამოსი ტილოს, სუდარის და ჯვრის თაობაზე. მან ყველაფერი შეისწავლა, რადგან იერუსალიმში არც მანამდე და არც იმ დროს, არავინ მოიძევებოდა ნიაფორივით განსწავლული ძველ თუ ახალ სჯულის კანონებში; ყველას აღემატებოდა განსწავლულობით. და როცა ნიაფორი ასწავლიდა ნინოს, უთხრა მას: „შვილო ჩემო, შენში ძალას ვხედავ, მსგავსს ძუ ლომისას, რომლის ღრიალი ყოველ ოთხფეხა პირუტყვზე უფრო ძლიერია, ან დედალი არწივისას, რომელსაც უნარი შესწევს ილივლივოს ცის თვალუწვდენელ სიმაღლეებში, სადაც მამალი არწივებიც ვერ აღწევენ, და მარგალიტივით პაწია თვალისჩინით მთელ ქვეყანას ხედავს, შეყოვნდება, მოიძიებს და ელვის უსწრაფესად შეიგრძნობს მსხვერპლს – ფრთებს მოიქნევს და წამში დააცხრება. სწორედ ასეთი შეიძლება იყოს შენი ცხოვრება წმინდა სულის წინამძღოლობით. ახლა მე შენ გამოგიცხადებ ყოველივეს: როცა უკვდავი ღმერთი მოკვდავი ადამიანების სამყაროს მოეველინა წარმართთა გამოსახმობად, რადგან მას თავად სურდა ამა სოფლის ხსნა, პირველი რაც გააკეთა, სიკეთე უყო ებრაელებს, მკვდრეთით აღადგენდა, თვალისჩინს უბრუნებდა, კურნავდა სნეულთ. ადამიანებს შემურდათ მისი, შეიკრიბნენ, მოითათბირეს და გაგზავნეს ჯარისკაცები (მაღელმსრობლები²²), რათა ეთხოვათ ებრაელებისთვის, სასწრაფოდ ჩასულიყვნენ იერუსალიმში, და ეუბნებოდნენ: „მოდით, შევიკრიბოთ ერთად და მოვკლათ იგი“. შემდეგ ყოველი კუთხიდან გამოვიდა უამრავი ბრძენკაცი, მოსეს რჯულში განსწავლულები, რომლებიც უარყოფდნენ სულიწმინდას და ის, ვინც იყო ქრისტე, მართლაც მოაკვდინეს. ჯვარს აცვეს და კენჭი ყარეს მის სამოსზე და ის²³ ერგო ერთ მოქალაქეს მცხეთიდან, ჩრდილოეთიდან. ებრაელებმა დამარ-

ხეს ქრისტე და ამოქოლეს მისი საფლავი და სდარაჯობდნენ, მაგრამ ის აღდგა, როგორც იწინასწარმეტყველა. და ქრისტეს აკლდამაში, სადაც პილატე და მისი ცოლი მივიდნენ, იპოვეს ტილოები. როცა იპოვეს, პილატეს ცოლმა მოითხოვა ზეწარი და სწრაფად წავიდნენ პონტოში, ცოლის სახლში, და პილატეს ცოლმა იწამა ქრისტე.²⁴ ცოტა ხნის შემდეგ, ტილო მოციქულ ლუკას ჩაუვარდა ხელში, რომელმაც ის შეინახა მხოლოდ მისთვის ცნობილ ადგილზე.

„ამის შემდეგ მათ ვეღარ იპოვეს სუდარა, მაგრამ ამბობენ, რომ ის პეტრემ იპოვა, წაიღო და შეინახა, მაგრამ არავინ უწყის, იპოვა თუ არა ვინმემ ის. ჯვრები დამარხულია იერუსალიმში, თუმცა კაციშვილმა არ იცის, რა ადგილზე. როცა ღმერთი ინებებს, ისინიც გამოჩნდება“.

როდესაც წმინდა ნინომ შეიტყო ეს ყოველივე სარა ნიამფორისგან, მან მადლობა უძღვნა და აკურთხა უფალი, და იკითხა: „სად არის ის ჩრდილოეთის ქვეყანა, საიდანაც ებრაელები ჩამოვიდნენ და სადაც მათ უფალი ქრისტეს შესამოსელი წაიღეს?“ სარამ მიუგო: „²⁵ აღმოსავლეთში, ქართლის ქვეყანაში არის ერთი ქალაქი, სახელად მცხეთა, სომხეთის და მთიულეთის მახლობლად, და ახლა ის უუიკთა²⁶ იმპერიის ნაწილი გახდა, და კერპთაყვანისმცემლების ქვეყანა“.

სწორედ იმხანად მავანი ქალი ჩამოვიდა ეფესოდან წმინდა ადგილების თაყვანსაცემად და სარა ნიამფორმა ჰკითხა მას, დედოფალი ელენე ისევ შეცდომილია და ისევ წყვდიადშია, თუ არაო. და ქალმა მიუგო: „მე მათი მსახური გახლავარ, მოზიარე ყველა მათი თათბირისა, როგორც საჯარო, ისე საიდუმლო, და ვიცი, რომ მას ახლა დიდად სწადია ქრისტეს სჯულს ეზიაროს და ნათლობა მიიღოს“. როცა წმინდა ნინომ ეს ამბავი შეიტყო, ნიამფორს უთხრა: „წარმგზავნე მასთან, წარვდგები დედოფალ ელენეს წინაშე; განა არ უნდა ვეახლო და დავეღაპარაკო ქრისტესათვის?“ ნიამფორმა პატრიარქს აუწყა ნინოს სურვილის და განზრახვის შესახებ, და პატრიარქმა, ნინოს ბიძამ, იხმო დისშვილი და დააყენა წმინდა საკურთხევის კიბეზე. პატრიარქმა წმინდა ხელები ნინოს მხრებზე დაადო, ზეცისკენ თვალაპყრობილმა ამოიხვნეშა და თქვა: „ო, უკვდავო უფალო ღმერთო, შენს წყალობას ვავედრებ ჩემი დის ობოლ ქალიშვილს, და ვაგზავნი მას, რათა იქადაგოს შენი ღვთაებრიობა. დაე, მან გაავრცელოს შენი აღდგომა; სადაც ინებებ შენ, დაე, იქით აიღოს გემი; დაე, ეს მოგზაური გახდეს, უფალო იესო, სულიერი შვების თავშესაფარი, წინამძღოლი, ბრძენი მეტყველი, რადგან ის ივლის შენი სახელით“. და დედა ეამბორა დამშვიდობებისას და პირჯვარი გადასახა²⁷, და ასე, უფლის მიმართ ლოცვითა და კურთხევით დაშორდნენ ერთმანეთს.

წმინდა ნინო გზას გაუდგა იმ დედაკაცთან ერთად, რომელიც ეფესოდან ჩამოსულიყო. როცა რომაელების სამეფოს მიაღწენ, **[ეფესოელ დედაკაცთან ერთად]** იმ დედაკაცის სახლში, ვისთან ერთადაც იმგზავრა, მათ ნახეს მავანი დედოფალი²⁸ (?მეფის ასული), სახელად რიფსიმე და მისი დედობილი გაიან²⁹. ისინი უმანკო დე-

დათა მონასტერში დაბინავებულიყვნენ, ესწრაფოდნენ ქრისტეს აღმსარებლობის მიღებას და ნათლობას იერუსალიმიდან. ის დედაკაცი მივიდა წმინდა ნინოსთან და უამბო მეფის ასულ რიფსიმეს შესახებ, და როდესაც ნინომ შეიტყო, როგორ ჰყვარებია რიფსიმეს ქრისტე, ისიც წავიდა მასთან საცხოვრებლად მეგობარ პილიგრიმ ქალთან ერთად. იმავე წელს წმინდა ნინომ მონათლა რიფსიმე, რომელიც დიდი ხანია, ამას ნატრობდა, **[რიფსიმეს ნათლობა]** და მასთან ერთად მონათლა მისი დედობილი გაიანე და მისი ოჯახის სხვა წევრებიც, სულ ორმოცდაათი³⁰ სული; და წმინდა ნინო დედათა მონასტერში³¹ ცხოვრობდა მათთან ერთად ორ წელიწადს.

იმ დღეებში³² იმპერატორმა ხალხი წარგზავნა კეთილი და მშვენიერი ქალწულის საპოვნელად, რომელსაც ღირსეულ ცოლობას გაუწევდა. **[იმპერატორს სურს ცოლად მოიყვანოს რიფსიმე]** როდესაც მაცნეები ქალწულ დედათა მონასტერში ჩავიდნენ, მათ დაინახეს რიფსიმე და შეიტყვეს, რომ სამეფო ჩამომავლობისა იყო. დიდად მოიხიბლნენ მისი სილამაზით, რადგან მსგავს სილამაზეს ვერსად ნახავდით. მათ ჩაიხატეს რიფსიმეს სახე და ხეზე გამოსახეს მისი პორტრეტი, რომელიც იმპერატორს გაუგზავნეს. როდესაც იმპერატორმა სურათი ნახა, უზომოდ გაიხარა და აღტაცებულმა გადაწყვიტა სამეფო დიდებულების შესაფერი ბრწყინვალე ქორწილი გადაეხადა. ამის გამო საჩქაროდ აფრინა მაცნეები და მთავრები მთელს სამეფოში და უბრძანა საჩუქრები შეეკრიბათ; დიდი სიხარულით გაჩაღდა მზადება საიმპერატორო ქორწილისთვის.

როდესაც წმინდა დედებმა დაინახეს მტრის ავი ზრახვა, და ისიც, თუ რა გამალებით სტყორცნიდნენ ცეცხლოვან ისრებს ქრისტეს წმინდა მოწმეებს, შეშფოთდნენ, რადგანაც მეფე რისხვის იარაღი იყო – როგორც გველი, რომელმაც სამოთხეში დაილაპარაკა; და სწორედ ასეთი იყო ეს წარმართიც, რომელიც უწმინდურ, შემზარავ კერპებს სცემდა თაყვანს. როდესაც კურთხეულმა რიფსიმემ და გაიანემ და სხვა მონაზონმა დედებმა დაინახეს ცდუნება, რომელიც მათ ემუქრებოდა, გაიხსენეს უმანკოების ფიცი, მიცემული უფლისთვის. მწარედ ატირდნენ იმის გამო, რომ მეფემ სურათით შეიტყო რიფსიმეს სილამაზის ამბავი. მწარე ეპიტიმია დაუწესეს საკუთარ თავს და გულმხურვალედ ევედრებოდნენ ღმერთს და ღოცულობდნენ დაუღალავად; და რაკი ყველანი ერთ აზრზე იყვნენ, საიდუმლოდ გაიპარნენ იმ ქვეყნიდან – ორმოცდაცამეტი სული ერთად. **[რიფსიმეს და მის თანმხლებთა გაქცევა სომხეთში]** ლტოლვილები სომხეთის (სომხეთის) საზღვრებში შევიდნენ, იმ ადგილზე, რომელსაც ახალქალაქი ეწოდება და რომლის შემოგარენშიც არის დვინი, სამეფო რეზიდენცია.

ისინი საწნახლებში შევიდნენ, რომლებიც გაშენებული იყო ჩრდილოეთით და აღმოსავლეთით და თავს ინახავდნენ ხელსაქმით.

როდესაც მეფემ გაიგო, რომ წმინდა რიფსიმე და მისი თანმხლებნი ერთად ხელიდან დაუსხლტნენ მას და მის ცოდვიან სიყვარულს, საშინელი რისხვით აღივსო და ყოველ მხარეს გაგზავნა ხალხი მათ საპოვნელად. და სამეფო დესპანები წარ-

დგნენ სომეხთა მეფე თრდატის წინაშე და გადასცეს მას იმპერატორის შემდეგი შინაარსის წერილი:

[იმპერატორის წერილი თრდატის, სომხეთის მეფისთვის] „მე, იმპერატორი, სალამს გიძღვნი შენ, ჩემს საყვარელ მონარქ ძმას და მეგობარს, თრდატს. მინდა გაცნობო, ჩემო ძმაო და მოკავშირე, რომ ქრისტიანების ერთმა სექტამ, რომელსაც ადრეც ბევრი ტანჯვა მოუყენებია ჩვენთვის, ისევ შეურაცხყო ჩვენი სამეფო უდიდებულესობა და აღაშფოთა ჩვენი სამეფო. ისინი ეთაყვანებიან ერთ მკვდარ კაცს, რომელიც ჯვარს აცვეს და თაყვანს სცემენ ხის ფიცარს და დიდებად მიაჩნიათ უფლის სახელით სიკვდილი; მათ არ ეშინიათ ებრაელების, არამედ ეშინიათ *მისი*, ვინც თავად აცვეს ჯვარს; ისინი შეურაცხყოფენ მეფეებს და აბუჩად იგდებენ ღმერთებს, და თაყვანს არ სცემენ არც მზეს და არც მთვარეს და ვარსკვლავებს, არამედ ამბობენ, რომ ყველაფერი იმ ჯვარცმულის შექმნილია; და ისინი გაურბიან ამქვეყნიურ ცხოვრებას, დაუტევებენ მამებს და დედებს და ცალკე ცხოვრობენ, სანამ ცოცხლები არიან. მიუხედავად იმისა, რომ ვემუქრები და ვაწამებ მათ, მაინც მრავლდებიან, სულ უფრო და უფრო. მაგრამ მოხდა ისე, რომ მე ამ სექტის ერთ-ერთი წევრის, ახალგაზრდა ქალიშვილის პორტრეტი ვნახე, და მისი ცოლად შერთვა განვიზრახე; მაგრამ მისი გული მეფის სიყვარულის მიმართაც კი გულგრილი აღმოჩნდა. მისთვის მე საზიზღარი და ბინძური ვარ, და სხვებთან ერთად გაიქცა, დამეძალა; ახლა ისინი შენი ქვეყნის საზღვრებში შემოსულან. ამიტომ მინდა გაცნობო შენ, ჩემო ძმაო, რომ ახლა შენ უნდა მოძებნო და იპოვო ის; დაე, ისინი, ვინც მას თან ახლავს, სიკვდილით დაისაჯონ, რადგან მათ ის აცდუნეს, მაგრამ თავად ის, ასეთი პირმშენიერი, სახელად რიფსიმე, ჩემთან გამოგზავნე. თუმცა, თუ შენ ისურვებ, შეგიძლია თავად დაიტოვო, რადგან შეუძლებელია მთელს იონიელთა (? იონიელები, ბერძნები) სამფლობელოში მასზე ლამაზი იპოვო ვინმე – და შეუნარჩუნე სიცოცხლე ღმერთების სადიდებლად“.

[თრდატი მოისურვებს ცოლად შეირთოს რიფსიმე] როცა თრდატმა იმპერატორის ეს ბრძანება წაიკითხა, სასწრაფოდ წამოიწყო ძებნა, და როცა იპოვა საწნახელში დამალულები, და როცა რიფსიმე დაინახა, სიყვარულის წადილით აენტო, დიდი სიხარულით აღივსო და განიზრახა მისი ცოლად შერთვა. **[რომელიც უარს ეუბნება და წამებით კლავენ]** რიფსიმე არ დათანხმდა მეფეს, და ამიტომ ის წამებით მოკლეს თავის დედობილ გაიანესთან და სხვა მრავალთან ერთად, როგორც აღწერილია მათი წამების წიგნში; და ჩვენთვის ცნობილია სასწაულები, მათი წამების ჟამს აღსრულებული, სომეხთა მოქცევაში, და ღმერთის განგებით, მეფე თრდატიც მათთან ერთად მოექცა.

[ნინო გაიქცევა და ასკილის ეკალბარდში იმალება. ნინოს ხილვა] შემდეგ რამდენიმე წმინდა დედა, მათ შორის წმინდა ნინოც, გაიქცა, და ნინო ასკილის ეკალბარდში დაიძალა, რომელიც ჯერ არ აყვავებულიყო. და ვიდრე წმინდა ნინო ასე

იმალებოდა, მას ეწვია ხილვა – მთავარდიაკვანი³³ გარდამოსული ციდან, სინათლის ოლარმოსხმული, ხელში სასაკმევლით, საიდანაც საამო ნელსურნელოვანი კვამლი იფრქევოდა და ცას ფარავდა; და მასთან ერთად იყო მრავალი ციური არსება. წმინდა წამებულთა სულები გათავისუფლებულიყვნენ თავიანთი სხეულებიდან და შერწყმოდნენ მანათობელ ანგელოზთა დასს, და ყველანი ერთად ამაღლებულიყვნენ ზეცად. როცა წმინდა ნინომ იხილა ეს ყოველივე, ხმამაღლა შესძახა: „ო, უფალო, ო, უფალო, რად დამტოვე მე აქ, ამ ვეშაპებსა და გველებს შორის?“³⁴ ამის შემდგომ გაიგონა ხმა ზეციდან ჩამომავალი: „შენც ასევე გაგიყვანენ ზეციურ სამეფოში და ღმერთის ტახტის წინ დაგაყენებენ, როცა ეს ეკალი, რომელიც გარს გარტყია, ვარდის ფურცლების სურნელებით შეიმოსება“³⁵; მაგრამ ახლა ადექი და წადი ჩრდილოეთის ქვეყანაში, სადაც სამკალი ბევრია, მუშაკნი კი – ცოტა“.³⁶

[ნინოს ჩრდილოეთით გამგზავრება] მაშინ ნინო გაეშურა იქით, და ჩავიდა ორბანთში³⁷, სომხეთის საზღვრებში; და ოთხი თვის შემდეგ – მარტიდან ივნისამდე – გზაში იყო და ჯავახეთის³⁸ მთებს მიაღდა (სადაც იყო დიდი ტბა, რომელსაც ეწოდება ფარავანი. როცა წმინდა ნინომ ამ ადგილს მიაღწია, დაინახა ბაფხულში თოვლით დაფარული ჩრდილოეთის მთები, და ცივმა ჰაერმა დაჰკრა) და აკანკალდა, და აღმოხდა: „ო, უფალო, მიიღე ჩემი სული!“ **[შეყოვნდება ფარავნის ტბასთან]** ნინო იქ ორ დღეს შეყოვნდა, და საკვებად თევზს სთხოვდა მეთევზეებს, რომლებიც ტბაში იჭერდნენ თევზს. იქ ასევე იყვნენ მწყემსები, და როცა ისინი ღამით ფარას დარაჯობდნენ, თავიანთ ღმერთებს, არმამს და ზადენს უხმობდნენ საშველად, და შესაწირავს აღუთქვამდნენ, როცა მშვიდობით წარდგებოდნენ მათ წინაშე. ამას ისინი სომხურ ენაზე ამბობდნენ, რაც წმინდა ნინოს ესმოდა, რადგან ადრე ნიაფორისგან ისწავლა ცოტა, და ნინო ერთ მწყემსს გამოელაპარაკა და ჰკითხა: „რომელი სოფლიდანა ხარ?“ მწყემსმა მიუგო: „ჩვენ ქინძარიდან, რაბათიდან და დიდი ქალაქიდან – მცხეთიდან ვართ, სადაც ეს ღმერთნი მბრძანებლობენ და მეფენი განაგებენ“.³⁹ „სად არის ეგ ქალაქი მცხეთა?“ – ჰკითხა ნინომ მეთევზეებს. მათ მიუგეს: „მცხეთა დგას მდინარეზე, რომელიც ამ ტბიდან მიედინება“.

როცა ნინომ დაინახა, რა გრძელი და მძიმე გზა ედო წინ და რამხელა მთები უნდა გადაეღაბა, შიშმა აიტანა და აცახცახდა. აიღო მოზრდილი ქვა და დადო მიწაზე ბალიშად, და იმ მდინარის პირას დაწვა დასაძინებლად, რომელიც ტბიდან მოედინებოდა. და როცა ჩაეძინა, სიზმარში გამოეცხადა უზომოდ მაღალი კაცი, რომელსაც თმა მხრებზე სცემდა (?)⁴⁰; და მან წმინდა ნინოს დაბეჭდილი წიგნი მისცა და უთხრა: **[სადაც ნინოს ათი მცნება ეუწყება ხილვაში]** „სწრაფად წაიღე ეს მცხეთაში და გადაეცი კერპთაყვანისმცემელ მეფეს“. მაგრამ წმინდა ნინო აქვითინდა და ვედრება დაუწყო: „ო, უფალო, მე ერთი უცხო ტომის დედაკაცი ვარ, თანაც გაუწაფავი – მათი ენა არ ვიცი და როგორ უნდა ველაპარაკო; რანაირად უნდა შევიდე უცხო ქვეყანაში, უცხო ხალხში?“ მაშინ კაცმა გადაშალა წიგნი, რომელსაც იესო ქრისტეს ბეჭედი

ესვა, და მასში რომაულ ენაზე⁴¹ ეწერა ათი სიტყვა, ისე როგორც მოსესთვის გადაცემულ ქვაზე, და გაუწოდა წმინდა ნინოს წასაკითხად, და აი, რა იგავები ეწერა იქ:

1. „...სადაც კი იქადაგებენ ამ სახარებას მთელ ქვეყნიერებაზე, იტყვიან, რაც ამ დედაკაცმა⁴² გააკეთა, მისსავე მოსაგონებლად“. მათე, 26:13
2. „არა არს რჩევა მამაკაცისა, არცა დედაკაცისა, რამეთუ თქუენ ყოველნი ერთ ხარტ ქრისტე იესუდს მიერ“. გალატელთა მიმართ, 3:28⁴³
3. „ახლა წადით და მოიმოწაფეთ ყველა ხალხი, მონათლეთ ისინი მამისა და ძისა და სულიწმიდის სახელით“. მათე, 28:19
4. „წარმართთათვის ნათლის გამოსაცხადებლად და შენი ხალხის, ისრაელის, დიდებად“. მათე, 28:19
5. უთხრა მათ: „მოედეთ მთელს სოფელს და უქადაგეთ სახარება ყოველ ქმნულებას“. მარკოზი, 26:15.
6. „ვინც თქვენ მიგიღებთ, მე მიმიღებს, ვინც მე მიმიღებს, ჩემს მომავლინებელს მიიღებს“. მათე, 10:40
7. „ვინაიდან მარიამი სათნო იყო უფლისათვის, ამიტომ ყოველთვის გულისყურით უსმენდა მის ჭეშმარიტებას და სიბრძნეს“.
8. „ნუ გეშინიათ მათი, ვინც სხეულს კლავენ, სულის მოკვლა კი არ ძალუძთ“. მათე, 10:28
9. „იესომ უთხრა მარიამ მაგდალელს: „წარვედ ძმათა ჩემთა და არქუ მათ: ალვალ მამისა ჩემისა და მამისა თქუენისა, ღმრთისა ჩემისა და ღმრთისა თქუენისა. იოანე, 20:17
10. „სადაც არ უნდა წახვიდე, იქადაგე მამისა და ძისა და სული წმიდის სახელით“.

როდესაც წმინდა ნინომ ბოლომდე წაიკითხა ეს სიტყვები, ლოცვა აღავლინა ღმერთის მიმართ და ცხადად შეიმეცნა, რომ ეს იყო ხილვა ზეციდან. და თვალები ზეცად აღაპყრო და დახმარება შესთხოვა ყოველთა მფარველ ღმერთს, რომლის სასუფეველია ცათა შინა⁴⁴. **[ნინო ურბნისში მიემგზავრება]** შემდეგ ის გაუდგა გზას და მდინარეს ისე მიუდგა, რომ მის დინებას დასავლეთით გაჰყოლოდა. გზად მრავალი განსაცდელი გადახდა თავს და სასტიკი მტაცებელი მხეცების შიშის დაძლევა, სირთულისა და დაბრკოლების გადალახვა მოუხდა, ვიდრე იმ ადგილს არ მიაღწია, სადაც ნაკადული მიედინება აღმოსავლეთისკენ. იქ მას ნუგეში მიეცა, რადგან შეხვდა მოგზაურებს, და მათთან ერთად მიადგა ქალაქის გარეუბანს, რომელსაც ურბნისი ეწოდება, და იქ ნინომ ნახა, როგორ ეთაყვანებოდნენ ადამიანები უცნაურ ღმერთებს, რადგან ისინი ცეცხლს, ქვას და ხეს სცემდნენ თაყვანს. ამან ძლიერ დაუმძიმა სული წმინდა ნინოს. ის შევიდა უბანში⁴⁵, სადაც ებრაელები ცხოვრობდნენ და მათ მშობლიურ ენაზე დაელაპარაკა (რაშიც გაწაფული იყო); და იქვე დაივნა ერთ თვეს და სწავლობდა იმ ქვეყნის ზნე-ჩვეულებებს.

ერთ დღესაც, იმ ქალაქიდან უამრავი ხალხი დაიძრა დიდი სამეფო ქალაქ მცხეთისკენ იმისათვის, რომ შეეძინათ, რაც სჭირდებოდათ და მსხვერპლი შეეწირათ თავიანთი ღმერთის, არმაზისთვის; მათთან ერთად გაეშურა წმ. ნინოც. **[ნინო ჩადის მცხეთაში, სადაც წარმართთა დღესასწაულს იხილავს]** როდესაც ქალაქ მცხეთას მიაღწიეს, მოგვთა ხიდის⁴⁶ მახლობლად დაბინავდნენ. და როცა წმ. ნინომ დაინახა ეს გრძნეულები, ცეცხლთაყვანისმცემლები, ადამიანთა მოდგმის მაცდუნებლები, ატირდა, რადგან ისინი წარწყმედილები იყვნენ და დადარდიანდა მათი უცნაური ზნის გამო. მეორე დღეს ატყდა საყვირების ყურისწამლები ხმა, ყვირილი და ამაზრზენი ფორიაქი, და უთვალავი ხალხი ველური ყვავილებივით მოეფინა იქაურობას, მორბოდნენ და ჯგუფდებოდნენ, მეფის და დედოფლის გამოჩენას მოელოდნენ. შემდეგ მოვიდა დედოფალი ნანა, და მას უკან მშვიდად მოჰყვებოდა ხალხი. ისინი მის ნაკვალევს ამკობდნენ და მის სავალს ფერად-ფერადი კრეტსაბმელებით ზღუდავდნენ, ძირს ხის ფოთლებსა თუ ყვავილებს უფენდნენ და ხოტბას ასხამდნენ მეფეს. შემდეგ მობრძანდა დიდი ზარ-ზეიმით მრისხანე მეფე მირიანი. წმ. ნინომ ერთ ებრაელ ქალს ჰკითხა: „რა არის ეს?“ მან მიუგო: „ესაა მათი ადათი, მიეახლეებიან თავიანთ ღმერთთა ღმერთს, რომელსაც ვერც ერთი კერპი ტოლს ვერ დაუდებს“. წმინდა ნინომ ეს რომ მოისმინა, ხალხს გაჰყვა არმაზის კერპის სანახავად, და ნახა, რომ მთის ფერდობები მორთულ-მოკაზმული იყო ბაირაღებითა და მინდვრის ყვავილების მსგავსი ალკაზმულობით და წმ. ნინომ აირბინა არმაზის ციხესიმაგრისკენ და ახლოს მივიდა კერპთან, რომელიც კლდის ნაპრაღში იდგა, და საკუთარი თვალით იხილა აქაური ადათის გაუგებარი და ენით უთქმელი უცნაურობა. ისმოდა საშინელი გრუხუნი და მთელი ერი და თავად მეფეც, ცახცახებდნენ და შიშით ძრწოდნენ კერპის წინაშე. წმ. ნინომ დაინახა სპილენძის კაცი, რომელსაც გარედან ემოსა ოქროს ჯავშანი და თავზე ეხურა ოქროს მუზარადი, ჰქონდა ზურმუხტის და ბივრისის სამხრეები და თვალები და ხელთ ეპყრა ელვარე ხმალი, რომელიც მის ხელში ტრიალებდა და ვერავინ ბედავდა კერპთან მიკარებას სიკვდილის შიშით. და ხალხი ასე მიმართავდა მას: „თუ აქ არის ვინმე, ვინც დიადი ღმერთის – არმაზის დიდებულებას არად აგდებს, ვინც ებრაელებს ეთანხმება, ვინც ყურს არ უგდებს მღვდლებს, რომლებიც მზის თაყვანისცემას ასწავლიან, ანდა ისინი, ვინც მავან უცნაურ ღმერთს, ციური ღმერთის ძეს ეთაყვანება – თუკი აქ, ჩვენ შორის არის ვინმე ასეთი ცოდვილი, დაე, მისმა ხმალმა, ვისი შიშითაც ძრწის მთელი სამყარო, სული გააფრთხოებინოს მას!“ და როცა ითქვა ეს სიტყვები, ყველანი, შიშით აცახცახებულნი, თითო-თითოდ მივიდნენ და თაყვანი სცეს კერპს. მას ხელმარჯვნივ ედგა მეორე კერპი, ოქროსი, ადამიანის სახით, და მას გაცი⁴⁷ ერქვა, ხოლო მისგან ხელმარცხნივ – მესამე, ვერცხლის კერპი, რომელსაც კაცის სახე ჰქონდა და ერქვა გაიმი⁴⁸, და ისინი იყვნენ ქართლის ერის ღმერთები.

როდესაც კურთხეულმა ნინომ იხილა ეს, ოხვრა აღმოხდა, ცხარე ცრემლით ატირდა და შეჰღალადა ღმერთს და შეევედრა ასე შეცთომილი ჩრდილოეთის ქვეყ-

ნის გამო, რადგან ნათელი დაფარული იყო მათთვის და ჩრდილი ადგა ქვეყანას⁴⁹. ნინომ დაინახა, როგორ მიუყვებოდნენ ცხოვრების გზას მათი მეფეები, მთელი მათი ლაშქარი და უფლისწულები თავიანთი ამალით ცოცხლად ჯოჯოხეთის სახისკენ, რადგან მათ უარყვეს შემოქმედი და ეთაყვანებოდნენ ქვის, ხის, თითბრის, სპილენძის ღმერთებს, და ისინი მიაჩნდათ ყოვლის შემოქმედად. მაშინ წმ. ნინომ გაიხსენა სიტყვები, რომლებიც დედამისის ძმამ, პატრიარქმა იობენალმა უთხრა მას: „როგორც გმირს ისე წარგვზავნი მე შენ ამ გზაზე, რადგან მიდიხარ უცხო ქვეყანაში, სადაც დარგველის, გეველის, ბარციდულის⁵⁰ გვარტომნი ბინადრობენ, და ასე იტყვიან ბრანჯულ ენაზე: „კაცნი, რომელნიც ღმერთის მტრები და მოწინააღმდეგეები არიან“. **[ნინოს ლოცვა]** მან თვალი ზეცისკენ აღაპყრო და თქვა: „ო, ღმერთი, შენი დიადი ძალით ისე ჰქმენ, რომ შენკენ იბრუნონ პირი ამ შენმა მტრებმა და შენი დიადი მრავალტანჯულობით დაე, ამ ხალხმა შეიძინოს სიბრძნე, და ყველა შენი მტერი აღიგავოს პირისაგან მიწისა, ვითარცა მტვერი და ნაცარი, მაგრამ არ შეიზიზღო ადამიანი, რომელიც შეჰქმენი მსგავსებად შენდა, და წმინდა სამეხიდან ის ერთი აქციე კაცად და მინიჭე სიცოცხლე ყველას ამქვეყნად. გადმოხედე მათ მოდგმას და იხსენსული მათი ეშმაკისა და უხილავი მბრძანებლისგან, წყვილიადის უფლისწულისგან და მომანიჭე უნარი, ო, უფალო ღმერთო ჩემი მამისა და დედისა, შენს მოახლეს, შენი მსახურებისთვის შობილს, რათა შენი მაცხოვარება ხილული გაგხადო დედამიწის ყოველ კუთხეში, რათა ჩრდილოეთმა და სამხრეთმა იხარონ, და რათა ყველა ადამიანმა თაყვანი სცეს ერთადერთ ღმერთს, შენი ძის, იესო ქრისტეს მეოხებით, ვინც ღირსია ვადიდებდეთ და ვმადლობდეთ აწ და მარადის“.

როცა წმ. ნინომ დაასრულა ლოცვა და ღვთის დიდება, **[ამოვარდა მძლავრი ქარიშხალი]** ღმერთმა უმაღლესმა გამოგზავნა დასავლეთის ქარები და ქარიშხლები, შემზარავი, ავის მომასწავებელ ღრუბლებთან ერთად, და ატყდა საზარელი ჭექა-ქუხილი და მზის ჩასვლისას ამოვარდა მწარე, მომწამვლელი, მყრალი ქარი. ამის შემხედვარე მთელი ხალხი სასწრაფოდ განერიდა იქაურობას და გაიტყა საკუთარი საცხოვრებლისკენ ქალაქში. **[კერპებს შემუსრავს]** ღმერთმა სულ ცოტა დრო მისცა საამისოდ, და როცა ყველამ სახლებს შეაფარა თავი, უეცრად მისი სასტიკი რისხვა ღრუბლიდან დაატყდა თავს, და წამოვიდა სეტყვა, ორი ხელის⁵¹ ოდენა, ისრებივით ესობოდა მძიმე და მყარი კერპების სადგომს და დაამსხვრია და მიწასთან გაასწორა, კედლებიც კი ჩამოშალა საშინელმა ქარმა და მიმოფანტა კლდეებში⁵². მაგრამ წმ. ნინო იდგა უვნებელი, და იმავე ადგილიდან იყურებოდა, სადაც თავიდანვე დადგა.

მეორე დღეს მოვიდა მეფე მირიანი და მთელი ერი, რათა მოენახათ თავიანთი კერპები, მაგრამ ვეღარსად იპოვეს. ამიტომ შიშმა და ძრწოლამ მოიცვა ყველანი და გაოცდნენ; ბევრმა მათგანმა თქვა: „ამრიგად, კერპები დაუცველები არიან და იმის გამო დაეცნენ, რომ ითრუჯანი, ქალდეველთა ღმერთი და ჩვენი ღმერთი არმაზი ყოველთვის მტრობდნენ ერთმანეთს, რადგან არმაზმა ზღვა მოაქცია მის მიწაზე, და

ახლა მას შეშურდა და ასე უმტრო მას“. ზოგმა კი თქვა, „ეს იმ ღმერთმა ჩაიდინა, რომლის ძლევითაც თრდატი, სომხეთის მეფე ჯერ ტახად და მერე ისევ იმავე ძალით კაცად იქცა, ვინაიდან, აბა, რომელ სხვა ღმერთს ხელეწიფება ამის ჩადენა?“ მას მერე, რაც მეფე თრდატი ქრისტეს ძლევით იქცა ტახად და ქრისტესავე ძლევით მას ადამიანის სახე დაუბრუნდა, ხალხი უკვე დაუფარავად აქებდა და აღიდიებდა ქრისტეს, რადგან აღმოსავლეთში უფლის მადლმა იწყო გაბრწინება.

იმ მრისხანებისა და კერპების უარყოფის ხანაში⁵³, როცა სეტყვა და სასტიკი ქარი ჩადგა, წმ. ნინო გამოვიდა **[წმ. ნინო მთაზე დაბინავდა]** კლდის ნაპრალიდან და იპოვა ბივრილის თვალი, აიღო და მივიდა უფსკრულის პირთან. იმ ადგილზე ძველთაგან ციხესიმაგრე და ქალაქი⁵⁴ იდგა, და დაინახა იქვე ხე, რომელსაც ერქვა *ბრინჯი*⁵⁵ (აკაცია), ძალიან დიდი და თვალადი, მრავალტოტიანი, რომლის ჩრდილშიც აღმართა ჯვრის ნიშანი და იქ დაჰყო ექვს დღეს და ჰმადლობდა უფალს და ევედრებოდა, რომ მოწყალე თვალით გადმოეხედა და ეშმაკთა ცდუნებისგან განერიდებინა ხალხი. და როდესაც კერპები უკუიქცნენ, მარტის თვიდან ხუთი თვე იყო გასული – იდგა აგვისტოს მეექვსე დღე, ის დღე, როცა ქრისტემ ფერისცვალება განიცადა და წარდგა წინასწარმეტყველთა და მის მოციქულთა⁵⁶ წინაშე.

როგორც უკვე მოგახსენეთ, წმ. ნინომ თავი შეაფარა ხეს და იქ დაბინავდა. **[მას ეწვია შროშანა]** მასთან მივიდა სასახლიდან სეფექალი, სახელად შროშანა, და როდესაც წმ. ნინო დაინახა, გაოცდა და ერთი ქალის დახმარებით, რომელიც ბერძნულად ლაპარაკობდა, ჰკითხა, საიდან მობრძანდით და რას აკეთებთო. როდესაც მან წმინდა ნინოსგან შეიტყო ყველაფერი (გარდა მისი წარმომავლობისა), რომ ის იყო ტყვე ქალი⁵⁷, შროშანამ თანაუგრძნო და სულგრძელობით განიმსჭვალა, რაკი ის უცხოელი იყო, და ცრემლმორეულმა სთხოვა წმ. ნინოს გაჰყოლოდა შინ, სასახლეში; მაგრამ წმ. ნინომ უარი უთხრა, და შროშანა წავიდა.

სამი დღის შემდეგ წმ. ნინო წამოდგა, გადაკვეთა მდინარე კურა და მივიდა სამეფო ბაღთან, სადაც დღეს აღმართულია წმინდა სვეტი და საკათოლიკოსო ეკლესია. **[და ცხრა თვეს ცხოვრობდა მეფის მეზაღის სახლში]** იქ მან დაინახა ბაღის მცველის პატარა სახლი, და შევიდა შიგ. იქ მას დახვდა ანასტოსი, ბაღის მცველის ცოლი, და გულთბილად ეამბორა ისე, თითქოს დიდი ხნის მეგობარი ყოფილიყო მისი. ფეხი განბანა, ზეთი აპკურა და პურითა და ღვინით გაუმასპინძლდა. წმ. ნინომ მასთან ცხრა თვეს დაჰყო. მოხდა ისე, რომ ანასტოსი და მისი ქმარი უშვილონი იყვნენ და ძლიერ დარდობდნენ ამის გამო. წმ. ნინოს ძილში ხილვა ეწვია, ნათლით შემოსილი კაცი, და უთხრა ნინოს: „წადი იმ ბაღში, და იქ, კედარის ხის ძირას პატარა ტოტს ნახავ, რომელიც სადაცაა მრავალ მშვენიერი ფერის სურნელოვან ყვავილს გამოიღებს. წამოიღე მიწა იმ ადგილიდან და მიეცი ამ წყვილს, რათა შეტამონ, და მათ ვაჟი შეეძინებათ“. წმ. ნინომ წარმოთქვა ლოცვა, და მისცა მიწა ქმარსა და მის ცოლს, რათა ეტამათ, როგორც ანგელოსმა დაუბარა. **[რომლის მეუღლეს ვაჟი შეეძინა]** და

მათ შეეძინათ ერთი ვაჟი, და შემდგომში ბევრი ქალიშვილი. ამის შემდეგ მათ იწამეს ქრისტე და წმ. ნინოს⁵⁸ საიდუმლო მოწაფეებად იქცნენ.

მებაღის სახლში გატარებული ცხრა თვის შემდეგ წმ. ნინომ ქალაქის გალავნის გარეთ, უფლის განგებულებით აღმოაჩინა ერთგვარი კარავი, რომელსაც მაყვლოვანი ქმნიდა, სადაც დღეს სამთავარეპისკოპოსო ეკლესიაა. **[ნინო მაყვლოვანში განმარტოვდება]** იქ დაივანა და მოისვენა წმინდა ნინომ, იქ აღმართა მისივე ხელნაკეთი ჯვარი, რომელიც ვაზის ტოტებისგან შეკრა, და მთელი ღამე მის წინ გაათია, იჯდა და უყურებდა. ასე, ღოცვებსა და უფლის წინაშე ვედრებაში გაიღია ღამე და გათენდა. წმინდა ნინოს მრავალი ტანჯვით გაოცებული ცოლ-ქმარი, რომლებიც მეფის ბაღს უვლიდნენ, ემსახურებოდნენ ნინოს. ვიდრე ასე ცხოვრობდა, წმ. ნინო ხშირად სტუმრობდა ებრაელების უბანს, რადგან შეეძლო ებრაულად ლაპარაკი, და სურდა ამ გზით შეეტყო იესოს პერანგის (კვართის) ადგილსამყოფელი, რომლის შესახებ ჯერ კიდევ ნიაფორისგან სმენოდა იერუსალიმში – როგორ ჩამოიტანეს ის მცხეთელმა ებრაელებმა, და წესით მათ უნდა სცოდნოდათ, სად ინახებოდა ის.

[აბიათარი, სიდონია და სხვა ებრაელები ემოწაფებიან ნინოს] ნინო შეხვდა მავან ებრაელ მღვდელს, სახელად აბიათარს, და სიდონიას, მის ქალიშვილს, მათ უქადაგა სახარება უფლისა ჩვენისა იესო ქრისტესი. და მათ მიიღეს ის, და გახდნენ წმ. ნინოს მოწაფეები, სხვა ექვსიოდე ებრაელ ქალთან ერთად, და წმ. ნინო ასწავლიდა მათ ყველაფერს, ნათლობის გარდა, რადგან იმ დროს იქ არ იყო მღვდელი, რომელსაც შეეძლო მათი მონათვლა, და საიდუმლოდ ინახავდნენ იმ ამბავს, რომ წმ. ნინოს დაემოწაფნენ. და უფალმა, ნინოს ხელით მრავალი სასწაული მოახდინა და მრავალი განკურნა, რადგან ბალახეულის გამოყენებით ნინომ შეძლო უკურნებელი სენისგან გაეთავისუფლებინა ადამიანები.

[კონსტანტინე უკუაქცევს ქართველთა და სპარსთა შემოსევას] ასე ცხოვრობდა წმინდა ნინო სამ წელიწადს ქალაქ მცხეთაში, და შემდეგ მეფე მირიანმა და მისმა ძმისშვილმა, სპარსეთის მეფემ, გაილაშქრეს საბერძნეთზე, საიდანაც საბერძნეთის იმპერატორმა კონსტანტინემ უკუაგდო ისინი ქრისტეს და მისი ჯვრის მეოხებით, რომელიც იმპერატორის ლაშქარს ყოველთვის წინ მიუძღოდა.

მონათხრობი მღვდელ აბიათარისა, რომელიც წმინდა და კურთხეულმა ნინომ მოაქცია⁵⁹

[აბიათარის თავგადასავალი] მე, აბიათარი, წილის ყრით ამირჩიეს მღვდლად, იმ წელიწადს, როცა წმინდა და კურთხეული დედა ნინო ჩამორბრძანდა მცხეთაში. ამის შემდეგ⁶⁰, **[აბიათარი იღებს წერილს ანტიოქიის ებრაელთაგან]** ანტიოქიის ებრაელ მღვდელთაგან მივიღე წერილი, რომელიც იუწყებოდა:

„ღმერთმა ისრაელის სამეფო სამ ნაწილად დაყო, რადგან ვაი, რომ, ჩვენი წინასწარმეტყველები აღარ არიან და მათ, ვისაც ჯერ კიდევ შერჩენოდა სული უფლისა, გვითხრეს, რომ ყველაფერი აღსრულდა. ჩვენ მიმოვიფანტეთ მთელს დედამიწაზე, და რომაელებმა დაიპყრეს ჩვენი ქვეყანა; აღარაფერი დაგვრჩენია გლოვის გარდა, რადგან შემოქმედი უფლის რისხვა დაგვატყდა თავს. ამიტომაც მოვიძიეთ მოსეს⁶¹ წიგნი, რომელმაც აღგვიწერა ეს ყოველივე – როგორ მოკლავდნენ მას, ვინც ამ მიწაზე თავის თავს უწოდებდა ძე ღვთისას. და ჩვენ აღმოვჩნდით ნაბარეველის მკვლელობის მიზეზი. ახლა ჩვენ გავაცნობიერეთ, თავიდანვე როგორ შესცოდეს ჩვენმა მამებმა ღმერთს და როგორ დაივიწყეს ის სრულიად. შემდეგ მან ისინი ეშმაკს ჩაუგდო ხელში, მაგრამ ისევ იბრუნეს პირი და ხმამაღლა შეჰლაღადეს ღმერთს, და მან ისინი მაშინვე დაიხსნა განსაცდელისგან; და ნამდვილად ასე მოიქცნენ, როგორც ვიცით წმინდა წერილიდან, ვიდრე შვიდგზისამდეც კი. ამიტომ, რაკი ჩვენმა მამებმა აღმართეს ხელი ქალწულის ძეზე, და მოაკვდინეს ის, ღმერთი განრისხდა ჩვენზე. მან გაანადგურა ჩვენი სამეფო, და გამოგვყარა მისი ტაძრიდან. ჩვენი მოდგმა ყველასთვის საძულველი შეიქნა. და იმ დღიდან მოყოლებული სამასი წელი (არა, მეტიც) გავიდა და მან არ შეისმინა ჩვენი ვედრება. აქედან ჩანს, რომ ეს ნამდვილად არ არის სიცრუე, და ის კაცი ციდან იყო მოვლენილი“.

კიდევ ბევრი რამ მოგვწერეს მათთან დაკავშირებული. როცა ეს შევითყვე, **[ნი-ნომ მოაქცია]** დავიწყე გამოკითხვა და ვეკითხებოდი იმ ქალს, ნინოს, ქრისტეს ამბავს: ვინ იყო ის, და რატომ იქცა ძე ღვთისა კაცად. წმინდა ნინომ პირი გააღო თუ არა, იქიდან ისე გადმოედინა სიტყვები, როგორც წყალი ჭიდან, და ზეპირად მიყვებოდა ჩვენს წიგნებს, სულ დასაბამიდან, სადაც მათი ძალაუფლება გაცხადდა. და ჰოი! მძინარე გამომადგინებლა, და ჩემს გაქცევებულ გულში სინათლე დაანთო, და ცხადად დავინახე ჩვენი მამების საცოდაობა. მე ვიწამე ახალი რჯული, და ვიწამე უფალი იესო ქრისტეს, ძე ღვთისას სიტყვები, რომელიც ეწამა და აღდგა კვალად, და ვინც კვლავ მოვა მეორეჯერ დიდებით, და ვინც იყო, და ჭეშმართად არის ის, ვისაც წარმართნი მოელიან. ჩემი ქალიშვილი სიდონია და მე ღირსი შევიქენით ნათლობის წმინდა წყლის ჰკურებისა განსაწმენდელად ცოდვათა, რაც წინასწარმეტყველი დავითის სურვილი იყო და რაც მან ვერ მიიღო. მე გავიგონე მათი ხმები, ვინც ერთად გალობდა ახალ სჯულს, რომლის გაგონება ასე ეწადა დავითს. და მე ღირსი გავხდი მეგება ქრისტეს, ძე ღვთისას, იმ კრავის, ანუ უტკბესი მაცხოვრის ჭეშმარიტი ხორცი და სისხლი, რომელიც მოაკვდინეს ამა სოფლის ცოდვათა გამოსასყიდად; და ამ რწმენით, ო, უფალო, დაე, ჩემი სული გამოვიდეს ჩემი სხეულიდან! და აი! მე ვიხილე ჩემი, საკუთარი თვალებით, როგორ აღასრულა მრავალი სახის სასწაული მცხეთაში წმინდა ნინომ.⁶²

იმავე მღვდელ აბიათარის ნაამბობი უფალი იესო ქრისტეს კვართის თაობაზე⁶³

მე, აბიათარი, მოგიხსენებ ამბავს, რომელიც გავიგონე და შევისმინე საკუთარი ყურით ჩემი მშობლებისგან, რომლებმაც ისწავლეს ეპისტოლეებიდან და მათი მშობლებისა და პაპებისა და დიდებისგან.

[ქართველმა ებრაელებმა] იმ დროს იერუსალიმს ჰეროდე მართავდა, და გავრცელდა ხმა, რომ სპარსელებმა აიღეს იერუსალიმი⁶⁴, **[შეიტყვეს ქრისტეს შობის ამბავი]** და ამის გამო მცხეთაში მცხოვრებ ქართველ ებრაელთა შორის, ბოდის მღვდლებსა და კოდის წყაროს მწიგნობართა და ხობის⁶⁵ სჯულის მთარგმნელთა შორის დიდმა მწუხარებამ და გლოვამ დაისადგურა. ამ ამბავმა ყველა შეძრა და გადაწყვიტეს იერუსალიმში წასვლა დასახმარებლად. მაგრამ რამდენიმე დღის შემდეგ სხვა მაცნე ჩამოვიდა და კეთილი ამბები ჩამოიტანა, რომ სპარსელები იერუსალიმში დასაპყრობად კი არ ჩასულან; არამედ, იარაღის⁶⁶ ნაცვლად მიიტანეს სამეფო⁶⁷ ოქრო, მირონი (ჭრილობის სწრაფმკურნალი) და საუცხოო სურნელოვანი საკმეველი.⁶⁸ ისინი დაეძებდნენ მავან ჩვილს, რომელიც დავითის თესლისგან შვა ქალწულმა, და იპოვეს ბავშვი, რომელიც ქალწულისგან იშვა ჟამითი უჟამოდ შეუფერებელ ადგილას, როგორც უცხოელთ სჩვეიათ (?). და ისინი მივიდნენ ჩვილთან და თაყვანი სცეს მას და მიართვეს მას ძღვენი⁶⁹ და მშვიდობით დაეთხოვნენ⁷⁰. და ქართველმა ებრაელებმა სიხარულით მოისმინეს ეს ამბები.

ამის შემდეგ ოცდაათი წელი გავიდა, და მღვდელმა ანნამ⁷¹ იერუსალიმიდან **[ქურთქურუმი ანნასი, ელიოზს უხმობს იერუსალიმში, რათა დაესწროს ქრისტეს სიკვდილს]** მოსწერა ჩემს მამას, ელიოზს,⁷² რომ ის, ვისთანაც სპარსეთის მეფეები ჩავიდნენ და ძღვენი მიართვეს, გაიზარდა და ჩავიდა მამათა მონასტერში,⁷³ ??? და რომ ის თავის თავს მოიხსენიებდა ძედ ღვთისა. „მიეახლე მის სიკვდილს, რომლითაც აღსრულდება საღმრთო და მოსეს სჯული“.

ელიოზი წავიდა; ის მამაჩემის მამა იყო, ასაკოვანი კაცი, და დედამისი – მღვდელი ელის ჩამომავალი, და ელიოზს ერთი და ჰყავდა. ელიოზის დედა ევედრებოდა, „წადი, შვილო ჩემო, რათა აღასრულო კეთილშობილი მეფის მოწოდება, რათა აღასრულო ის სჯულის კანონი, რის წინააღმდეგაც მოითათბირეს ებრაელებმა. არ დაეთანხმო მათ, ო, ჩემო შვილო, ვინაიდან ის არის წინასწარმეტყველთა სიტყვა და ბრძენთა იგავი და საიდუმლო, ებრაელთაგან დაფარული, ერების ნათელი და ცხოვრება მარადიული“. მცხეთელი ელიოზი და კარსნის ლონგინოზი გაემგზავრნენ და იხილეს უფალი იესო ქრისტეს ჯვარცმა.

[ელიოზის დედას ესმის, როგორ აჭედებენ ქრისტეს ღურსმნებით ჯვარზე] იმ დროს, როდესაც უფალი ჯვარზე ღურსმნებით გააკრეს და ჰასანიგმა⁷⁴ ღურსმნები რკინის ჩაქუჩით ჩააჭედა, ელიოზის დედამ მცხეთაში გაიგონა დარტყმების ხმა და უეცრად

შეჰყვრია: „მშვიდობით, სამეფოვ ებრაელთა, რადგან თქვენ თქვენი მაცხოვარი და მსხნელი მოაკვდინეთ და ამიერიდან პასუხს აგებთ როგორც თქვენი შემოქმედის მტრები და მკვლელები! ვაი მე, რომ არ დავიმარხე მის სიკვდილამდე, რადგან ყურები დამეხშო და ამიერიდან აღარა ვარ ღირსი ქრისტიანთა ნათლის და ისრაელის მშვიდობის ხილვისა“. როცა ეს სიტყვები აღმოხდა, უმაღლესი შევიდა იგი განსასვენებელსა.

[ელიოზს ქრისტეს კვართი ჩამოაქვს მცხეთაში და აძლევს მის დას, რომელიც კვდება და მარხავენ კვართთან ერთად] უფლის კვართი წილის ყრით ერგო მცხეთელ ებრაელს და ელიოზმა ის მცხეთაში წაიღო. მას ატირებული და შემოეგება, ყელზე მოეხვია; გამოართვა იესოს კვართი, გულში ჩაიკრა და იმავე წამს სული დალია. მისი სიკვდილი სამმაგი იყო: მწარე დარდი ქრისტეს მკვლელობის გამო, დედის სიკვდილი და⁷⁵ გულგატეხილობა, რომ ძმასთან ერთად არ დაესწრო ჯვარზე გაკვრას. ამან დიდი ინტერესი და მღელვარება აღძრა მცხეთაში, და ამ ამბავმა მეფე ადერკამდე⁷⁶ მიაღწია; და ხალხმა სამეფო ოჯახიშვილებმა და თავად მეფე ადერკმა, მოისურვეს ქრისტეს პერანგის ხელში ჩაგდება. მაგრამ მეფე შიშმა შეიპყრო, როცა აღმოაჩინა, რომ ვერაფრით გამოჰგლეჯდა ხელიდან; ისე მტკიცედ და მაგრად ჩაებლუჯა და მიეკრო მკერდზე, რომ მისმა ძმამ ქრისტეს პერანგთან ერთად დამარხა და. მხოლოდ უფალმა უწყის⁷⁷ ის ადგილი, სადაც ის დაიკრძალა და უფლის გარდა ვერავინ იტყვის ვერაფერს, გარდა იმისა, რომ ის დაიმარხა კედარის ხის მახლობლად, რომელიც ლიბანიდან ჩამოიტანეს, დარგეს და იხარა მცხეთაში.

მამამ ასევე მითხრა, რომ ელიას პერანგი, მეორე (?) სამოსი, ასევე ღვთაებრივი ძალით დაჯილდოებული, იმ ქალაქში ძევს, ძღვევის საკურთხეველის ქვის ქვეშ, და მას ვერავინ იპოვის დათქმულ დრომდე⁷⁸.

წმინდა ნინომ მომიწოდა მამაჩემისთვის მეთხოვა, ეამბნა ჩემთვის ყველაფერი ზედმიწევნით, რადგან წმინდა ნინოს არ ასვენებდა წყურვილი გაეგო, სად იყო ის ადგილი, სადაც კვართი ინახებოდა. მაგრამ მამამ მხოლოდ ის მითხრა, რომ ის იმ ადგილზე მარხია, სადაც კაცის ენა ღმერთს სადიდებელს უგალობს, ადგილზე, სადაც იაკობმა იხილა კიბე, რომელიც ზეცამდე აღიოდა.⁷⁹

მრავალი წლის შემდეგ,⁸⁰ მეფე ადერკის მამის ძმის შვილიშვილმა, მეფე ამზაელმა⁸¹ მოიკითხა სამოსი ებრაელთა შორის, მაგრამ ვერც იპოვა და ვერც ვერაფერი შეიტყო მასზე, ერთადერთი ის, რაც ზემოთაც აღვნიშნეთ; რომ როგორც ითქვა, ის დამარხული იყო ლიბანური კედარის მახლობლად. მაგრამ იმავე ელიოზის ოჯახმა, რომელმაც კვართი ჩამოიტანა და დასთან ერთად დამარხა ის, იცოდა, რომ ის იყო ქალაქის აღმოსავლეთით, მოგვთა ხიდთან.

იმ დღეებში, წმინდა ნინოს ძილში სამჯერ⁸², უფრო ზუსტად, ოთხჯერ ეწვია ხილვა. მუხლმოყრილი წმ. ნინო, წინ გადახრილიყო, მსუბუქ ძილ-ღვიძილში ჩავარდნილიყო. მან იხილა, როგორ ჩამოფრინდნენ შავფრთოსანი ფრინველები ზეციდან და შევიდნენ მდინარეში და იბანავეს, და სრულიად გათეთრდნენ, და შეფრინდნენ

ბაღში, რომელზეც უკვე მოგახსენეთ, და აკრიფეს ხილი და დაკენკეს ყვავილები; და ისინი აღერსიანად და სიყვარულით მიუახლოვდნენ ნინოს, თითქოს ის ყოფილიყო ბაღის მფლობელი, და შეგროვდნენ მის ირგვლივ და ტკბილად იგალობეს⁸³.

როდესაც წმ. ნინომ ეს მის მოწაფე სიღონიას (აბიათარის ქალიშვილს) უამბო, მან მიუგო: „ო, უცხოელო, სხვაგან დაბადებულო! ტყვე ქალო, როგორც თავად ამბობ! მე ვიცი, რომ შენით განახლდება ეს დროება და შენი მეოხებით გაცხადდება ის ამბავი, რაც ჩვენმა მამებმა ჩაიდინეს; ის, თუ როგორ დაღვარეს ღვთის შვილის უმანკო სისხლი, დანაშაული, რომლისთვისაც ებრაელები სამარცხვინონი გახდნენ, მთელს დედამიწაზე მიმოიფანტნენ, მათი სამეფო დაეცა და მათი წმინდა ტაძარი სხვებმა ჩაიგდეს ხელში, მათი დიდება უცხო ხალხს ჩაუვარდა ხელში. ო, იერუსალიმ! იერუსალიმ! შენ ფართოდ გაშალე ფრთები⁸⁴ და შენს ფრთებქვეშ შეკრიბე ყველა ერი ზეცის კიდით კიდემდე. იხილე ახლა, მოსულა ეს ქალი, რომლის მეოხებით სჯულს შეიცვლის ამ ქვეყნის ხალხი“. შემდეგ ის მიუბრუნდა ნინოს და თქვა: „ეს შენი ხილვა არის განცხადება და მტკიცება, რომ ეს ადგილი, შენი მეოხებით, სულიერად გარდაიქმნება სამოთხის ბაღად, რომელიც სამარადისოდ მოისხამს სამოთხის ნაყოფს“.

[**მირიანი ბრუნდება საბერძნეთიდან**] შემდეგ⁸⁵, როცა მეფე მირიანი დაბრუნდა საბერძნეთიდან, მეფე კონსტანტინეს მიერ უკუგდებული, მან გაიგო, როგორ ქადაგებდა წმ. ნინო ქრისტეს სახარებას; რადგან გაიგონა, საჯაროდ თქმული, რომ „ჩრდილოელები შეცთომილნი არიან“, და მას უამბეს ვაზის ხის ჯვრის შესახებ, და დიდი სასწაულების შესახებ, რაც ნინომ მოიმოქმედა. უწამლოდ კურნავდა უკურნებელ სნეულებებს ჯვრის უბრალო შეხებით. მისი მოწაფეებიც ქადაგებდნენ: ისინი, ვინც საიდუმლოდ მოინათლა, დაახლოებით შვიდი იუდეველი ქალი: სიღონია, აბიათარის ქალიშვილი და ექვსი სხვა, და ის წყვილი, რომელიც მეფის ბაღს უვლიდა და მღვდელი აბიათარი, [**აბიათარის ქადაგება**] ეს ახალი პავლე, რომელიც ქრისტეს რჯულს ქადაგებდა უშიშრად და დაულალავად. ის გაწაფული იყო ძველი სჯულის კანონში, ახალი სჯული კი ნინომ ასწავლა; და ნინოზე მეტადაც არწმუნებდა და ასწავლიდა ჭეშმარიტ სჯულს.

ებრაელები აბიათარის ქვასთან გადასახლდნენ, მაგრამ მეფე მირიანმა მსახურები გაგზავნა და თავი დაიბღვია, რომ ებრაელებს არ მოეკლათ ის (???), რადგან მეფე მირიანს სურდა უფრო მეტი გაეგო ქრისტეს სჯულზე, ვინაიდან მრავალი სასწაულის შესახებ მოსდიოდა ამბავი საბერძნეთიდან და სომხეთიდან და არ უშლიდა წმინდა ნინოს და მის მოწაფეებს ქადაგებას. მაგრამ ეშმაკი, ყველა ჭეშმარიტი მორწმუნის მტერი, ებრძოდა მას; და დედოფალი ნანა უფრო სასტიკი იყო მეფეზე და სძაგდა ქრისტეს ჭეშმარიტი სახარების ქადაგება.

წმინდა ნინო დაულალავად ლოცულობდა თავის მაყვლოვანის ბუჩქში გამართულ სადგომში, და წარმართები გაოცებულები იყვნენ მისი ლოცვით და სიფხიზლით და უცნაურად ეჩვენებოდათ ეს ყველაფერი, და დაუწყეს კითხვების დასმა. და

ნინომაც გააცნო მათ ძველი და ახალი წიგნები, რომლებიც ბრიყვს სიბრძნეს სძენდა და გულში ქრისტეს სიყვარულს უნერგავდა.

სამ წელიწადს ქადაგებდა ასე, და მრავალი მოაქცია. ერთხელ ერთი დიდგვაროვანი ოჯახის შვილი ძალიან ავად გახდა და დედამისი კარდაკარ დაატარებდა, იმედით, რომ ვინმე მცოდნე მკურნალს იპოვიდა, და მის გასაჭირს უშველიდა. მკურნალები გულდაგულ აკვირდებოდნენ ბავშვის ავადმყოფობას, მაგრამ ვერც ერთმა ვერ განკურნა, და საბოლოოდ დედას უთხრეს, რომ მისი ვაჟი ვერ განიკურნებოდა. ქალი თავგამოდებული წარმართი იყო, სძულდა ქრისტეს სჯული და სხვებსაც უშლიდა ნინოსთან რჩევისთვის მისვლას, მაგრამ სასოწარკვეთილმა მიაკითხა ნინოს, დაეცა მის წინაშე და შესთხოვა შვილის განკურნება. წმინდა ნინომ მიუგო: „მე არ ვფლობ კურნების ხელოვნებას, რომელიც კაცის ხელით ხდება; მაგრამ ჩემი ღმერთი, რომელსაც ვემსახურები, ქრისტე, განკურნავს ამ ბავშვს, მიუხედავად იმისა, რომ ყველას უიმედოდ მიაჩნია მისი მდგომარეობა“. წმინდა ნინომ სწეული ბიჭი მოათავსა ძაძაზე⁸⁶, რომელზეც თავად ლოცულობდა ხოლმე და ვედრება აღავლინა უფლისადმი; და ბავშვი განიკურნა. ბიჭი განცვიფრებულ და გახარებულ დედას ჩააბარა, რომელმაც ირწმუნა ქრისტე და თქვა: „არ არის ღმერთი ქრისტეს გარდა, რომელსაც ნინო ქადაგებს“. და ისიც დაემოწაფა წმინდა ნინოს, და გაუდგა გზას და აღიდებდა უფალს.

[ნინოს მიერ დედოფალ ნანას განკურნება] ამასობაში დედოფალ ნანას მძიმე წყლულოვანი სენი შეჰყოფდა და ვერავინ შეძლო მისი განკურნება. განსწავლულმა ექიმებმა ამოწურეს ყველა წამალი, და მაინც არაფერმა უშველა. ყველანი სასოწარკვეთილებაში ჩაცვივდნენ საკუთარი უძლურების გამო. მაშინ დედოფალ ნანას მოახსენეს, როგორ განკურნა მრავალი სწეული რომაელთა ტყვე ქალმა, სახელად ნინომ თავისი ლოცვებით. დედოფალმა უბრძანა მსახურებს, ნინო მომგვარეთო. მსახურები წავიდნენ და იპოვეს ნინო, რომელიც იჯდა მაცხოვრანის ტალავერში და ლოცულობდა, ექვსი საათი სრულდებოდა. მათ გადასცეს ნინოს დედოფლის ბრძანება. (მან მიუგო:) „ჩვენ არ გვიბრძანებენ ჩვენი მოკრძალებული კარავის მიტოვებას; მაგრამ დაე, დედოფალი თავად მობრძანდეს აქ, ჩემს სადგომში, და ჭეშმარიტად განიკურნება ქრისტეს ძლევათაშენადად“. მსახურებმა გადასცეს დედოფალს ნინოს დანაბარები, და მანაც სიხარულით გასცა ბრძანება გაემზადებინათ ტახტრევანი და წაეყვანათ ნინოსთან; და მსახურებმა ტახტრევნით მიიყვანეს დედოფალი და მისი ვაჟი რევი, ხალხმრავალ ამაღლასთან ერთად. როცა წმინდა ნინოს საცხოვრებელში მივიდნენ, და დედოფალი ფარდაგზე მოათავსეს, წმ. ნინო შეუდგა ლოცვას და დიდხანს ევედრებოდა უფალს; შემდეგ მან აიღო ჯვარი, და დედოფალს ჯერ თავზე დაადო, მერე ტერფებზე, მერე კი მხრებზე, და თან პირჯვარს გადასახავდა; და დედოფალი უმაღლესი განიკურნა, და წამოდგა ფეხზე გამოჯანმრთელებული; და მან იწამა ქრისტე, და თქვა: „არ არის ღმერთი გარდა ქრისტესი, რომელსაც ეს ტყვე ქალი ქადაგებს“ **[დედოფალი ნანას მოქცევა]** იმ დღიდან ნანა დედოფალი ნინოს

მეგობარი გახდა, და ყოველთვის ეკითხებოდა და ცდილობდა მეტი ცოდნა შეეძინა ქრისტეს რჯულის შესახებ; და წმ. ნინო და აბიათარი (ახალი პავლე) და მისი ქალიშვილი სიდონია, ასწავლიდნენ დედოფალს. და ასე გახდა დედოფალი მორწმუნე, და შეიმეცნა ღმერთი ჭეშმარიტი.

[მირიანი ქრისტიანული რწმენით ინტერესდება] მეფემ გამოკითხა დედოფალი, თუ როგორ განიკურნა ასე უცაბედად, და ნანამ უამბო მას ყველაფერი: როგორ მოხდა, რომ უწამლოდ, მხოლოდ და მხოლოდ ჯვრის შეხებით განიკურნა; და მრავალმა ხალხმა, ვინც ეს ნახა, დაადასტურა დედოფლის ნათქვამი. მეფე მირიანს ძლიერ გაუკვირდა და დაიწყო ქრისტეს სჯულის კვლევა. ხშირად ეკითხებოდა ებრაელ აბიათარს, ძველი და ახალი წიგნების თაობაზე, და ისიც უხსნიდა ყველაფერს. **[ქრისტესთან დაკავშირებული წინასწარმეტყველება „ნიმროდის წიგნში“. „ნებროთის“ წიგნში“**, რომელიც მირიანს ჰქონდა, მან აღმოაჩინა, რა ეწერა გოდოლის⁸⁷ მშენებლობის თაობაზე. როგორ ჩაესმა ნებროთს ხმა ზეციდან, და უთხრა: მე ვარ მიქაელი, და ღმერთის მიერ აღმოსავლეთის მბრძანებლად გამწესებული. განერიდე მაგ ქალაქს, რადგან ღმერთი იცავს მას; მაგრამ ბოლო დღეს მოვა უფალი ზეციდან, რომელიც საძულველ იქნება საძულველ კაცთა შორის. და მისი შიში არარად აქცევს მთელს ამ ქვეყნიურ ხიბლს; მეფენი დაუტევებენ თავიანთ სამეფოებს და სილატაკეს აირჩევენ. ის კი თვალს არ მოგაშორებს შენ განსაცდელში და გიხსნის შენ“.

შემდეგ მირიანმა შეიმეცნა, **[მეფე მირიანი სწავლობს წმინდა წიგნებს]** რასაც ძველი და ახალი წიგნები ადასტურებდნენ ნებროთის წიგნით, და ქრისტეს რწმენის მოწადინე გახდა. მაგრამ უხილავი მტერი წინ აღუდგა და აბრკოლებდა ქრისტეს აღმსარებლობას, და უმყარებდა გულში კერპების და ცეცხლის იმედს. **[მაგრამ კვლავ მერყეობს]** დედოფალი დაუღალავად ევედრებოდა, მიეღო ქრისტეს აღმსარებლობა, მაგრამ დედოფალ ნანას მოქცევიდან ერთი წლის განმავლობაში მეფე ორტოფობდა. წმ. ნინო კი ასწავლიდა ხალხს დაუღალავად, და არავის უმხელდა, ვინ იყო თავად ან საიდან მოვიდა, არამედ თავს ტყვე ქალად ასალებდა.

ამის შემდეგ, მოხდა ისე, რომ ერთ ჯადოქარს (ცეცხლთაყვანისმცემელს), **[სპარსეთის უფლისწული ავადაა]** სპარსეთის უფლისწულს სახელად ხვარაის⁸⁹ ფსიქიკური აშლილობა აწუხებდა, შეიშალა და სიკვდილი ემუქრებოდა. ეს უფლისწული მეფე მირიანის⁹⁰ ნათესავი იყო, და ამიტომ, მეფე და დედოფალი შეევედრნენ წმინდა ნინოს, დახმარებოდა მას, თუმცა მეფე კვლავ მერყეობდა. **[მირიანი და ნანა ნინოს დახმარებას სთხოვენ. მირიანი იცავს ძველ ღმერთებს]** მეფემ ჰკითხა წმინდა ნინოს: „რომელი ღმერთის ძალით ახორციელებ ასეთ კურნებას? არმაზის ქალიშვილი ხარ, თუ ზადენის? შენ აქ უცხო ქვეყნიდან მოსულხარ და ღმერთების მაღლი გარდამოსულა შენზე; მათ მოგანიჭეს კურნების ნიჭი, რომლითაც შეგიძლია სიცოცხლე აჩუქო ამ უცხო ქვეყნის ბინადრებს და შეგიძლია სამარადისოდ მოიხვეტო სახელი. იყავი ჩვენი შვილების ძიძა⁹¹ ამ ღვთისმომში ქალაქში, ოღონდ არ ილაპარაკო რომაელების ცრუ რწმენის

უცნაური სიტყვებით – ნურაფერს იტყვი ამაზე. რადგან ხომ ხედავ, მსოფლიოს დიდ დამპყრობელთა ღმერთების⁹², ქართლის განმანათლებლებისა და მასწავლებლების, არმაზის და ზადენის, ყოველი დაფარულის მაძიებელ გაცთან და გაიმთან⁹³ ერთად, ჩვენი მამების უძველესი ღმერთების ნდობა აუცილებლად უნდა ჰქონდეთ ადამიანებს. ხოლო თუ შენ ინებებ ამ უფლისწულის განკურნებას, მე შენ გაგამდიდრებ და მცხეთის მოქალაქედ გაგხდი, როგორც არმაზის მსახურს. და მართალია, მასზე მოვარდნილმა ქარებმა და სეტყვამ ის დაამსხვრია, მისი ადგილი უძრავი დარჩა. ეს არმაზი და ქალდეველთა ღმერთი ითრუჯანი⁹⁴ ყოველთვის მტრობდნენ ერთმანეთს; ჩვენმა ღმერთმა ზღვა მიუქსია მათ ღმერთს, რომელმაც ახლა ეს ჩაიდინა. ასეთია მსოფლიოს დამპყრობთა ადათი, ახლა კი, მოგვეცი თანხმობა ამ ჩემს ბრძანებაზე“.

[ნინო ქრისტეს ქადაგებს] მიუგო მეფეს წმინდა ნინომ: „ო, მეფეო, ქრისტეს სახელით, დედამისისა და ყოველთა წმინდანთა შუამავლობით, დაე, ცისა და მიწის ღმერთმა, შემოქმედმა, მოგივლინოს მისი დიდება და დიდებულება, და დაე, მან გადმოგაფრქვიოს შენ წყალობანი მისი ურიცხვი საუნჯიდან, როგორც ბუხრიდან, ერთი ნაპერწკალი მისი მადლისა, რომელიც შენ შეიძლება შეიმეცნო და აღიქვა ცათა სიმაღლედ,⁹⁵ მზის სინათლედ, ზღვის სიღრმედ, მთელი დედამიწის და მისი საძირკვლის სივრცედ. და მსურს იცოდეთ, ო, მეფეო, ის, ვინც ზეცას მოსავს ღრუბლებით, ქარით და ჭექა-ქუხილის გრგვინით, ვინც მიწას არყევს მისი მრისხანებით და ელვას სტყორცნის⁹⁶, და ცეცხლს უკიდებს მთებს მისი ღვთაებრივი რისხვით, ვინც მთელ დედამიწას არყევს (დიდი გველი თრთის ზღვებში), იმდენად, რომ მთელი დედამიწა, მთები და მყარი კლდეებიც კი ინგრევა. დაე, იცოდეთ თქვენ ეს ყველაფერი; რადგან უხილავი უფალი ზეცად, მხოლოდ ის არის უფალი ყოველთა არსთა, და მისი ძე, რომელიც მან მოავლინა დედამიწაზე კაცის ხატად; მან აღასრულა ყოველი, რისთვისაც მოვიდა და ამაღლდა ზეცად მის მამასთან. მარადიული ღმერთი მაღლაა და ზემოდან დასცქერის მორჩილებს, და შორიდანვე ცნობს ამპარტავანთ. ო, მეფეო, ახლოვდება მისი მოსვლა შენთან; რადგან ეს ქალაქი სასწაულია, ძე ღვთისას სამოსელია; და ამბობენ, რომ ელიას მოსასხამიც აქ არის, და მრავალი სასწაული უკვე გამჟღავნდა; და მე შენს უფლისწულს მხოლოდ ჩემი ქრისტეს სახელით და მისი წამების ჯვრით განვკურნავ, როგორც განვკურნე დედოფალი ნანა მისი მძიმე სნეულებისგან“.

[და უფლისწულს განკურნავს] და მიუყვანეს უფლისწული ნინოს, და დედოფალი ნანაც ეახლა ბაღში, და მათ მიასვენეს უფლისწული კედარის ქვეშ. ნინომ აღმოსავლეთით აღმართა ხელები და სამჯერ დაიძახა: „ო, ეშმაგ, შეგილოცავ, დაეხენი მას, რომ ქრისტე, ძე ღვთისა შევიდეს მასში“. და ნინო ატირდა, მთელი არსებით ოხრავდა და ევედრებოდა ღმერთს იმ კაცის გამო. მისი მოწაფეებიც იქ იყვნენ ერთი დღის და ორი ღამის⁹⁷ განმავლობაში, და უეცრად, ავი სული გამოვიდა მისგან. უფლისწული და მისი ოჯახი და მისი ხალხი⁹⁸ მოაქცია ნინომ, და აღიდებდნენ ყველანი მამას, ძეს და სულიწმინდას, აწ და მარადის და უკუნითი უკუნისამდე. ამინ.

**ნინოს მოწაფე დედაკაც სიდონიას მონათხრობი,
რომელმაც ნახა და აღწერა მეფე მირიანის
სასწაულებრივი მოქცევა, როგორ დაემხო მეფე
ნინოს ფერხთით, რათა მიეღო ქრისტეს
აღმსარებლობა. ჯვრის აღმართვა, ეკლესიის
აშენება და იქ მომხდარი სასწაულები**

[მეფე მირიანი განიზრახავს ქრისტიანთა დახოცვას] ზაფხულში, ივლისის ერთ შაბათ დღეს⁹⁹ (მე-20 დღეს), მეფე სანადიროდ გაეშურა მუხრანისკენ. უხილავად, მისი მტერი, ეშმა, შევიდა მასში და ჩაუნერგა გულში ცეცხლის და კერპების სიყვარული, და მირიანმა ჩაიფიქრა, ამოეულიტა ყველა ქრისტიანი, რითაც სამსახურს გაუწევდა თავის ცრუ ღმერთებს. მეფემ უთხრა თავის ოთხ ვეზირს: „ჩვენ უღირსად ვიქცევით ჩვენი ღმერთების წინაშე, რადგან არ ვემსახურებით მათ, და ამ ქრისტიან მჩხიბავებს ნება დავრთეთ იქადაგონ მათი რწმენა ჩვენს მიწაზე; და ისინი სასწაულებს ახდენენ. აი, რა იქნება ჩემი რჩევა: ჩვენ უნდა გავანადგუროთ ყველა ჯვრის ერთგული, თუ არ ემსახურებიან ქართლის დამყრობელ ღმერთებს. მოდი, ვნახოთ ჩემი ცოლი ნანა, თუ მოინანიებს და დაუტევებს თავის რწმენას ჯვარში, და თუ არა, მე დავივიწყებ ჩემს სიყვარულს მის მიმართ, და სხვებთან ერთად, მასაც გავანადგურებ“. მეფის თანმხლებნი დაეთანხმნენ მეფის გადაწყვეტილებას; რადგან ერთი სული ჰქონდათ ეს მომხდარიყო, და თავიდანვე ასეთი იყო მათი სურვილი, თუმცა ვერ ბედავდნენ ამის აშკარად გაცხადებას.

[ნადირობისას წყვდიადი მოიცავს მას] მეფე გასცდა მცხეთის შემოგარენს და ავიდა თხოთის¹⁰⁰ მაღალ მთაზე, საიდანაც დაინახა კასპი და უფლისციხე; როდესაც მთას კვეთდა სამხრეთისკენ, მზე დაბნელდა, და ყველაფერი გაშავდა, თითქოს მარადიული ღამე ჩამოწვა. წყვდიადმა დაისადგურა ირგვლივ და მეფემ და მისმა ამაღლამ დაკარგეს ერთმანეთი. ამ დარდსა და შფოთვაში მეფე მართო აღმოჩნდა. დახეტილობდა მთის უსიერ ტყეში; და მერე, შეშინებული და აცახცახებული, ერთ ადგილზე შედგა და გადარჩენის იმედი გადაეწურა. შემდეგ დაფიქრდა და გულისხმას მიჰყვა: „აჰა, მოვუხმე ჩემს ღმერთებს და ვერ ვპოვე შვება. მაშ იქნებ ის, ვისაც ნინო ქადაგებს, ჯვარი და ჯვარცმული, ვისი იმედიტაც ახდენს სასწაულებს, იქნებ მას შესწევს ძალა დამიხსნას ამ განსაცდელისგან? მე ახლა ცოცხალ ჯოჯოხეთში ვარ, და არ ვიცი, მთელ დედამიწაზე მოხდა თუ არა ასეთი ცვლილება და თუ სინათლე ყველგან სიბნელედ იქცა, ან იქნებ მხოლოდ [მირიანი ღმერთს ევედრება] ჩემთვის. და თუ ეს განსაცდელი მხოლოდ მე დამატყდა თავს, ო, წმინდა ნინოს ღმერთო, გამინათე ეს ღამე და ისევ დამანახე სამყარო და მე ვიწამებ შენს სახელს. აღვმართავ ხის ჯვარს და ვეთაყვანები მას, და ავაშენებ სახლს, სალოცავად, და დავემორჩილები ნინოს და რომალების რწმენას“.

[**და გადარჩება**] როგორც კი ეს სიტყვები წარმოთქვა, ინათა და მზე გამობრწყინდა მთელი თავისი დიდებულებით. მაშინ მეფე ჩამოქვეითდა ცხენიდან და იმ ადგილზე დადგა, ხელები აღმოსავლეთის ცისკენ აღაპყრო და შესძახა: „შენ ხარ ღმერთი ყოველთა ღმერთთა, უფალი უფალთა ზედა, შენ ის ღმერთი ხარ, რომელზეც ნინო ლაპარაკობს და შენს სახელს უნდა ადიდებდნენ ყველანი ცათა და ქვეყანასა ზედა; რადგან შენ დამიხსენი მე განსაცდელისგან და გამინათე წყვდიადი. ნახე, მე ვიცი, რომ შენ გსურს დამიხსნა, და მე, ო, კურთხეულო უფალო, სიხარულით მოგეახლეები შენ. ამ ადგილზე მე აღვმართავ ხის ჯვარს, რათა განადიდონ შენი სახელი, და სამარადისოდ ახსოვდეთ ეს სასწაული“. და მეფემ დაიმახსოვრა ის ადგილი და განეშორა. როცა მეფის მიმოფანტულმა მხლებლებმა დაინახეს, რომ ინათა, შეიკრიბნენ ერთად; და მეფემ შესძახა: „ადიდებდეთ ნინოს ღმერთს, რადგან ის არის ღმერთი მარადიული, და მხოლოდ მისია დიდება უკუნითი უკუნისამდე“.¹⁰¹

[**მეფე მირიანი ბრუნდება მცხეთაში**] დედოფალი ნანა და მთელი ხალხი გამოვიდა გარეთ მეფის შესაგებებლად, რადგან თავიდან ამბავი მოვიდა, თითქოს მეფე დაიღუპა, და შემდეგ შეიტყვეს, რომ მშვიდობით ბრუნდებოდა შინ. ისინი დახვდნენ მეფეს ქინძარასთან და ღართასთან.¹⁰² და წმინდა ნინო იმ დროს თავის მაყვლოვანში ლოცულობდა, როგორც წესად ჰქონდა სალამობით, და ჩვენც, ორმოცდაათი სული ვიყავით მასთან ერთად. და როცა მეფე მოვიდა, ქალაქი თითქოს შეიძრა. მეფემ ხმამაღლა შესძახა: „სად არის ის უცხოელი დედაკაცი, რომელიც არის ჩვენი დედა, და რომლის ღმერთი ჩემი მხსნელია?“ როცა მეფემ გაიგო, რომ ნინო მაყვლოვანში იყო და ლოცულობდა, მასთან მივიდა მთელი თავისი ჯარით, ჩამოქვეითდა ცხენიდან და უთხრა ნინოს: „ახლა მე უკვე ღირსი ვარ ვახსენო შენი ღმერთის და ჩემი მხსნელის სახელი“. მაშინ წმ. ნინომ ასწავლა მას და მიუთითა თაყვანსაცემად აღმოსავლეთით ებრუნა პირი და ელიარებიანა ძე ღვთისა ქრისტე. [**და აღიარებს ქრისტეს**] მთელი ერი აცახცახდა და ატირდა, როცა დაინახეს ატირებული¹⁰³ მეფე და დედოფალი.

[**ელჩების წარგზავნა კონსტანტინეპოლში**] მეორე დღეს მეფე მირიანმა ელჩები წარგზავნა საბერძნეთში, მეფე კონსტანტინესთან, [¹⁰⁴და ნინოს წერილი დედოფალ ელენესთვის, სადაც ის მოუთხრობს დედოფალს ყველა იმ სასწაულის ამბავს, რომელიც ქრისტემ მოახდინა, და რაც მეფე მირიანს გადახდა მცხეთაში, და სთხოვა დედოფალს, სასწრაფოდ გამოეგზავნა მღვდლები მათ მოსანათლად]. და წმ. ნინო და მისი მოწაფეები დღედაღამ დაუღალავად უჩვენებდნენ ერს სამოთხისკენ მიმავალ ჭეშმარიტ გზას.

იგივე (სიდონიას) მონათხრობი ეკლესიის მშენებლობასთან დაკავშირებით¹⁰⁵

[მირიანი იწყებს ეკლესიის მშენებლობას] ერმა სწრაფად მიიღო ქრისტიანობა. სანამ მღვდლები ჩამოვიდოდნენ, მეფემ უთხრა წმ. ნინოს: „მე დავაჩქარებ ღვთის სახლის მშენებლობას. სად ავაშენოთ?“ წმ. ნინომ მიუგო: „სადაც უფლისწული¹⁰⁶ ინებებს“, მეფემ უთხრა: „მე მიყვარს ეს შენი ბუჩქი, და აქ გამიხარდებოდა. მაგრამ თუ აქ არ შეიძლება, მაშინ პირდაპირ სამეფო ბაღში იყოს, მაღალი კედარის ხესთან, მსხმოიარე ხეებსა და სურნელოვან ყვავილებს შორის [107] იმ ხილვის მიხედვით, რომელიც შენ მოგვევლინა, შავბუმბულიანი ჩიტები რომ ბანაობდნენ წყალში, და მერე ხასხასა თეთრი ფერი რომ მიიღეს და ჩამოსხდნენ ხეებზე და ტკბილი გალობა დაგაფრქვიეს]. ჭეშმარიტად, ეს გარდამავალი ბაღი მიგვაახლებს ჩვენ მარადიულ ცხოვრებას. იქ უნდა ავაშენოთ უფლის¹⁰⁸ სახლი სალოცავად, ვიდრე მღვდლები ჩამოვიდოდნენ საბერძნეთიდან“.

[ცენტრალურ ძელს ძვრა ვერ უყვებს] მეფემ მაშინვე წაიღო ხე და მითითებები მისცა დურგლებს. და მათ მოჭრეს კედარი და მისგან დაამზადეს¹⁰⁹ შვიდი სვეტი ეკლესიისთვის. როცა ხის კედელი ააგეს, სვეტები სათითაოდ აღმართეს. ყველაზე დიდი ძელი, რომელიც საუცხოო სანახავი იყო, მზად იყო ეკლესიის შუაში აღსამართავად, მაგრამ ვერ ასწიეს ის. მეფეს სმენოდა იმ სასწაულის ამბავი, რომლის თანახმად სვეტს ვერ აღმართავდნენ იმ ადგილზე. მაშინ მეფემ უამრავი ხალხი მოიყვანა და ძალიან მძლავრი მანქანები გამოიყენეს, ყველა ერთად შეეჭიდა და ცდილობდნენ ძელის აწევას, მაგრამ ვერ შეძლეს. მეფე და მთელი ერი გაოცდნენ, და თქვეს: „რას უნდა ნიშნავდეს ეს?“ და როცა მოსალამოვდა, მეფე ძლიერ დაღონებული მივიდა შინ.

[არმაზის და ზადენის მთების ჩამოქცევის ხილვა] წმ. ნინო და მისი თორმეტი მოწაფე დედა დაეყუდნენ სვეტთან და ტიროდნენ. და შუალამისას ის ორი მთა — არმაზისა და ზადენის — დაეცა, თითქოს დაიმსხვრა და მდინარეებს გადაუღობეს გზა. მტკვარი (კურა) გადმოვიდა ნაპირებიდან, წაღეკა ქალაქი და ატყდა შემზარავი გლოვის და გოდების ხმა. მდინარე არაგვიც გადმოვიდა ციხესიმაგრეზე და შიშის მომგვრელი ხმაური ატყდა. დედაკაცები დაფრთხნენ და გაიქცნენ, მაგრამ წმ. ნინომ ხმამაღლა დაიყვირა: „ნუ შეშინდებით, დანო; მთა იქვე დგას და ხალხს კი სძინავს. მთის ეს ნგრევა მხოლოდ ნიშანია, რომ წარმართობის მთები ქართლში დაეცა, და შემდგარი მდინარეები მათი კერპებისთვის¹¹⁰ მსხვერპლად გაღებული ბავშვების სისხლია, რომელიც ამიერიდან აღარ დაიღვრება. გოდების ხმა კი იმ მრავალი ეშმის ხმაა, რომლებიც გლოვობენ, რადგან ამ არემარიდან ზეგარდმო ძალამ და ქრისტეს ჯვარმა განდევნა ისინი. ამიტომ მობრუნდით და ღმერთს ევედრეთ“. და უეცრად ხმაური შეწყდა, და აღარაფერი ხდებოდა.

[სპარსელების შემოსევის ხილვა] წმ. ნინო წამოდგა, მკლავები წინ გაიწვდინა და საუფლო ღოცვა აღავლინდა, ამბობდა: „დაე, ნუ დაბრკოლდება ის საქმე, რომელიც მეფემ წამოიწყო“. შემდეგ ისევ, ვიდრე მამალი იყივლებდა, ძლევამოსილი ლაშქარი გამოჩნდა შემზარავი ხმაურით ქალაქის სამი ალაყათის კართან. ჭიშკრები დაღეწეს და ქალაქი სპარსელი ჯარისკაცებით აივსო. მოისმა თავზარდამცემი ტირილის და კივილის ხმა და ატყდა ხოცვა-ჟლეტა და ყველგან დიდი სისხლი დაიღვარა. დიდი მოთქმა-გოდება, ხმლების ჭახანი ატყდა და ამ საზარელმა სანახაობამ ჩვენს სხეულს ძალა გამოაცალა და სულს მხნეობა; და ყველანი ნათესავებსა და ახლობლებს გლოვობდნენ. უეცრად მოისმა ძლიერი ყვირილი: „ხუარა, სპარსეთის მეფე, და ხუარანხუასრა“¹¹, მეფეთმეფე ბრძანებს, ყოველი ებრაელი ხმლის წვერზე ააცვიტო. როდესაც მე ეს გავიგონე და გავიაზრე, მე და ვინც ჩემთან ერთად იყო, კიდევ ათნი¹², ეჭვმა შეგვიპყრო, ხმალამოლებული ჯარისკაცები კი სულ უფრო ახლოვდებოდნენ, და ჩვენს ირგვლივ კლავდნენ და ხოცავდნენ. შემდეგ გავიგონეთ ძლიერი ხმა: „მეფე მირიანი შეიპყრეს“. ჩვენმა მხსნელმა წინამძღოლმა მიმოიხედა და თქვა: „მე ვიცი, რას ნიშნავს ეს ყვირილი, რომელიც ამდენ ტკივილს გვაყენებს. მოდი, ღმერთს მადლობა შევწიროთ. ეს არის ნიშანი მათი განადგურების, ქართლის ცხოვრების და ამ ადგილის დიდებისა“. ჩვენმა ბრძენმა წინამძღოლმა გვანუგეშა ჩვენ, ნინო ჭეშმარიტად იყო ჩვენი წინამძღოლი და ღვთივკურთხეული მოციქული.

ის (ნინო) მიუბრუნდა ერთ-ერთ ჯარისკაცს და უთხრა: „სად არიან მეფეები ხუარა და ხუარანხუასრა? გუშინ საბასტანიდან გამოვიდნენ; როგორ ჩამოხვედით აქ ასე სწრაფად? თქვენ დიდი და ძლიერი ლაშქარი გყავთ; რატომ დაანგრეთ ეს ქალაქი და რატომ ხოცავთ ხალხს ხმლით? გაჰყევით ჩრდილოეთის ქარებს და მთის ნიაგებს და კლდეებს, რათა იხილოთ, რომ ის მისგან მოდის, ვისაც თქვენ გაურბიხართ“. ნინომ წინ გაიწვდინა ხელები და ჯვარი გარდასახა, და უეცრად ის ყოველივე უხილავი გახდა, და სრული სიმშვიდე დასადგურდა. დედაკაცებმა¹³ დალოცეს ნინო და აღიდეს ღმერთი.

[ძელი სასწაულებრივად აღიმართება] განთიადი ახლოვდებოდა, როცა დედაკაცებს ჩაეძინათ, მაგრამ მე, სიდონიას მეღვიძა, და ნინო იდგა ზეაპყრობილი ხელებით. და ვხედავ, ჭაბუკი დგას იქ, ბრწყინვალე ნათებით შემკული და გარს ცეცხლი მოსავს; და რამდენიმე სიტყვა წარმოთქვა. ნინო დაეცა პირით ძირს და ჭაბუკმა ხელი დაადო სვეტს და ძელი აღიმართა. და მე, სიდონიამ, გაცეხულმა წარმოვთქვი: „ო, დედოფალო, რა არის ეს?“ და ნინომ მომიგო: „დახარე თავი მიწამდე“, და ნინო აქვითინდა. ცოტა ხნის შემდეგ, ნინო და მე წამოვდექით და წავედით იმ ადგილიდან. და იმ ქალებმა, რომლებიც ჩვენთან ერთად არ იყვნენ, მათაც დაინახეს სვეტი¹⁴. და ეს ისე მოხდა, თითქოს ცეცხლი ჩამოდიოდა დაბლა; და ის (სვეტი) თავის ადგილს მიუახლოვდა და მიწიდან თორმეტი წყრთის სიმაღლეზე აიწია, და ნაზად, თანდათანობით, იმ ადგილის თავზე დადგა, რომელიც მისთვის იყო ამოთხრილი კედარის ხის ფესვთან.

როცა გათენდა, მეფე ადგა, საზრუნავით გულდაძიმებული, გახედა ბაღს და ეკლესიის ახლად წამოწყებულ მშენებლობას, რომელზეც ამდენს ფიქრობდა. და დაინახა ნათება, ელვის სხივივით, რომელიც მისი ბაღიდან ცამდე გადაჭიმულიყო. მეფე გაიქცა, და სწრაფად მიიღბინა იქ, და მთელი მისი ოჯახობა და ქალაქის მოსახლეობა მოვიდნენ, რადგან მათაც იხილეს სასწაული. სვეტი, რომელიც შუქს ასხივებდა, თითქოს ზეციდან ჩამოსულიყო თავის ადგილზე, და მტკიცედ იდგა თავის ადგილზე, ისე, რომ ადამიანის ხელი არ შეხებია. ბედნიერია ის წამი, როცა ეს მოხდა. ქალაქი მცხეთა შიშმა და სიხარულმა შეიპყრო, და დაიღვარა ცრემლის მდინარეები. და მეფე და თავადები და მთელი ერი ოხრავდნენ და ადიდებდნენ ღმერთს და ლოცავდნენ წმ. ნინოს და დიდი სასწაულები მოხდა იმ დღეს.

[ძელთან მომხდარი სასწაულები] ¹¹⁵ პირველი იქ მავანი ებრაელი მივიდა, დაბადებით ბრმა. ის მიუახლოვდა ღვთაებრივად აღმართულ სვეტს და მაშინვე დაუბრუნდა თვალისჩინი და ადიდა ღმერთი.

ამის შემდეგ, იყო ერთი ტაბუკი, ამბასპანი¹¹⁶ მეფის კარზე, რომელიც **[ამბასპანის განკურნება]** საწოლს იყო მიჯაჭვული რვა წლის განმავლობაში. დედამ ის რწმენით განმსჭვალულმა მიიყვანა და მოათავსა მისი ტახტრევანი სინათლის სვეტის წინ, და შესთხოვდა ნინოს: „მოხედე ამ ჩემს ვაჟს, რომელიც სიკვდილის პირასაა; რადგანაც ვიცი, რომ ის ღმერთი, რომელსაც შენ ემსახურები და გვიქადაგებ ჩვენ, არის ღმერთი“. ნინომ ჯერ სვეტს შეახო ხელი და მერე ტაბუკს დაადო და თქვა: „გწამს შენ იესო ქრისტე, ძე ღვთისა, რომელიც ხორციელად მოევლინა მთელ სამყაროს სიცოცხლის მომნიჭებლად“¹¹⁷ ? . . . მაშ, განიკურნე მისით და ადიდე ის, ვისი ძალაც შენ განგკურნავს“. უმალ წამოდგა ტაბუკი ჯანმრთელი, და დიდმა შიშმა შეიპყრო მეფე და მთელი ხალხი. ყველა სახის სნეული მოვიდა და განიკურნა, სანამ მეფემ ხის საფარი არ შემოაკრა სვეტს და არ დაფარა ის კაცთა თვალისგან, და მაშინაც კი, ადამიანები ადებდნენ ხელს საფარს და იკურნებოდნენ. მეფემ დააჩქარა ეკლესიის მშენებლობა სასახლის ბაღში.

[მეფე კონსტანტინე ელჩებს უგზავნის მირიანს] ¹¹⁸ როცა მეფე მირიანის ელჩები წარდგნენ მეფე კონსტანტინეს წინაშე და უამბეს რა მოხდა, მეფემ და დედამისმა, დედოფალმა ელენემ დიდად გაიხარეს: პირველყოვლისა იმიტომ, რომ უფლის დიდება გაბრწყინებულიყო ყველგან, და მათი ხელით მთელი ქართლი ინათლებოდა; და შემდეგ გაიხარეს, რადგან ირწმუნეს, რომ მეფე მირიანი გაანადგურებდა სპარსელებს; და მათ გულთბილად მიიღეს ელჩები. ადიდეს და მადლობა შესწირეს უფალს და ჭეშმარიტი მღვდელი იოანე ეპისკოპოსი ორი მღვდლისა და სამი დიაკვნის თანხლებით მიავლინეს მირიანთან. და მეფე კონსტანტინემ მისწერა მირიანს ლოცვის და კურთხევის წერილი, რომელშიც მადლობას უხდოდა უფალს და გაუგზავნა მას ჯვარი, მაცხოვრის ხატი და მრავალი ძღვენი. დედოფალმა ელენემ მისწერა ნინოს ქების და ნუგეშის წერილი. მღვდელმთავრები და მთელი ერი

სიხარულით აღივსნენ, რადგან ისინი ნატრობდნენ, რომ მონათლულიყვნენ. მაშინ მირიანმა სასწრაფოდ გამოსცა ბრძანება, რომ ყველა ერისთავი (პროვინციების გამგებლები), სპასალარები (გენერლები), და მისი ყველა ქვეშევრდომი უნდა გამოცხადებულიყო მის წინაშე; და ყველანი საჩქაროდ ჩამოვიდნენ ქალაქში.

[მირიანის და მისი ერის მონათვლა] მეფე მოინათლა ნინოს ხელით, და მას მიჰყვნენ დედოფალი და მათი შვილები მღვდლებისა და დიაკვნების ხელით. მათ დალოცეს მდინარე მტკვარი (კურა) და ეპისკოპოსმა გაამზადა ადგილი მოგვთა ხიდის ტიშკრის მახლობლად, სადაც მღვდელი ელიოზის სახლი იდგა და იქ მონათლნენ დიდებულები და იმ ადგილს უწოდეს „მთავართ სანათლო“ (მთავართა ნათლობის ადგილი). იმავე მდინარის ქვემოთ, ორ ადგილზე, ორმა მღვდელმა და დიაკვნებმა მონათლეს ერი. და ხალხი ეკაჯგურებოდა ერთმანეთს; ყველა ევედრებოდა ბერებს, პირველი მე მომნათლეთო, ისეთი ძლიერი იყო ნათლობის სურვილი, რადგან მოსმენილი ჰქონდათ ნინოს ქადაგება, როცა მან თქვა: „ის, ვინც არ არის მონათლული, ვერ ეღირსება იმ მარადიულ ნათელს“. ამიტომ ყველანი ჩქარობდნენ მონათვლას. ასე საჩქაროდ მიიღეს ნათლობა ყველამ და ქართლის უმრავლესობამ, გარდა კავკასიის მთიულებისა (მთის მოსახლეობა); ნათელი მოეფინა მათ, მაგრამ გარკვეული დროის განმავლობაში მაინც ჯიუტად რჩებოდნენ სიბნელეში. მცხეთაში ასევე იყვნენ ებრაელები, რომლებიც არ მოინათლნენ, გარდა კაბრაბიელებისა¹⁹, რომელთაგან ორმოცდაათი სული მოინათლა, და ისინი ჭეშმარიტი ქრისტიანები გახდნენ; ამის გამო მეფემ განადიდა ისინი, და უბოძა მათ სოფელი, რომელიც მათგანვე ასე იწოდებოდა: „ციხე დიდი“ (დიდი ციხესიმაგრე). ფეროზმა, მეფე მირიანის ქალიშვილის ქმარმა არ მიიღო ნათლობა, არც მისმა ხალხმა, მაგრამ მორჩილებას უცხადებდნენ მეფე მირიანის დროებით ძალაუფლებას.

[მირიანი ხალხს გზავნის კონსტანტინესთან და მეტი მღვდლის გამოგზავნას სთხოვს] შემდეგ მეფე მირიანმა ეპისკოპოსი იოანე და მასთან ერთად დიდებულნი, გაგზავნა მეფე კონსტანტინესთან და შეევედრა, სიცოცხლის ხის ნაწილი ეწილადებინა მისთვის, რომელიც იმ დროს ქრისტეს ერთგული მხევლისა და მოყვარულის, დედოფალ ელენეს ხელში აღმოჩნდა. აგრეთვე სთხოვა, ბევრი მღვდელი გამოეგზავნა ხალხის მოსანათლად ყველა ქალაქსა და ადგილში, რათა მალე ქართლის ყოველი სულიერი მონათლულიყო; აგრეთვე სთხოვა, კალატოზები გამოეგზავნა ეკლესიების ასაშენებლად. როცა კონსტანტინეს წინაშე წარდგნენ, მეფემ სიხარულით უწილადა ხე სიცოცხლისა: იმ ძელების ნაწილი, რომლითაც უფლის ტერფები მიაღურსმნეს, და ღურსმნები, რომლითაც უფლის ხელები მიაჭედეს ძელზე. ასევე გაუგზავნა მღვდლები და მრავალი კალატოზი.

[კონსტანტინემ ეკლესიები აღაშენებინა] მეფე კონსტანტინემ თავის სამეფოში წმინდა ეკლესია, წმინდა ტაძარი აღაშენა, და ფრიად დიდძალი საუნჯე გადასცა

ეპისკოპოს იოანეს და უბრძანა, სადაც პირველად მივიდოდნენ ქართლში, იქ აეგოთ ეკლესიები მის სახელზე, რათა ეს საუნჯე შენახულიყო ქართლის საზღვრებში. ეპისკოპოსი გამოეშურა და მას გამოჰყვნენ ელჩები. როდესაც მიაღწიეს ადგილს სახელწოდებით ერუშეთი¹²⁰, კალატოზები იქ შეჩერდნენ ეკლესიის ასაშენებლად; მათ საუნჯე იქ დადეს, და ლურსმნებიც, რომლითაც უფლის ხელები გაიხვრიტა. შემდეგ მათ განაგრძეს გზა მანგლისისკენ¹²¹ და შეუდგნენ ეკლესიის მშენებლობას, და იქ მოათავსეს ძელები, რომელმაც უფლის ტერფები მიაჭედეს. და მეფე მირიანს არ ესიამოვნა, რომ პირველად სამეფო ქალაქში არ ჩავიდნენ, არამედ უკვე დაეწყოთ ეკლესიების მშენებლობა სხვა ქალაქებსა და ადგილებში და იქ დაეტოვებინათ საუნჯე. მაგრამ წმ. ნინო მასთან მივიდა და უთხრა: „ო, მეფეო, არ გაბრაზდე; რადგან სადაც არ მიდიან, ისინი უცხო ადგილზე უფლის სახელს ავრცელებენ და განა ამ ქალაქში ჩვენი უფლის დიდებული სამოსი არ ინახება?“

მეფემ შეკრიბა აბიათარი და მრავალი ებრაელი მასთან ერთად და გამოჰკითხა კვართის თაობაზე; მათ უთხრეს ყველაფერი, რაც ზემოთ დაწვერეთ. მაშინ მეფემ ხელი აღმართა ცისკენ და ბრძანა: „კურთხეული ხარ შენ, ო, იესო, ძეო ცოცხალი უფლისა; ვინაიდან დასაბამითგან შენ გეწადა ჩვენი გამოსხნა ეშმას ხელიდან და სიბნელიდან. ამიტომაც იყო, რომ შენი წმინდა პერანგი შენი წმინდა ქალაქ იერუსალიმიდან ჩვენთან ჩამოიტანეს იუდეველებმა, შენი ღვთაებრიობის უარყოფილებმა, და ჩვენთვის უცხოტომელებმა“.

[**საეპისკოპოსო ეკლესიის მშენებლობა მცხეთაში**] მეფემ და მთელმა ქალაქმა განამტკიცეს ქრისტიანობა. კალატოზები შეუდგნენ ეკლესიის მშენებლობას ქალაქის გარეუბანში, მაყვლოვანში, სადაც წმ. ნინოს ედო ბინა და სადაც ახლა საეპისკოპოსო ეკლესიაა. და წმ. ნინომ, თქვა: „კურთხეულია ჩვენი უფალი იესო ქრისტე და ჩვენი უფლის მამა, რომელმაც გამოგვიგზავნა წმინდა სიტყვა მაღლიდან, თავად მისი ყოვლისშემძლე ტახტიდან, რათა ის ამ ცოდვილ მიწაზე ჩამოსულიყო, ჭეშმარიტად შობილი დავითის თესლისგან, უბიწო და წმინდა ქალწულისგან; რადგან მისი სურვილი იყო მას სიცოცხლე მოენიჭებინა ჩვენთვის. მან განანათლა ყოველივე ცის ქვეშეთში, რათა მორწმუნენი გამხდარიყვნენ. ის იშვა კაცად, ის, ნათელი ყოველთა, ხატი უფლისა; და როგორც რჯულის მსახური, ის მოინათლა წყლით და სულიწმინდით; ის ჯვარს აცვეს და დაიმარხა, და აღდგა მესამე დღეს და ამაღლდა ზეცად მამასთან, და ის კვლავ მობრძანდება თავისი დიდებით. მისია ყოველი დიდება, მამისა და სულიწმინდისა, აჲ და მარადის და უკუნითი უკუნისამდე“.

პატიოსანი ჯვრის ამაღლება¹²²

[სასწაულმოქმედი ხე] როდესაც მეფე და დედოფალი და მათი შვილები და მთელი ერი მოინათლა, შეუვალი კლდის კენწეროზე იდგა ერთი ხე, ულამაზესი, საამო სურნელის მფრქვეველი. ეს იყო სასწაულმოქმედი ხე, რადგან ისრით დაჭრილი ნადირი მიდიოდა მასთან, და როცა მის ფოთლებს, ანდა ძირს დაცვენილ თესლს ჭამდა, იკურნებოდა, თუნდაც სასიკვდილოდ დაჭრილი ყოფილიყო.

ეს უდიდეს სასწაულად ეჩვენა ამ მანამდე წარმართებს და მათ უამბეს ეპისკოპოსი იოანეს ამ ხის შესახებ. ეპისკოპოსმა უთხრა მათ: „ისმინეთ! სინამდვილეში ეს მიწა ღმერთმა დასაბამიდან განსაზღვრა მისი მსახურებისთვის. ეს ხე ღმერთმა დარგო სწორედ ამ დროისთვის, რადგან ახლაც კი, უფლის წყალობა მოეფინა ქართლს და ამ ხიდან უნდა დამზადდეს თაყვანისცემის ჯვარი, რომელსაც ქართლის მთელი მცხოვრებნი ეთაყვანებიან“. და რევი, მეფის ვაჟი [მოჭრეს] და ეპისკოპოსი და მათთან ერთად მრავალი ადამიანი წავიდა და მოჭრეს ის ხე და წამოიღეს ტოტებიანად და ათჯერ ათმა მამაკაცმა, ტოტებითა და ფოთლებით შემოსილი ხე ქალაქში შეიტანა. ხალხი მოგროვდა მის სანახავად, რადგან მისი სიმწვანე და ფოთლოვანება ზაფხულის¹²³ დღეებში საკვირველი იყო, ვინაიდან ყოველი სხვა ხე უკვე გამხმარიყო. მას კი ფოთლები არ დასცვენოდა, შორ მანძილზე აფრქვევდა საამო სურნელს და ლამაზი შესახედავი იყო. მათ ხე საკუთარ ფესვებზე დადგეს ეკლესიის სამხრეთ კარიბჭესთან, სადაც სიო უბერავდა და ხის საამო სურნელებას შორით აფრქვევდა და ფოთლები ეფურჩქნებოდა. როგორც გვითხრეს, ეს ხე სილამაზით ისეთივე წარმტაცი იყო, როგორიც ედემის ბაღში დარგული ხე. ხე ოცდახუთ მარტს მოჭრეს, პარასკევ დღეს, ის კი იქ ოცდაჩვიდმეტ დღეს ისე იდგა, რომ ფოთლებმა ფერი არ იცვალეს; ასე იდგა, თითქოს ფესვიდან კენწერომდე აზიდულ ყველაზე მაღალ ტოტამდე ნაკადულში მდგარიყო, ვიდრე ტყის ყველა ხე ფოთლებით არ შეიმოსა და აყვავდა. მაშინ [და მისგან ჯვრები დაამზადეს] პირველ მაისს დაამზადეს ჯვრები (სამი) და მეშვიდე დღეს აღმართეს ისინი მეფის მფარველობით¹²⁴, სიხარულით, და მთელი ქალაქის მოსახლეობის ნებით, ვინც ეკლესიაში იყო.

[ცეცხლოვანი ჯვრისა და ვარსკვლავებიანი გვირგვინის გამოჩენა] შემდეგ ქალაქის მთელმა მოსახლეობამ ნახა იმ დღეებში, რომ ცეცხლოვანი ჯვარი ჩამოვიდა ციდან მასზე; მას გარს შემოურტყა, ასე ვთქვათ, ვარსკვლავების გვირგვინი, და ცეცხლოვანი ჯვარი ასე იდგა ეკლესიის თავზე მზის ამოსვლამდე; და როცა ინათა, ორი ვარსკვლავი გამოეყო დანარჩენებს — ერთი აღმოსავლეთით წავიდა და მეორე დასავლეთით, და ყველაზე კაშკაშა ნელა დაიძრა იმ ადგილისკენ, ნაკადულისკენ, არაგვს გადაღმა, და დადგა კლდოვან მთაზე, სადაც წმინდა ნინოს ცრემლებიდან წყარო აღმოცენდა¹²⁵, და იქიდან ვარსკვლავი ამაღლდა ზეცად.

ამრიგად, მთელმა ერმა ბევრჯერ იხილა ღმერთის მაცხოვარება, და ასე ეკითხე-

ბოდნენ წმ. ნინოს: „რას ნიშნავს ეს, რომ მანათობელი ვარსკვლავები დაიდრნენ და ერთი აღმოსავლეთით წავიდა და თავად კახეთის მთებსაც კი მიაღწია და მეორე კი დასავლეთისკენ წავიდა, ამ ქალაქის სიახლოვეს¹²⁶“ წმ. ნინომ მიუგო მათ: „როცა დავინახავთ, სად გამოანათეს მათ იმ მთებზე¹²⁷, დაე, იქ აღმართონ ორი ჯვარი ქრისტესთვის“. მეფე ასეც მოიქცა, და ხალხი უყურებდა უმაღლეს მთებს¹²⁸ ერთი მეორის მიყოლებით. ეს მოხდა ერთ პარასკევს, ხოლო შაბათს, გამთენიისას ისეთივე სასწაული მოხდა, როგორიც ადრე. მეორე დღეს ვარსკვლავები დასავლეთისკენ გაემართნენ, სადაც „ქვაბთა თავის“ (გამოქვაბულების თავი) მთაზე შედგნენ. მეფეს უთხრეს, როგორ გამოეყო ვარსკვლავი სხვა ვარსკვლავებს, როგორ ამაღლდა და თავზე დაადგა თხოთის მთის¹²⁹ ერთ ადგილს, კასპის უღელტეხილზე და მერე სრულიად უხილავი გახდა. ზუსტად ასევე, კახეთის მთებში გაგზავნილებმა, დაბრუნების შემდეგ უამბეს მეფეს, როგორ ნახეს, რომ ვარსკვლავი წავიდა იქით და შეჩერდა სოფელ ბუდის თავზე, კახეთის მხარეში¹³⁰.

[**ჯვრები აღმართეს თხოთში და უჯარმაში**] წმ. ნინომ მათ დაავალა, უთხრა: „წაიღეთ ეს ორი ჯვარი და აღმართეთ ერთი თხოთზე, სადაც უფალმა გვიჩვენა მისი ძალმოსილება, და ერთიც მიეცით სალომეს, ქრისტეს მოახლეს, რათა აღიმართოს ის ქალაქ უჯარმაში¹³¹. რაც შეეხება სოფელ ბუდის კახეთში, მას არ უნდა მივანიჭოთ სამეფო ქალაქთან შედარებით უპირატესობა, რაკი იქ ბევრი ხალხი ცხოვრობს. ბუდიც იხილავს უფლის მადლს“. და მოიქცნენ ისე, როგორც დედოფალმა¹³² უბრძანა: მათ ასწიეს სასწაულმოქმედი, წმინდა ჯვარი ადამიანის ხელით მცხეთაში, და ჩავიდნენ იმ ბორცვს ქვემოთ წყაროსთან, სადაც მთელი ღამე უფლის ლოცვაში გაათენეს და წმინდა ნინომ წყაროს წყალს თავისი ცრემლები შეურიო, და იქ მოხდა დიდი სასწაულები და კურნებანი.

მეორე დღეს გაეშურნენ ნინო, მეფე და დედოფალი და მთავრები და ხალხის დიდი სიმრავლე კლდისკენ და იმ ქვებზე მუხლმოყრილები ცხარედ ატირდნენ¹³³, სანამ მთებმა არ მისცეს ბანი. მაშინ წმ. ნინომ ხელი დაადო ერთ ქვას და ეპისკოპოსს მიმართა: „მოდით, რადგან შენ შეგშვენის ამ ქვის კურთხევა. და მართლაც, ეპისკოპოსმა აკურთხა ქვა, და ჯვარი აღმართეს იქ მეფის სადიდებლად. უთვალავმა ადამიანმა მოიდრიკა მუხლი და თავყვანი სცეს ჯვარს და აღიარეს ჯვარცმული ჭეშმარიტ ძედ ცოცხალი ღვთისა, და იწამეს დიადი სამბუნებოვანი ღმერთი. და დიდმა¹³⁴ მთავრებმა არ მიატოვეს წმინდა ეკლესია, სვეტი ნათლისა და ცხოველმყოფელი ჯვარი, რადგან იქ იხილეს საოცარი სასწაულები და უწყვეტი კურნება¹³⁵. და აღდგომის კვირა დღეს მეფე მირიანმა და მთელმა მცხეთამ მსხვერპლი შესწირეს. ეს დღე დააწესეს აღდგომას ჯვრის მსახურებად¹³⁶, და ამ წესს მთელი ქართლი დღემდე იცავს.

[**მანათობელი ჯვრის გამოჩენა და თორმეტი ვარსკვლავი**] გამოხდა ხანი და სულთმოფენობის შემდეგ, ერთ ოთხშაბათს, მათ იხილეს სასწაული, ყოვლად მშვენიერი: ჰოი! ნათლის სვეტი, ჯვრის ფორმისა, იდგა ჯვარზე, და თორმეტი ვარსკვლავით შეკ-

რული გვირგვინი შემოვლებოდა გარს¹³⁷; და ეს ჯვარი ბორცვზე საამურ სურნელს გამოსცემდა და ყველამ იხილა ეს სასწაული. მრავალი კერპთაყვანისმცემელი მოექცა და მოინათლა იმ დღეს¹³⁸, და ქრისტიანებს განუმყარდათ რწმენა და განადიდეს უფალი.

[მცხეთაში ჯვარს თავზე ცეცხლი ადგება] მათ იხილეს კიდევ ერთი ჯვრის სასწაული: როგორ დაადგა მას თავზე ცეცხლი, მზეზე შვიდჯერ უფრო კაშკაშა¹³⁹. ღუმელის ამოვარდნილი ნაპერწკალივით იდგა იქ და უფლის ანგელოზები ცისკენ ადიოდნენ და ქვემოთ ჩამოდიოდნენ. და გორაკი, რომელზეც ჯვარი¹⁴⁰ იდგა, შეირყა ძლიერ, და როცა სასწაული დასრულდა, რყევაც შეწყდა. როცა ერმა დაინახა ეს სასწაული, ძლიერ განცვიფრდნენ და უფრო და უფრო ადიდებდნენ ღმერთს. ეს სასწაულები ხდებოდა წლითი წლამდე, და მთელი ერი ხედავდა ამას შიშითა და ძრწოლით და აღივსნენ გულწრფელი რწმენით.

[რევის ვაჟის განკურნება] იმხანად რევის¹⁴¹, მეფის ძეს, მცირეწლოვანი ვაჟი ჰყავდა, რომელიც ავად იყო და სიკვდილი ემუქრებოდა; ის მისი ერთადერთი ვაჟი იყო. რევა შვილი წმინდა ჯვრის წინ მოათავსა და ცრემლმორეული ევედრებოდა ამ სიტყვებით: „თუ შენ ამ ჩემი შვილის სიცოცხლეს მაჩუქებ, მე საბურველს აგიშენებ სამყოფელად“. და მეყსეულად, იმ ადგილზე, ის შვილი განიკურნა და მამამ წაიყვანა ის სრულიად საღ-სალამათი და სიცოცხლით სავსე. შემდეგ რევი შეუდგა დადებული პირობის აღსრულებას; და დიდი სიხარულითა და გზნებით, მეფის შვილმა¹⁴² აღმართა საბურველი, და წლიდან წლამდე მოდიოდა და აღასრულებდა მსხვერპლშეწირვის პირობას; და ამის შედეგად, იმრავლა სწეულთა მსვლელობამ და მოდიოდნენ და იკურნებოდნენ და დიდი სიხარულით განადიდებდნენ ქრისტეს წმინდა ჯვარს.

[და მცხეთის ჯვართან განხორციელებული სხვა სასწაულები] იყო ერთი ჭაბუკი, რომელიც ბრმა იყო ორივე თვალით. ის დაჯდა¹⁴² ქრისტეს ჯვრის წინ და შვიდ დღეში დაუბრუნდა თვალისჩინი და განადიდა ჯვარი პატიოსანი.

შემდეგ იყო ერთი ქალი, რომელსაც ავი სულები არ ასვენებდნენ, და რვა წლის განმავლობაში გამოაცალეს გონება და ჯანი; და ტანზე იგლეჯდა ტანსაცმელს. ის მიიყვანეს და ჯვრის წინ დაასვენეს და თორმეტი დღის შემდეგ ის განიკურნა და ადგა და წავიდა და ადიდებდა უფალს და თაყვანს სცემდა წმინდა ჯვარს.

კიდევ იყო ერთი პატარა ბიჭი, რომელიც მოულოდნელად დაეცა მკვდარი¹⁴⁴. დედამისმა მიიტანა შვილის უსულო გვამი¹⁴⁵ ჯვართან. დიდიდან საღამომდე ლოცულობდა და ქვითინებდა ჯვართან. მასთან მივიდნენ და უთხრეს: „წაიყვანე აქედან, დედაკაცო, და დამარხე, რადგან მკვდარია; შეწყვიტე გლოვა“. მაგრამ ქალს იმედი კი არ დაუკარგავს, უფრო ძლიერ და უფრო შესაბრალისად ტიროდა და ლოცულობდა. და როცა მოსაღამოვდა, ბავშვი მკვდრეთით აღდგა და თვალი გაახილა და შვიდი¹⁴⁶ დღის შემდეგ დედამ შინ წაიყვანა განკურნებული და გაცოცხლებული და განადიდებდა უფალს.

როდესაც ხალხმა დაინახა წმინდა ჯვრის სასწაულმოქმედი კურნების ძალა, ბევრი უშვილო მოვიდა და ევედრებოდა უფალს, შვილი მიეცა მათთვის და მრავალს მიეცა შვილი; და ისინი მსხვერპლს სწირავდნენ და მადლობდნენ უფალს. და არა მხოლოდ განკურნების სათხოვნელად მოსულები იკურნებოდნენ, არამედ ვინც შორიდან შესთხოვდა წმინდა ჯვარს, ისინიც მყისვე¹⁴⁷ იღებდნენ შველას. და ის შველოდა მათ, ვინც იბრძოდა, რათა მტერი ეძლიათ და ისინიც სწრაფად მოდიოდნენ ჯვართან მადლობის შესაწირავად.

ბევრი შეჭირვებული წარმართი განკურნა ამ ჯვარმა და მრავალი მოინათლა და სიხარულით განადიდებდნენ უფალს; მრავალი სახის სენი განკურნა პატიოსანმა ჯვარმა, მრავალნი მოდიოდნენ სხვადასხვაგვარი სენით შეპყრობილები განკურნების სათხოვნელად და იქვე იკურნებოდნენ უმალ, დღემდეც კი¹⁴⁸, და ისინი ადიდებდნენ მამას, ძეს და სულიწმინდას, დიდება მამასა და ძესა და სულიწმინდასა, აწ და მარადის და უკუნითი უკუნისამდე.

წერილი, რომელიც რომის პატრიარქმა და ბრანჯთა მეფემ მისწერეს ნინოს, მეფეს და მთელ ქართლის ერს

იმ დღეებში რომის წმინდა პატრიარქისგან მოვიდა წერილი ნინოსადმი, მეფისა და მთელი ქართველი ხალხისადმი. მან ბრანჯი დიაკვანი გამოგზავნა მეფისთვის ხოტბის და კურთხევის გადმოსაცემად, და წმინდა ნინოსგან ლოცვისა და წყალობის სათხოვნელად. დიაკვანმა ასევე მოიტანა წერილი ბრანჯთა მეფისგან მოწერილი ნინოსადმი, რომელშიც ის იწერებოდა, რომ როგორც მისმა (ნინოს) მამამ მონათლა ყველა ბრანჯი – დიდებული საქმე ცნობილი იერუსალიმსა და კონსტანტინეპოლში, სწორედ ასე განანათლა მან მთელი ქართლი მართალთა მზით. ამიტომ მოსწერა მან გულითადი წერილი ნინოს, რადგან მას გაეგო, რა სასწაულებს ახდენდა ის ერში და აგრეთვე, გაეგო სასწაულები, რომელთაც ის ახდენდა სვეტთან და აგრეთვე მაყვლოვანის სადგომის და მისი კურნების ძალის შესახებ. ბრანჯთა დიაკვანმა იხილა და გაიგონა სვეტის სასწაულთა ამბავი, რომელიც მცხეთაში მომხდარიყო, და განადიდა ღმერთი. მან თან წაიღო წერილები და გაემგზავრა.

[**მირიანის მისიონერული აღტყინება**] მაშინ მეფემ უთხრა წმ. ნინოს და ეპისკოპოსს: „მე ხმლის პირით მოვაქცევ მთიულებს, და ჩემს სიძე ფეროზს, და უფლის მსახურად და პატიოსანი ჯვრის აღმსარებლად ვაქცევ მათ“. ნინომ მიუგო: „ღმერთი არ გვიბრძანებს ხმლის აღმართვას, არამედ სახარებით და პატიოსანი ჯვრით უნდა დავანახოთ ჭეშმარიტების გზა, რომელიც მათ მარადიული ცხოვრებისკენ გაუძღვება. დაე,

ღმერთის წყალობამ განანათლოს მათ გულებში დასადგურებული წყვდიადი“. და წმ. ნინო (და ეპისკოპოსი იოანე)¹⁴⁹ გაემგზავრა. მეფემ თან წაიყვანა *ერისთავი* (პროვინციის გამგებელი) და ისინი ჩავიდნენ ცუბენში¹⁵⁰, და მოუწოდა მთიულებს¹⁵¹, რომელთაც გარეული მხეცის გარეგნობა ჰქონდათ, და ჭართალელ¹⁵² ფხოველებს¹⁵³ და გუდამაყრელებს¹⁵⁴, და იქადაგეს მათთან ქრისტიანული სახარებისეული ჭეშმარიტება, რომელიც მარადიული სიცოცხლის საწინდარია, მაგრამ მათ არ ისურვეს ნათლობა; მაშინ მეფის ერისთავმა ხმალი აღმართა მათ წინააღმდეგ, და ძალით დაუნგრია კერპები. შემდეგ გაშორდნენ იმ ადგილებს და ჟალეთისკენ¹⁵⁵ წავიდნენ და იქადაგეს ერწოს თიანეთელებში¹⁵⁶, რომელთაც მიიღეს სახარება და მოინათლნენ. მაგრამ ფხოველებმა მიატოვეს თავიანთი მიწა-წყალი და ჩავიდნენ თუშეთში¹⁵⁷, და იქ იყვნენ სხვა მთიულები, რომლებიც არ იყვნენ ქრისტიანულ რწმენაზე მოქცეულები. მეფემ მძიმე ბეგარა დაუწესა მათ, ვინც მონათვლა არ ისურვა; ამიტომ იქაურებმა რაზმები შეკრეს და დათარეშობდნენ. ზოგი მათგანი, ბოლოს და ბოლოს, აბიბოს ნეკრესელმა¹⁵⁸ მონათლა, ზოგი კი დღემდე ცეცხლთაყვანისმცემლად რჩება.

[წმინდა ნინო შედის კახეთში] მაშინ წმ. ნინო გაემართა კახეთში და შეისვენა კაწარეთში და მოაქცია ერი. ამის შემდეგ ის შევიდა სოფელ ქველში და შეკრიბა კახეთის თავადები. მათ არაფერი სმენოდათ ქრისტიანობაზე და მეფის მონათვლის თაობაზე; სიხარულით მიიღეს მათ ნინოს სწავლება და მოექცნენ და მოინათლნენ მღვდელი იაკობისგან. ამის შემდეგ ნინო ჩავიდა ბოდიში, და იქ მასთან მივიდა სუჯი¹⁵⁹, კახეთის დედოფალი, და მასთან ერთად მთავრების დიდი **[მოაქცევს დედოფალ სუჯის]** სიმრავლე, სამხედროები და მონა ქალები. ნინომ გაუმხილა მათ ქრისტეს საიდუმლო (წმინდა ბიარება) და ტკბილმოუბრობით ასწავლიდა მათ ქრისტეს ჭეშმარიტ რწმენას. ნინომ უამბო იმ სასწაულების შესახებ, რომლებიც ცეცხლოვანმა სვეტმა მოიმოქმედა, რის თაობაზე მათ არაფერი გაეგოთ მანამდე. სიხარულით მიიღეს მათ წმ. ნინოს სწავლება და დედოფალი, მის ყველა მთავართან და მოახლესთან ერთად მოინათლა.

როდესაც ნეტარმა ნინომ ასე აღასრულა თავისი საქმე და ქადაგება, ის მიხვდა, რომ ახლოვდებოდა დრო, როცა მისი სული სხეულს უნდა განშორებოდა. მან **[წმ. ნინოს წერილი მეფე მირიანს]** მეფე მირიანს წერილი მისწერა და კახეთის დედოფალ სუჯის გადასცა. ნინო წერდა:

„იესო ქრისტეს მსახურს, წმინდა სამების ერთგულ მორწმუნეს, წმინდა მეფეთა მოკავშირეს, მეფე მირიანს. – დაე უფალმა მისი წყალობის ნამი გაწვიმოს შენ და მთელ შენს სამეფო კარს, და მთელი შენი ერის სამფლობელოს, და დაე, ქრისტეს ჯვარი და მისი ყოვლად წმინდა დედის მეოხება იყოს თქვენი მფარველი. აჰა, მე გამოვიარე მრავალი მიწა, და მათ მიიღეს ქრისტეს სახარება, და გამოისყიდეს ცოდვები და მოინათლნენ, და თავყანს სცემენ შემოქმედ უფალს. ახლა შენ ბედნიერი უნდა იყო, რადგან შენი მეფობის დროს მოხდა, რომ უფალმა მოხედა მის ქმნილებებს და მისი სიბრძნის ნათელი მოჰფინა მათ. მტკიცედ მიენდე ჭეშმარიტ რწმენას,

რათა მასთან ერთად იმეფო მის ზეციურ სამეფოში სამარადისოდ. მე აღვასრულე ჩემი დღეები ამ ქვეყანაზე და გავდივარ ცხოვრებიდან, რათა ჩემს მამათა გზას დავადგე. აღნიშვნის ღირსია ღმერთის წმინდანთა შორის დედოფალი სუჯი, რადგან ის გახდა ქრისტეს ჭეშმარიტი მორწმუნე და დაამხო კერპები და მოაქცია ერი უფლის მსახურებისთვის და მოუწოდა მის ძმას და ქალიშვილს, აგრეთვე ართერეონს, მხედართმთავარს, და ასწავლიდა მათ ჭეშმარიტ სჯულს, და ყველანი ბუდში მოინათლნენ მამის, ძის და წმიდა სულის სახელით. ახლა გამოგზავნე ჩემთან მამათა წმინდა მთავარი, რათა მან მომცეს საგზალი ჩემი სულის მარადიულ მოგზაურობაში თან წასაღებად, რადგან მოახლოვდა ჩემი ჟამი“.

[დედოფალი სუჯი წერილით გაუდგება გზას და მცხეთაში ჩადის] დედოფალმა სუჯიმ ნინოს წერილი გამოართვა და რადგან აღტყინებული იყო სურვილით, ცხოველმყოფელი სვეტისთვის თაყვანი ეცა, საჩქაროდ გაუდგა გზას. მთელი გზა ფეხშიშველმა იარა, და ცრემლით ალბობდა მიწას. როცა ცხოველმყოფელი სვეტის გადაღმა მხარეს მიაღწენ, დაინახეს, რომ მდინარე არაგვი ძლიერ ადიდებულიყო და სამხედროებსაც კი არ შეეძლოთ მისი გადაკვეთა; როდესაც ჩამოქვეითდნენ, აბობოქრებული მდინარის შიშით პირი იბრუნეს. მაგრამ როგორც პეტრემ გაიარა წყალზე უფლისკენ, ასეთივე რამ მოხდა ამ ქალის შემთხვევაშიც, რომელიც ქრისტეს რწმენით და ცხოველმყოფელ სვეტთან მიახლეობის სურვილით იყო აღტყინებული და ჰქონდა მდოვცის **[სასწაულებრივად გადაკვეთს არაგვს]** მარცვლისოდენა რწმენა. მან თავად გადაკვეთა მდინარე და ისე ისკუბა მდინარეში, თითქოს ბედაური ყოფილიყოს. მდინარის მეორე მხარეს, მთელ ხალხთან ერთად, ეპისკოპოსი იოანე იდგა და როცა სუჯი დინებაში შევიდა, წყალმა უკან დაიხია, ისე, რომ დედოფალი მშრალი ტერფებით გავიდა მეორე ნაპირზე. მეფე და მთავარეპისკოპოსი შეშინებულები და გაოცებულები დახვდნენ დედოფალს და შევიდნენ ერთად ეკლესიაში, სვეტიცხოველთან, და ილოცეს და ცხარე ცრემლი ღვარეს. დედოფალმა ერთგულების ნიშნად შესწირა საკუთარი თავი, შვილები და თავისი ყველა მსახური და პატარა ქალაქი ბართიანი, და დიდი სოფელი ბუდი; და გაიხარა სულიერად. შემდეგ დედოფალმა სუჯიმ ამოიღო ნეტარი ნინოს წერილი და გადასცა მეფეს, და მეფემ ხმამაღლა წაიკითხა წერილი და მწარედ ატირდა.

[მირიანი, სხვებთან ერთად, ბოდბეში მიდის წმ. ნინოს სიკვდილის წინ მოსანახულებლად] მათ ეპისკოპოსი იოანე წარგზავნეს ნინოს ჩამოსაყვანად, მაგრამ წმ. ნინომ დარჩენა ამჯობინა. ასე რომ, მეფე, დედოფალი ნანა და მრავალი ადამიანი გაუდგნენ გზას და მივიდნენ ნინოსთან. ურიცხვი იყო შეკრებილი ხალხის სიმრავლე, და მათ იხილეს ნინოს სახე, რომელიც ციდან მოვლენილ ანგელოზს ჰგავდა. ისინი მისცვივდნენ და ნინოს სამოსის ქობას ეამბორობოდნენ რწმენით; და ყველანი ირგვლივ გულმხურვალედ ლოცულობდნენ, ცრემლს აფრთქევდნენ თვალთაგან, რადგან მათი წინამძღვარი და კეთილისმყოფელი და სწეულთა მკურნალი ტოვებდა სოფელს. სალომე უჯარმელი (ანუ, უჯარმიდან) და ფერუჟავრი, სივნელი

(ანუ, სიონიდან) და ერისთავები (გამგებლები) და მთავრები (მმართველები, დიდი მემამულეები) კითხვებს უსვამდნენ და ამბობდნენ: „ვინ ხარ, საიდანა ხარ, და რატომ ჩამოხვედი ამ მიწაზე ჩვენთვის სიცოცხლის მოსანიჭებლად? სად აღიზარდე, ო, დედოფალო? გვიაშბე შენი ცხოვრების ამბავი, რადგან ახსენებდი ტყვეობას, ო, ღვთაებრივო ტყვეთა განმათავისუფლებელო. შენ ჩვენ გვასწავლე წინასწარმეტყველთა შესახებ, რომლებიც ქრისტეზე ადრე მოვიდნენ, მაგრამ ჩვენ არავინ მოგვივლინა ღმერთმა შენს გადასარჩენად, და ერთადერთი, რასაც შენს თავზე ამბობ ისაა, რომ ტყვე ქალი ხარ, ანდა უცხოელი“.

[ნინო მისი ცხოვრების ამბავს ჰყვება] მაშინ ნინომ დაიწყო ლაპარაკი და თქვა: „რწმენის ქალიშვილებო¹⁰⁰, ჩემს გულთან ახლოს მყოფო დედოფლებო, თქვენ ხედავთ რწმენას და სიყვარულს, რომელსაც პირველი დედები ატარებდნენ გულით ქრისტეს მიმართ, და მაინც გსურთ იცოდეთ ჩემი ცხოვრების შესახებ, უბრალო მოახლის ცხოვრების ამბავი! მაგრამ გიამბობთ, რადგან აღსრულდა ჩემი დღეები და სადაცაა სამუდამოდ მივიძინებ დედაჩემის ძილით. მოიტანეთ საწერი მასალა, რომ ჩაიწეროთ ჩემი უბადრუკი, უღირსი ცხოვრება, რათა თქვენმა შვილებმა გაიგონ თქვენი რწმენის ამბავი, და როგორ მიმიღეთ მე, და ის ღვთაებრივი სასწაულები, რომლებიც იხილეთ“. სალომე უჯარმელმა და ფერუჟავრ სივნელმა მაშინვე მოიტანეს საწერი მასალა და ნინომ უამბო მათ თავისი წმინდა და ნეტარი ცხოვრების ამბავი, როგორც აღვწერეთ ზემოთ, და მათ ჩაიწერეს ყველაფერი. ნინომ შესთხოვა მეფეს, რომ იოანეს შემდეგ ეპისკოპოსად გამხდარიყო მღვდელი იაკობი.

ეპისკოპოსმა იოანემ შესწირა მსხვერპლი უფალს და წმ. ნინომ მიიღო ქრისტეს **[წმ. ნინოს გარდაცვალება]** სისხლი და ხორცი, რომელიც მას საგზლად უნდა წაეღო თან მარადიულობაში. შემდეგ მან სული ღმერთს მიაბარა, და გარდავიდა მართალთა მარადიულობაში (14 იანვარს). ამრიგად, მოციქულთა მადლით შემკული, წმინდა ცხოვრებით გაბრწყინებული, მრავალი ღვაწლით, მრავალი საქმის ნიჭით შემკული, ნინო წარდგა წმინდა სამების წინაშე და ძღვნად მიიტანა მრავალი ერი და ამ სოფლად გადატანილი ტანჯვა. ის ამაღლდა ზეცად მისი საქართველოში მობრძანებიდან ოცდამეხუთე წელს და ქრისტეს სიკვდილიდან სამასოცდამეთვრამეტე წელს, და სამყაროს შექმნიდან ხუთი-ათას-შვიდას-ოცდამეთვრამეტე წელს.

მცხეთის მოსახლეობა და მთელი ქართლი შეძრა ნინოს გარდაცვალებამ და უამრავი ხალხი გამოვიდა და ყველანი შეიკრიბნენ, რათა ხელით შეხებოდნენ მისი კაბის ქობას. მეფემ იძულებით შეაკავა ეს აურზაური და ბრძანა, ნინოს ნეშტი წაებრძანებინათ და სვეტი ცხოველის ახლოს დაესვენებინათ. მაგრამ როცა დააპირეს ცხედრის აწევა, ხელში ძალა გამოეცალათ და ძვრა ვერ უყვეს. **[მისი დაკრძალვა ბოდბეში]** მაშინ მიხვდნენ, და დაკრძალეს იმ ადგილზე, კახეთის სოფელ ბუდიში. წმინდანმა თავად სთხოვა მეფეს, ჩვეული მოკრძალებით, იქ დაეკრძალათ, რადგან ეს იყო მოკრძალებული ადგილი. მაგრამ მეფე და დიდებულები სწუხდნენ ამის გამო; და მაინც,

წმინდანის სურვილის აღსასრულებლად, ასე მოიქცნენ. და აღაშენეს ეკლესია და განაწესეს იქ ეპისკოპოსი, ქართლის, კახეთის და ჰერეთის ღვთივკურთხეული განმანათლებლის, სამგზის ღვთივკურთხეული, სულმნათი ნინოს პატივსაცემად.

როდესაც ღვთივკურთხეულმა განმანათლებელმა მეფე მირიანმა ეს გააკეთა, ამით მთელი ქართლი და ჰერეთი განამტკიცა სამბუნებოვანი ღმერთის რწმენაში, რომელსაც არა აქვს დასაბამი და დასასრული, რომელიც არის ყოველთა არსთა შემოქმედი; და ისინიც საბოლოოდ განმტკიცდნენ რწმენაში.

[კონსტანტინე მირიანს უგზავნის უფლისწულ ბაქარს და თან წერილს ატანს] იმპერატორმა კონსტანტინემ, რომელსაც მძევლად ჰყავდა მირიანის ვაჟი ბაქარი, დაუბრუნა ის მეფეს, მრავალი საჩუქარი გამოატანა და წერილი, რომელშიც სწერდა:

„მე, მეფე კონსტანტინე, აბსოლუტური სუვერენი, ცათა სასუფეველის ახალი მსახური, ყოფილი ეშმაკის ტყვე, მაგრამ შემოქმედის მიერ დახსნილი, გწერ შენ, მეფე მირიან, ღვთივ განათლებულო, ჩემსავით ახლად გამყარებულო რწმენაში. მშვიდობა შენდა, და სიხარული მათ, ვინც შეიმეცნა სამება ერთარსება, ღმერთი დაუსაბამო, შემოქმედი ყოველთა არსთა. ამიერიდან აღარ მჭირდება შენგან მძევალი მყავდეს, რადგან ჩვენ შორის ქრისტეს, ძე ღვთისას შუამავლობაც იკმარებს, რომელიც არის მარადიულად ყველგან მსუფევი, რომელიც განკაცდა ჩვენი სულის დასახსნელად და მისი ჯვარი პატიოსანი, რომელიც მოგვეცა ჩვენ გზამკვლევად. ამ რწმენითა და შემოქმედი ღმერთის შუამავლობით, მოდი, ძმური სიყვარულით განვიმსჯელოთ ერთმანეთის მიმართ. მე გიბრუნებ შენს ვაჟს; იხილე და გაიხარე, და დაე, მშვიდობის ანგელოზი, ღმერთის მოვლენილი იყოს შენთან. დაე, შემოქმედი ღმერთი მუდამ აძევებდეს ბოროტ ეშმაკს შენი ქვეყნიდან“.

როცა უფლისწული ბაქარი და იმპერატორ კონსტანტინეს მაცნე მცხეთაში ჩამოვიდნენ, მეფე მირიანი და დედოფალი ნანა სიხარულით აღივსნენ და მადლობდნენ უფალს ყველა იმ ძღვენისთვის, რომლებიც მან უბოძა მათ. მეფე მირიანმა დაასრულა საკათედრო ტაძარი და დიდი ზეიმით აკურთხა ის თავისი მოქცევიდან ოცდამეხუთე წელიწადს. რევი, მისი ვაჟი, გარდაიცვალა; ის იყო სიძე სომეხთა მეფე თრდატის, რომელმაც მას თავისი სამეფო აჩუქა სიცოცხლეშივე. რევი იმ აკლდამაში დაკრძალეს, რომელიც თავად ააშენა. **[მეფე მირიანის გარდაცვალება]** იმავე წელს მეფე მირიანი ავად გახდა და სიკვდილის პირას მისულმა უთხრა ბაქარს, თავის ვაჟსა და მეუღლე ნანას: „მე არ აღვესრულები სააქოდან ისე, როგორც მოვედი, და მე ვმადლობ ყოველად მოწყალე შემოქმედ ღმერთს, შემოქმედს ცათა და ქვეყანათა, რომელმაც დამიხსნა ბჭეთაგან ჯოჯოხეთისა, როცა ეშმაკის ტყვეობაში ვიყავი, და ის ღირსად მყოფს დავჯდე მისგან ხელმარჯვნივ. შენ კი, ნანა, ჩემი გარდაცვალებიდან მალე, გაყავი ჩვენი სამეფო საუნჯე ორ ნაწილად, და გაეცი (ნახევარი) ჩვენი განმანათლებლის, ნინოს საფლავისთვის, რათა ის ადგილი არასოდეს შეიბღალოს, რადგან ის არ არის სამეფო ქალაქი, არამედ ღარიბი მხარეა; აგრეთვე, უთხარი ეპისკოპოსს, განადიდოს ის ადგილი, რადგან ის პატივისცემის ღირსია“.

და მან უთხრა თავის ვაჟს: „შვილო ჩემო, ჩემთვის წყვდიადი ნათლით შეიცვალა და სიკვდილი სიცოცხლედ. შენ გაბარებ ჩემი სამეფოს გვირგვინს. დაე, ღმერთმა, შემოქმედმა ცათა და ქვეყანისა, გაგაძლიეროს შენ ტეშმარიტ რწმენაში. დაემორჩილე ძე ღვთისას ყოველ ბრძანებას და მოქმედებდე მთლიანად მათზე და იესოს სახელზე დაყრდნობით. სიკვდილი სიცოცხლედ იქცევა შენთვის... სადაც კი ნახავ იმ ცეცხლთაყვანისმცემლებს, ცეცხლით დაწვი და აიძულე დალიონ წიდა//ნალვერდალი¹⁶¹ და იგივე ასწავლე შენს შვილებს, რადგან ვიცი, რომ კავკასიელებში ამოიკვეთება კერპთაყვანისმცემლობა. გულით მოეკიდე ამ საქმეს და ლოცვა აღავლინე დასაბამიდან შობილი ძე ღვთისას მიმართ, ვინც განკაცდა და ეწამა ჩვენი სულის საცხოვრებლად, და პატიოსანი ჯვრით გაუძეხი ბრძოლას შენი მტრების წინააღმდეგ, რადგან ასე იქცევიან ტეშმარიტი მორწმუნენი. პატივი ეცი ღვთაებრივად ამაღლებულ სვეტს, და შენი ყოველი იმედი მიმართე მისკენ; დაე, მიიძინო შენ წმინდა სამების რწმენით“.

[ბაქარის მეფედ კურთხევა] მათ მოატანინეს წმინდა ნინოს ჯვარი, ჯვარი, რომელიც ნინოს თავიდან ჰქონდა, და სამეფო გვირგვინი დაკიდეს მასზე, და მიიყვანეს ბაქარი და თავზე ჯვარი გარდასახეს, და ჩამოხსნეს ჯვრიდან გვირგვინი და თავზე დაადგეს. და მეფე მირიანი მიიცვალა, და დამარხეს ზედა ეკლესიაში, იმ ძეგლის სამხრეთ კუთხეში, სადაც ღვთაებრივად ამაღლებული სვეტის ნაწილი ინახება. მომდევნო წელს გარდაიცვალა დედოფალი ნანა, და ის იმ ძეგლის დასავლეთით დაკრძალეს, იმავე ადგილზე, სადაც მეფე მირიანი.

ბაქარი, მირიანის ვაჟი, გამეფდა, და მამამისის მსგავსად, ისიც მორწმუნე იყო. მან ქრისტეს რჯულზე მოაქცია კავკასიის მრავალი ერი, რომელთა ტეშმარიტ რწმენაზე მოქცევა ვერ შეძლო მირიანმა.

რუფინუსი, ეკლესიის ისტორია, წიგნი II¹⁶²

იმ დროს იბერთა ტომმაც, რომელიც პონტოს მხარეში ცხოვრობდა, იწამა ღვთის სიტყვა და მიიღო ქრისტეს სარწმუნოება. ხოლო ამ წყალობის მიზეზი იყო ერთი ტყვე ქალი, რომელიც იმ მხარეში აღმოჩნდა, რომელიც ერთობ მოკრძალებულ და წმინდა ცხოვრებას მისდევდა; რამდენიმე დღე და ღამე არ ეძინა და მთელ დროს ღვთის ლოცვაში ატარებდა. მისი ქცევა უჩვეულოდ ეჩვენებოდა იქაურ მოსახლეობას, მოისურვეს დაწვრილებით გაეგოთ, რას აკეთებდა ეს ქალი. მან მოისურვა ამ ახალ საქმეში ბარბაროსების ჩართვა. უბრალოდ აუწყა მათ, რომ თაყვანს სცემდა ღმერთს, რომლის სახელი იყო ქრისტე. ამან ქალებში ცნობისმოყვარეობა აღძრა, რა შედეგი უნდა მოჰყოლოდა ამ რწმენის აღიარებას. როგორც ამბობენ, იქაურ ხალხს ასეთი ჩვეულება ჰქონდა, რომ, როცა ყრმა ძალიან დასნეულებოდა, ბავშვის დედა ყველა ოჯახს ჩამოუვლიდა ყრმით ხელში, იქნებ ვინმეს სცოდნოდა რაიმე განსაკუთრებული წამალი. ერთხელ, ჩვეულებისამებრ, ერთმა ქალმა ყველა სახლი მოიარა

სნეული ყრმით ხელში, თუმცა განსაკურნებელი წამალი ვერსად მოიძია. ბოლოს მივიდა ამ ტყვე ქალთან, რათა მისთვისაც ეკითხა, ხომ არ შეეძლო ბავშვის განკურნება. მან კი (ტყვე ქალმა) აუხსნა დედას, რომ ადამიანური წამლით ავადმყოფის მორჩენა შეუძლებელი იყო, ხოლო თუ შეევედრებოდა თავის ღმერთს, ქრისტეს, ის ადამიანებისგან განწირულს დახმარებას აღმოუჩენდა.

ტყვე ქალმა ყრმა დასვა თხის ტყავზე, თვითონ ხელაპყრობით დაიწყო ლოცვა ღვთისადმი და განკურნებული ბავშვი სალ-სალამათი გადასცა დედას. ამ საოცრებამ დიდი მითქმა-მოთქმა გამოიწვია ხალხში. ბოლოს დედოფლის ყურსაც მისწვდა ეს ამბავი. იგი რაღაც უცნობი სნეულებით იყო შეპყრობილი, მთელი სხეული სტკიოდა და დიდ სასოწარკვეთილებებში იყო ჩავარდნილი. ითხოვა, რათა მასთან მიეყვანათ ტყვე ქალი, რომელმაც დედოფალთან მისვლაზე უარი განაცხადა, რომ ამის ნება არ ჰქონდა. მაშინ თავად დედოფალმა ბრძანა, წაეყვანათ ტყვე ქალის სენაკში. მან ესეც თხის ტყავზე დასვა და ქრისტეს სახელით დიდხანს ილოცა, და წამოაყენა დედოფალი სრულიად განკურნებული, თან აუხსნა, რომ იგი განკურნა ქრისტემ, ძემ ღვთისამ, უნდა სცოდნოდა, რომ იგი იყო მისთვის სიმრთელისა და ცხოვრების მხოცბელი და რომ ამ ღმერთისთვის უნდა მიემართა. იგი იყო ღმერთი, რომელიც მეფეებს მეფობას, ხოლო ცხოვრებას ზნეობრიობას ანიჭებდა.

გახარებული დედოფალი დაბრუნდა სასახლეში, ქმარმა დაწვრილებით გამოჰკითხა მას უცაბედი გამოჯანსაღების მიზეზი; როცა ყველაფერი გაიგო, მანაც გაიხარა მეუღლის განკურნებით და ბრძანა ტყვე ქალის გულუხვად დასაჩუქრება. დედოფალმა კი უთხრა, რომ ტყვე ქალს არც ოქრო უნდა და არც ვერცხლი. მისი საჩუქარი ის იქნება, თუ იმ ღმერთს ვაღიარებთ, ვისი სახელითაც მან განმკურნაო.

გამოხდა ხანი და ერთხელ მეფე ტყეში გაეშურა სანადიროდ ამაღლასთან ერთად. უეცრად ტყეში ჩამოხეწა, ნამდვილი ღამე ჩამოწვა. შეუძლებელი იყო გზის გაკვლევა, ირგვლივ ისეთი წყვდიადი იყო. მეფემ არ იცოდა, საით წასულიყო. სხვადასხვა მხარეს გაფანტული ამაღაც შემოეცალა. ბოლოს, იმედგადაწურულს, გონება გაეხსნა და ქრისტე გაახსენდა, თუ ის ჭეშმარიტად ღმერთია, როგორც მის ცოლს უთხრა ტყვე ქალმა, შეუძლია დაიხსნას მეფე ამ წყვდიადისგან, რათა მას მეფემ თავყვანი სცეს. ეს მხოლოდ გონებაში გაივლო, ერთი სიტყვაც კი არ წარმოუთქვამს და უეცრად დღე დაბრუნდა. მეფემ უვნებლად ჩააღწია ქალაქში.

დედოფლის განკურნებისა და მეფის ამბავი ყველამ შეიტყო. მეფემ ბრძანა, რომ მიეყვანათ ტყვე ქალი, რათა მისგან გაეგო, როგორ ემსახურებოდა თავის ღმერთს და ბრძანა, მხოლოდ ქრისტესთვის ეცათ პატივი და სხვა ღმერთები დაევიწყებინათ. მოიყვანეს ტყვე ქალი, რომელმაც გააცნო ქრისტეს მოძღვრება. ტყვე ქალს მიეცა საშუალება, ესწავლებინა ხალხისთვის, როგორ უნდა ელოცათ მუხლმოდრეკით ქრისტეს წინაშე და როგორ უნდა შეესრულებინათ საღვთო რიტუალი. შთააგონა მათ ტაძრის აგება, ასწავლა როგორი ფორმა უნდა ჰქონოდა მას. ასე რომ, მეფემ უხმო

თავის ერს და დედოფლის მიერ წამოწყებული საქმე განამტკიცა, გაავრცელა სარწმუნოება, აპოსტოლის მოწვევაც გადაწყვიტა. ისე გამოვიდა, რომ მამაკაცებმა ირწმუნეს ქრისტე მეფის რჩევით, ქალებმა კი დედოფლის მაგალითით. ყველას საერთო სურვილის თანახმად გადაწყდა ტაძრის აგება. კედლები სწრაფად შემოავლეს და სვეტების აღმართვის დროც დადგა. როცა აღიმართა ერთი თუ ორი, ჯერი მიდგა მესამეზე. მოზიდეს რაღაც მანქანები, მოიყვანეს ხარები და ადამიანური ძალებით შეეცადნენ სვეტის აღმართვას. როცა ეს ვერ შეძლეს, შეეცადნენ ხელმეორედ, მეტი ძალა გამოიყენეს, მაგრამ ამაოდ. სვეტი ვერ დაძრეს ადგილიდან. ყველას გაუკვირდა. მეფეს გუნება გაუფუჭდა. ყველა დაილაღა, საქმე შეჩერდა. მიატოვეს იქაურობა. დაღამდა, ყველა წავიდა ტყვე ქალის გარდა, რომელმაც გულმხურვალე ლოცვაში გაატარა ღამე. განთიადისას შეწუხებული მეფე თავისი ამალით მოვიდა და იხილა სვეტი, რომელიც ვერავითარმა ძალამ ვერ დაძრა, ვერც ადამიანებმა, ახლა კი საძირკვლის თავზე იყო თავისუფლად ჩამოკიდებული, ჰაერში იდგა ერთი ფუტის სიმაღლეზე. ხალხი მიაწყდა ამ სასწაულს და იწყეს ღვთის დიდება, ირწმუნეს მეფის სიტყვა და ტყვე ქალის სარწმუნოების საოცარი ძალა. და აი, ყველა გაოცდა და გაშეშდა, მათ თვალწინ, დაიდრა სვეტი და თავისივე სიმძიმით დაეშვა საძირკველზე, ისე რომ, არავინ შეხებია. დანარჩენი სვეტები სწრაფად აღიმართა და იმავე დღეს თავის ადგილას ჩაჯდა.

ამ დიდებული ტაძრის აგების შემდეგ ხალხი დაეწაფა ამ ახალ სარწმუნოებას, ტყვე ქალმა კონსტანტინეპოლში იმპერატორთან გაგზავნა ამ ხალხისგან წარგზავნილი ელჩები, რათა მოეთხოვათ მღვდელი, რომელიც თავის მოვალეობას შეასრულებდა. მან, იმპერატორმა, გაიხარა დიდად, რომ რომაელთათვის უცნობმა ქვეყანამ აღიარა ქრისტეს სარწმუნოება. *ეს ყველაფერი ჩვენ გავგაცნო ბაკურიუსმა, იმ ხალხის მეფემ, სარწმუნოების ერთგულმა კაცმა, რომელიც ჩვენში დომესტიკოსთა ამაღლას ეკუთვნოდა, როცა იგი, როგორც სარდალი, ცხოვრობდა იერუსალიმში პალესტინის სამღვრებთან.*

ნინოსთან დაკავშირებული მონაკვეთი, რომელსაც ხელნაწერში ეწოდება „მოქცევაჲ ქართლიასაჲ“

... (კონსტანტინეს მიერ ქრისტიანობის მიღებიდან) ათი წლის შემდეგ ელენე იერუსალიმში გაემგზავრა პატიოსანი ჯვრის მოსაძიებლად; და მეთოთხმეტე წელს, მავანი ქალი ევადაგი,¹⁶³ სახელად რიფსიმე, რაღაც მიზეზით გაექცა მეფეს მის დედობილთან ერთად. და მასთან ერთად იყო ერთი მშვენიერი ტყვე ქალი სახელად ნინო, რომელსაც დედოფალმა ელენემ გამოჰკითხა მისი ამბები და ის რომაელი დიდგვაროვანი აღმოჩნდა. ის წავიდა და გზად ბევრი ადამიანი განკურნა სასწაულებრივად და ჩავიდა საბერძნეთში და პრინცესა რიფსიმეს ასწავლიდა.

როდესაც რიფსიმემ, გაიანემ, ნინომ და მათთან ერთად რამდენიმე ქალმა გაქცევისას ზღვა გადალახეს, მიაღწენ სომხეთის, თრდატის სამეფოს, და იქ ისინი აწამეს. მაგრამ ნინო გაიქცა; და როცა ჩრდილოეთით მთებს კვეთდა, მივიდა მდინარე მტკვართან (კურა). ის გაჰყვა მტკვარს და მივიდა მცხეთაში, დიდ სატახტო ქალაქში. იქ მან სამ წელიწადს დაჰყო, საიდუმლოდ ღოცულობდა მაყვლოვანის ბუჩქებით მოფარებულ ადგილზე. მან ვაზის ღეროებისგან ჯვარი დაამზადა, იქ დადგა საცხოვრებლად და ღოცულობდა. ამ ადგილს არ ჰქონდა კედლები. იქ, სადაც ის მაყვლოვანი იყო, დღეს ზემო ეკლესია დგას.

მეოთხე წელიწადს მან დაიწყო ქრისტე ღმერთის და მისი რწმენის ქადაგება, და ამბობდა, რომ „ეს ჩრდილოეთის ქვეყანა შეცთომილი იყო“. მეექვსე წელიწადს მან მეფე და მისი ცოლი ნანა რწმენაში შეიყვანა, როდესაც ნანა ავად იყო, და მეშვიდე წელიწადს მეფე ქრისტეს რჯულზე მოიქცა სასწაულის წყალობით. მან მაშინვე აავიქვდა ეკლესია სამეფო ბაღში, და მის აგებას თავად მეფე ხელმძღვანელობდა.

როცა ეკლესია აშენდა, მეფემ ელჩები ნინოს წერილით მიაგვლინა კონსტანტინესთან, საბერძნეთის მეფესთან, თხოვნით, რომ მას მღვდლები გამოეგზავნა; ისინი მალე ჩამოვიდნენ. მეფემ ეპისკოპოსი იოანე, ორი მღვდელი, დიაკვანი და დედოფალ ელენეს წერილი, მაცხოვრის ხატი და სიცოცხლის ხე გამოატანა ნინოსთვის. როდესაც ისინი ჩამოვიდნენ, მეფე მირიანმა, დედოფალმა და მთელმა მათმა ოჯახმა ნათლობა მიიღეს. მათ ითხოვეს ხე, რომ მისგან ჯვრის¹⁶⁴ გაკეთება შესძლებოდათ...

¹⁶⁵[შემდეგ მეფემ უბრძანა აბიათარს, და მასთან ერთად ბევრ ებრაელს, ხლებოდნენ მას; და მან გამოჰკითხა ისინი კვართის თაობაზე, და მათ უთხრეს მეფეს ყველაფერი, რაც ზემოთ წერია. და მეფე მირიანმა ხელები ალაპყრო ზეცად და თქვა: „კურთხეული ხარ შენ, ო, უფალო იესო ქრისტე, ძეო ცოცხალი ღმერთისა, რადგან] შენ გსურს ჩვენი ხსნა და ეშმაკისგან და მისი ბნელეთისგან განრიდება, რაკი შენი სამოსი მოიტანეს ამ ებრაელებმა წმინდა ქალაქ იერუსალიმიდან ამ უცხო მოდგმის ქალაქში, რადგან ჩვენი მამები მართავდნენ ამ ქალაქს შენი ჯვარცმის დროს“. და მეფე და მთელი ქართლი მოექცნენ ქრისტიანულ სარწმუნოებაზე.

მაშინ კურთხეულმა დედა ნინომ თქვა: „კურთხეულია ღმერთი, ჩვენი უფალი იესო ქრისტეს მამა, რომელმაც მისი წმინდა სიტყვა გამოგვიგზავნა მაღალი ზეციდან, თავად ჩამობრძანდა მისი უძლეველი ტახტიდან მდაბალ მიწაზე; უდავოდ შეისხა ხორცი დავითის თესლისგან, და იშვა მხოლოდ ქალისგან, წმინდა და უბიწო ქალისგან, ვინც მან მოიწონა; და ასე იტვირთა მან ჩვენი ცხოვრება. მან განანათლა ყოველი არსი ცის ქვეშ, და მათ მეტი მოშურნეობით იწამეს მისი, რადგან ის იშვა ადამიანად. მას თაყვანს სცემდნენ ვითარცა ღმერთს; ის მოინათლა, როგორც სკულის მსახური, წყლითა და მიწით. ის იყო მოწმე და განადიდა მამა და სულიწმინდა მაღლით; ის ჯვარს ეცვა, დაეფლა და აღდგა ხელახლა. ის ამაღლდა ზეცად მამასთან, და კვლავაც მოგვევლინება დიდებით. მას ხამს დიდება. ამინ“.

როცა ეს წარმოთქვა, წაიყვანა თან იაკობი, მღვდელი, რომელიც საბერძნეთიდან ჩამოსულიყო და ერთი *ერისთავი* და გავიდნენ წობენში, და ეწვივნენ მთიულებს, ჭართალელებს, ფხოველებს და წილკნელებს, და ქადაგებდნენ ქრისტეს სჯულს, მაგრამ მათ არ მიიღეს ის. *ერისთავმა* ხმალი აღმართა ერთხელ, და მაშინ შიშით დათმეს თავიანთი კერპები დასამსხვრევად. გაიარეს ერწო¹⁶⁶ და შეყვონდნენ ჟალეთში, სოფელ ედემში, და მონათლეს ერწუ-თიანელები. და ქვარიანებმა შეიტყვეს ეს ამბავი და გაიტყვნენ თოშეთში, მაგრამ ბოლოს ისინიც დაიმორჩილეს, და მეფე თრდატმა¹⁶⁷ მონათლა ისინი.

და ნინო შეუძლოდ გახდა და გაემგზავრა მცხეთისკენ, და როცა ქტოეთაში ჩავიდა, სოფელში, რომელსაც ბოდინი ჰქვია, ველარ შეძლო გზის გაგრძელება. და მაშინ გამოემართნენ ქალაქ უჯარმიდან რევი, მეფის ვაჟი, და სალომე, მისი მეუღლე, და მისი ქალიშვილი, რათა ებრუნათ ნინოზე. მეფემ და მისმა მეუღლე ნანამ მთავარეპისკოპოსი იოვანე გაგზავნეს ნინოს მოსანახულებლად და მცხეთაში წამოსაყვანად. მაგრამ ნინომ აღარ ისურვა დაბრუნება¹⁶⁸, და ითხოვა, რომ იოვანეს შემდგომ მღვდელი იაკობი დაენიშნათ. და მისცა მას წერილი, დედოფალ ელენეს მიერ მისთვის მოწერილი, სადაც დედოფალი ნინოს მიმართავს როგორც დედოფალს, მოციქულს და ევანგელისტს. ნინომ სიცოცხლის ხე დედოფალ ნანას გადასცა. და იოვანემ ნინო ქრისტეს ხორციით და სისხლით აზიარა, და ნინომ მიიღო საგზალი თან წასაღებად, და სული უფლის ნებას მიაბარა, მისი ქართლში ჩამოსვლიდან მეთხუთმეტე წელიწადს, ქრისტეს ზეცად ამაღლებიდან სამას ოცდამეთვრამეტე წელს, და საბამიდან ხუთი ათას რვაას ორმოცდამეთვრამეტე წელს¹⁶⁹.

ამის შემდეგ მცხეთის, უჯარმის და მთელი ქართლის ქვეყანა გლოვობდა ნინოს გარდაცვალების გამო. მოვიდნენ და დაკრძალეს მისი ნეშტი, ძლევიტ მოსილ იმ ადგილზე, ბუდიში, ცხოეთის სოფელში. მეფე მირიანი და მთელი ერი დაიძრნენ და ზემო ეკლესია ააშენეს ქვით. ამის შემდეგ ოთხი წელი გავიდა და მეფე მირიანი გარდაიცვალა, და დამარხეს ცენტრალური სამხრეთი სვეტის ჩრდილოეთ მხარეს. იმ სვეტში არის ძელი ცხოველის ნაწილი. მეორე წელს კი ნანა დედოფალი გარდაიცვალა და იმავე ძელის დასავლეთით დაკრძალეს, სადაც მეფე მირიანი.

და ბაკური, რევის ძე¹⁷⁰, მეფედ აკურთხეს. და ეპისკოპოსი იოვანე გარდაიცვალა და მღვდელი იაკობი, რომელიც იმავე ადგილიდან იყო, მთავარეპისკოპოსად დაინიშნა.

ოცდასამი წელი გავიდა პატიოსანი ჯვრის ამაღლებიდან და რევმა საბურველით შემოსა ის და აკლდამა ააშენა ქვემო ეკლესიაში. და რევი¹⁷¹ გარდაიცვალა და დაკრძალეს მეუღლის გვერდით. ათი წელი გავიდა ამის მერე და ბაკურმა წამოიწყო წილკნის ეკლესიის მშენებლობა და ოცდათხუთმეტი წლის შემდეგ ბაკური გარდაიცვალა, და დაკრძალეს ქვემო ეკლესიაში...

ნინოსთან დაკავშირებული მონაკვეთი მოსე ქორენელის სომხეთის ისტორიაში (თავი LXXXVI)

...მაგანი ქალი, სახელად ნუნე, წმინდა რიფსიმეს გაფანტულ თანმხლებთაგანი, გამოქცევისას შევიდა იბერიის მიწაზე, მათს სამეფო ქალაქ მცხეთაში. მკაცრი ცხოვრების წესით მან კურნების ნიჭი მოიხვეჭა და ამის წყალობით მრავალი სენით შეპყრობილი ადამიანი განკურნა, მათ შორის იბერიის მბრძანებელი მიხრანის მეუღლე. და როდესაც მიხრანმა ჰკითხა მას, რა ძალით ახდენდა ამ სასწაულებს, მან ქრისტეს სახარების ცოდნა შეიმეცნა მისგან.

იმ ხანებში, მიხრანი ერთხელ სანადიროდ წავიდა: უდაბურ მთიან მხარეში გზა დაეკარგა საშინელ ამინდში, ოღონდ იმ ხილვის შედეგად არა, რომელიც გვამცნობს: „წყვდიაღს უხმობს ის მისი ხმით“ (იობი, XXXVIII. 34), და მეორეგან: (ამოსი, ტომი 8). ასეთი იყო წყვდიადი, რომელმაც მოიკცა მიხრანი, და ეს იქცა მისთვის მარადიული სინათლის საბაბად: რადგან ამ შეძრწუნების ჟამს მას მოაგონდა, რას ჰყვებოდნენ თერდატზე, როგორ განგმირა ის ღმერთმა, როცა სანადიროდ ემზადებოდა; მიხრანი ჩაფიქრდა, ხომ შეიძლება მეც იგივე დამემართოსო. შიშით შეპყრობილმა ლოცვა აღავლინა და შეევედრა ღმერთს, რომ მის ირგვლივ ჰაერი დაწმენდილიყო, და რომ მშვიდობით დაბრუნებულიყო შინ, და თან დადო აღთქმა, რომ ნუნეს ეთაყვანებოდა. მისი ვედრება შესმენილ იქნა და მიხრანმაც შეასრულა დადებული აღთქმა.

მაშინ კურთხეულმა ნუნემ მოსთხოვა მორწმუნე ადამიანებს, მისულიყვნენ წმ. გრეგორისთან, რათა ეკითხათ, რის გაკეთებას ურჩევდა ის, რაკი დაინახა, რომ იბერიელები მზად იყვნენ სახარების სწავლების მისაღებად. და ნუნემ მიიღო ბრძანება, მის მაგალითს მიჰყოლოდა და დაენგრია კერპები და აღემართა პატიოსანი ჯვრის ნიშანი, ვიდრე უფალი მოუვლენდა მოძღვარს წინამძღვრად. ნუნემ დაუყოვნებლივ დაამხო მეხთამტყორცნელი არამაზდის გამოსახულება, რომელიც ქალაქგარეთ იდგა, ქალაქიდან დიდი მდინარე მტკვრით (კურა) გამოყოფილი. ქალაქის მოსახლეობას ჩვევად ჰქონდა სახლის სახურავებიდან დილაუთენია თაყვანი ეცათ კერპის გამოსახულებისთვის, რომელიც ისე მაღლა იდგა, რომ ხედავდნენ; მსხვერპლშეწირვის მსურველებს მდინარე უნდა გადაელახათ, და ასე აღასრულებდნენ მსხვერპლშეწირვას კერპების თაყვანისცემის ადგილზე მიახლებულები.

ქალაქის თავები აღდგნენ და თქვეს: „ვის უნდა ვეთაყვანოთ ჩვენი კერპების ნაცვლად?“ მათ უთხრეს, რომ თაყვანი უნდა ეცათ „ქრისტეს ჯვრის ნიშნისთვის“. ისინი ასეც მოიქცნენ, და აღმართეს ჯვარი ქალაქის აღმოსავლეთით შემალღებულ კოხტა მთაზე, რომელიც ქალაქისგან მცირე მდინარით (არაგვით) იყო გამოყოფილი. დილით, მათი ადათის თანახმად, ადამიანებმა თაყვანი სცეს ჯვარს თავიანთი

სახლის სახურავებიდან. მაგრამ როდესაც ავიდნენ მთაზე და გაურანდავი ხის ჯვარი დაინახეს, მრავალმა მიზლით თქვა, ჩვენი ტყეები ხომ სასესეა ასეთი ხეებითო, და მიატოვეს იქაურობა. მაგრამ უფალმა წყალობით გადმოხედა ზემოდან მათ შეცდომას. მან ციდან ღრუბლის სვეტი მოავლინა, და მთელი მთა სურნელებით აივსო: გაისმა საამო ჰანგი, მრავალი მოგალობე აღავლენდა ფსალმუნებს და გამოისახა სინათლის სვეტი ჯვრის ფორმისა, და ზომითა და ფორმით ხის ჯვარს ჩამოჰგავდა: თორმეტი ვარსკვლავი დაადგა თავზე ხის ჯვარს; ყველამ ირწმუნა და თავყვანი სცა. და იმ დროიდან მოყოლებული, მრავალი ადამიანი განკურნა იმ ჯვარმა.

მაგრამ კურთხეული ნუნე გაუდგა გზას, რათა მისი წმინდა ბაგით დაერიგებინა იბერიის სხვა კუთხეების მოსახლეობა: ის ყველგან უკიდურესად სადა კაბით მიდიოდა, ყოველგვარი ზედმეტობების გარეშე, ვითარცა მწირი, ვისთვისაც უცხოა ეს ქვეყანა და ყოველივე ამქვეყნიური, გარდა ჯვარზე ღურსმნებით მიჭედდილისა, და მთელ ცხოვრებას უძღვნიდა მარადიულ სიკვდილს, აღიარებდა სიტყვით ღვთაებრივ სიტყვას და საკუთარი თავგანწირვით ისე შემკულიყო, ვითარცა სისხლიანი გვირგვინით; ჩვენ თამამად შეგვიძლია ვთქვათ, რომ მას შემდეგ, რაც მოციქულად იქცა, ქადაგებდა, დაწყებული კეხარჩიანელებით (დიდ სომხეთში), ალანთა (ქოხები - დარიალის უღელტეხილი) მისადგომებთან და კასბიელებით¹⁷², ვიდრე თავად მასკუტების (მასაგეტები) საზღვრებამდე, რის თაობაზეც შეგიძლიათ შეიტყოთ აგათანგელოსისგან.

ჯუანშერის სომხური ვერსია

თარგმანი ფ. ქ. ქონიბიარისა

წინასწარი შენიშვნა

სომხეთში შემონახულია ქართველთა ისტორია, რომელიც მიეწერება ვინმე ჯუანშერს. ეს რომ ქართველი მწერლის ნაშრომის თარგმანია, ჩანს იმიტ, რომ ხშირად არის გამოყენებული ქართული ფორმები და იდიომები, და ის შესრულებულია არაუგვიანეს მეცამეტე საუკუნისა, რადგან მასში ციტირებულია სტეფანოზ ორბელიანის ისტორია, რომელიც გრეგორი ანავარზის დროს ცხოვრობდა იმავე საუკუნის ბოლოს.

ამ ნაშრომის მე-16 თავი (სან-ლაზაროს 1884 წლის გამოცემა, გვ.104) შეიცავს ერთ შენიშვნას, რომელიც ცხადყოფს, რომ გამოყენებული იყო ქართული წყაროები. ეს არის შემდეგი მონაკვეთი: „და ეს მოკლე ისტორია აღმოჩნდა დიდი არეულობის დროს და შევიდა წიგნში, რომელსაც ეწოდება „ხართლის (ან ქართლის) ცხოვრება¹⁷³“, ანუ „ქართლის ისტორია“. და ის ჯუანშერმა აღმოაჩინა, და მასში აღწერილია ხანა მეფე ვახტანგის გამეფებამდე. და ჯუანშერმა თავად განაგრძო თხრობა დღე-

ვანდლამდე, და მოვლენების (აღწერა) მიანდო მათ, ვინც თავად ნახა და შეხვდა მას (თუ მათ) თავის სიცოცხლეში“.

მიუხედავად ამ ბოლო წინადადების ბუნდოვანებისა, ზემოთ მოყვანილიდან ცხადი ხდება, რომ სომხური თარგმანი ჯუანშერს ეკუთვნის; და რაკი ეს შენიშვნა უშუალოდ მოსდევს არჩილ მეორის მარტვილობის აღწერას, რომელიც 688-718 წლებში მეფობდა, ქართული ორიგინალი საგრძნობლად ძველი საბუთი იყო. თუმცა, იმ ორიგინალში შედიოდა მონათხრობი კიდევ უფრო ადრეული პერიოდისა, რომლის აღწერაც ჯუანშერმა უბრალოდ თავის ეპოქამდე მოიყვანა. იმ უფრო ძველი მონათხრობის რედაქტირება ვახტანგის მეფობის ხანას განეკუთვნება, და შესაბამისად, შეეხებოდა ეპოქას არაუგვიანეს 483 წლამდე ქრისტესშობიდან.

ჯუანშერის ნაშრომის ამ ადრეულ ბირთვს განეკუთვნება წმ. ნოუნას მიერ იბერიის მოქცევის ეპიზოდი, რომელსაც მე ახლა ვთარგმნი; და ჩვენ ალბათ უფლება გვაქვს დავასკვნათ, რომ სომხური თარგმანი წარმოადგენს ტექსტის ფორმას, რომელიც ამ სახით ჩაიწერა მეხუთე საუკუნის მიწურულამდე. როდესაც სომხურ დოკუმენტს ვადარებთ ქალბატონი უორდროპის ქართულ ენაზე თარგმნილ ტექსტს, რჩება ზოგადი შთაბეჭდილება, რომ ეს უკანასკნელი გადმოცემულია ზედმიწევნითი სიზუსტით.

ამასთან დაკავშირებით, კარგი იქნება მკითხველის ყურადღება მივაპყროთ შემდეგ საკითხებს:

1. ჩემ მიერ სომხურიდან თარგმნილი ტექსტის არშიაზე დასმული ციფრები ერთი ნახვითაც ცხადყოფს ჯუანშერის მონათხრობის გვერდიგვერდ შესატყვისობას ქალბატონი უორდროპის თარგმანთან. თვალის ერთი შევლებაც საკმარისია იმის დასანახავად, რომ ჯუანშერის მონათხრობი ფორმით უფრო შეკუმშული და კომპაქტური იყო არსებულ ქართულ ტექსტთან შედარებით. და ეს უეჭველად ასეა, თუნდაც დავუშვათ, რაც სავალდებულოც კია, რომ სომეხმა მთარგმნელმა საგრძნობლად შეკვეცა ტექსტის ორიგინალი.
2. ორიგინალური დოკუმენტის სტრუქტურა საუკეთესოაა შემონახული სომხურ თარგმანში. ამიტომ, ტექსტის პირველივე სიტყვებიდან ცხადი ხდება, რომ, როდესაც ნინომ მცხეთაში მხოლოდ სამი წელი დაჰყო, მან სალომეს უამბო თავისი წინა ცხოვრების ამბავი. გვ. 1-23.

ამ ნაამბობის ბოლოს არსებული მართებული გადასვლა აბიათარის მონათხრობზე გვხვდება მხოლოდ სომხურში, ნინოს დასკვნითი სიტყვების სახით: – „და თუ ჰკითხავ, აბიათარისგან შეიტყო სიმართლეს“.

აბიათარი მაშინვე იწყებს თხრობას. ის გრძელდება 29-ე გვერდამდე, „მოგვთა ხიდთან“. აქ სომხური თარგმანი სავსებით მართებულად გადმოსცემს ეპიზოდს იმის თაობაზე, რომ ებრაელებს სურდათ აბიათარის ქვით ჩაქოლვა, რასაც თხრობის დასასრულს ამბობს, და რაც მან, შესაძლოა, სალომესთანაც გაიმეორა მცხეთის ებრაულ უბანში.

მაგრამ ქართული ტექსტი ამ ადგილზე აცდენილია, და ეს ეპიზოდი გადადებულია 31-ე გვერდზე, და შეცვლილი სახითაა წარმოდგენილი ნინოს მისიონერული მოღვაწეობის უწყვეტი თხრობის შუაგულში.

ხოლო მონათხრობი, რომელიც მართებულად გვიყვება ნინოს ამბავს მესამე პირში, გრძელდება 45-ე გვერდამდე, ანუ, სარეცელზე წმინდანის მიცვალებამდე. და იქ, ქართულთან შედარებით, რომელიც არეულია, სომხური უფრო ნათლად აღგვიწერს ნინოს ადრეული მოგზაურობის ამსახველი დოკუმენტის წარმომავლობას. სარეცელთან მდგომნი ეკითხებიან ნინოს მისი ადრეული ცხოვრების ამბავს, და ნინო პასუხობს: „მე ეს ამბავი სალომეს ვუამბე. მოატანინეთ ქალაქი და მელანი და ჩაიწერეთ მის ბაგეთაგან“.

ეს საბუთი, რომელიც ამგვარად ჩაიწერა, ჯუანშერის თარგმანში მე-8 თავია, გვ. 1-23 ქალბატონი უორდროპის თარგმანში. მასში ნინო პირველ პირში გვიყვება თავის ამბავს პირველ ქართულ ხელნაწერზე დაყრდნობით (ა.ვ.), და ასეთივეა ჯუანშერის თხრობის ფორმაც. მოგზაურობის დოკუმენტის ეს დამახასიათებელი ნიშან-თვისება მომდევნო ქართულ ტექსტებში ან დაკარგულია, ან გაბუნდოვანებული.

3. სომხური თარგმანი ნინოს ქრისტიანობის კასტის საკმაოდ პრიმიტიულ და შესაძლოა, მონტანისტურ შეფერილობას ავლენს, რომელიც უეჭველია, საქართველოში დანერგილი რწმენის თავდაპირველი ნაირსახეობა იყო. რადგან სომხურში ხშირად გამოტოვებულია მეოთხე საუკუნეში დამკვიდრებული უფრო სრულყოფილი და განვითარებული ქრისტიანობის ნიშნები, რომლებსაც ქართული ვერსია შეიცავს, და პირიქით, უზუსტობას ავლენს სხვა მსგავს თავისებურებებთან დაკავშირებით, რაც ქართულ ვერსიაში გამოტოვებულია, ასეთ შემთხვევებში, ქართული და სომხური ერთგვარად გამორიცხავენ ერთმანეთს; და შეიძლება დავასკვნათ, რომ ეკლესიური განვითარების ეს უფრო გვიანდელი ეტაპის თავისებურებები არ იყო შესული თავდაპირველ აღწერებში. გთავაზობთ მაგალითებს: მე-20 გვერდზე სომხურ ვერსიაში წმინდა ნინოს ლოცვაში გამოტოვებულია წმინდა სამების მოხსენიება. მეორე მხრივ, 23-ე გვერდზე სომხური ვერსია გთავაზობს მსგავს მოხსენიებას, რომელიც არ გვხვდება ქართულ ტექსტში. ასე მაგალითად, 47-ე და 56-ე გვერდებზე ქართულში ვხვდებით ფრაზებს: „დიადი სამება-ერთარსება ღმერთი“, და „სამება, დაუსაბამო ღმერთი“. სომხური ტექსტის შესაბამის მონაკვეთებში ეს დოგმატური გამოთქმები არ გვხვდება. მეორე მხრივ, 34-ე გვერდზე, სომხური ტექსტი ქართულზე უფრო დოგმატურია. ასევეა 31-ე გვერდზე: „ჩემი ღმერთი იესო, მეფე მარადიული“.

25-ე გვერდზე კვლავ ვხვდებით ფრაზას: „ქალწულის ძე“. ამის შესატყვის სომხურში კი ასეა: „შეჭირვებული ქალის საბრალო ძე“. ქართულში კი 44-ე გვერდზე ვკითხულობთ: „ტეშმარიტად შობილი დავითის თესლისგან, უბიწო და წმინდა ქალწულისაგან“. მაშინ, როცა სომხურში უჩვეულო ფრაზას ვაწყდებით, „მხოლოდმო-

ბილი დედისაგან იშვა მხოლოდშობილი ღმერთი“. ეს ორი ფრაზა, სულ ცოტა, არ ითვალისწინებს ერთმანეთს; და შეიძლება ვივარაუდოთ, რომ მეოთხე თუ მეხუთე საუკუნეებში გვიანდელი ქართველი მწიგნობრები დოგმატურად ასწორებდნენ ამ ამბავს ერთგვარად და ტექსტის კონკრეტულ მონაკვეთებში; ხოლო ჯუანშერთან და სომხურ ტრადიციაში ტექსტი სხვაგვარად არის შესწორებული.

მაგრამ როგორც ქართული, ისე სომხური დოკუმენტები თანხვედრაშია შემდეგ საკითხებთან დაკავშირებით: რომ იესო იყო „ღვთაებრივი კაცი“, გვ.25 (რასაც განამტკიცებს სომხური ვერსიაც, 30-ე გვერდი); ვინც, „როდესაც მიაღწია კაცთა მიწაჲს, საკუთარ თავს უწოდა ძე ღვთისა“, გვ.27. ასევე, ორივე მოწმე ხაზს უსვამს იესოს ნათლობას, გვ.45, და ეს აშკარად ხაზგასმულია მონაკვეთში, რომელიც ნინოს მრწამსს ეხება. ეს იყო სასიცოცხლოდ მნიშვნელოვანი ეპიზოდი იესო ქრისტეს ებიონიტური მოძღვრების შესაბამისად, თუმცა ის ერთ-ერთია მათ შორის, რომელთაც უფრო გვიანდელი დოგმატური სისტემები აღარ განიხილავენ. დაბოლოს, ორივე წყარო დაბეჯითებით ამტკიცებს, რომ იესო ქრისტე სამყაროს მოევლინა „ხორცშესხმული“, გვ.41; და ეს იყო პოზიცია, რომელსაც ჩვეულებრივ იყენებდნენ დოკეტების და მანიქეველების პრიმიტიული შეცდომის საპირწონედ.

სომხური ტექსტი კიდევ უფრო აბუნდოვანებს თავად ნინოს ნათლობის საკითხს; რადგან მასში გამოტოვებულია სწორედ ამ ეჭვის აღმძვრელი შენიშვნა „გარდა ნათლობისა“, რომელიც ქართულ ტექსტში გვხვდება, გვ.23 – შენიშვნა, რომელიც თავისთავად გულისხმობს საეკლესიო დოკუმენტებში გათვითცნობიერებული მკითხველისთვის, რომ ის მოინათლა. სომხური ვერსია ასევე უგულვებელყოფს მრავლისმთქმელ დებულებას, რომელიც შემორჩენილია ქართული ტექსტის 42-ე გვერდზე, რომ ნინომ მონათლა მეფე მირიანი.

აგრეთვე, ეს ტექსტი ორჯერ მოიხსენიებს ნინოს თორმეტ მოწაფეს – გვ.38 და გვ.39, მაშინ, როცა ქართული ტექსტი ამას მხოლოდ ერთხელ აღნიშნავს. არაერთი ერესიარქი დაადანაშაულებს მკრეხელობაში იმის გამო, რომ მოწაფეების სწორედ ამ რაოდენობას ირჩევდნენ პროპაგანდისტული მოღვაწეობისას. ის, რომ აბიათარმა ნათლობისას პავლეს სახელი მიიღო, სომხურ ტექსტში უფრო ცხადად ჩანს, ვიდრე შესაბამის ადგილას ქართულში, გვ.30-33. ეს მოგვაგონებს პავლიკიანებში გაბატონებულ მსგავს ადათს, რომელიც არც მართლმადიდებელი მორწმუნეებისთვის იყო უცხო.

დასასრულ, თვალში საცემია, რომ სომხური ტექსტი, თითქმის X თავის ბოლომდე (= გვ. 40), წმინდანს; მოიხსენიებს როგორც ნოუნი; მაგრამ მთელი დანარჩენი თხრობისას როგორც – ნინაუ ან ნინო. შესაძლოა, მართლწერის ეს ცვლილება გულისხმობდეს ქართული ორიგინალური ტექსტის რომელიღაც ახალ დოკუმენტურ შრეს, რომელიც საფუძვლად დაედო სომხურს. ზოგადად, მე შევინარჩუნე სომხურ ტექსტში არსებული ყველა განსხვავება მართლწერაში. სახელი ნიოფორი – მე-10 გვერდზე, ბერძნული წარმოშობის ჩანს, νεοφορος და შემონახულია ძველსირიუ-

ლი დოკუმენტის შუამავლობით, რომელშიც ასო **ა** (კ) შეცდომით გადმოიტანეს ასო **ჟ** (ბ)-დ. თუ ეს ასეა, მაშ უნდა ვივარაუდოთ, რომ თავდაპირველი მათიანეები ძველ-სირიულად დაუწერიათ.

თავი VIII

იმ დროს¹⁷⁴ კურთხეული დედა ნოუნი, უირქთა¹⁷⁵ (ანუ, იბერიელების), უირკების დედა, მოვიდა მცხეთად და სამ წელიწადს¹⁷⁶ დაჰყო იქ. და „უირქთა“ დედოფალმა სოლომონიმ (?სალომემ) ჰკითხა მას, სადაური ხარო. და ნოუნიმ ასე უპასუხა:

„ჩემი ამბავი იწყება იმ დროიდან, როცა ბრანჯები ებრძოდნენ რომს; და ერთმა კაპადოკიელმა კაცმა, სახელად ზაბულონმა, დაიპყრო ისინი ქრისტეს ძლევის მეოხებით და ტყვედ აიყვანა მეფე და მისი ლაშქარი. და მათ ითხოვეს ნათლობის მადლი, რომელიც ზაბულონმა უბოძა მათ და გაუშვა ისინი თავიანთ ქვეყანაში ქრისტეს ნათლით გაბრწყინებულები.

ზაბულონი თავად გაჰყვა მათ და ბრანჯთა ერი ქრისტიანულ რჯულზე მოაქცია. და მივიდა მეფესთან და მიიღო მისგან ურიცხვი ძღვენი, შემდეგ გაემშურა იერუსალიმში, რათა პატივი მიეგო წმინდა ადგილებისთვის. და იქ მან იპოვა ორი ობოლი, რომლებიც კლასტრადიდან წამოსულიყვნენ მას შემდეგ, რაც მშობლები დაეხოცათ, რომლებიც ქრისტიანები ყოფილან. ერთ მათგანს ერქვა ჰოუბნალ (იგივე ჯუვენალი), და მის დას სუსანა, რომელიც ბეთლემელ ნიაფორს¹⁷⁷ ემსახურებოდა. და ზაბულონმა სუსანა ცოლად წაიყვანა და გაემგზავრა ქალაქ კლასტატასში. და მე მათი შვილი ვარ.

და როდესაც თორმეტი წლის გავხდი, ისინი იერუსალიმში ჩავიდნენ. და მამაჩემი წავიდა უდაბნოში, მე კი უფლის ნებას და ქრისტეს წყალობას მიმანდო, რათა ქალწულობაში მიმეძღვნა თავი ზეციური მეფისთვის. და მე შევედი ნიოფორის სახლში, რომელიც ეროვნებით სომეხი იყო, ქალაქ დვინიდან, და ვემსახურე მას (არ ჩანს სქესი) ორ წელიწადს, და გამუდმებით მასწავლიდა ჩვენი უფალი ღმერთი იესოს ეკონომიას, და როგორ გარდაიცვალა ის (სიტყვასიტყვით: *როგორი იყო მისი აღსასრული*), და სად ინახება სამოსი, რომლითაც ჩვენი უფალი დაკრძალეს. და მათ მასწავლეს მე, რომ ის, რაც წინასწარმეტყველებმა აღწერეს, აღსრულდა უფლის მიერ, და რომ იგი ჯვარს აცვეს და აღდგა, და ამაღლდა ზეცად, და ისევ დაბრუნდება. და მისი შესამოსელი ითხოვა (*თუ ეძებდა*) პილატეს ცოლმა და მან ირწმუნა ქრისტე; და გაემგზავრა პონტოში, თავის სამშობლოში. და გარკვეული ხნის შემდეგ ის ევანგელისტ ლუკას ჩაუვარდა ხელში და მან იცის, რა უქნა მათ. ხოლო, რაც შეეხება ტილოს, ამბობენ, რომ ის პეტრემ წაიღო თან; და უკერველი კვართი ჩრდილოვან (ანუ,

ჩრდილოეთის) ქვეყანაში ჩავიდა და ქალაქ მცხეთაში ძევს. მაგრამ უფლის ჯვარი იერუსალიმშია დამარხული და გამოჩნდება, როცა ის იწებებს.

და როცა ეს ყველაფერი გავიგე, წავედი პატრიარქთან და მან მაკურთხა მე. და მე ჩავედი რომში, რომ იქნებ, შემთხვევით, მომეპოვებინა ქრისტეს მადლის წილი. და მას მერე, რაც ჩემი ბედი საბოლოოდ მივანდე მაცოცხლებელ იმედს, აღმოვაჩინე პავლეს ვანქი (ანუ, დასასვენებელი სახლი/სასტუმრო), სადაც ქალწულები ცხოვრობდნენ, 300 სული. და ისეთ განსაცდელში აღმოჩნდნენ, რომ იძულებულები გახდით სომხეთში ჩამოვსულიყავით. და კეისარმა წერილი გაუგზავნა თრდატს; დაიწყეს ჩვენი ძებნა და გვიპოვეს საწნახლებში ჩამალულები. და მეფემ დიდი ცდის მიუხედავად ვერ დაიყოლია დანიშნული ჰრიფსიმა ცოლად გაჰყოლოდა; და მეფემ ხმალი შემართა და ოცდაჩვიდმეტი სული დახოცა ჩვენგან. და დანარჩენები მიმოიფანტნენ; მაგრამ მე ვარდის ხეებქვეშ დავრჩი, რომელიც ჯერ არ აყვავებულიყო. და როცა ზემოთ ავიხედე, დავინახე, როგორ გადიოდნენ წმინდანთა სულები ზეცად. და მათი წინამძღვარი იყო მღვდელი; ანგელოსთა ცეცხლოვანი დასით შეეგება მათ, ხელთ ეპყრა საცეცხლური; და საკმევლის სუნით აივსო მთელი სამყარო. და როცა აკმია წმინდანებს, ის დაბრუნდა მათთან ერთად, და ყველანი საბურველს უკან მიიმალენ.

მაგრამ მე შევღალადე უფალს სიტყვებით: „რად მიმატოვე აქ, ჩემო უფალო იესო?“ და მან მომიგო მე: „შიში ნუ გაქვს, რადგან შენც მიხვალ იმავე ადგილზე, სადაც შენი დები არიან. მაგრამ ადექი ახლა და გაეშურე ჩრდილოეთით, სადაც სამკალი ბევრია, მუშაკნი კი – ცოტა“. და სულ მალე, იქვე ეკლით დაფარულ ბუჩქზე შეცრად კვირტებმა იფეთქა და ვარდები გამოისხა.

და მე ავდექი და წავედი სომხების ოურბანიში და იქ გამოვიზამთრე; და ივნისის თვეში მივაღდექი ჯავახეთის მთას. და მივედი ფარავნის ტბასთან, დავინახე ბევრი მეთევზე ტბაში და მეცხვარეები ტბის განაპირას. და გავიგონე, როგორ იფიცებდნენ არამაზდისა და ზადენის სახელს¹⁷⁸. რადგან სომხური ენა ვიცოდი, რომელიც დვინში, ნიოფორის სახლში ვისწავლე, შევეკითხე, სადაურები იყვნენ და მითხრეს, რომ არიან დარბიდან, ღრბანიდან, საფოურსლიდან, ქინწერიდან, მცხეთის რაფატენიდან, სადაც ღმერთებს იფიცებენ და მეფეები კი მბრძანებლობენო. და ის მდინარე, რომელიც ამ ტბიდან გამოდის, იქით მიედინებაო. და მე განვმარტოვდი და დავდე თავი მიწაზე და დავიძინე. და იქ მომეცა წიგნი რომაელთა ენაზე, ბეჭდით დაბეჭდილი. და ბეჭედზე ეწერა იესო ქრისტეს სახელი. და კაცმა, რომელმაც გადმომცა წიგნი მითხრა: – ადექი, წადი და იქადაგე, რაც მანდ წერია. და მე ვუთხარი მას, – ვინ ვარ მე, ერთი უმეცარი და უმწეო დედაკაცი? – მაგრამ მან მითხრა: – ქრისტიანობის მადლში და სიცოცხლის მიწაზე, რომელიც არის ($\text{=}\tilde{\alpha}\text{ } u/v/\text{ }\omega\text{ } \text{)$ იერუსალიმი, არ არსებობს მამაკაცი ან დედაკაცი. და სისუსტე და უმეცრება სახსენებელი არ არის, რადგან ქრისტე არის უფლის ძალა და უფლის სიბრძნე. და მარიამ მაგდალელმა ახარა ქრისტეს აღდგომა მოციქულებს და ბევრ სხვასაც; და არც მას ჰქონდა სირცხვილის

გრძნობა, როცა ლაპარაკობდა და არც მათ, ვინც მას უსმენდა. და მე გავხსენი წიგნი და იქ იყო მოკლედ ჩაწერილი სახარების მთელი ძალა, შეკრებილი ათ წინადადებაში (*სიტყვასიტყვით: სიტყვებში*).¹⁷⁹

და მას მერე, რაც წავიკითხე და შევიმეცნე ის, ავდექი და უფლის ღოცვა აღვაჯლინე; და გავყევი დასავლეთიდან მდინარეს, სანამ დინებამ აღმოსავლეთით არ შეუხვია. და მივაღწიე ურბნისს, და იქ დავყავი ერთ თვეს; და შემდეგ მივედი მცხეთის ვაჭრებთან. და არამაზდის პატივსაცემად გამართულ დღესასწაულზე გავყევი მეფეს და მთელ ერს; და მე დავინახე სპილენძის ჯავშანი და ოქროს მუზარადი, ორი თვალთ შეძკული, ერთი ზურმუხტისა და მეორე ბივრილისა, ხელთ ეპყრა ხმალი, ელვის მკვესავი, და იქნევდა მას და შიშის ბარს სცემდა შეკრებილთ. და ისინი ცახცახებდნენ და გაიძახოდნენ: „ვაი ჩვენს თავს, თუ შეუფერებელი მსხვერპლი გავიღეთ ან სიტყვით შევცოდეთ ებრაელებთან ან მოგვებთან, რადგან არამაზდის ხელით განვიგმირებით“. და მისგან ხელმარჯვნივ იდგა კერპი სახელად გაცი, და მისგან ხელმარცხნივ – ვერცხლის კერპი სახელად გაიმი.

და მე მომაგონდა ჰოუზნალის, იერუსალიმის პატრიარქის გამონათქვამი, რომელმაც მითხრა, „შენ მიაღწევ კაცთა მიწას, სადაც ადამიანები ჭეშმარიტ ღმერთს ეომებიან“. და ღრმად ამოვიოხრე და ავტირდი, და ღმერთს ვთხოვე წყალობა მოელო შეცთომილებზე და ვთქვი: „ღმერთო ჩემი მამისა და დედისა, აწვნიე შენი რისხვა ამ ეშმაკით შეპყრობილ კერპებს და გაანადგურე ისინი, რათა მათ შეგიცნონ შენ, ერთადერთი ჭეშმარიტი ღმერთი“. და მოულოდნელად ამოვარდა ძლიერი ქარი, და სეტყვა, თითო ერთი ლიტრის წონისა; და საზარელი სიმყრალის სუნი ავარდა და ყომრალი ბინდი ჩამოწვა, რამაც კერპები უხილავი გახადა. და ბრბო გაიფანტა და შეცვივდა სამალავში. და მეორე დღეს მეფე და მთელი ერი გამოვიდა და სურდათ მომხდარის მიზეზი შეეტყოთ. მაშინ ზოგმა თქვა: „ქალდეველთა ღმერთი თროუჯანი¹⁸⁰ და არამაზდი თავიდანვე მტრობდნენ ერთმანეთს. და რაკი ერთხელ ჩვენმა ღმერთმა გაანადგურა ის წყლით, ახლა მან იძია შური“. მაგრამ სხვებმა თქვეს სიმართლე, რომ დიადმა ღმერთმა, რომელმაც სომეხთა მეფე გაასწორა მიწასთან და შემდეგ განკურნა მთელ ჰაიასტანთან (ე.ი. სომხეთთან) ერთად, მან მოიმოქმედა ეს სასწაული.

და მე ვიპოვე ბივრილის თვალი და მივედი ბანჩ/ქში, რომელსაც ისინი მეფე ბართომის თავშესაფარს უწოდებენ და ვილოცე იქ ექვს დღეს. და ჩვენი უფლის ფერისცვალების დიდებულ დღეს, როცა უფალმა მთავარ მოციქულებს და წინასწარმეტყველებს უჩვენა მამის გამოსახულება, ჩემთან მოვიდა სამეფო პირი, ქალი სახელად შოუშანი, და როცა დამინახა, გოცდა. მან მოიყვანა თან მთარგმნელი, რომელიც რომაულ ენაზე დამელაპარაკა და დამისვა შეკითხვები, და შემიბრალა როგორც უცხოელი. და მოისურვა გავყოლოდი თან სასახლეში. მაგრამ მე არ გავყევი; არამედ წავედი იქიდან და ვიპოვე ქალი, სახელად ანასტოუ, იმ კაცის ცოლი, ვინც სამეფო ბაღს უვლიდა, და მან სიხარულით მიმიღო. და მათ სახლში დავრჩი ცხრა თვეს.

და ისინი უშვილოები იყვნენ და ამის გამო დიდად დარდობდნენ. და მე მეწვია ნათლით მოსილი კაცი და მითხრა: წადი იმ ბაღში, და კედარის¹⁸¹ ხის ამონაყარიდან, ვარდის ბუჩქების მახლობლად, ამოიღე მიწა და მიეცი, უფლის სახელით შეჭამონ, და უფალი მისცემს მათ პირშოს. და მე ასეც მოვიქეცი; და მივეცი მათ იესო ქრისტეს, საბაოთთაა ღმერთის სახელით, რომელიც მოგვევლინა სიმდაბლით და კვლავ მოგვევლინება მისი დიდებით, რათა განიკითხოს სოფელი მისი დამსახურებისამებრ. და მათ მომისმინეს და მიიღეს აღთქმული შვილი.

და მე წამოვედი მათი სახლიდან; და გავმართე სადგომი კედლის გარეთ იალღუნიანში. და იქ ვიცხოვრე სამ წელიწადს, და დავამზადე ჯვარი და თაყვანს ვცემდი მას და წმინდა სამებას დღისით და ღამით. და დღითი დღე მივმართავდი ებრაელებს, რადგან ვიცოდი მათი ენა. და მოვიპოვე ცნობა უფლის კვართის თაობაზე. და მღვდელმა აბიათარმა და მისმა ქალიშვილმა სიდონიამ, და ექვსმა ებრაელმა ქალმა მასთან ერთად, ირწმუნეს ქრისტეს მეორედ მოსვლის ამბავი. და თუ ჰკითხავთ აბიათარს, სიმართლეს მისგან შეიტყობთ.

და როდესაც ბრძენმა დედოფალმა შეიტყო ეს ამბავი, განცვიფრდა და დაიჯერა მისი ნათქვამი. და როცა თრდატის, მამამისის თავს დამტყდარი დიდი სასწაულების ამბავიც გაიგო, კიდევ უფრო გაუშყარდა რწმენა და აღიდებდა ღმერთს და მის დაუსაბამო დიდებას.

თავი IX

მაგრამ მღვდელმა აბიათარმა ყველას გასაგონად მოგვითხრო თავისი ამბავი ამ სიტყვებით:

– იმ წელიწადს, როდესაც წმინდა ნოუნი ჩავიდა მცხეთაში, მე ვიყავი ჩემი გვართომის წილნაყარი მღვდელი. და იქ მე მომიტანეს წერილი ანტიოქიიდან, იქაური ებრაელებისგან, რომელშიც მწერდნენ, რომ სამეფო სამად დაიყო, და რომ რომაელები, ბერძნები და სომხები გვმართავენ ჩვენ. და რომ ჩვენი წინასწარმეტყველები დაადუმეს და ჩვენი ტაძრები მიწასთან გაასწორეს. ეს ჩვენთვის ცნობილია წმინდა წერილიდან – როცა ჩვენმა მამებმა შესცოდეს, ღმერთი გაბრაზდა და ისინი ტყვეობაში ჩაყარა. და როცა მათ იხილეს, რა ტანჯვა და ვაება ელოდათ, მოინანიეს, და შეჰღალადეს უფალს ლოცვებში; და ღმერთმა შეიწყნარა და დაბრუნების ნება დართო და წყალობა მოიღო მათზე. და ასეთი რამ შვიდჯერ მოხდა ძველ დროში. მაგრამ, რადგან ჩვენმა წინაპრებმა ჯვარს აცვეს მწირი (ან (ვილაცის) მწირი შვილი) ქალის ძე, სახელად ქრისტე, ახლა უკვე 300 წელია, რაც უფლის რისხვა სულ უფრო ძლიერდება ჩვენზე; და ჩვენ შევტირით მას დილით თუ ღამით, და ის არ გვცემს პასუხს, არც გვანუგეშებს. ჩვენ კი, მართებული იქნება, თუ შევიმცნებთ, რომ ის არის

ძე ღვთისა, ნაწინასწარმეტყველები სჯულის და წინასწარმეტყველთა მიერ. და მიდი და შეხედე და შეისწავლე შენი სიბრძნით და წმინდა წერილში განსწავლულობით, რომ დაინახო, ყოველივე დაწერილი როგორ აღსრულდა, და რომ ის კაცი ჭეშმარიტად ზეცით იყო მოვლენილი.

იმ დროს მე დიდად ვდარდობდი მრავალი დღის განმავლობაში, და მერე, როცა წმინდა წერილი შევისწავლე, აღმოვაჩინე, რომ დანიელის მიერ მითითებული დრო რომელი ავგუსტუს კეისრის ხანას ემთხვეოდა. და როცა მე ამით ვიყავი დაკავებული, დავინახე წმინდა ნოუნი, და სწორედ მის ბაგეთაგან მოვისმინე და შევიმეცნე ჩვენი წინასწარმეტყველების წიგნებში აღწერილი სიტყვები და მისი იკონომია ზედმიწევნით და მწყობრად, ყველაფერი, დაბადებიდან ვიდრე ზეცად ამაღლებამდე. და მე ვირწმუნე, რომ ის იყო ნამდვილად წარმართთა იმედი და ჩემი ისრაელელი ერის სულიერი ხსნა. და აი, ჩვენ ღირსი გავხდით, მე და ჩემი თესლი, *ნიებაზის*¹⁸² წყლისა, რომელიც ბეთლემშია, რომელსაც დავითი ნატრობდა, მაგრამ ვერ მოიპოვა. და უფალმა დაგვისხომა ჩვენ, რადგან ჩვენი ერი იყო მისი რჩეული და ჩვენ მოგვევლინა მისი მაცხოვრებით; და ჩვენ დავბინავდით უფლის სახლში, რათა გამუდმებით გვედიდებინა უფალი. რადგან წმინდა დავითმა გვაკურთხა ჩვენ; და ღმერთმა ღირსმყო მეხილა კიდეც ახალი სასწაულები და კურთხევა იმ ქალაქში წმინდა ქალწული ნოუნის ხელით.

და ამის გამგონებმა გაიხარეს და უთხრეს აბიათარს: „მოგვიყევი ყოველივე, რაც კი იცი ამის თაობაზე“, და მან მიუგო მათ:

– ჩვენ გვსმენია მამათა ჩვენთაგან, – რაც მათმა მამებმა უამბეს მათ, – რომ მეფე ჰეროდეს დროს მცხეთელ ებრაელებს ამბავი შეუტყვიათ, თითქოს სპარსეთის მეფეები წასულან და დაუპყრიათ იერუსალიმი; და ბოუდების და კოდის მღვდლები, ცლარიელი მწიგნობრები და ქანაანელი მთარგმნელები სასწრაფოდ გაქცეულან აღმოსავლეთით, და მთელი ებრაელობა გლოვობდა. მაგრამ რამდენიმე დღის შემდეგ ხმა მოვიდა უცხოეთიდან, რომ სპარსელები იერუსალიმში საომრად კი არ ჩასულან, არამედ პატივის მისაგებად ქალწულის ძისთვის, რომელიც დავითის თესლისგან შობილა, და მათ ციური ვარსკვლავი მიუძღოდა გზამკვლევად, გონიერი და ბრძენი. ვინც უდაბნოში იპოვეს და განადიდეს როგორც ღმერთი. რადგან იარაღის ნაცვლად მათ მიურთმევიათ ძღვენი, სამეფო ოქრო და საკურნებელი მური და მირონი და საკმევლი ღმერთისთვის შესაწირავი. და როცა ეს ძღვენი მიართვეს ჩვილს, მათ გზა განაგრძეს. და როცა ეს ამბავი ებრაელებმა შეიტყვეს, სიხარულით აღივსნენ. და ოცდაათი წლის შემდეგ იერუსალიმიდან მღვდელ ანასეს დედაჩემის მამისთვის, ელიოზისთვის წერილი გამოუგზავნია, რომ ჩვილმა იესომ, რომელიც მოგვებმა დაასაჩუქრეს, მას შემდეგ, რაც დაკაცდა, საკუთარ თავს უწოდა ძე ღვთისა. მოდით თქვენ, ვისაც შეგიძლიათ, აღვასრულოთ მოსეს სჯული და სიკვდილით დავსაჯოთ ის.

და გაემგავრა მღვდელი ელიოზი, სჯულის კანონში განსწავლული, ელიაზარის ოჯახიდან, ელის გვარტომი. და მისი დედა იმავე გვარტომისა იყო, და მან უთხრა

შვილს: „არ მიიღო მონაწილეობა ებრაელების თათბირში. რადგან ის ჩვენი წინასწარმეტყველების შეტყობინებაა და სჯულის დაფარული აზრი და ცოცხალი ღმერთის სიტყვა“. მასთან ერთად გაემგზავრა კარსნელი ლოუნკიანუსი, და ისინი გაემგზავრნენ და ჯვარცმის დღეს ჩავიდნენ იერუსალიმში. და როდესაც ჯალათმა ჩააჭედა ლურსმნები, მან ილიოსის დედა შეაკრთო, იმ წინასწარმეტყველების გამო, და მან თქვა: „წარმართთა სულის სიმშვიდისთვის ჩამობრძანდა მეფე ისრაელისა, მაცხოვარი ქვეყანისა. და სამგზის, ვაი თქვენ, შემოქმედის მკვლელებო! ოღონდ მოიღე წყალობა ჩვენზე, უფალო ღმერთო ჩვენო“.

და მას შემდეგ, რაც იმ წამს იწამა ქრისტე, განისვენა (ე.ი. გარდაიცვალა).

მაგრამ უკერველი კვართი მცხეთელ ებრაელებს ერგოთ წილისყრით; და ილიოსმა წამოიღო ის და წაიღო სახლში. და მისი და გამოვიდა ძმის შესაგებებლად, და გამოართვა (კვართი) და ეამბორა მას და გულზე მიიღო; და განუტევა სული, რადგან საამისოდ სამი საბაბი ჰქონდა ქრისტესაგან, – ღმერთის სიკვდილი, და დედის სიკვდილი, და მისი ძმის შეთანხმება ებრაელებთან.

და იმ დროს ქართველთა მეფე იყო ადრიკი, და როცა შეიტყო ეს ამბავი, განცვიფრდა; და მაინც, არ მოისურვა თავად ჰქონოდა მკვდრის კვართი. და მათ კვართი კედარის ხის ქვეშ შეინახეს, რომლის ნერგი თავდაპირველად ლიბანიდან ჩამოიტანეს. და აი, ილიოსის სახლი, რომელიც მოგვთა¹⁸³ ხიდის დასავლეთით მდებარეობს.

როდესაც მთელმა ებრაელობამ შეიტყო ეს, შერცხვათ საკუთარი საქციელის და ჩაიფიქრეს მისი ქვით ჩაქოლვა; ვინაიდან განსწავლული იყო სიბრძნით და დამაჯერებლად დაუსაბუთა მათ ძველი აღთქმიდან ქრისტეს ღვათაებრიობა, რომელსაც უნდა აღიდებდნენ მამასთან და სულიწმინდასთან ერთად. და როცა მეფემ შეიტყო ებრაელების მღელვარების ამბავი, მკაცრად მოეპყრა და უბრძანა, არ დაებრკოლებინათ ეს ქადაგება მის მიწაზე. რადგან მან უკვე იცოდა, რა სასწაულები მოხდა სომხეთში და რომში.

თავი X

მაშინ წმინდა ნოუნი, მორწმუნე მოწაფეების დახმარებით, თამამად შეუდგა ქრისტეს რწმენის გავრცელებას სხვადასხვა გზით, რისთვისაც სახეებიან ჯვარს იყენებდა. და მუხლმოყრილს ძილ-ღვიძილში სამჯერ მოევიდნა შავად შეფერილი ფრინველები; ისინი მდინარეზე დაეშვნენ და ამოვიდნენ წყლიდან სრულიად გათეთრებული, შემდეგ ბაღში მიფრინდნენ, და იქაური ყვავილები ამოკენკეს. იქიდან ცოტა გადაარჩიეს და ბაღის პატრონს მისცეს. და ნინომ უამბო ეს სიზმარი აბიათარის ქალიშვილს, და მან კი უთხრა: „ო, ახალმოსულო და მწირო, ეს ჩვენ სიცოცხლის ბაღის მემკვიდრეებად გვაქცევს, შენი ხილვები ჩვენი მამების კეთილი შეტყობინე-

ბებია და ღვთის კაცი იესოს და მისი უმანკო სისხლის ნამოღვაწარია. ოღონდაც, იერუსალიმო, მიდი, გაშალე ფრთები და შეკრიბე ერთად ისინი, ვინც მოიპოვა მცირე ადგილი სამოთხის ბაღში; ვის ირგვლივაც შენ გასურს შეგვეკრიბო ამ წმინდა ქალის ხელით, რომელიც ამ ადგილს ედემის ბაღად აქცევს“.

ამრიგად, წმინდა ნინომ გააძლიერა თვით-უარყოფა და გამუდმებული ლოცვა, და წარმართებს აოცებდა მისი სიმტკიცე.

იმხანად ერთი დედაკაცი დაატარებდა აქეთ-იქით შვილს, რომელსაც უკურნებელი სენი შეჰყროდა, რადგან იმედი ჰქონდა, იპოვიდა ვინმეს, ვინც მის შვილს უწამლებდა და გადაარჩინდა. ხოლო ის თავად უღმერთო ცხოვრებით ცხოვრობდა და გმობდა ქრისტე ღმერთს, და ბევრ ადამიანს დაუშალა ნოუნის ქადაგების მოსმენა. და მაინც, როცა აღარ დარჩა მეტი საშველი, აიყვანა შვილი და წმინდა ნოუნს წინ დაუგდო. და წმინდანმა თქვა: ჩემი კურნების ხელოვნება არის არა ადამიანისგან, არამედ მხოლოდ ჩემი ქრისტესგან, ყოველი ხილული თუ უხილავი არსის შემოქმედისგან. და ნინომ ბავშვი ფარდაზე დააწვინა და პირჯარი გადასწერა და წარმოთქვა: იესო ღმერთო ჩემო, მეუფეო მარადიულო, განკურნე ეს ბავშვი შენი ყოვლისშემძლე ძალის სახელით, რათა წარმართებმა შეიმეცნონ, რომ შენ ხარ სიცოცხლის მომნიჭებელი კაცთა მოდგმისთვის, რომლებიც ტეშმარიტად შენი ქმნილებანი არიან; და მართებთ შენი თაყვანისცემა და პატივისცემა და დიდება, აწ და მარადის, ამინ.

და მას მერე, რაც ეს წარმოთქვა, მან განკურნებული და გამშვენიერებული და სიხარულით სავსე დაუბრუნა შვილი დედას. და დედაკაცმა თქვა: „და არ არის სხვა ღმერთი შენს გარდა, ო, ქრისტე, უფალო და მბრძანებელო სიცოცხლისა და სიკვდილისა“. ქალი გახარებული წავიდა და ყველას გააგებინა ეს ამბავი. შემდეგ ის დაბრუნდა ნოუნისთან და მას აღარ დაშორებია.

იმ დღეებში დედოფალ ნანას უკურნებელი სენი შეეყარა; და ყველამ, ვინც კურნების ხელოვნებაში იყო დაოსტატებული, აღიარა მარცხი და თქვეს: „შეუძლებელია ადამიანმა განკურნოს ეს დაავადება“. და მათ უთხრეს დედოფალს ნოუნის შესახებ და დედოფალმა გაგზავნა ხალხი მის მოსაყვანად. წარგზავნილები მივიდნენ და ნახეს, რომ ნოუნი იალღუნთანში ლოცულობდა ჯვრის წინ. მათ შეატყობინეს დედოფლის დანაბარები. მაგრამ ნოუნმა მიუგო: „დღის ამ დროს ვერ მივატოვებ ჩემს უფალს. თუ ის იწებებს, ის მოვა ჩვენთან“. და როცა დედოფალმა გაიგო ეს, თქვა: „ამიყვანეთ და წამიყვანეთ მასთან“. დედოფალს უამრავი მამაკაცი და დედაკაცი გაჰყვა თან, და მივიდნენ და დააწვინეს დედოფალი ნოუნის ფარდაზე. და ნოუნიმ ხანგრძლივი ლოცვა აღავლინა და დაადო ჯვარი სივრცე ტანზე და დედოფალი უმაღლესად განკურნებული. და წამოდგა ფეხზე და წავიდა სახლში და აღიდებდა ქრისტე ღმერთს, მრავალრიცხოვან მხლებლებთან ერთად. და მას შემდეგ ის ტეშმარიტების მიმდევარი გახდა და შეისწავლა ქრისტეს სჯული წმინდა ნოუნისგან და მღვდელი აბიათარისგან, რომელსაც რწმენის გამო, ასევე უწოდეს პავლე.

მაგრამ მეფე მიჰრანი სრულიად განცვიფრებული იყო და ეკითხებოდა პავლეს, როგორ იქცა ღმერთი ადამიანად და რა იყო ეს სწავლება და რატომ ერქვა ქრისტიანობა. და მღვდელმაც, რამდენადაც უნარი შესწევდა, ყველაფერი აუხსნა წესის და რიგის მიხედვით. და მიჰრანს ჰქონდა წიგნი, რომელშიც აღწერილი იყო ყველაფერი ნებროუთის¹⁸⁴ ტომზე, და ყ/ქალენეს მშენებლობაზე; და მოატანიხა ის წიგნი და როცა წაიკითხა, ამ მონაკვეთს გადააწყდა: –

„როდესაც დაიწყეს ქალაქ *ყ/ქალენეს* მშენებლობა, ზემოდან მოისმა ხმა, რომელმაც თქვა: „მე ვარ მიქაელი (ე.ი. მიხეილი), აღმოსავლეთი მხარეების მმართველი. მიატოვეთ ის, რის აშენებასაც აპირებთ, რადგან ღმერთი დაანგრევს მას. მეტიც, ბოლო ხანებში მოდის ზეციური მეუფე; და ის აღასრულებს იმას, რასაც თქვენ ესწრაფვით. და მათ დაინახეს რომ ის, რაც მოსწონდათ, არ იყო მოსაწონი ერისთვის და მისმა სიყვარულმა გაფანტა ამა სოფლის მოჩვენებითი ხიბლი. რადგან მეფენი უარყოფენ თავიანთ სამეფოებს და შეიყვარებენ სიღატაკეს, და არა იმ დიდებას, რომელსაც შენ ესწრაფვი, ო, ნებროუთ“.

და მეფე დიდ საგონებელში ჩააგდო ამის წაკითხვამ და განცვიფრდა, რომ ყველა წიგნი მოწმობდა ქრისტეს. მაგრამ მას არ შეეძლო ზურგი ექცია წინაპართა კულტისთვის – მზისა და ცეცხლისა და არამამდისა და სხვა კერპებისა, რომელთაც შეჩვეული იყო.

იმხანად მეფის ერთი მოგვი ნათესავი ლოგინად ჩავარდა; და მიჰრანმა უთხრა წმინდა ნოუნის: შენ ხარ არამამდის ასული ანდა ზადენის თესლი, რომელმაც მოგიყვანა აქ როგორც უცხოელი და მოგანიჭა კურნების უნარი, რათა დიდებით შეიმოსოს შენი სახელი. ამიტომ ახლა იღვაწე, რომ განკურნო ეს ჩემი ახლობელი მეგობარი მათი სახელით, და ნუ შეცდები და ნუ ახსენებ იაონეს სჯულს. რადგან, მართალია, სპარსელების ღმერთმა თროუჯანმა ღრუბლით და სეტყვით ამოძირკვა და გააქრო ისინი, მაგრამ ეს ადგილი მაინც მტკიცეა; და ასეთი ომები სოფლის მპყრობელთა ჩვეულებაა. არც ჩვენი მამების ძველი ღმერთები გაიმი და გაციმი შემოგვრჩნენ, ისინი გვიგზავნიან მზის სხივებს და წვიმას, და ყოველივეს, რაც ყანის დასამუშავებლად და ნაყოფის მოსაყვანადაა აუცილებელი.

წმინდანმა კი პასუხად მიუგო: მე ვარ ტყვე ქალი; ქმნილება და თაყვანისმცემელი უხილავი და შეუცნობელი ზეციური მამისა და ძისა და სულიწმინდისა, რომელმაც შექმნა ცა და ქვეყანა. ვინც მისი განუზომელი წყალობით სიცოცხლეს ანიჭებს მის მოძულეებს და პატივისცემას აღძრავს, თუნდაც შენშია. რადგან მან გიბოძა გონება და სიტყვები, რათა შეიმეცნო ზეციური სიმაღლე და ვარსკვლავთა განლაგება და ზღვის სიღრმე და დედამიწა კიდით კიდემდე; და ამ ყოველივეთი შეიცნობ შენ მას, ვინც განაგებს და მართავს მათ. და მე გიცხადებ შენ, რომ განუზომელია (სიტყვასიტყვით: მიუწვდენელი) მისი სიდიადე, რომელიც ზეცას ღრუბლებით მოსავს და ქუხს ქარის ხმასავით და უშველებელი ლევიათანის¹⁸⁵ მეშვეობით აზანზარებს მთელს დედამიწას, ის მაღლით დაეშვა დაბლა და მიიღო ჩვენი ბუნება. მან აღასრულა

ოცდაცამეტი წელი. და უგუნურმა ერმა უარჰყო და ჯვარს აცვა ის, მისივე ნებით და არა იძულებით. და მესამე დღეს აღდგა და ამაღლდა ზეცად. და მან მქადაგებლები გაგზავნა მთელს დედამიწაზე, ვისაც სწამდა მისი სახელი და ღმერთს სცემდნენ თაყვანს და უარი თქვეს ფუჭ კერპებზე. ესაა სახარება, რომელსაც გიქადაგებ შენ, რათა ირწმუნო, და თუკი რაიმეს ვქმნი, ეს მისი სახელით ხდება. და აქ ჩამარხულია მისი სამოსელი; და როგორც ამბობენ, ცხვრის ტყავის მოსასხამი ელიასი, რომელმაც იხილა უფალი, აქ არის. და რათა ცხადად შეიმეცნო რასაც გეუბნები, მომიყვანე მოგვი ხორასანი, ჭეშმარიტების მტერი. და ის უარს იტყვის წარმართობაზე და რწმენით აღიარებს რის თქმასაც შთავაგონებ.

და როცა ის მიუყვანეს ნინოს ბაღში, კედარის ხის ქვეშ, მან ის პირით დასავლეთისკენ⁶⁶ შეაბრუნა და სამჯერ ათქმევინა: მე შენ გგმობ სატანავ. და მერე შეატრიალა აღმოსავლეთით და ათქმევინა: მთელი არსებით შენს წყალობას ვესწრაფვი, წმინდაო სამებაო, და პირს ვიბრუნებ შენკენ, ო, ჯვარცმულო ღმერთო.

და ნოუნი ატირდა და გამოსახა უფლის ჯვარი მასზე. და მაშინ გამოვიდა მისგან ავი სული ვითარცა კვამლი. და კაცი განიწმინდა ეშმაკისგან და ტანჯვისგან, და მან ირწმუნა ქრისტე მთელს თავის ოჯახთან ერთად. და მისი შემხედვარენი აღიდებდნენ მამას და ძეს და სულიწმინდას, აჲ და მარადის და უკუნითი უკუნისამდე, ამინ.

ამის შემდეგ მეფე წავიდა სანადიროდ მუხრანში . . .

(ეპიზოდი, რომელსაც ქვემოთ გთავაზობთ, თითქმის ზუსტად იმეორებს თხრობას 35-ე გვერდზე. მე ტექსტის მხოლოდ უფრო მნიშვნელოვან განსხვავებებს გთავაზობთ და ყოველ გვერდს მივყვები.)

გვ.36. გამოტოვებულია სიტყვები „მოდი ვნახოთ ნანა . . . დაინგრეს“.

იქვე: რადგან „საიდანაც დაინახა“, სომხ. არის „რათა მათ დაენახათ“.

იქვე: „წყვდიადმა მოიცვა“. სომხ. „თავზარი დაეცათ“.

იქვე: „ი//იხილე, მე დაგიძახე . . .“ სომხურში ლოცვა ასეა გადმოცემული:

„იესო ქრისტე, ნოუნის ღმერთო, მიმილე შენს მსახურად და დაიხსენი სული ჩემი ჯოჯოხეთისგან. რადგან ჩემმა ღმერთებმა მე ვერ მიშველეს; და მე მწამს, რომ შენ შეგწევს ძალა და შენია დღე და ღამე. ო, ჯვარცმულო უფალო, შენი ჯვრით მაცოცხლე მე. რადგან მე ვფიქრობ, რომ წყვდიადმა ყველა კი არ მოიცვა, არამედ მხოლოდ ჩვენ, ვისაც ნათლის მოფენის დღიდან დღემდე ისევ წყვდიადი გვიყვარს“.

და როცა მან ეს თქვა, მგემ გამოანათა კაშკაშა ციდან. და მისმა ჯარისკაცებმა იპოვეს ის. და ჩამოქვეითდნენ ცხენებიდან და დაემხნენ პირით მიწაზე და თაყვანი სცეს ჯვარცმულს, და იტყოდნენ: „შენა ხარ ღმერთი“ . . .

გვ.37, 1. 7 გვერდის ბოლოდამ. „ის გაეშურა . . .“. სომხურშია: „ისინი მივიდნენ მასთან (ნინოსთან) და დაეცნენ ძირს და თაყვანი სცეს. მაგრამ მან მაგრად ჩასტიდა ხელი, წამოაყენა და აღმოსავლეთისკენ შეატრიალა“.

გვ.37, ბოლო სტრიქონი. „მეორე დღეს . . .“ სომხურში ასეა:

„შემდეგ წმინდა ნოუნი სწერს წერილს (მათ) წინ ელენეს, რომის დედოფალს, მიჰრანი კი კონსტანტინე დიდს, ამ სიტყვებით: „უფალმა მოიხილა დიდ გასაჭირში ჩავარდნილი უირქის სახლი. ასე რომ, გთხოვ, გამოგვიგზავნო მღვდლები, რომ მოგვანიჭოს სიცოცხლე წყლითა და სულიწმინდით. მაგრამ წმინდა ნოუნის თავად არ შეუწყვეტია ქადაგება თორმეტ დედასთან ერთად, რომლებიც მუდამ თან ახლდნენ“. და ამის შემდეგ მეფემ ჩაიფიქრა ეკლესიის აშენება, მანამ, სანამ მღვდლები მოვიდოდნენ. და გავიდნენ ბაღში და მოჭრეს კედარის ხე და დაამზადეს მისგან ექვსი ძელი და ჩაყარეს საძირკველი და ზეაღმართეს ექვსი ძელი. მაგრამ მეშვიდეს, რომელიც ყველაზე დიდი იყო, ძვრა ვერ უყვეს მზის ჩასვლამდე, მიუხედავად იმისა, რომ მრავლად იყვნენ და მოხერხებულ მანქანებსაც იყენებდნენ. და შემდეგ იქვე დატოვეს და წავიდნენ დიდად გაკვირვებულები. მაგრამ წმინდა ნინო თორმეტ თანმხლებთან ერთად იქვე დარჩა და ცრემლმორეულებმა მთელი ღამე ლოცვაში გაატარეს. და შუალამისას დიდი შიშის ზარი დაეცათ და ატყდა საშინელი ტექა-ქუხილი, თითქოს არმაზის და ზადენის ორი მთა დამსხვრეულიყო, და ორ მდინარეს – კურას და არაგს პირი უკან ებრუნა და ქალაქს და ციხესიმაგრეს დასცემოდა. და ნოუნის ქალები დაფრთხნენ და გაიქცნენ. მაგრამ წმინდანმა უთხრა მათ: შიში ნუ გაქვთ, რადგან ეს მოჩვენებაა და არა სინამდვილე. რადგან მთები მყარად დგანან, და მდინარეებიც თავის კალაპოტში მიედინებიან, და ქალაქის მოსახლეობას მშვიდობიანად სძინავს. ხოლო ურწმუნობა, რომელიც მთასავით დიდი იყო, მართლაც რომ დაიმსხვრა; და მსხვერპლად გაღებული ბავშვების სისხლი იმწამს უკან შემობრუნდა. აი, რას მიგვანიშნებენ ეს მდინარეები. და ეს გოდება ხმაბილწი დემონების ხმებია, რომლებიც გზას ასცდნენ და ახლა დასტირიან საკუთარ აღსასრულს“. და როცა ეს თქვა, მოუხმო ქალებს მოთმინებისკენ, მაგრამ თავად ცრემლად დაიღვარა. და ვიდრე ჯერ მამალსაც არ დაეყვილა, ატყდა ერთი მღელვარება, ხმაური და ყვირილი, თითქოს ქალაქს ძლიერი ლაშქარი დასხმოდა თავს, დაეპყრო და გაენადგურებინა; და თითქოს მბრძანებელი ძლიერი ხმით გასცემდა ბრძანებებს და ამბობდა: „სპარსთა მბრძანებელი ხორა გიბრძანებთ თქვენ, და მეფეთმეფე ხორახოსროა აქ მბრძანებელი. თქვენ, ებრაელებო, გაეცალეთ აქაურობას, მიმოიფანტეთ და არ მოკვდებით. და ისევ (ხმა გაისმა): „მბრძანებელი მიჰრანი მოკლეს“.

მაგრამ კურთხეულმა დედამ გაშალა ხელები და თქვა: გადი გარესკნელის ბნელში. აი, ჯვარცმული, თქვენი მკვლეელი მოსულია. წადით თქვენ ჩრდილოეთის მხარეში. და სწორედ იმწამს ისინი გაუჩინარდნენ. და გამთენიისკენ გამოჩნდა ცეცხლოვანი ჭაბუკი, ხელმიუწვდენელი ნათლით მოსილი, რომელმაც წმინდა ნინას (ასეა) სამი სიტყვა უთხრა. და შემდეგ ის მივიდა სვეტთან და აღმართა მაღლა.

და მავანმა ქალმა, სახელად სიდინამ,¹⁸⁷ დაინახა ეს ყოველივე, რადგან ის ნინაუსთან ერთად იყო გამოსული და უთხრა: რა არის ეს, წმინდაო დედოფალო. მაგრამ მან უპასუხა: მშვიდად იყავი და ილოცე. და აი, მათ იხილეს სვეტი, რომელსაც ნათელი დასთამაშებდა. ნელა დაეშვა ის დაბლა ძირში გადაჭრილი ფესვის ადგილზე.

და გამთენიისას მოვიდა მბრძანებელი და დიდი ბრბო მასთან ერთად; და მათ იხილეს, რომ სვეტი აღმართულიყო ხელშეუხლებლად (უმუშევრად) და მყარად დამდგარიყო თავის ფუძეზე. და ყველამ აღიმალლა ხმა და ადიდეს უფალი.

და იმავე დღეს მრავალი სასწაული მოხდა იმ ადგილზე. რადგან იყო ერთი დაბადებით უსინათლო ებრაელი. ის სვეტთან ახლოს მიიყვანეს და უმაღლე აეხილა თვალი. და მერე ერთი უფლისწულთაგანი, რვა წლის დამბლადაცემული ფამაზასპუნი, მოიყვანა დედამ და დააწვინა სვეტის წინ, ბიჭის ლეიბზე, და შეევედრა ნინაუს გადაერჩინა მისი შვილი. და ნინაუმ გაიწვდინა ხელი სვეტისკენ, შემდეგ ხელი ბავშვს დაადო და თქვა: „იესო ქრისტე, რომელიც ხორცშესხმული მოევლინე სამყაროს გადასარჩენად, უშველე ამ ბავშვს. და ბავშვი იმწამს წამოდგა და ფეხზე დადგა. და უამრავმა ხალხმა, ამის შემსწრემ, ადიდა უფალი; და შიშმა შეიპყრო ყველა. და მეფემ საბურველი დაამბადებინა სვეტისთვის და ეკლესია აღაშენეს უფლის სადიდებლად.

თავი XI

მაგრამ იმპერატორი კონსტანტინე, რომელმაც დაინახა მიჰრანის ელჩები, გაახარა უირქთა ქრისტეს რჯულზე მოქცევამ, და უფრო იმან, რომ ირწმუნა მათი სპარსეთთან მეგობრული კავშირის სამუდამო გაწყვეტა. ამასვე გრძნობდა დედოფალი ელენეც. მათ ადიდეს უფალი და გაგზავნეს ეპისკოპოსი სახელად იოანე, ორი მღვდელი და სამი დიაკვანი და გაატანეს ჯვარი და მაცხოვრის ხატი. და წამოვიდნენ და განანათლეს ნათლობით მეფე და მისი მეუღლე და შვილები და გამოჩენილი ხალხი ადგილზე, რომელსაც *მოხბთა* ეწოდება და იმ ადგილს უწოდეს მთავართა ნათლისმცემელი. და ყველა უირქი მოინათლა გარდა მთივოულისა¹⁸⁸ და კოუკაზისა და მცხეთელი ებრაელებისა; მაგრამ ბარაბელთაგან ორმოცდაათი კაცი მოინათლა. და მეფემ შეიყვარა ისინი და აჩუქა მათ დიდციხე. მაგრამ ფეროზმა, რომელსაც სახლი ჰქონდა რანაში, შორს, ფართავში, და რომელიც მიჰრანის სიძე იყო, არ შეისმინა სიცოცხლის სიტყვა. და მიჰრანმა გაგზავნა ეპისკოპოსი იოანე (ჰოვანეს) და დიდკაცობა მეფე კონსტანტინესთან და მოითხოვა ბევრი მღვდელი და უფლის ჯვრის ნაწილი და ქვისმთლელები, რათა ეკლესიები აეშენებინათ მის სახელზე. და მან გამოგზავნა ყველაფერი, და უფლის სატერფალი და ხელის ღურსმნები, და აგრეთვე ავეჯი და საუნჯე სახარჯოდ, რათა მის სახელზე აეშენებინათ ეკლესია ქართლის მიწაზე.

და ეპისკოპოსი მივიდა ოუშეთის მიწაზე და ჩაყარა ეკლესიის საძირკველი და იქ მოათავსა ღურსმნები და დატოვა მშენებლები და საუნჯე. და შემდეგ წავიდნენ მანგლისისკენ და ჩაყარეს ეკლესიის საძირკველი და იქ მოათავსეს წმინდა სატერფალი. და მეფემ გაიგო და შეწუხდა, რომ წმინდა ნაწილები სხვაგან დარჩა და არა სამეფო ქალაქში და რომ დესპანები უწინარესად იქ არ ჩავიდნენ. მაგრამ

წმინდა ნინაუმ უთხრა: „საწყენად არ მიიღოთ, ო, მეფეო, რადგან სადაც არ მივა, იქ დაითესება უფლის სახელი. და აქ ხომ ინახება უფლის უდიდესი სიწმინდის სახსოვარი, მისი წმინდა კვართი“. და მეფემ შეიტყო აბიათარისგან სრული აღწერა კვართისა და ადიდა იესოს სახელი და თქვა: „კურთხეულია უფალი ღმერთი, რომელმაც დაიხსნა ის მისი მოძულე ებრაელი მტრებისგან და წყალობა მოიღო და ჩვენ გვიბოძა ასე შორს მყოფთ მისგან.“

და მაშინ, ეპისკოპოსის ჩამოსვლისთანავე, ქვისმთლელები ეკლესიის მშენებლობას შეუდგნენ ქალაქგარეთ, იქ, სადაც ახლა ეპისკოპოსის სახლი დგას. და წმინდა ნინაუმ შემდეგი სიტყვები წარმოთქვა სამუშაოს დაწყებისთანავე:

„დიდების გამავრცელებლო იესო, ძეო ღვთისაო; შენ შენი სისრულით და ძალით მოევლინე დავითის ერს. და მხოლოდშობილი დედისგან იშვი მხოლოდშობილი ღმერთი, ნათელი ყოველთა, ხატი მამისა, რომელმაც საჭიროებისამებრ მიიღე ნათლობა წყლითა და სულიწმინდით, ჯვარს ეცვი და დაიმარხე მიწაში, და აღსდექი მესამე დღეს, ამაღლდი ზეცად, და მოხვედი ცოცხალთა და მკვდართა განსაკითხავად. შენა ხარ ფარი და ბურჯი ყოველთა, ვინც შენ გესაგვს; და შენია დიდება აწ და მარადის, ამინ“.

და სწორედ იმ დროს ეპისკოპოსს უამბეს, რომ კოხტა მთის ძირას იზრდება ერთი მშვენიერი და სურნელოვანი ხე; და იმ ხესთან იკურნებიან ნადირობისას დაჭრილი ნუკრები, როცა ხეს ფოთლებს ან ნაყოფს აწიწნიან და ჭამენ. და უთხრა მათ ეპისკოპოსმა: ჭეშმარიტად, ამ მიწა-წყალზე უფალმა უფრო ადრე იზრუნა, ვიდრე ერი შეიცნობდა მას. და ეპირკოპოსმა წაიყვანა რევი, მეფის ვაჟი და მივიდა და მოჭრა ის ხე, მთლიანად, ტოტებიანად, და მიიტანა ის ქალაქში, 25 მარტს, პარასკევ დღეს. და მთელი ხე შემოსილი იყო ხშირი ფოთლებით. და ხე ეკლესიის კარზე მიაყუდეს, და ოცდამეჩვიდმეტე დღესაც კი, ხე არ დამტკნარა, თითქოს საკუთარ ფესვებზე მდგარიყოს. და პირველ მაისს სამი ჯვარი გამოკვეთეს. ერთი აღმართეს. და მთელი ერის დასანახავად, ზეციდან ჩამობრძანდა მანათობელი ჯვარი, ვარსკვლავთა გვირგვინით შემკული, და ასე ამშვენიერებდა ხეს, სანამ არ ირიჟრაჟა. და შემდეგ, ორი ვარსკვლავი გამოჩნდა, ერთი აღმოსავლეთით გაფრინდა, მეორე – დასავლეთით. და წმინდა ნინაუმ თქვა, წადით იმ მაღალმთიან ადგილებში და მოიძიეთ, ვარსკვლავები სად მივიდნენო. და მართლაც, წავიდნენ და ნახეს, რომ ერთი ვარსკვლავი თხოთის მთის თავს დაჰნათოდა, რომელიც კასპის სიახლოვესაა, მეორე კი კახეთის მიწაზე წასულიყო, დაბაში. და წაიღეს ორი ჯვარი და დააყენეს იმ ადგილებში, რომლებზეც უფალმა სხვადასხვა მხარეს გამსხლტარი ვარსკვლავებით მიაწინა. მაგრამ მთავარი ჯვარი კლდეზე დააყენეს, რომელიც ქალაქის გაღმაა. და დააწესეს დიდი ზადიკის დღე ჯვრის დღესასწაულად ქართლის ყოველი ოჯახისთვის, რვა დღის განმავლობაში. და ამ დღეების მერეც, ჯვარი ისევ ბრდღვიალებდა ნათლით და ნაპერწკლები სცვიოდა კვირის მეოთხე დღეს, და ედგა თავზე თორმეტი ვარსკვლავის გვირგვინი. და ამ სასწაულების დამნახავმა ყველა წარმართმა პირი

უფლისკენ იბრუნა და მოინათლა; და რწმენაში განმტკიცებულებმა ადიდეს უფალი წმინდა ჯვრის თაყვანისცემით. რადგან როგორც მთის ლაღი ბუდეში, ისე ლივლი-ვებდნენ და დასტრიალებდნენ ჯვარს თავზე ღვთიური ანგელოსები.

იმ დროს, რევის ვაჟი . . . (სომხურ ტექსტში აქ ყველაფერი ემთხვევა ქართულს, როგორც ზემოთ ვთარგმნეთ, შემდეგი გამონაკლისების გარდა):

გვ.30 „აღმართეს ჩარდახი“. „აღმართეს მარმარილოს ჩარდახი“.

გვ.50 „და ამის შედეგად . . . ქრისტეს ჯვარი“. გამოტოვებულია.

გვ.51. „და მან უშველა . . . აწ და მარადის“. გამოტოვებულია.

იქვე: „იმ დროს . . . იმ დღეებში“, & ა.შ.] სომხურ თარგმანში ასეა:

„იმ დღეებში იმპერატორმა კონსტანტინემ გამოგზავნა დიაკვანი, რომელმაც მოიტანა წერილი ბრანჯის ტომისგან, ვინც მამამისმა განანათლა. რადგან გაეგოთ, რომ სომეხთა და უირქთა შორის მართალთა მზის სხივმა ელვარე ბრწყინვალეობით გამოანათა, და რომ უფლის ყოვლისშემძლე ღვაწლი გაცხადდა ერში . . .“

გვ.52. „ნინომ მიუგო, & . . .“ სომხურში კი ასეა:

„მაგრამ წმინდა ნოუნიმ შეაყოვნა ისინი და უთხრა: „უფალი მოგვევლინა არა ხმლით და მშვილდით, არამედ ჯვრით და სახარებით“. და ეპისკოპოსი და ნინაუ წავიდნენ და მეფეც გაჰყვა თან, წრბინში, ჭართალში. თხელაში, წილკანში, გორამალ-რში. მაგრამ იქაურებმა არ მიიღეს უფლის სიტყვა. და ისინი ჩავიდნენ ჯალეთში და ერწოითში და იქ იქადაგეს. და მათ შეისმინეს და მოინათლნენ. და ფხაწიქებმა მიატო-ვეს მათი მიწა და წავიდნენ თოშეთში. და ბევრი მთიული დღემდე კერბთაყვანისმცემ-ლად რჩება. და წმინდა ნინაუ წავიდა რანას მხარეში ფეროზისთვის საქადაგებლად და დიდი გაჭირვება გადაიტანა კოუხეთში ფეხით ლაშქრობისას და ავად გახდა. და რევი, მეფის ვაჟი, და სალომე, მისი მეუღლე, რომლებიც უჯრამაში იყვნენ, მის სანახა-ვად ჩავიდნენ. და მეფემ გაიგო ეს და ეპისკოპოსი გაგზავნა ნინაუს მცხეთაში ჩამოსაყ-ვანად, მაგრამ ნინო არ გაჰყვა მას. მაშინ მეფე და მისი ცოლი და ფელოუჯავრ სიუნეცი და მრევლის რამდენიმე წევრი ჩავიდნენ მასთან, მიუსხდნენ გვერდით და ატირდნენ.

მაგრამ ნინომ ზეცად აღაპყრო მტკიცე მზერა, სიხარულით აღსავსე. მაშინ დედო-ფალმა უთხრა მას: „წმინდაო დედაო, როგორც შენგან გვსმენია, ძე ღვთისას მრავალი წინასწარმეტყველი ჰყავდა, და აგრეთვე, თორმეტი მოციქული და სამოცდა-თორმეტი მოწაფე, და მათგან არც ერთი არ გამოუგზავნია ჩვენთან, შენ ერთადერ-თი ხარ, წმინდა დედოფალო. მაშ, ახლა გაგვიზიარე შენი დაბადების და აღზრდის ამბავი [ჩვენ]“. და წმინდანმა მოუგო მათ:

„რაკი გსურთ იცოდეთ ქრისტეს მხევლის ტანჯვის ამბავი, ქრისტესი, რომელიც თავისთან და დედაჩემთან მიხმობს მარადიულობაში; და მე კი მოკლედ ვუამბე სა-ლომეს, სომხეთის მეფის ასულს ჩემი აქ ჩამოსვლის ამბავი: მაშ, მოატანინეთ ქალაღ-დი და მელანი¹⁸⁹ და ჩაიწერეთ უშუალოდ სალომეს პირით მონათხრობი. დანარჩენი კი თქვენ თავად იცით, რადგან თავად გაიგონეთ და იხილეთ ყველაფერი. და დაე,

ღვთიური მშვიდობა დასადგურდეს თქვენთან. და მე მოგანდობთ მღვდელ იაკობს, რომელიც იოანეს შემდეგ ეპისკოპოსი უნდა გახდეს სულიწმინდის მოწოდებით“.

ამის შემდეგ მან ეპისკოპოს იოანეს შეაწირინა მსხვერპლი და წმინდა ზიარება მიიღო. და მას მერე, რაც თავი მიანდო ღვთიურ მეუფეს, აღესრულა ქრისტეში. და ის დაკრძალეს იმავე ადგილზე უფლის ამაღლებიდან 332-ე წელს, და სამოთხის ბაღიდან ადამის გამოსვლის დღიდან 5832-ე წელს, ქართლში შესვლიდან მე-15 წელს.

ამასობაში, იმპერატორმა კონსტანტინემ წერილი მისწერა მიჰრანს და გაათავისუფლა მისი ვაჟი ბაჰქარი, რომელიც მძევლად ჰყავდა აყვანილი. და თქვა:

„მე, კონსტანტინე ავტოკრატი, იესო ქრისტეს ახალი მსახური, მის მიერ განთავისუფლებული სატანის ტყვეობიდან, გიგზავნი შენ, უირქთა მეფეს შენს ვაჟს. რადგან ამიერიდან ჩვენი უფალი იქნება ჩვენ შორის თავდები იმისა, რომ შენ ერთგული და მორჩილი იქნები ჩვენი. და მან გააძევა ავი ხრიკების მქმნელი *ეშმა* შენი გზებიდან“.

ასე რომ, მიჰრანმა დიდად გაიხარა და ნანასთან, თავისი შვილის დედასთან და მთელ ქვეყანასთან ერთად, დიდება უძღვნა ღმერთს.

ამის შემდეგ მან დაასრულა საეპისკოპოსო ეკლესიის მშენებლობა და მოაჩუქურთმა და მოკაზმა ის. და იმ დღეებში გარდაიცვალა მისი ვაჟი, რევი, რომელსაც ოცდაათოთხმეტი წელი შეუსრულდა. და იმავე წელს მეფე მირიანი ავად გახდა; და მოუხმო თავის ვაჟს, და სამეფო გვირგვინი ჯერ ჯვარზე დადო, შემდეგ კი აიღო და თავის ვაჟს დაადგა თავზე, და დაუბარა, ყოფილიყო ღვთისმოსავი და დაეცვა რელიგიური სჯულის კანონი. და თავის ცოლს კი უთხრა: შენ კი წადი და დაბინავდი წმინდა ნოუნის აკლდამაში და იცხოვრე იქ. და აღაშენე ეკლესია და პატივი მიაგე იმ ადგილს, და დაურიგე ჩვენი საუნჯე ღარიბებს, და უწილადე ნახევარი. და ხედავ, მივდივარ იქ, საიდანაც მოვედი. და ვმადლობ უფალს, რომელმაც სიბნელე სინათლედ მიქცია და სიკვდილი სიცოცხლედ და მარცხენა მარჯვენად. და არ დაიბარო და მოშურნეობით გაანადგურე დარჩენილი კერპები. და ყოვლისშემძლე უფალი გფარავდეს. და ეს თქვა თუ არა, მიიძინა. და მიჰრანის გარდაცვალებიდან სამი წლის შემდეგ დედოფალმა ნანამ განსასვენებელი ჰპოვა უფლის წიაღში.

მთარგმნელი ლელა დუმბაძე,
რედაქტორი ელზა ნაბახტველი.

სტატია ითარგმნა შემდეგი გამოცემის მიხედვით:
Marjory Wardrop and J. O. Wardrop, Life of St. Nino, Studia Biblica et Ecclesiastica, Essays, Chiffly in Biblical and Patristic Criticism by members of the University of Oxford, Volume V, Part I. Oxford, At the Clarendon Press, M DCCCC, 1900

რუფინუსის ტექსტი (pp: 225-226) ლათინურიდან თარგმნა იამზე გაგუამ.

**შენიშვნები ძირითადად მარჯორი უორდროპისაა.
ქართული მთარგმნელის შენიშვნებს მიჰყვითებით: (ლ.დ.)**

1. მისი მამა, ტვერელი მღვდელი პავლე საბინინი იყო, დედა – ქართველი, ეკატერინე მირზაშვილი. (ლ.დ.)
2. ფლავიუს რუფინუსი (335–395) აღმ. რომის იმპერიის კონსული; თეოდოსი დიდის პრეტორიანული პრეფექტი კონსტანტინეპოლში. (ლ.დ.)
3. წმინდა ეფრემ მცირე (მეთერთმეტე საუკუნე) – ქართველი საეკლესიო მოღვაწე, მწერალი, მთარგმნელი, ფილოლოგი, ფილოსოფოსი. (ლ.დ.)
4. გავლენიანი თეოლოგი, ბიბლიის კომენტატორი და კიროსის ქრისტიანი ეპისკოპოსი (423–457). (ლ.დ.)
5. *cilici* – (ლათინური *‘cilicium’* –იდან) ძაძუ; (უხეში ძუხარევი ჯვალა) (ლ.დ.)
6. როგორც ძველი ქრონიკები გვამცნობენ, წმინდა ნინო იყო წმინდა დიდმოწამე გიორგის ბიძაშვილი.
7. ა.ვ. ეს სახელი გამოტოვებულია
8. ა.ვ. „კოლასტრა“
9. „დევეტალარი“, დედოფალ მარიამის ხელნაწერში „დევხალარი“
10. სარა ნიამფორი – ა.ვ. „მიაფორი“. სარა
11. „ბრანჯი“. – ფრანგი (ფრანკები). Cf. Lebeau, *Hist. du Bas-Empire*, i. 42–3.
12. ა.ვ. „ფიხალანი“. სხვა ვარიანტებში „პიტალანი“
13. ა.ვ. „მან უთხრა მეფეს და პატრიარქს“.
14. ერისთავი (ლიტ. ხალხის თავკაცი), პროვინციის გამგებელი
15. ასეა საბინინთან, თუმცა შეიძლება იყოს „და“. (კავშირი) ზაკაი, როგორც ა.ვ.–ში.
16. თმონიგონი – ა.ვ.–ში სახელები ასეა მოცემული: ხოლამაი, ხოზაბაი ზლადრაი, ზენეშაგი, თიმგარაგი, ზაკაი, გზაი ზარგაი, ზარდაი, ზარმაი და სამეფო სისხლის თმონიგონი. მთლიანობაში მოცემულია ეს თერთმეტი სახელი, მაგრამ ძნელი გადასაწყვეტია, მათგან რომელია ორმაგი სახელი. დედოფალი მარიამის ხელნაწერში ამ სირთულეს თავი იმით გაართვეს, რომ გამოტოვებულია ზარმაი. ეს ხელნაწერი ინახება წმინდა იოანე ნათლისმცემლის მონასტერში, ყარაყაზის სტეპში. ეთანხმება ავტორისეულ ვერსიას. „ქართლის ცხოვრებაში“. ეი ეს ნუსხა ასეა მოცემული: ხოზამოი, ხოზაი, გაახლაჯაი (ვარ. გადაჯაი), ხონეშაგი, ხინგირაგი (ვარ. ხინდირაგი), ზაკაი, ზაგაი, ზარდაი, ზამრაი, თმონი.
17. დედოფალ მარიამის ხელნაწერში და ნათლისმცემლის ხელნაწერში არ წერია „ჯრმასა“. წინა ვარიანტში იკითხება *ჯრმადღრმასა*, და ეს უკანასკნელი *ჯადმარსა* (? გეოგრაფიული სახელები, მდინარეთა სახელები).
18. ა.ვ. ზაბულონი
19. ა.ვ. დასძენს: „ისინი წავიდნენ მის საკუთარ ქალაქ კოლასაში“. (ვარ. კოლასტრაში).
20. **ნინო** უბრალოდ არის უბრალოდ *ნონა*, ანუ მონაზონი ქალი.
21. ა.ვ. დასძენს „დღედაღამ დაუძინებლად“.
22. სტრატეიტი
23. ა.ვ. *კვართი*, იგივე *ქიტონი*, *ტუნიკი* ან *პერანგი*
24. ეს მონაცემი არ ჩანს „ქართლის ცხოვრებაში“, არც რომელიმე სხვა ვარიანტში, გარდა ა.ვ.
25. ა.ვ. „ეს არის მთიანი მიწა სომხითის ჩრდილოეთით, რომელსაც ბერძნები და უიკები მართავენ“.
26. *უიკები* ან უსებუ, ახლა *ოსები*, ოსეთები. Cf. *Const. Prphyr. de adm. Imp.*
27. ა.ვ. „მან ჯვარი მომცა“
28. ა.ვ. *ვადაგი მეფეთა*
29. ა.ვ. გამოტოვებულია „და მისი დედობილი გაიანე“.
30. ა.ვ. „ორმოცი“.
31. ა.ვ. „სახლი“.
32. ა.ვ. არ ახსენებს რიფსიმეს ლეგენდას ამ ადგილიდან „იმ დღეებში იმპერატორი...“. ქვემოთ იმ შემთხვევაში

- დე, როცა ნინოს მალავენ ეკალბარდებში (გვ.15), სადაც ტექსტი ასე გრძელდება: „და მე დამტოვეს ეკალბარდში“. ა.ვ. ჩაანაცვლებს შემდეგი მონაკვეთით: „მაშინ უფალმ“. გადმოხედა საბერძნეთს და მეფე კონსტანტინეს, რადგან მორწმუნე გახდა; და მან მიიღო ქრისტეს აღმსარებლობა, ის და დედამისი და მთელი მისი სამეფო კარი, იმ წელიწადის დასაწყისიდან (ა.ვ.) 5444, ქრისტეს აღდგომიდან. 311 (ეს თარიღი არც ერთ სხვა ვარიანტში არ გვხვდება), და მთელმა საბერძნეთმა მიიღო ქრისტიანობა. მეშვიდე წელს გაიმართა ნიკეაში წმინდა კრება, და მერვე წელიწადს ჩვენი გაქცევა საბერძნეთიდან – დედოფალი რიფსიმე, მისი დედობილი გაიანე და ორმოცდაათი სული, ჩვენ გზას დავადექით პირველი თვის მე-13 დღეს. და შევედით სომხეთის (სომხეთი) საზღვრებში მეფე თ’რდატის ბაღში; იქ ისინი დახოცეს პირველი თვის 30-ე დღეს, პარასკევს“. (ეს თარიღი არც ერთ სხვა ვარიანტში არ გვხვდება).
33. ა.ვ. „დიაკონი“
 34. იობი, გულისწყრომამან ვეშაბთამან გამოწოვენ; მოკალნი გიენამან გუელისამან.
 35. ა.ვ. დასძენს: „საშუალებით//მეშვეობით“.
 36. მაშინ თავის მოწაფეებს უთხრა: „სამკალი ბევრია, მუშაკნი კი – ცოტა“. (ლ.დ.)
 37. ა.ვ. გამოტოვებულია „ულოფორეთი, სადაც მე გამოვიგზამთრე დიდ შეჭირვებაში; „ქართლის ცხოვრება“, „ორბანთი“. დედოფალი მარიამის ხელნაწერი: „ურბნითი“. ნათლისმცემლის ხელნაწერი: „ორბნითი“. შიომღვიმის ხელნაწერი: „ურბნისა“.
 38. ა.ვ. გამოტოვებულია „მარტიდან ივნისამდე“, და მთელი მონაკვეთი დაწყებული „სადაც იყო დიდი მდინარე“. სიტყვებამდე „მერე ის გაუდგა გზას და გავიდა მეორე მხარეს“. (გვ.18). ეს მონაკვეთი ჩართულია ნათლისმცემლის და შიომღვიმის ხელნაწერებიდან. სიტყვა „კავახეთის“. შემდეგ ა.ვ.-ში ჩართულია: „რომ მე შესაძლოა მესწავლა სად იყო მცხეთა“.
 39. სიტყვასიტყვით: „ღმერთი ღმერთობენ და მეფენ მეფობენ“, „*the gods act as gods, the kings as kings.*“
 40. „თმა თმოსანი“.
 41. შიომღვიმის ხელნაწერში გამოტოვებულია.
 42. მათე, 26:13 „ჭეშმარიტად გუჟნებით თქვენ: სადაც კი იქადაგებენ ამ სახარებას მთელ ქვეყნიერებაზე, იტყვიან, რაც ამან (იგულისხმება მენელსახებლე ქალი. ლ. დ.) გააკეთა, მისავე მოსაგონებლად“. „*Wherever they preach this gospel, there shall they speak of this woman.*“ Matt. XXVI:13.
 43. „28. არა არს ჰურიანება, არცა წარმართება; არა არს მონება, არცა ზნაურება; არა არს რჩევა მამაკაცისა, არცა დედაკაცისა, რამეთუ თქვენ ყოველნი ერთ ხართ ქრისტე იესუს მხრე“. გალატელთა მიმართ, 3:28.
 44. აქედან ისევ ავტორისეული ვერსია იწყება.
 45. „ქართლის ცხოვრება“, „უბანსა სურიათასა“, ებრაელთა უბანში; დედოფალ მარიამის ხელნაწერში: „ბაგინსა რომაელთასა“, რომაელთა უბანში.
 46. პომპეუსის ხიდი, აგებული 65 წ. ქრისტემდე. თანამედროვე ხიდი იმავე ადგილზეა.
 47. *gatz* ქართულად ნიშნავს „კაცს“.
 48. ა.ვ. „გა“.
 49. ქართული სიტყვა „ჩრდილოეთი“. და ინგლისური „*shadow*“. ჩრდილი პრაქტიკულად ერთსა და იმავეს ნიშნავს. ასე შეიძლება წარმოიქმნას სიტყვის თამაში. (მ.უ.)
 50. „ქართლის ცხოვრება“. „დარგველ, ზეველ, ბარკადულ“. ა.ვ. „დგველ, ზეველ, ნარკადოველ“. შიომღვიმის და ნათლისმცემლის: „დარბეველ, ზეველ, ბარკადულ“.
 51. ა.ვ. „ლიტრის“. – ერთი გირვანქა ან ცხრა გირვანქა (წონის ერთ.)
 52. ა.ვ.-ში ერთი გვერდი აკლია, ამ სიტყვებამდე: „რადგან აღმოსავლეთით დაიწყო უფლის გამონათება“. (მომდევნო აბზაცის ბოლო). ნაკლები ნაწყვეტი გვხვდება შიომღვიმის და ნათლისმცემლის ხელნაწერებში.
 53. ა.ვ. კვლავ ასე იწყებს: „და მეფემ თქვა, ცრემლმორეულმა: „*Hehe rait’hmeboi khoja’t st’haanub rasul p’hsar zad,*“, რაც თარგმანში ნიშნავს: „შენ სიმართლეს ამბობ, ბედნიერო დედოფალო და ძე ღვთისას მოციქულო“. – „იმ მრისხანების ხანაში“. &c. პროფესორი მარგოლიუთი ხაზგასმით აღნიშნავს, რომ ხელნაწერში დამატებული სიტყვები, რომლებიც ასე იწყება: *Hehe*. . . გვიანდელი სპარსულის ტრანსლიტერაცია და სავარაუდოდ შეესაბამება შემდეგს: „აჰ, აჰ, სიმართლეს ბრძანებ, ბედნიერო დედაც და ძე ღვთისას მოციქულო“.
 54. პარმონიკა, მეფე ბართომის გაშენებული. სტრაბონი, XI. 3. 5; პლინიუსი, „ბუნების ისტორია“.

55. ეს ის ხეა, რომლის ქვეშაც მეფე ბართომი იჯდა ხოლმე და ისვენებდა ძალების მოსაკრებად“. საქართველოს სამოთხე, გვ.74.
56. ა.ვ. „ევმანუელე თავად გამოგვეცხადა თაბორზე მამის ხატად.
57. შდრ. რუფინუსს. ა.ვ.-ში გამოტოვებულია წარმომავლობა და ტყვეობა.
58. ა.ვ.-ში გამოტოვებულია ეს თავი, და ჩანაცვლებულია ნინოს სიზმრით ჩიტებზე (გვ.29)
59. ა.ვ.-ში ეს თავი წინ უსწრებს სვეტი ცხოველის მიერ განხორციელებული სასწაულის ამბავს. (გვ.41).
60. ა.ვ. წერილები მოვიდა რომიდან და ეგვიპტიდან, და ებრაელი მღვდლებისგან და იუდეველი მწიგნობრებისგან.
61. ა.ვ. „ვინც გვეუბნება: „ის, ვინც თავის თავს ღმერთად მოიხსენიებს დედამიწაზე, ხემა უნდა ჩამოახრჩონ“.
62. ა.ვ. დასძენს; „და ელიოზის სახლი იყო ქალაქის დასავლეთით, მოგვეთის (ჯადოქრების) ალაყაფთან, მდინარე კურაზე; და იქ იყო მათი პატარა სასაფლაო, რომლის თავზეც წმ. ნინომ აღმართა ქრისტეს ჯვარი, და მღვდელმა იაკობმა და მთავარდიაკანმა პროზილამ მონათლეს დიდგვაროვნები საითათაოდ. და მათ იმ ადგილს უწოდეს „მთავართა ნათლობის ადგილი“, და ის ადგილი ყველასთვის კარგად იყო ცნობილი ჩვენ დროს, რადგან ის იდგა დაბლობზე, სადაც არ იყო სხვა შენობები.
63. „იმ დროს მცხეთელი ებრაელები სიძულვილით აღივსნენ ჩემს მიმართ; და მათ მოგლიჯეს ხისებრი გვიმრა, (?) (cilamo) რომელიც საკურთხეველს კართან იდგა და იქაურობას ამშვენებდა, რადგან მისი ტოტები შენობის წინა კედელს შემოხვეოდა. „და იწყეს იქ სიარული, ბარაბელების ოჯახობის გარდა, რომელთაგან ორმოცდაათი სული მოინათლა, და ისინი გახდნენ მცხეთის მცხოვრებლები, და მირიანმა აჩუქა მათ სოფელი სახელად *ციხე დიდი*. მეფე მათ პატივს სცემდა და ყველანი ქრისტიანები იყვნენ, კურთხეული ნინოს მადლითა და წინამძღოლობით.“ (ბარაბელები მოხსენიებული არიან „კაბარაიანებად“. 43-ე გვერდზე.) ა.ვ.-ში ამ თავს ეწოდება: „თავი VII, ჩაწერილი სიღონიას, მღვდელი აბითარის ებრაელი ქალიშვილის მიერ“. ის ასე იწყება: „და მოხდა ისე, რომ უფალმა მოწყალებით მოხედა კავკასიელების ამ მივიწყებულ ჩრდილოეთის ქვეყანას, სომხეთის მთის მცხოვრებლებს, მთისა, რომელსაც ნისლი და დაბლობს კი ცოდვის და უმეცრების ოხშივარი ადგა თავს. და თავს მომდგარ ჩრდილში ვერ აღწევდა ძე ღვთისას ჭეშმარიტების მზე და განათლება და ღვთიური სამართალი; სინამდვილეში მას ეწოდება ჩრდილის ქვეყანა (შდრ. შენიშვნა I, გვ. 20) ...ქრისტეს შობამდე გასული იყო 5100 წელი; მისი შობიდან მის ჯვარცმამდე 33 წელი; ჯვარცმიდან საბრძანეთის მეფე კონსტანტინეს მოქცევამდე 311 წელი; თოთხმეტი წლის შემდეგ კი დედოფალი ნინო მივლინებულ იქნა ამ ჭეშმარიტი სიტყვის საქადაგებლად ამ ჩრდილოვან მთებში, და გათენდა, და შემდეგ გამოანათა დღის დიადმა მზრქანებელმა. ასეთი იყო ჩვენი ისტორია, ო, ქართველებო. რადგან ნათლისკენ ზურგი გვქონდა შექცეული და წყვდიადის მემკვიდრენი ვიყავით. ჩვენ გვიხაროდა და ვკრებდით საუნჯეს, მაგრამ როცა ვგლოვობდით, არ გვყავდა მანუგეშებელი; ჩვენ ვემსახურებოდით შექმნილ კერპებს და არა შემოქმედს. ჩვენი მამები (ე.ი. ებრაელები) ეთაყვანებოდნენ გებალს და გარიზინს, ქერუბიმზე დაბრძანებულებს, და გვერდით არ გვყავდა ღმერთი, არც მოსე, არც მათი ნიშანწყალი, მხოლოდ კერპები და უსულო ქვა. და ქართლის ამ ქვეყანაში იყო ორი მთა, და მათზე იდგა ორი კერპი, არმაზი და ზადენი, რომლებიც ყარდნენ ათასი ახალშობილი ჩვილის ავადმყოფური სუნით, ვისაც მშობლები მსხვერპლად სწირავდნენ დღემდე. და იყო კიდევ სხვა სამეფო კერპები, გაცი და გა, და მათ მსხვერპლად უფლისწულს სწირავდნენ, რომელსაც ციციხეში წვავდნენ და ფერფლს თავზე აყრიდნენ კერპებს“.
64. ა.ვ. რომ თორმეტი მეფე ჩავიდა ქვეყნის დასაპყრობად.
65. ტექსტში ნახსენები ებრაელთა დასახლებები, როგორც ჩანს, ასეთი იყო: ბოდი, ბუდი ან ბოდზე კახეთში, სიღნაღის მახლობლად, წმ. ნინოს გარდაცვალებისა და დაკრძალვის ადგილი; დედათა მონასტერი დღესაც არსებობს იქ. კოდის წყარო, ქართლში, პატარა ნაკადულია, რომელიც კუმისის მლაშე ტბაში ჩაედინება, მტკვართან ახლოს, თბილისის ქვემოთ. სოფელი კოდა ამ წყაროზეა გაშენებული. ხობი (ა.ვ.-ში სობი, მაგრამ ? კორექტურული შეცდომა) – ხობა არის პატარა ქალაქი სამცხეში, ქალაქთან და ძველი თმოგვის ციხის მახლობლად, ახალციხის რაიონი.
66. ა.ვ. „სურსათი“
67. ა.ვ. „ყვითელი“.
68. „მეფეებს ტვირთი თავად მიჰქონდათ“.
69. ა.ვ. „გადაკვეთეს მთები და“.

70. ა.ვ. „ახლა ნუ გეშინიათ, ო ებრაელებო; მე, ჰეროდე, ვეძებდი და ვერ ვიპოვე ის ჩვილი, ვერც მისი დედა. მაგრამ ახლა აღვმართე ხმალი ნებისმიერი ორი წლის და ნაკლების ასაკის ბავშვის წინააღმდეგ, და გავა-
ნადგურე ისიც მათთან ერთად“.
71. ა.ვ. „ანა“
72. ა.ვ. „მამის მამა ოზიას“.
73. ა.ვ. „და ჩავიდა ზაქარიას შვილთან, იოანესთან ერთად მდინარე იორდანთან. იქ მივიდა იერუსალიმის მთელი მოსახლეობა და მათთან ერთად იყო შენი მამის დედის ძმა ელიოს (?ვთოს). და დაინახეს ელვა ცაზე, და მიწა იძრა და მთები შეზანზარდა, და მთები ამღერდა და ზღვა გაირინდა, წყალი აღიღდა – ზა-
ქარიას ვაჟი გაიქცა, და ჩვენ ყველანი შიშმა და ძრწოლამ შეგვიპყრო; და ხალხმრავლობის გამო ჩვენ არაფერს ვამბობდით ამ ამბის შესახებ“.
74. ა.ვ. „პ/ფასანიკ“. – დედოფალ მარიამის ხელნაწერი; „პ/ფასანგი“. – შიომღვიმის და ნათლისმცემლის ხელ-
ნაწერები: „პ/ფასანიკ“. – „ქართლის ცხოვრება“. და სხვა ვარიანტები: „ჰასანიკ“. ალბათ ყველა ეს სიტ-
ყვა პასტრასის დამახინჯებული ვერსიებია, ანუ სამართლის აღსრულების, ეგზეკუტორის, სამეფო ოფიცრის მცდარი ვერსიები.
75. ა.ვ. „კვართის მგზნებარე დანატრება“.
76. ა.ვ. „ამაზაერი“, მაგრამ ყველა სხვა ვერსიაში ადერკი იყო მეფე ქართლში ქრისტეს სიკვდილის დროს.
77. ა.ვ. „და დედაჩემმა ნინომ იცის, ოლონდ ის არ ამბობს, რადგან ჯერ არ მოსულა გაცხადების დღე. დაე, იკმარონ ნინოს მოწაფეებმა და ქრისტეს მოწამეებმა, რომ კვართი იმ კედარის ხესთან ახლოს მარხია, რომელიც ლიბანიდან ჩამოიტანეს და მცხეთაში დარგეს.“
78. ა.ვ. „უხრწნელი“.
79. ? ეკლესიის საკურთხეველი მცხეთაში, ასეა აღწერილი მეტაფორულად.
80. ა.ვ. ეს აბზაცი გამოტოვებულია.
81. ა.ვ. ახ.წ.-ით 88.
82. ა.ვ. „ორჯერ და სამჯერ“
83. ა.ვ. არ ამბობს, რომ ჩიტები შავფრთოსნები იყვნენ, არც იმას, რომ გათეთრდნენ.
84. ა.ვ. „შენი შვილები მიმოიფანტნენ“
85. ამ ადგილიდან ხვარაის შემთხვევამდე (გვ.33) ა.ვ. ძალიან მოკლეა, და თითქმის არაფერს ამბობს ამ სას-
წაულებზე.
86. *cillici*, i.e. *cilicium*. (*ძაძა* (ბალნისა); *ცხენის ძუის*, ან *თხის* ან *სხვა ბეწვისგან დამზადებული ქსოვილი*, *ჯვალა*. ლ.დ.).
87. ნიმროდი. ბატონი ჯ. რენდელ რაისი ამბობს, რომ სინას მონასტერში, Cod, Arab, No.456, არის ერთი მონაკ-
ვეთი დასათარებული: „ქანაანის ძის, ნებროდის ისტორია“. α' ιστορία νεβροσ υιός Χανααν
88. ანდა უფრო „სვეტი“. „ნიმროდის წიგნი“ ნახსენებია ვახტანგ გორგასალის „ცხოვრებაში“.
89. ა.ვ. „ხვარასნული“. (ე.ი. ხორასნელი/ხორასანიდან), დედოფალ ნანას დედის ძმა“. (*sneuli ნიშნავს ავადმყოფს*.)
90. ა.ვ. ახლა ძირითადად ეთანხმება მომდევნო ტექსტს. ტომი V, ნაწილი I.
91. ა.ვ. „ვახდი ერთ-ერთი (*nurse*) (ძიძათაგანი//ალმზრდელი) ამ პატივსაცემ ქვეყანაში“.
92. ა.ვ. „ხილიელულის, მზის და წვიმის მბრძანებლები“.
93. ა.ვ. „ითრუშანა“.
94. ა.ვ. „ითრუშანა“.
95. „სიმაღლე“, მაგრამ ა.ვ.-ს უწერია „სიმართლე“, ანუ სამართალი.
96. ა.ვ. „თავის გზაზე, და მოგვივლენს მისი რისხვის ხანძრებს“,
97. ა.ვ. „ერთი დღე“.
98. ა.ვ. გამოტოვებულია „და მისი ხალხი“.
99. ამ სიტყვებიდან ვიდრე სიტყვებამდე: „დედოფალი ნანა და მთელი ერი გავიდა გარეთ მეფის შესაგებებ-
ლად“. (გვ.37), ა.ვ.-ის ტექსტში აქ სიცარიელეა, და შესვებულია ნათლისმცემლის და შიომღვიმელის ვა-
რიატებით.
100. მუხრანიდან ცამეტი მილის სავალია. პატარა ეკლესია ჯერ კიდევ შეინიშნება ამ ადგილზე.

101. ა.ვ.-ში გამოტოვებული ადგილის დასასრული.
102. ქინძარა მცხეთიდან ჩრდილოეთით რამდენიმე მილის მანძილზე, მდინარე ნარეკვავზე, სადაც ის არაგვს ერთვის. ღარბა იმავე რაიონშია.
103. ა.ვ.-ში გამოტოვებულია ფრჩხილებში მოთავსებული მონაკვეთი. ა.ვ. დასძენს: „სიხარულით, და იმ მშვენიერი სასწაულის გამო, რომელიც მოხდა“.
104. ა.ვ.-ში გამოტოვებულია ფრჩხილებში მოთავსებული მონაკვეთი.
105. ა.ვ. ცალკე თავად არა აქვს გამოყოფილი
106. ა.ვ. „მეფე“
107. ა.ვ. გამოტოვებულია ნინოს ხილვის ეპიზოდი.
108. ა.ვ. დასძენს: „რომელიც იდგება სამარადისოდ//უკუნიით უკუნისამდე“.
109. ა.ვ. „სვეტი, და მის ფესვებში ჩააგეს ეკლესიის საძირკველი“.
110. ა.ვ. „მათი ავი სულებისთვის“
111. ა.ვ. „ხუარანხუარა“
112. ? ალბათ ეს ნიშნავს, რომ ზოგმა იუდამ ამასობაში მიატოვეს წმ. ნინო.
113. ა.ვ. „დებმა“
114. ა.ვ. „და ქალები გარეთ გამოსულიყვნენ და მე დავინახე სვეტი“.
115. ა.ვ. აქედან იწყებს ახალ თავს.
116. ა.ვ. არ ამბობს ჭაბუკის სახელს.
117. ა.ვ.-ს აქ ჩასმული აქვს: „და ჭაბუკმა მიუგო: „დიახ, დედოფალო, მე მწამს იესო ქრისტე, ყოველი სულიერის მაცხოვარი“. მერე ნინომ თქვა: „“.
118. ა.ვ. გამოტოვებულია ეს თავი ბოლომდე, და მხოლოდ წერია: „შემდეგ ჩამოვიდნენ ელჩები საბერძნეთიდან მღვდელმთავრებთან, მღვდლებთან და დიაკვნებთან ერთად და დაიწყეს ნათლობა, როგორც წერია ზემოთ“.
119. „ქართლის ცხოვრება“. „არაბელები“. ამბობენ, რომ ბარაბას შთამომავლები იყვნენ.
120. ერუშეთი იყო ერთი მხარე, სადაც მოედინება იმავე სახელწოდების მდინარე, მდინარე მტკვრის სათავეს მახლობლად. ერუშეთის ციხე თუ სოფელი ახლოსაა ნაქალაქევთან. „*ou etait une ville, aujourd'hui simple bourg. La fut batie une belle eglise a coupole, par aun envoye du grand constantin, aux grais de l'empereur. „Wakhoucht, Sescr. Georgie. p. 105; Berge and Bakradze, „Zapiski, p. 100; Hist. de la Georgie, t. t. pp. 121. 195. „კუმურდოსთან, კიდეც უფრო ახლოს მტკვრის სათავესთან არის კიდეც ერთი ეკლესია, რომელმაც ნათქვამია, რომ აშენებულია კონსტანტინეს წარგზავნილთა მიერ. ბერუჟ და ბაქრაძე, Zapiski. p. 85; ვახუშტი, გვ.99, 101, 103; ბროსე, Voy. archeol., II Rapp. p. 166, IV Rapp. p.6*
121. მანგლისის ეკლესია ტფილისიდან დასავლეთით, ოცდახუთიოდე მილზე მდებარეობს. ბაქრაძე, გვ.93; ვახუშტი, *საქართველოს აღწერა. p. 171.* — „Cette eglise n’a jamais ete ruinee. Au midi de la voule est represente Mahomet sur un lion; on dit ques s’est pour cela que les musulmans l’ont respectee.“
122. ა.ვ. დასძენს „დაწერილია იაკობის მიერ“ (მღვდლის). ა.ვ.-ში იაკობი პირველ პირში წერს.
123. ყველა სხვა ხელნაწერში, გარდა „ქართლის ცხოვრებისა“, წერია „ზამთარი“, რაც კონტექსტის მიხედვით სწორია.
124. „დიდებითა“, შესაძლოა შეეშალათ „დადებითა“-ში, რაც ხელნაწერებში გვხვდება, მაგრამ შეადარეთ გვ.47-ს: „მეფის სადიდებლად“.
125. ნაკადულს ეწოდება „ძუძუს წყარო“, და იქ არის პატარა ეკლესია.
126. ა.ვ. „შენი სამეფოს საზღვრებისკენ“.
127. ა.ვ. „განუწყვეტლივ ათი დღის განმავლობაში“.
128. ა.ვ. „გამუდმებით ათი დღის განმავლობაში“.
129. ა.ვ. ამ ადგილის სახელს გვთავაზობს ასე: „*ერგვი*“.
130. ბოდბე კახეთში, ქალაქი ქიზიყის (სიღნაღი) მახლობლად, ასევე იწერება ხან *ბოდი*, ხან *ბუდი*.
131. უჯარმა, ადრე ციხე-ქალაქი, კახეთის მეფეთა რეზიდენცია, ახლა სოფელია მდინარე იორზე კახეთში, როგორც ამბობენ, საურმაგის აშენებული (237-161 წწ. ქრისტეშობამდე).
132. ა.ვ. „წმინდა ნონომ“. წმინდანს მშირად მიმართავდნენ ასე — დედოფალი.

133. ა.ვ. „კაცი, ქალი და ბავშვები“.

134. დიდნი, მაგრამ ავ.-ში ვხედავთ „დედანი“.

135. ა.ვ. აქ დასძენს: „მაშინ წმ. ნინომ მიატოვა ქალაქი მცხეთა და გაეშურა მთიულეთისკენ, რათა სახარება მიეტანა ველური მხეცის მსგავსი ადამიანებისთვის, და რათა დაეშო მათი კერპები. მაგრამ აბიათარი, ებრაელი მღვდელი ადგილზე დარჩა – ის იყო მეორე პავლე, რომელიც განუხრელად, დღისით და ღამით ქადაგებდა ქრისტეს და მის დიდებას, ებრაელების გაქცევამდე“. ა.ვ. შემდეგ იწყებს ახალ თავს: „წმინდა ჯვრის აღმართვა მცხეთაში და მეორე ხილვა“. „და როდესაც ქართლის მთელი ქვეყანა მოექცა „ქრისტიანობაზე, საბერძნეთიდან ჩამოსულმა მღვდლებმა თათბირი შეკრეს იმის თაობაზე, თუ როგორ უნდა აღემართათ ჯვრის ნიშანი; და მათ უთხრეს მეფე მირიანს: „კარგი იქნება ჯვრის ღვთაებრივი ნიშანი აღვმართოთ“. მეფემ და მთელმა ერმა მოიწონეს ეს რჩევა და სიხარულით დათანხმდნენ მღვდლების სიტყვას და სწავლებას. მეფე მირიანმა დაუკვეთა ხის ჯარი. ხუროები მოვიდნენ და საამო სურნელის მფრქვეველი ხე მოჭრეს და მეფემ ბრძანა მისგან ჯვარი გამოეთალათ. მღვდლებმა ასწავლეს, როგორი ფორმა უნდა მიეცათ; და როცა დაამზადეს, ხუროები ეახლნენ მეფეს და უთხრეს: „ჩვენ დავამზადეთ ჯვარი მღვდლების დარიგების შესაბამისად“. გახარებული მეფე წამოდგა და მთელმა ხალხმა იხილა ჯვრის ფორმა, და დიდად გაოცდნენ და განადიდეს უფალი. მაშინ მეფე ჩაფიქრდა და გაიხსენა – იმ დღეს, როცა მთაზე ავიდა და სრულიად ჩამოხველდა, როგორ დაინახა ჯვრის ფორმის დიდებული ბრწყინვალება. შემდეგ მეფემ უამბო მღვდლებსა და მთელ ხალხს თავისი ხილვის შესახებ, თუ როგორ გაფანტა ჯვრის ნიშანმა წყვილი მის თვალი. როცა ხალხმა მოისმინა მეფის ამბავი, უფრო და უფრო გაუმყარდათ იესო ქრისტეს და მისი ჯვრის ნიშნის რწმენა და ყველამ ერთხმად თაყვანი სცა და განადიდა ღმერთი. შემდეგ მეფემ დაარჩა ხალხი, რომ მათ უნდა აღემართათ ჯვრის გამოსახულება სხვადასხვა ადგილას, და ბრძანა, რომ ყოველი ჯვარი იქ უნდა აღემართათ, სადაც მართებული იქნებოდა და არა სადაც მოესურვებოდათ. იმ დროს მეფე მირიანმა ღოცვა აღავლინა და თქვა: „ო, უფალო იესო ქრისტე, რომელიც გიწამეთ ამ ტყვე ქალის მეოხებით, და შენმა მღვდლებმა გვასწავლეს – შენ, რომელმაც დაიმდაბლე თავი, და შენი თავმდაბლობით შეიმოსე მონათა სამოსით, შენ, რომელიც ჩამობრძანდი შენი მამის კურთხეული წიაღიდან, შენ, ვინც მიატოვე ჩვენი გულისათვის შენი სამეფო გვირგვინი, ბრწყინვალება და ძალაუფლება, და შეხვედი უბიწო ქალწულის საშოში და შემდეგ ჯვარს გაცვა პონტიუს (პონტოელი) პილატემ, და დაგვლეს მიწაში და მესამე დღეს აღსდევით, და აღასრულე ყოველი, რაზეც წინასწარმეტყველები გვეუბნებოდნენ, ამაღლდი ზეცად და დაბრძანდი ხელმარჯვნივ მამისა, და კვლავაც უნდა მოველინო ცოცხალთა და მკვდართა განსაკითხავად – შენ დაგვიტოვე შენი ჯვრის ნიშანი მტრის უხილავი ხლართების გასანადგურებლად; სასწაულებრივად განგვმსჭვალე შენი შიშით, რათა დავეხსნათ ეშმაკს, რომელსაც ჯაჭვით ვყავდით დაბმული დასალუპავად. მაგრამ ახლა, ო, ღმერთო, ჩვენი მაცხოვარო, გავგზადე ღირსი და გვიჩვენე ადგილი, სადაც შენი ჯვრის ნიშანი უნდა აღიმართოს, რათა მან თვალიხილული გახდეს ჩვენი მოძულეებისთვის, და რათა შერცხვეთ; რადგან შენ, ო, ღმერთო, შენ ხარ ჩვენი მსხნელი და ნუგეშისმცემელი“. და იმ ღამის შემდეგ უფლის ანგელოზი მოველინა მეფე მირიანს ხილვაში და უჩვენა მთა მდინარე არაგვზე, მცხეთის მახლობლად, და უთხრა მას: „ეს არის ღმერთის მიერ არჩეული ადგილი; იქ უნდა აღმართო შენ ჯვრის ნიშანი“. და ინათა თუ არა, მეფე მირიანმა უთხრა მღვდლებს, როგორ იხილა ანგელოზი, და მისი ნათქვამი, და ის მთა, რომელიც მან უჩვენა მეფეს. როცა შეიტყვეს მეფის ხილვის ამბავი და იხილეს ის ადგილი, გაიხარა მთელმა ერმა. სიხარულითა და სადიდებელი გალობით ყველა მთავარმა აიღო ჯვარი, და ერთხმად აიტანეს და აღმართეს მთაზე მცხეთის მახლობლად, აღმოსავლეთისკენ, აღდგომის კვირა დღეს. და როცა ჯვრის ნიშანი აღიმართა ქართლის მიწაზე, ქართლის ყველა კუთხეში უეცრად დაეცა და დაიმსხვრა კერპები მთელი ქვეყნის საზღვრებში, და სალოცავებიც განადგურდა. როდესაც ეს გასაკვირი საქმე და სასწაული ჯვრის ძლევით განხორციელდა, კიდევ უფრო განცვიფრდა ხალხი, და განადიდეს უფალი და თაყვანს სცემდნენ პატიოსან ჯვარს სიხარულით“.

136. ა.ვ. „ძლევა მოსილი“.

137. „და თორმეტ ანგელოზს გვირგვინის ფორმის წრე შეეკრა მის ირგვლივ“.

138. ა.ვ. და მათ აღაშენეს ეკლესიები

139. ა.ვ. „ელვარე//მანათობელი//კაშკაშა ალივით//სხივით ენთო ჯვრის თავზე“.
140. ა.ვ. „დიდად გაიხარეს და მთელი დედამიწა შეირყა; და მთებიდან, გორებიდან და ხევებიდან საამური სურნელის მფრქვეველი ნისლი ავიდა ცამდე და კლდეები დაიმსხვრა. და მძაფრი სუნი დატრიალდა მთელს მიწაზე... და ძლიერი ხმები გაისმა და მთელმა ერმა შეიმეცნა გალობის ხმა, შეშინდა და გაოცდა ძლიერ. შიშითა და ძრწოლით თაყვანი სცეს პატიოსან ჯვარს და დიდი სიხარულით განადიდეს უფალი“.
141. ა.ვ. „ღვთისმომიში კაცი“.
142. ა.ვ. „რევის ვაჟიშვილი“.
143. ა.ვ. „დაეცა“.
144. ა.ვ. „ლონემიხილი//უსულო“.
145. ა.ვ. „ლონემიხილი//უსულო“.
146. ა.ვ. „სამი“.
147. ა.ვ. „თუკი ვინმე თხოვნით მიმართავდა მცხეთის წმინდა ჯვარს ცხარე ბრძოლის დროს, ჯვარი მყისვე ევლინებოდა მხსნელად მტერთან გამკლავებაში“.
148. ა.ვ. „ეს აღწერილია უფლის და პატიოსანი ჯვრის სადიდებლად და რათა ყველამ თაყვანი ვცეთ მამას, ძეს და სულიწმინდას, აჲ და მარადის და უკუნიით უკუნისამდე. ამინ“.
149. ა.ვ. გამოტოვებულია „და ეპისკოპოსი იოანე“.
150. ქართლის ცხოვრება: „წ/ცორობანი“(?). ხსენებული ადგილი ალბათ არის წობენი, არაგვიდან შვიდი მილით და მცხეთის ზემოთ თხუთმეტი მილით დაშორებული.
151. მთიულეთი არის მხარე (იგივეა, რაც *“the highlands”*. გუდამაყრის და არაგვის გადაკვეთაზე).
152. ჭართალი, მდინარე და მთა არაგვის დასავლეთით, მთიულეთის სამხრეთით.
153. ფშავთა და ხევსურთა ძველი სახელი, ისინი თეთრ არაგვზე სახლობდნენ, მთიულეთიდან და გუდამაყრიდან აღმოსავლეთით და თიანეთიდან ჩრდილოეთით.
154. შავი არაგვის შესართავთან.
155. ჟალეთი, ან ჟალიეთი, მდინარე იორზე, თიანეთში.
156. ანუ, მცირე თიანეთი, თიანეთის სამხრეთით და საგურამოს აღმოსავლეთით.
157. კახეთის უკიდურესი ჩრდილოეთით.
158. აბიბოსი, ნეკრესის ეპისკოპოსი, სირიელ მამათაგან ერთ-ერთი, რომელიც საქართველოში მიეცეს საუკუნის შუა წლებში ჩამოვიდა.
159. ა.ვ. არ ახსენებს სუჯის.
160. ა.ვ. „ღმერთთან ახლოს მდგომო, ჩემო დედოფლებო“.
161. ბ-ნი კონიებარი ამბობს, რომ ქრისტიანი სომხებისთვის სპარსელებთან ომში გავრცელებული იყო ამ უკანასკნელთათვის დაეღვივნებინათ წყალში გარეული ნალვერდალი/წიდა“.
162. გვ.36-37 ლათინური ტექსტის თარგმანია: *Rufinus, ‘Ecclesiastical History,’ Bk. II, ch. vii, in the Migne’s ‘Patrologia,’ t. xxi. 480-482 (the following from Auctores Hist. Eccl. Basilae,’ 1544, pp. 225-226).*
163. სიტყვა ევადგი არ არის განმარტებული. ამ ხელნაწერში ბევრი ბუნდოვანი მონაკვეთი.
164. ამ ადგილზე ერთი ფურცელი აკლია ამ ხელნაწერს.
165. ეს მონაკვეთი ფრხილეებში შევსებულია „ქართლის ცხოვრებიდან“. ის, რომელიც მას მოჰყვება, ნინოს ლოცვის ბოლომდე, იგივეა, თითქმის სიტყვასიტყვით, და აშკარად იმავე ხელნაწერიდან უნდა იყოს ამოღებული.
166. პატარა რაიონი საგურამოს აღმოსავლეთით. ძალეით არის ერწოში.
167. ? მირდათ III, ქართველი, ბაკურის ძმა (ა.წ. 365-379 წწ.)
168. „ქართლის ცხოვრება“. „მაგრამ წმ. ნინო გაემზადა რანში წასასვლელად, ფეროზის მოსანათლავად, და როცა მიუახლოვდა სოფელ ბუდის კახეთში, დარჩა იქ რამდენიმე დღით; და კახეთის ხალხი მოდიოდა მასთან, კითხვებს უსვამდა და ნინომ ბევრი იმოწაფა.
169. ? ჩვენი აზრით, „ამაღლებიდან“. კი არა, უნდა წავიკითხოთ „დაბადებიდან“.
170. „ქართლის ცხოვრება“. „ბაქარი, ან ბახარი, მირიანის ძე“.
171. „ქართლის ცხოვრებაში“. რევი მირიანზე ადრე კვდება. „ქართლის ცხოვრება“. ამბობს: „მეფე მირიანის მოქცევადან, ოცდამეხუთე წელს (სომხური ქრონიკა – *Chronique armen. ‘thirty-fifth’*) გარდაიცვალა მისი

- ვაჟი რევი, სომეხთა მეფის სიძე, რომელმაც თავისი სამეფო თავისსავე სიცოცხლეში უბოძა მას. ის (რევი) დაიკრძალა აკლდამაში, რომელიც თავად ააგო“.
172. კახეთის აღმოსავლეთი. შდრ. სტრაბონი, გვ.5.
173. იხ. მის უორდროპის წინასიტყვაობა, გვ.4.
174. ისტორიულად აღწერილი ბოლო მოვლენა არის კონსტანტინეს წარმატებული ომი მიჭრანთან, იბერიის მეფესთან, რომლის დასრულებისას კონსტანტინემ ბაჰქარი, მიჭრანის ვაჟი მძევლად აიყვანა, და სომეხთის მეფე თრდატმა, მისი ქალიშვილი ბეოუნი (გათხოვების შემდეგ სალომედ წოდებული) მიათხოვა მიჭრანის ვაჟს. სომხური ტექსტი ემთხვევა ჯუანშერის დაბეჭდილ ტექსტს.
175. სომხურად ‘u/virk/q’ ქართველს ნიშნავდა. ბოლო ასო ‘ქ’ მრავლობითი რიცხვის აღმნიშვნელია და ცხადი ხდება მისი კავშირი *იბერიელებთან*. ქართველები თურუში სომხებს იცნობდნენ სახელით *სომხური*, ბერძნებს, *ელინელებს* სახელით — *წარმართები* და ბერძნულ ენას, როგორც *ბერძნულს*.
176. ნინო სამ წელიწადს იყო მცხეთაში, როცა სალომეს უამბო თავისი თავგადასავალი. ტექსტში *შეცდომით* წერია „თვე“, რომელიც მე შევასწორე და დავწერე „წელი“. იხილე გვ.75 (23).
177. ასევე იწერება „ნიოფორი“. სომხურში არ ჩანს, ეს პიროვნება ქალი იყო თუ კაცი. შესაბამისად, ცხადი მხოლოდ ისაა, რომ ამ სახელით ერთი ადამიანი იყო და არა ორი, და რომ ის (ქალი თუ კაცი) დვინიდან იყო, ძველი სომხური ქრისტიანული ცენტრიდან, არაქსზე, არტაქსატის მახლობლად.
178. ე.ი. ფიცს აძლევდნენ იმ ღმერთებს. ნინოს საქმეთა ეს ნაწილი გასაოცარი სიმუსტით გამოირჩევა ტოპოგრაფიის თვალსაზრისით, იმდენად, რომ შესაძლებელია მათი შემოწმება სხვა ალუზიებშიც.
179. სომხურ ვარიანტში გამოტოვებულია ეს ათი წინადადება. ეს ისეთი სახელმძღვანელოა, როგორიც მონტანისტ წინასწარმეტყველ ქალს შეიძლება ეტარებინა თან.
180. (Xisuthrus) სისოუთრასი — ეს სახელი ჩვენ გვეცნო, რადგან ბეროსუსს გამოუყენებია. მაგრამ ქართული ამახინჯებს უსებიუსის ჟამთააღწერას თუ ინარჩუნებს დამოუკიდებელ ადგილობრივ ტრადიციას, რომელსაც ბეროსუსი ინარჩუნებს, ბუნდოვანია. მე უნდა ვივარაუდო, რომ ნიმროდის წიგნი მიახლოებული ქართული წყაროა.
181. სომხური სიტყვა უფრო ზუსტად „ფიჭვის“. ყლორტს ნიშნავს.
182. ნიებაში განუმარტავია. ეტყობა, ქართული სიტყვა *ემბამა* გადმოიტანეს ქართული ტექსტიდან. სომეხ მთარგმნელს ის საკუთარ სახელში აქრია, რაც = „ნათლობას“ ნიშნავს.
183. სომხურ ვერსიაში წერია *მოგთა*, რაც ქართულის მრავლობით რიცხვს შეესაბამება. (ლ.დ. აქ ავტორი ლათინური ვერსიით წერს მრავლობითში ამ სიტყვას „Magi“).
184. ნიმროდის წიგნი არაერთხელაა ნახსენები თაროწელი პავლეს წერილში თეოფისტუს ბერძენის წინააღმდეგ; ეს წერილი არის მეთერთმეტე საუკუნის ძეგლი, იმ დროისა, როცა ეს აპოკრიფი ჯერ კიდევ გავრცელებული იყო სომხეთში; ჰარისი აცხადებს, რომ სინას მთის არაბულ ხელნაწერში, №435, ინახება „ნიმროდის ისტორია“. ალბათ ეს არის ხსენებული აპოკრიფი.
185. სომხ. კიტოსი, ანუ, ბერძნულად: *κίτος*
186. ეს დეტალი არ არის ქართულ ვერსიაში, და დანამდვილებით სომეხი მთარგმნელის დამატებულია.
187. სხვაგან ყველგან წერია სიდონია. შეუძლებელია ითქვას, საკუთარი სახელების მართლწერა სომხურ ვარიანტში და ჩემ მიერ შენარჩუნებული თარგმანში, ნაკარნახევია ქართული ორიგინალით თუ უბრალოდ სომხური ტრადიციით. თუ ისინი ქართულშიც ასეა, შესაძლოა იმის გამოა ასე, რომ მიგვანიშნოს, რომ სირიაკის (ძველი სირიული ენის დიალექტი) ან ებრაულის თარგმანია, რომელშიც ხმოვნები არ იყო გამოხატული.
188. ქართულ თარგმანში „კაკკასიის მთიულები“, რომელიც ალბათ სწორი ტექსტია.
189. სომხურად *Quartes yev melan*, რომელიც არის *chartas* და *μελαν* ბერძნ. ამ სიტყვებს სომეხები საწერი მასალის აღსანიშნავად იყენებდნენ მეათე საუკუნეში. თუნდაც იგივე სიტყვები რომ ყოფილიყო ჯუანშერის ქართულ ტექსტში, ეს არ იქნებოდა იმის მიმანიშნებელი, რომ ის ტექსტი იყო ბერძნულიდან ნათარგმნი. თვეების ლათინური სახელების გამოყენება უფრო ლათინურ ორიგინალზე მიუთითებს.



ოდეს კენი, 1923
ლუიზა ლაფერაძის რეპროდუქცია

ოქროს საწმისის ქვეყანაში (დამოუკიდებელ, მენშევიკურ საქართველოში)

ამ პირველ ტომს, რომელშიც აღწერილია საქართველო, დიდი სიყვარულით ვუძღვნი ქართველ თავადსა და კაპიტანს, გიორგი (გრიგოლ) წერეთელს; მსურს ამგვარად გამოვხატო მოწიწება მისდამი და პატივი მივაგო ამ ჩინებულ ადამიანს, რადგანაც ფარდა ახადა ყველაფერს და ცხადლივ დამანახა თავისი ერის განუზომელი ღირსებანი, როცა ჩვენი საამური კავშირით ვტკბებოდით; სწორედ ამ ღირსებათა წყალობით, კიდევ უფრო ძლიერ შემიყვარდა მისი შინაგანი სამყარო, შემიყვარდა თავაზიან, სანდომიან, სიყვარულის ღირს მამაკაცთა მოდგმა, რომლის სათაყვანო განსახიერებაა გრიგოლ წერეთელი.

წინასიტყვაობა

საქართველო აღმოვაჩინე 1920 წელს, მაშინ, როცა დამოუკიდებელი, სოციალ-დემოკრატიული რესპუბლიკა იყო; ქართველი ხალხის სამშობლოს მართავდა მენშევიკური მთავრობა, რომელსაც დეფაქტოდ აღიარებდა ევროპა. ამ ქვეყანას დაახლოებით სამ მილიონ ნახევარი მოსახლე ჰყავს; მთელ საქართველოში ქრისტიანობაა გავრცელებული, თუმცაღა, სამხრეთ ნაწილის თითო-ორი პოლიტიკა მუსლიმანურია; ესაა ერთ-ერთი იმ სახელმწიფოთა შორის, ყველაზე მეომრული წარსული რომ აქვს ამქვეყნად; მთელი თავისი ისტორიის განმავლობაში თავგამეტებით ებრძოდა სპარსელებს, თურქებს, თათრებს, ქურთებს, მონღოლებს, ყიზილბაშებს და იმ ტომებს, კავკასიის ჩრდილოეთიდან რომ ეს-ხმოდნენ თავს ჯოგებივით. 1783 წელს ეს ხალხი მოუთმენლად ელოდა რუსეთის მხარდაჭერასა და თანადგომას, რადგან ერთადერთ საყრდენად ეჩვენებოდა ეს ქვეყანა; ამიტომაც, დადეს ტრაქტატი, რომელსაც ხელი მოაწერეს ქართველთა მეფემ, ერეკლე მეორემ და რუსეთის იმპერატორმა, ეკატერინე მეორემ; ამ შეთანხმებამ საქართველოს ყველა უფლება და სრული შიდა სუვერენიტეტი შეუნარჩუნა.

ნა; მაგრამ 1801 წელს, რუსეთის „ცარმა“ გააუქმა ის დოკუმენტები და შეთანხმებები, საგარეო პროტექტორატს რომ უზრუნველყოფდა; რუსეთის მეფემ ტრაქტატით დადგენილი ალიანსი და მოკავშირეობა გადააქცია უბრალო, დაუფარავ, წმინდა წყლის ანექსიად. ამ ბატონობამ 1917 წლამდე გასტანა; როგორც კი რუსეთში მოულოდნელად დატრიალდა რევოლუციის ქარცეცხლი, კავკასიამ გადააგდო სლავთაგან დადგმული მონობის უღელი, დაამსხვრია ბორკილები, ეზიარა ნანატრ თავისუფლებას, შეეცადა, ჩამოყალიბებულიყო ფედერაციულ რესპუბლიკად, რომლის მართვის სადავეებსაც ხელთ იგდებდა ამიერკავკასიის სეიმი, ანუ არჩეულთა პოლიტიკური ასამბლეა. მათმა თავდაუზოგავმა ბრძოლამ, შემართებამ და ძალისხმევამ ნაყოფი ვერ გამოიღო, ამოდ გაისარჯნენ, ფუჭად ჩაიარა ყოველივე და 1918 წლის 26 მაისს, საქართველოს ეროვნულმა საბჭომ საქართველოს დამოუკიდებლობა გამოაცხადა. ქართველი მენშევიკები, რომელთაც მეზობლები გამუდმებით ესხმოდნენ თავს და წამდაუწუმ აწიოკებდნენ, ბოლშევიკური რუსეთი ემუქრებოდა, ევროპამ კი სულ მთლად აქცია ზურგი და მიატოვა, სამი წლის განმავლობაში იბრძოდნენ, გმირული სულისკვეთებით განმსჭვალულნი, ძალღონეს არ იშურებდნენ, რათა დაემკვიდრებინათ წესრიგი, ჩამოეყალიბებინათ ვაჭრობის ქსელი და სტაბილურობა შეემატებინათ თავიანთი პოლიტიკისათვის. ქართველმა მენშევიკებმა არა მხოლოდ დააარსეს სოციალისტური და დემოკრატიული რესპუბლიკა (თვით ხალხი დაეხმარა მათ ამ საქმეში; ხალხი, რომელიც, იქამდე არსებული ფეოდალური რეჟიმის მიუხედავად, თავისი ტემპერამენტიდან და ზნე-ხასიათიდან გამომდინარე, მუდამდღე მთელი არსებით მიელტვოდა, გამალებით ესწრაფვოდა ყველაზე კეთილშობილური, ამალღებული და დიადი სოციალისტური მიზნების ხორცშესხმას), არამედ სისხლისღვრის გარეშე მოახერხეს შესანიშნავი, მართლაც რომ ჩინებული აგრარული რევოლუციის ბრწყინვალედ დაგვირგვინება – შვიდ ჰექტარამდე შეამცირეს თვალუწვდენელი ადგილ-მამულები, სამფლობელონი; სახალხო საკუთრებათა ნუსხაში შეიტანეს გასხვისებული ტყეები, გაყიდული, დაუმუშავებელი, გაოხრებული და გავერანებული მიწები; წამოიწყეს ნაციონალიზაცია, კერძო მესაკუთრეთათვის გადაცემული ქონების ჩამორთმევა; გლეხები დაამშვიდეს და დაარწმუნეს, რომ საბოლოოდ გახდებოდნენ თავიანთი ყანების მესაკუთრენი. რაკი ამ მეტად პროგრესულმა, ტოლერანტობით, გულწრფელობითა და შემწყნარებლობით განთქმულმა მთავრობამ ვერ მიაღწია წარმატებას, მარცხი იგემა და ხელი მოეცარა, სავსებით სამართლიანი იქნება, დაჟინებით გავუსვათ ხაზი იმ ფაქტს, რომ მას კაციშვილმა არ გაუწოდა დახმარების ხელი; რომ არ დაანებეს საკუთარი საშინაო პროგრამის სრულ სიმშვიდესა და სიმყდროვეში განხორციელება; რომ საგარეო მოვლენებმა შთანთქეს და წაღეკეს ყოველივე... 1921 წლის თებერვალში, პარიზის მოკავშირეთაშორისმა კონფერენციამ დე იურე აღიარა საქართველო; დაახლოებით, ორი

კვირის შემდეგ რუსი კომუნისტები სათავეში ჩაუდგნენ თავიანთ წითელ რაზმებს და დაიძრნენ საქართველოსაკენ; წითელმა არმიამ დაიპყრო ეს პატარა ქვეყანა. მენშევიკების მთავრობა რამდენიმე დღის განმავლობაში იყო გამაგრებული დედაქალაქში, ტფილისში, უძალიანდებოდა მტერს და არ ყრიდა ფარ-ხმალს; სწორედ დედაქალაქის მისადგომებთან შეაკლეს თავი დამპყრობელ წითლებს საქართველოს სამხედრო სასწავლებლის კურსდამთავრებულებმა; გმირული, საუცხოოდ დიადი და მომნუსხველი იყო მათი თავგანწირვა; მერე მენშევიკებმა უკან დაიხიეს, ერთმანეთის მიყოლებით დათმეს ქალაქები; ასე გაგრძელდა მანამ, სანამ არ მიაღწენ ბათუმს, შავი ზღვის პირას გადაშლილს... დაახლოებით მარტის დამლევს განეშორა, იმ ქალაქის პორტს და კონსტანტინეპოლისაკენ გაცურა. თითქმის აღარ უბრძოლია ქართულ არმიას, რომლის დაქსაქსულ ნაწილებსაც მეტად უხეირო მეთაურები ჰყავდა, საკმარისი აღჭურვილობაც კი არ ჰქონდა და, გარდა ამისა, დემორალიზებული, სულ მთლად მხნეობადაკარგული ჩანდა ხელისუფლების უკან დახევისა და ბრძოლის ველიდან გაქცევის გამო; ტფილისის მისადგომებთან გაჩაღებული შეტაკებების შემდეგ დაყარა ფარ-ხმალი და აღარ შეჰბრძოლებია მტერს, რომელიც რაოდენობით ბევრად აღემატებოდა ქართველ მეომრებს... და საქართველო მოესწრო იმ დღეს, როცა სხვებმა საბჭოთა რესპუბლიკად გამოაცხადეს და მისი მართვის სადავენი მოსკოვმა იგდო ხელთ. ახლა, როცა ამ ტექსტს ვწერ, რუსული ბოლშევიზმი ფესვს იდგამს ამ სულგრძელი, ხელგაშლილი, გულუხვი, მამაცი, დიდსულოვანი, თვალწარმტაცი, მშვენიერი, მომხიბვლელი, რაინდული სულისკვთებით განმსჭვალული, ყველასაგან გამორჩეული ხალხით სავსე პაწაწინა ქვეყანაში, რომლის მკვიდრთაც სიბილწის ნატამალი არა აქვთ; იგი იმსახურებს ბედნიერებას, უფრო მეტადაც კი, ვიდრე ნებისმიერი სხვა. ეს ქვეყანა შემოიჭრა ჩემს გულში, ძალზე ღრმად შემოიჭრა და საუკუნოდ დაიდო ბინა იქ; გზნებითა და სიცხოვლით აღვსილი, გავამხელ ჩემს იმ ყველაზე გულდამწველ ნატვრას, საქართველოს რომ უკავშირდება; აი, ასეთია ჩემი სანუკვარი, მხურვალე წადილი: დაე, ახალმა მმართველობამ შეუნარჩუნოს საქართველოს ის დამოუკიდებლობა, რომელსაც ასეთი უსაზღვრო აღტყინებით, ესოდენ მგზნებარედ და გატაცებით ესწრაფვის ეს ხალხი, გააფთრებით ებლაუჭება ამ საუნჯეს და ვერაფრის ფასად ვერ თმობს; დაე, მისცენ ამ ქვეყანას აყვავების, აღორძინებისა და გაფურჩქნის შესაძლებლობა, რადგან ამას სავსებით სამართლიანად იმსახურებს.

ოქროს საწმისის ქვეყანაში

პარი პირველი

თავი პირველი

კახეთი

კავკასიაში პირველად მოგზაურობისას, საქართველოს აღმოსავლეთით და ჩრდილო-აღმოსავლეთით გადაშლილი პროვინციების შემოვლისას დიდ სირთულეებს წავაწყდი – ვიყავი კახეთში, თუშეთში, გარეკახეთში, ჩრდილოეთ ფშავში, შუაგულ ფშავსა და ხევსურეთში... დაბრკოლებებით დაიწყო ჩემი ქართული ოდი-სეა; თავიდანვე წინააღმდეგობებს შევეჩეხე; ეს ჭეშმარიტ და უტყუარ წინასწარ-მეტყველებად მეჩვენა; თითქოს ამგვარი სიძნელებები უთუოდ ავის მომასწავებელი ნიშანი იყო, რაღაც ცუდს რომ მიქადდა და მიმახვედრებდა, რა მოჰყვებოდა ამ ნავ-სიან დასაწყისს. 1920 წლის 25 მაისს, დილაადრიან უნდა გავცლოდი დედაქალაქს, ტფილისს და წავსულიყავი კახეთში, ქალაქ თელავში; ეს უნდა ყოფილიყო ჩემი პირველი დანიშნულების ადგილი; შუალამისას, როცა ის-ის იყო, უნდა მოვრჩენი-ლიყავი უნაგირზე დასამაგრებელი ტყავის ბუდეების გავსებას, დოდიმ დააკაკუნა კარზე; მერე შემოაბიჯა ჩემს დროებით სამყოფელში – სასტუმროს იმ ნომერში, სა-დაც ვფუსფუსებდი. დროებით ჩემს საკუთრებად ქცეულ დივანზე ჩამოჯდა, სიგა-რეტს მოუკიდა – როგორც ყველა კარგი და გულადი ქართველი მამაკაცი, დოდი ას ღერ სიგარეტს მაინც ეწეოდა (ასე მგონია) ყოველ ცისმარე დღეს და მითხრა:

– მოვედი, რათა ძალზე ცუდი ახალი ამბავი გაუწყოთ. ხევსურეთის დეპუტატმა, რომელიც სულ რამდენიმე წუთის წინ დავტოვე კლუბში, მაცნობა, რომ მთელი თუ-შეთი ააოხრეს და ააწიოკეს ავაზაკებმა, ამიტომაც, შეუძლებელი იქნება იმ გზის გავ-ლა თქვენთვის და ქალბატონი ოდეტისათვის.

დოდი – ასე ვუწოდებ ლეიტენანტ თავადას, დავით ჭავჭავაძეს... ეს კაცი იყო ქართლ-კახეთის უკანასკნელი მეფის, გიორგი მეცამეტის შთამომავალი და იმ სა-ხელგანთქმული თავადის ასულის შვილთაშვილი, რომელიც ჩერქეზეთის ემირმა, შამილმა, ტყვედ ჩაიგდო და გაიტაცა მშობლიური მხარის მთებში, როცა მართლა ეპიკური ბრძოლა ჰქონდა გაჩაღებული რუსეთის იმპერატორის წინააღმდეგ... სა-ქართველოს სამხედრო სამინისტრომ სწორედ მას მიანდო ჩემი მფარველობა,

საიმედო დამცველად მომიჩინა და დაავალა, ამაღლის წევრივით ედევნებინა თვალყური ჩემთვის, ვიდრე არ დავასრულებდი ჩემს დაუვიწყარ მოგზაურობას. ოცი წლის იყო, აშოლტილი, ტანკენარი, მოქნილი, სხარტი, მოხდენილი, სალუქი, მიმზიდველი და მომხიბვლელი; ისეთი იერი ჰქონდა, იფიქრებდით, ლარივით სწორ, ცადაზიდულ ყლორტივით ამოიზარდა მიწიდან და აიყარა ტანიო. მისი სავსე, ბადრი სახე ერთდროულად მომნუსხველად მშვენიერიც იყო და ბავშვურიც, ქალურად ნაზიც, სათუთიც და ალერსიანიც; ალბათ, სწორედ ასეთი სახე ექნებოდა რამდენიმე საუკუნის წინათ შობილ ტოსკანელ პაჟს: შვენოდა მხიარული, ცოცხალი, მოციმციმე, ნუშისმაგვარი, ყავისფერი თვალები და თვალწარმტაცი ბაგე, რომელსაც თითქოსდა წრფელი, დაუფარავი, მოურიდელები ავხორცობის, ჟინისა და ვნების დამლაემჩნეოდა; მის ტუჩებზე ეშვებოდა ბრიტანულ ყაიდაზე დაყენებული პაწია, განუყრელი უღვაში, რომელიც უცილობლად მოგხვდებოდათ თვალში; სწორედ ასეთი უღვაშები აქვთ ინგლისელ სამხედროებს; ომის შემდეგ დამკვიდრდა ეს მოდა; ოფიცერთა უმეტესობამ გადმოიღო უღვაშის ასე დაყენების წესი. შემდგომში ხშირად ვსეირნობდით ერთად, თვალუწვდენელ მანძილს ვფარავდით ფეხდაფეხ, ვტკბებოდით ხანგრძლივი ლაშქრობებით; როცა გაღვიძებას დავასწრებდი, საწოლშივე წამოვკდებოდი ხოლმე, რათა უკეთ მეშხირა მისთვის; მეცქირა, როგორ გამოთილიყო ჩვენი საერთო ოთახის მეორე ბოლოში. მისი ყმაწვილკაცური სილამაზე მომაჯადოებელ სანახაობად მეჩვენებოდა, განუწყვეტლივ უჩვეულოდ მიჩუყებდა გულს, მართლაც რომ საკვირველად მალეღვებდა; ასეთი რამ მემართებოდა მე, იმ ადამიანს, რომელსაც არასოდეს, არასოდეს უცხოვრია ბავშვებთან ერთად ერთ ჭერქვეშ; დღემდე არც ერთ ბავშვს არ ვიცნობ კარგად; ერთ მათგანთანაც კი არ მექონია სიახლოვე. გასაოცარი სიცხადით და განსაკუთრებით ხშირად მაგონდება ამგვარი დოდი: სძინავს თავჩაქინდრულს, სულ უცვლელ პოზაში წევს, მთელი ძალით დაჭყრდნობია იმ მარცხენა მკლავს, ბალიშის ქვეშ რომ შეუცურებია; ეს ფაფუკი და სათუთი სიმრუდე ისეთი საამოა, ვით ანტიკური ლარნაკის სახელური. არც კი ვიცი, რა უფრო ეამებოდა თვალს: მისი უძრავი, მოშიშვლებული, თალივით მორკალული მკლავის ცქერა, თუ მისი თოვლივით თეთრი გულმკერდის თვალიერება, რომლის ჰარმონიული, ნატიფი ღარებიც სახისაკენ მიიწევდნენ; მაგონებდა ხის იმ ტოტს, რომელიც კოხტად ჩამოკონწიალებული ნაყოფით ბოლოვდება; ან იქნებ თვით მისი სახე ატყვევებდა მზერას ყველაზე მეტად? სახე, ძილისაგან შარავანდედით გაცისკროვნებული, სულიერების ნატიფი საბურვლით მოსილი, ერთგვარი კრძალული ნეტარებით, კეთილგონივრული, დაურევბული, ბრძნული განცხრომით გამშვენიერებული, იმ ჯადოსნური ათინათით შემკული, ოქროცურვილი თაფლისფერი რომ დაჰკრავდა; აი, ასეთი საკვირველი ფერის არილი ციმციმებდა ჩვენს ოთახში, რომელიც ოდენ ნახევრად გაეჩირაღდნებინათ მზის კაშკაშა სხივებს... თუმცაღა, დღე რომ მოაწევდა, ყველაფერი შეიცვლებოდა ხოლმე – დოდი გაუჩერებლად მღერო-

და, ყვიროდა, მხედრისათვის ჩვეულ გულადობას, ცხენოსნისათვის შესაფერ სიმამაცეს, გაბედულებას, შეუპოვრობასა და უშიშრობას ამჟღავნებდა, ტრაბახობდა, ყოყორობდა, იკვეხნიდა, ბაქიაობდა, უბასუხისმგებლობას იჩენდა – ერთი სიტყვით, ერთობ თვალსაჩინო განსახიერება გახლდათ იმ თანამედროვე ქართული არისტოკრატიისა, რომელსაც უდავოდ აქვს პატივი, დეკორატიულ არისტოკრატიად იწოდებოდეს, მაგრამ, მიუხედავად ამ დეკორატიულობისა, გული ამიჩვილა, აღმაფრთოვანა და მომაჯადოვა. სწორედ იმათგან მოსდგამდა დოდის ასეთი აზროვნება, სულისკვეთება, წმინდა წყლის უმეცრება და უსაზღვრო შეუგნებლობა (ამასთანავე, ჰქონდა წარუხოცელი გალანტურობა, გულადობა და სიმამაცე, რომელიც არასოდეს ღალატობდა); იოტისოდენადაც კი ვერ იაზრებდა, რა ფასი ჰქონდა მიცემულ სიტყვას, ნაკისრ ვალდებულებებსა და სულიერ დამოუკიდებლობასა და თავისუფლებას... ყოველივე ამას ოდნავადაც კი არ ეტყობოდა არც თანდაყოლილი უკეთურება, არც სისხლსა და ხორცში გამჯდარი სიავე, არც სულმდაბლობა, არც სისაძაგლე; მართლოდენ იმიტომ ჰქონდა ასეთი ჩვევები, რომ მისი წინაპრები, ბანქოს თამაშს, ღვინის სმასა და ნადირობას რომ გადაჰყვნენ, არად აგდებდნენ სულიერ, შინაგან ცხოვრებას; მისი ყველა წინაპარი ასეთი თავაშვებული იყო; საუკუნეებს გაუძლო ამ ზნე-ხასიათმა, თაობიდან თაობას რომ გადაეცემოდა. საცოდავი პატარა! ისეთი გიჟმაჟი, ისეთი თავქარიანი, ისეთი ქარაფშუტა ჩანდა, როცა ამჩატებოდა და სისულელეებს სჩადიოდა... ასეთი იყო მას შემდეგ, რაც პირველად ოფიციალურად გამოაცხადა დაუმორჩილებლობა, ურჩობა გამოიჩინა, არ დაელოდა ზემდგომთა ბრძანებას და ჩემთან ერთად გაეცალა ტფილისს... ასეთი იყო მანამ, სანამ რევოლუვერი არ მოიმარჯვა და ტყვია არ დაიხალა (ჩვენი ხანგრძლივი ლაშქრობის დასასრულს მოხდა ეს); ასეთი ადამიანი იყო – სულ მცირე საყვედურის ატანაც კი არ შეეძლო! უვარგისი გამოდგა საზოგადო საქმეთა შესასრულებლად, მაგრამ საოცრად საამო იყო მისი ამგვარი ფუქსავატობა და გამოუსადეგრობა; ამას ერთვოდა ის მგზნებარება და სიცხოვლე, რომელსაც დაცხრომა არ ეწერა; ვერასოდეს მომწიფდებოდა, ვერ დაღვინდებოდა... რაში გამოიყენებდა ეს სამყარო (რომელსაც არაფერი სჭირდებოდა ძალ-ღონის გარდა) დოდის, ამ დაუფიქრებელი, წინდაუხედავი, განუსჯელი, მარმაცი, მანტი და განებივრებული ყმაწვილკაცის მყიფე მამოძრავებელ ძალას? რას არგებდა ქვეყნიერებას?

– გარდა ამისა, – განაგრძო დოდიმ, – დეპუტატმა უყოყმანოდ და გადაჭრით მითხრა, არ გირჩევთ ხვალ გამგზავრებას, გადაიფიქრეთ წასვლა და ხელი აიღეთ მაგ განზრახვაზეო...

ისეთი დეტალები გამიმხილა, წუთით ვიგრძენი, რაოდენ დიდი საფრთხე გვემუქრებოდა; შეიძლებოდა, ჩვენი ყველა გეგმა ჩაშლილიყო, ყველაფერი არეულდარეულიყო და თავდაყირა დამდგარიყო. მოწოდებული ინფორმაცია მეტისმეტად ზუსტი იყო და ამიტომაც, არ შეგვეძლო, დაუდევრობა გამოგვეჩინა, არად ჩაგვეგდო ხიფათი და ყურად არ გველო გაფრთხილება; არასგზით არ გამოვიდოდა ამის უგუ-

ლებელყოფა. მეორე დღე გაილია აქეთ-იქით სირბილსა და გამალებულ გამოძიებაში – გავცვივდით დამფუძნებელთა კრების სასახლეში და იქ ვცადეთ ყველაფრის გარკვევა; ორმა გულთბილმა და თავაზიანმა დეპუტატმა (ხევსურეთისა და თუშეთის წარმომადგენელნი გახლდნენ) გავეშებით, გადაჭრით და დაჟინებით უარყო ჩვენი ინფორმაცია; ერთმანეთის მიყოლებით, დაბეჯითებით განაცხადეს, ჩვენს პროვინციებში სულ ოდნავი არეულობაც კი არააო; მერე სამხედრო სამინისტროში გავქანდით და იქ მოვინდომეთ ყველაფრის გამოჩხრეკა; იქ არაფერი იცოდნენ, ისევე, როგორც ყველა იმ სამმართველოში, პატივს რომ სცემს საკუთარ თავს; მერე გავიქეციტ საგარეო საქმეთა სახელმწიფო მდივნის მოადგილესთან, ბატონ საბახტარაშვილთან; ეს უკანასკნელი გაბედული, ნერვული, დაუდეგარი, დაუცხრომელი, მოუთმენელი, სულსწრაფი და შფოთიანი იყო; არაქათი გამოეცალა, გაღიზიანდა და გული გაუწვრილდა ურთიერთსაწინააღმდეგო არგუმენტების მოსმენისას; ამიტომაც, გადაჭრით გვითხრა, გადავწყვიტე, კატეგორიულად აგიკრძალოთ ტფილისის დატოვებაო; დასძინა, ფეხი არ მოიცვალოთ დედაქალაქიდან, სანამ ზუსტ და უტყუარ ცნობებს არ მოგვაწვდიანო. აი, მაშინ კი იძულებული გავხდი, ხელახლა შევდგომოდი ჩემი მოგზაურობის მარშრუტის მოხაზვას, მომეთხოვა ახალ-ახალი საბუთები, დაჟინებით მეთხოვა სხვებისთვის შუამავლობა, ნაირნაირი რეკომენდაციები... მოთმინების ძაფი გამიწყდა. ჩვეულებისამებრ, ეს ერთობ იოლ და სწრაფად შესასრულებელ ოპერაციად მეჩვენება; ძალდაუტანებლად, უწვალებლად და მარდად ვაკეთებ ყველაფერს... და გარდა ამისა, შემრცხვა, მღელვარებამ რომ მძლია, მივწვდები წამიერ სისუსტეს, სულიერად გავტყდი და თავბარი დამეცა... „ეშმაკმა წაიღოს ჩემი თავი და ტანი, თუ კიდევ ერთ ადამიანს მაინც ვკითხო რჩევა! წავიდეთ აქედან... გზას რომ დავადგებით, ცხადად, საკუთარი თვალით ვნახავთ, რაც დაგვემართება!“ – წამოვიძახე ბოლოს... და დოდიმ გაიმეორა: „წავიდეთ აქედან“. ამ ახალგაზრდას აღარ შეეძლო თავისი სამსახურის ატანა; აღარ შეეძლო ტფილისში მსახურება და იტანჯებოდა... ტუჩის კუთხეში გაერჭო თავისი მარადიული, განუყრელი სიგარეტი და ცუღლუტ ქუჩის ბიჭუნასავით მიკრავდა თვალს.

მატარებელში რომ ვიჯექი იმ ზაფხულის დამდეგს, თვალი შევაველე თითქოსდა ერთბაშად მოვაკებულ-მოსწორებულ კახეთს, რომელიც დაფარული იყო ფერმიქრალი, მწვანე ველ-მინდვრებითა და მუქი მწვანე კორომებით; საქართველოს ეს მხარე გადაჭიმულიყო იმ საავდროდ მოქურუხებული, თითქოსდა მოქანცული, მიბნედილი, დუნე და უსიცოცხლო ცის ქვეშ, რომელიც თითქოს მძიმედ დასწოლოდა დედამიწას; ისე მოქუფრულიყო, გვეგონა, სადაც იყო, ჭექა-ქუხილი დაიწყებოდა, ან ქარიშხალი ამოვარდებოდა. კახეთს ამკობდა ხევები, ხრამები, ღარტაფები, ღრეები, ღრანტეები; მოყვითალო, ქვასავით მაგარ მიწასა და ლიოსებს ჰქონდა ნამზღვლე-ვები, უცაბედად გაჩენილი ბზარები და ნაპრალები, და მნახველს აოცებდა ამ განუყოფელ მთლიანობად ქცეულ, უკიდევანო სივრცეში იმ ვიწრო, უდრეკი, დაქანებუ-

ლი და დაკბილული ფიგურების დანახვა, რაღაცისგან გამოჭრილსა და გამოცალ-კავებულს რომ ჰგავდნენ. მაშინ უკვე ვიცოდი, რა მდიდარი იყო კახეთი, რაოდენ ბარაქიანი, ნოყიერი, ხვავიანი, დოვლათიანი და უხვმოსავლიანი მიწები იყო იქ, რადგან ეს მხარე მრავალგვარი ღვინით ამარაგებდა მთელ ქვეყანას; ამით ძლიერ ჰგავს შამპანის ისტორიულ ოლქს, ღვინოს რომ აწვდის მთელ საფრანგეთს. მიუხედავად ყველაფრისა, მხოლოდ შემდგომში გადაიშალა ჩვენ თვალწინ კახეთის დამატყვევებელი სიტურფისა და ნატიფი მშვენიერების სურათები – როცა შემოვიარეთ თელავი, მერე კი წინანდლისაკენ გავემურეთ; როცა დავინახეთ, რომ ასი პატარა სოფელი ისე გადაჭიმულიყო მთელი პროვინციის სიგრძეზე, ვით კრიალოსნისთვის გადანახულ ძაფზე ასხმული, კოხტად ჩამწკრივებული მარცვლები: მატანი, ახმეტა, ცხრაკარა (შეგვიძლია, ამგვარად ვთარგმნოთ ფრანგულად ეს უკანასკნელი: „ცხრა კარიბჭე“)... ამ არნახული, ჯადოსნური სილამაზის მზერით ვტკებოდით მდინარე ალაზნის გადალახვისას. წინანდლისაკენ მიმავალ გზას რომ გავცქეროდი, თითქოს პირველად აეხადა ფარდა კახეთის მშვენიერებას; თითქოს პირველად შემოედარცვა იდუმალების საბურველი; ეს გზა ისეთი მხურვალე და მყარი მეჩვენა, ვით ის შარა, სოფლის დედოფალმა რომ უნდა გაიაროს. ის, რაც მაშინ იქ აღმოვაჩინე, ყოველ ცისმარე დღეს მეორდებოდა, როცა ცხენებით დავცროდით დაბლობზე. არასოდეს განელებულა ამ ჯადოსნობის, ამ გრძნეულების ძალა, არასოდეს, წამითაც კი არ მიგრძნია, რომ უწინდებურად არ მიჩუყებდა გულს საკვირველი ხიბლი, სინატიფე და სილამაზე ნელსურნელების მკმეველი, სიცოცხლითა და სიცხოვლით სავსე პეიზაჟისა; სულ, სულ მალელებდა და მიჩქროლებდა გულს; მუდამ ავსებდა ჩემს გულს მგზნებარე, ცეცხლივით მწველი და ბუმბულივით მჩატე სიხარულით (ყოვლად შეუძლებელი იყო, სხვაგვარად მომხდარიყო); ეს ძლიერ ჰგავდა იმ ერთადერთ მაგიურ ლიქიორს, იმ ჯადოსნურ სითხეს, სრულყოფილება რომ მოაქვს ადამიანისათვის; ქვეყნად მარტოოდენ ამ ნექტარს ძალუძს, სრულქმნილება უბოძოს მოკვდავს.

თავდაპირველად, სითეთრის საამო შთაბეჭდილებით ვტკებოდით – იმ ნატიფი სითეთრის, იმ სათუთი და ფაქიზი სიქათქათისა, ახალმოჭრილ, ბზინვარე ვერცხლს რომ ამშვენებს; ეს ბრკიალა სითეთრე დამშრალ მდინარეთა ფართო კალაპოტებიდან იფრქვევა... დიდ-დიდ, გლუვ, კრიალა, ლაპლაპა კენჭებს შორის თავბრუდამხვევი სისწრაფით მოჩქევს წყალი; თითქოს სადღაც მიეჩქარება და მიგელავს; მოჩუხჩუხებს, მორაკრაკებს, მოედინება წვრილ-წვრილ ნაკადებად, აქაფებულია, ისეთი ფერისაა, რძეს მოგავონებთ, და იმ გლეხის ნარინჯისფერი ხიფთანი, ბობოქარ ზვითებს რომ მიაპობს, ისე იფეთქებს და ამოსკდება ამ მოელვარე მონოქრომიის სიმქრქალესა და ფერმიხდილობაში, ვით უეცრად ჩაბერილი ბუკის კივილი, უმაღვე რომ მიწყდება. შვეულად აღმართული კედელი მომაგონებს მოხუცის სახეს, რომელსაც რომელიღაც ცხოველის ტყავის ფერი ადევს და ამკობს ხავერდოვან გვიმრათა ნორჩი ფოთლები, ხშირ თმასავით, ახალგაზრდულ დაღალებივით რომ ჩამოშლი-

ლან. ცაცხვების ფოთლები ბადეებს ჰგვანან; თითქოს ამ დაქსელილ ბადეთა უჯრედებში ცხრილავენ და ფილტრავენ მზის სინათლეს, სანამ მიწაზე დაეცემა; ეს შუქი ჩრდილში გახვეულ ტბებად იდღაბნება ნიადაგზე. ორი დაბალტყეოვანი, მიჯრით მიდგმული სახლი ერთმანეთს ეხება; საკვირველად ჰგვანან იმ ტყუპ დებს, ძლიერ რომ უყვართ ერთმანეთი; ორივე ელვარებს, ბრწყინავს, ალისფრად ღაღანებს, ღუდღუდებს, ყაყაოსავით წითლად ელვარებს; კვიპაროსთა მწკრივი იკვეთება ფაფუკ, ხავერდოვან ღრუბელთა ფონზე; თითქოს საგუშაგოზე ასული დარაჯები არიან ეს ხეები; თავს აფარებენ ლაჟვარდისფერი ნაქარგებით მორთულ, ფირუზისფერი ფარდაგებით შემკულ იმ ჯიხურს, მხოლოდ გუშაგთათვის რომაა განკუთვნილი. აქ მარტოოდენ ფერთა თამაშია გაჩაღებული; აი, სწორედ ესაა ის ერთადერთი მოვლენა, თვალს რომ იტაცებს; ამის გარდა არაფერი ხდება აქ... ხორბლის ყანები ემსგავსება ახალჩამოსხმულ, ხასხასა, ცინცხალ, დრეკად ოქროს, სულ იოლად რომ დაჰყვება ჩამომსხმელის ნებას; ეს თავთავები გადაიქცევა იმ სუფთა, კრიალა, ბზინვარე ლითონად, ადვილად რომ იდრიკება და ილუნება, გაუთავებლად ბიბინებს, ღაღანებს, ლივლივებს, ირხევა და ტალღასავით ღელავს, რაწამს მხიარული სიო თითქოსდა სიცილკისკისით გადაუქროლებს; და ამ ათასფრად მოციმციმე, ჯადოსნურად მოკიაფე, მობრჭყვიალე, უკიდებანო განფენილობაში (სწორედ ისე ელავს, ვით ის ზღვა, დილაადრიან რომ დაანათებს მზე) განცალკევებით მდგარი ხეები და თითქოსდა ჯმუხი, დაბალ-დაბალი ბუჩქები პაწია კუნძულებს დღაბნიან მიწაზე, რადგან მათ ფოთლებზე გაჩენილი შავ-შავი წინწყლები და ლაქები წამის გაელვებაში ეშხეფებიან ბალახზე. სიმინდი ამოზიდულა იმ მაგარ, სქელ-სქელ, ქვასავით მყარ ღეროებად, ერთგვარი ცივი სიმწვანე რომ დაჰკრავთ, და თვალუწვდენელი ვენახების, გაფურჩქნილი ზვრებისა და აყვავებული ვაზის ფოთოლთა უსაზღვრო სიუხვეს ისე შთაუთქმავს უდრეკი, გამძლე და მსხვილ-მსხვილი ჭიგოები, მათი წვერებიც კი არ მოჩანს. აშოლტილი, ტანკენარი ალვის ხეები ჩამწკრივებულან ბორცვებსა და გორაკებზე, გოროზად აღუმართავთ საკუთარი წაწვეტებული, თითქოსდა ბასრი, უსწორმასწორო, დაკბილული სილუეტები; დროდადრო აიქოჩრება კორომი, მაგრამ იოტისოდენა მუქარასაც კი არ მოასწავებს ამგვარი მოძრაობა, მეგობრული კეთილგანწყობითაა სავსე, ოდენ იმას ლამობს ხეთა ჯარი, როგორმე გაანელოს სულშემხუთავი, თვალისმოძრეულად მოკაშკაშე სიციხე-პაპანაქება, ოდნავ მაინც დააცხროს ეს მოციალე მცხუნვარება იმ საამოდ თბილი ჩრდილის წყალობით, ბალდახინივით რომ აფენს არემარეს; იმ მბრწყინავი, წყნარი ათინათით, მიწაზე ჩამოცვენილი ოქროს დუბლონებით¹ შეკოწიწებულ, უწყინარ, უშფოთველ ცივინათელას რომ მომაგონებს; კორომი გულუხვად აფრქვევს

1. ძველებური ოქროს მონეტა, გავრცელებული ესპანეთსა და საფრანგეთში, აგრეთვე შვეიცარიასა და იტალიაში.

მიდამოს მუსიკის მთრთოლვარე ჰანგებს — მარჩხი წყლის ჩქრიალს, ფაჩუნს, ჩუჩუნს, შრიალს, შარიშურს; უშურველად აკმევს იმ პაწია, ხასხასა, ცოცხალი ყვავილების დამატრობელ სურნელებას, თითქოს კმაყოფილნი და ბედნიერნი რომ არიან; უხარიათ, საამო სურნელით გაჟღენთილი სული რომ აღმოხდათ და ერთგვარ ხარკად მიართვეს გაცისკროვნებულ, შარავანდედმოსილ ქვეყნიერებას. კამეჩები ხაკისფერ გუბურებში ჩაწოლილან; წყალს დაუფარავს მათი ზორზოხი ტანი; ტბორებში ჩაფლულა მათი მძიმე სხეულები; სწევნ გაძურულ თავებს, წყლის ზედაპირს ეხებიან, გაუნძრევლად წვანან, გარინდებულან; შეხედავს თუ არა მათ ადამიანი, უმაღლ მოაგონდება უცხო ქვეყნებში გავრცელებული რომელიღაც უშველებელი, შავი წყალმცენარეები და ის უკიდევანო ფლორა, წყლის სამყაროში რომ უდევს ბინა; და როცა კამეჩები გულს იჯერებენ მოსვენებით და წამოიმართებიან ხაკისფერი გუბურებიდან, ხევდებიან, ქვავდებიან თითქოსდა ტყვიასავით დამძიმებული ნეტარებისა და განცხრომისაგან, ემსგავსებიან იმ ახალშობილ პირუტყვებს, რომელთა ფიგურებიც ოსტატმა მტკიცედ და მკვიდრად გამოძერწა ფერმიმქრალი, ლაქწასმულივით პრიალა თიხნარისგან. წითლად და თეთრად დაფერილ, მდიდარ სოფლებში — იქ აღმართულ სახლებს ღია აივნები შვენიით — მოჩანს პატარა სვეტები, მოაჯირები, კუწუბები, ყვავილწუნულები, ოთახის კუთხეებში დადგმული, ხისგან კოხტად გამოჭრილი ავეჯი; პარკს ჰგავს ეს მთრთოლვარე კახეთი? რითი ჰგავს? მრავალფეროვანი, თვალწარმტაცი სანახაობით: ველებსა და მდელოებზე ყველაფერს წვენი სდის; იქ ძროხები გულდამშვიდებით ძოვენ, წყნარად იცოხნებიან და ბალახობენ, რადგან არც ადამიანები არ აწვალევენ და არც ძაღლები არ აბეზრებენ თავს; არ ჩქარობენ, აჭიანურებენ ძოვას, რათა როგორმე გაიხანგრძლივონ სიამე, ინეტარონ და დატკნენ ანკარა წყალივით გრილი ბალახის ცოხნით, გემო ჩაატანონ თითოეულ ღერს... და რაწამს ბუზები მეტისმეტად მწარედ უკბენენ, მწვანედ აქაფებული დორბლით ერთიანად მოთხვრილნი, თავს უხახუნებენ ხის ტანს, და ეს მოძრაობა მომაგონებს უტკუო, მოუსამრებელი და ყეყეჩი ბერიკაცის მექანიკურ, ანგარიშმიუცემელ თავის კანტურს. თვალისმომჭრელად მოელვარე მტვრის კორიანტელი ირევა ფართო შარავნებზე; განიერ გზატკეცილებზე მამალი ინდაურები დააბიჯებენ დედლების წინაშე, თავს აწონებენ მათ, ისე მედიდურად მიიწევენ წინ, ისე იბლინძებიან და იფხოვებიან, ისეთი იერი და სიარულის მანერა აქვთ, საუცხოო, დიდებული, მდიდრული და ბრწყინვალე მოკაზმულობით გამორჩეულ სულთნებს ჰგვანან; მამალი იხვები, ნაკადულთა პირას რომ დგანან, ისეთი ლამაზები არიან, როგორიც მათი ის „ძმები“, იაპონელმა ფერმწერებმა რომ გამოსახეს ტილოებზე; შემოგვყურებენ ყვითელი ფოთლებისა და ჩალის გროვებზე წამოწოლილი ჟღალი ხბორები: დაჰყრდნობიან იმ მოხრილ ჩლიქებს, ბუნდოვნად რომ მოჩანს; აღარ იციან, რა მოუხერხონ თავიანთ კუდებს; მიაბიტი, უმანკო თვალები აქვთ; და ბალანი, რომელსაც დედები ლოკვისას უშლიან, პაწია, გახამებულ საყელოსავით შემოვლებიათ ჩლიქოსნებს. მოჩანს პატარა ღორების

კოლტი, ლეგიონივით ურიცხვი; ამ ცეროდენა ღრუტუნებს დაგლუვებული დინგები აქვთ, მოშიშვლებული, ბალანგაცვენილი ბარკლები, თითქოსდა უხამსად და უგვანოდ ვარდისფერი; მარდად გარბიან, იმ ვეებერთელა ჯაგრისებს ჰგვანან, რომელთაც სული შთაბერეს და სიცოცხლე უბოძეს; მკვირცხლად მირბიან და თან ღვარძლიანად ჭყვიან, ბოლმიანად და გესლიანად ჭყვიტინებენ, თითქოს უნდათ, მთელ სამყაროს ამცნონ საკუთარი აღმოჩენების, იმედგაცრუების, მარცხისა და გაწბილების შესახებ; ტყრუშული ღობეები და სხლტეები ერთთავად მოჭედილი და კოხტად მოოჭვილია მყიფე, ლაღად მონარნარე ვარსკვლავებით; იმდენ ჩიტსა და სხვა ფრინველს დაუბუდებია ხეხილის ბაღებში, თითქოს თვით მწვანედ მობიბინე მცენარეულობასაც კი აღმოხდება ჟივილ-ხივილი საამური სურნელების კმევისას, თითქოს იმ მოტიკტიკე და აჟივჯივებულ ფრთოსანთა ორკესტრად ქცეულა ეს მწვანე საფარი; ის ათასობით ბილიკი, ოქროცურვილ გვირაბებს რომ ჩამოჰგავს, უსასრულოდ მიიკლაკნება დიდრონ, მომრგვალებულ, ლაზათიანად მორკალულ იმ ტოტებს, რტოებსა და ვარჯებს ქვეშ, თვალწარმტაც თაღს რომ მოაგონებენ მნახველს; და ყველა ბავშვი გიჟმაჟი, ანცი და ონავარია; გაუთავებლად ცელქობენ და ცუღლუტობენ...

კახელები², გზად რომ შემოგვხვდნენ, ძალზე მკვირცხლნი, სიცოცხლით სავსენი, დაკუნთულნი და დაძარღვულნი იყვნენ; ისეთი მშემოკიდებული, ერთიანად გარუჯული სახეები ჰქონდათ, იმ იაღქნებს ჰგავდნენ, მზის მცხუნვარე სხივებმა რომ დახრუკეს, ცელქმა ნიაგმა კი ზღვისა და მარილის მკვეთრი სუნით გაჟღინთა; აი, ასეთი ყაიდის კაცები არიან – გამჭრიახნი, თითქმის მგზნებარენი და თავგადაკლულნი; მოკლედ შეკრეჭილი თმა შვენივით, მაგრამ კუპრივით შავი ქოჩორი ჩამოშლიათ შუბლზე, ხშირი წვერი უფარავთ სახეს, ფეტრის პატარა, მრგვალი ქუდები დაუკოსებიანთ კინკრიხობე; სასულიერო ორდენთა გულმხიარულ, ლალ, ხალისიან, სიცოცხლით სავსე წევრებს მაგონებენ. გარდა ამისა, დაცინვის, ღრეჭისა და ლაზლანდარობის დიდი მოყვარულნი არიან, მახვილგონივრული და ენაშტარე სიტყვებით ამათრახებენ ყველას; ისე ამასხარავებენ და აპამპულავებენ ერთმანეთს, გულს უკოდავენ კიდევ... კართა ზღურბლებთან სულ ახლოს მოჩანს ქვევრები – ეს საკვირველი, მართლაც რომ ფანტასტიკური, ალისფერი ამფორები, რომლებშიაც ღვინოს ინახავენ; ქვევრები ნახევრად ჩაფლულია მიწაში; საწნახელს უწოდებენ ყურძნის რუხ საწურს, გიგანტური ხის ტანისგან გამოჭრილს; თორნე ჰქვია ღუმელს, ერთგვარ საველე ფურნეს, რომელშიაც პურს აცხობენ; დაბალია, მრგვალი, კოხტად დაწნეხილ-დაგრეხილი შტოებით შემკული; ქალები ფუსფუსებენ და გაუთავებლად ფაცაფუცობენ ფერგახუნებულ კალოებზე, უსასრულო ვენახებში; ვერცხლისფერი მაქმანები-

2. ქართველები კახელებს უწოდებენ ამ მხარის, ანუ კახეთის, მკვიდრთ; ეს მრავლობითი რიცხვია; მხოლობითი კი ასეა: „კახელი“.

თა და სირმებით გარშემოვლებულ, დაპლისულ თეთრ თავსაბურავებს ქვეშ ბევრ მათგანს ჯერ კიდევ მოუჩანს მუქი ფერის ხავერდის შუბლსახვევი; და ბიბილოებზე ჩამოკონწიალებული ორი დიდრონი საყურე ეშვება მათ ფერმიმქრალ ლაწვებზე... შვენით ძველებური ქართული ვარცხნილობა, ესოდენ კოხტა, მომხიბვლელი და მშვენიერი, უკვე სანთლით საძებარი. ახლა ძალზე იშვიათად თუ გადაეყრებით ქართველ ქალს, რომელიც თავს იწონებს ასეთი ვარცხნილობით. ძველთაძველი ციხესიმაგრეებით შეფენილან მთათა თხემები; ყველა ციხესიმაგრეს ერთი დასაბამი აქვს; შორეულ მეთორმეტე საუკუნეში უნდა ვეძებოთ მათი საძირკვლები; სწორედ იმხანად იჯდა ტახტზე ის გასაოცარი, ბუმბერაზი, ფენომენალური, საარაკო მონარქი, თამარ დედოფალს რომ უწოდებდნენ; ამ კეთილშობილ, დიდგვაროვან და პატივსაცემ ქალბატონს, კავკასიის ამ სემირამიდას, მეფის წოდება უბოძეს თანამემამულეებმა; მარი-ტერეზ ფრანგსაც ასეთი ტიტული მიანიჭეს საფრანგეთში; თამარმა მოკაშკაშე ტაძრებით, საყდრებით, ციხესიმაგრეებითა და სასახლეებით მოფინა თავისი ქვეყანა. ამ ნაგებობებმა უკვე დაკარგეს ოდინდელი დანიშნულება; დღეს ოდენ ქვების წყებად და იმ უზარმაზარ, განმაცვიფრებელ, შთამბეჭდავ გალავნებად ქცეულან, კრძალვასა და შიშს რომ აღუძრავენ მნახველს, თუმცა, ბუნების ძალების, სტიქიებისა და ჟამთასვლის გამოისობით, რკინასავით მტკიცენი და უდრეკნი გამხდარან; ფოთლებითაა გამოტენილი ის ნაცრისფერი, მომრგვალო კოშკები, სადაც ოდესღაც სათოფურები და ამბრაზურები გამოუჭრიათ; ქონგურებს შორის აცოცებული სუროს გვირგვინები ცოცხალ ქვებს ჰგვანან, და კიდევ უფრო ზევით მოჩანს ღია ფერის, გახუნებული, მეჩხერ-მეჩხერი შტოები, რომლებიც ისე იხრებიან და იდრიკებიან, ვით დაგრეხილი ბუმბულებისაგან შეკრული ის წრეები, სუვერენები და უმაღლესი ძალაუფლების მპყრობელნი რომ ატარებენ. ამ უზარმაზარ, კუშტ, ძლევა-მოსილ ნარჩენებს, ძველი დროების ვეება ნაშთად რომ მესახება, დღემდე შერჩენია დიდებული იერი, და როცა ეს ნანგრევები გოროზად გადმოჰყურებს თითქოსდა ავადმყოფურად ფერმკრთალ, მიტკალივით გაფითრებულ კლდეებს, როცა ყველაფერს იმდენად ერთნაირი შეფერილობა აქვს, რომ მნახველმა ისიც კი აღარ იცის, სად მთავრდება ქვა და სად იწყება ციტადელი, ჟამთასვლის ეს ნარჩენები თითქმის დიდებულ ელფერს ანიჭებენ თვალისმომჭრელად მოლიცლიცე და მოციალე პეიზაჟს; ისე დიდებულს, მოწიწებას რომ აღუძრავს ადამიანს; და თითქოს ახსენებს ამ ხალხს საკუთარ ბობოქარ, მძვინვარე, მეომრულ წარსულს. დაბლობის ერთი მხარე ჩაკარგულა ბუნდოვან და წამდაუწუმ ცვალებად პერსპექტივაში; მწუხრის ჟამს, ბინდუნდი რომ ჩამოწვება, დაბლობის ის ნაწილი თითქოს უკვალოდ ქრება, თითქოს ერწყმის ვარდისფერ და იასამნისფერ ღვარებს, რომელთა მოხაზულობაც ძლივს იკვეთება სივრცეში; და ისე შორეული ჩანს მისი მიჯნები და ზღუდეები, ჰარმონიულად ერწყმის, თვალწარმტაცად ეხამება გამქრქალებულ, თითქოსდა ღონემიხდილ ტონებს, თვით იმ ჰაერს, იდუმალი სადაფისფრით რომ ელავს, და ყველა ეს საზ-

ღვარი არამიწიერი და ჰაეროვანი ხდება ამ ცივი სინატიფისა და სისათუთის გამო. და დაბლობის მეორე მხარეს ჩამწკრივებულან მთები, რომლებიც თითქოს სადღაც მიეშურებიან და უჩინარდებიან... ეს კავკასიაა – მწვერვალთა ამ გრძელი წყების ჩრდილოეთით, მთებს გადაღმა, ერთიმეორის მიყოლებით ბინადრობენ ის ტომები, რომელთა მოსანახულებლადაც ჩამოვედი; ამ მთის გადაღმა ერთი ტომი სახლობს, აი, იმ მეორე მთის გადაღმა – მეორე... უსასრულო რიგია. დღის ნათლის ჯადოსნობა და სასწაულებრივი სილამაზე ისეთი მომნუსხველია აქ, რომ მთათა ვეება ჯაჭვმა, გასრესას რომ უქადის ყოველივეს, დაკარგა თავისი შემზარავი, მედიდური, გოროზი სიდიადე და შემადრწუნებელი, ამპარტავნული დიდმშვენიერება. გარდაისახა ეს კოლოსალური, უშველებელი ქმნილებანი, გადაიქცა ესტამპის დეკორაციად³, მიბნედილთა და მოქანცულთა ნელ პროცესიად; ჰგვანან იმ ზმანებებს, ოცნებებსა და სიზმრებს, ბანტად და უსიცოცხლოდ რომ მიირწევა. აღარაფერი დარჩა სრულქმნილი და მარადიული: იმ ცის თაღის ფონზე, რომლის დიდებაც, შარავანდედიც და საუცხოო ბრწყინვალეობაც წარმავალია, – ხან ტყავგაცლილი, უღალი მტაცებელი ცხოველის ბეწვს ჰგავს, ხან კი გლიცინიების მტევნებით შემკულ ოქროს ცხაურას მახსენებს, – იკვეთება მთები, ნაზი, ბუნდოვანი და თითქოსდა მოშვებული კონტურები რომ აქვთ; დამშვენებულნი არიან მოცისფრო-მოიისფრო, ბუმბულივით მსუბუქი, მაგრამ მაინც ხშირი ნისლით. ჰგვანან იმ მუსლინის ქსოვილებს, რომლებიც თითქოსდა გაქვავებულა... უჩვეულოდ ირეალური, არამიწიერი და სიზმრისეულია ყოველივე ეს, შთაგონებულს, ქიშკრას ჰგავს, მიჯნასავით არ უდევს ფართო პეიზაჟს, მაგრამ იზიდავს გონებას, ალაგზნებს და ფრთებს ასხამს, რათა როგორმე განაშოროს თავის ხილულ ზღუდეს, თავის თვალსაჩინო მიჯნას, გადაულახავ დაბრკოლებად რომ ელობება; რათა წარიტაცოს შორეთში, მერე კი გონი თვითონვე შეერწყება რაღაც ჯადოსნურ ეთერს, რომელიც გრძნებით შეკრავს და მონუსხავს ადამიანს; იშვიათად თუ ეღირსება მოკვდავი ამის ხილვას; და იმ ჰაერიდან, საამურ სურნელებას რომ აკმევს არეშარეს, იმ ფერებიდან, ცის ნამცვრევსა და უეცრად მოვარდნილ ღვარებს რომ ჰგავს, აჩრდილის მაგვარი, სანუკვარი, ფასდაუდებელი კავკასიიდან, მთრთოლვარე, გულის ამაჩქროლებელი მდუმარებიდან გამოსტვივის უცვლელი სინაზე (მძაფრად იგრძნობა მისი უძლეველი ძალა და გავლენა), უცვლელი, შეკავებული, გაჭირვებით დაურევბული სიხარული... და სული, თითქოსდა ფერიათა სათუთი, ფაქიზი, ბუმბულივით მჩატე ხელებით ნაალერსები, ბოლოს და ბოლოს, მინებდება იმ ენით აღუწერელი, საამური ზმანების, იმ გამოუთქმელი, ტკბილი ოცნების ტალღებს, ბედნიერებისა და ნეტარების უშრეტ წყაროდ რომ იქცევა.

3. ესტამპი – რაიმე გამოსახულების ანაბეჭდი ქაღალდზე, გადაღებული თვით მხატვრის ან ოსტატ გრავიორისაგან შექმნილი ფორმიდან.

თავი მეორე

შეგვიძლია, დანამდვილებით ვთქვათ, რომ კახეთს აქვს ორი მეტად მშვენიერი ღირსშესანიშნაობა; მათი ცქერა წარმტაც და დახვეწილ სანახაობასავით ახარებს ადამიანის თვალს; ერთია ალავერდის საკათედრო ტაძარი (საოცარი არქიტექტურის გამო), მეორე კი წმინდა იოანე ნათლისმცემლის სახელობის პატარა სამლოცველო (თვალწარმტაცი ფრესკების გამო), ალვანის ველთან სულ ახლოს რომაა აღმართული და ხეებით გარშემორტყმული. მომწუსხველ საოცრებათა სანახავად მივეშურებით. ადგილს რომ მივალწიოთ, ალაზანი უნდა გადავცუროთ, შევერკინოთ ზვირთებს და ფონს გავიდეთ. ამას თავს ვერ ავარიდებთ. მდინარე ხუთ ვეებერთელა ტოტად გაყოფილა; ყველა ერთნაირად შლეგი, ბობოქარი, მძვინვარე, მგრგვინავია და მოყვითალო ფერი დაჰკრავს; უკანასკნელი შენაკადი ძრწოლით მავსებს. ანაზდად, ცხენები მკერდამდე ჩაეფლნენ იმ წყალში, ქარბორბალასავით რომ ტრიალებს და მეც წამის უსწრაფესად შევბიჯე თითქოსდა თავდაყირა დამდგარ სამყაროში, ჩემ ირგვლივ თავბრუდამხვევი სისწრაფით რომ ბრუნავს მორევივით. მეჩვენება, რომ ცურვას შეუდგნენ ცხენები, ის ერთგული პირუტყვები, რომლებიც ჩვენი ესკორტის განუყოფელ ნაწილად ქცეულან; მე კი ვიცი, რომ გაუნძრევლად უნდა იდგნენ წყალში; რომ ჩემი ბედაური შედგა ბრტყელი ქვების გროვაზე, მერე კი უკან დაიხია; რომ წამის შემდეგ ამ აზვირთებულ მდინარეში შთავინთქმებით ყველანი. თავგზაარეული, გაგიჟებით ვლამობ შუა გზიდან მობრუნებას, უკან დახევას, გაქცევას; თავს არ ვზოგავ; ამასობაში, დოდი და ერთი მილიციელი მთელი ხმით ღრიალებენ, რაც ძალი და ღონე აქვთ, ყვირიან, რათა ხმა მიაწვდინონ ერთმანეთს, რადგან მდინარე ისევ ქუხილითა და გრიალით მოედინება, პირუტყვები კი ყურთასმენის წამლები დგაფუნით ყვინთავენ წყალში, გაუთავებლად ყურყუმელაობენ; ეს ორი კაცი მთელი ძალით ჩაჰფრენია ჩემს ალვირს; მიბრძანებს, თვალეები დახუჭეო. აღარაფერი დამრჩენია ამის გარდა. სხვა რა გზა მაქვს?! გარდა ამისა, ისე მწუსხავს, მაჯადოებს და მატყვევებს ცადაზიდული, ბობოქარი ზვირთების ცქერა, ისე მძაფრად ვგრძნობ, რაოდენ შემზარავი ტროპიკული ციკლონი გრგვინავს ჩემს მყოფე თავის ქალაში, ისე ნიაღვარივით ტრიალებს და აქეთ-იქით აწყდება, რომ მგონია, მე თვითონ, საკუთარი ნებით, ძალდაუტანებლად, ელვის სისწრაფით გადავეშვები ამ ღვარში. წინ მივიწევ, თვალდახუჭული, რაც ძალი და ღონე მაქვს, ვებლაუტები ბედაურის ფაფარს, ვეჭიდები ამ ერთადერთ მყარ საყრდენს; დროდადრო ფრუტუნებს ჩემი ცხენი, ხან შეკრთება, ხან მკვეთრი მოძრაობით გადაიგდებს თავს უკან, მე კი ცხადად ჩამესმის, როგორ ძალუმად გამოდევნის ნესტოებში ჩალვრილ, აქაფებულ წყალს (რაოდენ დიდ ძალას, შეუპოვრობასა და სულსწრაფობას იჩენს!). თითქოს მრავალი საუკუნე გავლიე ამ წყვდიადში, ამ თვალშეუვალ უკუნეთში, ამ გამაყრუებელ ხმაურში, დგაფუნსა და ორომტრიალში; მარტოოდენ ამ უსასრულო

სიბნელისა და დომხალის გაქრობის შემდეგ ავბობლდი რის ვაივავლახით გაღმა ნაპირზე. „აი, გულადი, გაბედული და მამაცი ქალი!“ – ამბობს ერთ-ერთი იმ მილიციელთაგან, ჩვენ რომ გვაცილებენ; თუმცა, ის კაცი კახელია და, ამასთანავე, მისი ირონია და სარკაზმიც დავიმსახურე.

ამასობაში, ვუახლოვდებით ალავერდის საკათედრო ტაძარს, ფერმიმქრალ, მომწვანო ველზე აღმართულს, ალაგ-ალაგ მიმოფანტული იმ უდრეკი კვიპაროსებით დამშვენებულს, გულმოკლულ მგლოვიარეებივით საშინლად დაღვრემილი იერი და გლუვი, მორუხო ტანი რომ აქვს; საყდარს უკიდევანო, საიმედო გალავანივით აკრავს გარს კედელი; საოცარი ფერი აქვს ამ ოსტატურად შემოვლებულ გალავანს, ისეთი, როგორიც ჰქონდათ შორეულ წარსულში აშენებულ, ჟამთასვლისაგან თითქმის ჩამონგრეულ კოშკურებს, სასახლეების, ციხე-კოშკების შავ სათოფურებსა და ამბრაზურებს... ამ ტაძრისათვის თვალის ერთი შევლებაც კი საკმარისია, რათა აღფრთოვანება დამეუფლოს; გულს მიჩქროლებს, მალელებს, მანცვიფრებს, საოცრად მძაფრ შეგრძნებებს აღმიძრავს მისი შთამბეჭდავი შეუდრეკლობა. ეს ველი საყოველთაოდ ცნობილია ისტორიაში: ქართველები და სპარსელები სწორედ იქ შეერკინნენ ერთმანეთს გამშაგებით, ის ვეებერთელა ეკლესია კი, მარადიულ ნიშანსვეტად რომ აზიდულა იმ ველზე, საუკუნოდ ასეთი დარჩა – კუმტი, სადა, ღარიბული; ჰგავდა იმ დაჩაჩანაკებულ ბერიკაცს, რომელიც, რაკი მთელი ცხოვრების განმავლობაში აკვირდებოდა ადამიანთა ზღვარგადასულ სიშლეგეს, მეტისმეტი მოუვიდა, ყელში ამოუვიდა იმ შემოღილ რადიკალთა მძვინვარება და თარეში, განუდგა ყოველივეს, განეშორა ამქვეყნიურ ქაოსსა და ამაოებას, მოსწყდა ყოველივე იმას, რაც სრულიად არაა არსებითი და უმთავრესი, გახევდა, გაირინდა, სული განაბა, საკუთარ ნატყუში გამოიკეტა, გაქვავდა და გაილურსა ერთგვარი დიადი, მოწიწების აღმძვრელი, უკაცური და შიშველი უბრალოების საბურველში გამოხვეული. ჩემი აზრით, ყველაზე მაღალი საკათედრო ტაძარია საქართველოში; ასე მგონია, ამ ქვეყანაში არასოდეს მინახავს მასზე მაღალი საყდარი; ქვებითა და მძიმე, ხეში აგურებითაა ნაგები, შეუვალი სიმკაცრით, მძიმე, ყოვლისმომცველი თეთრი სიდიადით გამორჩეული. თითქოს არ იკადრა არაფრის მორთვა, არც გარეთ აღმართული ჯვრების, არც იმ ქვების გამშვენება, რომლებიც, ჩვეულებისამებრ, თვალწარმტაც ნაქარგობებივით ამკობენ რელიგიურ ნაგებობებს. ამ ტაძარს სულაც არა აქვს არც მოხატულობა, არც ემბლემები, არც სიმბოლოები, და მთელი მისი ამაღლებულობა და დიადი მშვენიერება იმალება მისი მარტივი, მაგრამ ძლიერი სტრუქტურის, მისი ცივი, მისი მონოტონური უმფოთველობის, ერთფეროვანი, აუმიღვრეველი სიმშვიდის მიღმა.

თელავი პატარა ქალაქია, მუდამ მოწითალო ელფერით დამშვენებული, დუქნებით სავსე, ხეებში, მწვანედ მოღალანე ბორცვებსა და გორაკებში ჩაფლული; იქ არის ერთი გამხირი, რომლითაც დიდად ამაყობენ და თავს იწონებენ თელავის ბინადარნი; საოცარ სიამესა ჰგვრით იქ სეირნობა; ქალაქს აშშვენებს XVII საუკუნეში აგებული ციხესი-

მაგრე, რომელსაც აქვს კომპურები, კომპები, დაკბილული, ქონგურებიანი გალავანი, მიწისქვეშეთში ჩამალული გვირაბები; და ქალთა გიმნაზიაში არის სამლოცველოდ გადაკეთებული, სპარსული ორნამენტებით შემკული თეთრი ოთახი, სადაც სული და-ლია მეფე ერეკლე მეორემ. მე და დოდის სწორედ თელავში მოგვივიდა ჩხუბი პირვე-ლად: დილის რვა საათზე უნდა გავმგზავრებულიყავით მის ერთ-ერთ თანაშემწესთან ერთად; მას შემდეგ, რაც ზედიზედ ოთხჯერ გავგზავნეთ ადამიანები მის მოსაძებნად, შუადღისას გამოჩნდნენ ცხენები, მაგრამ არსად ჩანდა ის თანაშემწე; ვერც ის პირუტ-ყვები დავინახეთ, რომელთაც საპალნესა და მთელ ჩვენს ბარგი-ბარხანას ავკიდებ-დით. დოდი თავგაბეზრებული, მოქანცული და გულგაწვრილებული ჩანდა, რადგან არც მანამდე არ დაუკლია ცდა ყველაფრის მოსაგვარებლად; არაქათი გამოაცალა ძალ-ღონის უკიდურესად დაძაბვამ; კვლავ სიგარეტი გაერტო ტუჩის კუთხეში, უმ-ფოთველად, აუძღვრეველი სიმშვიდით უჭვრეტდა იმ მილიციელის თავბარდაცემულ და შეძრწუნებულ სახეს, რომელსაც დაავალა, სწრაფად აეჩხორა და უწესრიგოდ აე-კოკოლაგვებინა საკუთარი ცხენის ზურგზე ორი წყვილი ხურჯინი, ლეიბი და რამდენიმე საბანი! რახან ისედაც აღარ შემრჩენოდა ძველებური სიმშვიდე, ამევსო მოთმინების ფიალა, ხმას ავუმაღლე, ფრანგულ ენაზე მოვეყვი გმობასა და ძაგებას, ყველაზე გამაყ-რუბელი და ჩქარი ფრანგულით ავლაპარაკდი; ბოლო არ უჩანდა ამ გაუთავებელ კილვას, დაბეზლებასა და მხილებას; ვგმობდი, ვამუნათებდი და ავად ვახსენებდი ყვე-ლა სამმართველოს; გავიძახოდი, ყველა ქვეყნის ადმინისტრაცია ერთნაირია-მეთქი; ვაქებებდი ჩემს პატარა, საყვარელ ორდინარეც ოფიცერს,⁴ მოვუწოდებდი, დაბრუნე-ბულიყო ტფილისში, წარმდგარიყო უფროსობის წინაშე, გულწრფელად ელიარებინა მარცხი, გამომეტყდარიყო, რომ არ ჰქონდა ფხა, უნარი და საკმარისი კომპეტენცია, არ შესწევდა ძალა, თავი გაერთვა დაკისრებული მოვალეობისათვის. ქვეყნად არ მეგუ-ლებს ხალხი, რომელსაც ისე არისხებს იუმორის საჯარო გამოვლინება (თუნდაც, ქა-ლის მხრიდან), როგორც ქართველებს; ვერაფრით მიიღებენ სახალხოდ თქმულ ხუმ-რობას; უეცრად შემოგწყრებიან. დოდის ანაზღად შეეცვალა გამომეტყველება, მოის-როლა ტუჩებს შუა გარჭობილი სიგარეტი, ცხენზე ამხედრდა, მარჯვედ დაჯდა უნაგირ-ზე, ფეხები ჩამოუშვა, უზანგში გაუყარა, სადღაც გაქროლდა და ათი წუთის შემდეგ დაბრუნდა; ხმას არ იღებდა და ეს ყველაზე მედიდური და ამპარტავნული დუმილი იყო ამქვეყნად; მოეყვანა პირუტყვი, რომელიც, უბრალოდ, ჩამოერთვა ვიღაც გამ-ვლელისათვის. მთავრობამ სასტიკად აგვიკრძალა ასეთი ხერხებით ფონს გასვლა, თუმცაღა, ვინ იცის, რამდენჯერ მომიწევდა მგზავრობისას იმის დადასტურება, რომ ჩემი თვით ყველაზე ელემენტარული პრინციპებიც კი უკვალოდ ქრებოდა თითქოსდა

4. სამხედრო მოსამსახურე, რომელიც მიმავრებულია მეთაურზე (ოფიცერზე) და ასრულებს მის ცალკეულ დავალებებს, ემსახურება მას.

რაღაც მაგიის, ჯადოსნობისა და გრძნეულების წყალობით, როგორც კი განსაცდელში ჩავვარდებოდი და მივხვდებოდი, რომ რაღაც უცხოობლად მჭირდებოდა. და ბოლოს და ბოლოს, ვირწმუნე, რომ სწორედ გარდაუვალი აუცილებლობაა ის ერთადერთი ღვთაება, ადამიანთა ცხოვრების მართვის სადავენი რომ უპყრია ხელთ... თელავიდან ალვანის ველამდის, ალვანიდან თუშეთამდის გადაჭიმულ ტერიტორიაზე ერთმანეთს მოსდევენ დაბლობები, ბოლო არ უჩანს ამ მწვანე ვენახებს, ამ უკიდევანო ზვრებს, ამ შეფოთლილ ვაზს, ამ ცისფერ ყვავილებს, მინანქრის ლურსმნებს რომ მომაგონებენ; ველები და მდელოები მზის კაშკაშა სხივებით გაჩირალდნებულ, ნაქარგებით დამშვენებულ ფარდაგებსა და ხალიჩებს ჰგავს; ამ მწვანედ მოღალანე ხალიჩებსა და ფარდაგებზე კი მოჩანს ხორბლის სიყვითლეშეპარული თავთავები, გაქვავებული აფსკები, უძრავი, ოქროსფრად მოელვარე სიციხე-პაპანაქებისაგან თითქოსდა გახევებული; დაქრის მათრობელა, მომწუსხველი, თავბრუდამხვევი სიო, საამო ფშვინვას რომ მახსენებს; ყოველივე ეს ემსგავსება მეფეთა მიწებიდან წამოხეტებული სულისაგან გამოცემულ დანაბარებს; და იკვთება იმ ირეალურ, სიმბრისეულ, დაბალ-დაბალ მთათა, გორაკთა, ფერდობთა, ბექობთა, კორტოხთა და მწვერვალთა რიგი, მომცრო ბუდეებში დაუდევრად, ზანტად და გულგრილად ჩასმულ პატიოსან თვლებს რომ ჰგავს; იმ უწონო, იდუმალებით მოცულ ძვირფას ქვებს, რომელთაც სულ მთლად დაუკარგავთ სიმყარე, სიმკვრივე და სიმტკიცე... პატარა ტყე აიქორჩება შუა გზაზე, თითქმის დანგრეული კოშკის მოპირდაპირე მხარეს, და, აი, დოდი მოულოდნელად, მკვახე ტონით მიბრძანებს, ჩემ ზურგსუკან დადექიო. „რატომ?“ – ვეკითხები გაოგნებული. „საფრთხე გემუქრება!“ – აი, ასეთ პასუხს მაძლევს ჩემი დამცველი. ბუნებრივია, მისი ბედაურის გვერდით შევყენე ჩემი ცხენი; მაშინლა შევიტყვე, რომ ჩვეულებრივ, სულ იოლად გამოიჭრებოდნენ ხოლმე ავაზაკები ტყიდან და ლამის ჩამოქცეული კოშკიდან (სულ ხუთი მხეცი ყოფილა იმ ბანდაში), დათარეშობდნენ, წარმოუდგენელ სისასტიკესა და მკვლელობებს სჩადიოდნენ, ქურდობდნენ, შეუბრალებლად ხოცავდნენ და ძარცვავდნენ ხალხს... ერთ-ერთი მილიციელი კახელია, – ასე უწოდებენ კახეთის მკვიდრს საქართველოში, – მართლაც მეტად ჭკვიანი, მარჯვე, მოხერხებული, გაწაფული და ენერგიული კაცი; როგორც გავიგე, სულ ცოტა ხნის წინ გამოასალმა სიცოცხლეს ერთ-ერთი ბანდიტი; ყოველწამიერ მოელოდა სხვა ყაჩაღთა შურისგებას; ეგონა, არ შეარჩენდნენ ამხანაგის მოკვლას. ერთი საათი გაილია ლოდინში; თოფი გარდიგარდმო გადაედო უნაგირზე; მთელი ამ ხნის განმავლობაში განუწყვეტლად ზვერავდა იდუმალების საბურველში გახვეულ ხეებს; ჯაშუშივით თვალმოუშორებლად აკვირდებოდა ყველაფერს; გამჭოლი მხერა ჰქონდა; არაფერი გამოეპარებოდა მის მახვილ თვალს. მისი თანამგზავრი, შავ-შავი, მშვიდი, უწყინარი, აღუშფოთველი კაცი, ოდნავადაც კი არ ირხეოდა. „აბა!“ – წამოიძახა, როგორც კი კითხვა დაუსვით. „კარგად ვიცი, აქ არიან ის ყაჩაღები, მაგრამ, აბა, მხოლოდ ცქერით ხომ ვერ გამოვიყვან სამალავიდან?!“ – დასძინა ბოლოს. გამახსენდა ის დღე, ალვანისაკენ რომ გავეშუ-

რეთ... დასრულდა ხანგრძლივი მგზავრობა; როგორც იქნა, ჩავედით; მეორე დღეს, როცა ისინი თელავში ბრუნდებოდნენ, შუაგულ ტყეში გააცხებინეს სული ერთ-ერთ ქურდს; და მომაგონდა, რომ სწორედ იმ დღეს დავინახე, როგორ შემოვიდა სოფელში თივით დაზვინული ურემი; ამ გროვიდან გამოირილიყო ორი გაქვავებული ფეხი და ორი გაყვითლებული, ერთიანად დაკრუნხული ხელი. დიდებული, მაღალ-მაღალი, ახოვანი, ქერათმიანი თუშები⁵ დააცქერდნენ მკვდარს; იოტისოდენა სიძულვილიც კი არ აღბეჭდოდათ სახეზე. „რეგვენი იყო. ყველა მათგანი ასე ცუდად დაამთავრებს!“ – თქვეს ბოლოს... მწუხრის ჟამმა მოაწია; ბინდი ჩამოწვა; მზე ჯერ თითქოსდა წარმოუდგენლად დიდხანს იცლებოდა სისხლისაგან; ადამიანის ენას არ ძალუძს იმის გამოთქმა, როგორ უსაშველოდ გაჯანჯლდა მისი სისხლდენა; მას შემდეგ, რაც უკანასკნელი წვეთი დაღვარა, ზოზინით იწყო ჩასვენება; ცის თალიდან ჩუხჩუხით, თქრიალით, უხვ ნაკადებად იღვრებოდა მზის სიცოცხლე, სიცოცხლე, ოქროსფერ და წითელ ლაქებად მიმოფანტული, და მერე ლეგა ღრუბლებმა მოირბინეს მარდად, რათა ჩამოერეცხათ და გაეკრიალებინათ ალისფრად ანთებული ცის კამარა; ეს ღრუბლები ჰგავდნენ იმ მონებს, საგულდაგულოდ რომ წმენდნენ და მონდომებით ასუფთავებდნენ სისხლით მორწყულ არენებს ორთაბრძოლის შემდეგ... მოქნილი თავთავები იოლადა იდრიკებოდნენ; ძილს მისცემოდნენ და მათი ეს სიმშვიდე, მოსვენება და უმფოთველობა თითქოს ისე ლიცლიცებდა, ბრჭვიალებდა და ლივლიცებდა, ვით მთავრის შუქში გახვეული გაშლილი ზღვა; ხეები ჩამქრალ შუქურებივით აზიდულა თავთავებს შორის; წყაროები და ნაკადულები იასამნისფრად დაფერილა, ელავენ და მოჩუხჩუხებენ იმ კორომთა შორისხლოს, რომელთა სიღრმიდანაც მოისმის სამალავებში შეეყუჟულ ბულებულთა გალობა; ყველაფერი ისე ჩანს, თითქოს ამ საღამოს, ფრთოსანთა ეს საამური სიმღერა ცქეულა იმ კორომთა ფშვინვად, ყურთასმენის დამატკბობელ სუნთქვად; ჭრელ-ჭრელი ძროხები, საძოვრებიდან რომ ბრუნდებიან, შარაგმებზე ჩერდებიან; ნახირი გარდიგარდმო გადაჭიმულა გზებზე; ერთხანს ყურადღებას არ აქცევენ პატარა მწყემსების ყვირილს; ყურსაც არ იბერტყავენ; ტყრუშული ღობეებისა და სხლტეების ძირას ძოვენ; პირს ჩაიგემრიელებენ ბალახის უკანასკნელი გროვით; რაწამს ძირფესვიანად ამოგლეჯენ ამ უთვალავ, მწვანედ მობიბინე ღეროს, კვლავ ძველებურად თვინიერნი და დამყოლნი გახდებიან, მორჩილად განაგრძობენ გზას; და მათ განუწყვეტლად მოძრავ, ჩამოშვებულ ღრუნებზე დაკიდულა ბალახის ღეროები, რომლებიდანაც ცვარი მოჟონავს. მინასავით გააქვს წკრიალი გუბურებსა და ტბორებში ამოსულ ჯოჯოთა შორის ჩამალული იმ ბაყაყების წვრილ ხმას, თითქოსდა ფლეიტას რომ უკრავენ და გამაყრუებელ ჰანგებს გამოსცემენ; და გამეფებულა მდუ-

5. ასე მოიხსენებიან თუშეთის ბინადარნი; თუში მხოლოდითი რიცხვის აღსანიშნავად იხმარება, თუშები – მრავლობითი რიცხვის.

მარება, უფრო და უფრო ძალუმაღ რომ უხმობს ყოველივეს, იზიდავს და ითრევს თავის უძირო სიღრმეში; ბაყაყები ყურყუმელაობენ წყალში და ეს ხანმოკლე დგაფუნი ისე იფეთქებს, ვით თოფის წამლის ნაკვესები. ჩრდილები ეშვება მიწაზე, წყვდიადის ფარდა ეფარება ყოველივეს, ამასობაში კი მთელი ეს გულანთებული ქვეყანა, საოცარი გზებით, სიშმაგითა და ჟინით სავსე ეს მხარე იქცევა უძრავ, იისფერ ზღვად, ხოლო ჰორიზონტზე გადაჭიმულა ხავერდოვანი კავკასია, უწონო და უფორმო; გვირგვინს იდგამს, თავს იმკობს ნემსივით წვრილი, ბასრი, წვეტიანი და წამახული ალის ენებით, რომლებიც თითქოსდა მოსწყდნენ მთრთოლვარე, წკრიალა ვერცხლს; ეს ენები მომაგონებენ იმ ლიუტენებს, იმ ფუძის ანგელოზებს, უეცრად რომ ამოყვინთავენ უკუნეთიდან, ანაზდად გაჩნდებიან არსაიდან, რათა ღამეულ ფერხულში ჩაებან.

თავი მესამე

თუშეთი

ალვანი, თუშეთის ერთგვარ ავანპოსტად რომ გვევლინება, სულ ახლოსაა მთიან მხარესთან; იქაურები უთუოდ განიცდიან მთის მკვიდრთა გავლენას; თავისებური დალი დაასვა ამ სიახლოვემ და სიმჭიდროვემ. თვალს მიეფარა ველ-მინდვრები, ყანები, მდელოები, ვენახები და ზვრები; ეს მობიბინე სიმწვანე შეცვალა უკიდევანო, ფერმიმქრალმა, ერთგვაროვანმა საძოვრებმა; ერთი ხეც კი არ აღმართულა იქ; ეს საძოვრები ასკეტურად კუშტ და სადა იერს აძლევს მთელ ამ უზარმაზარ სოფელს; თითქმის ისეთ იერს, რომ იფიქრებთ, აქაურობა ერთთავად მოშიშვლებული და უკაცრიელიაო. თუშებს სულს უხუთავთ საშინელი სივიწროვე და ხელმოკლეობა, რადგან თოვლით დაფარულ, თვალუწვდენელ სიშორემდე გადაჭიმულ ხეობებში ცხოვრობენ; იძულებულნი არიან, მიატოვონ სახლ-კარი და ხიზნობაში გაატარონ ნახევარი წელი; ამ მხრივ ძლიერ ჰგვანან სავოიელებსა და ოვერნელებს. გარდა ამისა, ნიადაგის თავისებურების, ბუნების, კლიმატის, ჰავის, გაჭირვების, სიღატაკის (ისე მიეჩვივნენ ამას, ისე გამოიწვრთნენ, იციან, მკვირცხლად რომ უნდა იმოქმედონ, შორსმჭვრეტელობა გამოიჩინონ და მუდამ თადარიგი დაიჭირონ), აუტანელი მეგობლების გამო (ფიცხი, უხეში, ტლანქი და მხეცებივით ველური ქისტები ესაზღვრებიან), მათი ტემპერამენტი და ზნე-ხასიათი თავისით გამოიბრძმედა, თითქოს გასაღკლდევდა; ისეთი გამჭრიახობა, ოსტატური მოხერხებულობა, გერგილიანობა, სიმარჯვე, სიმამაცე, გულადობა და გამბედაობა აქვთ გამჭდარი ძვალსა და რბილში, თუკი რომელიმე მათგანი სიმხდალესა და სიღარეს გამოიჩენს შერკინებისას, უმაღლე ძაღლის სადგომში დაამ-

წყვედვენ და აიძულებენ, იქ ჭამოს საჭმელი; თავისიანსაც კი არ დაინდობენ. როცა მათთან ვიყავი, ვიხილე მასწავლებლები, ქართულ სკოლებში რომ ასწავლიდნენ; მითხრეს, ნეტავ იცოდეთ, რაოდენ სწყურიათ ბავშვებს სწავლა-განათლება, რარიც გატაცებით ეწაფებიან ცოდნის უმრეტ წყაროსო; ისიც მომახსენეს, პატარა მწყემსები და მენახირეები თან საქონელს უვლიან, თან წერა-კითხვას შეისწავლიან, მიუხედავად იმისა, რომ სულ მარტონი არიან მთებშიო. გამორჩეულია მათი კილოკავი, საქართველოში გავრცელებულთა შორის ერთ-ერთი ყველაზე რთული; თუმცაღა, თითქმის ყველა კაცი ლაპარაკობს მრავალ ენაზე, და სოფელში ყოფნისას უთვალავჯერ გავებასეთ ნასწავლ გლეხებს; თურმე ყველა მათგანს დაუმთავრებია გიმნაზიის უკლებლივ ყველა კლასი. მართლაც ბევრი სახლია ცარიელი, რადგან დაბლობის ბინადარი თუშები ზაფხულობით მიიწევენ თვალუწვდენელი მაღლობებისაკენ, თავიანთ ნახირსაც მილაღვენ ცადაზიდულ სიმაღლეებზე შეფენილი იმ იალაღებისაკენ – ამ მხრივ უთუოდ ჰგვანან ორესის მთათა მასივის მკვიდრ ბერბერებს – და ოდენ ზამთრის დამდეგს უბრუნდებიან საკუთარ კარ-მიდამოს. ის საცხოვრებლები, მე რომ დავათვალიერე, რბილად რომ ვთქვა, სულაც არაა ისეთი კოხტა, როგორიც კახური ხის სახლები, მთაში აშენებულ შვეიცარიულ შაღეებს რომ ჰგვანან. აქ თითოეული საცხოვრებელი განცალკევებით დგას, შემოღობილში მიმაღული; მთელი ეზო-ყურე მოფენილია ათასი ხარახურით გამოტენილი ფარდულებით, თივის ზვინებით, ძნებით, ურმებით, ორთვალებით. თითქმის ყველა სახლი ხისაა, წითელი სახურავი შვენის, აქვს ერთგვარი გადახურული ვერანდა, რომელიც ეყრდნობა უხეშად გამოჩორკნილ სვეტებს; და აკვნები, კატები, ქათმები, ცხოველთა ტყავები, საწმისები, ხალიჩები, ფარდაგები, საჭურველი, აბჯრები, ცხენის აღკაზმულობა და სამოსი ისეა არეული ერთმანეთში, წარმოდგენილი ზედახორაა; ამ უწყსრიგოდ ახორავებულ და აკოკოლაგებულ ნივთებს გამოუტენიათ სახლი; ტევა აღარაა; დაუჯერებელია! ლოგინების ერთი კიდიდან მეორემდე გადაჭიმულა თუშური საბნები და გადასაფარებლები; მხოლოდ ამ ხალხს სჩვევია ასეთი გამორჩეული საბნების შეკერვა და გადასაფარებლების მოქარგვა; მათი ნახელავი სულ ოდნავ ჰგავს თურქულ „Karamanès“-ებს, თავისი რომბისებური და სამკუთხა ფიგურებით, თეთრი, ლურჯი, ცისფერი, ნარინჯისფერი, მოწითალო ნაქარგებით; ყველა ფიგურა მრუმედ ელავს შავ ფონზე. ჭერს სწვდება ვიწრო შუშაბანდებში დადგმული მძიმე დაზგები, რომელთა წყალობითაც ქსოვენ ძალზე გამძლე, მაგარ, რუხ და მოყავისფრო შალს (მამაკაცები იმოსებიან ამ ქსოვილისაგან დამზადებული ტანსაცმლით), და ხანდახან ასეთი სანახაობაც გადაიშლება ჩემ თვალწინ: დახვავებულია ის მოგლეჯილი ბალახი, ჯერ რომ ილღიაში ამოუჩრიათ, მერე კი აქ შემოუტანიათ; დახვავებულია პაწია, გამხმარი ყვავილები, აბრეშუმის ჭიის პარკები; ყოველივე ამას საწმისები, ფარდაგები, ხალიჩები და თუთის ხის შტოებისაგან შეკოწიწებული ჩარჩოები იფარავენ ქარისაგან; მომაგონებენ გამის მეტად მსუბუქ, სიფრიფანა, თეთრ ქსოვილს, დაფენილს დამჭკნარ ზიზილებზე; სქელ-სქელი აბრეშუმის ჭიები

ნელ-ნელა მიცოცავენ ღეროებზე. გამორჩეული, უჩვეულო, საკვირველი, საუცხოოდ მშვენიერი და თვალწარმტაცია; ერთობ ნატიფი ელფერი დაჰკრავს და ერთთავად გაჟღენთილია მკვდარი გვირილების ნატიფი, სუსტი, შორეული სურნელით... სუფთა, დაბანილ-დავარცხნილ, წესიერ ბავშვებს, საოცრად ვარდიფერი კანი რომ აქვთ, კრიალა თვალის გუგებზეც კი ეტყობათ, გულწრფელნი და უეშმაკონი რომ არიან; დაინტერესდნენ ჩვენი, მაგრამ იოტისოდენა კადნიერება, სიუხეშე და ბარბაროსული სიველურეც კი არ იმალება მათი ცნობისმოყვარეობის მიღმა; წყვეტენ თვინიერი და კეთილგონიერი ბავშვებისათვის ჩვეულ, ჭკვიანურ, უბრალო თამაშებს, რათა გატაცებით გვადევნონ თვალი, დაუსრულებლად გვათვალიერონ...

სხვათა შორის, საოცრად მშვენიერი მეჩვენება მათი მოდგმა. თითქმის ყველა მაღალი და ახოვანია, – ძალზე ხშირად შეხვდებით ქერათმიან თუშებს, – მუდამ ძაღლინით სავსეებს; მათი ნამზეურის მიღმა იმალება საოცრად თეთრი პირ-სახე; რძისფერი კბილები აქვთ და ცოტა არ იყოს, გადმოკარკლული ცისფერი თვალები; მუქ ჩოხა-ახალუხებში გამოწყობილი თუშები მშვიდი ხალხია; ნელა, დინჯად სიარული სჩვევიათ; მათთვის სრულიად უცხოა როგორც მოუქნელობა, სიტლანქე და მოუხეშაობა, ისე მგზნებარება, გატაცება, სიცხოვლე და აღტყინება; მთის ბინადართათვის ჩვეული ძალა აქვთ, შეკავებული, დაურევბული ძალა; მოსდგამთ მთიელთა სიამაყე, ადათ-წესებისა და ტრადიციების ურყევი სიყვარული, მიდრეკილება განუწყვეტელი, მძიმე შრომისაკენ, გაუთავებელი ჯაფისა და გამუდმებული ჭაპანწყვეტისაკენ. ჩვენ უმაღლ შევნიშნეთ ერთი საკვირველი ფორმალიზმი, რომელმაც ცნობისმოყვარეობა აღგვიძრა – რაკი ვახშამი ჯერ კიდევ არ იყო მზად, მასპინძლებმა მთელი ერთი საათი გვაყურუტეს კართან, მერე კი გვთხოვეს, შემობრძანდითო; სახლში შევაბიჯეთ, მაგრამ მაშინაც კი ვერ შევძელით სუფრის ირგვლივ შემოსხდომა, რადგან არავის მივუპატიჟებდით. შემიძლია, დაბეჯითებით ვთქვა, რომ იქ აშკარად იგრძნობოდა მუსლიმანების გავლენა. ეს ეტყობოდა ყველაფერს: მათს მორალს (ისეთი შეურიგებელი, დაუთმობელი და პრინციპული ხალხია, თუკი შეისწრებდნენ ხორციელ სიამეს მიცემულ საყვარლებს, მაშინვე სიკვდილით სჯიდნენ „ცოდვილთ“, იმ შემთხვევაშიც კი, თუ „ხარჭა“ ქალიშვილი იყო და თანაც, თავისუფალი და უქმრო); გარიგებით ქორწინებას (მხოლოდ ნეფე-დედოფლის მშობლები აკვარახტინებდნენ ამ საქმეს); იმ თავდაჭერილობას, რომელსაც არასოდეს ივიწყებდა ოჯახის არც ერთი წევრი. ერთმა ოჯახმა შეგვიფარა აქ; მთელი ჯალაბობა შედგება მოხუცი ცოლ-ქმრისგან, მათი ერთადერთი ვაჟიშვილისა და მისი ცოლისგან. ისეთი სიწყნარე გამეფებულა ამ საგვარეულო კარ-მიდამოში, ისეთი მდუმარება სუფევს, სამარეში გვგონია თავი; მოხუცი ქალი არც კი ჩანს, მისი ახალგაზრდა რძალი კი სიტყვის უთქმელად შემოდის და გადის. მეტად ლამაზი და ეშხიანი ქალია; მქრქალი კანი და შავგვრემანი სახე შვენის; ასკეტურად სადა, დაბამბული, შავი კაბა აცვია; გრძელი, მუქი თავსაბურავი ერთიანად უფარავს თმას და სარტყელივით მჭიდროდ ეკვრის მის შუბლს; ეს ქსოვილი, რომლის ნაკვეც-

ბიკ ტერფებამდე დაშვებულა, ამ მოკრძალებულ, უენო ქალს ანიჭებს მონაზვნის უდრეკ სიმკაცრესა და შეუვალ ღირსებას, ღვთისმოსაურ მოწიწებას რომ აღუძრავს ადამიანს. როცა ვთხოვე, თქვენი ადგილი დაიკავეთ და გვერდით მოგვიჯექით-მეთქი, ოჯახის უფროსმა, მედიდური იერის, უხეშმა, გაუთლელმა, ლოყებლაჟლაჟა ბერიკაცმა, საოცრად რომ ჰგავდა ხორვატს, ჩემს თანხმლებს სთხოვა, ამ ქალბატონს ჩემ მაგიერ გავცით პასუხი, რათა გაიგოს, რომ ქალები ხმაამოუღებლად, ჩქამის გაუღებლად ემსახურებიან მამაკაცებს, როცა სუფრასთან სხედანო; მათი ვალია, კერძები მიართვან და ჩუმად გავიდნენ ოთახიდანო... მეტიც: შემდგომში ისიც კი შევიტყვე, რომ უფრო მკაცრი ტრადიციები ჰქონიათ. მაგალითად, ქორწილის შემდეგ – ამ საზეიმო ცერემონიისას პატარძალმა არაფრის დიდებით არ უნდა მოიხსნას რიდე, მთლიანად რომ უფარავს თავსაც და სახესაც – ცოლი უნდა დაიმალოს, თვეზე მეტხანს იყოს ასეთ დღეში; ქალს იმის უფლებაც კი არა აქვს, ხმა ამოიღოს, მიმართოს დედამთილ-მამამთილს, ან მათ წინაშე ჩამოჯდეს, თუკი თავად არ დართავენ ამის ნებას... როცა მათ პირისპირ აღმოჩნდება, შეწუხებული სახე უნდა მიიღოს და უხერხულად იგრძნოს თავი; კარგა ხანს არ უნდა მოიშოროს ამგვარი გამომეტყველება; აი, ასეთია დაუწერელი კანონი, წესი და რიგი. ხალხის დასანახადაც მოკრძალებული უნდა იყოს; თვით ქმართანაც კი ძალზე ხანმოკლე კავშირი უნდა ჰქონდეს; წამითაც კი არ უნდა დაკარგოს სიდინჯე და თავდაჭერილობა; სულ დაძაბული უნდა იყოს... რაწამს გამოვცალეთ ჩაით გალიცლიცებული ფინჯნები, მამაკაცებმა თითი დააკაკუნეს მაგიდაზე, ერთი კომენტარიც კი არ დაუყოლებიათ, არაფერი უთქვამთ; წამის გაელვებაში შემოვიდა ქალი და ისეთი იერით შეავსო, როგორიც აქვს მუყაით, დაუზარელ, თავდადებულ, გულმოდგინე, მორჩილ და ქედმოდრეკილ მხევალს; საუბრის, სადილისა და ვახშმის შემდეგ გვის, ყველაფერს ასუფთავებს, ღონივრად ბერტყავს ლოგინის წინ დაფენილ ხალიჩას და ლოგინის თავთან, კედელზე გაკრულ ფარდაებს. თვით დღესასწაულებიც კი მკაცრად დადგენილია წინდაწინ; ყოველი წლის აგვისტოში ზეიმობენ; წმინდა გიორგის თვეს უწოდებენ; განსვენებულთა წლისთავს აღნიშნავენ; ან კიდევ, მას შემდეგ, რაც მსხვერპლს შესწირავენ ღვთაებას, ცხვრებს ზვარაკად მიიტანენ სისხლით მორწყულ სამსხვერპლოზე, უხვად დაისხამენ სასმელს და გამოცლიან უშველებელ სასმისებს, გამოიყვანენ ცხენებს და მოჰყვებიან ჯირითობას; ერთმანეთს ეჯიბრებიან გაქაფული ბედაურები; გარდაცვლილთა ხსოვნის პატივსაცემად აჩაღებენ ამ დოღს. ვკითხე, შეუძლებელი ხომ არ იქნება ჩვენთვის თქვენი სიმღერებისა და საკრავების საამური ჟღერის მოსმენა, ცეკვა-თამაშის ყურება, ხომ გვექნება ამ სანახაობაზე დასწრების უფლება-მეთქი. „ჯერ არა... ახლა მუშაობის ჟამმა მოაწია!“ – შესძახა ბებერმა თუშმა. მიუხედავად ამისა, ერთ საღამოს ვიხილეთ ნანატრი სანახაობა: კაცმა სულ რამდენიმე სიტყვა გადაულაპარაკა ცოლს, არც კი შეხედა და რაღაც უბრძანა; ახალგაზრდა ქალი დაჰყვა მის სიტყვას; დაიწყო დაკვრა. საშინელ ტკივილს მგვრის მისი ცქერა; ვეწამები და გული მეზზარება, როცა ვხედავ, რაოდენ მორცხვი, გაუბედავი და მოკრძალებული

იერიტ გვიხსნის რაღაცას, როცა საკრავი ფუჭდება; ახსნა-განმარტებებად იღვრება, ცდილობს, ნათელი მოჭფინოს ყველაფერს... თუშები გარმონიკას უწოდებენ ამ ინსტრუმენტს; ერთგვარი აკორდეონია, ქალთათვის განკუთვნილი; კაცებს დაუსაკუთრებიათ ჩონგური და სალამური, ძალიან რომ ჰგავს ბანჯოსა და ფლეიტას; თვალისჩინივით უფრთხილდებიან და არავის დაუთმობენ; ჩონგური და სალამური უფრო ჰგავს საომარი სულისკვეთებით განმსჭვალულ მებრძოლთა საკრავს, ვიდრე გარმონიკა. ქალი დასაკრავად მოემზადა და საგანგებოდ შეიმოსა; ზღვარგადასული პოპმზურობა იგრძნობოდა; თითქოს ბარ-ბეიმით უნდა აღენიშნა რაღაც; სადღესასწაულო ტანსაცმელში გამოეწყო; მოისხა შავი ტუნიკა, აბრეშუმის მოკაზმულობებით დამშვენებული, წარმტაცი ნაქარგებით, გრძელი, ვერტიკალური ხაზებით, ყაისნალის ნაქარგობებით, ძეწკვებით, ვერცხლის მონეტებით, ლალივით წითლად მოელვარე ძვირფასი თვლებით, ყვითელი ბუმბენტებით, ყაითნებითა და სირმებით გაწყობილი; უსახელო ჟაკეტი აცვია და ხავერდის მუქი მწვანე წინსაფარი უკეთია; ოქროს ბურთულები ჩამოკონწიალებულა მის ყურებსა და ყელზე. ყოველივე ამის ფონზე იკვეთება მშვიდი, ფერმიხდილი და ნაზი სახე, რომელსაც გარს ევლება თავსაბურავის ბალთები და მოყავისფრო საყურეები, მკერდზე კიდევ უფრო დაბლა რომ ეშვება; და თავი მიუბრუნებია ბნელი ოთახის უძირო სიღრმისაკენ, კოხტად მორთულ-მოკაზმულს, ნაღვლიანს, უმეტყველოს; ჰგავს რომელიღაც სოფლის მკვიდრ მადონას, მომქანცველი, მტანჯველი, დამთრგუნველი და გულისმომწყვლევი ოცნების თუ ზმანების ტალღებში შთანთქმულს. რაწამს მისმა გაწაფულმა და მარჯვე ხელებმა უსაშველოდ გაჭიმეს ინსტრუმენტი, საამო მუსიკის ტალღებმა წაღეკა ეს ორი კაცი, მისი მოდგმის რომაა; სულგანაბულნი უგდებენ ყურს; მათაც მის დარად დაუხრიათ თვალები, იატაკს დაჰყურებენ, გარინდულან, არც კი ირხევიან, და მათი შეუვალი, უშფოთველი სახეები, რომელთაც არასოდეს დაეტყობათ სულ ოდნავი ღმობიერება და გულაჩუყებაც კი, გამოხატავენ ერთგვარ დინჯ, დარბაისლურ, კუმტ კმაყოფილებას, მაგრამ არაფრის დიდებით არ იტყვიან რამეს ამ გრძნობის შესახებ. ამ საუცხოო, გამორჩეულ მელოდიას, ცნობისმოყვარეობას რომ გვიღვიძებს, ორმაგი ტემპი აქვს: ცოცხალ, ჩქარ, თამამ, გაბედულ მოტივებში ხანდისხან გამოერევა მწარე ჰანგები; მათში ხან მძლავრად, თავაწყვეტით, ელვის სისწრაფით, ხან კი თითქოსდა ხტუნვა-ხტუნვითა და კრთომით მოქრის მთათა საოცრად მარდი და მკვირცხლი სული; ამას მაღიმალ აგვირგვინებს გრძელი, თითქმის ჩურჩულით ნამღერი სტროფი, ქრომატული, ისეთი ნაღვლიანი, ისეთი კაემნის მომგვრელი, ისეთი შემზარავი ძალით სავსე, ისეთი გულში ჩამწვდომი, რომ ბოლოს და ბოლოს, ნათლად იკვეთება ერთი ხატება, და ადამიანმა ყური რომ დაუგდოს ამ მელოდიას, უთუოდ ირწმუნებს, ვილაცამ გააფრთხილა ეს მხიარული, ლალი და ხალისიანი ნოტები, აუწყა, დიდი საფრთხე გეშუქრებათო, გაუმხილა, სულ მალე გმთანთქავთ მელანქოლიის ტალღებით; ამიტომაც, ეს ნოტები სადღაც მიიჩქარიან, ერთმანეთს აწყდებიან, თავადვე ეხვევიან გზნების ცეცხლში, თვითონვე აქებებენ, აღელვე-

ბენ და აგულიანებენ საკუთარ თავს, ერთგვარი ყალბი, ნაძალადევი, მოჩვენებითი ნების წყალობით აღძრულნი; მიეშურებიან ასე ალგზნებულნი და აალებულნი, რათა დააბოლოონ თავიანთი სარაბანდა⁶, რომელშიაც ავადმყოფური ალტყინება, უსაზღვრო მგზნებარება, სიშმაგე, სიშლეგე და მძვინვარება იგრძნობა; რათა დიდებულად დააგვირგვინონ ეს გიჟმაჟური ცეკვა, სანამ უძირო წყვდიადში შთაინთქმებიან და საუკუნოდ გაქრებიან. მაგრამ მათ ჩაახშობს და წაღეკავს მძლავრი, უღერადი, ნოსტალგიური, ნაღვლიანი რიტმი, თან მეტისმეტად უღმობელი და უწყალო, და მთელი ოთახი ივსება უკვე მოყირჩებული ტკივილით...

თუშები ძალზე სტუმართმოყვარე და პურადი ხალხია, თუმცაღა, ანაზდეულად, უკვალოდ ქრება მათი კეთილგანწყობა, რაწამს ცხენებზე ჩამოაგდებს სიტყვას ვინმე. დოდიმ დაიჩემა, ვიცე, არსებობს ერთი თუშური გამოთქმა, თუ ანდაზა, რომელიც ნათლად ამტკიცებს, რომ არც ერთი თუში ჯარისკაცი არ დაუთმობს თავის გენერალს საკუთარ საჯდომ ცხენსა და უნაგირსო. ცხადზე უცხადესია, პირუტყვი მჭირდება, რათა კიდით კიდემდე შემოვიარო თუშეთი, გაფაციცებით დავაკვირდე ყველაფერს და ცხოვრებაში პირველად აღმოვაჩინო მისი საოცრებანი. ჩვენს მასპინძელს სამი ბედაური ჰყავს, მაგრამ უცაბედად გაგულცივდა და გამოგვიცხადა, ჩემს ერთ მეგობარს ეკუთვნის ეგ ტაიჭებიო. რწმუნებული თავადაც თუშია და გულშიაც კი არ გაივლებს, თუნდაც ყველაზე უხეირო სახედარი მაინც ჩამოართვას ვინმეს ამ მხარეში (რეკვიზიციის ძალით). გარდა ამისა, კიდევ უფრო გაართულა საქმე რამდენიმე სამწუხარო ფაქტმა: დაუდგრომელმა ქისტებმა ერთი შფოთი და ჩოჩქოლი ატეხეს, გზები კი ღრმა თოვლით დაიფარა; გიდები ანგარიშობენ და ასკვნიან, რომ ოცი ათასი ქართული რუბლი (იმხანად 800 ფრანკს უტოლდებოდა ეს თანხა) დაგვიჯდება მათი მომსახურება; არ უღირთ ნაკლები გასამრჯელოს სანაცვლოდ წინამძღოლობა, რადგან ჩვენს უნაგირზე დასამაგრებელი, დამბაჩებისათვის განკუთვნილი ტყავის ბუდეები უნდა ათრიონ და ჩაგვაცილონ ომალომდე, რომელიც ალვანიდან სამი დღის სავალზე მდებარეობს; საკმაოდ შორსაა; ვერც ერთ სხვა სოფელს ვერ ვიპოვით გზად. ოცი ათასი რუბლი – აი, სწორედ ეს თანხა მიიღო დოდიმ მთელი მოგზაურობის ხარჯების დასაფარად. ამ ფულის ასე ერთბაშად ხელიდან გამოცლა ნამდვილად არ იქნებოდა კეთილგონივრული საქციელი... ძვალსა და რბილში მაქვს გამჯდარი ის დაუძლეველი, გადაულახავი, გაჭირვებით ჩახშობილი ძრწოლა, მთები რომ მგვრიან. ისე მძულს, თითქოს უსულო კი არა, ის სულიერი საგნები არიან, ცნობიერება და შეგნება რომ აქვთ, დიდი სიავე სწადიათ ჩემთვის და ჩემზე ბევრად ძლევაძმოსილნი არიან. არასოდეს, არასოდეს გამხდარა მთა კარგად ნაცნობი და თითქმის მშობლიური ტერიტორია ჩემთვის. დავიწყება და ადამიანთა სიძულვილია მთის არსთა არსი, და გოროზი და კუშტი მწვერვალები არა მხოლოდ აცამტყერებენ ჩემს ადამიანურ ძალისხმევას,

6. ძველებური ესპანური ცეკვა.

– გულისმომწყვლელად შესაბრალისია ძალ-ღონის ეს უკიდურესი დაძაბვა, მაგრამ მაინც ისეთი დიდებული და გიგანტათვის შესაფერი მეჩვენება, მინდა, დაჟინებით მოვითხოვო, მომეცით უფლება, ვიამყო ჩემი თავდადებით-მეთქი, – არამედ არც კი იმჩნევენ ჩემს გარჯას, ძალისხმევასა და ჯახირს. მოაშთობენ ყოველივეს, ყოველივეს იმ სიამაყის ჩათვლით, რომელიც გარდაუვალად სჭირდება ადამიანს, მოაზროვნე არსებას, რათა ღირსება შეინარჩუნოს; რაწამს ცადატყორცნილ მწვერვალებს შორის აღმოვჩნდები, ვრწმუნდები, რომ არა მაქვს მაინცდამაინც დიდი გაქანება და მეტად უნაყოფოა ჩემი ვითომდა ბრძნული შორსმჭვრეტელობა და გამჭრიახობა. მთელი ბუნება, ეს უსასრულო, უკიდევანო სამყარო, გულგრილია ადამიანისადმი, თუმცა-ღა, მაინც მთები მეჩვენება უგრძნობლობისა და გულცივობის ყველაზე თვალსაჩინო განსახიერებად; მაშინაც კი, როცა მოღალანე სიმწვანით შეიმოსება, აყვავებული, გაფურჩქნილი, ჭრელ-ჭრელი ყვავილებით დაიფარება და გამშვენდება, გულკეთილობის ნატამალსაც კი ვერ ვამჩნევ იდუმალებით მოცულ მათ სახეებზე, და მათზე გადაფენილი ღიმილი მესახება იმ ამოუხსნელ, ჩაუწვდომელ, ამოუცნობ და მოუხელთებელ ირონიად, რომელსაც ავლენს ყოველივე მარადიული ყოველი სულიერის ამქვეყნიური ამაოებისა და წარმავლობის წინაშე. ყოველთვის ხომ ვერ ავარიდებ თავს მთებთან შეხვედრას?! კარგად ვიცი, როგორ მელიან, როცა მოგზაურობით ვტკებები... მაგრამ რაკი ამჯერად თვით ღმერთებმა განაჩინეს, ოდეთი ვერასგზით ვერ შეძლებს იმ მწვერვალთა ხილვასო, ვინ ვარ მე, უმწეო, უსუსური და უძალო მოკვდავი, წინ რომ აღვუდგე ღვთაებათა ნებას?!

მიშას სახეა ის უკანასკნელი ხატება, ალვანიდან რომ გამომედევნა. მიშა ჩვენ წარმოგვესახა მრისხანების, სიშმაგისა და მძვინვარების თითქოსდა ცოცხალ ქარბორბალად, მაგრამ მისი სიავიც კი ისეთი ამაღელვებელია, პირდაპირ გულისგულამდე მხვდება. ფეხზე დგას და ლამის წელამდე მწვდება, მიუხედავად იმისა, რომ მხოლოდ ორი თვისაა; გაბანჯგვლულია, დიდი, ბურთივით მრგვალი თავი აქვს, მძიმე, ტლანქი, ბრტყელი კიდურები კი ცხოველის თათებს მიუგავს; თავიდან ფეხებამდე თმით დაფარულს, ერთიანად შავს, სულ მთლად გაჩეჩილსა და გაბურძენილს, საოცრად მრგვალი მუცელი მოუჩანს; მისი ძალზე მოკლე ცხვირი პირუტყვის დრუნჩის მომაგონებს; მისი პაწია, ყავისფერი თვალები მაშინაც კი შესაბრალისი და უბედური ადამიანის თვალებად მეჩვენება, როცა გაცოფებისაგან ელავენ და ნაპერწკლებს ყრიან მომეტებული რისხვისაგან. მიშა მთებში დატყვევებული დათვის ბელია, და ერთადერთ რამეს დაეძებს ამქვეყნად – იმ ხანჯლის ქარქაშს, რომელსაც ატარებს მხცოვანი თუში, ჩვენი მასპინძელი, და ეს ნივთი ყველა საჭმელს ურჩევნია (ვერავინ ხვდება, რატომ). დილიდან დაღამებამდე დაკუნტრუშებს და გიჟმაჟობს თავისი პატრონის გვერდით; აბეზარია, გულის გამაწვრილებელი, ჯიუტი და მოუშორებელი; ერთადერთი აზრი უტრიალებს იმ ჩლუნგ ტვინში; ტლანქად, მოუქნელად ხტის, უგერგილოდ ლამობს ალერსს...

ახმეტაში პირველად შევხვდი რუს ბოლშევიკებს. აქაურები განსხვავდებიან თუშე-ბისაგან. ქალები და მამაკაცები თავისუფლად ირევიან ერთმანეთში, ისე ებაასებიან და ეპყრობიან ერთიმეორეს, როგორც თანასწორთ შეჰფერით. ქალები, მიუხედავად იმისა, რომ მძიმედ და თავდაუზოგადვად შრომობენ, მიწას ამუშავებენ და არც შინ არა აქვთ მოსვენება, უფრო ინდივიდუალურები არიან; შეინარჩუნეს შინაგანი „მე“; ოჯახური კერის ბატონ-პატრონნი არიან, მართვის სადავეთა მპყრობელნი...

ერთ-ერთ დუქანში⁷ გადავეყარეთ ბოლშევიკებს. სამივე რუსი იყო; კეთილი, ბუნჩულა კაცების იერი და ნათელი თვალები ჰქონდათ; ბრტყელ-ბრტყელი ქუდები ეხურათ და დაფლეთილი, მწვანე ბლუზები ეცვათ; დაათრევდნენ კოჭაზე დახვეულ ძაფებს, მათი ქურთუკის ღილებზე რომ იყო ჩამოკონწიალებული. ასე მგონია, ეს, ჰო, აი, სწორედ ესაა ის მეტისმეტად თვალსაჩინო, მეტისმეტად დაუფარავი, განზრახ „დასმული ნიშანი“, მათ საიდუმლოს რომ ააშკარავებს და ყველას მიახვედრებს, რასაც საქმიანობენ. რაღაცის გამავრცელებლები არიან. ამან გამოგვაფხიზლა. უკ-ვე დამთვრალიყვნენ; ჩვეული სიფრთხილის, წინდახედულობისა და კეთილგონიერების ნატამალიც კი აღარ შერჩენოდათ. თავდაპირველად, ცოტა არ იყოს, ეჭვის თვალთ გვიყურებდნენ, ჯერ კიდევ არ გვენდობოდნენ ბოლომდე; უარი თქვეს მწკლარტე ღვინოზე, ლობიოსა და იმ პაწაწინა თევზებზე, ვარდისფერ ქალაღში შეხვეული რომ მოგვართვეს. მიუხედავად ამისა, რაწამს სიგარეტები გამოგვართვეს მე და დოდის, გული გადაგვიშალეს და ერთხანს გაცხარებით ვიკამათეთ პოლიტიკაზე. დოდამ უმაღ იეჭვა რაღაც, მოულოდნელად გამოიჩინა მაკიაველური ტაქტიკა, გვერდზე გაიხმო დუქნის მეპატრონე და უთხრა, შეკვეთას გაძლევთ, ახალი ღვინო მოგვიტანეთ, არაყნარევიო. მერე მოგვიბრუნდა, ჩემი თავი წარუდგინა მათ და უთხრა, ეს ქალბატონი ფრანგი სოციალისტია, სოციალისტური პარტიის ერთ-ერთი ბურჟიო; მერე საკუთარი თავი გაასალა ბოლშევიზმის იდუმალ გულშემატკივრად და დასძინა, გულის სიღრმეში ბოლშევიკების ქომაგი ვარ, მათი იდეოლოგიის გამარჯვებისთვის გაჩაღებული ბრძოლის წარმატებით დაგვირგვინება ის ზოგადსაკაცობრიო საქმეა, დიდ სიკეთეს რომ მოუტანს ყველასო. ცოტა ხნის შემდეგ უთხრა, ერთ საიდუმლოს გაგანდობთ, სერგეი კიროვის ერთგული და თავდადებული აგენტი ვარ (ეს უკანასკნელი ბოლშევიკური მისიის ხელმძღვანელი გახლდათ და იმხანად ტფილისში საქმიანობდა), ერთი ქართველი ოფიცრის უნიფორმა გადავიცვი, რათა უკეთ ავურიო გზა-კვალი მილიციასო. საჭირო იყო, მუცელი ამოეყორათ იმ ბოლშევიკებს, რათა დაეჯერებინათ დოდის ის ზღაპარი; მართლაც ენდნენ და გაუმხილეს საკუთარი განზრახვა: „საქართველოს მთავრობის დამხობაა ჩვენი მიზანი“. მერე დასძინეს: „სოფლებში გავაჩაღეთ მუშაობა... იმ ჟორდანისას, იმ გეგეჭკორს, იმ რა-

7. ასე უწოდებენ საქართველოში ძალზე პოპულარულ სასადილოებს.

მიშვილს, საბრძოლველად რომ აქეზებენ ხალხს, სინამდვილეში, უნდათ, წყალივით დაღვარონ ადამიანთა სისხლი... ისე იზამენ ამას, წარბსაც არ შეიხრიან... ქართველები ყვეჩები არიან... დურაკები, როგორც ჩვენ, რუსები, ვიტყვით ხოლმე... იმის შეგნებაც კი არ სურთ, რომ უთუოდ ერთად უნდა ვიცხოვროთ, ძმურად...“ აშკარა იყო, ამ ემისართაგან ორი, უბრალოდ, სხვათა აზრებს გამოთქვამდა, თუთიყუშით იმეორებდა მათ იდეებს, თუმცაღა, მესამე ნამდვილად გამოირჩეოდა მათგან, რადგან შერჩენოდა ინდივიდუალობა და ისე მსჯელობდა, როგორც სწავლულ კაცს შეშვენოდა; ამიტომაც, სწორედ მას მივმართე:

– ძმურად? კი, მაგრამ... სულ ახლახან ჩაიგდეთ ხელში აზერბაიჯანი... ნუთუ ძმური სიყვარულის გამოხატულება იყო ეს ქმედება? ხოცვა-ჟლეტა გააჩაღეთ ბაქოში, განჯაში... სულ მცირე, ათი ათასი ადამიანის სიცოცხლე შეიწირეთ... ბოლო არ უჩანს ამ უკანონო დაპატიმრებებს... უსამართლოდ გამოამწყვდიეთ სატუსალოში ხალხი... ყოველგვარი განსჯისა და გასამართლების გარეშე დასაჯეთ სიკვდილით ადამიანები „Tchresvitchaika“-ს ტრიბუნალზე...

მერე კი მივახალე ყოველივე ის, რამაც სასო წარმიკვეთა, გული გამიტეხა და იმედი გადამიწურა კავკასიაში ჩამოსვლის შემდეგ... ტკივილით სავსე რამდენი თვე გავლიე!

– მეც კომუნისტი ვარ, – დავსძინე მაშინვე, – თქვენი პოლიტიკური, სოციალური და ეკონომიკური პროგრამის იდეები ყველაზე ძვირფასია ჩემთვის. ესაა ყველაზე ღრმა, ყველაზე უცვლელი და მყარი იდეები, ისეთები, როგორებიც ისე გვჭირდება, ვითარცა ჭაერი, რათა ვისუნთქოთ... ის იდეები, ყველა ოცნებაზე მაღლა რომ დგას; ის იდეები, რომელთაც ვერც კი შეედრება სიყვარულის, დიდების, სახელის მოხვეჭისა და ხსნის ნატვრა... თანახმა ვარ, ხვალვე გამაკრან ჯვარზე, თუკი ჩემი ჯვარცმა, თუნდაც, მარტოოდენ ერთი წლით მაინც დააჩქარებს იმ სანატრელი ხანის დადგომას, როცა ველირსებით ჩემი სასწაულებრივი, საკვირველი და დიდებული მომავლის ქალაქის აშენებას. მაგრამ, სამწუხაროდ, იარაღის ლულებზე წამოცმული ხიშტების გარდა ვეღარაფერს ვხედავ თქვენს სისტემაში. კომუნიზმი ინტელიქტუალური და მორალური მოძღვრებაა, მე ასე აღვიქვამ ამ სწავლებას, მაგრამ რაკი თქვენს ხელში ჩავარდა, პოლიტიკურ-მილიტარისტულ იდეოლოგიად იქცა... არსებობს ერთი ძველთაძველი წიგნი, სახარება ეწოდება და სიბრძნითაა სავსე. ეს წიგნი გვეუბნება, რომ ყველა, ვინც აიღებს მახვილს, მახვილითვე დაიღუპება. რა დაგითესავთ სიძულვილის მეტი?!

– კაცობრიობა უსაშველოდ იტანჯებოდა. წამებულ ადამიანთა მოდგმას არ შეუძლია, კიდევ დაკარგოს დრო და დაელოდოს ევოლუციას, – მომიგო მან.

– თქვენ კაპიტალიზმის ერთი ნაირსახეობა მეორე ფორმით ჩაანაცვლეთ...

– სახალხო კაპიტალიზმით...

– იმპერიალიზმის ერთი სახესხვაობა მეორით შეცვალეთ...

– მშრომელთა იმპერიალიზმით...

– განა უნაყოფობა არ სუფევს ყველგან, სადაც ფეხი დადგით?..

– ეს ზამთრის თვალში საცემი, მაგრამ მოჩვენებითი უნაყოფოა. ვერაფერი გააქრობს იმ მედგარ, უხილავ ძალებს, საოცარი სიცხადით რომ გამოვლინდება გაზაფხულის დამდეგს.

– კი, მაგრამ, რად მოაშთეთ ყოველივე? თვით ის უმცირესი თავისუფლებაც კი წაართვით ხალხს, რომელსაც დესპოტებიც კი ანიჭებენ მოსახლეობას. გადაადგილების, მიმოსვლის, თავის დაცვის, აცილების მოთხოვნის, საკუთარი არაკომპეტენტურობის აღიარების უფლება... ეს ხომ სულ მთლად მარტივი პრინციპებია?..

– ჯერ ერთაშად უნდა მოასწორო მთელი ნიადაგი, რათა მერე ნაგებობა აღმართო.

აღბათ, პოლიტიკური ფანატიზმის გადმოსახედიდან, ჭეშმარიტი ჩანს ყოველივე ეს. მაგრამ ჩემს შინაგან სამყაროში აღმოცენებულმა, სულ სხვაგვარმა, უეცრად მოზღვავებულმა ფანატიზმმა ანაზღად ყველაზე მგზნებარედ, ყველაზე თავგანწირულად გაიბრძოლა და გააფთრებით შემომიტია...

– უცილობლად უნდა აღსრულდეს სამართალი. ეს უფრო მნიშვნელოვანია, ვიდრე ის, რომ კომუნიზმი ასეთ მდგომარეობაში იყოს...

უცებ შეწყდა კამათი. ბოლშევიკმა ჭიქა ასწია და ისეთი საკვირველი, ისეთი ცნობისმოყვარეობის აღმძვრელი საბოლოო არგუმენტი წარმოთქვა (ნუთუ ბოლშევიკთათვის დამახასიათებელია ასეთი რამ?!), მინდა, ციტატასავით დავწერო ამ წიგნში: „როცა ჩვენ მოვალთ და მართვის სადავეებს ჩავიგდებთ ხელში, ტავარიში (ეს სიტყვა ამხანაგს ნიშნავს რუსულად), ციხეში გიკრავენ თავს; ჰოდა, შეგიძლიათ, გულდასმით განსაჯოთ ჩვენი მეთოდები სატუსალოში, დაუსრულებლად იფიქროთ ამაზე“.

შეიძლება, ასეც მოხდეს. მაგრამ ეს სულაც არ იქნება ბრძნული გადაწყვეტილება. არსებობს მარად უცვლელი, მკაცრი კანონები, რომლებიც გვკარნახობს, რომ ყოველგვარი ტერორი მთავრდება შლეგი, მძვინვარე, გავეშებული და ავადმყოფური გზებით სავსე რეაქციონერების აღზევებით; რომ ტირანიის ყოველ ნაირსახეობას (თუნდაც, ხალხის საკეთილდღეოდ დამკვიდრებულს), ბოლოს და ბოლოს, შთანთქავს ის ჯანყი და ამბოხი, რომელიც დაჯახნის ტირანს. განა, ამჟამინდელი ბოლშევიზმი ისე არ ვნებს ჭეშმარიტ კომუნიზმს, როგორც ინკვიზიციამ ავნო ქრისტიანულ რელიგიას?...

თავი მეოთხე

გარეკახეთი

იძულებულნი გავხდით, რამდენიმე დღით დავრჩენილიყავით თიანეთში. სულ უბრალო მიზეზით შემოვრჩით იმ მხარეში – გვინდოდა, ყველაფერი დაგვეგეგმა და ძალ-ღონე მოგვეკრიბა. ერთი შეხედვით, კარგი პირი არ უჩანდა საქმეს; მეგონა, ვერაფრის მოგვარებას ვერ შევძლებდით; თითქოს ყველაფერი ჩვენ წინააღმდეგ ამ-

ხედრებულიყო. გარეკახეთის სამმართველოს წევრებსა და ხევსურებს (ეს უკანასკნელი იმ სამმართველოს ექვემდებარებოდნენ) ნამდვილად არ ჰქონდათ გულთბილი ურთიერთობა იმხანად; საყვედურებით, სამდურავითა და ჩივილით იყო დამძიმებული ყოველივე ის, რაც გვესმოდა ამ მცირერიცხოვანი, თუმცაღა, გაუტეხელი, შეუპოვარი, მედგარი, შეუდრეკელი და ქედუხრელი ხალხის შესახებ. ერთი მხრივ, ქისტებთან ჰქონდათ ერთი დავიდარაბა და აყალმაყალი (ქისტები, ყოველ შემთხვევაში, ხევსურებივით ავები, ბოლმინები და გულღრძოები იყვნენ), მეორე მხრივ კი გამუდმებით ესხმოდნენ თავს ფშაველებს, ანუ ფშავის ბინადართ; ფშაველთა მოდგმა ყველაზე წყნარია საქართველოს მკვიდრ ტომებს შორის; ხევსურებმა ძველი წყენა გაუხსენეს მეზობლებს, შუღლი გააღვივეს, ხელახლა გააჩაღეს კარგა ხნის წინ შეწყვეტილი აყალმაყალი, გააცოცხლეს პირადი შურისძიების ის ადათი, უხსოვარ დროში რომ მისდევდნენ; ბევრი სისხლი დაღვარეს; სისხლის აღებას უწოდებენ ამგვარ ვენდეტას. ალბათ, იკითხავთ: „რატომ მოხდა ასე?“ იმდენი მიზეზი აქვს ამ ძველთაძველი ჩვეულების აღორძინებას, ჩამოწერა რომ დავიწყო, სათვალავი ამერევა; კონად რომ შევკრა, უთვალავი საბაბი და მიზეზი გადაიხლართება, აიბურდება და ყველაფერი აირევ-დაირევა. 1917 წლის რევოლუციამ ძალაუვნებურად მოიტანა კავკასიაში გარდაუვალი, საყოველთაო დაბავება; მოდუნდნენ, მოეშვნენ; გაქრა უწინდელი დაძაბულობა; მაშინაც კი, როცა საქართველოს სოციალისტურმა რესპუბლიკამ გმირული სულისკვეთება გამოიჩინა და სცადა წესრიგის დამყარება (ამის მცდელობაც კი გმირობის ტოლფასი იყო), მთიელები, რომლებიც უხსოვარი დროიდან უღისციპლინო, ურჩი, კერპი და თავნება ხალხი იყო, მაინც ბობოქრობდნენ; არა და არ უჩანდა ბოლო მათს თარეშს, შფოთსა და მღელვარებას. გარდა ამისა, ხევსურები დენიკინისა და სომხეთის წინააღმდეგ გაჩაღებულ ომში ჩაებნენ; ამიტომაც, სულაც არ ეჭაშნიკათ, ასეთ მოპყრობას რომ შეეჩეხნენ ყაზარმებში; მათ ყველაზე ძლევადასილ თავკაცს სულხანი ერქვა; ვიღაც მოუკლავს ამ უკანასკნელს; ამიტომაც გადამტერებოდა ხელი-სუფალთ, რომელთაც დაიქადეს, საპყრობილეში ვუკრავთ თავსო; როგორც კი ამ აბავმა მიაღწია სულხანის ყურამდე, მთებში გაიხიზნა და უკვალოდ გაქრა; თავის სახლში დაეხვავებინა ტყვიამფრქვევები; სწორედ იმ საბრძოლო იარაღების სანახავად მივეშურებოდით ყველანი ცოტა ხნით ადრე; მაისში, როცა უკანასკნელად გამოცხადდა საყოველთაო სამხედრო მობილიზაცია, ხევსურებმა გაიხსენეს უხსოვარი დროიდან დაგროვილი წყენები, ძველთაძველი სამდურავები, უარი მოახსენეს მთავრობას და კატეგორიულად განუცხადეს, ერთ კაცსაც კი არ გავიმეტებთ თქვენი არმიისათვისო; ბოლოს და ბოლოს, რაკი გეოგრაფიული იზოლაციის გამო არ შეეძლოთ, ფეხი აეწყოთ თანამედროვე მოძრაობებისათვის, მონარქისტებად დარჩნენ (ასეთი ტრადიცია მოსდგამთ), თავშეკავება და დიდი სიფრთხილე გამოიჩინეს და რბილად რომ ვთქვათ, აღფრთოვანებით არ შეეგებნენ ახალ წყობას; არაფრად ეპიტნავათ სახელმწიფოს მართვის ახლებური, რესპუბლიკური ფორმა. მუდამ ამ უცვლელ არგუმენტს

უპირისპირებენ თიანეთის სამმართველოს დაჟინებულ მოთხოვნებსა და საჩივრებს: „დაგვეხსენით! მოგვეცით მშვიდად ცხოვრების უფლება! რატომ ეჩრებით ჩვენს საქმეში? ჩვენ თვითონ მოგავგარებთ ყველაფერს...“ მთავრობის ერთადერთი წევრი, რომელსაც ცოტაოდენი გავლენა მაინც აქვს მათზე, მათ ბარბაროსულად პრიმიტიულ, განუვითარებელ, დახშულ, უმეცარ ტვინებზე, მათივე დეპუტატია – შალვა ქარუმიძე. ერთი წლის წინ ფეხდაფეხ შემოირბინა მთები; ქადაგად დავარდა; ყველას შეაგონებდა, შერიგდითო. კატეგორიულ მოთხოვნებს იღებდა; სწორედ შალვა, ეს ხალისიანი, სიცოცხლით სავსე, მხნე, ლალი, ხელგაშლილი, დიდსულოვანი, გულუხვი კაცი გვამარაგებდა სარეკომენდაციო წერილებით, რომლებიც უნდა გადაგვეცა მისი ურჩი, თავნება და შეუსმენელი ამომრჩევლებისათვის.

მე და დოდი მარტო ვართ, მაგრამ შეიძლება, ოდენ დეპუტატ ქარუმიძისაგან გადმოცემული საბუთები გამოგვადგეს ერთგვარ პაროლად, ჰო, შესაძლოა, ერთგვარ კოდურ სიტყვად გამოვიყენოთ, რადგან ხევსურებს ის-ის იყო, ჩაეხერგათ ბარისახოს გზა; ეს მათი პირველი სოფელი იყო; მხოლოდ მათ კეთილ ნებაზე იყო დამოკიდებული მისვლა-მოსვლა; თუ მოეწადინებოდათ, გაგვატარებდნენ; თუ არ მოეხასიათებოდათ ჩვენი გაშვება, გზას შეგვიკრავდნენ. და რაწამს თიანეთის სამმართველოს იმ ბედკრულმა წევრებმა დაინახეს, როგორი დოკუმენტებით ვიყავით შეიარაღებულნი, გამოგვიცხადეს, ოფიციალურ ექსპედიციას შევკრებთ თქვენთან ერთადო. თუკი ყველაფერს კარგად აწონ-დაწონდით, მიხვდებოდით, რომ, მიუხედავად ყველაფრისა, ამ სამმართველოს ვალი იყო, შეხმიანებოდა თავის უბადლო, ყველასაგან გამორჩეულ, სწორუბოვარ ქვეშევრდომებს, ქვას რომ წყალს გამოადენდნენ, არაფრიდან რაღაც სასიკეთოს გამოადნობდნენ და თვით ყველაზე უხეირო ხისგანაც კი გამოთლიდნენ ბასრ ისარს. არ ვიცი, რამდენად სახეირო იქნება ჩვენთვის მათთან ერთად ლაშქრობა; და დოდის – ამ ახალგაზრდას, როგორც ჭეშმარიტ ქართველს, წარმოუდგენლად კარგი, უტყუარი პოლიტიკური ალღო აქვს – ოდნავ მოელრუბლა სახე... მიუხედავად ამისა, ხელისუფლების წარმომადგენელნი ისეთი თავაზიანნი, ისეთი სანდომიანნი, ისეთი გულითადნი, ისეთი მხიარულნი ჩანდნენ, მეც ისეთი კმაყოფილებითა და სიხარულით აღვივსე, რაწამს დავინახე, როგორ ირეოდნენ ჩემ გარშემო ეს ნორჩი, უშიშარი, შეუპოვარი, გულადი სახეები, რომლებიც ქვეყნად არაფერს შეეპუებოდნენ (ისეთი გამომეტყველება ჭქონდათ, როგორიც იმ ბავშვებს, აკრძალული თავგადასავალი რომ იზიდავთ), უმაღლესი ალტყინებით დავთანხმდი მათს შემოთავაზებას. და მაშინვე შევუდექით ცხენების ძებნას; უთუოდ დაგვჭირდებოდა მათი დაქირავება, რადგან მგზავრობის დასრულებამდე უნდა გვეჭირითა; მე და დოდი დავეხეტებოდით, თან სულ ახალ ცოდნას ვიძენდით და უხილავ ძაფებს ვაბამდით ჩვენსა და ახალ მეგობრებს შორის.

უპირველეს ყოვლისა, უნდა ვახსენო ძია მიხო... ფრანგულად რომ ვთარგმნოთ, ასე გამოვა: „ძია მიშელი“; სწორედ ამ კაცმა გვიმასპინძლა თიანეთში; თავად ხევ-

სური იყო, თუმცაღა, ძალზე ცივილიზებული და კულტურული ადამიანი გახლდათ – ახოვანს, ძვალმსხვილსა და ტანადს, შვენოდა კეთილი, ბადრი სახე; პირის გაპარსვის შემდეგ ნიკაპზე შერჩენილი მისი მოკლე, მხვლეტავი წვერი ნემსის წამახული წვერივით ბასრი იყო; გაგიჟებით უყვარდა თავისი ერთადერთი ქალიშვილი (ათიოდე წლის იყო ის ცეროდენა გოგოცუნა), რომელიც პატრიოტულ ლექსებს წერდა; როცა გამოთქმით, საოცარი გზნებით კითხულობდა თავის სტროფებს, ისეთი იერი ჰქონდა, იფიქრებდით, ეს არამიწიერი არსება ცეცხლისგანაა შექმნილი და სულშთაბერილიო. განცვიფრება მიპყრობს, რაწამს ჩემს ყურთასმენას მისწვდება ეს ხრინწიანი, მძიმე, უსიამო ხორხისმიერი ხმა; თითქოს მათი დიალექტური მეტყველება მხოლოდ და მხოლოდ თანხმოვნებისაგან შედგება... მეხსიერებაში ამომიტივტივდა ლეგენდა იმ თურქი მიჯნურის შესახებ, რომელმაც სიტყვით მიმართა თავის გულით საყვარელ ქართველ ბანოვანს და ამგვარად დაიწყო ხოტბის შესხმა: „ო, შენ! დიდებულო ქმნილებავ! შენი მშობლიური ენა ლომის ბრდღვინვას ჰგავს...“ მიუხედავად ამისა, იმ გოგონას ლექსების სტროფებში ჩაწერილი და ბავშვის ბაგეთაგან აღმომხდარი ქართული სიტყვები იტალიურივით ნაზი და ალერსიანი ხდება, კასტილიის საარაკო გმირთა სიტყვებივით ღირსეული და ჟღერადი... ძია მიხო დიდხანს მუშაობდა მასწავლებლად ბარისახოში; გარდა ამისა, რაკი ეჭვობდა, რომ საკადრისად ვერ დაგვხვდებოდნენ მისი ძველი მოსწავლეები, გვითხრა, მე ვიქნები თქვენი თანმხლები, ეს ღირსების საქმედ მეჩვენებაო. მთათა ხელმწიფის საპატიო ტიტული აქვს; უფრო სწორად, ასე უწოდებს საკუთარ თავს; აღგვითქვა, ჩემი ქედმოუხრელი, მოუთვინიერებელი, გაუტეხელი, დაუმარცხებელი და შეუდრეკელი მშობლიური მხარის უკლებლივ ყველა კარიბჭე განიხვნება ჩემ წინაშეო; გამამხნევებელ აპოსტროფებს წარმოთქვამს⁸, შუა გზაში უწყდება სიტყვა და შემოსძახებს იმ სიმღერებს, საომარ ეპოპებს რომ უკავშირდება.

მერე გამოჩნდა თავადიშვილი შაქრო ჩოლოყაშვილი, რომელიც მუდამ დარჩება ჩემს მეხსიერებაში; ეს კაცი მშვენიერი ქართველი თავადაზნაურობის ყველაზე წარმტაცი განსახიერებაც კია ჩემს თვალში – მათ გამოარჩევთ „ჩერქეზკას“, ანუ ჩოხის სადა ხაზები, ჩემსაზე ათჯერ უფრო ნატიფი და კენარი ტანი, კენტავრის მხარბეტი, არწივის ნისკარტის სადარი ცხვირი, ცოცხალი მზერა, მოუსვენარი, ანთებული თვალები, შავი, ხუჭუტა წვერი, გასაოცარი ღირსება, საუცხოო მედიდურობა, სიამაყე, თავდატერილობა... ბატონი შაქრო მოკრძალებული გახლდათ, თავმდაბალი, მამაცი, გულადი, გამბედავი, ზრდილი, დახვეწილი, თავაზიანი და გალანტური; რაინდული, კურტუაზული მანერებით, გამაოგნებელი ერთგულებით, საკვირველი თავდადებითა და განმაცვიფრებელი თავგანწირვით გამორჩეული; ეს საარაკო ერთგულება და

8. ორატორული ხერხი – მიმართვა უსულო საგნისადმი ისე, როგორც სულიერისადმი, ანდა არმყოფისადმი ისე, როგორც დამსწრისადმი.

თავდადება ბოლომდე შეუბღალავი და მტკიცე დარჩა, ხოლო მის გარდა თითქმის ყველას დააწყდა ნერვები, რადგან აქამდე ერთხელაც კი არ გადაუტანიათ ასეთი ჯოჯოხეთური მგზავრობა; ვერ გაუძლეს ეშმაკის ამ გამოცდას და გადაეშენენ სიშმაგის, რისხვისა და მძვინვარების მორევში. დოლიძეს გამგებლის მოადგილის თანამდებობა ეჭირა; ახოვანი, მჭლე, ხმელ-ხმელი კაცი გახლდათ, ერთიანად დაძარღვული; დონ კიხოტს მაგონებდა; უსაზღვრო გზებით, შემართებითა და ალტყინებით სავსეს, ჭკუა უჭრიდა, გამჭრიახი, საზრიანი, მოხერხებული, ფხიანი და მარჯვე იყო, სიამაყით განმსჭვალული; მოქმედების, თავის გამოჩენის, აღიარებისა და სახელის მოხვეჭის სურვილით იწვოდა. წარმოშობით გურული იყო; საქმიანობისას ოსტატურად იყენებდა იმ პროგრესულ აზროვნებას, რომელსაც ფესვი გაედგა მის პროვინციაში; მეტწილად, მისი უშრეტი ენერგიის დამსახურებაა, ასე რომ დაიხვეწა და განვითარდა თიანეთი; ამ ადამიანს უნდა უმაღლოდნენ, რომ იმ მხარეში არსებობს ელექტრობა; ყვითელი შუქითაა გაბრღვიალებული არემარე; აშენდა მექანიკური სამხერხაო და წისქვილი; აიგო საავადმყოფო; შემოიღეს საღამოს გაკვეთილები ზრდასრულთათვის და ის კინოთეატრიც კი გახსნეს, სადაც აღმზრდელობით, საგანმანათლებლო და შემეცნებით ფილმებს აყურებინებენ ყველა მსურველს! ბატონი ვლადიმირი რუსია, გადასახადების ამკრეფად მუშაობს; არასოდეს არაფერი აუღია თავის ადმინისტრაციას დაქვემდებარებული ხევსური აღმასრულებლებისაგან; თხემით ტერფამდე თეთრი ტანსაცმლით შემოსილი, თმაშევერცხილი, მშვიდი, თვინიერი, უწყინარი და უშფოთველი კაცია; კარგა ხნის წინ შეეგუა ადამიანთა მეტად ცვალებადი გუნება-განწყობის ყველაზე უჩვეულო გამოვლინებებსაც კი; თავის დღეში არ დაკარგავდა იმ კეთილგანწყობასა და გულმოწყალებას, საკუთარ ფილოსოფიად რომ ექცია; კეთილშობილება მისი ცხოვრებისეული მოძღვრება იყო... ძია მიხოს ვეებერთელა სასტუმრო ოთახში ვიძინებდით ხოლმე მე და დოდი, ტახტებზე ვწვებოდით; მაგიდას რომ შემოვუსხდებოდით, ჩვენს მარშრუტს ვხაზავდით; ნაცნობი მილიციელები (ყველაზე გამოცდილი და მცოდნე სამართალდამცველნი იყვნენ) ერეოდნენ ჩვენს სჯა-ბაასში, რჩევებს გვაძლევდნენ, ჭკუას გვარიგებდნენ, ძალზე დემოკრატიულად, ამაღდროულად, მკვახედ, უცერემონიოდ და უკმეხად შეუძახებდნენ ხოლმე თავად ჩოლოყაშვილსა და დოდის (მიუხედავად იმისა, რომ ის-ის იყო, გაეცნოთ ერთმანეთი), სახელებით მიმართავდნენ... მხოლოდ შემდგომში გავიგე, რომ ქართველ მეთაურებსა და ჯარისკაცებს ერთნაირი ყოფა-ცხოვრება ჰქონდათ, – ვერც კი წარმოვიდგენდი, რაოდენ ჰგავდა ერთმანეთს მათი ყოველდღიურობა ამ ქვეყანაში, – მათთვის ჩვეული სრული მიუკერძოებლობის წყალობით იზიარებდნენ სიამესაც და უბედურებასაც, ერთად უძკლავდებოდნენ ყოველგვარ ბიფათსა და ფათერაკს.

როგორც კი გეგმები დავსახეთ, ნამდვილი ქართული ზეიმი გავაჩაღეთ ჩვენი გამგზავრების აღსანიშნავად; დაიწყო დიდებული ნადიმი, რომელმაც, სულ მცირე, რვა

საათს გასტანა; წესი და რიგი დავიცავით და რიტუალურად ავირჩიეთ თამადა (ასე უწოდებენ იმას, ვინც სუფრის თავში დაბრძანდება ბატონკაცურად და ყველაფერს განაგებს); ჩვეულებისამებრ, თამადა ყველაზე მეტად ეძალევა ღვინოს, ყველაზე კარგი მსმელია, ყველასგან გამორჩეული ტემპერამენტი და მხიარული ხასიათი აქვს და საუკეთესო ორატორია (ყველა ქართველი მჭევრმეტყველია! ეს ხალხი ისე იოლად, ლაღად და ძალდაუტანებლად ენაშვებო, როგორც სუნთქავს!); გარდა ამისა, მუდამ ფხიზლობს, თვალყურს ადევნებს წესრიგს, მერხებებს სთავაზობს, მოდით, რიგრიგობით შევსვათ ყოველი ჩვენგანის სადღეგრძელოო; თითოეული თანამეინახე, რაწამს ჯერი მასზე მიდგება, ფეხზე უნდა წამოდგეს და პასუხი შეაგებოს იმას, ვინც ადღეგრძელებს; ასე უნდა მოიქცეს იმის შიშით, რომ სერიოზული შეურაცხყოფა არ მიაყენოს მას და დიდი შეცოდება არ ჩაიდინოს; თამადა წარმართავს სუფრასთან გაჩაღებულ საუბარს და ბრძანებს, შეავსონ შემადრწუნებლად ვეებერთელა და განმაცვიფრებელი ყანწები; აი, ასე უწოდებენ ქართველები ხარის ან ჯიხვის რქებისაგან დამზადებულ, ტალღასავით მოლივლივე, ძვირფას სასმისს, მოსევადებული ვერცხლის მოელვარე მოჭედილობით დამშვენებულს; ღვინით გალიცლიცბულ ამ სასმისს რომ მოგართმევენ, ვერსად ვერ შეძლებთ მის ჩამოღებას; უთუოდ ერთი მოსმით, სულმოუთქმელად უნდა გამოცალოთ; თვალის დახამხამებაში უნდა გაართვათ თავი დაკისრებულ მოვალეობას. გულწრფელად გეტყვით: ყოველთვის მაძრწუნებდა ამგვარი გამოცდა, დიდ განსაცდელადაც კი მესახებოდა; არასოდეს გამწელვებია ეს გრძნობა; ვერავინ აარიდებს თავს ყანწის გამოცლას; თამადა ყოვლისშემძლეა; გრანიტის სიმტკიცე აქვთ ძირძველ, თითქოსდა გასაღკლდევებულ ტრადიციებს; ამიტომაც, თუკი ერთ სტუმარს მაინც გამოეცლება ძალ-ღონე, მოთმინების ძაფი გაუწყდება, ველარ აიტანს ამ ტანჯვას, ველარ გაუძლებს მკაცრ გამოცდას და უარს იტყვის გალიცლიცბული სასმისის გამოცლაზე, იძულებული გახდება, წავიდეს; აღარ დარჩება სხვა გზა. მოვიდნენ ნამდვილი ბარდები, ჭეშმარიტი კელტი მგოსნები – მესტვირეები; ასე უწოდებენ ქართული ხალხური საკრავის, სტვირის, დამკვრელთ, თან რომ მღერიან და ლექსავენ; ეს მესტვირენი იმ მუსიკოსების შთამომავლები არიან, რომლებიც მრავალი საუკუნის განმავლობაში ნუსხავდნენ სასახლეებსა და ციხე-დარბაზებში თავმოყრილ, დიდებული ნადიმებით განებივრებულ ხალხს; ძველად დიდი ვასალნი მართავდნენ ასეთ მეფურ ღვინოს საქართველოში... მესტვირეები იატაკზე დასხდნენ, აღმოსავლურ ყაიდაზე მოირთხეს ფეხი, ილღიაში ამოიჩარეს ის გამობურცული გუდები, – ასე უწოდებენ ტიკს, – ასერიგად რომ აცხოველებენ, თითქოსდა სასიცოცხლო სუნთქვას შთაბერავენ ფლეიტის მწარე, გამაყრუებელ ჰანგებს; მგზნებარებით სავსე ბერიკაცები მღერიან, ამბებს გვიცვებიან, ყველაფერს აღგვიწერენ, სახელდახელოდ თხზავენ, ტკბებიან იმპროვიზაციით... აი, მათი ერთ-ერთი ლეგენდა, საარაკო ბრძოლას რომ მოგვითხრობს: „ანაზდად ჰკრეს დეზები რაშებს; მათმა მათრახებმა სივილით გაკვეთეს ჰაერი...

როცა იმათ დაინახეს, ყველა კარი გააღეს; ყურთასმენის წამლები ჩოჩქოლი, ყაყანი და აურზაური ქარბორბალასავით, თვალის დახამხამებაში გაიჭრა ქალაქის ბჭეთა მიღმა... აი, მაშინ კი დაატყდა თავს ქაჯეთს გამწყრალი უფლის უსაზღვრო რისხვა. კრონოსმა წყრომით დახარა თვალი, მზერა მიაპყრო დედამიწას და წამის გაელვებაში მოაშთო მზის მოალერსე სხივების საამური, ნეტარი სინაზე... ველ-მინდვრები ველარ იტევდნენ ცხედრებს, ყოველწამიერ მატულობდა მკვდართა ლაშქარი... ბოლო არ უჩანდა განსვენებულთა დასს“... „ავთანდილი და ლომი ფრიდონი სასახლის სიღრმეში შეიყარნენ; საბოლოოდ გააცამტვერეს მტერი; მდინარესავით მოჩუხჩუხებდა მიწასთან გასწორებული დუშმანის სისხლი; უსასრულო ღვარი მოედინებოდა; ავთანდილმა და ფრიდონმა შეჰყვირეს, რაწამს ერთმანეთი დაინახეს; დიდად გაიხარეს; ბოლოს თქვეს: „რა მოუვიდა ტარიელს?“ თვალებს აცეცებდნენ, ყოველ კუთხე-კუნჭულს აკვირდებოდნენ, გამალებით დაეძებდნენ ძმადნაფიცს“... „არც ერთმა არ იცოდა ტარიელის ასავალ-დასავალი... არაფერი სმენოდათ მასზე. გზა გააგრძელეს, მიადგნენ სასახლის კარიბჭეს; სულ არ ადარდებდათ მტერი; სწორედ იქ დაინახეს აბჯარ-საჭურვლის გროვა, მახვილების, ხმლებისა და ხანჯლების მოელვარე ნამტვრევები, ათი ათასი გუშაგის უსიცოცხლო სხეული და აგრეთვე, მტერის კორიანტელი“... „სასახლის ყველა დარაჯი სნეულივით ესვენა მიწაზე; თითოეული მათგანი თავიდან ფეხებამდე დაჭრილი იყო; სისხლმდინარე ჭრილობებით დაფარული; უმოწყალოდ დამსხვრეული მათი აბჯარ-საჭურვლის ნატეხები აქეთ-იქით მიმოფანტულიყო; სასახლის ყველა კარი გაღებულიყო, გისოსების ნამტვრევები მიმოხეულიყო. უმაღლესი ტარიელის ნამოქმედარი. ერთხმად თქვეს: „ეს მისი ნახელავია“... „მერე მიაგნეს ერთმანეთისაგან გაყრილ გზებს; როგორც იქნა, გააღწიეს იქიდან და გახოხდნენ გრძელ გასასვლელში; აი, ასეთი სანახაობა გადაიშალა მათ თვალწინ: მთვარეს თავი დაეხსნა გველის ტყვეობიდან, მოეშორებინა ის შხამიანი ქვეწარმავალი და მზესთან შესახვედრად მიეშურებოდა; ერთი სული ჰქონდა, შეეგებებოდა ელვარე მნათობს; კაცმა ასწია თავისი ჩაჩქანი, უკან გადაიყარა გრძელი თმა, რომლის თითოეული ღერიც ქორფა ღერწმის სათუთ, მოქნილ ტანს ჰგავდა და კიდევ უფრო ამშვენებდა მას; გულმკერდი გულმკერდს მისწებებოდა, კისერის კისერზე მიბჯენილიყო, ყელი ყელს გადასტდობოდა“...⁹

9. აი, ასეთია „ვეფხისტყაოსნის“ რამდენიმე მონაკვეთის მოკლე შინაარსი. ეს ეპიკური პოემა, შოთა რუსთაველმა რომ დაწერა მეთორმეტე საუკუნეში, ქართველთა ეროვნული სიამაყეა. ამ ეპიკოსში აღწერილია, როგორ შეიყარნენ ბრძოლის შემდეგ გმირი ტარიელი და ნესტანი. მარჯორი სკოტ უორდროპის წყალობით ვთარგმნე ეს ნაწყვეტი, რადგან სწორედ ამ სწავლულის კალამს ეკუთვნის ამ ნაწარმოების მართლაც რომ საუცხოოდ ბრწყინვალე და ჩინებული ინგლისური თარგმანი.

თავი ოცდამეერთე

ზემო სვანეთი

კარგა დაღამებული იყო, სოფელ კალას რომ მივალწიეთ. ეს თემი თავს იწონებს ერთი ტაძრით; უსაზღვრო, საკვირველ მოწიწებას იჩენენ მისდამი; ყველა გეგმა შევცვალეთ და მთელი მგზავრობის მარშრუტი ავრიეთ, რათა იმ საარაკო საყდრის სანახავად წავსულიყავით. უსასრულო გვეჩვენა უსაშველოდ გრძელი ხეობის გასწვრივ გადაჭიმული გზა, და უსასრულო გვეჩვენა ის მოთეთრო მდინარეც, რომელიც ისე იგრიხებოდა და იკლავებოდა, ვით ქვეწარმავალი ანკარა ნაძვის წაწვეტებულ ტოტებს შორის. ძლივს მოვასწარი იმის გააზრება, რაოდენ გამორჩეული იერსახე ჰქონდა პაწია დაბეზად დაყოფილ ამ სოფელს; ჭერდაბალ, ფერმიმქრალ სახლებს შვენოდა ბელლები, რომელთა მოფრიალებული კარებიც დაფენილ პირებს ჰგავდა; ხახების მაგვარი მათი სიღრმე ჩახერგილიყო ორ-ორი ვერტიკალური თავხეთი; და რაწამს პირველად შევავლე თვალი, ისეთი შეგრძნება დამეუფლა, თითქოს ყველაზე დაუნდობელ, უცილობელ მტრობას მიქადდნენ; ამას წყალი არ გაუვიდოდა; ყოვლად შეუძლებელი მეჩვენა ამის უარყოფა; ყველაზე ეჭვშეუვალი და ცხადი შთაბეჭდილება იყო ამქვეყნად. ნუთუ იმიტომ განვიმსჯვალე ასეთი შეგრძნებით, რომ ამ ბელლებსა და სახლებს, ესოდენ უფერულთ და გახუნებულთ, მძიმედ დასწოლოდა კვამლის ბოლქვებისაგან თითქოსდა დაღარული, შავ-შავი სახურავები? ნუთუ იმიტომ, რომ საფრთხე ემოქრებოდა ამ ძველთაძველ, დანგრევის პირას მისულ, უსწორმასწორო საცხოვრებლებსა და ნაგებობებს? ნუთუ იმიტომ, რომ შეიძლებოდა, სულ მალე ბათქით ჩამოქცეულიყო? იქნებ იმიტომ, რომ მათი გაცრეცილი, ფერგადასული კედლების ფონზე თვალსაჩინოდ გამოკვეთილიყო ერთადერთი, თითქოსდა ეული, მუქი და კუმტი კარი, უხეშად გამოჩორკნილი, ულაბათო ისრული თალის ფორმა რომ ჰქონდა? ნუთუ იმიტომ, რომ ეს კარი გადიოდა აივანზე, რომელსაც სიშორე ფარავდა ჩემს თვალთაგან? ნუთუ იმიტომ, რომ ეს აივანი ჰგავდა იმ ჩასაფრებული მზვერავის გამტერებულ თვალს, გაფაციცებით რომ ელოდა ჩემს გამოჩენას? არ ვიცი, რატომ დამეუფლა ასეთი უსიამო გრძნობა. მიუხედავად ყველაფრისა, ასეა, თუ ისე, თვალის დახამხამებაში შემიპყრობს ხოლმე შფოთვა და მოუსვენრობა. ცოტა ხნის წინ გადაიღო წვიმამ, მაგრამ კვლავ დაუშვა; ენით აღუწერელი გავეშებით, გამძვინვარებითა და გაშმაგებით ეცემოდა წვეთები; წამის გაელვებაში ჩამოწოლილი ზვავით გვშთანთქა წყვდიადმა. გრიშამ ერთი მილიციელი დამიტოვა და სხვებთან ერთად გამალებით შეუდგა თავშესაფრის ძიებას; ნახევარ საათს ველოდე; ისე გავილუმპე, სხეულის ერთი გოჯიც არ შემრჩენია მშრალი; თითქოს ჩემი უკანასკნელი ძარღვებიც კი წყლით გაიჟლინთა; და როცა

გრიშა დაბრუნდა, ერთობ უჩვეულო ამბავი მომითხრო: სოფელი დაცარიელებული ყოფილა; სულიერის ჭაჭანება არ ყოფილა იქ; ყველა კაცი, ქალი და ბავშვიც კი გაკრეფილიყო სადღაც; ვერაფერი უპოვიათ გომურებში, თავლებსა და ბოსლებში დამწყვდეული პირუტყვის გარდა... მდუმარედ გადავხედეთ ერთმანეთს, თუმცაღა, რა გვექონდა სათქმელი? რა ამრი ექნებოდა ამაო კომენტარებს? რად უნდა გავრჯილიყავით ტყუილუბრალოდ? ფუჭი იქნებოდა ყოველი სიტყვა. ცხადზე უცხადესი იყო, მეგობრული კეთილგანწყობითა და სითბოთი სავსე მხარეში რომ არ ამოგვიყვია თავი. მეტისმეტად მძაფრად ვგრძნობდით ამას. „აქაურებმა იცოდნენ, უცილობლად რომ დაადგებოდნენ თავს სამთავრობო კომისიის წევრები და იარაღს აპყრიდნენ“, – მითხრა გრიშამ ბოლოს და ბოლოს. სულ ეს იყო. კრინტი აღარ დაუძრავს არავის.

აი, სწორედ ამგვარ ვითარებაში ისახელებს ხოლმე თავს გრიშა და ყველას უმტკიცებს, რომ სათანადოდ ვერ აფასებდნენ. თვალის დახამხამებაში იღებდა გადაწყვეტილებებს; მერე გამოგვეცხადა ერთი ოფიცერი, რომელსაც კარგად ეხერხებოდა ყოველგვარი გარემოების თავისდა სასიკეთოდ გამოყენება ომიანობის ჟამს; ნამდვილად გაწაფული იყო ამ საქმეში; ყველაფერში ხეირის ნახვა შეეძლო. სოფლის სკოლას მიაგნო და გამიძღვა კიდეც იმ შენობისაკენ. სკოლა, ისევე, როგორც ყველა სხვა ნაგებობა, ცარიელი დაგვიხვდა, და გარდა ამისა, ვეებერთელა სამსჭვალეებით, დაგრეხილი, უთავბოლოდ გადახლართული მავთულებით ჩახერგილიყო მისი შესასვლელი. სულ რამდენიმე წამში შეამტვრიეს ყველა კარი, და ყველა მილიციელმა მიიღო ბრძანება. დაემორჩილნენ განკარგულებას. რამდენიმე მათგანმა მძიმე უნაგირი მოხსნა არაქათგამოცლილ, ფეხებზე ტყავგადაყვლეფილ ცხენებს, დანარჩენები კი წყლისა და ფიჩხის მოსაძებნად გაეშურნენ; ეგონათ, რამეს მაინც იპოვიდნენ სკოლის მომიჯნავედ აქოჩრილ ტყეში; ერთი ოთახი საგულდაგულოდ დაასუფთავეს, დაალაგეს, მერხები და სკამები ერთ კუთხეში მიაწყვეს; ცეცხლი ბრძღვიალებდა და გუზგუზებდა თითქოსდა პირველყოფილთა ხანიდან შემორჩენილ ბუხარში; და შრებოდა აღმოდებული კუნძებისა და ნაპობების წინ დალაგებული ნივთები: ჩვენს უნაგირებზე დასამაგრებელი, დამბახებისათვის განკუთვნილი ტყავის ბუდეები, ჩვენი საბნები და ჩემი ლეიბი (ყველაფერი წვიმის წყლით იყო გაჟღენთილი). როცა ჯარისკაცები დაბრუნდნენ, დარაბები დავხურეთ და დარაჯები დავაყენეთ ყველა კართან. ძალზე ავის მომასწავებელი იყო ეს მდუმარე სამზადისი; ყოველგვარი ახსნა-განმარტების გარეშე ფაციფუცობდნენ; ემზადებოდნენ, რათა გამკლავებოდნენ ხიფათსა და განსაცდელს, თუმცაღა, ჯერ კიდევ არავინ იცოდა, რა საფრთხე გვემუქრებოდა; კაციშვილს არ შეეცნო ეს საიდუმლო; და უეცრად მშთანთქა დებრესიის ბობოქარმა და შავმა ტალღამ. მეჩვენება, რომ ოდინდელი ცნობისმოყვარეობის, სიმამაცისა და გულადობის ნატამალიც კი აღარ შემრჩა; მრავალი ხანგრძლივი, მღელვარე, ხმაურიანი და შფოთიანი თვე გავლიე, ამ ნერვიულობამ, განუწყვეტელმა დარტყმებმა, ელდამ, თავბარმა და ძრწოლამ გამოფიტა ჩემი სხეუ-

ლიც, სულიც და გონებაც. დაე, დაესვას წერტილი ამ მოგზაურობას! დაე, დავწერო წიგნი ამის შესახებ, რახან სწორედ ამ მიზნით წამოვიწყე მოგზაურობა! დაე, წავიდე აქედან, გადავიხვეწო სადღაც შორს, შორს ადამის ურიცხვი მოდგმისაგან, ყველა მთავრობისაგან, ადამიანებისაგან! დაე, აღარასოდეს მისწვდეს ჩემს ყურთასმენას ყრუ გნისა, ღრიანცელი, ერთმანეთში არეული ხმები და მითქმა-მოთქმა! დაე, ვე-
ლარასოდეს ვუმზირო ამქვეყნიურ ტანჯვა-ვაებას და საშინელებებს, რადგანაც, გარ-
და იმისა, რომ ვეწამები, სრულიად უძლური, უმწეო, უღონო და უსუსური ვარ; არაფ-
რის გამოსწორება და შემსუბუქება არ ძალმიძს! არ შემიძლია, ვინმე ვანუგეშო! ვე-
რავის მოვუფონებ გულს! „ადამის მოდგმის პირმშოვ, აცოცდი თვალმიუწვდენელ
მაღლობებზე და გვაუწყე, რასაც იხილავ“. რვა წლის წინ მეგონა, ჯადოსნური ხილ-
ვებით ვტკბებოდი; ცხედავდი, როგორ დააღწია თავი კაცობრიობამ სიბილწეს,
უხამსობას, საზარელ სიბინძურეს, წუმპეს, ტალახს, ლაფს, ციებ-ცხელებას, სილატა-
კეს, გაჭირვებას, უბედურებას, ტანჯვა-ვაებას და ელვის სისწრაფით გაიჭრა წინ,
რადგან უსამღვრო ძალით აღევსო მოუთოკავ, დაუძლეველ, აულაგმავ ლტოლვას,
რომელიც ადამიანთა მოდგმის გარდაუვალი გამარჯვების საწინდარი შეიქნებოდა;
იმპულსი ახალი ხილი იყო სამყაროს ისტორიაში; არნახული ერთობა გაჩნდა, რათა
მოეხვეჭათ ცოდნა და ძლევა მოსილება; და დამყარდა ცხოვრება, კეთილშობილე-
ბით, ძლიერებითა და სინათლით საგსე, და მისი მართვის სადავენი ბრძენმა ხალ-
ხმა იგდო ხელთ; დამკვიდრდა და მოიტანა ისეთი მშვენიერება, სიტურფე, სიკეთე,
გულმოწყალება, წესრიგი და წყობა, როგორც იქამდე ვერ იოცნებებდნენ თვით
ყველაზე დიდი ჭკუა-გონებით, ყველაზე დიდი გულით გამორჩეული ადამიანები; შე-
დეგმა ყოველგვარ მოლოდინს გადააჭარბა. კაცობრიობა ისე გოროზად წამოიჭიმა
მიწაზე, თითქოს კვარცხლბეკზე შედგა, ხელით შეეხო მნათობთ და სამეფო დააფუძნა
ცათა სასუფეველში... „გვაუწყე, რასაც იხილავ!“... როცა უფრო გულდასმით დავაკვირ-
დი ყველაფერს, სულ სხვაგვარი ბედისწერა ვიხილე: განვიმსჯალე იმის ურყევი
რწმენით, რომ ჩვენ, ადამიანები, ისევე, როგორც პირუტყვი, განწირულნი ვიყავით
ტკივილისათვის, ტანჯვა-წამებისათვის, ვარამისათვის, წყვდიადში შთანთქმისათვის,
ხორციელი ვნებებისათვის, სხეულებრივი უინისა და ლტოლვისათვის, გონებაში ფეს-
ვგადგმული ცრურწმენებისა და სულში გამეფებული ძრწოლისათვის. ადამიანები ვე-
რა და ვერ ეგუებოდნენ ამქვეყნიური ყოფიერების პირობებს, წესებსა და კანონებს;
მარად და მარად ეწამებოდნენ, რადგანაც ვერ მოერგოთ ეს ცხოვრება ისე, როგორც
სურდათ; საოცრად ჰგავდნენ მარიონეტებს; დაუსრულებლად დაეხეტებოდნენ ბნელ
ხეობაში, და იმ მაღალ, ლამის ცად აწვდენილ, გადაულახავ მთებს, გარს რომ ერ-
ტყმოდნენ ადამის მოდგმას, სამარადუამოდ გაეძევებინათ თავიანთი სამფლობელო-
დან ვარსკვლავები, სივრცე და დღის ნათელი. ის, რაც ზოგს სამართლიანობად მიაჩ-
ნია, მუდამ უსამართლობა იქნება სხვებისთვის; თანაბრად შეიძლება სათნოებისა და
ბიწიერების, ბოროტებისა და სიკეთის გამართლება და ყველა ზემოჩამოთვლილი ერ-

თნაირი ხვედრის მომტანია; სულდგმულის ხორციელი საბურველი იხლიჩება ურთიერთსაწინააღმდეგო მისწრაფებებს შორის, ამ შფოთის, ორომტრიალისა და დომხალის მიღმა კი იმალება მარადიული დაუკმაყოფილებლობა, მარად მოუკლავი წყურვილი, მარად დაუცხრომელი ჟინი, მარადიული უწესრიგობა, ზედახორა, ფუჭი დანაკარგი და არეულობა, რომელიც ჰგავს ვეება, გადაულახავ, დაუძლეველ ღვარს და თან ისეთი გაუნელებელია, ყველაფერს უძლებს. დაქსაქსული, უთავბოლო, აბნეული, დაკუწული, დასახიჩრებული და სისხლით მოთხვრილი კაცობრიობა, რომელსაც უთუოდ ძლიერ აკლია გარდაუვალად საჭირო, საერთო შთავონება და კოლექტიური აღმაფრენა, უკანასკნელ კატაკლიზმამდის ვერ მოახერხებს საკუთარ ტვინშივე აღმოცენებული კონცეფციებისა და კუნთების ძალის რიგიანად შეხამებას, და ადამიანთა მოდგმა ამ პლანეტაზე გადაჭიმულ, თითქოსდა ზარცემულ, შეძრწუნებულ მიწას მოჰფენს საკუთარი ნატანჯი, უწყალოდ გვემული ნაშთებით, რამეთუ საბედისწერო ყელის გამოჭრა და მსხვერპლშეწირვა მათრობელა ღვინოსავით დაახვევს თავბრუს, მოაჯადოებს, გონგადასული აღტყინებითა და ეიფორიით აღავსებს... „გვაუწყე, რასაც იხილავ!“... მეტისმეტად ბევრი, დიახ, მეტისმეტად ბევრი რამ ვიხილე... და ეს იყო ყოვლისმომცველი, სრულიად უსამართლო, ენით აღუწერელი წაბილწვა, ძალადობის, სიყეყეის, უგუნურების, უმეცრების, უბედურების, სიმძიმის, წამების, ვაების, მწუხარების იმ ბეჭდით დაღდასმული, სასოს რომ წარუკვეთს ადამიანს. ვიხილე ახავლებული, ბერწი მიწა, ტანჯვის ოკეანი დაფარული. ვიხილე, რომ მზე აღარ ამოვიდა ჰორიზონტზე. ცისკიდური აღარ ააღდა ამ ცხრათვალა მნათობის სხივებით. ვიხილე, როგორ შთანთქა უკუნმა ღამემ ყველა ნაპერწკალი. ვიხილე ძველთაძველი რელიგიები – მათი ღმერთებისაგან აღარაფერი დარჩენილიყო მჯიღებისა და ამოყორილი მუცლების გარდა; ურიცხვი რასები ტალახში ფორთხავდნენ, პირქვე დამხობილნი, ლაფით ითხვრიდნენ გულმკერდს, რომლის განწმენდაც ყოვლად შეუძლებელი იყო – აი, ამგვარად ეთაყვანებოდნენ იმ ღმერთებს. ვიხილე ერთი ახალი კულტი, რომლის ქურუმნიც ღიადი კერპების წინაშე აღასრულებდნენ საზეიმო რიტუალებს; ამ კერპთა სახელები იყო: ჭეშმარიტება, სამართლიანობა, განუხრელობა, პირუთვნელობა და ბედნიერება, და დიდების შარავანდედით გაცისკროვნებული მათი სილუეტებიც სხვებივით უძრავად გართხმულიყვნენ მიწაზე; ნაგვითა და ათასგვარი უწმინდურებით დაფარულიყო მათი სახე; მდუმარენი, შებღალულნი და წაბილწულნი იყვნენ; ამავდროულად, შლეგი წინასწარმეტყველნი, სადისტი გამყიდველები და სიხარბით სავსე დაქირავებული ჯარისკაცები ცოცხლად წვავდნენ და მსხვერპლად სწირავდნენ გმინვა-გოდებით დაღალულ ხალხს სისხლით მორწყულ სამსხვერპლოებზე. ოჰ! ვიხილე ცეცხლოვანი მახვილი, თავის ფერმიმქრალ ცხენზე ამხედრებული მიჯირითობდა კვიპაროსების იმ ხეივანში, საშვილოსნოდან აკლდამამდე რომ გადაჭიმულა, და ვთრთი, ავი წინათგრძნობა მიპყრობს, ისე მაშინებს იმის მოყოლა, როგორ გაუთავებლად ტრიალებდა იქ გავლისას! ვიხილე ადამიანთა ხორცისაგან შეკოწიწებული მონუ-

მენტები, იმ ადამიანთა ხორცისაგან, რომლებიც მსხვერპლად შესწირეს მთავრობათა შემზარავ ჟინს, სიხარბესა და მხეცურ, საძაგელ გულისთქმას, ზვარაკად მიიტანეს ხელისუფალთა შემადრწუნებელ, საგმობ წადილთა სამსხვერპლოზე, და იმ ყირმიზ მდინარეთა ალისფრად მოელვარე ზვირთები, დაგლეჯილ-დაფლეთილი ნაწილებიდან რომ ამოსკდნენ ჩქეფით, წყალვარდნილივით მძიმედ დაენარცხნენ მიწას და ერთბაშად შთანთქეს მერმისის ყველა ჩანასახი, ხვალინდელი დღის ყველა თესლი, ნაყოფი რომ უნდა გამოეღო. მეტისმეტად ბევრი, ჰო, მეტისმეტად ბევრი რამ ვიხილე; არ ძალმიძს, გაუწყით რამე; არაფრის წინასწარმეტყველება არ შემიძლია; მართოდენ იმას გამოგიცხადებთ, რომ გარდაუვალი, უწყალო, უღმობელი, საბედისწერო უკუნეთი, დაუნდობელი სასჯელი, ტანჯვა-წამება, გვემა, ჯახირი, ხლაფორთი, წვალება, ტკივილი და გოდება გველის; მაშასადამე, დაე, ახლავე სამუდამოდ დაიხუჭოს ის თვალები, რომელთა სიღრმეშიც დაუვანებია ამ საზარელ ხატებას; რომლებიც ინახავენ ამ სურათებს, და დაე, დაახშონ ხმა იმ ადამიანისა, ამ თავზარდამცემ ხატებას რომ აღწერს!

ო, როგორ იმატებს მღელვარება, შფოთი, ჩოჩოლი და მოუსვენრობა ჩვენ ირგვლივ! გრიშა დაყიალებს ოთახში; ნერვებაშლილი, უმიზნოდ დაბორიალებს; მილიციელები დროდადრო წამოიმართებიან, რათა გარეთ გაიხედონ; ჯიუტად ცდილობენ, რამე მაინც გაარჩიონ ამ თვალშეუვალ ღამეში; მე თვითონ კითხვის თავიც კი არ მაქვს, და შილიფად ჩაცმული გავხევებულვარ ცეცხლშემოგზნებული ნაპობებისა და კუნძების წინ; მოსვენებას ვერ ვპოულობ. ეს მდუმარება, ეს სიცარიელე, ამ მხარის სადღაც გამქრალი მკვიდრნი, ეს თავსხმა წვიმა... ამ საღამოს ყველაფერი უფრო და უფრო ავბედით ელფერს იძენს; უფრო და უფრო მძაფრად გვრძნობ, რომ ყოველივე დიდ საფრთხეს მიქადის; ავი წინათგრძნობა გვიპყრობს; გული გვიგრძნობს, სადაცაა, რაღაც საშინელება დატრიალდება, და ეს გუმანი, რაღაც იდუმალი ძალის გამო, მძიმე ტვირთად გვაწევს. ცოტა ხნის შემდეგ გრიშა მომიახლოვდა და ჩემ გვერდით ჩამოჯდა; თავდაპირველად, ცოტა არ იყოს, არეულ-დარეულად ვმასლაათობდით, მაინცდამაინც დიდი ამრობრივი თანმიმდევრობა არ ჰქონდა ჩვენს დიალოგს, რადგან თითოეული ჩვენგანი ძლიერ შეეწუხებინა სულ სხვადასხვა საფიქრალს; სულ სხვადასხვა რამეს დასტრიალებდა ჩვენი გონება... და, აი, ისე ალაპარაკდა გრიშა, ერთი საკითხიდან მეორეზე გადასვლაც კი არ უცდია; ყოველგვარი შესავლისა და მიკიბულ-მოკიბულის გარეშე, თითქმის მტკიცედ შეუდგა რაღაცის მოყოლას; თითქოს მიჰყვებოდა იმ ხაზს, კარგა ხნით ადრე რომ დაიხაზა; იფიქრებდით, თადარიგი დაიჭირა და წინასწარ გათვალა ყოველივე; ისეთი მბრძანებლური იერით გაავლო ეს ხაზი, არად ჩააგდო პრემბულები; იმ ადამიანს, რომლის გონებაშიც ჩაისახა ეს ყოველივე, სწორედ ეს ხაზი აიძულებს, ხელი აიღოს ყველაფერზე და უმაღლეს მას მიჰყვეს. რატომ მოიქცა გრიშა ასე? რამ უბიძგა ამ საღამოს, გული გადაეშალა ჩემთვის და თავის მესაიდუმლედ ვექცეი? იდუმალებითაა

მოცული ამის მიზეზი. რაწამს მისი ნაამბობის პირველი სიტყვები მისწვდა ჩემს ყურ-
თასმენას, მივხვდი, თავისთვის სასიცოცხლოდ მნიშვნელოვანი ამბავი უნდა მოეთ-
ხრო. როგორ მივხვდი? შეიძლება, ითქვას, რომ სწორედ მისი მონათხრობის ანაზ-
დეულობამაც კი მიმახვედრა ყველაფერს.

ნამდვილად საუცხოოდ მშვენიერი დასაწყისი ჰქონდა ამბავს. არასოდეს მომის-
მენია ნაამბობი, ასე ძლიერ რომ მაგონებდა რომეოსა და ჯულიეტას ტრაგედიას.
გრიშა იმერეთის ერთ-ერთ სოფელში დაიბადა; მშობლიურ მხარეში აღიზარდა ერ-
თი დიდი მემამულის ერთადერთ ქალიშვილთან ერთად; ელენა ერქვა იმ მდიდარი
კაცისა და მისი ცოლის დედისერთა გოგონას; ამ უკანასკნელსა და გრიშას ბავშვო-
ბიდან უყვარდათ ერთმანეთი. სულ ერთად თამაშობდნენ; ერთ სკოლაში დადიოდ-
ნენ; ერთ მდინარეში ბანაობდნენ, ყოველმხრივ ერთიმეორის თანაზიარნი იყვნენ,
საერთო თამაშებით ტკებობდნენ; არასდიდებით არ დაიწყებდნენ უერთმანეთოდ
თამაშს; მათი ნორჩი ცხოვრების ყველა ნაბიჯი, ყველა საქმე, წყლის ორი წვეთივით
ჰგავდა ერთმანეთს და, რაც მთავარია, ერთდროულად დგამდნენ ყველა ნაბიჯს,
ერთდროულად ასრულებდნენ ყველა საქმეს. ბუნებრივია, აღთქმა დადეს, რომ
როცა ხანი გამოხდებოდა და წამოიზრდებოდნენ, შეუღლდებოდნენ. ელენა ქერათ-
მიანი იყო (სანთლითაა საძებარი ქერა ქართველი), დიდრონი, ცისფერი თვალები
შვენოდა; ამ მიმდობი, ნაზი, სათუთი, უსიტყვო, ჩუმი, გულჩათხრობილი, საკუთარ
გრძნობათა ნატყუში გამოკეტილი, მეოცნებე ქალიშვილის შინაგან სამყაროში იმა-
ლებოდა შლეგი ვნება, რომელიც ბობოქრობდა, ზღვაგდებოდა, უფრო და უფრო
შემზარავად დიადი, ძლიერი, შთამბეჭდავი და საუცხოო ხდებოდა; თითქოსდა იქ-
ცეოდა უშველებელ გროვად, ბურთივით იბერებოდა და იბურცებოდა, წყალდიდო-
ბისას მოვარდნილი ღვარივით დიდდებოდა, მაგრამ არ ძალუძდა მისი გამოხატვა...
ყველასგან გამორჩეული, პრინციპული, განუხრელი იყო, აღარაფერი ახსოვდა ში-
ნაგანი სამყაროს გარდა; მარტოდენ გული და გრძნობა იყო მნიშვნელოვანი მის-
თვის; სხვას არაფერს ჰქონდა ფასი. რაჟამს წამოიჩინა, კიდევ უფრო იმატა მისმა
უტყვმა ძალმოსილებამ; და გრიშა, რომელსაც გარეგნულად უფრო მეტად ეტყობო-
და სიფიცხე, გზნება, დაუდგრომლობა, ალტყინება, მძვინვარება, ენერგიულობა და
მოუსვენრობა, ელენას დარად ებლაუტებოდა იმ აზრს, რომ მას და მის სარტფოს
ერთნაირი ხვედრი ერგოთ; რომ ერთმანეთის ბედი უნდა გაეზიარებინათ. რაჟამს
თხუთმეტი წელი შეუსრულდათ, ქუთაისის გიმნაზიაში მიაბარეს, და სწორედ იქ, იმ
ქალაქში ისწავლეს, რას ნიშნავდა ის მორალური თავისუფლება და შემბოჭავ ზნე-
ჩვეულებათა ბორკილების მსხვერვა, რომლითაც რუსი სტუდენტები ტკებიან (ასე-
თი ჩვევა აქვთ); ერთსა და იმავე საგნებს სწავლობდნენ; ერთი და იგივე პრობლე-
მები იპყრობდა მათს ყურადღებას; ერთი და იმავე საჭირობოროტო საკითხები იზი-
დავდათ; ერთსა და იმავე გამოსავალს ეძებდნენ; ერთდროულად დაიწყო დიდი
ინტელექტუალური გამოღვიძება ყმაწვილქალისა და ჭაბუკის შინაგან სამყაროში;

და გამუდმებულმა ფიქრმა, განუწყვეტელმა აზროვნებამ და დაუსრულებელმა გონებრივმა შრომამ გამოაწრთო და განამტკიცა მათი სათუთი ტრფობა და ნაზი სიყვარული. გრიშა გაბედულად, მტკიცედ და შეუპოვრად გადაეშვა სოციალიზმის მორევში; აღფრთოვანებით, თამამად ჩაება საზოგადოებისათვის სასიკეთო საქმეში და ამგვარად განუდგა საკუთარ ოჯახს, ხელალებით უარყო მათი ტრადიციები; გულადი, მამაცი, გამბედავი, იმპულსური და ფიცი ახალგაზრდა სათავეში ჩაუდგა სტუდენტთა პირველ გაფიცვას, და ამბოხის დასასრულს დააპატიმრეს ცარისტმა პოლიციელებმა (ერთ საღამოს შეუცვივდნენ ბინაში), ექვსი თვით გამოამწყვდიეს ქალაქის სატუსალოში; ცალკე კამერაში გამოკეტეს და გაასაიდუმლოეს მისი შეპყრობის ამბავი; წიგნებიც კი არ მისცეს; ტანისამოსიც კი არ აღირსეს; თითქმის უჭმელ-უსმელი ჰყავდათ; ყოველდღე ესწრებოდა იმ ბრძოლას, რომელსაც აჩალებდნენ მეზობელ საკნებში ჩაყრილი მისი ამხანაგები, გაფიცვის ის სხვა სულისჩამდგმელნი, სტუდენტები რომ შეაგულიანეს, წააქემეს და ზემდგომთა წინააღმდეგ აამხედრეს; ასეთი ბრძოლებით იცეკვდნენ თავს, სანამ ჩამოახრჩობდნენ. ენით აღუწერელი საშინელება იხილა გრიშამ; დაწვრილებით აღმიწერა ჯოჯოხეთური, შემზარავი სცენები. ელენა იყო ის ერთადერთი ადამიანი, რომელმაც შეძლო მისი მონახულება, და ამ განსაცდელის ჟამს იგრძნეს მოზღვავება იმ სიყვარულისა, რომელიც საბოლოოდ გარდაისახა არაამქვეყნიურ აღტყინებად და გზნებად. ბოლოს და ბოლოს, გაათავისუფლეს საპატიმროდან; როგორც იქნა, ძღვევამოსილი, წონიანი, ავტორიტეტული და გავლენიანი ადამიანების წყალობით დააღწია თავი ტყვეობას, თუმცა, განდევნეს თავისი სოფლიდან; ელენა მშობლიურ მხარეში გაჰყვა მიჯნურს, მაგრამ, როგორც აღმოჩნდა, სულ ტყუილად გადალახეს ამოდენა მანძილი – იქ წააწყდნენ შემადრწუნებელ წინააღმდეგობებს, გადაულახავ დაბრკოლებად რომ აღმართულიყო მათ წინაშე. გრიშას მამა მოხუცი, ქედუხრელი, შეუდრეკელი და შეურიგებელი არისტოკრატი გახლდათ; მისი გული დაეკოდა ვაჟიშვილის რევოლუციურ მაქინაციებს, ფანდებს, მანევრებს, ინტრიგებსა და ხრიკებს; ქალიშვილის მამას კი, პირიქით, ფეხი აეწყო ახალი მოძრაობისთვის; და ამ ორი ოჯახის უფროსებმა ყველაზე უღმობელი პოლიტიკური მტრობა და სიძულვილი აღუთქვეს ერთმანეთს; ბოლო არ უჩანდა ორმხრივ ბრალდებებს, ღვარძლიან საყვედურებს, მწარე ჩივილს, დამუნათებას, გაკილვას; იქამდე მივიდა საქმე, რომ ერთმანეთი შეურაცხყვეს ერთ-ერთი სახალხო თავყრილობისას; ერთმა მეორე დაადანაშაულა, მოზარდები გზას ააცდინე და გადაავარეო; მეორემ კი მიახალა, მაგნე რეტროგრადი, დამლუპველი რეაქციონერი, ჩამორჩენილი, პროგრესის დაუძინებელი მტერი, წარსულის გადმონაშთი, გონებაშეზღუდული ანაქრონიზმი ხარ და ძალ-ღონეს არ იშურებ იმისათვის, რომ როგორმე შეაჩერო გარდაუვალი და ყოვლად სამართლიანი ევოლუციაო. ახალგაზრდა გრიშასა და ელენას საბოლოოდ აუკრძალეს ერთმანეთის ნახვა; მათი შესაბრალონი დედების ძალისხმევის მიუხედავად, კიდევ უფრო იმატა ამ ორი კაცის მრისხანე-

ბამ; გამძაფრდა ისედაც უსაზღვრო სიძულვილი; იმატა გმობამ და შეჩვენებამ; ყოველივე ამან მტრობის, უკეთურების, სიავისა და არაკეთილმოსურნეობის პაროქსიზმს მიაღწია – გრიშასა და ელენას, ჯერ კიდევ ბავშვები რომ იყვნენ, დაექადნენ, მამების წყევლა-კრულვის ნიაღვარი დაგატყდებოდა თავს, თუკი კვლავ გეყვარებათ ერთმანეთით; მარტოოდენ ეს მიზეზი იქნება საკმარისი თქვენ შესაჩვენებლადო; უთუოდ უნდა ამოიგლიჯოთ გულიდან ერთიმეორეო. საქართველოში იმხანად არავის მოუვიდოდა აზრად, წინ აღდგომოდა ამგვარ ბრძანებებს, აჯანყებოდა მშობლებს, თავად ეგდო ხელთ საკუთარი ცხოვრების მართვის სადავენი, ისე გამოეძერწა თავისი ყოველდღიური ყოფა, როგორც მოეწადინებოდა, ისე გაელაპირა სიცოცხლის დღენი, როგორც თავად სურდა, მიეფურთხებინა ოჯახისათვის და არად ჩაეგდო დედ-მამის ნება. როცა ყმაწვილქალი ელენა საბოლოოდ დარწმუნდა, რომ ყოველგვარი იმედი გადაწურული იყო, პირველად ჩამოაგდო სიტყვა თვითმკვლელობაზე. მრავალი კვირის განმავლობაში ხვდებოდნენ ერთმანეთს სხვებისაგან მალულად; საიდუმლო საუბრები ჰქონდათ გაჩაღებული; გრიშა იბრძოდა, უძალიანდებოდა, ეხვეწებოდა, ევედრებოდა, ემუდარებოდა, ედავებოდა, შეაგონებდა, ჭკუას არიგებდა; მაგრამ იგი კერპი, შეუსმენელი, თავისნათქვამა და ნაღვლიანი აღმოჩნდა; იმ საარაკო სიყვარულით გულანთებულ, ტრაგიკულ, დიად, მიჯნურ ქალთა მოდგმის ღირსეული შთამომავალი გამოდგა, რომელთაც მაშინაც კი იზიდავდა და ნუსხავთ სიკვდილი, როცა ბედნიერებას ეზიარებიან. როგორც იქნა, გრიშა დანებდა გულის სწორს; ბოლოს და ბოლოს, დაყარა ფარ-ხმალი; ერთ დღეს, ორივენი გაემგზავრნენ ქუთაისს, და იმ ღამეზე ქალაქში იქირავეს ერთი ოთახი ღამის გასათევად. ქალიშვილმა არაფრის თქმა არ ისურვა მისთვის; არაფრის ახსნა არ იწებდა; მხოლოდ ის სთხოვა დაჟინებით, მე მომანდე ყველაფრის გადაწყვეტაო, და მოქანცული, ყველაფრისგან მოყირაჩებული, არაქათგამოცლილი და გაბებრებული ყმაწვილი დათანხმდა. ელენამ თავად მოუმზადა ვახშამი იმ ღამეს; უარი უთხრა გულის გადაშლაზე, საიდუმლოს გამჟღავნებასა და გეგმების გამხელაზე; ბოლომდე არ გაუნდია სატრფოსთვის, რა ცეცხლი ტრიალებდა მის სასოწარკვეთილ, მოწყალე, ღმობიერ, თანაღმობით სავსე გულში; როცა მოუსვენარი, დაუდეგარი და შეწუხებული გრიშა შფოთიან კითხვებს უსვამდა, ელენა ეამბოროებოდა მის ბაგეს და ასე ადუმებდა, თუმცაღა, ამავე დროს, გრიშამ გულის სიღრმეში იცოდა, უდარდელობა და უბრუნველობა რომ იმალებოდა ამ შიშის, ძრწოლისა და შფოთის მიღმა, რამეთუ სიკვდილს თავისივე ნებით დათანხმდა. ვაჟმა მასთან ერთად მიირთვა კერძი და უმაღლილი მოერიცა; ვერა და ვერ გაუმკლავდა ამ დაუძლეველ სურვილს; ელენამ საწოლამდე მიიყვანა, დააწვინა, მერე კი თავადაც გაიშოტა მის გვერდით; და რაკი ყმაწვილქალმა ერთგვარი პირქუში გააფთრებით, გულმხურვალედ და დაჟინებით სთხოვა, სარეცელი გავიზიაროთო, რაკი ასე გამოიწვია, წააქეზა და აცდუნა, ახალგაზრდა პირველად დაეუფლა მის სხეულს; მოწყვითა მისი უმანკოების ყვავილი. და

მერე მოცელილივით დაემხო საწოლზე და უმაღლეს აზარას მორევში გადაეშვა. ორმოცდარვა საათის შემდეგ მიაკვლიეს ქალ-ვაჟს; დიდი დრო გალიეს მათ ძებნაში; ყველა კარი შეამტვრიეს; გრიშა კომაში იყო, ელენას კი სული დაელია; მისი თავი მისი საყვარლის გულმკერდზე ესვენა; გახელილი დარჩენოდა მშვენიერი, ცისფერი თვალები და თითქოს დაჟინებით შესცქეროდა თავის ერთადერთ და ჭეშმარიტ მიზნურს. ექვსი თვის განმავლობაში მკურნალობდნენ გრიშას, რათა როგორმე გადაერჩინათ; ამდენი დრო და ზრუნვა დასჭირდა მის ხსნას, რადგან სასიკვდილო შხამს ძლიერ ევნო მისთვის; გამოხდა ხანი და ევროპაში გაამგზავრეს; და მხოლოდ იმისათვის დაბრუნდა სამშობლოში, რომ გააფთრებულ ბრძოლაში ჩაბმულიყო, როცა დიდი ომი გამოცხადდა; რუსეთ-გერმანიის საზღვრებისაკენ გაემშრა. ვერასოდეს მიხვდა, როგორი განზრახვა ჰქონდა მის საყვარელ ქალს; ეს ჩანადიერი ბოლომდე იდუმალებით მოცული დარჩა მისთვის; ნუთუ ელენამ მიქსტურის სხვადასხვა დოზა დაასხა საკუთარ და გრიშას კერძებს? იქნებ განგებ შეურია არათანაბარი დოზები, რადგან გრიშას გადარჩენა ეწადა? ნუთუ უნდოდა, მასზე დიდხანს ეცოცხლა მის გულის სწორს? ან იქნებ თანაბრად გაანაწილა საწამლავი, მაგრამ გრიშა სიკვდილისაგან იხსნა ოდენ საკუთარმა გაუტეხელმა ჯანმრთელობამ, დიდმა ამტანობამ, ახოვნობამ, ზორბა აღნაგობამ და მტკიცე აგებულებამ? გრიშა მიუახლოვდა ნამბობის დასასრულს, მერე კი ცრემლი წასცდა; რა შემზარავი იყო მისი გულამოსკვნილი ქვითინი! „ვერასოდეს გავიგებ ამას; ჩემს დღეში ვერ ჩავწვდები ამ საიდუმლოს; თუკი ჩემი გულის მურაბი ნატრობდა, მეც მასთან ერთად გამოვთხოვებოდი წუთისოფელს, განა მაქვს სიცოცხლის უფლება? მე ხომ ჯერ კიდევ სულდგმული ვარ?!“ – ამოიგმინა დაღონებულმა. ოჰ! რა ცხადად ჩამესმის მისი სასოწარმკვეთი და გულსაკლავი სიტყვები! რა ცხოვლად მეხატება თვალწინ მისი კრუნჩხვამორეული სახე, მისი მოძრაობა! ბრმასავით აფართხალდა და ხელის ცეცებით გამოემართა, რათა როგორმე მოეღწია ჩემამდე; სურდა, მისთვის მეწყალობებინა შემწეობა, რამეთუ ყოვლად აუტანელი ტანჯვა გადაიტანა, გაუსაძლისი წამება იწვნია, ჯვარს ეცვა, ევნო, გოლგოთის გზა გაიარა, მარტვილობის სიმწარე და გვემა იგემა და ახლაც არ უჩანდა ბოლო მის უსასოობას, განსაცდელს, ნაღველს, მწუხარებას, უბედობას, მიუსაფრობასა და ტკივილს. ვაი, რომ არ შემიძლია, შემწე-მფარველად მოვვლენოდი და დახმარების ხელი გამეწოდებინა მისთვის! მეც ვაღვარღვარებდი ცრემლებს; ვტიროდი, რადგან სრულიად უსუსური, უმწეო და უღონო ვიყავი, და მის ტკივილიან, მწარე ქვითინსა და სლუკუნს, მტანჯველ ხმაურად რომ ჩამესმოდა, ანაზღად შეერია გარედან შემოღწეული, ყურთასმენის წამლები, უცაბედი, საზარელი ხმაური – ცეცხლსასროლ იარაღს ისროდნენ. ეს სცენა სამარადისოდ ჩამებეჭდა მეხსიერებაში; შემომრჩა იმ ღამის მოგონება, რამეთუ ერთ-ერთი ყველაზე მტანჯველი და გულის მომკვლელი სცენა იყო მათ შორის, ჩემ დღეში რომ მინახავს: გრიშა წამოიმართა, სახე ჯერ კიდევ დაღტობილი ჰქონდა ცრემლებით, მაგრამ უმაღ

გაიღვიძა მკაცრ დისციპლინას ნაჩვევი, გამოწრთობილი ჯარისკაცის მძაფრმა ინსტინქტმა და უტყუარმა ალლომ, და ახალგაზრდა კაცი უეცრად მოსწყდა ადგილს, გავეშებით დაეძგერა შემოსასვლელს და შესძახა: „ყველანი კართან აესვეტეთ!“ სულ რამდენიმე წაშში მოახერხეს ყველა კარის ჩახერგვა, გადაულახავი ბარიკადების აღმართვა; ყველაფერი, რაც სკოლის შენობაში მიმოფანტულიყო და რაც ხელში მოჰყვათ, აახორეს კარის წინ; უზარმაზარი გროვა დადგა; დახვავებულიყო მერხები, სკამები და მაგიდები. „არ მოშორდეთ თქვენს ადგილებს... ფხიზლად იდარაჯეთ...“ – ასეთი მოკლე, გასაგები და ნათელი ბრძანებები პოსტზე დამდგარ გუშაგებს მილიციელებს ამსგავსებდა. „არ გაისროლოთ; არ უნდა მოგვაკვლიონ; დაელოდეთ მათ თავდასხმას. სანამ იერიშზე არ გადმოვლენ, არ გაინძრეთ“. გრიშამ სანთლები ჩააქრო, რათა ერთი ბეწო სინათლეც კი არ გაპარულიყო ტუტრუტანებიდან და კედლის ბზარებიდან; გარდა ამისა, უკვე დაეხურათ ჩემი ოთახის ხის დარაბები, და ვერაფერს ვხედავდი წითლად მოელვარე ცეცხლისა და ბუხარში მოგიზგიზე კუნძების გარდა. „Lie down! დაწექით, ოდეთ!“ – მითხრა გრიშამ. ჩემკენ გამოემართა, რახან კვლავ ფეხზე ვიდექი; უნდოდა, ძალა დაეტანებინა ჩემთვის და ძირს გავეშოტე. მაგრამ რაწამს მომიახლოვდა, სიშმაგემ შემიპყრო (არ ვიცი, რად მოხდა ასე); არნახული გავეშება და გააფთრება იყო! არასოდეს, არასოდეს მიგრძნია ჩემი სიგიჟე ისე მძაფრად, როგორც მაშინ, იმ შემადრწუნებელ წუთებში; ჩემს არსებაში უთუოდ დაუბუდებია ამ სიშლეგეს – ამას წყალი არ გაუვა. გონგადასული, შეშლილი ქალივით გავუძალიანდი მის იმ მძიმე ხელებს, აუტანელ ტვირთად რომ დამწოლოდნენ მხრებზე და ჩემს მოდრეკას ლამობდნენ. დამეხსენით ყველანი! მინდა, მოვკვდე თავისუფალი და ეული, მარტოდ შთენილი; არა მწადია ეს მკლავები, მარწუხებივით რომ შემომჭდობიან; არა მსურს მამაკაცის ეს ალერსი და ლაციცი; ვნატრობ, მოვკვდე მეთვალყურეთა მხერისაგან შორს, მათი სიტყვებისაგან შორს... არ მინდა არც ღმერთების ნუგეშისცემა, არც ადამიანთა მოდგმის დახმარება, შემწეობა, შველა, მოწყალება და მფარველობა; ვოცნებობ, მარტოდმარტო გამოვესაღმო სიცოცხლეს, გამოვეთხოვო ეული, ჩემი სულის ანაბარა დარჩენილი, ჩემი აზრებით, ჩემი ფიქრებით, ჩემი ძალით, ჩემი სიმწრითა და ვარამით, ჩემი შიშით; ისლა მწადია, მარტოდმარტომ ვიარო წინ და შთავინთქა აჩრდილებით სავსე წყვდიადში. მარტოდმარტომ გავლიე ამ ცხოვრების გზა, მარტოდმარტომ გადავჭერი ჩემი პრობლემები, მარტოდმარტო გავუმკლავდი სირთულეებს, მარტოდმარტო წამოვდექი ფეხზე, როცა სხვებმა მთელი ძალით დამცეს ძირს; არ მინდა, შემეხონ ის ფარისევლები, თვალთმაქცები, პირმოთნეები, უვარგისები, უგერგილოები, უღმობლები და სასტიკები; არ მახლონ ხელი ამ უკანასკნელ წამს, როცა საშინლად გამძაფრდა ჩემი სიცხოველე. არასოდეს არაფერი უქნიათ ჩემთვის სიავის გარდა; არასოდეს დაუყრიათ სიკეთე; ოდენ მავნეს; ბოროტებითა და უკეთურებით დამამახსოვრეს თავი; არ დავნებდები; არ მოვიხრი ქელს; წინ აღვუდგები; არ მივცემ უფლებას, ასე ჩამაშხა-

მონ სიკვდილი, რადგან უკვე ყველაფერი ჩამამწარეს, წაახდინეს, შებღალეს და წაბილწეს ჩემი ცხოვრების ყველაზე ამაღლებული და წმინდა, ყველაზე ძვირფასი და სანუკვარი საუნჯენი, რამეთუ, რაკი აბსოლუტს ვესწრაფოდი და დაუსაბამოსა და მარადიულთან ზიარება მეწადა, ადამიანებმა ოთხ ნაწილად გაგლიჯეს ჩემი გული.; როცა ასე მაწამებდნენ და გულს მიფლეთდნენ, ტაკიმასხარებივით ხითხითებდნენ და ისეთ პირუტყვულ სისასტიკეს, სიველურეს, სიმხევეს, უხეშობასა და დაუნდობლობას იჩენდნენ, თვით ყველაზე უწყალო და შეუბრალებელ ჯალათებსაც კი შეშურდებოდათ. არავის ვენდობი, არავისი მწამს ჩემი თავის გარდა – მხოლოდ საკუთარი ხელები გამომადგებიან ჩემი გონებისა და სულის მტკიცე საყრდენად, და როს, ბოლოს და ბოლოს, დავიხსნი თავს ყოველი საძულველი, უცხო მონობის უღლისაგან და ვიგემებ ნანატრ თავისუფლებას, ჩემი ეული ცნობიერების განუყოფელი მთლიანობის წყალობით, თამამად გავუსწორებ თვალს შეუცნობელს და გულუშიმრად შევეგებები სიკვდილის იდუმალ სამყაროს. ხელის კვრით მოვიცილე გაოგნებული გრიშა, განვეშორე მილიციელებს, და საკუთარ შინაგან სამყაროში ჩაძირული, ველოდები, როდის დადგება უკანასკნელი წამი, თუკი მაინცდამაინც ამაღამ უნდა დადგეს.

არ დამდგარა, რახან ამ გვერდებს ვწერ, რახან ჯერ კიდევ აქა ვარ, გამალებით ვიქექები ამ მოგონებებში, ვაცოცხლებ ამ გრძნობებს, ხელახლა განვიცდი ყოველივეს და კვლავ ვიძირები ემოციების ამ ზღვაში; ო, როგორ მინდა, დავწვდე ჩემს გულს, ხელისგულებს შორის მოვიმწყვდიო (რაკი ჩემს დიდ წარსულს გადავაგლე თვალი) და ვუთხრა: „დაიძინე; საკმარისია; მორჩა; აღარასოდეს, აღარასოდეს განმეორდება ეს საშინელება... დაიძინე... რახან მათ ისიც კი არ შეეძლოთ, გამოეჩინათ ყოვლად უბადრუკი გულმოწყალება და მოეკალი, სულ სხვა გზა ვპოვე შენთვის, და სულ მალე შეძლებ იქ სამარადისოდ განსვენებას“... ვერასოდეს მივხვდით, რამ აურია გზა-კვალი იმ სვანებს, სოფელს რომ დაეცნენ თავს; იქნებ სახლებში გამეფებულმა წყვდიადმა? იქნებ სკოლის შენობაში ჩამოწოლილმა უკუნეთმა? იქნებ ჩვენმა მღუმარებამ? ან იქნებ მართლა შეცდნენ? ნუთუ ნამდვილად დაიჯერეს, რომ განიარაღების სამთავრობო კომისიის წევრები ვიყავით? მეორე დღეს, სოფლის ბინადრებმა ჯერ ყველა თავიანთი ღმერთი დაიფიცეს, მერე კი ყველა სათაყვანო ხატის წინაშე მოჰყვნენ ფიცილს, საერთოდ არაფერი ვიცით, წარმოდგენა არა გვაქვს, რა ხრიკები წამოიწყესო. ამასთანავე, უნდა ითქვას, რომ მხოლოდ ოც წუთს გასტანა ცეცხლსასროლი იარაღების გაშმაგებულმა და გაბმულმა ბათქაბუთქმა; დარწმუნებული ვარ, გრიშას გადაწყვეტილებამ (მილიციელებს არ დართო ნება, ერთხელ მაინც გაესროლათ საპასუხოდ და თავის დასაცავად შეეცაათ მათთვის, სანამ თავად არ გამოვიდოდნენ აშკარა და დაუფარავ იერიშზე) მართლაც ძალზე დიდი წვლილი შეიტანა ჩვენი სიცოცხლის ხსნის საგმირო საქმეში. როცა კვლავ სიჩუმე ჩამოვარდა, უშფოთველი და შეუვალი ჯარისკაცები კი კარის ზღურბლებთან მოკალათდნენ ლამის გა-

სათევად, გრიშა ჩემ დასახედავად შემობრუნდა ჩემს ოთახში. ცოტაოდენი პური და კონსერვის ქილები მომიტანა; ჩემს საწოლზე ჩამოვსხედით და გავირინდეთ, ოთახის წყვდიადში ჩაძირულნი; არ უნდოდა, კვლავ ამენთო სანთლები. სულ დამვიწყებოდა განგაში და საბრძოლო მზადყოფნა; ყველაფერი გადამვარდნოდა გულიდან და ვფიქრობდი ჩემი მეხსიერების უძირო მორევიდან ამოტივტივებულ იმ ქერათმიან ბავშვზე, იმ ელენაზე, რომელმაც გრიშას გვერდით მოისწრაფა სიცოცხლე; მისი სიყვარულის გამო გამოეთხოვა წუთისოფელს; და მჯეროდა, რომ კურთხეული და ნეტარი იყო მიჯნურთა, საყვარელთა და ნანდაურთა შორის; დალოცვილი და განწმენდილი იყო ელენა, ანუ ის, ვინც უსაზღვრო სიხარულის, ბედნიერების, განცხრომისა და ნეტარების ჟამსაც კი სულის დაღევა არჩია! ოჰ! ნეტავ ბედისწერა (განგება უთუოდ ვალშია ჩემ წინაშე – ცოტაოდენი სინაზე და ღმობიერება მაინც უნდა გამოიჩინოს ჩემდამი) ერთ დღეს მეც ელენასავით დამანებებდეს ნეტარ სიკვდილს – დაე, გამოვესალმო წუთისოფელს, როს ახდება ჩემი ერთ-ერთი ოცნება! უეცრად გრიშამ მკლავები შემომაჭდო, მხრები დამიკოცნა, მკერდზე მომაბჯინა თავი, და თითქოს ყველაფერს მიმიხვდაო, ტირილ-ტირილით გაიმეორა რამდენჯერმე: „And now I love you“... „და ახლა კი თქვენ მიყვარხართ; მიყვარხართ, და მდაბლად გთხოვთ, მომიტევოთ“.

აღბათ, მისი სიყვარული ბევრად უფრო ნაზი, სათუთი, ურყევი და შეუდრეკელი იყო, ვიდრე მრავალი სხვისა; თუმცაღა, მამაკაცთა გულში აღმოცენებულ, თვით სწორუპოვარ სიყვარულსაც კი არაფერი მოუტანია ჩემთვის; მარტოოდენ სიკვდილის სურვილი აღმიძრა; ჰო, ვინატრე, ბოლოს და ბოლოს, დამეღია სული, რათა თავდავიწყებით აღარ მივნდობოდი ამ გრძნობას. და ეს კაციც, ეს ქართველი ოფიცერიც, გულში რომ მიკრავდა და თან ცრემლებს აღვარღვარებდა, ჰო, ეს კაციც (სხვების დარად) ოდესმე აღმიძრავდა სიკვდილის სურვილს; ერთ დღეს უთუოდ მანატრებინებდა იმას, რაც მანატრებინეს ჩემმა სხვა მიჯნურებმა... დიახ, ყველა მათგანმა წუთისოფელთან გამოთხოვების წადილი გამიჩინა...

მეორე დღეს გრიშამ მბრძანებლური ტონით იხმო თავისთან კომისარი და რწმუნებული; კვლავ მოუყარა თავი მილიციელებს და ყველანი გავედით მოედანზე, რათა დაჟინებით მოგვეთხოვა ახსნა-განმარტებები; გვინდოდა, გავგერკვია, რატომ მოხდა ასეთი რამ წინაღამეს, რად ჩაიდინეს ეს ყოვლად აღმაშფოთებელი დანაშაული და შეურაცხყოფა მიაყენეს თანამდებობის პირებს სამსახურებრივი მოვალეობის შესრულებისას.

რაწამს თავი მოიყარა კალის უკლებლივ ყველა სახელოვანმა, გავლენიანმა და საპატიო მკვიდრმა, გრიშამ მათი დაკითხვა დაიწყო. თუმცაღა, როგორც აღმოჩნდა, არაფერი იცოდნენ; არაფრის ბაიბურში არ იყვნენ; დაიფიცეს, უდანაშაულონი ვართო; თვით უმანკოებისა და უბიწოების განსახიერებად მოგვაჩვენეს თავი; გვითხრეს, ჩვენ ვერ ვაგებთ პასუხს იმ მოთარეშე ავაზაკთა ბანდების შემზარავი დანაშაულებისა და უკეთურების გამო, რადგან არც კი ვიცნობთ იმ დაჯგუფების წევრებ-

სო. ერთ საათს გასტანა საიდუმლო ბჭობამ და ჩურჩულმა; რაკი კატეგორიულად არ მიიღეს ჩვენი საჩივარი და ფორმალურადაც დასრულდა ყველაფერი, გრიშა სულ სხვა საკითხის განხილვაზე გადავიდა:

— ეს ქალბატონი, მე რომ მახლავს, უცხოელია, ჩინებული მეცნიერი და გამოჩენილი სწავლული; ამ ტაძრის სანახავად ჩამოვიდა საფრანგეთიდან; ხომ მისცემთ დათვალიერების უფლებას?

— არა, — ერთხმად მიუგეს მათ.

მაშინვე გაჩაღდა ცხარე კამათი, რომელმაც კიდევ ერთი საათი წაგვართვა. ომის გამოცხადებამდე ცოტა ხნით ადრე, ერთი რუსი გრაფინია ჩამოსულა აქ; უაღრესად გავლენიანი და ძლევამოსილი ადამიანების წყალობით შეუღწევია სალოცავში; ხელოვნების ნიმუში მოუპარავს და ერთ-ერთ მუზეუმში წაუღია. შევთავაზე, შემომყევით იმ ტაძარში, თვალი არ მომაცილოთ და ფხიზლად მიდარაჯეთ-მეთქი; ისიც დავაყოლე, პირობას ვდებ, არც ერთ ხატს არ შევხები, მხოლოდ ჩემს უბის წიგნაკს შევიყოლებ, სხვა ნივთებს კი დაუნანებლად შეველევი-მეთქი. მერე უკანასკნელ, წარმოუდგენლად დიდ დათმობაზე წავედი და ვუთხარი, თუ მოისურვებთ, შეგიძლიათ, ხელებიც შემიკრათ-მეთქი. გრიშა მეტად უკმაყოფილო დარჩა ჩემი გადაწყვეტილებით; ამპარტავნული იერით გადასცა ჩემი თხოვნა მათ. „არა. ეს უცხოელი, ეს გადამთიელი ქალია; ამიტომაც, შესაძლოა, რამე სწეულება სჭირდეს, ან დედათა წესი ჰქონდეს და წაბილწოს წმინდა ადგილი!“ — უპასუხეს მათ. აღშფოთებით ვიუარე, ენერგია შემემატა და საჯაროდ განვაცხადე, მერწმუნეთ, სრულიად ჯანმრთელი ვარ, თუ ჩემი არ გჯერათ, შეგიძლიათ, სოფლის ორ მატრონასაც კი უხმოთ, ის ქალები გულდასმით გამსინჯავენ და დარწმუნდებიან, სალ-სალამათი რომ ვარ-მეთქი. ხანგრძლივი, მოსაწყენი და გულისგამაწვრილებელი საუბარი კინკლაობაში გადაიზარდა, მერე კი სხვისი პირით მამცნეს საბოლოო განაჩენი: „არა! შეიძლება, თვით იმ ტაძარში შესვლის შემდეგ იქცეს უწმინდურ არსებად! თუ ასე მოხდება, ველარასოდეს შევძლებთ იმ ბიწიერების მოშობას და წმინდა ადგილის ხელახლა კურთხევას!“ რწმუნებულის მოსყიდვა ვცადე; ეს კაცი შეძრწუნებისაგან უკან იხევდა და ამბობდა, ხელები დამიბანია, არაკომპეტენტური ვარ, არაფერი გამეგება ამ საქმისაო; მიუხედავად ამისა, ეტყობოდა დიდი წადილი; მერე მათ შევთავაზე, დიდძალ თანხას გავიღებ, რათა ამ ეკლესიის მოვლა-პატრონობა შეძლოთ-მეთქი, მაგრამ უხუცესები შეუდრეკელნი და ქედუხრელნი ჩანდნენ. „არა! ოდენ ქალის იქ ყოფნაც კი უწმინდურების ტოლფასი იქნება!“ — მომახალეს უკმეხად. ერთადერთი ნებართვა მოვიპოვე: მითხრეს, შეგიძლიათ, მთის ძირას იაროთ და დატკბეთ მწვერვალზე გოროზად წამომართული წმინდა სალოცავის მხერითო. სულ ეს იყო. მეტს ვერაფერს მივადწეე. მაგრამ ეს მეტისმეტი შეურაცხყოფა იყო; საჯაროდ დამამცირეს და შებლაღეს ჩემი სახელი; ხმათართოლებული და ძლიერი გრძნობით შეპყრობილი ვიწყებ გულში ჩამწვდომ, გზნებით სავსე და მეტად ამაღელვებელ ენაშვებობას, რათა ყველას ვაუწყო, ჩემი წადლების ლანჩებით

ავადენ მტვერს ამ ველურთა დაბას, კორიანტელს დავაყენებ, მერე კი სამუდამოდ განვეშორები აქაურობას-მეთქი, და ამ შეჩვენების, წყევლა-კრულვის, ანათემაზე გადაცემის შემდეგ, ქვეყნად ყველაზე მტრული მდუმარება რომ ჩამოვარდა, ყოველგვარი გამოსალმების, მოკითხვისა და თავაზიანი სიტყვების გაცვლა-გამოცვლის გარეშე მოვახსნით ზურგზე ჩვენს ერთგულ პირუტყვებს, დეზები ვკარით და ელვის სისწრაფით გავქროლდით. და ჩვენ ზურგსუკან გველივით იკლაკნება ველურივით უკარება, მოუთვინიერებელი, მოუხელთებელი, დაუურვებელი, მიუდგომელი, პირქუში, მჭმუნვარე, დაღვრემილი, თითქოსდა მგლოვიარე ხეობა, იქედნურად ქირქილებენ ფერმიმქრალი, თითქოსდა მიტკალივით გაფითრებული სახლები, და კაშკაშებს, ციალებს, თვალისმომჭრელ სხივებს სტყორცნის არემარეს სრულქმნილი, მარადიული, შეუბღალავი, საუკუნო და წარუვალი დიდება იმ შარავანდედმოსილი, არაამქვეყნიური სინათლივით, დიადი, ამაღლებული მშვენიერებითა და სიტურფით შემოსილი თოვლისა; ჯერ კიდევ ვერ შეძლო ძეხორციელმა ამ მოელვარე, სპეტაკი სითეთრით შესუდრულ მწვერვალთა დაპყრობა.

დასასრული

ამ წიგნის წერა დავიწყე 1921 წელს, ჩაქვში, საქართველოში; დავამთავრე 1922 წელს, ჟუან-ლე-პენში, საფრანგეთში.

მთარგმნელი ნიკა გელოვანი,
რედაქტორი ნინო ბექიშვილი.

სტატია ითარგმნა შემდეგი გამოცემის მიხედვით:
*Odette Keun, Au Pays de la Toison D'or, En Géorgie Menchéviste
Indépendante, Ernest Flammarion, Editeur, Paris, 1923 (PP: 1-97, 272-285)*

